


Tũpa Ñehengagüer



New Testament in Guarayu (BL:gyr:Guarayu)

Tũpa Ñehengagüer

New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022
c27c2d97-c359-59f5-b367-83efb2e33739

Contents

SAN MATEO	1
SAN MARCOS	61
SAN LUCAS	98
SAN JUAN	164
LOS HECHOS	210
ROMANOS	269
1 CORINTIOS	295
2 CORINTIOS	322
GALATAS	338
EFESIOS	347
FILIPENSES	355
COLOSENSES	361
1 TESALONICENSES	367
2 TESALONICENSES	372
1 TIMOTEO	375
2 TIMOTEO	382
TITO	387
FILEMÓN	390
HEBREOS	392
SANTIAGO	411
1 SAN PEDRO	418
2 SAN PEDRO	425
1 SAN JUAN	429
2 SAN JUAN	435
3 SAN JUAN	436
SAN JUDAS	437
APOCALIPSIS	439

MATEO REMBICUACHIA JESUS RECOUER RESENDAR SAN MATEO

Ava eta oyesu vahe Jesucristo yesu renondeve

¹ Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

² Abraham rahir Isaac, Isaac rahir evocoiyase Jacob, ipare Jacob rahir ahe Judá ambuae tiqehir, tivireta reseve.

³ Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoiyase Aram.

⁴ Aram rahir Aminadab, Aminadab rahir Naasón, Naasón rahir evocoiyase Salmón,

⁵ Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí,

⁶ Isaí rahir mborerecuar guasu David, David rahir evocoiyase Salomón, Urías rembirecocuer pipe oyesu vahe.

⁷ Salomón rahir Roboam, Roboam rahir Abías, Abías rahir Asa.

⁸ Asa rahir Josafat, Josafat rahir Joram, Joram rahir evocoiyase Uzías.

⁹ Uzías rahir Jotam, Jotam rahir Acáz, Acáz rahir ahe Ezequías.

¹⁰ Ezequías rahir Manasés, Manasés rahir Amón, Amón rahir evocoiyase Josías.

¹¹ Josías rahir Jeconías tivireta reseve, Babilonia ve mbiguai yuvirecoi vahecuer.

¹² Mbiguai yuvirecoire Jeconías omboyesu Salatiel, Salatiel rahir ahe Zorobabel.

¹³ Zorobabel rahir Abiud, Abiud rahir ahe Eliaquim, Eliaquim rahir evocoiyase Azor.

¹⁴ Azor rahir Sadoc, Sadoc rahir ahe Aquim, Aquim rahir evocoiyase Eliud.

¹⁵ Eliud rahir Eleazar, Eleazar rahir ahe Matán, Matán rahir evocoiyase Jacob.

¹⁶ Jacob rahir José, María mer, María evocoiyase Jesús si secoi. Ahe imembri Tüpa Rembiporavo Poropisirosar.

¹⁷ Evocoiyase Abraham yesusa sui tupri oyepota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai sereco agüer pipe Babilonia ve; ahe omomba avei catorce yesu yoapi agüer. Mbiguai ava serecosa sui oyepota araviter Poropisirosar haragüer rupi, ahe omomba iri avei ambuae catorce yesu yoapi agüer.

Jesucristo yesu agüer

¹⁸ Na ehi Jesucristo oyesu aracahe. María, ichi, ahe omenda pota vahe José rese. Oyese yuvirecoiêhi viteseve rumo, Espíritu Santo pīratasa pipe imembi.

¹⁹ Evocoiyase José, imevi, ahe ava seco catupri vahe, “Tapoiño ayase ava icuaêhisa pipe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa pipe.

²⁰ Aipo ophiñañemoñeta reseve oque. Iquerve rumo, Tüpa rembiguai oyemboyecua chupe aipo ehi: “José, David suindar, eresiqüiyei rene María rese nde menda água. Esepia, Espíritu Santo sui ou imembrã.

21 María virecose omembri, pemondora sererguã Jesús. Esepia, ahe oipĩsirora omu judío eta yangaipa sui” ehi.

22 Co rupi opa yaviye yande Yar remimombehugüer aipo ehi vahecuer ñehe mombehúsar aracahe:

23 “Cuña ndaseco marai vahe imembira.

Ahe imembri rer-ra Emanuel” ehi

(Tüpa yande rese ité secoi’ oya aipo ehi).

24 Omahese José, Tüpa rembiguai oyeupe ñehe agüer omboyeroya ité. Ichui omenda María rese cute.

25 Ndoypo vitei eté rumo mbahe oyese yuvireco. Yipindar imembira rane ité, ahese José omondo Jesús sererguã.

2

Ava yasitata rese oyembohe vahe ari sêsa cotindar yuviraso pītani repia

1 Herodes mborerecuar guasu recose, Jesús oha Judea ivi rupi tecua Belén ve. Coiye yugüeru ava yasitata rese oyembohe vahe ari sêsa coti sui Jerusalén ve.

2 Ahe oporandu Herodes upe yuvireco aipo ehi:

—¿Que vo aipo oha judío recuar guasu? Esepia niha, caharu coti yasitata orosepia. Sesé oroyu ari sêsa coti sui imboetei água —ehi yuvireco chupe.

3 Aipo ihese, mborerecuar Herodes oyembosiquiye tēi, ava Jerusalén pendar avei ěgüe ehi pãve yuvireco.

4 Iyavei cūrteimi opa omonuha uca pahi rerecuareta, Moisés porocuita rese oporombohe vahe avei. Ipare oporandu chupe:

—¿Que vo aipo ohara Poropĩsirosar? —ehi.

5 Ahe omboyeví yuvireco chupe:

—Ahe ohara Judea rupi Belén ve —ehi—. Esepia, Tüpa ñehe mombehúsar Miqueas rembicuachiagüer pīpe aipo ehi:

6 ‘Pe, tecua mini Belén pīpendar, ndahei ivi coti tēi vahe ambuae tecua Judá pīpendar sui peico.

Esepia, pe sui osēra mborerecuar che recua iguar Israel yocuai água’ ehi —ehi yuvireco Herodes upe.

7 Aipo hese, Herodes oñehe ñemi ava yasitata rese oyembohe vahe upe ‘toicua eme ava yuvireco’ oyapave oporandu: “¿Mbahe yasi pīpe ité vo pesepia ramo aipó yasitata?” ehi.

8 Oyeupe mombehu pare, omondopa Belén ve aipo ehi chupe:

—Peso evocoiyase, pēseca pītani. Acoi peyosuse, co rupi avei peyevi cheu icua uca água. Che avei evocoiyase tasomi imboetei —ehi angahu chupe.

9 Aipo oyeupe he pare, yasitata rese oyembohe vahe osiriño voi yuviraso. Ahe pīpeve yasitata oyemboyecua iri senonera. Ichui pītani recosa rese tupri tecua Belén ve opita yasitata.

10 Sepiase, ovihareté yuvireco.

11 Ipare yuviroique oí pīpe, osepia pītani ichi María reseve yuvireco. Ichui oñenopiha sovai imboeteisa pīpe. Ipare opōhe ombahe riru pīpe yuvireco oicuvēhe vaherã oporerecosa sepĩrusu vahe oro, itaisi, ambuae mbahe siacua vahe mirra serer vahe avei.

12 Yuviroyevise güecuave yuviraso, ndoyuviroyeví iri Jerusalén rupi mborerecuar Herodes upe imombehu. Esepia, Tüpa aipo omombehu iquerve chupe ambuae perĩ rupi iyeví água.

Jesús pītani seroñemisa Egipto ve

13 Aipo ava yepēpi pare, José upe oyemboyecua Tūpa rembiguai iquerve, aipo ehi chupe: “Eñarapuha, eroñemi pītani ichi reseve eraso Egipto ve. Aheve erepitara acoi che amombehuse voi nde yevī āgua. Esepia, mborerecuar Herodes osecara pītani yuca āgua oico” ehi chupe.

14 Ahe pītu pipeve voi José vīraso pītani ichi reseve Egipto ve.

15 Aheve yuvirecoi co mborerecuar Herodes mano rāro. Co rupi imboavīyesa Tūpa ñehe mombehugar remimombehugūer: “Egipto sui anose che Rahir” ehi vahe.

Herodes oyuca uca chīhivahe eta

16 Mborerecuar Herodes rumo oñemoiró iteanga yasitata rese oyembohe vahe ombopa tēisa rese. Sese, “Toyuvīraso sundao tecua Belén ve, toyucapa chīhivahe cuimbahemi yuvireco opacatu ñuvirio aravīter ovireco vahe, chīhivahemi catu vahe avei, ahe tecua ivirindar pipe avei no” ehi. Esepia, omoñetase yasitata rese oyembohe vahe yuvireco, oicua ahe aravīter opa cūritei.

17 Ēgūe ehi yavīye Tūpa ñehe mombehugar Jeremías remimombehugūer aipo ehi vahe:

18 “Oyeendu ava Ramá ve.

Ahe Raquel oyaseho ité omembireta manose; ndoyemboviha catui eté ipipe” ehi.

19 Mborerecuar Herodes manore, Egipto ve José upe oñehe iri Tūpa rembiguai iquerve aipo ehi:

20 “Eñarapuha, eroyevī pītani ichi reseve Israel recuave. Esepia, opa omano pītani yuca potasar yuvireco” ehi.

21 Aipo oyeupe hese, oñarapuha, vīroyevī pītani ichi reseve Israel recuave.

22-23 Peri rupi oyanduse rumo Arquelao vu recoyar mborerecuar chinise, ahese oyembosiquiye aheve oso āgua. Coiyemi tēi iquerve Tūpa, “Peso Galilea ivi rese” ehi chupe. Ichui yuvīraso tecua Nazaret ve. Aheve opīta yuvireco cute. Ēgūe ehi yavīye Tūpa ñehe mombehugar remimombehugūer: “Nazaret pendar” ehira serecosa” ehi vahe.

3

Juan Oporoāpiramo vahe ivi iporupirēhisa rupi secoi

1 Ipare Juan Oporoāpiramo vahe Tūpa recocuer rese oñehe oico Judea ivi rupi ava yemboerecuaēhisave

2 aipo ehi: “iPemoasi pe angaipa; peyevī Tūpa upe! Esepia, co Tūpa mborerecuasa cōimi secoi yandeu” ehi.

3 Co Juan rese niha oñehe yipive Tūpa ñehe mombehugar Isaías aipo ehi güembicuachiagūer pipe:

“Oyeendu ñehesa ava yemboerecuaēhisave:

‘Pemoingatu yande Yar raperā; pemohivi tupri avei’ ehi aracahe.

4 Juan turucuar ahese camello ragūer apopri, sumbicuasa mbahe pīrer, sembihu evocoyase tucru, eiri caha pipendar avei.

5 Opacatu ava Jerusalén pendar, Judea rupindar tecua, iai Jordán rerovica pendar avei yuvīraso ñehe rendu

6 oangaipagūer mombehu āgua. Ahese Juan oñapiramo iai Jordán pipe.

7 Yugūero atise rumo fariseo iyavei saduceo oñeapiramo uca āgua, Juan aipo ehi ahe ava upe: “iPe mboi mboetasa tēi peico! ¿Ava vo, ‘Pesera Tūpa ñemoirosa ou vahe sui’ ehi tupri tēi pēu?”

8 Yipindar toyecua tupri rane Tūpa upe pe yevisa pe angaipa mboasisa pipe.

⁹ Iyavei ndapeyeroyai chira ‘ore Abraham suindar oroico’ pe hesa rese tēi pe ñepisiro āgua. Esepia, Tūpa oicatuño ité co ita sui Abraham suindar nungar tupri apo āgua oyeupe nara yepi.

¹⁰ Hacha niha imoingatusa voi eté opacatu ivira ndihai vahe sapo rupi yasia āgua. Ichui yasia pare imondosa tatave.

¹¹ Che i pipe tēi opoāpiramo Tūpa upe pe yevi āgua. Oura rumo ambuae che raquicuei, ahe pe āpiramora Espiritu Santo tata nungar pipe. Ahe seco pīrata catu vahe secoi che sui. Sese cheu ndiyai eté ahe ipitaquisā yora āgua ichui.

¹² Ahe oipehara mbahe rāhii ihigüer sui. Sāhii evocoyase oyapocatura, ihigüer rumo omondora tata apirēhi vahesave” ehi.

Jesús āpiramosa

¹³ Ipare Jesús oso Galilea sui iai Jordán ve Juan recosave ‘tache āpiramo’ oya.

¹⁴ Yipindar rumo Juan ndoipotai eté, aipo ehiño chupe:

—Nde rumo iya ité che āpiramora eve viña, ¿nde rumo ereyu che nde āpiramo āgua? —ehi.

¹⁵ —Ēgüe tehiño aipo. Iyacatu yayapora Tūpa porocuita —ehi Juan upe.

Evocoyase Juan, “Aviye” ehi chupe.

¹⁶ Oāpiramo pare, osē ive sui. Ahe pipeve voi iva oyemboi tupri, aheseve avei osepia Tūpa Espiritu ogüeyise ou iharive apicasu nungar.

¹⁷ Iyavei oyeendu ñehesa iva suindar aipo ehi vahe: “Co che Rahir, che rembiaisu. Sese aviharete vichico” ehi.

4

Jesús recoāhasa

¹ Ipare Tūpa Espiritu viraso Jesús ava yemboerecuaēhisave ‘tosecoāha Carugar’ ohesa pipe.

² Aheve cuarenta ari, cuarenta pītu ndocarui. Sese ndasiepoi eté oico.

³ Evocoyase oyemboya Carugar sese secoāha āgua, aipo ehi chupe:

—Tūpa Rahir ité nde recose, co ita sui eyapo pan cūrítei —ehi.

⁴ Jesús rumo omboyevi chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Ēgüe ehi rumo opacatu Tūpa Ñehengagüer reroya pipe ava yuvirecovera yepi’ ehi —ehiño chupe.

⁵ Ichui Carugar viraso Jesús Jerusalén maranehi pipendar tūparo torre apiterve.

⁶ Aheve aipo ehi chupe:

—Tūpa Rahir ité nde recose, eviapi cohava sui. Esepia niha, icuachiapri pipe:

‘Tūpa oyocuaiira güembigui eta nde rāro āgua.

Ahe nde mopuhara yuvireco que ñepeí ita nde momara rāgüer sui’ ehi —ehi Carugar chupe.

⁷ Evocoyase omboyevi Carugar upe:

—Icuachiapri pipe rumo aipo ehi avei no: ‘Ndereseoāhai chira nde Yar Tūpa’ ehi —ehi chupe.

⁸ Ipare Carugar viraso iri ivitri ivate vahe apiterve secoāha āgua. Aheve aipo opacatu ivi pipendar, tecua guasu pipendar mbahe porañete vahe yemboivate aisa omboyecua chupe,

⁹ aipo ehi:

—Che rovai ereñenopihase che mboeteisave, co opacatu mbahe nde rembiepia amondora nde mahera —ehi Caruguar chupe.

¹⁰ Aipo oyeupe hese:

—Eyepepi che sui cūritei, Caruguar —ehi—. Esepia, icuachiapri: ‘Emboetei nde Yar Tūpa, ahe güeraño tupri avei eremboyeroyara’ ehi —ehi Caruguar upe.

¹¹ Ahese Caruguar oyepepi ichui. Ipare Tūpa rembiguai yuvirogüeyi Jesús rese hañeco āgua yuvireco.

Jesús omboipi oporombohe Galilea rupi

¹² Jesús oyanduse Juan roquendasa, oso Galilea ivi rese Nazaret ve.

¹³ Ndopitai rumo aheve. Osoño Capernaum ve, aheve opita. Ahe tecua ipa Galilea ivii, ivi Zabulón iyavei Neftalí rupi avei.

¹⁴ Na ehi yaviye Tūpa ñehe mombehugar Isaías rembicuachiagüer aipo ehi vahe aracahe:

¹⁵ “Co ava ivi Zabulón pendar, Neftalí pendar, para guasu ivirindar, iai Jordán rovaingar iyavei Galilea pipendar ndahei vahe judío,

¹⁶ ahe aviye pītumimbisave yuvirecoi vahe, osepia ramo vahe tesapasa yuvireco; iyavei mano rāgüer pipe yuvirecoi vahe upe avei aviye oyecua ramo vahe tesapasa” ehi.

¹⁷ Ahe ari suive Jesús omombehu Tūpa recocuer ava upe: “Pemboasi pe angaipa; peyevi Tūpa upe. Esepia, cōimi eté Tūpa mborerecuasa secoi” ehi.

Jesús, “Perio che rupi” ehi irungatu pira mbohasar upe

¹⁸ Coiye ipa Galilea ivii oguatase, Jesús osepia mbia Simón Pedro serer vahe tivri Andrés reseve. Ahe pira omboha yuvireco.

¹⁹ Evocoiyase:

—Pe pira recasar peico. Perio che rupi. Na peye aveira ava reca āgua cheu nara —ehi chupe.

²⁰ Aipo he ramoseve, opoi opira mbohasa sui yuvireco, yuviraso supi.

²¹ Coi coti catu aipo Jesús osepia ambuae mbia Santiago tivri Juan reseve, ahe oguapi yuvinoi carite pipe oyesupa Zebedeo piri; omoingatu opira mbohasa yuvinoi.

²² “Perio che rupi” he ramoseve, opaño oporaviquisa sui opoi yuvireco, oseyaño oyesupa, yuviraso supi.

Jesús ombohe ava rehi

²³ Jesús evocoiyase oguata opacatu Galilea ivi rupi, judío tūparo yacatu rupi oporombohe oico. Aheve ñehesa aviye vahe omombehu Tūpa mborerecuasa resendar. Oporombogüera avei opacatu-catu tēi mbaherasisa ava vireco vahe sui.

²⁴ Oyepotase rumo serācua opacatu Siria ivi rupindar upe, ahese güeru opacatu iparaisu vahe yuvireco chupe: imbaheasi vahe, caruguar vireco vahe, que nañaca pōrai vahe iyavei ndoguatai vahe. Ahe opa tupri ombogüera.

²⁵ Ēgüe ehi ava rehi oguata yuvireco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, iai Jordán rovaingar avei no.

1 Ñepei ari pipe, ava rehi repiase, Jesús oyeupi ivitri rese. Aheve oguapi oĩ. Aheve semimbohe oyemboya yuvireco sese.

2 Ichui omboipi imbohe aipo ehi:

3 “Sorivete catura acoi ava oicuae mbahe ipane vahe Tūpa rese ité güeco tupri āgua. Esepia niha, chupe nara ité Tūpa mborerecuasa.

4 “Sorivete catura acoi ava oyaseho vahe oviharēhisa pipe. Esepia niha, Tūpa omboura viharetesa chupe coipe.

5 “Sorivete catura ndaseco asimi vahe. Esepia, ahe chupe imondosara co ivi imahera curi.

6 “Sorivete catura ava oipota vahe teco catupriša Tūpa suindar. Esepia, chupe ité ahe imondosara.

7 “Sorivete catura acoi ava oporoparisuereco vahe. Esepia, ahe Tūpa oiparisuerecota.

8 “Sorivete catura acoi ava ipihañemoñeta tupri vahe. Esepia niha, ahe osepiara Tūpa yuvireco curi.

9 “Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tūpa.

10 “Sorivete catura acoi ava seco catupri rese imombaraisupri. Esepia, ahe chupe nara Tūpa mborerecuasa.

11 “Perorivete catura pe acoi ava iñehe-ñehe tēise pēu, iyavei pe mombaraisuse, acoi oyapo-yapo tēise güemira-mira tēi pipe mbahe pe rese che recocuer sui tēi yuvireco.

12 Pe rumo peyembovihanora. Esepia, ivave tuvichá vahe porerecosa peipisira curi. Ēgüe ehi avei niha yipindar evocoi ava ramoi Tūpa ñehe mombehusareta mombaraisu yuvireco aracahe” ehi.

Jesús reroyasar aviye yucri iyavei tesapesa yuvirecoi ava upe

13 “Co ivi pipe pe aviye yucri peico opacatu ava upe. Yucri rumo nasehe irise, ndayaicatui imoehe iri āgua, ndiporusai chietera; imombopasara ava pirunga āgua yuvireco.

14 “Iyavei pe tesapesa nungar peico opacatu ava upe co ivi pipe inungar que tecua guasu yapopri ivitri rese. Ahe ndayaicatui ñomi āgua.

15 Iyavei ndayamoendii chira tataendi mbahevrive tēi. Iyacatu rumo yasupi ivate sendave opacatu oi pipendar ava resape āgua.

16 Pe ēgüe peye aveira pemboyecua ava eta upe pe recocuer aviye vahe. Ipipe sui tomoetei yande Ru Tūpa iva pendar yuvireco” ehi ava rehi upe.

Jesús oporombohe Moisés porocuita rese

17 “Aní chira, ‘Co mbia revo oporombohe Tūpa ñehe mombehusar rembicuachía mboyeroyaēhi āgua iyavei Moisés porocuita cuachiapri mboyeroyaēhi āgua avei no’ peye tēi cheu. Ēgüe ehi rumo che ayu imboaviye āgua.

18 Supi eté co iva, ivi avei yandeu oime vitemiseve, ndipoi chietera que ñepei yepe Moisés porocuita, que ambuae Tūpa ñehe mombehusar rembicuachiagüer ocañi tēi vaherā; ñepei-pe porocuita imombehupri imboaviesaño itera.

19 Sese acoi ava ndoviroyai vahe que ñepei mborocuitamira viña, ombohe avei ava seroyaēhi āgua, ahe evocoyase ivi coti catu vahe aveira Tūpa mborerecuasave yuvirecoi. Acoi viroya vahe rumo Tūpa porocuita yuvireco iyavei oporombohe vahe yuvireco sese, ahe evocoyase Tūpa osecomboivate catura omborerecuasave curi.

20 Iyavei amombehu pëu: acoi pe reco ïvi tuprisa ndaheise aviye catu vahe fariseo recocuer sui iyavei ndaheise aviye catu vahe Moisés porocuita rese oporombohe vahe recocuer sui avei, ahese ndapeiquei chietera Tüpa mborerecuasave” ehi.

Jesús oporombohe ñemoiroëhi ägua rese

21 “Pe peicua acoi pe ramoi aracahendar upe aipo ehi vahe: ‘Peporoyucaí rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirã’ ehi.

22 Che rumo aipo ahe pëu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi ‘nde ëgüe ere tēi vahe eico’ ehi vahe ambuae ava upe, ahe serasosara porandu ägua mborerecuar ivate catu vahe rovai. Acoi ava rumo oñehe marase seroïrosave ambuae ava upe, ahe iyacatu imondosa ité tata guasuve.

23 “Sese Tüpa upe pe porerecosa reropovëhesave tüparo pipe pemahenduhase ava pe amotarëhimbar rese,

24 peseya rane pe porerecosa aheve; peyevi rane pe amotarëhimbar upe pëu ñero ägua rese. Acoi peñerose oyeupe, ahese voi peyevi, tapeicuavëhe pe porerecosa Tüpa upe.

25 “Iyavei peyeamotarëhise, peñero voi oyeupe peyoepiase. Anise, aviyeteramo coiyé catu tēise pe mombehu tēira pe amotarëhimbar mborerecuar upe pe reraso ägua. Ichui aviyeteramo ahe pe roquenda ucara.

26 Supi eté aipo ahe pëu: Ndapesëi chietera acoi peyemboepipase voi eté pesëra ichui” ehi.

Jesús oporombohe yemboaguasëhi ägua rese

27 “Peicua niha Moisés porocuita yipindar: ‘Peaguasai rene ambuae ava rembireco rese’ ehi vahe.

28 Che rumo aipo ahe pëu: Acoi ava omahese cuña rese ipotasa pipe, ahe inungar oyapo vahe ité mbahe sese opiha pipe yepi.

29 “Iyavei inungar que pe resa pe acato cotindar oipota rai ucasa mbahe pëu pe mboangaipa ägua tēi, iya penose ité, pemombo amombri peyesui. Aní pe mondo uca opacatu pe recocuer tata guasuve.

30 Iyavei inungar que pe po pe acato cotindar pe mboangaipa ucasa, iya peyasia ité imombo amombri peyesui. Aní pe mondo uca opacatu pe recocuer tata guasuve” ehi.

Jesús oporombohe ava mendasa sui poiëhi ägua rese

31 “Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poisa resendar mborerecuar rovai yuvireco chupe’ ehi.

32 Che rumo aipo ahe pëu: ava oposito güembireco sui, cuña ndoyaviise mbahe, ahese ombopihañemoñeta tiëtera güembireco mboaguasa uca ägua. Iyavei cuimbahe omendase cuña omenda vahecuer rese, oyemboaguasa tēi avei sese” ehi.

Jesús oporombohe Vu Tüpa rer poru tēiëhi ägua rese

33 “Iyavei peicua acoi aipo ehi vahe pe ramoi upe aracahe: ‘Pemboaviye itera pemoingatu tuprise Tüpa rer pipe mbahe pemombehu vahe yepi’ ehi.

34 Che rumo, ‘Ndapeñehei chira que mbahe rer pipe, ìva rer pipe tēi avei’ ahe pëu. Esepia, ahe niha Tüpa renda;

³⁵ ivi rer pipe tēi avei ndapeñehei chira. Esepia, ahe Tūpa pirunga; Jerusalén rer pipe avei ndapeñehei chira. Esepia, ahe niha mborerecuar ivate catu vahe recua.

³⁶ Pe āca rer pipe avei ndapeñehei chira. Esepia, ndapeicatui chira que ñepeí pe ha momorochi āgua, imou āgua avei.

³⁷ Sese niha peñehese, ñepeí reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe tēi” ehi.

Jesús oporombohe yande amotarēhisar upe mbahe tēi mboyeviēhi āgua

³⁸ “Peicura acoi Moisés porocuita aracahendar aipo ehi vahe: ‘Que ava vinose vahe ambuae ava resa ichui, ahe sesa avei senosesara. Iyavei vinose vahe sāi ichui, sāi avei senosesara’ ehi vahe.

³⁹ Che rumo aipo ahe pēu: Aní chira pemboyevi pēu mbahe tēi aposar upe. Acoi que pe amotarēhisar pe rovapetese yuvireco, ambuae coti pe rova avei pemoporēhiñora chupe.

⁴⁰ Porandusave pe rerasose pe camisa rerocua āgua yuvireco pe sui, pe saco avei pemondoñora chupe.

⁴¹ Ñepeí legua rupi evosii co mbahe rese cheu’ ehise que ava pēu, pe rumo perasoñora ñuvirío legua rupi chupe.

⁴² Iyavei oporanduse que pe mbahe rese yuvireco pēu, pemondoño avei chupe. Aní chira perecatēhi sese” ehi.

Pesaisu pe amotarēhimbar

⁴³ “Iyavei pesendu ñehesa yipindar: ‘Pesepia potai rene pe amotarēhimbar, pe mboripar güeraño pesaisu’ ehi vahe.

⁴⁴ Che rumo aipo ahe pēu: Pesaisu catu pe amotarēhimbar iyavei peyeroqui pe momara potasar rese.

⁴⁵ Evocoi nungar apo pipe pe Ru Tūpa iva pendar rahir ité peicora. Ahe niha osesape uca ari ava nāporai vahe upe, ava aviye vahe upe avei. Ombou avei amar seco catupri vahe upe, ava ndaseco pōrai vahe upe avei.

⁴⁶ Pe raisupar güeraño pesaisu catu tēise, ndapeipisii chietera porerecosa evocoi nungar sui. Esepia niha, ava guarepochi rerocuasar ndipihai vahe guaisupar tēi osaisu yuvireco yepi.

⁴⁷ Ndahei yande mboripar upe güeraño yayapora ‘avirave’. Esepia, ava ndoicuai vahe avei Tūpa oyapo ‘avirave’ omboripar upe yuvireco yepi.

⁴⁸ Sese pe recocuer perecora pe Ru Tūpa iva pendar seco catupri vahe nungar” ehi.

6

Jesús oporombohe mbahe aviye vahe apo āgua rese

¹ “Tūpa upe mbahe peyapo potase, ‘Tache repia ava yuvireco’ ndapeyei chira. Esepia, ēgüe peyese, ndapeipisii chietera pe Ru Tūpa iva pendar porerecosa.

² Evocoiyase iparaisu vahe rese peporerecose, ‘Tamombehupa ava upe vichico’ ndapeyei chira inungar ava Tūpa reroyasar angahu tēi yuvireco yepi. Tūparove iyavei ocar rupi mimbí omoñehe yuvireco ‘Co ava aviye ité yuvirecoi, tehi angahu yuvireco yandeu’ oya tēi. Supi eté aipo ahe pēu: Ēgüe ehi vahe rumo opa voi oipisi porerecosa co ivi pipe tēi yuvireco.

³ Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña.

4 Peporereco catu ava pe repiaēhisa pipe; pe Ru Tūpa niha mbahe ndoye-cuai vahe osepia. Ahe omboura porerecosa pēu opacatu ava rembiepiave curi” ehi.

Jesús oporombohe yerure āgua rese

5 “Acoi peyuruse, peicoi rene acoi ava ‘tosepia che yeruresa yuvireco’ ehi vahe nungar. Esepia, ahe opūha-pūha catu tūparo pipe oyeruqi yuvireco cupiha yacatu avei ‘tayande repia angahu ava’ ohesa pipe tēi. Supi eté che aipo ahe pēu: Ēgüe ehi vahe opa voi eté co ivi pipeve tēi oipisi porerecosa yuvireco.

6 Iyacatu rumo pe, peyeruqi potase, peiquera pe rēta pipe peyeoquendara pe ae pe yeroqui āgua pe Ru Tūpa upe. Evocoiyase pe Ru Tūpa oicua vahe mbahe pe rembiapo, iporerocora pe rese.

7 “Iyavei peyeruqi, ndapemboyevi-yevii chira pe ñehe pe poranduse mbahe rese Tūpa upe inungar ava Tūpa ndoicuai vahe. Ahe omboyevi-yevii oyeruresa ‘Tūpa revo co rupi yande mboyeroa voira’ ohesave yuvireco viña.

8 Aní chira inungar tēi peico. Esepia, pe Ru Tūpa oicua pe porandu renondeve mbahe ipane vahe pēu.

9 Sese aipo peyera peyeruqi:

‘Ore Ru Tūpa, ivave ereico vahe, imboeteipri nde rer tasecoi.

10 Tou nde mborerecuasa oreu.

Tayaposa nde remimbotar co ivi pipe, inungar ivave yaposa.

11 Embou ore rembihi ari yacatundar oreu co ari pipe.

12 Iyavei ndeñero ore angaipa rese oreu inungar ore oreñero ore amotarēhimbar upe.

13 Ore mboangaipa ucai rene eve; eipeha mbahe naporai vahe ore sui’ peyera.

14 “Esepia, pe amotarēhimbar upe peñerose, pe Ru iva pendar avei iñerora pēu;

15 ndapeñeroise rumo, ahe avei niñeroi chietera pēu” ehi.

Jesús oporombohe yecuacusa rese

16 “Acoi peyecuacuse, ndapemboyecuai chira pe viharēhisa, inungar acoi Tūpa reroyasar angahu tēi yuvireco yepi. Esepia, ahe opa oyeerecomeguapa tupri yuvireco, ‘Co oyecuacu vahe, tēhi ava yande repiasar yuvireco yandēu’ ohesa pipe tēi. Supi eté aipo ahe pēu: Ēgüe ehi vahe opa voi oipisi porerecosa ava güepia pipe tēi yuvireco.

17 Pe rumo peyecuacuse, peñeaca mondoro tuprira, peyovai tupri aveira.

18 Evocoiyase, ‘Co oyecuacu vahe’ ndehi chira ava yuvireco pēu. Pe Ru Tūpa, ndayasepai vahe, güeraño oicuaru pe yecuacusa. Ahe evocoiyase iporerocora pe rese curi” ehi.

Mbahe porañeté vahe oime ivave

19 “Ndapemonuha atii chietera mbahe pe rembiereco co ivi pipe. Esepia, ahe mbahe pe rembiereco mbahe raso omboaso ati-ati imocañipa, iyavei sãve-sãve tēi opochi ati-ati oapocatusave, imonda vahe avei evocoiyase imondañe sese pēu.

20 Iya peseca catu tecocuer aviye vahe ivave nara. Aheve niha ndipoi chira co ivi pipendar nungar pe reco mocañi āgua.

21 Esepia, pe mbahe pe rembiereco setá catu vahesa rupi-rupi pe pihañemoñeta yepi, yepera que co ivi pipe, anise que ivave avei” ehi.

Yande resa inungar tataendi yande recocuer uve

22 “Iyavei yande resa inungar tataendi yande retecuer upe. Evocoyase yande resa aviye, opacatu yande retecuer upe osesape;

23 acoi imarase rumo, opacatu yande retecuer pítumimisave tēi seci. Tesapesa oime vahe yande rese, ahe ogüese rumo yande sui, mbahe tēi eté, pítumimbi nungar opacatu yande recocuer upe” ehi.

Guarepochi pota raisa; Tūpa mboyeroyaēhisa

24 “Iyavei ndipoi chietera que ava ñuvirio güerecuar omboyeroya vahe. Esepia, ñepeí oyamotarēhira imboyeroya potaēhisa pipe, ambuae evocoyase osaisu catura imboyeroysa pipe. Ēgüe peye avei, ndapeicatuí Tūpa mboyeroya guarepochi pota raisa pipe” ehi.

Tūpa osāro guahireta

25 “Iyavei ndapeyemomahenduha guasu ai chira mbahe pe remihura rese pe recove āgua, pe ihu āgua rese, pe turucuarā rese tēi avei no. Esepia, yande recovesa aviye catu vahe tembihu sui, yande retecuer avei aviye catu turucuar sui no.

26 Pesepia vīrai eta oveve vahe: nomahetií vahe, nomonuhai avei, ndoyapocatuí avei mbahe yuvireco. Pe Ru Tūpa iva pendar ité niha omoime mbahe itohu. ¡Pe rumo ivate catu vahe ité peico vīrai sui!

27 Ndipoi que ñepeí pe pāhu pendar oicatu vahe opihañemoñetasa pipe tēi güecocuer mōpucu iri āgua.

28 “Ndahei chira pe turucuarā rese tēi peyemomahenduha guasu ai. Pemahecua ru mbahe potri caha pipendar rese: ndoporaviquií eté iyavei ndoipiai oturucuarā.

29 Iyavei yepe mborerecuar guasu Salomón vireco setá ombahe iporañete vahe aracahe viña, iturucuar catupri güer rumo ndahoyoyai mbahe potri catupri güer rese.

30 Tūpa niha omboporañete raimi tēi mbahe potri caha pipendar, moviro ari tēi yasepia, ichui sapisapaño horno pipe. ¡Ahe rumo omondo catura turucuar pēu, pe ava nimbahe reroya tupri vahe!

31 Sese, ‘¿Mbahe pīha yahura, yaíhura?’ Iyavei, ¿mbahe pīha yamondera?’ ndapeyi chira pe yemomahenduha guasu aisa pipe.

32 Ava Tūpa reroyasārēhi aipo nungar reseño tēi ipihañemoñeta yuvireco yepi. Pe Ru Tūpa iva pendar rumo oicua ité pēu mbahe ipane vahe.

33 Pemahenduha rane Tūpa rese pe recocuer tupri pipe ipovrive mbahe pe yapo āgua semimbotar rupi, ahese omboura opacatu co mbahe ipane vahe pēu.

34 Peyemomahenduha guasa ai eme mbahe peyapo vaheṛā rese. Iyacatu rumo ahe ari oyepotase voi, peyemomahenduhara sese. Esepia, ari yacatu rupi oime mbahe pemoingatu vaheṛā yepi.

7

Aní, “Oyavi mbahe” peye voi ambuae upe

1 “Ndiyai, ‘Oyavi ité mbahe’ peye voiño tēi ambuae ava upe; evocoyase Tūpa, ‘Oyavi mbahe’ ndehi chira pēu.

2 Esepia, inungar pe ambuae ava upe peico, ēgüe ehi aveira niha Tūpa pēu.

3 ¡Mahera ambuae ava rembiavimi rese tēi pemahe! ¡Iya rumo peyese rane mbahe tuvichá catu vahe pesepia!

4 Ndiyai pēu, ‘Che toropitivií mbahe nde rembiavi rese’ peye vaheṛā chupe. Esepia, ¡pe peyavi guasu catu mbahe ichui!

⁵ ¡Pe Tūpa roroyasar angahu tēi peico vahe! Penose uca rane mbahe pe rembiavi tuvichá catu vahe peyesui, ahese ramo ambuae ava rembiavi tahimi vahe moingatu peicatura.

⁶ “Pemondo eme mbahe maranehi ava cave nungar tēi upe, iyavei ndape-mondo chira mbahe porañete vahe ava cuchi nungar tēi upe. Aviyeteramo oyemboyerera mbahe-mbahe tēi apo yuvireco pēu” ehi.

Peporandu Tūpa upe pēu mbahe ipane vahe rese

⁷ “Peporandu mbahe rese Tūpa upe, ahese omboura pēu; peseca ahe mbahe, ahese peyosura; inungar pemōta oquenda, ēgüe peyera pe yeroquisa pipe Tūpa upe, ahese imbousara pe porandusa pēu.

⁸ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeroquisa pipe omota vahe oquenda Tūpa upe, chupe imboisara.

⁹ “Ndipoi eté revo que ñepepe pe pāhu pendar omondo vaherā ita tēi guahir upe pan rese oyeupe poranduse.

¹⁰ Que pira rese oyeupe poranduse revo, ndomondo chiaveira mboi tēi chupe.

¹¹ Yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru ¡va pendar oipota catu mbahe aviye vahe mondo āgua acoi ava mbahe rese oporandu vahe upe!

¹² “Acoi mbahe peipota vahe ambuae ava oyapo vaherā pēu, ahe tupri avei peyapora chupe. Ahe niha Moisés porocuaíta iyavei Tūpa ñehe mombehusareta porombohesa” ehi.

Oime perī icāhimi vahe ava recocuer upe nara

¹³ “Peique oquendipi icāhimi vahe rupi. Esepia, oquendipi guasu iyavei perī guasu cañi tēisave oso vahe. Ahe supi setá catu ava yuviraso;

¹⁴ teco apirēhisave oso vahe rumo oquendipi, perī reseve icāhimi. Supi guata āgua yavai eté; moviromi tēi ava oseca yuvireco” ehi.

¡vira aviye vahe icuasa iha rese

¹⁵ “Coiye yugüerura ava Tūpa Ñehengagüer mombehusar angahu tēi pe pāhuve. Ahe ndoyavii chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evocoi nungar sui.

¹⁶ Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ¡vira sāchi ati vahe sui.

¹⁷ Evocoyase ¡vira aviye vahe, iha aviye avei; ¡vira naporai vahe, iha naporai avei no.

¹⁸ Esepia, ¡vira aviye vahe ndovirecoi oha naporai vahe, iyavei ¡vira naporai vahe ndovirecoi oha aviye vahe.

¹⁹ Sese opacatu ¡vira iha naporai vahe yasiasa yepi. Ichui imondosapa tatave.

²⁰ Na peyera ava recocuer cua sembiapo rese” ehi.

Ndahei chira opacatu ava yuviroique Tūpa mborerecuasave

²¹ “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru ¡va pendar remimbotar apovar año tupri rumo yuviroiquera aheve.

²² Ari cañi pipe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo caruguar ava sui nde rer pipe, setá poromondiisa oroyapo’ ehi tēira yuvireco cheu.

²³ Che rumo, “¡Aní, ndopocuai! ¡Pe mbahe tēi peico vahe, peyepēi che sui!” aheñora aipo nungar upe” ehi.

Ñuvirío oi apopri

²⁴ “Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güetarã.

²⁵ Yepe ahe oi upe oyepota tēi ivitu ai, amarusu reseve, ichui oyeapo tēi avei iai chupe, oi rumo ndoviapi eté. Esepia, ita harive ité yaposa.

²⁶ Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriēhisa pipe omopuha vahe ivi cuhi harive tēi güetarã.

²⁷ Ipare rumo oyepotase ivitu ai amarusu reseve chupe, ndaracaheimi ahe oi omondurupa” ehi Jesús ava rehii upe.

²⁸ Iñehe renduse ava rehii, “¿Mara ehi rutei?” ehi tēi yuvireco chupe.

²⁹ Esepia, ndahei Moisés porocuita rese oporombohe vahe nungar; ahe rumo oporombohe güeco pīratasa pipe.

8

Jesús ombogüera ava lepra vireco vahe

¹ Ivitri sui ogüeyise Jesús, ava rehii avei yuvirecoi supi.

² Ahese ava lepra vireco vahe ou, oñenopiha sovai aipo ehi chupe:

—Che Yar, ereipotase, che mbogüerami eve co mbaherasi sui —ehi.

³ Aipo ihese, Jesús opoco sese aipo ehi:

—Taa, aipota. ¡Ecuera cūrítei! —ehi.

Aipo ihe ramoseve, ocuera voi eté.

⁴ —Nde cuerasa eremombehu eme ambuae ava upe —ehi—. Nde poyavaño eso, eyemboyecua judío pahi upe. Ipare eicuvēhe nde porerecosa nde cuera agüer resendar Moisés porocuita rupi. Ipipe sui toicua ava nde cuerasa yuvireco —ehi.

Jesús ombogüera sundao rereciar remimboacua

⁵ Ipare Jesús oguataño, ēgüe ehi tecua Capernaum ve oyepota oso. Aheve oime sundao rereciar Roma iguar. Ahe ou chupe

⁶ aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tēi ombaheasisa ou —ehi.

⁷ —Aviye, cūrítei evocoyase asora imbogüera —ehi.

⁸ —Aní, che Yar, ndiyai eté che rēta pipe nde reique āgua; iyacatu niha cohapeve ereñeheño tēi icuera āgua. Evocoyase nde ñehe pipe tēi che remimboacua ocuerara.

⁹ Esepia, che niha serecua vahe avei no, areco avei sundao che voya. Ahe chupe, “Eso peve” ahese, cūrítei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

¹⁰ “¡Too!” ehi Jesús aipo oyeupe hese. Ichui aipo ehi oyeupindar ava rehii upe:

—Yepe ahe ndahei vahe judío viña, opacatu Israel recua pipendar rumo ndasepiái eté ava imbahe reroya vahe yuvireco yepi co ava nungar.

¹¹ Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rereciar. Iyavei opacatu ava ivi rupindar oguapira yuvireco Tupa mborecguasave Abraham, Isaac iyavei Jacob piri coiye.

12 Judío eta rumo, oyeupe ñehesa reroyaëhi pipe setá p̄itumimbisave ocañi t̄eira yuvireco. Aheve oyaseho t̄eira yuvireco iyavei oñeaimbotere-tere t̄eira mbaherasicuer rereco yuvireco —ehi oñehe.

13 Evocoyase sundao rerecuar upe aipo ehi:

—Eso, nde mbahe reroya pipe yaposa nde remimbotar ndeu —ehi.

Ahe pipeve semimboacua ocuera tupri ité.

Jesús ombogüera Pedro rembireco si

14 Ipare Jesús oso Pedro r̄etave. Aheve osepia Pedro rembireco si sohi iteangase vupave ou.

15 Opocose ipo rese, ahe ramoseve sohi op̄ituhu ichui. Ocuerare, oñarapuha ava rese ohañeco ãgua.

Jesús ombogüera setá ava imbaheasi vahe

16 Ipare p̄itu ramose setá carugar vireco vahe ogüeru yuvireco chupe. Jesús rumo ñepeí reseve oñehe pipe t̄ei omombopa carugar ava rehi sui, iyavei opacatu imbaheasi vahe ombogüera avei no.

17 Ëgüe ehi omboaviye Tüpa ñehe mombehúsar Isaías rembicuachigüer aipo ehi vahe aracahe: “Ahe ae v̄irocua opacatu yande mbaherasisa yande sui iyavei oiporara opacatu mbahe tasi vahe yande rese” ehi.

Oguata pota t̄ei vahe ava Jesús rupi yuvireco

18 Jesús osepiase ava rehi oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so ãgua” ehi.

19 Ahese Moisés porocuaite rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi —ehi.

20 Jesús rumo aipo ehi imboyeví chupe:

—Yavaira rumo ndeu. Esepia, v̄irai vireco guaiti, iyavei aguara vireco oquesa; che rumo, Ava Riquehir, ndarecoi que che r̄eta ité che p̄ituhu ãgua yepi —ehi.

21 Ipare ñepeí ivoya aipo ehi chupe:

—Che Yar, che ru manore voi che nde rupiño ité aicora —ehi.

22 —Aní, cūritei voi eyu che rupi —ehi—. Ëgüe tehiño ava secocuer omano vahe nungar, ahe ae toñeñeti yuvireco —ehi chupe.

Jesús omombituhu ivitu ai, ohitu vahe avei

23 Ipare Jesús yuviroha güemimbohe reseve yuviraso carite pipe.

24 Ipa pipe yuviraso pucu ramoseve Jesús oque ou. Ahese avieteramo t̄ei ivitu ai op̄uha ipa pipe; i ohitu vahe ndiguaȳi eté, seni-seni carite oyopi.

25 Evocoyase semimbohe yuviraso voi imomahe:

—¡Ore Yar, yande rerasora mo co carite ipive! ¡Yande p̄isiro eve! —ehi yuvireco chupe.

26 Evocoyase aipo ehi:

—¡Mahera pesiquiye! ¡Ndapeyeroyai eté che rese! —ehi güemimbohe upe.

Ahe oñarapuha aipo ehi itu guasu upe, ivitu ai upe avei no: “Pep̄ituhupa” ehi. Aheseve voi opa tupri op̄ituhu yuvireco.

27 —¿Mara ehi rutei p̄iha co? —ehi t̄ei semimbohe yuvireco chupe—. ¿Mara ehi vahe p̄iha co ava secoi?

Esepia niha, ivitu, para guasu avei omboyeroya yuvireco no —ehi.

Jesús omboyepepipa carugar Gadara pendar sui

²⁸ Jesús oguataño güemimbohe eta reseve oyepota ipa rovai Gadara ivi rese yuviraso. Aheve ñuvirío ava carugar vireco vahe yugüeru sovaichi. Ahe ava tehögüer ruvipa rupi tēi yuvirecoi vahe, iyavei ndiporomboetei vahe yuvireco. Ichui osiquiyepave ava ndoguata potai ahe peri rupi yuvireco yepi.

²⁹ Jesús repia ramoseve rumo, oñhe pīrata yuvireco chupe aipo ehi:

—¡Jesús, Tūpa Rahir, eyepēpi ore sui! Esepia niha, ndoyepota vitei ari nde ore mombaraisu āgua oreu —ehi tēi yuvireco.

³⁰ Namombrīimi cuchi rehi yuvirecoi ichui.

³¹ Carugar evocoyase aipo ehi yuvireco chupe:

—Ore mombopaño tēi eve evocoi cuchi rese —ehi.

³² —Aviye, peso —ehi carugareta upe.

Aipo hese, carugar opa yuvinose ava sui, yuviroique cuchi rehi aviterve. Ipare rumo cuchi ndayaracua iri yuvireco; ivi socuer rupi yuvinoña yuviraso, opa ipa pipe ocañi tēi yuvireco.

³³ Yuvinoña evocoyase cuchi rārosar tecuave yuviraso opacatu mbahe güembiepia mombehu ava upe yuvireco.

³⁴ Ichui opacatu ava tecua pendar yuvinose ati Jesús upe, “¡Eso cohava sui!” ehi yuvireco chupe.

9

Jesús ombogüera ava ndoguatai vahe

¹ Ipare Jesús oha carite pipe osasa iri ipa rovai oso güecua Capernaum ve.

² Aheve, ava ndoguatai vahe omboyovai seraso imbaheasi vahe riru pipe yuvireco chupe. Ahe oicuase co ava yuvirecoi vahe oyese yeroya, aipo ehi imbaheasi vahe upe:

—Che rahir, eyemopoase, che ñero nde angaipa rese ndeu —ehi.

³ “¡Co mbia oyemboivate ai tēi vahe, Tūpa ñhehe nungar pipe tēi oñhehe!” ehi Moisés porocuaita rese oporombohe vahe yuvireco chupe.

⁴ Jesús rumo oicua ipihañemoñetas, sese aipo ehi chupe:

—¡Mahera pepihañemoñeta rai pe yapisacasa rereco!

⁵ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pīha, anise, ‘Epūha, eguata’ hesa tie?

⁶ Tapeicua ru che, Ava Riquehir, areco mborerecuasa co ivi pipe ava angaipa upe che ñero āgua —ehi.

Evocoyase aipo ehi imbaheasi vahe upe:

—Epūha, esupi nde rupa seraso nde rētave —ehi.

⁷ Ahese opūha voi, oso güētave.

⁸ “¡Too! ¿Mara ehi rutei vo?” ehi ava rehi yuvireco imboeteisave. “Esepia, ahe niha ombou opīratasa ava upe” ehi yuvireco chupe.

Jesús, “Erio che rupi” ehi Mateo upe

⁹ Ichui osose Jesús, che repia, che Roma pendar mborerecuar guasu upe guarepochi rerocuasa mesave che rēise. Ipare aipo ehi cheu:

—Erio che rupi —ehi.

Evocoyase apūha, aso voi supi.

¹⁰ Ahe ari pipeve Jesús güemimbohe reseve yuviroique che rētave. Ambo-caru setá ambuae ava guarepochi Roma pendar mborerecuar guasu upe monuhasar reseve, ava angaipa viyar yuvirecoi vahe reseve avei.

¹¹ Co nungar repiase, fariseo oporandu semimbohe upe yuvireco:

—¿Mahera ru pe mbohesar ocaru evocoi nungar ava angaipa viyar pāhuve tēi? —ehi seroïrosa pipe yuvireco chupe.

12 Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopōsano vahe; imbaheasi vaheño rumo oseca yuvireco.

13 Peyapísaca icuachiapri aracahendar aipo ehi vahe rese: ‘Poroparaisuerecosa aipota; ndaipotai mbahe cheu serocuavēhepri tēi’ ehi. Esepia, ndayui ava seco catupri vahe reca, ěgüe ehi rumo ayu ava angaipa viyar reca —ehi Jesús ava eta upe.

Yecuacu rese ñehesa

14 Ipare Juan Oporoãpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoiyase nde remimbohe eta ndoyecuacui yuvireco yepi? —ehi yuvireco chupe.

15 Ahe rumo omboyevi ahe ava upe:

—¡Ndiyai eté ichohopri mendasave ndoyembovihal yuvireco imer oicovese ipāhuve! Oimera rumo ari imer reraso āgua ichui curi. Ahese ramo oye-cuacura yuvireco cute —ehi.

16 “Ndipoi chietera revo que ava oturucuar cuacua oyapete vahe turucuar ipiasu vahe pipe. Esepia niha, yapetesa ipiasu vahe oichohoño turucuar cuacua imondoro. Ichorosa evocoiyase tuvicha catu-catuño ité.

17 Iyavei ndiyai ava uva ricuer piasu oyapocatu siru mbahe pিরer cuacua vahe pipe. ěgüe ehise, mbahe pিরer opura viña, ocañi tēira, uva ricuer avei evocoiyase ocañi tēi aveira viña no. Acoi uva ricuer ipiasu vahe mbahe pিরer ipiasu vahe pipe yapocatupri rumo oyoya ndoyemomarai yuvireco” ehi.

Jairo rayri iyavei cuña Jesús turucuar rese opoco vahe

18 Jesús oporombohe viteseve, ou mborerecar oñenopiha sovai aipo ehi chupe:

—Che rayri mo cūrítei omano pota ité. Yaso, nde eremondose rumo nde po sese oicovera —ehi chupe.

19 “Aviye” ehi. Evocoiyase opūha yuviraso güemimbohe reseve supi.

20 Ahe pipeve cuña doce araviter rupi suvi ndopai vahe opoco saquicuei coti iturucuar popi rese.

21 Esepia, ahe aipo ehi opiha pipe: “Yepe que iturucuar popi resemi tēi apocora, acuerara rumo” ehi.

22 Jesús evocoiyase oyemboyere cuña rese aipo ehi chupe:

—Che rayri, eyemopoase, erecuera cūrítei nde yeroyasa pipe —ehi.

Aipo ihe ramoseve, cuña ocuera voi eté.

23 Oyepotase Jesús mborerecar rētave, osepia omimbi vahe iyemoingatu-pase omano vahe tī āgua, ava yaseho atise avei no.

24 Ahese aipo ehi ava oyaseho vahe upe:

—Pesēpa cohava sui. Co cuñatai nomanoi; oque tēi ou —ehi.

Ahe ava rumo opucaete atīño seroyaēhisave yuvireco.

25 Ichui opa ava omore, ahese oique oi pipe oipopisi cuñatai. Evocoiyase ahe oñarapuha voi.

26 Co sembiapo evocoiyase oyandupa voi opacatu tecua rupi yuvireco.

Jesús ombogüera ñuvirío ava ndasesapisoi vahe

27 Acoi osēse evocoi oi sui Jesús, ahese ñuvirío ndasesapisoi vahe osaquicue moña, osapucaí yuvireco chupe aipo ehi:

—¡Jesús, David suindar, ore paraisuerecomi tēi eve! —ehi pucu-pucu yuvireco chupe.

²⁸ Oi pîpe seiquese, oyemboya ndasesapisoi vahe yuvireco sese. Ahese Jesús oporandu chupe:

—¿Che reroya ité vo pe mbogüera ägua rese peye? —ehi.

—Nde reroyasa ité, ore Yar —ehi yuvireco.

²⁹ Aipo oyeupe hese, opoco sesa rese, aipo ehi chupe:

—Tayapo pe che reroyasa pîpe mbahe pëu —ehi.

³⁰ Aipo ihe ramoseve osareco tupri voi yuvireco. Ipare,

—Peicua catu. Peicua ucai rene ämbuae ava upe —ehi chupe viña.

³¹ Ahe rumo ichui oyepepi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

Jesús ombogüera niñhengatui vahe

³² Ichiri ramoseve rumo, ämbuae ava viroyepota ava niñhengatui vahe carugar rerecosar Jesús upe yuvireco.

³³ Ichui omosese carugar, iñhengatu cute. Sepiase opacatu ava,

—¡Too! —ehi—, ¡Ndasepiasai vahe ité co nungar mbahe yande recua pîpe yepi! —ehi tēi yuvireco.

³⁴ Fariseo eta rumo aipo ehiño yuvireco:

—Carugar rerecuar pîratasa pîpe co mbia omose carugar ava sui —ehi tupri tēi yuvireco chupe viña.

Jesús oiparaisuereco ava

³⁵ Ichui opacatu tecua rupi Jesús oguata oporombohe tūparo yacatu. Omombehu tecovesa aviye vahe Vu mborerecuasa resendar iyavei oporombogüera opacatu-catu tēi mbaherasisa sui avei no.

³⁶ Osepiase ava rehi, oiparaisuereco yuvireco. Esepia, ahe oñemosañi tēi mbahe rasicuer pāhuve inungar ovesa ndovirecoi vahe guārosar yuvireco

³⁷ Evocoyase aipo ehi güemimbohe upe:

—Supi eté mbahe miti imonuhapirā setá iteanga; sese oporaviqui vahe rumo moviromi tēi.

³⁸ Sese peporandu mbahe miti Yar upe, ahe tomondo ava imonuha ägua —ehi güemimbohe eta upe.

10

Jesús oiporavo doce tupri apóstol

¹ Evocoyase, “Perio” ehi Jesús doce güemimbohe upe. Chupe omondo güeco pîratasa carugar ava sui imboyepepi ägua iyavei iporombogüera ägua opacatu-catu tēi mbaherasisa sui.

² Ahe ava doce tupri apóstol yuvirecoi vahe: yipîndar Simón Pedro, ahe tivri Andrés; ämbuae Santiago, Zebedeo rahir; ahe tivri Juan;

³ Felipe, Bartolomé, Tomás; iyavei che, Mateo, guarepochi monuhasarer; ämbuae Santiago, Alfeo rahir; ämbuae Tadeo;

⁴ iyavei Simón, güecua rese secatēhi vahe pāhu pendarer; ipa vahe Judas Iscariote, ahe Jesús omondo vahe yamotarēhimbar upe.

Jesús oyocuai güemimbohe Vu mborerecuasa mombehu ägua

⁵⁻⁶ Ipare oyocuai güemimbohe imondo aipo ehi chupe: “Pesora yipîndar judío recua rupi. Esepia, inungar ovesa ocañi vahe, ēgüe ehi tēi secocuer yuvireco. Evocoyase pesoi rene ndahei vahe judío recua rupi iyavei ndapeiquei chira tecua Samaria ve” ehi.

⁷ “Judío recua rupi pesoseve, ‘Cōimi Tūpa mborerecuasa secoi yandeu’ peyera imombehu.

8 Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei carugar pemboyepepi serecosar sui. Esepia niha, peipisi pīratasa ndasepi vahe. Sese peyapoño evocoi mbahe guarepochi pisiēhisa pipe.

9-10 “Ava oporaviqui pipe sui ocaru yepi. Sese ndaperasoi chira guarepochi peyese. Ndaperasoi chiaveira pe mbahe riru, iyavei ambuae pe turucuar, pe pitaqui; peyesendar güeraño tupri perasora. Pe pococa avei ndaperasoi chira” ehi.

11 “Iyavei que tecuave peyepotase, peseca rane ava imboyeroyapri. Ahe sētave pepitami ranera. Pemboaviyese pe cuaita, ahese ramo pesora ichui” ehi.

12 “Evocoiyase peique ramoseve oi pipe, peyapora, ‘Avirave, Tūpa tape rovasa’ peyera chupe.

13 Acoi aviyeise oi pipendar ava pēu, ahe oipisira Tūpa porovasasa; acoi ndahaviyeise rumo ava, ndoipisii chira Tūpa porovasasa yuvireco.

14 Acoi ndosendu potaise pe ñehe, ndape pisi potaise avei yuvireco, ahese pesēño ahe oi pipe sui, anise tecua sui. Peipipetera pe pi ivi rātachigüer sui, pesē pecua ichui ‘toipisi Tūpa ñemoirosa yuvireco’ pe yapave.

15 Evocoiyase supi eté ari cañi oyepotase co tecua upe, ivate catura Tūpa ñemoirosa ava Sodoma, Gomorra iguar upendar sui curi” ehi.

Yamotarēhiprira Jesús reroyasar

16 “¡Psendu tupri che ñehe! Che opomondo ovesa nungar ava mbahe mimba oñaro ai vahe nungar pāhuve. Sese peresaeté tuprira peyese mboi nungar, iyavei inungar apicasu seco tupri vahe peicora.

17 Iyavei peicua catu peamotarēhimbar sui. Esepia, mborerecuar rovai pe rerasora iyavei pe nupara otūparo pipe yuvireco,

18 ichui pe reraso aveira mborerecuareta ivate catu vahe rovai yuvireco che recocuer sui tēi, ěgüe peyera peñehe che recocuer rese chupe iyavei ava ndahei vahe judío upe avei.

19 Acoi pe rerasose mborerecuar upe yuvireco, ‘¿Mbahe pīha amombehura chupe?’ ndapeyei chira; acoi peñehe potase rumo, Tūpa omondora pe ñehe āgua pēu.

20 Esepia, ndahei chira peyesui tēi peñehe, pe Ru Tūpa Espiritu pemoñehe ucara.

21 “Ipare rumo ava vivri omondora oamotarēhisar upe ‘toyuca yuvireco’ oya. ěgüe ehi aveira ava guahir upe; tahir avei oyamotarēhira oyesupa yuca uca āgua yuvireco che recocuer rese.

22 Iyavei opacatu ava ndape ambotai chira che recocuer sui tēi yuvireco. Acoi oyemoviracua vaheño rumo ari ipa vahe rupi, ahe ipisiroproi yuvirecoira curi.

23 Iyavei acoi pe mañeco tēise ñepeu tecuave yuvireco, ahese peyepipiñora ichui ambuae tecua pipendar upe che recocuer mombehu āgua. Supi eté Ava Riquehir oura ndapemboaviye viteiseve pe guatasa judío recua rupi.

24 “Ñepeu yepi niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecuar sui.

25 Iyavei semimbohe, ‘Aviye ité’ ehiñora ombohesar osecoupitise. ěgüe ehi aveira mbiguai güerecuar upe. Acoi oi yar upe: ‘Carugar rerecuar Beelzebú’ ehise, aipo ehi aveira niha oi pipendar upe yuvireco no” ehi.

¿Uma sui pīha siquiyesara?

²⁶ “Sese ndapesiquiyeyi chira ava pe amotarēhimbar sui. Esepia, yaposa vahe imombehupirēhi cūritei, icuasaño itera curi; iyavei mbahe ñomipri, icuasaño aveira no.

²⁷ Acoi che amombehu vahe pītumimbisave pēu, pemombehu ari pipe coiyeyi, iyavei acoi amombehu vahe pēuñomi, perosapucaí pe rēta harive imombehu opacatu ava upe.

²⁸ Iyavei ndapesiquiyeyi chira acoi ava peyuca potasar sui. Esepia, ndoicatu niha ava hã mócañi āgua yuvireco. Tūpa sui rumo pesiquiyeyi catura. Esepia, ahe oicatu yande retecuer, yande hã reseve imocañi āgua tata guasu pipe” ehi.

²⁹ “Yamondo niha ñuvirío vīraimi repirā ñepeimi guarepochi yepi. Yande Ru Tūpa ndoipotaise rumo, ndoviapi chietera que ñepeí vīraimi” ehi.

³⁰⁻³¹ “Sese pesiquiyeyi eme. Esepia, pe niha ivate catu vahe ité peico opacatu vīrai sui. Supi eté Tūpa niha oicua opacatu ñepeí-peí pe ha retacuer” ehi.

“Che aicua Jesucristo” ehi vahe opacatu ava rovaque

³² “Acoi ava ‘che aicua Jesucristo’ ehi vahe opacatu ava rovaque, che avei evocoyase: ‘Co ava che rupindar secoi’ ahera che Ru iva pendar upe.

³³ Acoi ava ‘che ndahei Cristo rese aico’ ehi vahe rumo cheu ava rovaque, che avei evocoyase, ‘Ndahei co che rupindar secoi’ ahera che Ru iva pendar upe.

Jesús reroyasa pipe sui oimera yeamotarēhisa

³⁴ “ ‘Mbahe tupri ai revo güeru co ivi pipe’ ndapeyeyi chira cheu. Ēgüe ehi rumo che yusa omoime ucara yeamotarēhisa.

³⁵⁻³⁶ Sese ava oñemosai ae oyeamotarēhi-rēhira yuvireco; ava oyesupa oyamotarēhira, iyavei cuña membri osi oyamotarēhira, cuña vovayar oyamotarēhi aveira.

³⁷ “Iyavei acoi oyesupa tēi osaisu catu vahe che sui, ahe ndiyai eté secoi che voyarā; inungar avei osaisu catu vahe guahir, anise guayri che sui.

³⁸ Iyavei acoi noñemosai vahe mbahe rasicuer upe, inungar-ra curusu rese ovosii vahe ité viña che rupi oguata pipe, ahe chupe ndiyai eté che voya seco āgua.

³⁹ Acoi ava oipisiro pota vahe güecocuer tēi, ahe ocañi tēira; acoi omoañi vahe rumo güecocuer che recocuer rese, ahe oñepisirora” ehi Jesús güemimbohe eta upe.

Porerecosa resendar ñehesa

⁴⁰ “Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar.

⁴¹ Acoi ava oipisi tupri vahe ambuae ava Tūpa ñehese mombehusar secosa rese, ahe oipisi aveira porerecosa inungar tupri. Iyavei acoi ava oipisi tupri vahe ava seco catuprisa rese, ahe oipisi aveira porerecosa inungar tupri.

⁴² Iyavei acoi omondo vahe que chīhi i sōhisa vahe que ñepeí seco mbegüemi catu vahe toihu che reroyasar seco rese, ahe oipisi aveira Tūpa suindar porerecosa” ehi.

11

Juan Oporoāpiramo vahe ovoya omondo Jesús recocuer cua uca āgua

¹ Opase Jesús oyocuai doce güemimbohe, ahese yuviraso oporombohe Tūpa Ñehengagüer rese judío recua rupi yuvireco.

2 Ahese Juan Oporoãpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese

3 imboporandu água: “¿Nde ité vo Tüpa Rembiporavo aipo sãrombri ereico? anise, ¿oime tie ambuae orosãro vaherã?” ehi yuvireco chupe.

4 Ipare omboyevi chupe aipo ehi: “Peso, pemombehupa Juan upe mbahe pe rembiepia iyavei pesendu vahe.

5 ‘Ndasesapisoí vahe osareco tupri cūrítei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaísu vahe upe imombehusa pãsirosa resendar ñehesa’ peyera chupe.

6 ‘Oviharetera acói ava oyeroyaño vahe che rese!’ ehi Juan rupindar upe.

7 Juan rupindar yuviraso pare, Jesús omboipi imombehu ava upe Juan recocer: “¿Pesepiase Juan recocer ava porêhisave capihíata ivitu ombovambova vahe nungar pĩha?

8 Anise, ¿pesepia tie iturucuar porañete ai vahe iyemboeteise? ¡Aní! Ēgüe ehi vahe rumo secoi mborerecuar guasu rētave yepi.

9 Evocoiyase pesepiase, ¿‘Ava’ peye vo pe chupe? ¿Tüpa ñehe mombehúsar ité pĩha? Taa, ahe ité. Evocoi niha ivate catu vahe Tüpa ñehe mombehúsar sui.

10 Ahe chupe ité Tüpa icuachiapri aracahendar pipe aipo ehi: ‘Che amondora nde renondeve che ñehe mombehúsar nde raperã moingatu água’ ehi.

11 Supi eté ndipoi que ñepeí ava seco ivate catu vahe Juan Oporoãpiramo vahe sui. Yepe ahe ivate catu vahe viña, Tüpa mborerecuasave rumo ava seco mbegüemi catu vahe ivate catu ichui.

12 ‘Juan yusa suíve tupri Tüpa povri pendar oiporara mbahe tēi yuvireco. Osãha-sãha ava opĩratasa pipe imocañi água.

13 Opacatu Tüpa ñehe mombehúsar rembicuachía pipe, Moisés porocuita icuachiapri pipe avei imombehusa Juan yusa rupive co Tüpa mborerecuasa resendar.

14 Yepe yavaira seroya água pēu viña, Juan rumo, Tüpa ñehe mombehúsar Elías. Ahe imombehupri ou vahe.

15 Acoi ava osendu pota vahe che ñehe, toyapísacaño sese” ehi.

16 “¿Mbahe rese pĩha amboyoyara ava recocer cūríteindar? Esepia, co ava inungar acói chíhivahe iguayí tēi vahe ocar rupi. Ipare oñehe pucu-pucu omboripar upe yuvireco aipo ehi:

17 ‘Oromoñehe tēi mimbí pēu, ndapepivoi eté rumo iyavei orosapucaí tēi sapucaisa viharēhisa resendar pēu, pe rumo ndapeyasehoi eté’ ehi.

18 Esepia, ouse Juan Oporoãpiramo vahe, ahe ndohui tembihu sepĩrusu ai vahe iyavei ndoihui uva ricuer ipĩrata vahe, sese, ‘Co mbia carugar víreco vahe oyese’ peye tupri tēi chupe.

19 Coiye che ayu, Ava Riquehĩr, acarú, aihu tupri avei. Ipare, ‘Co icaru guasu ai vahe secoi, iihu guasu ai vahe avei’ peye cheu; ‘Ava angaipa viyar mboripar tēi iyavei guarepochi rero cuasar mboripar tēi’ peye avei cheu. Acoi ava supi eté víreco vahe Tüpa mbahecuasa, ahe icuasara sembiapo rese yepi” ehi.

Tecua ndiporeroyai vahe

20 Ahese Jesús oñehe pĩrata moviro tecua pendar upe. Esepia, aheve acói oyapo ati catu mbahe poromondiisa viña. Ahe pendar ava rumo ndosecuñaro potai eté güecocueraí Tüpa upe nara yuvireco. Evocoiyase aipo ehi chupe:

²¹ “¡Peparaisu, ava tecua Corazín pendar! ¡Pe avei peparaisu tecua Betsaida pendar! Esepia, acoi poromondiisa pe pãhuve yapopri, yaposara yipive tecua Tiro, Sidón ve viña, co tecua pendar aracaheve anga omondera turucuar viharêhisa resendar, tanimbu avei omondora oãca rese oangaipa mboasisa pipe yuvireco viña no.

²² Pe rumo peipisira ivate catu vahe Tûpa ñemoirosa ava Tiro, Sidón pendar sui ari cañi pipe coiye.

²³ Pe avei no, tecua Capernaum pendar pemoha co ivave pe reco ãgua viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondiisa yapopri vahe pe pãhuve yaposara viña, cūrítei oime vitera ahe tecua viña.

²⁴ Sese, pe peipisira ivate catu Tûpa ñemoirosa ava Sodoma iguar sui ari cañi pipe coiye” ehi.

Peyu cheu mbituhusa reca

²⁵ Iyavei ahe ari pipe Jesús oyerure: “Che Ru, aviye ndeu. Nde niha iba pendar, ivi pipendar Yar ereico. Esepia, nde ereñomi co ñehesa supi tupri vahe ava imbahecua vai vahe sui; eremboyecua rumo ava seco mbegüemi vahe upe.

²⁶ Êgüe ere niha mbahe nde remimbotar apo, che Ru” ehi.

²⁷ “Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoi nungar upe aicua uca tupriãra.

²⁸ Peyu cheu opacatu icuerai vahe. Che amondora pe pituhu ãgua.

²⁹⁻³⁰ Peico che povrive, peyembohe avei che sui. Esepia, che ndache reco asi, iyavei che povrive pe recosa ndayavaimi eté. Ahese ramo oimera mbituhusa pëu” ehi.

12

Mbituhusa ari pipe Jesús remimbohe oipoho trigo yuvireco

¹ Mbituhusa ari pipe Jesús yuviraso güemimbohe rese, oguata mbahe miti pãhu rupi. Ahese semimbohe ndasiepoi. Evocoiyase trigo rãhiñ oipohopohomi güemihura yuvireco.

² Fariseo yuvirecoi vahe osepiase, aipo ehi Jesús upe:

—Esepia nde remimbohe. Oporaviquiño mbituhusa ari pipe yuvireco —ehi yuvireco chupe.

³ Ahe rumo omboyeve ahe fariseo upe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco.

⁴ Ahe niha yuviroique ité tûparo pipe pan imboeteipri Tûpa upendar hu ãgua ondugüer reseve. Ahe chupe acoi ndipotasai ihu ãgua yuvireco viña. Judío pahi yuvirecoi vahe upeño ité niha ipotasa ihu ãgua yepi.

⁵ ¿Ndapeyeroquiñ vo Moisés porocuaita resendar pipe? Esepia, judío pahi tûparo rese hañecosar ndopituhui eté tûparo pipe yuvireco mbituhusa ari pipe yepi. Ndahei rumo oyemboangaipa ipipe yuvireco.

⁶ Cūrítei cohava oime ava ivate catu vahe tûparo sui.

⁷ Evocoiyase pe ndapesenducuai eté Tûpa Ñhengagüer aipo ehi vahe: ‘Che aipota peporoparisuereco, aní chira peropovêhepa porerecosa mbahe mimba tēi cheu’ ehi vahe. Pesenducuaase viña, ahese, “Oyavi mbahe” ndapeye voi chira che remimbohe mbahe ndoyavii vahe upe viña.

⁸ Esepia, Ava Riquehir mbituhusa ari rerecuar ité secói —ehi fariseo eta upe.

Mbia ipo nomii vahe Jesús ombogüera

⁹ Ichui osose Jesús, oi que judío tūparove.

¹⁰ Aheve oime mbia ipo co cotigüer nomii vahe. Aheve avei fariseo, “Yaiñhengapo angahu Jesús” ehi yuvireco viña. Sese, —¿Iyaño pñha mbituhusa ari pipe ava imbogüerasa yepi’ —ehi yuvireco chupe.

¹¹ Evocoiyase Jesús aipo ehi imboyevi:

—¿Ava vo pe pñhu pendar acoi mbituhusa ari pipe oviapise seimba ovesa ivicuarve ndosoi chira senose viña?

¹² ¡Ava niha aviye catu ovesa sui! Sese iyacatu yande yayapo mbahe aviye vahe mbituhusa ari pipe yepi —ehi.

¹³ Ahese aipo ehi aipo mbia upe:

—Eichoho nde yiva —ehi.

Evocoiyase oichohose oyiva, ocuera tupri voi inungar ambuae iyiva.

¹⁴ Evocoiyase fariseo opa yuvínose yuviraso oyemoingatu Jesús yuca ägua yuvireco.

Yaviye aracahendar imombehupri Jesús recocuer resendar

¹⁵ Evocoiyase Jesús oicuase fariseo piñañemoñetasa, osē oso, ava rehii avei yuviraso supi. Setá avei imbaheasi vahe ombogüera,

¹⁶ iyavei, “Che mombehui rene ava upe peyé” ehi.

¹⁷ Ëgüe ehi yaviyepa Tūpa ñehe mombehugar Isaías remimombehugüer:

¹⁸ “Co ité che mboyeroyasar che rembiporavo.

Ahe asaisu etepri.

Sese ité ayemboviha.

Amondora che Espiritu chupe.

Ahe omombehu aveira mbahe ihívi vahe opacatu ava ivi pipendar upe.

¹⁹ Noiñehopepi-epii chira ava, nasase-sasei tēi chiaveira; iyavei ndosendui chietera ava iñehe ocar rupi.

²⁰ Iyavei nomopei chietera que ñepei patavíimi oyeapa vahe; nombogüei chiaveira tataendi sātachiñomi tēi vahe.

Ëgüe ehira mbahe ihívi vahe pipe opacatu secopipa.

²¹ Evocoiyase opacatu tecua pendar ava ndahei vahe judío oyeroyara yuvireco sese’ ehi

Isaías aracahe.

“Jesús vireco carugar pīratasa oyese” ehi tēi ava yuvireco

²² Ichui ava ndasesapisoi vahe, noñehei vahe carugar rerecosar viraso Jesús upe yuvireco. Evocoiyase Jesús ombogüera. Ahese osareco, oñehe avei.

²³ Evocoiyase opacatu ava oyepihamondisave aipo ehi yuvireco: “¿Tūpa Rembiporavo David suindar piha co?” ehi yuvireco chupe.

²⁴ Osenduse rumo fariseo, “Co mbia carugar rerecuar Beelzebú pīratasa pipe tēi omboyepepi carugar ava sui” ehi yuvireco.

²⁵ Oicuano rumo ipiñañemoñetasa. Sese aipo ehi: “Que mborerecuar guasu povri pendar ovava-vavase oyeupe oyeamotarēhisave yuvireco, ahese evocoi mborerecuar pīratasa ocañi tēira. Iyavei que tecua pendar, anise, que ava omu rese ovavase oyeupe, oyoya oyemocañi tēira yuvireco.

²⁶ Ëgüe ehi avei carugar. Esepia, serecuar omboyepepise opovri pendar, ovavara oyeupe yuvireco viña. Evocoiyase ahe oyemocañi tēira yuvireco.

²⁷ Iyavei pe, ‘Beelzebú pīratasa pipe sui tēi omboyepēpi caruguar ava sui’ peye tēi cheu. Evocoyase, ¿ava pīratasa pipe vo pe voya eta omboyepēpi caruguar ava sui yuvireco? Tūpa pīratasa pipese, che avei evocoyase ayapo evocoi nungar ipīratasa pipe. Pe voya ae omboyecuara pe ñehe pe rembiavi yuvireco pēu.

²⁸ Che rumo Tūpa Espiritu pīratasa pipe amboyepēpi caruguar ava sui. Sese cūrtei pesepia ité Tūpa mborerecuasa.

²⁹ “Iyavei no, que ava oi que potase ambuae ava ipīrata etepri vahe rētave imbahe rerocua āgua ichui viña, yipindar opa rane itera oñapichi-pichi. Ipape voi opara vīrocua imbahe ichui.

³⁰ “Iyavei acoi ava ndache mboyoyai vahe, ahe che amotarēhimbar yuvirecoi; acoi ava ndosecai vahe ava cheu nara, ahe omosai tēi yuvireco che sui.

³¹ “Sese ava upe oimera ñeroisa opacatu angaipa rese iyavei iñehe mara-mara tēi vahe upe avei. Co catu acoi iñehe-ñehe tēi vahe Tūpa Espiritu upe, ahe chupe ndipoi chietera ñeroisa.

³² Iyavei acoi ava oñehe-ñehe tēi vahe che, Ava Riquehir rese, ahe chupe oimeño ñeroisa; acoi oñehe-ñehe tēi vahe rumo Espiritu amotarēhisave, ahe chupe ndipoi chira ñeroisa co ivi pipe iyavei ivave” ehi Jesús fariseo eta upe.

Ava recocuer icuasa semiapo rese

³³ “Emoatiro tupri ivira, ahe iha aviya, ahe nderemoatiro tupriise ivira, ahe evocoyase vīrocua oha naporai vahe. Esepia, ivira icuasa iha rese.

³⁴ ¡Evocoyase pe, mboi nungar tēi peico vahe, pe recocuer naporaise, ndapeicatui chira mbahe aviye vahe rese pe ñehe āgua! Esepia, pe piha pipe sui tēi osē pe ñehe āgua.

³⁵ Iyavei acoi ava aviye vahe oñehe tupri opihañemoñeta catuprisa pipe; acoi ava recocuer naporai vahe rumo, opihañemoñeta raisa pipe tēi oñehe.

³⁶ Sese ari cañi pipe opacatu ava opara omombehu oñehe-ñehe tēisa Tūpa rovai yuvireco.

³⁷ Esepia, pe ñehe aviye vahe repri peipisira, pe ñehe naporai vahe repri peipisi aveira” ehi Jesús.

Ava eta ndaseco pōrai vahe oporandu poromondiisa rese yuvireco

³⁸ Evocoyase fariseo iyavei Moisés porocuita rese oporombohe vahe aipo ehi yuvireco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua āgua —ehi yuvireco.

³⁹ Jesús rumo omboyevi iñehe:

—Pe ava ndaseco pōrai vahe, ndiporeroyai vahe, peporandu tēi poromondiisa tecocuer cua āgua rese. Che rumo namboyecuai chira ambuae poromondiisa; Jonás recocuer rese güeraño opomomahenduhara.

⁴⁰ Esepia, inungar Jonás secoi mbosapi ari pira guasu aviterve aracahe, ēgüe ehi aveira Ava Riquehir mbosapi ari ivivri ve tuiira omano vahe pāhuve.

⁴¹ Evocoyase ari cañi pipe ava tecua Nínive pendar porandusave omombehura ava cūrteindar cañipa āgua. Esepia, Nínive pendar niha omboasise oangaipa, oyevi Tūpa upe yuvireco Jonás omombehuse Tūpa Ñehengagüer chupe. Cūrtei rumo oime Jonás sui aviye catu vahe pe pāhuve.

⁴² Iyavei ari cañi pipe cuña mborerecar guasu irohí coti secua vahe porandusave, omombehura cūrteindar ava cañipa āgua. Esepia, ahe ou amombri sui Salomón mbahecuasa rendu āgua. Cūrtei rumo oime ivate catu vahe Salomón sui —ehi fariseo eta upe.

Caruguar oyeve iri ava güeco agüerve

⁴³ “Iyavei caruguar osêse ava sui, uguata têi ivi ipiru vahe rupi opituhu ägua reca. Ipape rumo ndoyosuise, ipihañemoñeta,

⁴⁴ ‘Ayeve irira che reco agüerve vicho’ ehi. Aheve oyeveise, osepia iri secocuer inungar oi ndiporusai vahe, sahuvapri tupri.

⁴⁵ Sepiase, oso siete caruguar naporai catu vahe reca. Ichui güeruse, oyoya guasu yuviroique co mbia pîha pipe. Sese mbahe têi catu ité secocuer yipindar güeco agüer sui. Êgüe ehi aveira ava cûriteindar ndaseco pōrai vahe upe” ehi.

Jesús si, tivireta avei

⁴⁶ Jesús oñehe viteseve ava upe, ahese ichi, tivireta reseve ocarve yuvinohai. Ahe oñehe pota yuvireco chupe.

⁴⁷ Evocoyase mbia omombehu Jesús upe:

—Nde si, nde rivireta reseve co ocarve yuvinohai. Ahe oñehe pota yuvireco ndeu —ehi.

⁴⁸ Ahe rumo,

—¿Ava pîha che si; ava pîha che rivri? —ehi ahe mbia upe.

⁴⁹ Evocoyase omboyecua opo pipe güemimbohe eta aipo ehi:

—Co che si eta, co che rivireta.

⁵⁰ Esepia, acoi che Ru iva pendar remimbotar oyapo vahe, ahe che rivri, che reindri iyavei ahe che si yuvirecoi —ehi.

13*Mbahe miti sui yembohesa*

¹ Ahe ari pipe Jesús osê oi sui oso, uguapi ipa popive oi.

² Aheve ava oñemonuha atise yuvireco, oha carite pipe uguapi oi, evocoyase opacatu ava opita ipa popi rupi yuvireco.

³ Ahese omboyoya-yoya oporombohesa setá mbahe rese aipo ehi:

“Ñepe mbia osê omaheti oico.

⁴ Ahe otiapi-apiise mbahe rāhi oso, moviro oiti peri rupi. Vîrai ogüeyise rumo sese, opaño yuvirohu.

⁵ Iyavei moviro oiti ivi nayanai vahesave ita pāhuve. Sese cûriteimi sori;

⁶ ari tasise rumo, opaño ipiru. Esepia, ndasapoi niha.

⁷ Iyavei ambuae mbahe rāhi oiti yu pāhuve. Ahe yu rumo sori poyava catu yuvireco ichui. Sese opaño oyopi.

⁸ Ambuae rumo oiti ivi avïye vahesave, ahe setá iha imonuhasa; ñepe ihi sui osê cién iha, ambuae sui osê sesenta, ambuae sui treinta.

⁹ Acoi ava osenducua pota vahe che ñehe, toyapisacaño sese” ehi Jesús ava eta upe.

¿Mahera pîha co yembohesa imboyoyasa ambuae mbahe rese?

¹⁰ Ichui semimbohe eta oyemboya Jesús rese yuvireco mbahe rese oporandu ägua chupe: “¿Mahera vo eremboyoya-yoya mbahe rese nde porombohesa ava upe yepi?” ehi.

¹¹ Jesús aipo ehi: “Pêu rumo Tûpa oicua uca ité mbahe ndicuasai vahe omborerecuasa resendar; ambuae ava upe rumo ndoicua ucai eté.

¹² Esepia, acoi vireco vahe upe, imondosa catura; acoi ndovirecoi vahe evocoi osenducua raimi vahe serocuasañora ichui.

¹³ Sese añehese chupe, amboyoya-yoya aipo nungar mbahe yavai vahe ambuae mbahe rese yepi. Esepia, ahe osepia tēi, ndosepiacuai rumo yuvireco iyavei osendu tēi, ndosenducuai avei yuvireco no.

¹⁴ Na ehi yaviye Tūpa Ñehengagüer Isaías remimombehu:

‘Pe niha pesendu tēira, ndapeicuai chira rumo; iyavei pesepia tēira, ndape-sepiacuai chira rumo.

¹⁵ Esepia, evocoi ava eta upe yavai eté ipiha pīpe imbahe reroya āgua, ndayapisai eté sendu potaēhisave; ndoyemboesapisoi avei sepia potaēhisave.

Esepia, ndosenducua potai opīha pīpe yuvireco cheu oyevi potaēhisave ombogüera āgua’ ehi

Isaías aracahe.

¹⁶ “Pe rumo perorivete ité sepiacuase, pesenducuae avei no.

¹⁷ Supi eté setá Tūpa ñehe mombehusar iyavei ava seco catupri vahe aracahendar osepia pota tēi mbahe pe rembiepia, ahe rumo ndosepiai eté yuvireco; iyavei osendu pota tēi co pe remiendu, ahe rumo ndosendui avei yuvireco” ehi Jesús güemimbohe eta upe.

Jesús omombehu yembohesa mbahe miti resendar

¹⁸ Ipare aipo ehi: “Peyapisaca omaheti vahe recocuer rese.

¹⁹ Acoi osendu tēi vahe Tūpa Ñehengagüer imborerecuasa resendar, ipare rumo ndosenducuai, ahe inungar acoi mbahe rāhii oviapi vahe peri rupi. Ipare rumo caruguar ou chupe. Ahe ipiha pīpe osendu vahe Tūpa Ñehengagüer opa tupriño omocañi ichui.

²⁰ Iyavei acoi mbahe rāhii seitipri ita pāhuve, ahe inungar ava recocuer yipiño osendu vahe, oipisi vahe avei vorivetesa pīpe Tūpa Ñehengagüer.

²¹ Ipare rumo inungar co mbahe miti ndovirecoi vahe guapo ovīracua āgua, ēgüe ehi avei evocoi nungar ava oimese mbahe-mbahe tēi Tūpa Ñehengagüer sui chupe, cūrteimi seroyaēhisave oyepepi ichui.

²² Acoi mbahe rāhii seitipri yu pāhuve, ahe inungar ava osendu vahe Tūpa ñehe. Ipare rumo ahe ipihañemoñeta catu saiskusave opacatu ombahe eta co ivi pipendar rese. Ipipe sui oyembopa uca ombahe eta upe. Ichui ndoguata iriño Tūpa Ñehengagüer rupi. Sese secocuer ndaviye iri eté, inungar mbahe miti ndihai vahe.

²³ Acoi itisa vahe mbahe rāhii ivi aviye vahe rese, ahe inungar ava osenducua vahe Tūpa Ñehengagüer. Iyavei inungar acoi co mbahe miti ihā iteanga vahe, ēgüe ehi avei ava secocuer aviye vahe inungar ñepe-pe sāhii sui osé que cien iha, sesenta iha, anise que treinta” ehi Jesús güemimbohe eta upe.

Trigo pāhuve caha naporai vahe sui yembohesa

²⁴ Jesús omombehu iri co ambuae mbahe rese yembohesa oyoya vahe: “Tūpa mborerecuasa oyoya tupri ava oivi pīpe mbahe rāhii oñoti vahe rese.

²⁵ Opacatu ava queseve rumo oyepota yamotarēhisar, caha tēi rāhii oñoti trigo pāhuve oso.

²⁶ Acoi trigo iha potase, supive avei sori caha.

²⁷ Evocoiyase oporaviqui vahe yuviraso, omombehu iyar upe aipo ehi yuvireco: ‘Ore rerecuar, ¿ndahei vo acoi mbahe rāhii aviye vahe ereñoti nde ivi pīpe? ¿Que sui ru caha sori ipāhuve?’ ehi yuvireco chupe.

²⁸ Iyar rumo aipo ehi chupe: ‘Oime revo que che amotarēhisar’ ehi. Evocoiyase oporaviqui vahe oporandu yuvireco chupe: ‘¿Ndiyai pīha caha tēi orosapohopara ichui viña?’ ehi.

²⁹ Ahe rumo aipo ehi chupe: ‘Aní, aviyeteramo caha rupive pesapoho tiêtera trigo’ ehi.

³⁰ ‘Evocoyase peseya, tocuacuaño oyoya yuvireco. Yaviyese voi mbahe miti, ahese che ayocuaira oporaviqui vahe caha têi rane rerocua âgua imboapuha uca sapi. Ipape oyapocatura trigo rãhi che mbahe apocatusave yuvireco’ ehi ivi yar” ehi Jesús.

Yembohesa mostaza rãhi suindar

³¹ Jesús omombehu iri co ambuae mbahe rese yembohesa oyoya vahe: “Tũpa povri pendar oyoya tupri mostaza rãhi rese. Ahe mbia oñoti vahe oivi pipe.

³² Supi eté co mostaza rãhi tahimi catu opacatu ambuae mbahe rãhi sui. Ipape rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sãca rese vïrai rehi oyapo guaitirã” ehi oporombohe.

Yembohesa pan mboapeposa sui

³³ Ipape Jesús oporombohe iri ambuae mbahe rese aipo ehi: “Tũpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo âgua yepi” ehi oporombohe.

Jesús oiporu oporombohe âgua mbahe rese mboyoyasa yepi

³⁴ Jesús omombehu opacatu evocoi nungar mbahe omboyoya-yoyase oporombohesa ambuae mbahe rese opacatu ava upe.

³⁵ Co rumo na ehi Tũpa ñehe mombehugar rembicuachiagüer aviye âgua: “Che añehese, amboyoyara che porombohesa ambuae mbahe rese. Iyavei amombehura Tũpa ivi apo suive mbahe niporêhi vahe” ehi.

Jesús omombehu tupri oporombohesa caha têi resendar

³⁶ Ahese Jesús, “Aviye” ehi ava upe. Ipape oique oi pipe. Aheve semimbohe oyemboyapa yuvireco sese ‘tomombehu trigo pâhuve caha oime vahe resendar yandeu’ oya.

³⁷ Evocoyase omboyevi chupe: “Acoi ava mbahe rãhi aviye vahe oñoti vahe, ahe che, Ava Riquehir.

³⁸ Ivi mbahe miti rupa, ahe ava co ivi pipendar. Iyavei mbahe rãhi aviye vahe, ahe ava Tũpa povri pendar; caha naporai vahe, ahe ava carugar suindar yuvirecoi vahe.

³⁹ Acoi yamotarêimbar, oñoti vahe caha, ahe niha Carugar ité. Evocoyase ari mbahe miti pohosa, ahe ari cañisa; acoi omonuha vahe mbahe miti, ahe Tũpa rembiguai iva pendar yuvireco.

⁴⁰ Iyavei inungar acoi caha têi imonuhapri sapi âgua, êgüe ehi aveira ari cañi pipe coiye.

⁴¹ Evocoyase che, Ava Riquehir, che rembiguai iva pendar amondora opacatu ava ambuae omboangaipa uca vahe, mbahe-mbahe têi aposar avei rerocua âgua che povrive yuvirecoi vahe pâhu sui.

⁴² Ichui omondopara tata guasuve. Aheve oyaseho têira iyavei ombotere-tere têira guai yuvireco.

⁴³ Aheseve voi ava Tũpa reroyasar seco tupri vahe, ari nungar sendi yaira Vu mborerecuasave yuvireco. Que ava osendu pota vahe che ñehe, toypisacaño sese” ehi.

Mbahe repirusu ñomimbri sui yembohesa

⁴⁴ “Evocoyase Tũpa mborerecuasa oyoya tupri mbahe sepirusu vahe que ivi pipe ñomipri rese. Ipape ava aviyeteramo têi oyosura viña. Ahe rumo

ahave avei oñomi. Ipare vorivetesa pipe opacatu ombahe omondopa co ivi rerocua ãgua mbahe sepĩrusu vahe pota raisa pipe” ehi.

Mbohĩr sepĩrusu catu vahe sui yembohesa

⁴⁵ “Iyavei Tũpa mborerecuasa inungar ava mbahe rerocuasar oseca vahe mbohĩr icatupri vahe yepi.

⁴⁶ Ahe oyosuse mbohĩr sepĩ catu vahe, oso opacatu ombahe mondo co sepĩ catu vahe rerocua ãgua.

Pira mbohasa sui yembohesa

⁴⁷ “Iyavei Tũpa mborerecuasa inungar pira mbohasa. Imondopri ipive. Ipare omboha opacatu-catu tẽi pira.

⁴⁸ Acoi savapipose pira mbohasa, vinose ivi ãtasave yuvireco. Aheve oiporavo pira aviye vahe oñoñapa ombahe riruve yuvinoi, naporai vahe rumo opaño omombo yuvireco.

⁴⁹ Ēgũe ehi aveira ari cañi pipe: ahese Tũpa rembiguai iva pendar yuvinosera opacatu ava ndaseco põrai vahe mboyepepi ãgua ava seco catupri vahe sui.

⁵⁰ Evocoyase ava ndaseco põrai vahe imondosara tata guasuve. Aheve oyaseho tẽira iyavei ombotere-tere tẽira guãĩ yuvireco” ehi.

Mbahe ipiasu vahe iyavei ocuacua vahe sui yembohesa

⁵¹ Evocoyase oporandu gũemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

⁵² Evocoyase ahe aipo ehi:

—Acoi ava oporombohe vahe porocuita rese, oyembohe vahe avei che Ru mborerecuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi gũemimbohe eta upe.

Jesús Nazaret ve secoi

⁵³ Oñehe pare, Jesús osẽ ichui

⁵⁴ oyepota gũecuave oso. Aheve ombohe ava judío tũparo pipe oico. Evocoyase ahe pendar ava oyepĩhamondii tẽi:

—¿Que pĩha co ava oyembohe catu ombahecua ãgua? iyavei, ¿mara ehi pĩha co mbahe poromondiisa apo? —ehi yuvireco—.

⁵⁵ ¿Ndahei vo acoi carpintero rahĩr tẽi? Ichĩ niha acoi María, iyavei yuvirecove tivri, ahe Santiago, José, Simón, Judas.

⁵⁶ Seindri avei niha yuvirecove yande pãhuve. Evocoyase, ¿que pĩha oyembohera viña? —ehi tẽi yuvireco chupe.

⁵⁷ Ipipe sui ndoviroyai yuvireco. Ahe rumo aipo ehi chupe:

—Tũpa ñehe mombehusar niha omboetei opacatu rupi yuvireco yepi. Secua pipendar, sẽta pipendar ae rumo nombotei yuvireco —ehi.

⁵⁸ Evocoyase, ahe ava viroyaẽhisa rese, moviro tẽi oyapo mbahe poromondiisa ipãhuve.

14

Juan Oporoãpiramo vahe mano agũer

¹ Ahe ari rupi Herodes, mborerecuar guasu Galilea pendar, oyandu Jesús rerãcua.

² Evocoyase aipo ehi opĩtiviisar upe: “Juan Oporoãpiramo vahe revo ocuerayevi. Sese oyapo poromondiisa ipĩrata vahe” ehi.

³ Esepia niha, yipindar Herodes Juan oipisi, oñapichi carena pipe soquenda água vivri Felipe rembireco Herodías sui tēi,

⁴ “Ndiyai eté nde rembireco nungar ererectora” oyeupe hese.

⁵ Herodes oyuca pota Juan viña, osiquiyeño rumo ava eta sui. Esepia, ahe, “Tūpa ñehese mombehúsar secói” ehi yuvireco chupe.

⁶ Acoi Herodes haragüer mboeteisa pipe rumo aipo cuña Herodías membri osē opivoi ava rehii rembiepiave. Herodes upe evocoyase aviye ai eté.

⁷ Sese ahe oyemoingatu ñepeí reseve que mbahe oyeupe oporanduse imondo água chupe.

⁸ Evocoyase ahe cuñatai oyeupe osi remimombehu rupi, aipo ehi Herodes upe:

—Embou Juan Oporoãpiramo vahe áca poratu pipe cheu —ehi.

⁹ Aipo ñehesa nombovihai eté Herodes; ndiya iri rumo, “Aní” ohe água. Esepia, opacatu ava güemimbori eta rovaque aipo ehi. Sese, “Taperu chupe” ehiño.

¹⁰ Ahese oporocuai Juan áca hasia água soquendasave.

¹¹ Ipare víraso poratu pipe cuñatai upe yuvireco. Evocoyase ahe omondo osi upe.

¹² Ahese Juan remimbohe oyepota yugüeru, víraso sete ñoti yuvireco. Ipare yuvíraso Jesús upe imombehu.

Jesús oyopoi cinco mil cuimbahe

¹³ Jesús oyanduse Juan manosa, ahese ahe ae oso ava porēhisave carite pipe. Ava rehii rumo oyanduse, yuvínose voi güecua sui, ivi rupi yuvíraso osupiti secosave yuvireco.

¹⁴ Evocoyase osēse carite pipe sui, osepia ava rehii. Ahese oiparaisuereco ava eta. Sese opa ombogüera imbaheasi vahe serasopri.

¹⁵ Evocoyase caharuse semimbohe oyemboya yuvireco sese aipo ehi:

—Caharú ité moco cute iyavei ndipoi oi co rupivemi vahe. ¿Ndiyai vo eremondopa ava tecua-tecuami rupi, ahe supi tovírocua mbahe güemihura yuvireco? —ehi yuvireco chupe.

¹⁶ —Aní, ndiyai yuvíraso. Pe pemondora mbahe semihura yuvireco —ehiño chupe.

¹⁷ —Poyandepomi tēi rumo pan orovireco iyavei ñuvíriomi tēi avei pira —ehiño semimbohe yuvireco chupe.

¹⁸ —Peruño ave cheu —ehi güemimbohe upe.

¹⁹ Ipare aipo ehi ava rehii upe: “Peguapi capihi haríve” ehi. Evocoyase oipisi poyandepomi vahe pan, ñuvíriomi vahe pira. Ichui omahese íva rese, “Aviye ndeu, che Ru” ehi. Ichui omombíte-mbíte pan imondo güemimbohe upe. Ahe evocoyase omboyaho-yaho ava eta upe semihura yuvireco.

²⁰ Evocoyase opacatu ava ocaru vahe ihítaropa tēi yuvireco. Ipare semimbohe omboapipopa doce tupri iruova sembihu rumbírer yuvireco.

²¹ Ahe cuimbahe ocaru vahe retacuer cinco mil. Cuña rumo iyavei chíhivahe ndipapasai yuvireco.

Jesús oguata i hari rupi

²² Ipare Jesús, “Peha pe rane carite pipe, pesasa ípa peso che renondeve. ‘Aviye’ tahe rane ava eta upe” ehi güemimbohe upe.

²³ “Aviye” ohe pare ava upe, oyeupi oso ahe ae ivitri rese oyeroqui água. Pítuse chupe, opitaño aheve.

²⁴ Aheseve carite oso pucuse ípa popi sui, ivitu ipírata vahe osovaichi yuvireco. Sese ohitu vahe nambegüe-mbegüei ocua sese.

- ²⁵ Cõhe potase, oguata i hari rupi oso güemimbohe coti.
- ²⁶ Semimbohe i hari rupi iguatase, oyembosiquiye yuvireco ichui. Sese, —ñdahei vo evocoi hãgüer secói! —ehi yuvireco chupe.
- ²⁷ Güemimbohe upe rumo aipo ehi:
—¡Peyemoviracuaño, che tõi! ¡Pesiquireme eme che sui! —ehi.
- ²⁸ —Che Yar —ehi Pedro—. Nde ité ereicose, taguata i hari rupi vicho nde piri —ehi.
- ²⁹ —Erio ru —ehi chupe.
Evocoiyase Pedro ogüeyi carite pipe sui, oguata i hari rupi. Osora ipiri viña.
- ³⁰ Ivitu pírata repiase rumo, osiquiye ichui. Oso senise rumo ipive,
—¡Che Yar! ¡Che písiromi eve! —ehi.
- ³¹ Ahese cüriteimi voi oipisi Pedro po rese, aipo ehi chupe:
—¡Chĩhi tõi ereyeroya che rese! ¡Mahera ndereyeroya tupri che rese! —ehi.
- ³² Oyuvirohase rumo carite pipe, opituhu voi ivitu.
- ³³ Evocoiyase carite pipe yuvirecoi vahe oñenopiha sovai,
—¡Supi eté catu nde Tũpa Rahir ereico! —ehi yuvireco chupe.
- Jesús ombogüera imbaheasi vahe Genesaret pendar*
- ³⁴ Osasase ipa, oyepota Genesaret ivi rese yuviraso.
- ³⁵ Opacatu ahe pendar ava oicuae Jesús yepota, ahese opacatu tecuami rupi omombehu-mbehu ava upe yuvireco. Evocoiyase viraso imbaheasi vahe chupe,
- ³⁶ aipo ehi yuvireco: “Topocomi tõi nde turucuar popi rese yuvireco” ehi; evocoiyase opacatu sese opoco vahe, ocuerapa voi eté yuvireco.

15

Porombohesa yande mboangaipa vahe resendar

- ¹ Oyemboya Jesús rese moviro fariseo iyavei Moisés porocuita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:
- ² —¿Mahera vo nde remimbohe ndoguatai yande ramoi aracahendar aracuasa rupi yuvireco? ¿Mahera vo yande porocuita mboaviyeẽhisa pipe ndoyepoi ocaru ãgua yuvireco yepi? —ehi.
- ³ Jesús omboyevi aipo ehi chupe:
—Pe no, ¡mahera ndapemboyeroyai Tũpa porocuita pe ramoi aracahendar aracuasa rupi tõi pe guata ãgua!
- ⁴ Esepia, Tũpa aipo ehi: “Pemboyeroyara iyavei peipitiviira pe ru, pe si avei no. Acoi ñehe mara vahe oyesupa upe, ahe tomanoño” ehi aracahe.
- ⁵ Pe rumo aipo peye tõi: “Acoi ava aipo ehi vahe vu upe, osi upe avei no: ‘Ndiyai chira mbahe mondo ãgua pẽu. Esepia, che opacatu mbahe areco vahe imondopri Tũpa upe’ ehise,
- ⁶ ahese ndiyai eté ipitivi ãgua chupe” peye. Ëgüe peye pe aracua raisa pipe pemocañi Tũpa porocuita peyesui.
- ⁷ ¡Pe Tũpa reroyar angahu tõi peico vahe! Supi tupri ité Tũpa ñehe mombehugar Isaiás rembicuachía aracahendar omombehu pe recocuer:
- ⁸ ‘Co tecua pendar ava oyuru pipe tõi che mboetei yuvireco; ipihañemoñetasa rumo amombri tõi che sui.
- ⁹ Oyerure tupri tõi yuvireco cheu.
Esepia, iporombohesa ava porocuita tõi’ ehi Isaiás rembicuachiagüer pipe aracahe —ehi Jesús imombehu.
- ¹⁰ Ipare,

—Perio —ehi ava rehii upe—. Peyapisaca, pesenducua tupri che ñehe:

¹¹ mbahe oi que vahe ava yuru rupi nomboangaipa ucai. Mbahe osẽ vahe ava yuru pipe sui, ahe rumo omboangaipa uca —ehi.

¹² Evocoiyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe renduse yuvireco? —ehi.

¹³ Ahe rumo aipo ehi chupe:

—Opacatu mbahe miti ndahei vahe che Ru iva pendar remiti, opara sapohosa curi —ehi—.

¹⁴ Ëgüe tehiño yuvireco. Esepia, evocoi inungar ndasesapisoi vahe viroguata ambuae ava ndasesapisoi vahe yuvireco. Ahe evocoiyase oyoya voira oviapi ivicuar pipe yuvirašo —ehi.

¹⁵ Evocoiyase Pedro oporandu chupe aipo ehi:

—Emombehu tupri catu iri mbahe eremombehu vahe oreu —ehi.

¹⁶ —¿Ndapesenducua vitei avei catu pe co ñehesa?

¹⁷ ¿Ndapeicuai vo opacatu mbahe acoi ava yuru rupi oi que vahe oso yaviterve, ipare osẽ setecuer sui?

¹⁸ Ava pihañemoñetasa sui osẽ vahe rumo iyuru rupi, ahe ava omboangaipa.

¹⁹ Esepia, ava pihañemoñetasa sui osẽ pihañemoñeta raisa, porapichisa, mendasa sui yemboaguasasa, nomendai vahe yemboaguasa tẽisa, mondasa, temira iyavei ava rese ñemoñeta tẽisa.

²⁰ Evocoi nungar mbahe rumo omboangaipa ava; ndahei angaipa acoi yande caru renonde yande yepoiẽhisa nungar —ehi.

Cuña ndahei vahe judía viroya Jesús

²¹ Ichui osẽ Jesús oso, uguata Tiro ivi rupi, Sidón ivi rupi avei.

²² Cuña cananea, Tiro, Sidón ivi rese secoi vahe oyemboya Jesús rese aipo ehi:

—¡Che Yar, David suindar, che paraisuerecomi eve! ¡Che membri vireco carugar oyese! —ehi pucu-pucu ou chupe.

²³ Ahe rumo nombovevi eté chupe. Evocoiyase semimbohe oyemboya yuvireco sese aipo ehi:

—Emboyepepi co cuña yande sui. Esepia, sãse pucu-pucu ou yande raquicuei —ehi yuvireco chupe.

²⁴ Evocoiyase aipo ehi güemimbohe upe:

—Che Ru Tũpa rumo che mbou Israel recua pendar upeño. Esepia, ahe ovesa ocañi tẽi vahe nungar yuvireco —ehi.

²⁵ Ahe cuña rumo oñenopiha sovai, aipo ehi chupe:

—¡Che Yar, che pĩtiviimi eve! —ehi.

²⁶ Ahe rumo aipo ehi chupe:

—Naporai rumo yarocua pan tahir sui cave tohu yamondo vaherã —ehi.

²⁷ —Supi eté, che Yar, cave avei rumo ohuño ité pan rahicuer oviapi vahe yepi —ehiño chupe.

²⁸ —¡Cuña, tuvichá nde yeroyasa! Aviye, ãgüe tehi eté nde remimbotar rupi —ehi.

Aipo ihe ramoseve, ocuera voi eté imembri.

Jesús setá ombogüera ava imbaheasi vahe

²⁹ Ichui Jesús osẽ oso ipa Galilea ivii. Ipare oyeupi ivitri rese uguapi oĩ.

³⁰ Aheve setá ava oyepota, güeru ati imbaheasi vahe yuvireco chupe: ndipindugüei vahe, ndasesapisoi vahe, ipãri-pãri vahe, niñehengatui vahe,

iyavei ambuae setá imbaheasi vahe no. Omondose sovai yuvireco, ahe opa ombogüera.

³¹ Ichui ava niñehengatui vahe oñehe; ipãri-pãri vahe ocuera tupri; ndoguatai vahe oguata avei iyavei ndasesapisoí vahe osareco yuvireco. Sepiase ava rehií oyepihamondií aipo ehi: “Imboeteipri Israel Tüpa tasecoi” ehi yuvireco.

Jesús oyopoi cuatro mil cuimbahe

³² Evocoiyase Jesús oñehe güemimbohe upe aipo ehi:

—Iparaisu catu co ava yuvireco cheu. Esepia, mbosapi ari yuvirecoi yande piri iyavei ndipoi eté mbahe semihura. Ndiyai sêtave sie porêhi reseve amondo. Aviyeteramo oviroviapi-api tiêtera tieporêhi peri rupi yuvireco viña —ehi.

³³ Evocoiyase semimbohe aipo ehi yuvireco chupe:

—¿Que sui pîha orosecara tembihu ava rehií upe nara cohava ava porêhisave viña? —ehi yuvireco.

³⁴ —¿Mbovi vo pan pereco? —ehi.

—Orovirecomi siete pan iyavei moviromi têi pirami —ehi semimbohe yuvireco chupe.

³⁵ Evocoiyase, “Peguapi ivi harive” ehi ava rehií upe.

³⁶ Ahese oipisi siete pan, pirami reseve, “Aviye ndeu” ehi Vu upe. Ichui omboyaho-yaho güemimbohe upe imondo. Ahe evocoiyase omondopa ava rehií upe yuvireco.

³⁷ Opacatu ava ocaru vahe ihîtaro yuvireco. Ipare semimbohe omboapipo iri rane sumbirer siete iruova yuvireco.

³⁸ Cuimbahe ocaru vahe retacuer cuatro mil. Cuña, chîhivahe retacuer rumo ndicuasai.

³⁹ Ipare Jesús, “Aviye” ehi ava upe, ahese oha carite pipe oso ivi Magadán rupi.

16

Fariseo iyavei saduceo oporandu poromondiisa rese yuvireco

¹ Fariseo iyavei saduceo yuviraso Jesús repia secoãha ãgua yuvireco viña. “Emoporêhi Tüpa suindar nde recosa poromondiisa pipe oreu” ehi yuvireco chupe.

² Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, ìva rese pîra iteanga’;

³ iyavei añihivei: ‘Co pipe ari naporai chira. Esepia, ìva rese pîra vai anga, pîtu guasu-guasú avei’ peye. Pe niha peicua mbahe ìva resendar têi oyecua vahe mombehu; ndapeicuai rumo mara oyapave co poromondiisa cûriteindar ava upe imombehu.

⁴ Co ava ndaseco põrai vahe oyepepi vahe Tüpa sui oporandu poromondiisa rese ‘¿Tüpa suindar ité pîha?’ oyapave. Che rumo namboyecuai chira ambuae poromondiisa chupe; acoi poromondiisa Tüpa oyapo Jonás upe güeraño tupri asevara chupe” ehi.

Ichui oseyapaño ava rehií oso.

Fariseo iyavei saduceo porombohesa inungar pan mboapeposa

⁵ Evocoiyase semimbohe oyepota ipa rovai yuviraso. Pan sui rumo sesarai eté yuvireco.

⁶ Evocoiyase Jesús aipo ehi chupe:

—Peicua catu fariseo iyavei saduceo pan mboapeposa sui —ehi.

7 Iñhe renduse, semimbohe aipo ehi oyeupe yuvireco:

—¡Ndayarui eté rumo pan! —ehi-ehi tēi oyeupe yuvireco.

8 Ahe rumo oicua güemimbohe pihañemoñetasa. Sese aipo ehi chupe:

—¡Mahera, “Ndayarui pan” peye! ¡Pe ndapeyeroya tuprii che rese!

9 ¿Ndapeicua vītei vo che rembiapo? ¿Ndapeyemomahenduha vītei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbirer imonuhase?

10 ¿Ndapeyemomahenduha vītei avei vo acoi amboyaho vahe siete pan ava cuatro mil vahe upe, iyavei mbovi iruova pemboapipo sumbirer?

11 ¡Too, mara peye rutei pe aipo senducuaēhi! Ndahei mo pan rese ité añehe. Peicua catu fariseo iyavei saduceo pan mboapeposa sui —ehi.

12 Ahesse ramo oicua yuvireco cute, ndahei pan mboapeposa rese ité oñehe, Jesús rumo oñehe fariseo iyavei saduceo eta porombohesa rese tēi.

Pedro oicua uca Jesús Tūpa Rembiporavo secose

13 Oyepotase Jesús, oso tecua Cesarea coti Filipino ivi rese, aheve oporandu güemimbohe upe aipo ehi:

—¿Mara ehi vo ava oñehe yuvireco che rese, Ava Riquehir che recose? —ehi.

14 Semimbohe evocoyase aipo ehi yuvireco chupe:

—Amove ava: “Juan Oporoāpiramo vahe” ehi yuvireco ndeu; ambuae aipo ehi yuvireco: “Elías”; ambuae ava aipo ehi avei yuvireco: “Jeremías”; anise ambuae ava, “Tūpa ñehe mombehusar mboetasa” ehi yuvireco ndeu —ehi.

15 —Pe no, ¿‘Ava co secoi’ peye ru pe cheu no? —ehi güemimbohe upe.

16 —Nde niha Tūpa supi eté vahe Rembiporavo imombehupri; Tahir ité ereico —ehi Simón Pedro.

17 —Nde sovasapri ereico Simón, Jonás rahir. Esepia, ndahei ava tēi omboyecua co mbahe ndeu, che Ru iva pendar teieté omboyecua ndeu —ehi—.

18 Nde Pedro ereico, co ita guasu harive amopuhara che tūparoguã. Ñepeipe manosa ndosecoreroyi chietera opīratasa pipe.

19 Evocoyase che amondo Tūpa mborerecuasa resendar mboisa ndeu; acoi, “Aviye” erese que mbahe uve co ivi pipe, ēgüe ehi aveira ivave; iyavei, “Aní” erese que mbahe uve co ivi pipe, ēgüe ehi aveira ivave —ehi.

20 Ipare Jesús aipo ehi güemimbohe upe: “ ‘Co Tūpa Rembiporavo Poropisirosar’ peye eme ava upe cheu” ehi.

Jesús omombehu omano āgua

21 Ichuive tupri Jesús omboipi imombehu güemimbohe upe oico: “Iya niha cheu che so āgua tecua guasu Jerusalén ve. Aheve judío rerecar, pahi rerecar ivate catu vahe iyavei Moisés porocuita rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari pipe acuerayevira” ehi.

22 Pedro rumo viraso co cotimi chupe oñehengata āgua:

—¡Tūpa ndoipotai eté evocoi nungar nde reco āgua, che Yar! ¡Ndipoi chietera mbahe ndeu! —ehi Pedro chupe viña.

23 —¡Esiri che sui, Caruguar! —ehi Pedro upe—. Nde che reiti pota eve mbahe tēi pipe. Esepia, nandepihañemoñetai mbahe Tūpa upendar rese, ava nungar tēi nde pihañemoñeta eico —ehi.

24 Ipare aipo ehi güemimbohe upe:

—Acoi oguata pota vahe che rupi, tasesarai mbahe güemimbotar aposa sui iyavei inungar-ra curusu rese ovosiira viña, toyemoingatu voi che recocuer rese oparaisu āgua iyavei toguata tupri che rupi.

²⁵ Esepia, acoi ava güetecuer tēi raisupar, ocañi tēi etera; acoi ava omocañi tēi vahe rumo güetecuer che recocuer rese, ahe oñepisirora.

²⁶ Esepia, ¿aviye ai angahu pñha ava upe opacatu mbahe co ivi pipendar pisi ãgua, ahe ae tēi omocañise güecocuer yuvireco viña? ¿Mbovi pñha omondora ava güecocuer repirã viña?

²⁷ Esepia che, Ava Riquehir, ayevira che Ru reco pñratasa pipe che rembiguai iva pendar reseve curi. Che evocoyase aicuara ñepepe-pei ava rembiapo agüer rupi chupe.

²⁸ Supi eté oimera amove cohava ava nomano vitei chivaherã, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

17

Jesús ñecuñaro agüer

¹ Seis ari pare Jesús viraso Pedro, Santiago, tivri Juan reseve co coti ivitri ivate vahesave oyeupi.

² Aheve, aviyeteramo tēi oñecuñaro güemimbohe rovai. Evocoyase sendi sova inungar ari, iturucuar morochí, sendi avei.

³ Aheseve voi oyemboyecua Moisés, Elías reseve yuvireco chupe. Ahe oñemoñeta oyeupe yuvinoha.

⁴ Ahese Pedro aipo ehi chupe:

—Che Yar, ¿aviye ai eté cohava yaico! Ereipotase, ayapora mbosapi teyupami: ñepepe ndeu nara, ambuae Moisés upe, ambuae evocoyase Elías upe nara —ehi.

⁵ Aviyeteramo tēi iva quiha rese osesapé ogüeyi ou oyopipa tupri ité. Ipãhuve oyeendu ñehesa aipo ehi: “Co che Rahir, che rembiaisu. Che mboviharete; peyapisaca catu ñehe rese” ehi vahe.

⁶ Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui.

⁷ Ahese oyemboya oso güemimbohe rese, oñatoi aipo ehi chupe:

—Pepũha; pesiquiyeyi rene —ehi.

⁸ Evocoyase omahe yuvireco sese, ahese ahe güeraño osepia imoha yuvireco.

⁹ Ipare yuvirogüeyi ivitri sui aipo ehi evocoi mbosapi güemimbohe upe:

—Ndapemobehui chietera que ñepepe ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

¹⁰ Evocoyase semimbohe oporandu yuvireco:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹¹ Evocoyase omboyeyi güemimbohe upe aipo ehi:

—Elías rane ité niha oura opacatu mbahe moingatú ãgua curi.

¹² Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Ëgüe ahe aveira niha cheparaísura ahe ava povrive vichico —ehi.

¹³ Evocoyase semimbohe osenducua ramo ñehe yuvireco. Ëgüe ehi Jesús oñehe Juan Oporoãpiramo vahe rese.

Jesús ombogüera chíhivahe carugar rerecosar

¹⁴ Viroypota Jesús güemimbohe ava rehüsave seraso. Aheve mbia oyemboya oso sese, oñenopiha sovai aipo ehi chupe:

15 —Che Yar, ereiparaisuerecomi tēira che rahir cheu viña. Esepia, ahe ipiha mbaheasi vahe, oyemombaraisú iteanga. Setá yupagüer oviapi tatave, ive avei no.

16 Sese aru tēi nde remimbohe upe. Nombogüera catu rumo yuvireco —ehi.

17 —¡Too, ndapeyeroya tupri vitei eté che rese! ¡Co coti tēi vite pe pihañemoñetas! ¡Mbovi rupi rutei vo aico vitera pe pāhuve che ñemosasa pipe! Peru evocoi chíhivahe cheu —ehi.

18 Ahese oñehe pírata carugar upe chíhivahe sui imose. Aheseve ocuera tupri voi eté.

19 Ipare semimbohe oporandu co cotimi yuvireco chupe:

—¿Mahera pīha ndoromose catu eté carugar ichui? —ehi yuvireco.

20 —Esepia, ndapeyeroya tuprii Tūpa rese. Supi eté sese pe yeroyasa, yepé ndoyavii chira mostaza ráhii tahimi vahe viña, aipo peyera co ivitri upe: ‘Esiri, eso coi coti’ peyera. Evocoyase ivitri osiriño itera. Ahese ndapemboavaimi chira mbahe.

21 Evocoi nungar carugar imosesa yayerurese yande yecuacusa pipe —ehi.

Jesús omombehu iri omano ñgua

22 Jesús oguata vitesese Galilea ivi rupi, aipo ehi güemimbohe upe oico:

—Che, Ava Riquehir, imondopri aicora che amotarēhimbar povrive.

23 Che yuca aveira yuvireco. Acuerayevira rumo imombosapisa ari pipe —ehi.

Osenduse semimbohe aipo ihe, ndovihai tēi yuvireco.

Jesús omondo guarepochi tūparo uve nara oyeupe oporandu vahe upe

24 Oyepotase Jesús güemimbohe reseve tecua Capernaum ve, aheve guarepochi reroquasar tūparo upe nara yuviraso Pedro upe, oporandu yuvireco chupe:

—¿Supi eté pe rerecuar ndomondo guarepochi tūparo upe nara? —ehi.

25 —Omboepi niha —ehi Pedro chupe.

Evocoyase oiquese Pedro oi pipe, aheve Jesús rane oñehe chupe aipo ehi:

—¿Mara ehi nde pihañemoñeta, Simón? ¿Ava sui vo vīrocuā guarepochi mborerecuar guasu co ivi pipe yepi? ¿Omu sui pīha, ambuae ava sui tie? —ehi.

26 Pedro evocoyase omboeyevi chupe:

—Ambuae ava sui —ehi.

—¡Taa! —ehi—. Evocoyase mborerecuar povri pendar nombopii chira yuvireco —ehi—.

27 Guarepochi reroquasar moñemoiroēhi ñgua rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepe guarepochi. Ahe eraso chupe. Ipipe iyacatura imboepi ñgua yandeu —ehi Jesús Pedro upe.

18

¿Ava vo seco ivate catu vahe?

1 Ahe ari pipeve semimbohe oyemboya Jesús rese yuvireco mbahe rese oporandu ñgua chupe:

—¿Uma vo seco ivate catu vahe Tūpa mborerecuasa pipendar? —ehi.

2 Evocoyase Jesús: “Erio” ehi ñepe chíhivahemi upe, omondo güemimbohe pāhuve imoha,

3 aipo ehi:

—Supi eté, acoi ndapeñecuñaroise iyavei ndapeicoise chihivahemi nungar, ahese ndapeiquei chira Tupa mborerecuasa pipe.

⁴ Acoi oñemomini vahe rumo inungar co chihivahemi, evocoi nungar seco ivate catura Tupa mborerecuasave.

⁵ Acoi ava oipisi vahe co chihivahemi nungar che rer pipe sereco, che ité che pisi yuvireco —ehi.

Iparaïsu itera ava oporomongaipa uca vahe

⁶ “Acoi que ava rumo omboangaipa uca vahe co chihivahemi nungar che reroyasar, iyacatu evocoi nungar ava ñapichisa ita guasu iyesho rese para guasu pipe imombo água.

⁷ Iparaïsu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroatoisa yepi, jahe imboangaipa ucasar rumo iparaïsu itera!

⁸ “Sese inungar pe po, anise que pe pi avei pemboangaipa uca vahe, peyasia, pemombora amombri peyesui viña. Esepia, aviye catu peiquera tecove apirêhisave ñepepe pe pi, pe po rese, peso rãgüer sui tata guasu apirêhisave ñuvirio pe po, que ñuvirio pe pi reseve.

⁹ Iyavei pe resa pe mboangaipa ucasa, penose, pemombo amombri peyesui. Esepia niha, aviye catu peiquera ñepeimi pe resa rese tecove apirêhisave, ñuvirio pe resa rese tata guasu apirêhisave pe reique rãgüer sui.

Porombohesa ovesa ocañi tẽi vahe resendar

¹⁰ “Peroiroi rene que ñepepe chihivahemi che reroyasar. Esepia, ivave sembuguai che Ru pirindar ité yuvirecoi yepi” ehi.

¹¹ “Che niha, Ava Riquehir, ayu ava ocañi tẽi vahe pĩsiro água.

¹² “¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepepe ichui viña, evocoiyase ovesa ranera noventa y nueve tẽi vahe ovesa ivitri rese. Oyevira ocañi vahe reca oso.

¹³ Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui.

¹⁴ Ëgüe ehi avei che Ru ivave secoi vahe, ndoipotai eté que ñepepe ava che reroyasar chihivahemi nungar cañi água” ehi.

Porombohesa yande ñero água rese

¹⁵ “Acoi nde mboetas Tupa reroyasar oyapose que mbahe tẽi ndeu, eresora nde ae, eñehe mbahe ndeu oyavi vahe rese chupe. Nde ñehe viroyase, ahese peñero oyeupe cute.

¹⁶ Nande reroyase rumo, ahese ereñehera ñepepe, anise ñuvirio ava upe nde pĩvivi água rese. Ahe avei tosendu pe ñehe. Ahese oimera que ñuvirio, anise mbosapi sendusar.

¹⁷ Acoi ndoviroyase pe ñehe, ahese emombehu opacatu Jesús reroyasar upe; ahe ndoviroyase ité no, evocoiyase Tupa ndoicuai vahe nungar perco iyavei inungar mbahe-mbahe tẽi aposar, êgüe peye sereco” ehi.

¹⁸ “Supi eté acoi, ‘Aviye’ peyese que mbahe upe co ivi pipe; êgüe ehi aveira ivave. Iyavei co ivi pipe, ‘Ani’ peyese que mbahe upe, êgüe ehi aveira ivave.

¹⁹ “Iyavei co amombehu potami avei pẽu: Acoi ñuvirio co ivi pipe pe pihañemoñetasa oyoya tuprise que mbahe rese peporandu água pe yeruresa pipe, evocoiyase che Ru iba pendar omondora pe porandusa pẽu.

²⁰ Esepia, acoi ava ñuvirio, que mbosapi oñemonuhase che rer pipe yuvireco, aheve che aico ipãhuve” ehi.

²¹ Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tēi cheu oyapose? ¿Siete yupagüer rupi pīha? —ehi.

22 —¡Aní! —ehi—. ¡Setenta rupi siete oyupagüer! —ehi Pedro upe.

Yembohesa ava niñero potai vahe resendar

23 “Tūpa mborerecuasa inungar mborerecuar guasu omoingatu pota vahe güembiguai revesa chupe.

24 Evocoyase omboipi imoingatu āgua, ahese ipitiviisar güeru ireve ati catu vahe guarepochi rese chupe.

25 Ahe rumo ndovirecoi imboepi āgua. Sese co mborerecuar oyocuai opitiviisar aipo ehi: ‘Timondopasa co che rembiguai sembireco reseve, tahir iyavei opacatu mbahe vireco vahe reseve irevesa mboepipa āgua cheu’ ehi.

26 Evocoyase sembiguai oñenopiha sovai aipo ehi chupe: ‘¡Too! Che rerecuar, eñemosañomi tēi cheu. Opara niha amboepi ndeu’ ehi chupe.

27 Ahe oiparaisuereco, opoi irevesa sui.

28 “Aheseve voi rumo sembiguai osēse, osepia ambuae ondugüer oyeupe ndasetu tuprii vahe ireve. Ahe chupe aipo ehi iyesho pisi: ‘¡Emboepipa acoi nde revesa cheu!’ ehi.

29 ‘¡Aní!’ ehi oñenopiha oso sovai, ‘Eñemosañomi tēi cheu’ ehi, ‘amboepipara niha acoi che revesa ndeu’ ehi.

30 Niñero potai eté rumo. ‘Tomboepipa rane ité orevesa cheu’ ehi soquenda uca.

31 Osepia rumo ambuae imboetasa, tasí iteanga ipiha pipe. Ahese yuviraso omombehu güerecuar uve opacatu sembiapocuer yuvireco.

32 Evocoyase ahe serecuar güeru uca aipo ehi chupe: ‘¡Mbahe tēi eté nde rembiapo! Che apoño opacatu nde revesa sui. Esepia, ereyemombaraisu catumi ereporandu cheu.

33 ¡Ndiyai vo nde avei ereiparaisuereco nde mboetasa viña, inungar che oroparaisuereco!’ ehi.

34 Ichui serecuar oñemoirosave oyocuai imombaraisu āgua ‘tomboepipa rane ité orevesa cheu’ oyapave.

35 “Indó, evocoyase ēgüe ehi aveira che Ru iva pendar pēu ndapeñeroise ité peyeupe” ehi Jesús güemimbohe upe.

19

Jesús oporombohe mendasa sui poiēhi āgua

1 Ipare Jesús osē Galilea sui, oso Judea ivi rupi ari sēsa coti iai Jordán rovai.

2 Ava rehii yuviraso saquicuei. Aheve setá imbaheasi vahe ombogüera.

3 Evocoyase oyemboya fariseo Jesús rese yuvireco; secoãhasave oporandu yuvireco chupe:

—¿Aviye pīha opoi cuimbahe güembireco sui que mbahe tēi oyapose? —aipo ehi yuvireco chupe.

4 Ahe rumo omboyeve fariseo upe:

—¿Ndapesenducuaيمي vo ñehesa icuachiapri pipe peyeroquise: ‘Yipandar yande Aposar oyapo cuimbahe, cuña avei’ ehi?

5 Iyavei aipo ehi: ‘Sese niha cuimbahe omendase, oyepepira oyesupa sui güembireco rese ité yuvirecoi āgua. Evocoyase ñuvirío yuvirecoira ñepeí ava nungar’ ehi.

6 Sese ndahe iri ñuvirío, ñepeí vahe ité yuvirecoira. Evocoyase ava Tūpa omomenda vahe oyese, ndiyai ava tēi omboyepepi yuvireco oyesui —ehi.

7 Evocoyase fariseo oporandu yuvireco chupe:

—¿Mahera ru oyocuai Moisés cuimbahe omondo vaherã güembireco upe cuachiar poisa resendar opoi ägua ichui? —ehi.

8 —Pe preroyaëhisa pipe niha Moisés ëgüe ehi pëu. Yipisuive ité rumo Tüpa ndoipotai oyesui opoi ägua yuvireco.

9 Esepia, acoi opoi vahe güembireco mbahe ndoyavii vahe sui omendase ambuae cuña rese, ahe oyemboaguasa tõi vahe —ehi fariseo upe.

10 Ipare semimbohe aipo ehi yuvireco chupe:

—Ëgüe ehise cuimbahe güembireco rese, evocoyase aviye catu ndayamendai chira —ehi.

11 —Ndahei chira rumo opacatu osenducua che aipo ahe vahe yuvireco. Tüpa ombou vahe sembiaporã, ahe güeraño osenducua yuvireco —ehi güemimbohe upe—.

12 Esepia, oime pihañemoñetasa ava mendaëhi ägua: amove ohasa suive ndatahi vahe, ambuae nomboahi ucai ava yuvireco, ambuae evocoyase nimendasei. Esepia, ahe oporaviqui pota Tüpa mborerecuasa reseño ité. Acoi oicatu vahe co ñehesa reroya ägua, toviroyaño —ehi.

Jesús osovasa chihivahe

13 Ipare ahe pendar güeru moviro chihivahe Jesús upe yuvireco ‘tomondo opo iharive; toyerure avei sese no’ oyapave; semimbohe rumo, “¿Mahera vo peruño tõi chihivahe?” ehiño serusar upe yuvireco.

14 Jesús rumo aipo ehi:

—¡Mahera ndapeipotai iyu ägua! Toyugüeruño chihivahe cheu. Esepia, co chihivahe nungar ava yuviroiquera che Ru povrive —ehi.

15 Ipare omondo opo chihivahe harive osovasa. Ichui osë oso.

Mbia chihivahe imbahe eta vahe omoñeta Jesús

16 Mbia chihivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirëhi vahe rereco ägua? —ehi.

17 —¡Mahera ereporandu cheu mbahe aviye vahe rese! —ehi—. Ñepeño ité aviye vahe oime. Erereco potase rumo tecovesa apirëhi vahe, emboyeroya mborocuita —ehi.

18 —¿Uma vo aipo mborocuita? —ehi.

Ahese omboyevi chupe:

—Ndereporoyucái chira, nandegasai chira, nandemondai chira, nanderemirai chiaveira ambuae ava rese,

19 eremboyeroyara nde ru, nde si avei, eresaisura ambuae ava nde yeaisu nungar eico’ ehi icuachiapri pipe —ehi mbahe yar upe.

20 —Co rumo mborocuita opacatu amboaviye ité yepi. ¿Mbahe vo evocoyase ipane vite che ayapo vaherã? —ehi.

21 —Ereipotase mbahe tupri pipe nde reco ägua, emondopa rane nde mbahe; ahe sepri evocoyase eremondora ava iparaisu vahe upe. Ichui ererectora mbahe aviye vahe ivave. Ipare ereguatara che rupi —ehi chupe.

22 Aipo oyeupe hese rumo, ahe mbia oyepepiño ichui oviharëhisave oso. Esepia, mbahe yar ité secoi.

23 Evocoyase aipo ehi güemimbohe upe:

—Supi eté yavai eteanga imbahe eta vahe upe oi que vaherã che Ru mborerecuasave.

24 Aipo ahe iri: Yavai rai camello upe yucuar rupi seique ägua; ava imbahe eta vahe upe rumo yavai catu che Ru mborerecuasave seique ägua —ehi.

25 Aipo iñehesa renduse, semimbohe oyepihamondii aipo ehi:

—¡Ava angahu pīha evocoyase oñepisirora yuvireco viña! —ehi yuvireco.

²⁶ Omahe güemimbohe rese, aipo ehi:

—Ava tēi upe yavai aipo nungar mbahe apo. Tūpa upe rumo mbahe opacatú ndayavaimi eté —ehi.

²⁷ Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata água. ¿Mbahe evocoyase oimera oreu? —ehi.

²⁸ —Oime itera niha mbahe pēu. Esepia, acoi ari oyepotase opacatu mbahe recuñaro água, ahese che, Ava Riquehír, aguapira che rendave che mborerecua guasusave. Pe avei, che rupindar, peguapira doce tenda harive. Ahese opacatu júdíó acoi doce imar Israel suindar recocuer rese peporandura curi.

²⁹ Acoi opacatu ava oseya vahe güēta, anise que víquehír, anise vívri, güeindri, que vu, anise osi, guahír, que oivi avei che raisusa pipe, ahe oipisira omahera cien yupagüer rupi mbahe oseya vahe iyavei vírecora tecovesa apirēhi vahe.

³⁰ Seta vai rumo cūritei yipindar vahe, ipa tēira yuvirecoi; setá aveira cūritei ipa tēi vahe, yipindar yuvirecoira curi —ehi.

20

Yembohesa oporaviqui vahe resendar

¹ “Tūpa mborecuasa inungar acoi ava ivi yar osē añihiveive oyeupe nara oporaviqui vahe reca ‘toporaviqui che uva tive yuvireco’ oyapave.

² Oyosuse ava, ahese omoingatu oyeupe oporaviqui vahe rā upe ñepeí ari mboraviqui repri imboepi água. Ahese opa omondo ocove imboporaviqui.

³ Ipare osē, oso añihivei, arivate catumi osepia ocarusu pipe ambuae ava oporaviquisa ndovirecoi vahe,

⁴ aipo ehi chupe: ‘Peso, tapeporaviqui che uva tive. Amboepi tuprira niha pēu’ ehi. Ahe evocoyase yuviraso oporaviqui água icove.

⁵ Ipare oso iri mbiter ari rupi oyeupe oporaviqui vahe reca, ēgüe ehi tupri avei caharuse, las tres rupi.

⁶ Ipa osē iri las cinco pipe, aheve avei osepia ambuae ava ndovirecoi vahe oporaviquisa yuvinoha. Chupe aipo ehi: ‘¿Mahera peyembohí tēi ari momba cohava pehā?’

⁷ ‘¡Aní!’ ehi yuvireco, ‘Esepia, ndipoi eté ava, tapeporaviquimi, ehi vahe oreu’ ehi. Evocoyase, ‘Peso, pe avei peporaviqui tive’ ehi.

⁸ “Pítu ramose, cove yar aipo ehi oporaviqui vahe rese yangarecuar upe: ‘Eñehépa ava oporaviqui vahe upe. ‘Emboepi ipa yugüeru vahe upe rane iporaviqui yuvireco chupe. Ipare tenondar uve’ ehi.

⁹ Evocoyase las cinco pipe yuviroique vahe oporaviqui, ahe rane tenonde yugüeru. Oyacatu ñepeí-peí ñepeí ari rupindar oipisi guarepochi yuvireco.

¹⁰ Ipare tenonde catu yuviroique vahe oporaviqui, ahe chupe ipa tēi imboepisa. Ahe ipihañemoñeta, ‘Yaipisi catura revo guarepochi’ ehi oyeupe yuvireco viña. Ipare rumo ahe tupriño avei oipisi ñepeí ari rupindar yuvireco.

¹¹ Guarepochi pisire rumo oñemoiro cove yar upe yuvireco,

¹² aipo ehi: ‘Co ava yugüeru ipa tēi vahe, ñepeí horami tēi oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemoño tēi oroporaviqui ari momba sacucuer upe oricoi’ ehi.

¹³ Cove yar rumo aipo ehi ñepeí ipāhu pendar upe: ‘Mbori, ndaheí mbahe tēi ayapo ndeu. Esepia, amboepi guarepochi ñepeí ari resendar ndeu acoi, Aviye, peye vahecuer rese cheu’ ehi.

14 ‘Evocoyase ndo co, eipisi nde guarepochi, eraso. Che rumo amondo pota co ava ipa tēi oi que vahe upe inungar tupri ndeu amboepi.

15 Esepia, cheu iyacatu ité che remimbotar rupi mbahe ayapo che guarepochi rese. Nderecatēhi tie ambuae ava mbahe rese che ayapose mbahe aveye vahe chupe’ ehi.

16 “Indó, ēgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tēi vahe rā yuvireco curi” ehi güemimbohe upe.

Jesús omombehu iri omano āgua

17 Jesús oguata oso tecua Jerusalén piar rupi. Ahese co cotimi oipeha güemimbohe doce vahe oyeupe aipo ehi chupe:

18 –Peyapisaca tupri che ñehe rese: yasora tecua Jerusalén ve. Aheve che, Ava Riquehír, che pisira, che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, “Tomano” ehira yuvireco cheu.

19 Ipare che mondora ava ndahei vahe yande mu upe mara-mara tēi che rereco āgua che roerōrosa pipe. Ipipe che yucara curusu rese yuvireco. Imombosapisa ari pipe rumo acuerayevira –ehi.

Santiago, Juan si oporandu Jesús upe mbahe rese omembri upe nara

20 Ipare Zebedeo rembireco ñuvirío omembri reseve, oyemboya Jesús rese yuvireco. Ahese oñenopiha sovai oporandu āgua mbahe rese.

21 Evocoyase,

–¿Mbahe vo ereipotami? –aipo ehi ichi upe.

–Che aipota che membri erembogupira ndeyepiri ñepeí nde mbahe rese pocosa coti, ambuae nde mbahe rese pocoēhisa coti nde mborerecuasave –ehi chupe.

22 –Pe ndapeicuai mbahe rese peporandu. ¿Peiporara catura pīha co mbahe-mbahe tēi aiporara vahe rā, inungar-ra que igua iro vahe aihu vahe rā viña? –ehi.

–Taa, orocatuño itera –ehi yuvireco.

23 –Supi eté peiporarara mbahe-mbahe tēi. Co rumo ndiyai cheu, che piri opombogupí āgua che mbahe rese pocosa coti, ambuae che mbahe rese pocoēhisa coti avei. Che Ru rumo omoingatu güembiporavo upe nara ogupai vahe rā che ipive –ehi.

24 Aipo iñehesa renduse ore ambuae diez semimbohe, oroñemoiro Santiago, Juan upe avei.

25 Evocoyase, “Perio” ehi oreu.

–Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe, iyavei acoi ivate catu vahe oyeecoapirasá omborecuasa pipe yepi.

26 Pe rumo ēgüe ndapeyei chira peico. Iyacatu rumo acoi ava oipota vahe ivate catu güeco āgua pe pāhuve, ihañeco rane itera opacatu ambuae ava rese.

27 Iyavei acoi pe pāhu pendar oipota vahe tenonde catu güeco āgua, ihañeco tupri ranera opacatu pe pāhu pendar rese.

28 Esepia, che, Ava Riquehír, ayu ndahei vahe rese ihañeco āgua, che rumo ayu ava rese che hañeco āgua iyavei amano vahe rā ava eta repira Carugar povri sui senose āgua –ehi.

Jesús ombogüera ñuvirío ndasesapisoí vahe

29 Ipare Jesús, güemimbohe reseve oñocuase tecua Jericó yuvireco, ahese ava rehí yuviraso saquicuei.

³⁰ Aheve peri popive ñuvirío ava ndasesapisoi vahe oguapi yuvinoi. Evo-coiyase osenduse Jesús ocuase supi, osapucaí pĩrata yuvireco chupe aipo ehi:
—¡Ore Yar, mborerecuar guasu David suindar, ore paraisuerecomi tẽi eve!
—ehi yuvinoi.

³¹ Ahe ava oyaca-yacaño: “Quiriri” ehi yuvireco chupe. Ahe rumo osapucaí pĩrata catuño ité yuvireco aipo ehi:

—¡Ore Yar, David suindar, ore paraisuerecomi tẽira eve viña! —ehi iriño ité yuvireco.

³² Evocoiyase osendu iñehe, opita, “Perio” ehi chupe. Ipare,

—¿Mbahe vo peipota ayapo vaherã pẽu? —ehi.

³³ —¡Ore Yar, ore mbosarecomi tẽi eve! —ehi.

³⁴ Evocoiyase saisusave opoco sesa rese. Ahe ramoseve ndasesapisoi vahe osareco tupri ai eté yuvireco. Ipare yuvirasoño ité supi.

21

Jesús oi que Jerusalén pipe

¹ Acoi orovirovise Jerusalén, oroyepota tecuami Betfagé popive, ivitri Olivo serer vahe ipimi. Aheve omondo ñuvirío güemimbohe

² aipo ehi chupe:

—Peso co tecuami yande rovaindarve. Aheve pesepiara guaricu imemברי reseve ñapichimברי imoha. Ahe peyorañora seru cheu.

³ Acoi que ava oporanduse yuvireco pẽu sese, “Yar oiporu pota, ipare niha omboevĩ voĩñora” peyera chupe —ehi güemimbohe upe.

⁴ Co ãgũe ehi chupe arachendar Tũpa ñehe mombehusar ñehengagũer mboaviye ãgua, aipo ehi vahe:

⁵ “Pemombehu Sion pendar upe:

‘Pesepia, pe rerecuar guasu ou oico güeco mbegũesa pipe pẽu guaricu harive imemברי reseve’ peyera” ehi.

⁶ Evocoiyase evocoi semimbohe yuviraso, oyapo ité ocuaisa yuvireco.

⁷ Güeru guaricu imemברי reseve yuvireco chupe. Omondo oturucuar icupeao ãgua yuvireco. Ipare Jesús oyeupi iharive.

⁸ Iyavei ava rehi oipipira oturucuar peri rupi imboetei guasusa pipe. Ambuae evocoiyase oyasia pindo omondo peri rupi yuvireco saperã.

⁹ Ava rehi senonde, saquicuei avei oguata vahe osapucaí yuvireco aipo ehi:

—¡Co mborerecuar guasu David suindar, imboeteipri tasecoi! —ehi—,
¡Sovasapri secoi ou vahe yande Yar rer pipe! ¡hvave imboeteipri tasecoi! —ehi yuvireco.

¹⁰ Oiquese Jerusalén pipe, opacatu co tecua pipendar oyepihamondii yuvireco. Iyavei setã oporandu-randu yuvireco:

—¿Ava piha co mbia? —ehi tẽi yuvireco.

¹¹ Ava rehi oguata vahe Jesús rupi aipo ehi yuvireco chupe:

—Co niha Jesús, Tũpa ñehe mombehusar, ivi Galilea rupindar, Nazaret pendar —ehi yuvireco chupe.

Jesús omombopa ava mbahe mboepisar tũparo pipe sui

¹² Ipare Jesús oi que judío tũparo guasu pipe. Ipipendar opa omombo ichui ava mbahe mondosar, mbahe rero cuasar. Iyavei ava guarepochi recuñarosar mesa opa omboviapi ichui; apicasu mondosar renda avei omboviapi imondo.

¹³ Ipare aipo ehi chupe:

—Icuachiapri aracahendar pipe aipo ehi: ‘Che rēta yeruresa rētarā’ ehi. Pe rumo imonda rai vahe rēta nungar tēi pereco —ehi.

¹⁴ Aheve oyemboya Jesús rese yugüeru ava ndasesapisoi vahe, ipāri-pāri vahe avei. Ahe opa ombogüera.

¹⁵ Osepiase rumo pahi rerecurar guasu iyavei judío porocuita rese oporombohe vahe yuvireco mbahe ndayasepiai vahe sembiapo, iyavei tūparo pipe osenduse chihivahe sapucaisa: “¡Imboeteipri David suindar tasecoi!” ehise, aheese oñemoiro yuvireco

¹⁶ aipo ehi chupe:

—¡Eresendu vo aipo ehi tēi vahe chihivahe yuvireco! —ehi.

—Taa, asendu ité —ehi—. Pe no, ¿ndapeyeroquii vo sesendar ñehesa icuachiapri pipe:

‘Chihivahemi, pītanimi avei osapucaira nde mboeteisa pipe yuvireco’ ehi vahe? —ehi.

¹⁷ Ipare opaño oseya ava oso tecua Betania ve. Aheve ñepepi pītu oque.

Jesús omomara ivira higuera ndihai vahe oñehe pipe

¹⁸ Ahere ayihive añihiveive, oyeveise tecua Jerusalén ve, Jesús ndasiepoi oico.

¹⁹ Aheve peri popive osepia ivira higuera. Ahe sese oyemboya oso ‘¿iha pīha?’ oya viña. So güeraño tēi rumo osepia. Evocoiyase ahe aipo ehi chupe: —¡Co pipe suive nandehai chietera! —ehi.

Aheseve voi opa ipiru.

²⁰ Ahe mbahe repiase, ore,

—¡Too, mara ehi rutei pīha co cūrteimi opa voi ipiru! —orohe tēi chupe.

²¹ Ahese omboyevi oreu:

—Acoi peyeroyase ité Tūpa rese, aheese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu pipe’ peyese, ahe evocoiyase osiriño itera.

²² Indó, acoi peyerurese mbahe pe porandusa rese Tūpa rese pe yeroyasa pipe, peipisi itera ahe mbahe —ehi.

Jesús mborerecuasa

²³ Ichui Jesús oique iri judío tūparo guasu pipe oporombohe. Ahese pahi eta rerecurar, judío rerecurar avei oyemboya sese, oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarā ndeu? —ehi.

²⁴ Evocoiyase ahe aipo ehi chupe:

—Che avei aporandura mbahe rese pēu. Pemboyevise che porandusa, aheese che avei amombehura ava porocuita rupi eté pīha ayapo co mbahe vichico.

²⁵ ¿Ava vo Juan ombou ava āpiramo āgua? ¿Tūpa pīha, ava tēi tie? —ehi.

Evocoiyase oñemoñeta aipo ehi oyeupe yuvireco: “ ‘Tūpa ombou’ yahese chupe, ahe evocoiyase omboyevira yandeu: ‘¿Mahera ru evocoiyase ndaperoyai?’ ehira.

²⁶ Anise, ‘Ava tēi remimbou’ yahese rumo, aviyeteramo opacatu ava yande amotarēhira yuvireco. Esepia, opacatu: ‘Juan omombehu vahe ñehesa Tūpa suindar’ ehi eté yuvireco chupe” ehi.

²⁷ Sese,

—Ndoroicuai eté Juan mbousar —ehiño yuvireco.

Ahese ahe aipo ehi:

—Evocoiyase che avei, “Ahe iporocuita pipe co mbahe ayapo” ndahei chietera pēu —ehi mborerecuar guasu upe.

Ñuvirío ava rahir recocuer sui yembohesa

²⁸ Iyavei Jesús aipo ehi judío rerecuareta upe:

—¿Mara ehi pe pihañemoñetasa co rese? Oime mbia vireco vahe ñuvirío guahír. Ahe aipo ehi ocuacua catu vahe upe: ‘Che rahír, co pipe eresora, eporaviqui cove’ ehi.

²⁹ ‘¡Nachequerêhil!’ ehi voifío. Coiye rumo, ‘¿Mahera êgüe ahe?’ ehi. Ipare osoño ité, eporaviqui.

³⁰ Ipare oso ambuae guahír upe: ‘Eresora, eporaviqui cove’ ehi tupri avei. Evocoyase, ‘Asora, che ru’ ehi angahu. Ipare rumo ndosoi eté.

³¹ ¿Uma vo co ñuvirío yuvirecoi vahe oyapo vu remimbotar? —ehi.

—Co yipindar vahe —ehi yuvireco.

—Supi eté. Esepia, co angaipa viyar mbahe-mbahe tēi aposar, cuña oyemondo-mondo tēi vahe avei, ahe rane yuviroiquera Tūpa mborerecuasave pe sui.

³² Esepia, Juan Oporoãpiramo vahe ou co tecocuer ihĩvi vahe mboyecua ãgua pēu pe reco tupri ãgua viña. Pe rumo ndaperoyai eté. Co angaipa viyar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoi mbahe viña, ipare rumo ndapeñecuñaroi pe recocuerei sui seroya ãgua —ehi mborerecuar guasu yuvirecoi vahe upe.

Ava mbahe tēi eporaviqui vahe recocuer sui yembohesa

³³ ‘Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri sereco, oyapo uva riavivi ãgua; oyapo avei oivate vahe ahe sese mahemoha ãgua. Ipare oseya oivi ava eporaviqui vahe upe iporu ãgua. Ichui osé oso amombri vahesa rupi.

³⁴ Coiye oyepotase ari uva pohosa, ahese omondo güembigui eporaviqui vahe upe imbororandu ãgua ‘taipisi uva pohopri cheundar cute’ oyapave viña.

³⁵ Ipare rumo eporaviqui vahe oipisi sembiguai yuvireco: amove oinupanupa yuvireco, amove oyuca, oyapi-yapi avei amove ita pipe yuvireco.

³⁶ Ipare rumo ivi yar setá catu omondo iri güembigui. Eporaviqui vahe rumo mara-mara tēiño avei vireco yuvireco.

³⁷ ‘Coiye rumo guahír teieté omondo chupe cute. Ahe ipihañemoñeta: ‘Omboyeroya catura revo che rahír yuvireco’ ehi viña.

³⁸ Evocoyase ahe ava tahír repiase, ‘Co aipo oipisira vu mbahe; yayucaño, evocoyase co ivi opitara yandeu nara’ ehi oyeupe yuvireco.

³⁹ Evocoyase oipisi, vinose miti pãhu sui, oyuca ité yuvireco’ ehi.

⁴⁰ ‘Acoi ouse ivi yar, ¿mbahe vo oyapora eporaviqui vahe upe?’ ehi oñehe rendusar upe.

⁴¹ Ahe evocoyase,

—Opara revo oyuca saisuẽhisa pipe ité co ava ndipihai vahe yuvireco. Ipare revo omondora oivi ambuae ava eporaviqui vahe uve iporu ãgua ‘ahe tombou voimi uva ipohopirer cheundar cheu curi’ ohesa pipe —ehi yuvireco.

⁴² Aipo ihe pare, aipo ehi oñehe rendusar upe:

—¿Ndapeyeroqui vo co aipo ehi vahe icuachiapri pipe?

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri ãgua.

Êgüe ehi niha Yar yapo yande mohapisi ai eté’

ehi icuachiapri pipe.

⁴³ Sese che Ru Tūpa mborerecuasa serocuasara pe sui. Ambuae ava upe rumo imondosara. Ahe virasora che Ru mombahesa chupe.

44 Acoi que oviapi vahe evocoi ita harive, opa tēira ahe ae oyemomara; iyavei acoi oviapise evocoi ita que ava harive, ahese opa tupri aveira omocañi —ehi Jesús oñehe oyese.

45 Acoi osenduse pahi rerecuar iyavei fariseo yuvirecoi vahe, osenducua oyesendar ñehesa yuvireco.

46 Aheseve oipisi pota voi yuvireco viña. Osiquiyeño rumo ava rehi sui yuvireco. Esepia, opacatu ava ipihañemoñeta: “Co ité Tūpa pīratasa pīpe oñehe” ehi yuvireco chupe.

22

Jesús oporombohe carusa mendasa resendar rese

1 Ipare Jesús oporombohe iri ambuae ava recocuer rese aipo ehi:

2 “Tūpa omborerecuasave inungar mborerecuar guasu guahir mendase oyapo pieta.

3 Ipare oyocuai güembigui eta ‘ava ichohopri upe toyügeru cute’ oya. Ichohopri rumo niqerēhi iri yugüeru aheve.

4 Ipare oyocuai iri ambuae güembigui eta aipo ehi: ‘Aipo peyera ichohopri upe: ¡Toyügeruño ité! Esepia, opa ité oingatu tembihu iyavei ayuca uca tivi iyavei ambuae mbahe mimba iquira vahe. Che opacatu amoingatu. Sese toyügeruño ité mendasave, ehi, peyera chupe’ ehi güembigui upe.

5 Ichohopri rumo ndoviroyai eté yuvireco. Evocoyase ñepeí osoño ocove, ambuae oso ombahe movendesave,

6 ambuae rumo oipisi sembigui mara-mara tēi sereco āgua. Ahe ipipe oyuca yuvireco.

7 Evocoyase mborerecuar guasu oñemoiro eteprisave omondo osundao eta co ava oporapichi vahe yuca ucapa āgua, iyavei secua rapipa āgua.

8 Ipare aipo ehi ambuae güembigui eta upe: ‘Opa oingatu tembihu mendasave. Co rumo yipindar ichohopri, ndiya iri chira yugüeru vaheñā cohove.

9 Sese peso opacatu ava guata catusa rupi, peñehe mendasave yugüeru vaheñā opacatu pe rovaichisar upe’ ehi.

10 Evocoyase sembigui eta yuvinozepa yuviraso ocar rupi. Ahe osovaichi vahe setā omonuha yuvireco que seco tupri vahe, seco raí vahe avei; ēgüe ehi ava savapipo tupri oi guasu mendasave yuvireco.

11 “Evocoyase acoi mborerecuar oique ava ichohopri repia. Ipare omahecuā tupri ñepeí ava ipāhu pendar rese. Ahe rumo ndomondei turucuar mendasa resendar.

12 Evocoyase aipo ehi chupe: ‘Che mboripar, ¿mara ere eique ave co turucuar mendasa resendar porēhi?’ ehi. Ahe rumo noñeheñiño ité chupe.

13 Evocoyase, ‘Peipisi co mbia, peñapichi ipi, ipo avei, pemose ocarve pītumimbisave. Aheve oyaseho tēira, sāitere-tere tēira mbaherasicuer rereco’ ehi ichohopri rese hañecosar upe.

14 Esepia, setā tēi ichohopri, moviromi tēi rumo iporavopri ipāhu sui” ehi mborerecuareta uve.

Fariseo osecoña iri tēi Jesús guarepochi rese yuvireco

15 Ipare fariseo oñemonuha, ipihañemoñeta yuvireco oyeupe Jesús ñehe yavi uca āgua mborerecuar rovai imomara-mara tēi āgua.

16 Ahe evocoyase omondo moviro ovoya yuvireco mborerecuar Herodes rupindar reseve Jesús upe. Ahese aipo ehi angahu chupe:

—Porombohesar, ore oroicua nde supi eté vahe mbahe eremombehu eico iyavei ereporombohe mbahe supi tupri vahe Tūpa recocuer rese. Nde niha

ndereroyai vahe ava ñehesa tēi. Esepia, ava pīhañemoñeta rupi ndereicoi vahe; nde pīhañemoñeta rumo ñepei reseve erereco.

17 ¿Mara ehi nde pīhañemoñeta? ¿Aviyera pīha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

18 Oicua rumo fariseo pīhañemoñeta raisa. Sese aipo ehi chupe:

—Pe seco tupri angahu tēi vahe peico. ¡Mahera che moingue pota mbahe tēi pipe peye!

19 Pemboyecua ru ñepei guarepochi mborerecuar guasu upendar cheu —ehi.

Evocoyase güeru yuvireco chupe.

20 —¿Ava rahanga vo co guarepochi rese chini iyavei ava rer vo co chini sese no? —ehi.

21 —Roma pendar mborerecuar guasu —ehiño fariseo yuvireco chupe.

—Pemondora evocoyase mborerecuar upe mbahe chupendar, Tūpa upendar mbahe evocoyase pemondora Tūpa upe —ehi fariseo upe.

22 Osenduse, oyepihamondí tēi yuvireco. Evocoyase yuvínose yuvíraso ichuí.

Saduceo oporandu Jesús upe cuerayevisa rese secoãhasave

23 Ahe ari pipe saduceo “ndipoi eté cuerayevisa” ehi vahe yugüeru Jesús upe, oporandu tēi angahu yuvireco chupe:

24 —Porombohesar, Moisés aipo ehi aracahe:

‘Que cuimbahe omanose guahiēhiseve, ahese tivri omendara sembirecocuer rese ahe viquehir omano vahecuer upe nara tahirā oico’ ehi —ehi yuvireco chupe—.

25 Cohave, ore pāhuve, oime siete tupri oyesuindar pāve yuvirecoi vahe. Yipindar vahe omenda. Ipare omanoño guahiēhiseve. Evocoyase tivri omenda sembirecocuer rese.

26 Ahe omano guahiēhiseve avei no. Ēgüe ehi avei opacatu ambuae tivri, omano avei guahiēhiseve yuvireco.

27 Opacatu imano pare, cuña avei omano cute.

28 Evocoyase opase ocuerayevi yuvireco, ¿uma rese ité pīha opitara ahe cuña? Esepia, opacatu niha omenda yuvireco sese —ehi saduceo yuvireco chupe.

29 —Pe pīhañemoñetasa co coti tēi eté. Esepia, ndapeicuai eté Tūpa ñehe icuachiapri aracahendar, ndapeicuai avei Tūpa pīratasa —ehi—.

30 Esepia, acoi omano vahe ocuerayevise, chupe ndipo iri chira mendasa. Ahe rumo Tūpa rembiguai iva pendar nungar yuvirecoira ivave —ehi—.

31 Co cuerayevisa resendar rumo amombehura pēu. Aviye ndapeyeroqui anga vahe acoi Tūpa omombehu vahecuer rese. Supi eté ahe aipo ehi aracahe:

32 ‘Che Abraham, Isaac iyavei Jacob Tūpa aico’ ehi. ¡Tūpa ndahei omano vahecuer Tūpa, ahe rumo oicove vahe ité Tūpa secoi! —ehi.

33 “¡Too!” ehi ava rehi. “¡Mara ehi rutei iporombohesa!” ehi tēi yuvireco.

Porocuita aviye catu vahe

34 Ipare fariseo oyanduse yuvireco Jesús omonguiriripañose saduceo oye-sui, ahese oñemonuha yuvireco.

35 Ñepei ipāhu pendar Moisés porocuita rese oporombohe vahe, ahe oyemboya oso Jesús rese oporandu ‘toyavi oñehe Moisés porocuita sui yandeu’ oyapave viña:

36 —Porombohesar, ¿uma ité vo porocuaíta avíye catu vahe opacatu ambuae porocuaíta sui? —ehi.

37 Evocoiyase ahe aipo ehi chupe:

—‘Eresaisura nde Yar Tūpa opacatu nde pīhañemoñetasa pipe, opacatu nde recoceru pipe, nde yapisacasa pipe avei’ ehi.

38 Co porocuaíta avíye catu vahe ambuae porocuaíta sui.

39 Imoñuviriosa inungar tupri avei aipo ehi no: ‘Eresaisura ambuae ava nde yeaisu nungar’ ehi.

40 Co ñuvirío porocuaíta rupi uguata opacatu Moisés porocuaíta icuachipri, opacatu Tūpa ñehe mombehusar rembicuachía avei —ehi.

¿Ava suindar pīha Poropīsīrosar?

41 Fariseo ñemonuha viteseve,

42 Jesús oporandu chupe:

—¿Mara ehi pepīhañemoñeta acoi Tūpa Rembiporavo ou vaheṛā ava pīsīro āgua rese? ¿Ava suindar-ra pīha secoi? —ehi.

—Ahe niha David suindar secoira —ehi fariseo yuvireco chupe.

43 Ahease aipo ehi fariseo upe:

—¿Mahera pīha evocoiyase David oñehese Espírītu pīratasa pipe aracahe, “Che Yar” ehi chupe? Esepia, ahe aipo ehi:

44 ‘Yar aipo ehi che Yar upe:

Eguapi che acato coti acoi che amondose voi eté nde amotarēhimbar nde povrīve yuvireco’ ehi David aracahe.

45 Evocoiyase, ¿mahera ru: “Poropīsīrosar David suindar secoira” peye, David teieté, “Che Yar” ehise chupe? —ehi fariseo upe.

46 Evocoiyase ndoicatu iri imboyeveí āgua yuvireco cute. Ahe arí pipe sui ndipo iri que ñepeí iquerēhi vahe iñehe aví uca āgua oñehe pipe yuvireco.

23

Jesús oicua uca fariseo iyavei Moisés porocuaíta rese oporombohe vahe recocerai

1 Ipare Jesús aipo ehi ava eta upe, oreu avei no:

2 “Co Moisés porocuaíta rese oporombohe vahe iyavei fariseo eta, ahe icuaita Moisés porocuaíta mombehu tupri āgua yuvireco.

3 Sese iya peroyaño ité iyavei peyapo opacatu mbahe semimombehu; aní chira rumo peyapo mbahe sembiapo ai. Esepia, omombehu tupri tēi mbahe viña, ipare rumo co coti tēi mbahe oyapo yuvireco.

4 Iyavei omondo porocuaíta inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyeí eté que ñepeí oporocuaíta yuvireco no.

5 Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tēi. Osiva rese, oyiva rese avei ipe guasu vahe vireco-reco tēi oturucuar rese Tūpa Ñehengagüer cuachiapri yuvireco. Iyavei ipi catu vahe oturucuar popi moaro āgua omondo yuvireco.

6 Oipota carusa rupi güenara avíye catu vahe yuvireco, oseca avei tenda porañete catu vahe güenara otūparo pipe yuvireco no.

7 Oipota avei ava oyeupe ‘avirave’ apo āgua omboeteisave ocar rupi iyavei oipota, ‘Porombohesar’ oyeupe he yuvireco.

8 “Pe rumo, ‘Porombohesar’ ndapembohe ucai chira ava peyeupe. Esepia, pe opacatu guasu peyeivri peico, iyavei ñepeño ité pereco pe Mbohesar.

9 Iyavei, ‘Che ru’ ndapeyei chira que ava co ivi pipendar tēi upe. Esepia, ñepeño ité pe Ru pereco, ahe niha iva pendar.

10 Ndiyai avei, ‘Mborerecuar’ pembohe uca ava peyeupe. Esepia, Poropisirosar güeraño ité pe rerecuar seci.

11 Acoi ava seco ivate catu vahe, ahe toporopitívii güeco mbegüesa pipe.

12 Esepia, acoi oyemboivate ai vahe opara seco reroiya, iyavei acoi ava seco mbegüe vahe, ahe seco mboivate catusara curi.

13 “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe peico! Pemombitaño ava Tüpa povrive seique rägüer sui peico yepi. Pe avei eté ndapeiquei ipovrive, iyavei acoi yuviroique pota vahe pemombitaño seique rägüer sui.

14 “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe peico! Esepia, perocuarocuaño tēi cuña imer mano vahecuer rēta ichui, ipare peyeroqui tupri tēi angahu ava rembiepiave. Sese peipisira Tüpa ñemoirosa ipirata catu vahe curi.

15 “¡Peparaisu catu itera pe Moisés porocuita rese oporombohe vahe, pe avei fariseo, pe guata tēi angahu vahe Tüpa rese! Peguata opacatu ivi rupi iyavei para guasu rovai rupi ava mbohe. Ipare rumo pe remimbohecuer mbahe tēi catu pe sui. Pe nungar carugar ratave nara tēi pereco uca.

16 “¡Peparaisu catu itera, pe ava mbohesar ndasesapisoi vahe nungar peico! Pe aipo peye tēi vahe: ‘Yamombehuse mbahe tūparo rer pipe yandé ñehe mboaviye água, égüe yahe tēi eté; co rumo yamombehuse mbahe oro tūparo pendar rer pipe, ahese iya itera yamboaviye yepi’ aipo peye tēi.

17 ¡Pe ndapembahecuai vahe nungar, ndasesapisoi vahe nungar avei peico! ¿Uma vo aviye catu vahe: oro pīha, anise tūparo tie? Tūparo pipe niha oro rovasasa yepi.

18 Iyavei co uve avei aipo peye tēi peico: ‘Yamombehuse mbahe seropovēhepri renda rer pipe yandé ñehe mboaviye água, égüe yahe tēi eté; co rumo mbahe yamombehuse mbahe seropovēhepri renda hari pendar rer pipe yandé ñehe mboaviye água, ahese iya ité yamboaviyera yandé ñehe yepi’ aipo peye tēi.

19 ¡Pe ndasesapisoi vahe nungar peico yepi! ¿Uma vo aviye catu vahe? ¿Evocoi porerecosa seropovēhepri pīha, anise mbahe seropovēhepri renda tie? Ahe tenda harive niha porerecosa sovasasa yepi.

20 Sese acoi mbahe omombehu vahe mbahe seropovēhepri renda rer pipe oñehe mboaviye água, ndahei serer pipe güeraño, omombehu avei opacatu ihari pendar mbahe seropovēhepri rer pipe,

21 iyavei acoi ava omombehu vahe mbahe tūparo rer pipe oñehe mboaviye água, ahe omombehu ipipendar rer pipe avei. Ahe niha Tüpa seci.

22 Iyavei acoi omombehu vahe mbahe que ambuae ava upe iva resendar rer pipe oñehe mboaviye água, omombehu avei Tüpa recua rer pipe, Tüpa rer pipe avei. Esepia, Tüpa aheve ité seci.

23 “¡Peparaisu catu itera, pe Moisés porocuita rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepeí-peí diez pe remití menta, anís, camino pereco vahe sui ñepeí Tüpa uve nara viña, pe rumo pepoi co porombohesa aviye catu vahe porocuita resendar sui. Ahe peyapora mbahe

ihĩvi vahe, peporoparaisuerecora iyavei pemboaviye tuprira pe cuaita yepi. Iyacatu rumo ahe pemboaviye aveira viña.

²⁴ ¡Pe ava mbohesar ndasesapisoi vahe nungar peico! Pe pembogua rutei mbahe rahicuer sui pe igua; mbahe tuvicha vahe rumo pemocoño ité evocoiyase. Ēgüe peye co mborocuaita upe.

²⁵ “¡Peparaisu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe! Esepia, inungar igua riru iyavei tembihu riru icupe rupi tēi yoseipri. Ipípe rumo iquihā opitaño ité. Ēgüe ehi tēi pe recocuer pe monda raisave, mbahe pota-pota tēisave avei.

²⁶ ¡Pe fariseo peico vahe, ndapepihañemoñetai vahe mbahe pe rembiapo ai rese, pemoatiro rane pe piha pipe mbahe yavaeté vahe sui! Ahese ramo pe rembiapo icatuprira cute.

²⁷ “¡Peparaisu catu itera, pe Moisés porocuita rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvipa imomorochimbri tēi. Iharive tēi icatupri chupe. Ipípe rumo tehögüer cangüer iyavei opacatu mbahe yavaeté vahe ovireco oyese.

²⁸ Ēgüe peye: ava rembiepiave aviye pe reco ihĩvi vahe viña, pe piha pipe rumo oime pe porombopasa iyavei opacatu mbahe-mbahe tēi.

²⁹ “¡Peparaisu catu itera pe Moisés porocuita rese oporombohe vahe, pe fariseo peico vahe, pe reco tupri angahu tēi vahe! Esepia, pemoingatu Tūpa ñehe mombehúsar ruvipagüer peico sese pe yemomahenduha āgua iyavei pemoporañete ai tēi ava seco ihĩvi vahe ruvipagüer yepi viña.

³⁰ Ipāre aipo: ‘Yande yaicose revo aracahe yande ramoi recose, ndayaiñitivi chietera Tūpa ñehe mombehúsar yuca āgua yuvireco viña’ peye tupri tēi.

³¹ Aipo peyese rumo, pemboyecua Tūpa ñehe mombehúsarer yucasar suindar pe yesusa.

³² ¡Pemboyepi iriño evocoiyase pe ramoi rembiapocuerai!

³³ “¡Pe mboi vai suindar tēi peico! Ndapesoyepi chira rumo Tūpa ñemoirosa sui, pesora rumo tata guasuve.

³⁴ Evocoiyase che amboura pēu Tūpa ñehe mombehúsar ava yaracua vahe iyavei ava pe mbohe āgua yuvireco viña. Amove rumo ipāhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei ambuae peseca-secara peico tecua yacatu rupi.

³⁵ Sese pēuño ité oura Tūpa ñemoirosa opacatu ava aviye vahe yuca agüer rese co ivi pipe; Abel seco ivi tupri: vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahir Zacarías sui avei, ahe peyuca vahe tūparo pipe mbahe seropovēhepri renda rovai.

³⁶ Supi eté opacatu co mbahe tēi oura pe recove viteseve” ehi.

Jesús oyaseho Jerusalén pendar rese

³⁷ “¡Too rutei, pe Jerusalén pendar, peyuca vahe Tūpa ñehe mombehúsar, ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembrí opepovrive! Ēgüe ahe pota tēi pe rereco viña, pe rumo ndapeipotai eté evocoi nungar pe rereco āgua.

³⁸ Sese seyapirā tēi peicora.

³⁹ Esepia, ndache repiai chira peye acoi, ‘¡Imboetipri Yar remimbou tasecoi!’ peyese voi che repia irira peye” ehi Jesús ava eta upe.

24

Jesús omombehu judío tūparo guasu mocañi āgua

¹ Ipare Jesús osē judío tūparo pīpe sui oso. Aheve ore semimbohe oroyemboya sese aipo orohe chupe: “¡Ore Yar, esepia co tūparo!” orohe.

² Ahe rumo:

—Supi eté amombehu pēu: co opacatu pesepia vahe, ndipoi chietera que ñepeí ita oyeha vīte vahe. Opacatu ité imondurusara curi —ehi oreu.

Jesús omombehu mbahe oime vaheṛā arī cañi renonde

³ Ipare Jesús oso ivitri Olivo ve oguapí oī. Aheve ore güeraño tupri oroso chupe mbahe rese ore porandu āgua:

—Emombehu catu oreu: ¿Mbahese vo aipo mbahe yavīyera? ¿Mbahe poromondiisa rese rane vo icuasara nde yu āgua iyavei arī cañi āgua? —orohe chupe.

⁴ —Peicua catu, peyembopa ucai rene ambuae ava upe peico.

⁵ Esepia, setá ava yugüerura, ‘Che aico Tūpa remimbou ava pīsīro āgua’ ehi tēira ava eta mbopa yuvireco.

⁶ Iyavei pesendura ñehesa vavasa resendar cohawe iyavei que rupi. Ndapeyembosiquīyēi chira rumo ichui. Esepia, ēgüe ehi rane itera niha; ndehi vīteí chira rumo arī cañisa.

⁷ Esepia, ñepeí ivi pipendar ovavara ambuae ivi pipendar rese oyeupe yuvireco. Ahe se oimera tiavor, ivi riri opacatu-catu tēi fecua rupi.

⁸ Opacatu evocoi mbahe rumo omboipi ramomi vahe mbahe tēi porarasa.

⁹ “Ahe se pisira yuvireco mara-mara tēi pe rereco āgua, pe yuca āgua avei. Iyavei opacatu ava-ava tēi ndape ambotai chira che recocuer sui tēi yuvireco.

¹⁰ Ahe arī rupi evocoiyase setá ava ndache reroya iri chira yuvireco. Ahe oyeamotarēhira iyavei omondora ambuae omboetasagüer yamotarēhimbar povrive yuvireco.

¹¹ Iyavei setá Tūpa ñehe mombehusar angahu tēi oimera, ahe ava ombopambopa tēira yuvireco.

¹² Ombouvicha catura mbahe-mbahe tēi naporai vahe. Ipipe sui ndoyeaisu tupri iri chira ava yuvireco.

¹³ Acoi ava oyemoviracua vaheño rumo arī ipa vahe rupi, ipīsīropri yuvirecoira.

¹⁴ Iyavei co ñehesa icatupri vahe Tūpa mborerecuasa resendar imombesuhapa ranera opacatu ivi rupi icua uca āgua. Ahe se ramo oimera cañisa co ivi pipe” ehi oreu.

¹⁵ “Tūpa ñehe mombehusar Daniel oicuachía mbahe-mbahe tēi aposa resendar oime vaheṛā tūparo guasu maranehi vahe pīpe aracahe. Ahe pesepiase oī maranehi pīpe —acoi oyerocui vahe, ahe tosenducua tupri yuvireco—,

¹⁶ evocoiyase Judea ve yuvirecoi vahe toñemipa poyava ivitri rese yuvireco ichui;

¹⁷ iyavei acoi güēta harive yuvirecoi vahe ogüeyise, toique iri eme güētave ombahe reca;

¹⁸ iyavei acoi que rupi tēi yuvirecoi vahe, toyevi iri eme güētave que oyeaosa renose āgua yuvireco.

¹⁹ ¡Iparaisu itera cuña ipuruha vahe, imembí pītani vahe avei yuvireco!

²⁰ Peoporandu Tūpa upe pe recua pīpe sui pe sēēhi āgua irohi pīpe, mbītuhusa arī pipe avei.

²¹ Esepia, ahe arí pipe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chietera evocoi nungar.

²² Iyavei nomombituhuisse Tüpa co arí naporai vahe, ndipoi chietera ava oñepisiro vahe yuvireco viña. Ahe rumo güembiporavo raisusa pipe omombituhura” ehi.

²³ “Iyavei que ava, ‘Esepia co Poropisirosar secói’; anise, ‘Peve secói’ ehise yuvireco pëu, aní chira peroya aipo ehi vahe.

²⁴ Esepia, yugüerura ava ‘che Poropisirosar aico’ ehi tēi vahe iyavei ‘che amombehu vahe Tüpa Ñehengagüer’ ehi angahu tēi vahe; iyavei oyapora mbahe ava ndoyapoi vahe poromondiisa güeco pīratasa mboyecua āgua yuvireco. Ipipe osecoāhara Tüpa rembiporavo imbopa āgua yuvireco.

²⁵ Opa aipo co senondeve amombehu pëu.

²⁶ Sese que ava pëu: ‘Pesepia pe ivi iporupirēhisave secói’ ehise, pesoi rene aheve seroyasave, aní chiveira peroya acoi ‘pesepia co secói oi pipe’ ehi vahe yuvireco.

²⁷ Che rumo inungar overa vahe sendi añihivei sui caharu coti ocua iva rese, ěgüe ahera che, Ava Riquehír, opacatu ava rembiepiave ayevi irise vitu curi.

²⁸ Esepia, mbahe rehögüer reimesave, uruvu oñemonuha atí yuvireco yepi” ehi güemimbohe eta upe.

Jesús yevi āgua resendar

²⁹ “Ahe arí pipe mbahe-mbahe tēi pare cūríteimi ndoyecua iri chira arí, yasi avei ndosesape iri chira, yasitata avei opara oviapi iva sui iyavei iva resendar mbahe oriñira yuvireco.

³⁰ Ahese oimera iva rese iporēhi vahe che, Ava Riquehír, yu āgua resendar. Evocoiyase opacatu ava-ava tēi co ivi pipendar oyaseho tēira osiquiyepave yuvireco. Che repia aveira yuvireco agüeyise iva quiha rese che pīratasa rendigüer porañetesa pipe.

³¹ Iyavei amboura che rembiguai eta iva pendar. Ahe evocoiyase güemimbi omoñehe pīratara opacatu che rembiporavo co ivi rupindar que amombri rupi yuvirecoi vahe monuha āgua” ehi.

³² “Peyembohera ivira higuera recocuer sui: Co ivira soqui ramose, yaicua cōimi arí sacu vahe yepota āgua yandeu yepi.

³³ Na ehi aveira pëu che ñehe rupi tupri mbahe pesepiase, sese peicuara cōimi eté che yevi āgua.

³⁴ Supi eté yuvirecove vitera ava osepia vahe co mbahe opase yaviye.

³⁵ Iva, ivi opara ocañi, che ñehengagüer rumo imboaviyesa rane itera.

³⁶ “Ndipoi eté rumo ava oicua vahe arí iyavei hora che yevi āgua. Iva pendar che Ru rembiguai avei ndoicuai yuvireco. Che avei ndaicuai eté. Che Ru güeraño ité rumo oicua.

³⁷ “Inungar ava Noé recose yuvirecoi aracahe, ěgüe ehi tupri aveira che, Ava Riquehír, yevi āgua renonde.

³⁸ Yipive amarusu renonde, ahese ava ocaru, oiñu; guahír, guayri avei omomendaño yuvireco. Noé arca pipe seiqueese, ěgüe ehi vite yuvireco.

³⁹ Nomohai eté rumo amarusu viapi āgua yuvireco oyeupe viña, ěgüe ehi rumo aviyeteramo tēi amar oviapi imocañipa. ěgüe ahe aveira che, Ava Riquehír, ayevi aviyeteramo tēi.

⁴⁰ Evocoi arí pipe oimera ñuvirío ava amombri güecua sui yuvirecoi vahe: ñepe serasosara, indugüer rumo opitara.

⁴¹ Ēgüe ehi aveira ñuvirío cuña ohicho vahe upe: ñepe serasosara, indugüer rumo opítara.

⁴² “Sese pemahemoha yepi. Esepia, ndapeicuai mbahe ari pipe che, pe Yar, ayevíra ivá sui.

⁴³ Iyavei peyapisaca tupri co rese: inungar acoi oi yar oicuase revo que hora pítu pipe imonda vahe yepota água, ahese imahemohara sese güeta pipe seiqueēhi água viña.

⁴⁴ Ēgüe peye aveira peyemoingatu che yevi água rese. Esepia niha, che, Ava Riquehir, aporoesapiha tēira vitu curi” ehi.

Mbiguai omboaviye vahe ocuaita, nomboaviyei vahe avei

⁴⁵ “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarã güeta pipendar rese hañeco água ‘tembihu tomondo che rēta pipendar upe che porocuaita rupi’ ohesave.

⁴⁶ Acoi omboaviyese ocuaita, ahese oviharetera güerecuar yevise.

⁴⁷ Supi eté niha serecuar oyocuíra opacatu ombahe rese hañeco água.

⁴⁸ Ahe mbiguai rumo ndipihaise ‘ndoyepota vitei chira revo che rerecuar’ oya,

⁴⁹ omboetasa omboipi mara-mara tēi sereco iyavei oyemboya caguar tēi rese ipiri ocaru iyavei oiñu tēi água.

⁵⁰ Ipare rumo serecuar oyepotara imahemohaēhiseve.

⁵¹ Ahese omombaraisu catura, ‘Tinupasa, ava seco tupri ai angahu tēi vahe nupasa nungar pipe’ ehira chupe. Ahese oyaseho tēira, oyemoaitere-tere tēi aveira” ehi güemimbohe upe.

25

Diez cuñatai ndaseco marai vahe resendar ñehesa

¹ “Evocoi ari pipe Túpa mborerecuasa inungar-ra mendasave diez cuñatai ndaseco marai vahe virasora tataendi ambuae cuña mevi pisi água yuvireco.

² Ipāhuve yuvirecove cinco ndipihañemoñetai vahe, ambuae cinco rumo ipihañemoñeta tupri vahe yuvireco.

³ Ipare ndipihañemoñetai vahe oipisi guataendirã yuvireco, ndovirasoi rumo yandi guataendi riru mboapipo iri água yuvireco;

⁴ evocoi ipihañemoñeta tupri vahe rumo viraso yandi siru pipe guataendi reseve yuvireco.

⁵ Acoi ndoyepota apihaise cuña mevi, ahese sopesii tēi yuvireco. Coiye opaño yuviroque yuvireco ichui.

⁶ Pítu mbiter senise rumo, osendu ñehesa aipo ehi vahe yuvireco: ‘¡Coi imevi turi! ¡Pesē ipisi água cute!’ ehi.

⁷ Evocoiyase opacatu evocoi cuñatai oñarapuha voi iyavei omoingatu guataendi yuvireco.

⁸ Ahese nimahemohai vahe aipo ehi ambuae imahemoha vahe upe yuvireco: ‘Pemboumi tēi chíhi pe yandi oreu. Esepia, ogüe pota ité ore rataendi’ ehi tēi yuvireco.

⁹ ‘Aní, ndiyai chira revo oromondo vaherã pēu. Iyacatu revo peso imboepisave serocua peyeupe nara’ ehi.

¹⁰ Imboepi yuviraso viteseve, ou cuña mevi cute. Oyemoingatu vahe rumo yuviroique supi mendasave. Evocoiyase saquicuerive voi omboya oquenda rārosar.

11 Ipape oyepotase ambuae cinco cuñatai yugüeru aipo ehi yuvireco oi yar upe: '¡Emboimi tēi oreu!' ehi tēi yuvinoha.

12 'Aní, ndopocuai vahe ité' ehiño chupe.

13 "Pe evocoiyase pemahemohara. Esepia, ndapeicuai mbahe ari pipe, mbahe hora pipe che, Ava Riquehir, ayevíra" ehi Jesús oreu.

Ñehesa guarepochi mondosa resendar

14 "Iyavei Tūpa omborerecuasave inungar-ra ava mbahe yar oso āgua renonde ivi amombrisave omonuha güembiguaí oguarepochi rāro āgua viña.

15 Yipindar ñepeí upe omondo cinco mil guarepochi, ambuae upe omondo dos mil, iyavei imombosapisa upe omondo mil tēi: ahe omondo ñepeí-peí upe seco etegüer rupi-rupi. Ipape voi oso cute.

16 Evocoiyase evocoi mbiguai oipisi vahe cinco mil guarepochi, ahe oporaviqui co guarepochi rese. Ipape sui coíye oipisi catu iri ambuae cinco.

17 Inungar avei ambuae oipisi vahe dos mil, ichui oipisi catu iri ambuae dos mil.

18 Ambuae oipisi vahe rumo ñepeí guarepochi, ahe oyoho ivicuar. Aheve oñoti güerecuar guarepochi.

19 "Ipape coíye oyevíse serecuar, ahese oñehe güembiguaí upe oguarepochi retacuer cua āgua.

20 Yipindar cinco mil guarepochi oipisi vahe ranengatu oyemboya güerecuar rese aipo ehi: 'Ndo co acoi erembou vahe cinco mil cheu, ichui co ambuae cinco aipisi irimi ndeu' ehi.

21 'Aviye ité, nde mbiguai seco aviye vahe ereico iyavei eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese' ehi chupe.

22 Ipape ambuae sembiguai oipisi vahe dos mil guarepochi, oyemboya güerecuar rese aipo ehi chupe: 'Ndo co erembou vahe dos mil cheu. Ipape sui co ambuae aipisi irimi dos mil avei ndeu' ehi.

23 'Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese' ehi avei chupe.

24 "Ipape acoi oyepotase ambuae mbiguai oipisi vahe mil guarepochi, ahe aipo ehi güerecuar upe: 'Che aicua nde reco; nde acoi ndihavai vahe ereico. Esepia, ava remitigüer tēi eremonuha iyavei imbovepírer tēi avei ereipisi ndeyeupe nara.

25 Sese che siquiyesa pipe añomi ivivrive nde guarepochi. Ndo co nde mbahe' ehi chupe.

26 'Nde mbiguai ndaseco pōrai vahe, yangaipa vai vahe avei ereico. Nde nira ereicua che recocuer aipisise mbahe nañoti vahe sui.

27 Ereyapocatumira che guarepochi guarepochi apocatusave cuese rahe viña che yéve voi senose āgua cheu imboyeví catumí āgua viña' ehi.

28 Ipape aipo ehi: 'Perocua guarepochi ichui, pemondora evocoi diez rupi guarepochi omboeta vahe upe' ehi.

29 'Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembiere-comi ichui.

30 Sese pemose co mbiguai ēgüe ehi tēi vahe ocarve pītumimbisave. Aheve toyaseho, tasāitere tēi oī ehira serecuar chupe" ehi Jesús oreu.

Jesús oura opacatu ava recocuer rese porandu ãgua

³¹ “Che, Ava Riquehir, ayevisé, opacatu che Ru rembiguai ìva pendar reseve che reco ìvategüer pipe, ahese aguapira che renda porañete vahesave ava recocuer rese porandu ãgua.

³² Evocoiyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rãrosar oipeha vahe ovesa cavara sui.

³³ Che evocoiyase ovesa aipehara mbahe rese che pocosa coti, cavara mbahe rese che pocoẽhisa coti.

³⁴ Ahese che mborerecuar ìvate catu vahe aipo ahera che acato cotindar upe: ‘Perio pe opacatu che Ru sui sovasapri peico vahe, peique che Ru mborerecuasa pipe; ahe acoi yipive ìvi apo ramo suive imoingatupri pẽu nara.

³⁵ Esepia, ndacheriepoise, pe evocoiyase pembou mbahe che remihura; iyavei che huseise, pe evocoiyase pembou taihu; che aguata tẽise pe recua rupi vichico, pe avei oi pembou che que ãgua.

³⁶ Turucuar cheu ipanese, pe avei pembou che turucuarã; chembaheasise, peso avei che piri; che roquendasave peso avei che repia no’ ehi.

³⁷ Evocoiyase evocoi seco catupri vahe aipo ehira yuvireco cheu: ‘Ore Yar, ¿mbahese vo nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu?’

³⁸ ¿Mbahese vo nde repiasa nde guatase ore recua rupi, ipare nde monguesa ore piri, ipanese nde turucuarã, ore aipo evocoiyase oromondo ndeu?’

³⁹ Iyavei, ¿mbahese vo aipo nde repiasa nembahesise, anise que nde roquendasave, aheve aipo oroso nde repia yepi?’ ehira yuvireco cheu.

⁴⁰ Evocoiyase che, mborerecuar ìvate vahe, amboyevira yuvireco chupe aipo ahera: ‘Supi eté, opacatu mbahe peyapose que ñepei seco mbegüemi vahe che reroyasar pãhu pendar upe viña, cheu rumo êgüe peye’ ahera.

⁴¹ “Ahese aipo ahera cute che mbahe rese pocoẽhisa cotindar upe: ‘Pesiri che sui. Esepia, pe peico Tũpa ñemoirosavri pendar. Pesopa tata guasu apirẽhisave, evocoi imoingatupri opacatu carugar upe nara serecuar reseve.

⁴² Esepia, ndacheriepoise, pe evocoiyase: Yamondomi icaru ãgua, ndapeyei eté cheu; che huseise, ahese, Yamondomi toihu, ndapeyei avei cheu;

⁴³ ambuae tecua pipe aguata tẽise vichico, ahese, Eique che rõtave che piri, ndapeyei eté cheu. Ipanese che turucuarã, pe rumo ndapemboui cheu, chembaheasise vichico, iyavei che roquendasave, Yasomi tẽi sepia, ndapeyei eté cheu’ ahera.

⁴⁴ ‘Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarã ndeu no, nembahesise, anise nde roquendasave, marase vo mbahe rese nande pitiviisai?’ ehi tẽira yuvireco cheu.

⁴⁵ ‘Supi eté acoi amove mbahe ndapeyapoise que seco mbegüemi vahe upe viña. Ipipe rumo cheu avei mbahe ndapeyapoi eté’ ahera.

⁴⁶ Ahe ava yuvirasora Tũpa ñemoirosa apirẽhi vahesave. Seco ìvi vahe rumo teco ori opaẽhisave yuvirasora” ehi Jesús oreu.

26

Jesús yamotarẽhimbar omboguai yuca ãgua yuvireco

¹ Ipare Jesús aipo ehi oreu:

2 —Pe peicua ñuvirío ari tēi ipane vite co Pascua pieta yepota āgua yandeu. Ahese che, Ava Riquehír, imondopri aicora che atica āgua curusu rese yuvireco —ehi.

3 Ahe pipeve avei Jerusalén ve, co pahi rerecuareta, iyavei judío rerecuareta oñemonuha yuvireco pahi rerecuar ivate catu vahe Caifás rētave.

4 Aheve oñemoñeta: ‘Yambopa ipisi yuca āgua’ ehi yuvireco oyeupe.

5 Ahe rumo:

—Ndiyai pieta pipe ité yaipisi ava rehíi yemondíi guasuēhi āgua yandeu —ehi.

Cuñā oipiyere Jesús āca rese mbahe síacuá vahe

6 Jesús tecua Betania ve secoi, Simón lepra víreco vahecuer rētave.

7 Aheve mesave chiniseve, cuñā víreco vahe mbahe síacuá vahe síru reseve víroyepota chupe. Ahe oipiyere Jesús āca rese.

8 Orosepiase rumo oroñemoiro aipo orohe oreyeupe:

—¡Mahera vo co omocañi tēi!

9 Omondo vahe ité tie co setá guarepochi rupi ava iparaisu vahe pítivíi āgua víña —orohe tēi chupe.

10 Jesús rumo oicua ore pihañemoñetasa. Sese aipo ehi oreu:

—¡Mahera vo co cuñā pemañeco tēi! Esepia, co mbahe oyapo vahe avíye ité cheu.

11 Ava iparaisu vahe niha yuvirecoiño itera pe pāhuve. Che rumo ēgüe ndahe viteñoi chira vichico pe pāhuve.

12 Esepia, co cuñā oipiyere mbahe síacuá vahe che rese che tĩ āgua renondevé.

13 Supi eté aipo ahe pēu: co ñehesa pĩsirosa resendar mombehuse opacatu tecua rupi, imombehusa aveira co cuñā rembiapo sese mahenduha āgua —ehi.

Judas Iscariote oyemoingatu Jesús mondo āgua yamotarēhimbar povrive

14 Ipare ñepeí ore pāhu pendar, Judas Iscariote, oso, oñehe pahi eta rerecuar yuvirecoi vahe upe

15 aipo ehi:

—¿Mboví rupi vo pemboepira cheu amondose Jesús pēu víña? —ehi.

“Treinta guarepochi rupi” ehi yuvireco chupe.

16 Ahesa reseve voi oseca Jesús mondo āgua yamotarēhimbar upe.

Jesús caru agüer ipa vahe güemimbohe rese

17 Ari yipíndar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yandeu? —orohe chupe.

18 Evocoiyase,

—Peso tecua guasuve che cua vahe rētave aipo peyera chupe: ‘Ore Mbohesar aipo ehi: Cõimi che mano āgua, sese ayapo potami sētave Pascua pieta che remimbohe reseve, ehi ndeu’ peyera chupe —ehi.

19 Evocoiyase oyapo semimombehu rupi tupri ité yuvireco, omoingatu carusa Pascua pieta resendar yuvireco aheve.

20 Pítu ramomise, opacatu oroguapi mesave Jesús píri ore caru āgua.

21 Ore carusave aipo ehi oreu:

—Supi eté aipo ahe pēu: ñepeí pe pāhu pendar che mondora che amotarēhisar upe —ehi.

²² —Che Yar, ¿che pīha? —orohe-rohe tēi ñepepei ore yacatu ore viharēhisa pipe chupe.

²³ —Omondo vahe opo che caro pipe, ahe che mondora che amotarēhisar upe —ehi—.

²⁴ Imboaviyesa itera che, Ava Riquehír, rese ñehesa icuachiapri. ¡Iparaisu catura rumo acoi mbia che mondosar! Aviye catura ndoyesuisse viña —ehi.

²⁵ Ahese Judas imondosavi oporandu:

—Ore Mbohesar, ¿che tie? —ehi.

—Taa, ¿nde ité niha ěgüe erera! —ehi chupe.

²⁶ Ore caru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi oreu imondo, aipo ehi:

—Ndo co, pehu co che rete —ehi.

²⁷ Ipare oipisi igua ríru, “Aviye ndeu” ehi Vu upe. Aipo ohe pare ombou oreu aipo ehi:

—Peihu peyacatu co sui.

²⁸ Esepia, co che ruvi, ahe omoimera che Ru remimbotar ipiasu vahe pēu, ahe oyepiyerera ava rehí angaipa rese ñero āgua.

²⁹ Ndaihu iri chira uva ricuer cheu arí oyepotase voi che Ru mborere-cuasave aihura pe rese ambuae uva ricuer ipiasu vahe —ehi oreu.

Jesús, “Ndaicuai vahe ité aipo mbia’ erera cheu” ehi Pedro upe

³⁰ Ore sapucaire, oroso ivitri Olivo ve.

³¹ Evocoiyase Jesús aipo ehi oreu:

—Opara pemocañi che rese yeroyasa peyesui co pítu pipe. Esepia, acoi icuachiapri pipe aipo ehi: ‘Ayucara ovesa rārosar, ahese oñemosai tēira ovesa opacatu rupi yuvireco’ ehi vahe.

³² Che cuerayevire rumo, aso voi etera pe renonera Galilea ve —ehi.

³³ Pedro rumo,

—Yepe ambuae opacatu nande reroya iri chira yuvireco, che rumo ndayepepi chietera nde sui —ehi chupe.

³⁴ —Che rumo supi eté aipo ahe ndeu: co pítu pipeve voi eté tacura ñehere nondeve, “Ndaicuai vahe ité aipo mbia” erera mbosapi oyupagüer rupi cheu —ehi Pedro upe.

³⁵ Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahe chietera —ehi-ehi catuño ité chupe.

Aipo orohe pāve tupri tēi chupe.

Jesús oyerogui Getsemaní ve

³⁶ Ipare Jesús rupi orosoño Getsemaní ve. Aheve aipo ehi oreu:

—Peguapi cohavé; che aso ranera peve catumi, ayeroqui —ehi.

³⁷ Aheve viraso Pedro oyeupi iyavei ñuvirío Zebedeo rahír. Ahese oyandu oviharēhisa oico.

³⁸ Evocoiyase ahe aipo ehi chupe:

—Ndavíhai eté. Esepia, che hā oyandu ité manosa. Pepita rane cohavé iyavei pemahemohara pe yeroqui pipe che rese —ehi.

³⁹ Evocoiyase oso tenonde catumi. Aheve oñenopiha ovapi ivi rese oyerogui Vu upe aipo ehi: “Che Ru, iyase ndeu che renose mbahe-mbahe tēi sui eve; tayapo eme ru che remimbotar tēi, nde remimbotar rupi catu tayapo” ehi.

⁴⁰ Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—¡Ndapeñemosai eté vo pe ropesii upe che rãro ãgua que ñepei hora che mondugüe ãgua peye!

⁴¹ Pemahemoha, peyeroqui mbahe tēi pipe pe viapiēhi ãgua. Supi eté pequerēhi ité viña, pe retecuer tēi niha nipiratai pēu —ehi.

⁴² Ichui imoñuviriosa rupi oso iri oyeruqui aipo ehi: “Che Ru, ereipotase che reique ãgua co mbahe tēi pipe, eyapo nde remimbotar che rese” ehi.

⁴³ Ipare oyevise, osesapiha iri iqueseve ou. Esepia, sopesii nomboyeroyai eté yuvireco.

⁴⁴ Evocoyase oseyapa iri oso oyeruqui ãgua imombosapisa rupi. Aipo ehi tupriño avei oyeruqui Vu upe.

⁴⁵ Ipare oyeví iri güemimbohe upe aipo ehi chupe no:

—¡Pequeño vite vo peyu! Osupiti che, Ava Riquehir, mondo ãgua ava yangaipa vahe povrive.

⁴⁶ Pepūha, yaso. Esepia, cōimi eté che amotarēhisar upe che mondo vahe rã secoi —ehi.

Jesús oipisi yuvireco

⁴⁷ Jesús ñehe viteseve, Judas oyepota oso chupe. Ahe ñepei semimbohe ore pãhu pendar, iyavei setá iteanga ava yugüeru quise pucu, ivira reseve-seve supi. Ahe pahi eta rerecuar yuvirecoi vahe judío rerecuareta porocuita rupi oyapo yuvireco.

⁴⁸ Yipindar rumo imondosar Judas aipo ehi: “Asovaupitese, ahese pecuara; ahe peipisira” ehi.

⁴⁹ Ipare oyemboya voi oso sese.

—¡Avirave, Porombohesar! —ehi sovaupite.

⁵⁰ —Che mboripar —ehi Jesús—, eyapoño mbahe nde remimbotar cheu —ehi.

Aheseve voi oipisi yuvireco.

⁵¹ Evocoyase semimbohe secoi vahe supi vinose oquise pucu, oyasia pahi rerecuar ivate catu vahe rembiguai nambi.

⁵² —¡Aní! —ehi güemimbohe upe—. Emoingue siru pipe nde quise pucu. Esepia, acoi ava opacatu ovava vahe oquise pipe yuvireco, ipipe avei opara yucasa yuvireco.

⁵³ ¿Ndereicuai vo aporanduse che Ru uve viña, ahe evocoyase cūrítei voi omboura doce mil sui setá catu vahe güembiguai che repi ãgua viña?

⁵⁴ Ēgüe ehise rumo Tūpa Ñehengagüer icuachiapri ndayaviyei chietera viña, ahe co cūrítei osupiti —ehi.

⁵⁵ Ahese aipo ehi ava rehi upe:

—Pe quise pucu, ivira reseve-seve rutei co peyu che ropeña che pisi ãgua imonda rai vahe nungar che rereco peye. Che ari yacatu rupi aguapise pe pãhuve pe mbohe ãgua tūparo pipe, ndapeyapoi eté co nungar cheu.

⁵⁶ Co rumo opacatu ěgüe peye Tūpa ñehe mombehusar rembicuachiagüer mboaviye ãgua cute —ehi ava rehi upe.

Ahese voi opacatu oroñemosai, oroseya ahe aetemi Jesús ava rehi upe imoha.

Jesús serasosa pahi rerecuar ivate catu vahe rovai

⁵⁷ Ahese Jesús pisisar viraso Caifás rētave yuvireco, ahe pahi rerecuar ivate catu vahe secoi. Aheve oñemonuha Moisés porocuita rese oporombohe vahe, judío rerecuar yuvirecoi vahe avei no.

⁵⁸ Pedro rumo amombri rupive tēi osaquicue moña oso. Ēgüe ehi oyepota pahi rerecuar ivate catu vahe rēta rocar āchisave. Aheve oi que ipipe, iyavei oguapi oĩ sundao pāhuve ‘¿mara ehi etera pīha sereco yuvireco?’ oya.

⁵⁹ Ahese pahi eta rerecuar iyavei opacatu porandusa ivate catu vahe pendar, ahe oñhengapo-ngapo uca tēi ava Jesús amotarēhisave yuca uca āgua yuvireco,

⁶⁰ yepe oyemboyecua setá iteanga yamotarēhisar semira-mira tēi vahe yuvireco viña, ndoyosui eté rumo mbahe sembiapo naporai vahe yuca uca āgua yuvireco. Aheseve yugüeru ñuvirío yamotarēhisar oporombopa-mbopa tēi vahe yuvireco cute.

⁶¹ —Co mbia aipo ehi: ‘Che aicatu co tūparo monduru; aicatu aveira imopuha iri mbosapi ari rupi’ ehi —ehi tēi yuvireco chupe.

⁶² Ahese pahi rerecuar ivate catu vahe opūha, oporandu Jesús upe:

—¿Mahera vo nderemboyevii eté iñehe yuvireco chupe? ¿Mbahe ehi vo aipo nde amotarēhisar nde rese oñehe? —ehi.

⁶³ Noñehei eté rumo. Ahese,

—Che orocuai Tūpa supi eté vahe rer pipe emombehu oreu: ¿Poropĩsiosar ité nde ereico, Tūpa Rahir? —ehi pahi rerecuar ivate catu vahe chupe.

⁶⁴ —Taa, supi eté niha aipo aipo ere cheu, co catu amombehura pēu, che repiara niha peye che, Ava Riquehir, aguapise Tūpa mbahe mboavaisarēhi acato coti, ayevise avei iva quiha rese curi —ehi.

⁶⁵ Evocoyase pahi rerecuar ivate catu vahe imboasipave omondoro oturucuar aipo ehi:

—¡Indó, mbahe tēi eté iñehe Tūpa upe! ¡Mbahe iri vo yaipota vite yaico! Yasendupa niha aipo Tūpa upe iñehe-ñehe tēisa cūrítei.

⁶⁶ ¿Mara ehi aipo pe pihave? —ehi.

—Supi eté, oyavi mbahe. ¡Tomanoño ité! —ehiño ivoya eta yuvireco chupe.

⁶⁷ Ahese ondivi-ndivi sova rese iyavei yuvirocua-rocua yuvireco sese. Ambuae osovapete-pete,

⁶⁸ aipo ehi yuvireco chupe:

—Nde niha aipo ereico Tūpa remimbou Poropĩsiosar, ¿eicua ité ru, ava evocoi ocua nde rese? —ehi yoyai catu-catu yuvireco.

Pedro, “Ndaicuai vahe evocoi mbia” ehi Jesús upe

⁶⁹ Pedro evocoyase oguapi sãro ocarve ñachimbri pipe oĩ. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

⁷⁰ Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

⁷¹ Tchui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upe imombehu:

—Co ava avei acoi secoi Jesús Nazaret pendar rupi yepi —ehi ava upe.

⁷² —¡Aní! —ehi iri ahe cuña upe—. ¡Tūpa oicua, supi eté ndaicuai aipo mbia! —ehi angahu tēi.

⁷³ Iparemi tēi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepia, nde ñehe pãrigüer rese nde cuasaño —ehi yuvireco.

⁷⁴ Ahe evocoyase,

¡Tūpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pēu! —ehi angahu tēi chupe.

Aipo iheseve, tacura oñehe.

⁷⁵ Ahese Pedro oyemomahenduha Jesús oyeupe, ‘Acoi tacura ñehe renondeve mbosapi oyupagüer rupi: Ndaicuai vahe ité aipo mbia, erera cheu’ ihe agüer rese. Ahese osẽ, oyasehõ iteanga oso.

27

Jesús serasosa Pilato rovai

¹ Cõhe ramose, ahese opacatu pahi eta rerecuar, judío rerecuar avei oñemonuha atí oyemboyoya guasu ‘Jesús tayucasa ité’ oyapave yuvireco.

² Ipare oipocua-pocua seraso mborerecuar guasu Pilato upe yuvireco.

Judas yeyuca agüer

³ Judas, acoi Jesús omondo vahe yamotarẽhisar uve oicua, “Jesús tayucasa cute” ehise, ahese tasí iteanga chupe. Evocoyase oso voi tẽi tũparo guasuve pahi eta rerecuar yuvirecoi vahe upe iyavei judío rerecuareta upe treinta guarepochi mboyeví ãgua aipo ehi:

⁴ —Che ayemboangaipa tiẽte vichico. Esepia, amondoño tẽi mbia seco catupri vahe pẽu yuca uca ãgua —ehi mborerecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

⁵ Evocoyase opaño guarepochi omombó tũparo pĩpe. Ichui voi oso oyemboyaseco, oyeyuca.

⁶ Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa riru pĩpe. Esepia, ava yucapirã repri tẽi —ehi yuvireco.

⁷ Ipare oyoya guasu ipihañemoñeta yuvireco co guarepochi rese ñaihu rese oporaviqui vahe ivi rerocua ãgua ‘toime ava secua ambuae vahe rehõgüer tĩ ãgua’ oyapave yuvireco.

⁸ Sese cõritei co ivi upe, “Ava ruvi repri tẽi” ehi yuvireco yepi.

⁹ Ëgüe ehi co imboaviye ité Tũpa ñehe mombehusar Jeremías remimbehugüer aipo ehi vahe: “Oipisipa treinta guarepochi yuvireco, ahe ava Israel suindar mborerecuar remimombehugüer rupi eté evocoi mbia pisi ãgua.

¹⁰ Ipipe virocua ñaihu rese oporaviqui vahe ivi yuvireco. Cheu che Yar omombehu vahecuer rupi tupri ité oyapo yuvireco” ehi Tũpa ñehe mombehusar aracahendar.

Jesús serasosa mborerecuar Pilato rovai

¹¹ Jesús serasosa mborerecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, ‘Ahe ereico’ ere cheu —ehiño imboyeví Pilato upe.

¹² Evocoyase acoi pahi eta rerecuar iyavei judío rerecuareta oñemonuha vahe eipeve oiñehengapo-ngapo tẽi yuvireco. Nomboyeví eté rumo iñehe chupe oyeepi ãgua.

¹³ Evocoyase:

—¿Nderesendui vo aipo co opacatu ndeu ñehe-ñehe tẽisa? —ehi Pilato chupe.

¹⁴ Nomboyeví eté rumo que ñepeí angara ñehesa chupe viña. “¡Too, mara ehi rutei vo col!” ehi-ehi tẽi mborerecuar chupe.

“¡Tayaticasa!” ehi Jesús upe ava yuvireco

¹⁵ Mborerecuar guasu recosa ité ñepeí ava soquendapri renose água Pascua pieta pîpe ava rehîi remimbotar rupi yepi.

¹⁶ Aheve oime soquendapri mbia icuapri vahe ité Barrabás serer vahe;

¹⁷ evocoyase ava rehîi oñemonuha atise, Pilato oporandu chupe yuvireco: —¿Uma peipota che amose ucara pëu: Barrabás pîha, anise Jesús “Poropîsirosar” ehi vahe yuvireco chupe tie? —ehi.

¹⁸ Esepia, ahe oicuaño ité ava rese yemoecatêhisa pîpe sui imondopri secoise.

¹⁹ Pilato güendave chini viteseve, sembireco omondo oñehe chupe aipo ehi: “Ereyapoi rene mbahe evocoi ava seco catupri vahe upe. Esepia, che querve asepia mbahe têi eté sesendar” ehi.

²⁰ Evocoi pahi eta rerecuar iyavei judío rerecuareta rumo ava rehîi omonguerêhi, “Barrabás tosê; Jesús evocoyase tomano” he água yuvireco.

²¹ Evocoyase Pilato oporandu iri ava rehîi upe:

—¿Uma peipota catu co ñuvirío yuvirecoi vahe sui amose vahe rã pëu? —ehi.

—¡Barrabás tosê! —ehi yuvireco.

²² —¿Mbahe vo evocoyase che ayapora Jesús rese chupe acoi ava, “Poropîsirosar” ehi yuvireco? —ehi.

—¡Tayaticasa curusu rese! —ehi ati-atiño yuvireco chupe.

²³ —¿Mbahe ité vo oyapo naporai vahe? —ehi têi ava rehîi upe.

Ahe rumo:

—¡Tayaticasa ité curusu rese! —ehi ati-ati iriño yuvireco chupe.

²⁴ Evocoyase Pilato: “Ndaicatui mbahe moingatu sepi água” ehi têi oyeupe. Sese ava yaivu guasu catu-catu irise, ogüeru uca i. Ipipe oyepoi opacatu ava rehîi rovaque aipo ehi:

—Ndahei che remimbotar rupi co mbia yucasara; pe remimbotar rupi eté —ehi.

²⁵ —¡Ore rese ité, ore rahîr rese avei toviapi que mbahe têi co mbia mano sui! —ehi atiño ité yuvireco.

²⁶ Ahese Pilato omose uca Barrabás; Jesús rumo oinupá iteanga uca tucumbo tupeicha nungar pîpe imondo curusu rese yatica água.

²⁷ Evocoyase mborerecuar sundao viroique Jesús ambuae oi pîpe. Aheve opacatu omboetasa omboyere tupri uca sese yuvireco.

²⁸ Ahese osequiipa iturucuar ichui. Ipare omonde turucuar pîra vahe yuvireco sese

²⁹ iyavei omonde ñaca rese yu piapri, omondo avei ñepeí tacuarmi mbahe rese ipocosa coti ipove yuvireco. Ipare oñenopiha angahu sovai yuvireco aipo ehi:

—¡Imboetepri judío rerecuar tasecoi! —ehi angahu sese oguayî têisa pîpe yuvireco.

³⁰ Iyavei ondivi-ndivi yuvireco sese. Ipare yuvirocua-rocua ipo pendar tacuarmi pîpe ñaca rese yuvireco.

³¹ Êgüe ehi yoyai catu-catu yuvireco. Ipare virocuae turucuar pîra vahe ichui, ahese omonde iturucuar ité yuvireco sese. Ichui viraso curusu rese yatica água yuvireco cute.

Jesús yaticasa curusu rese

³² Acói yuvinosese yuviraso, osepia mbia Cirene pendar, Simón serer vahe. Ahe chupe, “Erio, terevosii co curusu Jesús vireco vahe rese” ehi voiño têi yuvireco.

33 Oyepotase yuviraso Gólgota serer vahesave, ahe ‘ava ãcagüer’ oya aipo ehi chupe,

34 aheve uva ricuer imboyesehapri mbahe pihapiar rese omondo tēi yuvireco Jesús toihu. Osãha tēi, ndoihu potai rumo.

35 Ipare oyatica curusu rese yuvireco. Ahesesundao iguayĩño oyeupe iturucuar mboyaho-yaho ãgua rese.

36 Ipare aheve oguapri yuvinoi sãro.

37 Iyavei omombehu ivate curusu rese ñaca harive mbahe sui oyuca yuvireco: “Co Jesús judío rerecuar guasu” ehi icuachiapri ōi.

38 Ñuvirío imonda rai vahe yaticasa avei curusu rese supive yuvireco, ñepi mbahe rese ipocosa coti, ambuae evocoyase mbahe rese ipocõehisa coti yuvireco.

39 Acoi ava ñocuasar ñehe-ñehe tēi, õñeaca mbovava,

40 aipo ehi yuvireco chupe:

—Nde acoi, “Opara tũparo amonduru. Ipare mbosapri ari rupi opa irira amopuha” ere acõi cuese. ¡Eñepisiro ru nde ae cute! ¡Tũpa Rahir nde recose, egüeyi curusu sui! —ehi tēi yuvireco chupe.

41 Aipo ehi avei pahi eta rerecuar, Moisés porocuita rese oporombohe vahe iyavei judío rerecuareta avei; ahe ñehe mara-mara tēi yuvireco chupe aipo ehi:

42 —Oipisiro ambuae, ahe ae rumo ndoicatui õñepisiro. Israel rerecuar guasu secoise, ¡togüeyi curusu sui cõritei, aheseseroyasara!

43 Ahe oyeroya Tũpa rese, Tũpa evocoyase oipotase, toipisiro cõritei. Espia, ahe, “Che Tũpa Rahir aico” ehi yandeu cuese —ehi yuvireco.

44 Imonda rai vahe avei rumo acõi yaticapri supive, ahe avei mara ehi-ehi tēi chupe.

Jesús mano agüer

45 Ahese mbiter ari pipe, opa tupri pĩtu ivi rupi. Ëgüe ehi las tres rupi.

46 Ahese tupri avei Jesús õñehe pĩrata aipo ehi: “Elí, Elí, ¿lema sabactani?” ehi, (ahe ‘che Ru Tũpa, che Ru Tũpa, ¿mahera vo che reya eve?’ oyapave aipo ehi).

47 Ava aheve yuvirecoi vahe osenduse ñehe, aipo ehi yuvireco:

—Esendu co mbia, Tũpa ñehe mombehusar Elías upe õñehe —ehi yuvireco chupe.

48 Aheseve voi imboetasa õña, oso mbahe saviyu vahe reca, omoaqui vinagre pipe imondo ivira apri rese chupe ‘toihu’ oya.

49 Ambuae rumo aipo ehiño yuvireco:

—Ëgüe tehiño rane, ¿oura pĩha Elías ipisiro ãgua? —ehi yuvireco.

50 Ahese Jesús sãse pĩrata iri, omano.

51 Ahe pipeve voi tũparo guasu turucuar ivate coti sui ovo tupri. Aheseve avei ivi orĩrii iyavei ita guasu-guasuyuca.

52 Tehõgüer ruvipa ita apopri avei oyemboi yuvireco iyavei setá Tũpa reroyasar omano vahecuer, ahe avei opa ocuerayevi yuvireco.

53 Ëgüe ehi Jesús cuerayevire, ahe opa yuvinose tehõgüer ruvipa sui. Ipare yuviroique Jerusalén maranehi pipe. Aheve setá ava upe oyemboyecua yuvireco.

54 Evocoyase co sundao rerecuar iyavei Jesús rãrosareta, ahe oyanduse ivi rirĩi yuvireco iyavei ambuae mbahe Ëgüe ehi vahecuer repiase, aheseyembosiquiye guasu aipo ehi yuvireco:

—¡Supi eté catu co mbia Tũpa Rahir ité secoi! —ehi tēi yuvireco.

⁵⁵ Iyavei setá cuña aheve amombrive osepia catu yuvinoha, ahe acoi Galilea sui yugüeru vahecuer Jesús rupi iyavei setá rupi oipítivi yuvireco yepi.

⁵⁶ Ahe ipãhuve María Magdalena secói, iyavei ambuae María ahe Santiago, José si, Zebedeo rahir si avei supi secói.

Jesús apocatu agüer tuvipa pipe

⁵⁷ Pítu potase, ou mbia mbahe yar José serer vahe, ahe Jesús reroyasar tecua Arimatea pendar.

⁵⁸ Evocoyase ahe oso Pilato upe oporandu Jesús rehögüer rese. Evocoyase Pilato aipo ehi: “Aviye, timondosaño chupe” ehi.

⁵⁹ José evocoyase viraso sehögüer. Ipare oimama tupri turucuar secose vahe ndiquihai vahe pipe.

⁶⁰ Ichui omoingue ombahe tuvipa ipiasu vahe, ita oyoho uca vahe pipe. Ipare osovapi ita guasu yapayere vahe pipe oso.

⁶¹ Aheve María Magdalena ambuae María rese suvipa rovai oguapi yuvinoi.

Jesús ruvipa osãro sundao yuvireco

⁶² Ahere ayihive mbituhusa ari pipe, yuviraso pahi eta rerecuar iyavei fariseo Pilato upe mbahe rese oporandu ãgua

⁶³ aipo ehi yuvireco:

—Ore rerecuar, ore oroyemomahenduha acoi iporombopa serai vahe ñehe agüer rese: “Acuera yevira mbosapi ari pare omano vahe pãhu sui” ehi acoi cuese oicove vitese —ehi yuvireco—.

⁶⁴ Sese emondo sundao sehögüer ruvipa rãro tupri ãgua mbosapi ari rupi semimbohe ñomiñi ãgua pítu pipe yuvireco. Aviyeteramo, “Ocuera yevi omano vahe pãhu sui” aipo ehi tupri tẽi tiẽtera ava upe yuvireco. Aipo ehise yuvireco, yipindar semira tẽi vahe sui ivate catura serecosa —ehi yuvireco.

⁶⁵ Pilato evocoyase aipo ehi chupe yuvireco:

—Aviye —ehi—. Amondora sundao pẽu. Peraso, pemoviracua tupri itẽ sãro ãgua —ehi.

⁶⁶ Evocoyase yuviraso tehögüer ruvipa rãro tupri ãgua yuvireco. Ahese omondo tehögüer rovapisa ita guasu rese mbahe imomiisa cua ãgua yuvireco. Ipare oseya aheve sundao sãro ãgua yuvireco cute.

28

Jesús ocuera yevi

¹ Cõhe ramomise, domingu pipe, María Magdalena iyavei ambuae María yuviraso tehögüer ruvipa repia yuvireco.

² Aviyeteramo tẽi oriri pĩratá ivi Tũpa rembiguai iva sui igüeyise. Ëgüe ehi oyepota tehögüer ruvipave ou, ahe virocua itape guasu sovapisa ichui. Ipare iharive oguapi oĩ.

³ Ëgüe ehi sendá iteanga aviye acoi overa vahe. Iturucuar evocoyase morochí eté.

⁴ Osepiase sundao, oriri eteanga osiquiyepave yuvireco ichui, opa oyuca pucu-pucu tẽi yuvireco.

⁵ Tũpa rembiguai rumo aipo ehi voi eté cuña upe:

—Pesiquiyeyi rene. Esepia, che aicua pe peseca Jesús yaticapirer.

⁶ Ndipoi eté cohave. Esepia, ahe ocuera yevi güemimombehu rupi eté. Tapesepia ru supagüer —ehi.

Ipare aipo ehi:

⁷ —Peso poyava voi, tapemombehu semimbohe eta upe: ‘Ocuera yevi omano vahe pāhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu āgua pēu —ehi Tūpa rembiguañi cuña upe.

⁸ Evocoiyase cuña yuviraso poyava voi suvīpa sui, osiquiye pāhuve rumo ovihāño yuvireco; ēgüe ehi yuvinoñá iteanga imombehu yugüeru oreu.

⁹ Ahese Jesús oyemboyecua cuña upe cute omboavirave. Ahe cuña evocoiyase oyemboya sese oñenopiha ipicuhaguā imboetisave yuvireco.

¹⁰ Evocoiyase ahe aipo ehi chupe:

—Pesiñiquiyei rene che sui. Pesoño, tapemombehu che reroyasareta upe. Ahe toyuviraso Galilea ve. Aheve che repiara yuvireco —ehi cuña upe.

Sundao omombehu mbahe güembiepia yuvireco

¹¹ Cuña yuviraso viteseve, ahese moviro sundao yuviroique tecua guasu Jerusalén pipe yuvireco. Ahe omombehupa pahi eta rerecuar upe opacatu mbahe osepia vahecuer yuvireco.

¹² Evocoiyase pahi rerecuareta oñemoñeta judío rerecuar rese opihañemoñeta mboyoya āgua. Ichui omondo setá guarepochi sundao upe yuvireco,

¹³ aipo ehiño yuvireco chupe:

—Aipo peyera ava uve: “Oroque viteseve pītu pipe, ahese revo Jesús remimbohe yugüeru sehögüer ñomi āgua ore sui” peyera —ehi mborerecuar yuvireco chupe—.

¹⁴ Acoi oyanduse rumo mborerecuar guasu curi, ahese opoviroya ucara chupe. Evocoiyase ndipoi chira mbahe pe rese —ehiño pahi eta rerecuar sundao upe yuvireco.

¹⁵ Evocoiyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Ēgüe ehi vite cūrítei judío Jesús cuerayevisa reroyaēhi yuvireco yepi.

Jesús omondo güemimbohe ivi yacatu rupi oñhengagüer mombehu āgua

¹⁶ Evocoiyase ēgüe orohé oroso semimbohe once oroico vahe Jesús remimombehu ivi Galilea pendar ivitrive.

¹⁷ Acoi orosepiase rumo Jesús, ahese oromboetei oroico, yepe moviro tēi ore pāhu pendar ndoviroya tupri vitei yuvireco viña.

¹⁸ Evocoiyase ahe oyemboya ore rese aipo ehi oreu:

—Tūpa che mbou mborerecuar ivate catu vahe che reco āgua ivave, ivive nara avei no —ehi—.

¹⁹ Peso ava upe opacatú ivi rupi iyavei pembohe che recocuer rupi eté yuvirecoi vaherā; peñapiramo avei che Ru rer pipe, che rer pipe, Espiritu Santo rer pipe avei no.

²⁰ Iyavei pembohe che opacatu pe mbohe agüer reroya āgua rese —ehi—. Peicuañora che aicovera pe reseve ari yacatu rupi yepi, acoi ari ipa vahe rupi —ehi Jesús oreu.

Aviye, aipo rupive.

MARCOS REMBICUACHIA JESUS RECOCUER RESENDAR San Marcos

Juan Oporoãpiramo vahe ivi iporupirêhisa rupi secoi

¹ Co yipindar aviye vahe ñehesa Jesucristo, Tüpa Rahir, recocuer resendar amombehu potami pëu.

² Yipiindar Tüpa aipo ehi imombehu oñehe mombehusar Isaías rembicuachia pipe aracahe:

“Amondora che ñehe mombehusar nde renonera, ndeu peri moatiro ãgua” ehi.

³ “Oyeendu ñehesa ipirata vahe ava porêhise: ‘Pemoingatu yande Yar raperã; pemohivi tupri avei’ ehi” ehi aracahe.

⁴ Ëgüe ehi Juan ou ava ãpiramo ivi iporupirêhisa rupi oico, aipo ehi: “Pemboasi pe angaipa, peyevi Tüpa upe, ahese opoãpiramora Tüpa pëu ñero ãgua pe angaipa rese” ehi ava upe.

⁵ Opatatu ava oyugüeru ñehe rendu ãgua ivi Judea rupindar, iyavei tecua Jerusalén pendar oangaipagüer mombehu ãgua. Ahese Juan oñapiramo iai Jordán pipe.

⁶ Juan turucuar camello ragüer apopri, sumbicuasa mbahe pিরer, sembihu evocoiyase tucru, eiri caha pipendar avei.

⁷ Ahe aipo ehi oñehe ava upe oico: “Che raquicuei oura seco pirata catu vahe che sui, sese cheu ndiyai chira ayeaivi ipitaquisã yora ãgua.

⁸ Che supi eté opoãpiramo i pipe tõi; ahe rumo pe ãpiramora Espiritu Santo pipe” ehi.

Jesús ãpiramo agüer

⁹ Ipare Jesús osê tecua Nazaret sui oso Galilea rupi. Aheve Juan oñapiramo iai Jordán pipe.

¹⁰ Osê ramoseve i sui, Jesús osepia ìva oyemboi tupri, ahese Espiritu ogüeyi iharive apicasu nungar.

¹¹ Aheve oyeendu ñehesa ìva sui aipo ehi: “Nde che Rahir ereico, che rembiaisu, aviha etepri nde rese” ehi vahe.

Jesús recoãhasa

¹² Ipare voi, Espiritu Santo viroguata Jesús ava porêhisa rupi.

¹³ Aheve Jesús secoi cuarenta ari mbahe mimba vai pãhuve. Aheve avei Carugar osecoãha; Tüpa rembiguai ìva pendareta rumo ihañecoño yuvireco sese.

Jesús omboipi oporaviqui Galilea rupi

¹⁴ Juan roquenda pare, Jesús oso ivi Galilea rupi, omombehu ñehesa aviye vahe Vu recocuer resendar ava upe oico

¹⁵ aipo ehi: “Oyepota ari iyavei cõimi eté Tüpa mborerecuasa yandeu. Sese, pemboasi pe angaipa, peyevi Tüpa upe, iyavei peroya co ñehesa aviye vahe Tüpa suindar” ehi.

Jesús, “Perio che rupi” ehi irungatu pira mbohasar upe

¹⁶ Ñepei ari Jesús oguata ìpa Galilea ivi. Aheve osepia Simón, tivri Andrés avei, ahe pira omboha yuvireco.

¹⁷ Ahese Jesús aipo ehi chupe:

—Pe pira recasar peico, perio che rupi, na peye aveira ava reca água cheu nara —ehi.

¹⁸ Aipo he ramoseve voi, opoi opira mbohasa sui yuvireco, yuviraso supi.

¹⁹ Ipare chîhi oguata irimise, ahese osepia Santiago, Zebedeo rahir, tivri Juan reseve carite pipe omoingatu opira mbohasa yuvinoi vu piri.

²⁰ Ahe chupe avei: “Perio che rupi” ehi, evocoyase vu oseya carite pipe ipitivisar reseve, yuviraso supi.

Mbia carugar vireco vahe oyese

²¹ Oyepotase tecua Capernaum ve yuvireco mbituhusa ari pipe, Jesús oi que oporombohe tûparove.

²² Evocoyase ava osenduse iporombohesa, “¿Mara ehi rutei?” ehi tēi yuvireco chupe. Esepia, ahe oporombohe güeco pīratasa pipe, ndahei Moisés porocuita rese oporombohe vahe nungar.

²³ Aheve mbia ahe tecua pendar vireco vahe carugar oyese, oñhe pīrata chupe aipo ehi:

²⁴ —¿Mahera vo ereyuño tēi cohava oreu, Jesús Nazaret pendar? ¿Ereyu vo ore mocañi água tēi? Che orocua ité, nde Tûpa suindar ndaseco marai vahe ereico —ehi chupe.

²⁵ Oñhe pīrata rumo carugar upe aipo ehi: —¡Quiriri, esē co mbia sui! —ehi chupe.

²⁶ Evocoyase carugar mbia rese secoi vahe omoehoha seiti ivive, sãse, osē oso ichui.

²⁷ Opacatu ava ombosiquiye, ichui oporandu-randu oyeupe yuvireco aipo ehi:

—¿Mbahe pīha co? ¡Iporombohesa ipiasu vahe ité! ¡Co mbia vireco ité omborerecuasa! ¡Carugar avei eté omboyeroya oyeupe iñehese! —ehi tēi ava yuvireco.

²⁸ Cūrteimi voi yandusa serãcua opacatu ivi Galilea rupi.

Jesús ombogüera Pedro rembireco si

²⁹ Jesús yuvinosese tûparo sui, yuviraso Santiago, Juan rese Simón, Andrés rētave.

³⁰ Aheve Simón rembireco si sohí iteanga vupave ou. Evocoyase omombehu Jesús upe imbaherasisa yuvireco.

³¹ Ahese oso chupe oipisi ipo rese imopuha, ahe ramoseve, sohí opituhu ichui. Ipare voi ahe cuña ihañeco semihura rese.

Jesús setá ombogüera ava imbaheasi vahe

³² Pītu ramosé opacatu imbaheasi vahe iyavei carugar vireco vahe vīraso yuvireco chupe imbogüera água.

³³ Opacatu ava ahe tecua pendar oñemonuha oquendipive yuvireco.

³⁴ Evocoyase setá ombogüera mbaherasi-rasi tēi vireco vahe, iyavei omboyepipi setá carugar ava sui. Ndoipotai rumo carugar ñehe. Esepia, ahe oicua ité evocoiya seco yuvireco.

Jesús Vu Tûpa Ñehengagüer omombehu judío tûparo rupi

³⁵ Ayihiteve Jesús oñarapuha oso ava porēhisave oyerogui água.

³⁶ Evocoyase Simón ondugüer reseve yuviraso seca.

³⁷ Osepiase,

—Opacatu ava nde reca tēi yuvireco —ehi yuvireco chupe.

³⁸ Ahe rumo,

—Yaso ambuae tecua namombrii vahesa rupi Tūpa Ñehengagüer mombehu āgua aheve; evocoi nungar apo āgua niha che ayu —ehi.

³⁹ Ēgüe ehi oguata opacatu Galilea ivi rupi, omombehu Vu Tūpa Ñehengagüer judío tūparo yacatu rupi oico, iyavei setá omose carugar ava sui.

Jesús ombogüera mbia lepra vireco vahe

⁴⁰ Ñepe mbia lepra rerecosar oyemboya Jesús rese, oñenopiha sovai aipo ehi:

—Ereipotase, iya nde che mbogüerami eve —ehi.

⁴¹ Iparaisuerecosave opoco sese.

—Aipota. ¡Erecuerara cūrítei! —ehi chupe.

⁴² Aipo ihe ramoseve, ocuera voi eté.

⁴³ Ahese aipo ehi iri chupe icho renondeve:

⁴⁴ —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porerecosa nde cuerasa re-sendar Moisés porocuita rupi. Evocoiyase toicua opacatu ava yuvireco nde cuerasa —ehi chupe viña.

⁴⁵ Ahe mbia rumo oso omombehu-mbehu opacatú ava upe. Sese Jesús ndoicatu iri güeique āgua güecocuer mombehuse tecua rupi; secoño tēi tecua popi rupi ava porēhisave. Ava rumo yugüeruño ité opacatu tecua rupindar sepia.

2

Jesús ombogüera ava ndoguatai vahe

¹ Ñepe ari pipe Jesús oyeve ou tecua Capernaum ve, ahese opacatu oyandu ñepe oive secoise yuvireco.

² Cūríteimi voi eté setá ava oñemonuha yuvireco secosave. Sese ndipoi eté ava reique iri āgua oi pipe oquendipi rupi. Ahe rumo omombehuño ité Vu Ñehengagüer.

³ Aheseve irungatu mbia viroyepota ndoguatai vahe yuvireco chupe.

⁴ Ahe rumo ndiyai seroique āgua Jesús uve ava rehisave yuvireco. Sese viroyeupi oi harive seraso yuvireco. Aheve teca virocua oi sui yuvireco; supi viroyi supa reseve imondo Jesús rovai tupri yuvireco.

⁵ Ahe oicuase co mbia yuvirecoi vahe oyese yeroya, aipo ehi imbaheasi vahe upe:

—Ché rahir, che ñero nde angaipa rese ndeu —ehi.

⁶ Moisés porocuita rese oporombohe vahe rumo ipihañemoñeta aheve yuvinoi:

⁷ “¿Mahera co mbia aipo ehiño tēi oñehe? Ahe oyemboivate ai tēi vahe Tūpa ñehe nungar pipe tēi oñehe. Tūpaño ité niha oicatu ava angaipa upe oñeroi āgua” ehi.

⁸ Ahe rumo oicuaño ipihañemoñetasa, sese aipo ehi:

—¿Mahera vo pepihañemoñeta rai tēi che rese?

⁹ ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa piña, anise: “Eñarapuha, esupi nde rupa, eguata” hesa tie?

¹⁰ Tarepicua ru che, Ava Riquehir, areco mborrecuasa co ivi pipe ava angaipa upe che ñero āgua —ehi.

Evocoiyase aipo ehi imbaheasi vahe upe:

11 —Eñarapuha, esupi nde rupa, eso nde rētave —ehi.

12 Imbaheasi vahe aipo ihe ramoseve, oñarapuha, osupi vupagüer, osé oso ichui opacatu ava rembiepiave. Sese opacatu oyepihamondii yuvireco, omboetei Tüpa yuvireco aipo ehi:

—Yipisuive ndayasepiavai vahe ité co nungar mbahe —ehi tēi yuvireco.

Jesús oñehe mbia Leví serer vahe upe

13 Ipare Jesús oso iri ipa ivii. Aheve oporombohe oyese ava rehii yemboyase.

14 Ichui oguata vitesse, osepia Leví, Alfeo rahir, guarepochi rerocuasave chinise, aipo ehi chupe:

—Erio che rupi —ehi.

Evocoiyase Leví opüha, oso voi supi.

15 Ipare ocaru Leví rētave güemimbohe reseve yuvireco, ava sui guarepochi rerocuar iyavei ava yangaipa vahe pāhuve. Esepia, setá ava osaquicue moñaño ité yuvireco.

16 Evocoiyase Jesús ocaruse ipāhuve, fariseo eta, oporombohe vahe Moisés porocuaíta rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi rerocuar iyavei yangaipa guasu vahe pāhuve tēi? —ehi.

17 Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui avá seco tupri vahe reca; che rumo ayu ava yangaipa guasu vahe reca —ehi.

Yecuacusa rese ñehesa

18 Ñepeí ari pipe Juan Oporoãpiramo vahe remimbohe oyecuacu yuvireco, fariseo eta avei oyecuacu yuvireco no. Evocoiyase moviro mbia ipāhu pendar yuvirasno, oporandu Jesús upe:

—¿Mahera ru nde remimbohe ndoyecuacui eté yuvireco? Esepia, Juan remimbohe iyavei fariseo eta oyecuacu yuvireco yepi —ehi yuvireco chupe.

19 Evocoiyase omboyevi ahe ava upe:

—¿Ndiyai eté ichohopri mendasave iyecuacu ãgua imer oicove vitesse ipāhuve!

20 Oimera rumo ari imer reraso ãgua ichui curi, ahese ramo oyecuacura yuvireco cute —ehi.

21 “Ndiyai yayapete turucuar cuacua turucuar ipiasu vahe pipe. Esepia niha, ipiasu vahe oichohó turucuar cuacua imondoro iri ãgua, ichorosa evocoiyase tuvicha catu-catuño ité.

22 Iyavei uva ricuer ipiasu vahe ndiyai iñasa mbahe pírer cuacua pipe. Esepia, uva ricuer ipiasu vahe oseca mbahe pírer cuacua vahe pipe, ombopuñora, uva ricuer evocoiyase ocañipa tēira, iyavei mbahe pírer ocañi tēi aveira. Sese uva ricuer ipiasu vahe ñoñasara mbahe pírer ipiasu vahe pipe yepi” ehi.

Jesús remimbohe oipoho trigo mbituhusa ari pipe yuvireco

23 Ñepeí mbituhusa ari pipe, Jesús oguata güemimbohe rese trigo pāhu rupi fariseo rembiepiave yuvireco. Ahese semimbohe oipoho-poho sãhii yuvireco.

24 Evocoiyase fariseo aipo ehi:

—¿Mahera nde remimbohe mbituhusa ari pipe oporaviquiño yuvireco! —ehi yuvireco chupe.

25 Ahe rumo aipo ehi:

—Peyeroqui niha icuachiapri aracahendar pipe mborerecuar guasu David rembiapogüer rese acoi ndasiepoise ondugüer reseve yuvireco aracahe.

²⁶ Pahi rerecuar ivate catu vahe Abiatar serer vahe recose, ahese David oiQue Tüpa rêta pipe pan imboeteipri Tüpa upendar reca ondugüer reseve yuvirohu água. Ahe chupe acoi ndipotasai ihu água yuvireco viña; judío pahi yuvirecoi vahe upeño ité niha ipotasa ihu água yepi. Ahe rumo ohuño, omondo avei ava oyeupindar tohu aracahe —ehi.

²⁷ Iyavei aipo ehi:

—Mbituhusa ari yaposa ava upe nara, ndahei ava yaposa mbituhusa ari upe nara.

²⁸ Sese Ava Riquehir mbituhusa ari rerecuar secoi —ehi Jesús fariseo upe.

3

Mbia ipo nomii vahe Jesús ombogüera

¹ Jesús oiQue iri judío tüparove. Aheve oime mbia ipo co cotigüer nomii vahe.

² Aheve avei fariseo ‘¿ombogüerara pïha mbituhusa ari pipe?’ oya omahengatu yuvireco sese ‘yaiñehengapo angahu’ oyapave tēi.

³ Evocoiyase Jesús aipo ehi co mbia ipo nomii vahe upe:

—Epüha ore mbiterve —ehi.

⁴ Ipare oporandu ambuae upe:

—¿Mbahe vo yaposara mbituhusa ari pipe yepi: mbahe aviye vahe pïha, mbahe naporai vahe tie? ¿Yaiipisiro pïha ava recocuer, yamocañi uca tēi tie? —ehi chupe.

Ahe rumo opaño iquiriri tupri yuvireco.

⁵ Evocoiyase omahe ava oyese oyere tupri vahe rese voriehisave iyavei ndovihai ava ndosenducua catuise yuvireco. Sese aipo ehi ipo nomii vahe uve:

—Eichoho nde yiva —ehi.

Evocoiyase oichoho oyiva, ocuera tupri ité.

⁶ Ahe se fariseo opa yuvino se yuviraso oyemoingatu Herodes rupindar rese Jesús yuca água yuvireco.

Ava rehii ipa popi rupi yuvirecoi

⁷ Ipare Jesús yuviraso güemimbohe reseve ipa popi rupi, ava rehii avei ivi Galilea rupindar yuviraso supi.

⁸ Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, iai Jordán cotindar avei, opacatu ava Tiro, Sidón pendar yugüeru sepia água.

⁹ Sese oyocuai güemimbohe vireco voi vaherã ñepeí carite yuvireco ava omboti etepriehi água yuvireco.

¹⁰ Esepia, setá imbaheasi vahe ombogüera. Sese opacatu ambuae imbaheasi vahe yuviraso chupe sese opoco água.

¹¹ Iyavei ava carugar vireco vahe sepiase, oñenopiha sovai, oñehe pucupucu yuvireco:

—¡Nde Tüpa Rahir ereico! —ehi.

¹² Jesús rumo oñehe pïrata chupe: “Che mombehui rene ava rovaque peye” ehiño imondo.

Jesús oiporavo doce tupri güemimboherã

¹³ Ipare Jesús oyeupi ivitri rese oso. Aheve ava viroyasar upe oñehe iporavo água güemimbotar rupi. Ichui oyugüeru yuvireco chupe.

14 Ahe ipāhu pendar osenoi doce tupri güemimboherã ‘toguataño che rupi, tomombehu Tūpa Ñehengagüer opacatu ivi rupi’ oya. Ahe osero “apóstol”

15 ‘toipisi avei mborerecuasa carugar ava sui imboyepepi āgua yuvireco’ oyapave.

16 Evocoi doce yuvirecoi vahe, ahe: Simón (sererguã acoi omondo Pedro),

17 Santiago iyavei tivri Juan Zebedeo rahir, ahe avei omondo sererguã Boanerges (‘osunu vahe rahir’ oya aipo ehi);

18 iyavei Andrés, Felipe, Bartolomé, Mateo, Tomás, Santiago Alfeo rahir; Tadeo, Simón, ava güecua rese secatēhi vahe pāhu pendarer;

19 iyavei Judas Iscariote, ahe omondo vaheerã Jesús yamotarēhisar upe.

“Jesús carugar pīratasa vireco oyese” ehi tēi ava yuvireco

20 Ipare Jesús oi que oi pipe güemimbohe reseve. Aheve oñemonuha ati irise ava yuvireco sese, ndiyai icaru āgua yuvireco.

21 Oyanduse imu secocuer yuvireco, oyugüeru seraso āgua ‘ndayaracua iri revo’ oya.

22 Iyavei oporombohe vahe Moisés porocuita rese oyugüeru vahe Jerusalén sui aipo ehi: “Co mbia carugar rerecuar Beelzebú oyocuai vahe, ipīratasa pipe tēi omboyepepi carugar ava sui” ehi yuvireco.

23 Evocoyase Jesús omombehu carugar recocuer aipo ehi: “¿Mara ehira aipo carugar ahe ae oyeenose ava sui viña?”

24 Acoi mborerecuar guasu povri pendar, ahe ovava-vavase oyeupe; evocoi nungar mborerecuar pīratasa ocañi tēira.

25 Acoi oñemu oyese ae oyeamotarēhise, oyemboyahose yuvireco viña, ahe ndipocopii chiaveira yuvireco.

26 Acoi carugar oyemboyahose ovava āgua oyeupe ae yuvireco, ndipocopii chiaveira yuvireco, ahe evocoyase secocuer ocañi tēi vaheerã ité yuvireco.

27 “Ndi poi eté niha ava oi que vahe que ava ipīrata etepri vahe rēta pipe imbahe rero cuapa āgua ichui; oñapichi rane itera. Ipare voi opara imbahe vīrocu ichui.

28 “Supi eté aipo ahe pēu: Acoi ava yangaipa vahe upe Tūpa iñerora opacatu yangaipa rese, iñehe-ñehe tēisa rese avei.

29 Acoi iñehe-ñehe tēi vahe rumo Espiritu Santo rese, ahe chupe ndipo iri chietera ñerosa apirēhi vaheerã ité” ehi.

30 Aipo ehi Jesús imboyevei ava upe. Esepia, “Carugar tēi erereco” ehiño ava yuvireco chupe.

Jesús si, tivireta avei

31 Coiye opa oyepota Jesús rivireta iyavei ichi; ahe rumo opītaño ocarve yuvireco. Ichui omondo oñehe yuvireco chupe oyeupe ichē āgua.

32 Yivii yuvinoi vahe oñehe yuvireco chupe:

—Nde si, nde rivireta, nde reindri reseve ocarve nde reca tēi yuvireco —ehi.

33 Ahe rumo,

—¿Ava pīha che si; ava pīha che rivireta yuvirecoi? —ehi.

34 Evocoyase omahe ava oivirindar yuvinoi vahe rese aipo ehi iri chupe:

—Co che si eta; co che rivireta.

35 Esepia, acoi Tūpa remimbotar oyapo vahe yuvireco, ahe che rivri, che reindri, che si avei yuvirecoi —ehi.

4

Mbahe miti sui yembohesa

1 Jesús oporombohe iri ipa popi rupi. Aheve ava rehii oyemboya yuvireco sese. Ipare oha carite imbehive tui vahe pipe. Aheve uguapi oi oñehe. Ava rumo opacatu ivi átasa rupi opitaño yuvireco.

2 Evocoyase ava mbohe água omboyoya tecocuer mbahe tisa rese aipo ehi:

3 “Pesendu co ñehesa: Ñepe mbia osẽ omaheti.

4 Ahe otiapi-apise mbahe rãhii oso, moviro oviapi peri rupi. Vĩrai yugũeruse rumo, opaño yuvirohu.

5 Iyavei moviro oiti ivi nayanai vahesave, ita pãhuve. Sese cũriteimi sori.

6 Ari tasise rumo, opaño ipiru. Esepia, ndasapoi niha.

7 Iyavei ambuae mbahe rãhii oiti yu pãhuve; ahe yu rumo sori poyava catu. Sese opaño oyopi. Evocoyase ahe miti ndihai etẽ.

8 Ambuae mbahe rãhii oiti ivi aviye vahesave. Ahe opa ocuacua miti, iha tupri ai yuvireco: amove iha treinta tupri ohi rese, amove sesenta, amove cien tupri itẽ oha vireco” ehi.

9 Evocoyase, “Acoi osendu pota vahe che ñehe, toyapisacaño sese” ehi Jesús ava rehii upe.

¿Mahera pãha co yembohesa imboyoyasa ambuae mbahe rese?

10 Ipare Jesús opita ahe ae. Ava opita vite vahe semimbohe eta reseve oyemboya yuviraso sese oporandu yuvireco chupe, “¿Mara oya vo co yembohesa aipo ehi?” ehi yuvireco chupe.

11 Ahe aipo ehi: “Pẽu niha Tũpa oicua uca mbahe ndicuasai vahe omborecuasa resendar. Ndache reroya potai vahe upe rumo imboyoyasa mbahe ambuae mbahe rese yepi.

12 Yepe osepia tẽira, ndosepiacuai chietera rumo yuvireco. Iyavei yepe osendu tẽira, ahe rumo ndosenducuai chietera yuvireco, Tũpa upe oyẽvi potaẽhisave, ipipe sui ndipoi chira ñeroisa yuvireco chupe” ehi.

Jesús omombehu tupri yembohesa mbahe tisa resendar

13 Iyavei aipo ehi: “¿Ndapesenducuaimi vo aipo porombohesa? ¿Mara peyera ru opacatu ambuae che porombohesa cua tupri água?

14 Evocoi mbahe rãhii oñoti vahe, Tũpa Ñehengagũer mombehusar nungar.

15 Amove ava recocuer inungar co mbahe rãhii seitipri peri rupi: osendu angahu Tũpa Ñehengagũer. Sendu pare rumo, ou Carugar ovirocupaño oique vahe ipiha pipe ichui.

16 Ambuae ava recocuer inungar mbahe rãhii seitipri ita pãhu rupi: osendu Tũpa Ñehengagũer, oipisi tupri angahu oyeupe nara vorivetesave pipe;

17 ndovirecoi rumo guapo oyese opĩrata água. Evocoyase yuvirecoise mbahe-mbahe tẽi pipe Tũpa Ñehengagũer sui tẽi, cũriteimi seroyaẽhisave, ‘Apoira ichui’ ehi yuvireco.

18 Ambuae ava recocuer inungar mbahe rãhii ñotimbri yu pãhu rupi: osenduse ñehesa Tũpa suindar,

19 ahe rumo ipihañemoñeta catu opacatu ombahe eta co ivi pipendar rese saisusave. Oyembopa uca rumo ombahe eta upe. ‘Opacatu itẽ mbahe tareco’ ehi tiẽte viña. Ipipe sui omocañi tẽi Tũpa Ñehengagũer. Ndoypa ucai avei mbahe eta aviye vahe evocoi nungar ava upe.

²⁰ Ambuae ava rumo osendu vahe Tūpa Ñehengagüer seroyasa pipe, oyapoño ité mbahe aviye vahe. Ahe inungar mbahe rāhii ñotimbri ivi aviye vahe rese: amove vireco ohi rese treinta, ambuae sesenta, ambuae cien” ehi.

Tataendi resendar porombohesa

²¹ Iyavei aipo ehi: “¿Serecosa vo tataendi mbahe riruvrive nara tēi iyavei yande rupavrive nara tēi no? Aní, tataendi imondosa ivate poroesape āgua.

²² Ndipoi chietera mbahe ñomipri ndayasepiai vaheṛā curi.

²³ Acoi osendu pota vahe che ñehe, toyapísacaño yuvireco sese” ehi.

²⁴ Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua ucara che ñehe pēu. Iharive amondo iri catura pēu.

²⁵ Vireco tupri vahe upe, imondosa catura. Acoi ndovireco tupri vahe sui, serocusañora” ehi.

Yembohesa mbahe rāhii rorisā resendar

²⁶ Aipo ehi iri avei Jesús: “Tūpa mborerecuasa co ivi pipe inungar que ava oñoti vahe mbahe rāhii.

²⁷ Omaheti pare, oso oque. Ipare coiye catu oñarapuha. Ahe oñocua pītu, ari avei, evocoiyase mbahe rāhii sorí poyava yuvireco. Itísar rumo ndoicuai mara ehi vori.

²⁸ Ivi rese niha oyesu miti: yipindar sorí, ipare iha, ipare sāhii yuvinose sese.

²⁹ Evocoiyase co mbia mbahe ha yaviyese, oipoho. Esepia, oyepota ari ipoho āgua chupe” ehi.

Yembohesa mostaza rāhii suindar

³⁰ Iyavei aipo ehi: “¿Mara ehi vo Tūpa povri pendar co ivi pipe pēu; mbahe rese pīha iyacatu imboyoyasa icua āgua?

³¹ Ahe oyoya tupri mostaza rāhii rese. Ahe tahimi catu opacatu ambuae mbahe rāhii sui.

³² Ñoti pare rumo, sorí, ocuacuase tuvichá catu ambuae mbahe miti sui. Sāca tuvichá ité, sese vírai oyemboaiti sovri rupi yuvireco” ehi.

Jesús omboyoya ambuae mbahe rese oporombohe yepi

³³ Ēgüe ehi Jesús oporombohe Tūpa Ñehengagüer rese, omboyoya-yoya ñepei mbahe ambuae mbahe rese ava mbahecuagüer rupi.

³⁴ Nomombehui eté mbahe ambuae mbahe rese imboyoyāehi pipe. Ahe rumo omombehu tupri güemimbohe upe ahe aemi yuvirecoise.

Jesús omombituhu i ohitu vahe, ivitu ai reseve

³⁵ Ahe ari pipe pītu ramomise, aipo ehi güemimbohe upe:

—Yaso ipa rovai —ehi.

³⁶ Evocoiyase ava sui osiri yuvireco, yuviraso carite pipe. Ambuae carite pipendar avei yuviraso supi.

³⁷ Oyepotase rumo ivitu ai ipīrata vahe, i ohitu vahe oha guasu-guasú carite pipe, omboapipo seni yuvireco chupe.

³⁸ Jesús rumo oyeatocoño, oque ou supita coti. Evocoiyase omomahe voi yuvireco, aipo ehi chupe:

—¡Pomombohesar! ¿Nandemahemohaimi rutei vo yande rese? ¡Opara moco yaso ipive! —ehi.

³⁹ Evocoiyase aipo hese, omahe, oñehe pīrata ivitu ai upe, ipa upe avei:

—¡Pepituhu! —ehi.

Aheseve voi opituhu tupri.

40 Ipare aipo ehi güemimbohe upe:

—¿Mahera pesiquiyé iteanga? ¿Ndapeyeroya vîtei vo che rese? —ehi.

41 Ahe rumo osiquiyepave oporandu-randu oyeupe yuvireco:

—¿Ava pîha co mbîa secoi? Esepia niha, ivitu ai, ipa avei omboyeroya —ehi tēi yuvireco chupe.

5

Mbîa Gerasa iguar vîreco vahe carugar oyese

1 Jesús güemimbohe reseve oyepota ipa rovai Gerasa ivi rese yuviraso.

2 Yuvinose pare carite pipe sui, ahese mbîa carugar rerecosar tuvîpa pâhu rupi secoi vahe oso Jesús upe.

3 Co mbîa tuvîpa pâhu rupi secoi vahe yepi. Ndipoi eté ava secopisar, carena avei eté opa-opaño omondoso.

4 Setá yupagüer rupi tēi ñapichisa carena pipe ipi, ipo rupi avei yepi. Ahe rumo opa-opaño ité omondoso carena yepi. Ndipoi eté ava osecoreroyi vahe.

5 Ari, pîtu rupi oguata, osapucaî oico ivitri mahugüer rupi, tuvîpa mahugüer rupi avei; ocua-ocua ita pipe oyese yepi.

6 Amombrî Jesús repia ramoseve, oña senonde oñenopiha voi sovai,

7 oñehe pîrata chupe:

—¡Eyepi che sui Jesús, Tûpa seco ivate catu vahe Rahir! ¡Aporandu Tûpa rer pipe che mombaraisuēhi âgua eve! —ehi.

8 Aipo ehi, esepia, yipîndar Jesús aipo ehi chupe:

—¡Carugar mbahe tēi vahe, esē co mbîa sui! —ehi chupe.

9 Aheve oporandu chupe:

—¿Mara vo nde rer? —ehi.

Ahe omboyevi chupe:

—Che rer Legión. Esepia, ore rehi eté —ehi.

10 Oporanduño chupe omondopaēhi âgua co ivi sui.

11 Ichui namombrîimi setá cuchi ocaru vahe ivitri rese yuvireco.

12 Sese carugar oporandu yuvireco chupe:

—Ore mondopaño cuchi aviterve eve —ehi yuvireco.

13 Evocoyase Jesús omondo carugar sē âgua ahe mbîa sui. Ahe opa yuviroique cuchi aviterve. Ahe cuchi retacuer dos mil tupri vahe, ahe yuvinoña yuviraso ivivate sui ipa pipe ocañipa.

14 Evocoyase cuchi rârosar yuvinoña osiquiyepave yuviraso imombehu âgua tecuave, caha pipe rupi yuvirecoi vahe upe avei. Sese ava opa yugüeru sepia ‘¿mbahe pîha?’ oya yuvireco.

15 Oyepotase Jesús recosave, aheve osepia mbîa carugar vîreco vahecuer yuvireco oyemonde tuprise oî, yaracua tuprise avei. Ahese oyembosiquiye tēi yuvireco.

16 Mbahe oime vahe carugar vîreco vahe rese, cuchi rese avei, ahe sepiasar omombehupa ambuae ava upe yuvireco.

17 Evocoyase ava Jesús upe: “Esē cohava sui” ehi yuvireco.

18 Oha irise Jesús carite pipe, co mbîa carugar rerecosarer oporandu chupe supi oso âgua.

19 Ahe rumo,

—Esoño nde rētave, nde mu piri. Aheve emombehupa Yar oporoaisusa pipe mbahe oyapo vahecuer nde rese —ehiño chupe.

²⁰ Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoyase ava opacatu, “¡Mara ehi rutei!” ehi tēi yuvireco.

Jesús ombogüera Jairo rayri, iyavei cuña opoco vahe iturucuar rese ombogüera

²¹ Oyeveise Jesús carite pipe ipa rovai oso, aheve oñemonuha ati ava yuvireco chupe. Ahe evocoyase opitaño ipa popive.

²² Evocoyase oyepota mbia mborerecuar tūparo pendar, ahe serer Jairo. Jesús repiase, oñenopiha sovai,

²³ aipo ehi chupe:

—Che rayri omano pota. Yaso, teremondomi tēi nde po iharive imbogüera água —ehi.

²⁴ Evocoyase oso supi. Ava rehii avei yuviraso supi.

²⁵ Ipāhuve avei oime cuña doce araviter rupi suvı yepiyere-yere vahe.

²⁶ Iparaisú iteanga, setá oporoposano vahe ndoicatui imbogüera yuvireco omomandaivete catu iposanosa pipe yuvireco. Opa tupri tēi omondo mbahe vireco vahe, ivate catuño rumo imbaherasisa chupe.

²⁷ Co cuña osenduse Jesús rese ñehesa, oguata saquicuei oso ava rehii pāhuve, iturucuar rese opoco.

²⁸ Aipo ehi oyeupe oico: “Iturucuar rese apocose rumo, acuerara” ehi.

²⁹ Ahe ramoseve voi ndasuvı yepiyere iri. Ipare oyandu güetecuer yemoingatu tuprisa, ocuerase ombaherasisa sui.

³⁰ Jesús rumo oyandu osēse opīratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? —ehi.

³¹ Semimbohe omboyevi yuvireco chupe:

—¿Nderemahei vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

³² Ahe rumo omaheño vite ité ava oiviindar rese ‘¿uma ité pīha opoco che turucuar rese?’ oya.

³³ Evocoyase co cuña oicuae mbahe oyesendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe.

³⁴ Evocoyase Jesús aipo ehi chupe:

—Che rayri, erecuera cūritei nde yeroyasa pipe. Eso tupri. Esepia niha, erecuera nde mbaherasisa sui —ehi chupe.

³⁵ Iñehe viteseve, oyepota moviro Jairo rēta pendar tayri mano mombehu yuvireco:

—Omano ité nde rayri. Anı eremañeco tēi vite Porombohesar —ehi yuvireco chupe.

³⁶ Ahe rumo Jairo upe aipo ehi:

—Anı eresiquiye. Eyeroya catuño —ehi.

³⁷ Ndoipotai rumo ambuae ava oyeupi icho água; Pedro, Santiago, Juan güeraño oipota.

³⁸ Oyepotase Jairo rētave, osepia ava yemondii Oyaseho vahe.

³⁹ Ichui oiquese oi pipe, aipo ehi:

—¿Mahera vo perāse guasu tēi peyaseho peyu? Co cuñatai nomanoi, oque tēi ou —ehi ava upe.

⁴⁰ Ava rumo opucaete-eteño seroyaēhisave yuvireco. Evocoyase omose opacatu ava. Ipare omoingue iyesupa, ichi, oyeupindar reseve cuñatai rehögüersave.

⁴¹ Ipare oipopisi aipo ehi:

—Talita, cum —ehi chupe ('cuñatai, eñarapuha, ahe ndeu' ohesave aipo ehi).

⁴² Ahe ramoseve voi cuñatai doce araviter vahe oñarapuha, ipare oguata. Sepiase ava, oyembosiquiye guasu yuvireco.

⁴³ Jesús rumo oyocuai imombehuēhi āgua ambuae ava upe. Ipare, —Pembocaru co cuñatai —ehi.

6

Jesús Nazaret ve secói

¹ Jesús osē co tecua sui oso güecuave; semimbohe avei yuviraso supi.

² Oyepotase mbituhusa ari, ahese oporombohe tũparo pipe. Setá ava ñehe rendusar oyepihamondiisave oporandu-randu yuvireco:

—¿Que sui vo co ava oicupá opacatu mbahe? ¿Que sui pñha vinose co mbahecuasa co poromondiisa apo āgua? —ehi yuvireco oyeupe—.

³ Co niha carpintero, María membri; Santiago, José, Judas iyavei Simón riquehir, seindri avei yuvirecove yande pāhuve —ehi.

Sese ndoviroyai yuvireco.

⁴ Jesús rumo aipo ehi ahe ava eta upe:

—Tũpa ñehe mombehusar avei niha ava omboetei opacatu rupi yuvireco yepi, imu sēta pipendar ae rumo nomboetei yuvireco —ehi.

⁵ Ndoicatui mbahe oporomondi vahe apo āgua ava viroyaēhisa pipe, sese moviro tēi imbaheasi vahe harive omondo opo imbogüera āgua.

⁶ Ndoyembovihal avei viroyaēhisa rese.

Jesús oyocuai güemimbohe Tũpa mborerecuasa mombehu āgua

Ipare Jesús oso, oguata tecua-tecuami namombrii vahe rupi oporombohe oico.

⁷ Evocoyase, “Perio” ehi güemimbohe doce vahe upe. Ipare oyocuai ñuvirío-río, iyavei omondo güeco pñratasa carugar mboyepepi āgua chupe.

⁸ —Ndaperasoi chira rumo mbahe peguatasa rupi, pe pococa güeraño ité perasora —ehi—. Ndiyai avei peraso mbahe riru, pan, guarepochi avei.

⁹ Iyavei pemondera pitaquí güeraño. Ndapemondugüei chiaveira pe camisa seraso.

¹⁰ —Que pesosave peiquese oi pipe, pepitaño ipipe, ichuive tupriño ité pesēra pecua.

¹¹ Acoi ambuae tecua pendar ndape pñsi potaise, ndosendu potaise avei pe ñehe yuvireco, peyepipiñora ichui. Peipipeteño aveira pe pi ivi rñtachigüer sui. Ēgüe pe hesa omboyecuara cañisa apirēhi yuvireco chupe —ehi.

¹² Evocoyase semimbohe eta yuviraso, “Pemboasi pe angaipe, peyevi Tũpa upe” ohe āgua yuvireco.

¹³ Iyavei setá omboyepipi carugar ava sui, setá avei omondo mbahe quira ava imbaheasi vahē rese imbogüera āgua yuvireco.

Juan Oporoāpiramo vahe mano agüer

¹⁴ Mborerecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:

—Juan Oporoāpiramo vahe revo ocuerayevi. Sese oyapo poromondiisa ipñrata vahe —ehi.

¹⁵ Ambuae rumo,

—Tũpa ñehe mombehusar Elías mo evocoi —ehi yuvireco.

Ambuae evocoyase,

—Tũpa ñehe mombehusar aracahendar mo evocoi —ehi yuvireco.

¹⁶ Osenduse Herodes co nungar ñehesa, aipo ehi:

—Juan ité niha evocoi che añaca asia uca vahecuer, ahe cūrítei ocuerayevi —ehi.

¹⁷ Herodías recocuer sui tēi niha Herodes Juan oñapichi uca carena pipe soquenda. Esepia, coaña Herodías yipindar Felipe rembireco, co Felipe Herodes rivri viña. Herodes rumo omendaño vivri rembireco rese.

¹⁸ Juan aipo ehi Herodes upe: “Ndiyai eté nde ererecora nde rivri rembireco” ehi.

¹⁹ Herodías evocoyase oyuca pota Juan yamotarēhisave; ndoicatui rumo yuca.

²⁰ Esepia, Herodes osiquiyeyño ichui oicuase co mbia reco tupri aisa iyavei seco maranehise. Sese osepí ité; yepé ndoyembohe catui osenduse iñehe viña, ahe rumo osendu pota raiño ité.

²¹ Coiye rumo osupiti ari Herodías remimbotar apo āgua, ahese Herodes oharagüer pipe oyapo carusa guasu mborerecuareta rese, ava Galilea pendar icuapri ivate catu yuvirecoi vahe rese avei.

²² Herodías membri cuñatai oi que carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remimbotar rese cheu, che evocoyase amondora ndeu —ehi.

²³ Ipare aipo ehi iri opacatu ava rovaque chupe: “Amondora nde remimbotar ndeu, anise, che mbahe eta amboyahora ndeu” ehi.

²⁴ Ahe cuñatai osē oso, osi upe oporandu:

—¿Mbahe rese pñha aporandura chupe? —ehi.

Ichí aipo ehi chupe:

—Eporandu Juan Oporoāpiramo vahe āca rese —ehi chupe.

²⁵ Ipare cuñatai oña, oi que oso mborerecuar guapisave, aipo ehi chupe:

—Che aipota co pipeve voi eremboura Juan Oporoāpiramo vahe āca poratu pipe cheu —ehi.

²⁶ Mborerecuar rumo ndoyembovihai tēi. Esepia, ava ichohopri rovaque ité yipindar oñehe. Sese ndoicatui, “Aní” ohe āgua.

²⁷ Evocoyase ipare voi mborerecuar oyocuai sundao Juan āca reru āgua.

²⁸ Sundao oso soquendasave, oyasia Juan āca, seru poratu pipe. Mborerecuar omondo co cuñatai upe, evocoyase cuñatai omondo osi upe.

²⁹ Oyanduse Juan remimbohe, yuviraso setecuer reca. Ipare viraso yuvireco tuvipave yapocatu.

Jesús oyopoi cinco mil cuimbahe

³⁰ Co pare, apóstol oñemonuha Jesús piri yuvireco. Ipare omombehu mbahe güembiapogüer, oporombohe agüer avei yuvireco chupe.

³¹ Ahese aipo ehi oapóstol upe:

—Perio cohave, yaso, yapituhumi rane co coti —ehi.

Esepia, oyepindecuano ité ava yugüeru chupe, sese ndiyai icaru āgua yuvireco.

³² Evocoyase ahe güeraño apóstol reseve yuviraso carite pipe co coti ava sui.

³³ Setá rumo ava osepia ichose. Ichui opacatu ava tecua rupindar osaquie moñaño; ahe ranengatu oyepotapa yuvireco ichui.

³⁴ Ogüeyise rumo carite pipe sui, osepia ava rehí, ahese iparaisu ava eta chupe, inungar ovesa ndovirecoi vahe guãrosar. Ipare ombohe opacatu mbahe rese.

³⁵ Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe.

³⁶ ¿Ndiyai vo eremondopa ava tecua-tecuami cōi vahesa rupi? Aheve tovirocua ocaru āgua yuvireco —ehi yuvireco chupe.

³⁷ Ahe rumo omboyevi:

—Pe pemondora mbahe semihura —ehi.

Semimbohe aipo ehi yuvireco chupe:

—¿lyacatura pīha oreu dosciento denario pan repirã ava mbocaru āgua? —ehi.

³⁸ Jesús aipo ehi:

—¿Mbovi vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

³⁹ Evocoyase omboyaho-yaho ava imboguapi capihi hari rupi.

⁴⁰ Cincuenta, cien rupi-rupi oyemboyaho yuvireco.

⁴¹ Ichui Jesús oipisi poyandepo pan, ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehi upe imondo āgua yuvireco. Pira ñuvirío vahe avei omboyaho-yaho opacatu ava upe.

⁴² Evocoyase opacatu ava ocaru vahe ihitaropa tēi yuvireco.

⁴³ Ipare semimbohe omboapipopa doce tupri iruova pan iyavei pira rumbirer yuvireco.

⁴⁴ Cuimbahe ocaru vahe retacuer cinco mil tupri.

Jesús oguata i hari rupi

⁴⁵ Ipare Jesús, “Peha pe rane carite pipe, pesasa ipa Betsaida ve peso che renondeve. ‘Aviye’ tahe rane ava eta upe” ehi güemimbohe upe.

⁴⁶ “Aviye” ohe pare ava upe, oyeupi oso ivitri rese oyeroguī āgua.

⁴⁷ Pītuse carite ipa mbiterve ité secoi. Jesús rumo ahe ae opitaño ivive.

⁴⁸ Ahese omahe güemimbohe rese iyeapicui catuēhise. Esepia, ivitu ipirata vahe osovaichi yuvireco. Cōhe potase, oguata i hari rupi güemimbohe coti oso. Aviye ité acoi oñocuaño vahe rã oso.

⁴⁹ Sepiase rumo ‘hãgüer tēi revo’ oya, sãse pucu-pucu i hari rupi iguatase semimbohe yuvireco.

⁵⁰ Esepia, opacatu osepiase osiquiye yuvireco ichui. Ahe rumo aipo ehi:

—¡Peyemoviracuaño, che tēi! ¡Pesiquiye eme che sui! —ehi güemimbohe upe.

⁵¹ Ahe ohase carite pipe, opituhu voi ivitu. Evocoyase, “¡Mara ehi rutei!” ehi tēi yuvireco.

⁵² Esepia, ndocua vitei eté pan apo ati agüer yuvireco, yavai vite seroya āgua yuvireco chupe.

Jesús ombogüera ava imbaheasi vahe Genesaret pendar

⁵³ Osasase ipa, oyepota Genesaret ivi rese yuviraso, ahe imbehive oñapichiño carite yuvireco.

⁵⁴ Yuvinosepa ramomiseve, ava oicua voi Jesús yuvireco.

⁵⁵ Ichui opacatu ahe ivi pipendar güeru imbaheasi vahe Jesús upe yuvireco.

⁵⁶ Oyepotase que tecuamive, anise tecua guasuve, caha pipe oi-oimi rupi, ahe supí imbaheasi vahe ocar rupi vinosepa voi yuvireco. “Topocomi tēi nde turucuar popi rese” ehi yuvireco chupe. Evocoyase opacatu sese opoco vahe, ocuerapa voi eté yuvireco.

7

Mbahe omonguiha vahe ava recocuer

¹ Evocoiyase fariseo eta, Moisés porocuita rese oporombohe vahe avei yugüeru Jerusalén sui oyemboya Jesús rese yuvireco.

² Ahese ahe osepia Jesús remimbohe ocaru água iyepoiêhise porocuita mboaviyeêhise yuvireco, sese oñemoiro yuvireco chupe.

³ (Esepia, fariseo iyavei opacatu judío eta aracahendar recocuer sui ndipoisai eté yuvireco, sese oyepoiêhise ndocarui eté yuvireco yepi.

⁴ Mbahe rerocuasa sui oyevisé, ndocarui oyepoiêhi vitesese yuvireco. Iyavei tecocuer aracahendar tēi oyapo vite yuvireco inungar igua riru piisa, mbahe riru guarepochi apopri iyavei vupa moatiro tuprisa.)

⁵ Sese fariseo eta iyavei Moisés porocuita rese oporombohe vahe oporandu Jesús upe yuvireco:

—¿Mahera vo nde remimbohe yande ramoi aracahendar recocuer ndoviroya iri yuvireco? Esepia ru, ahe ocaruño opo quiha reseve yuvireco —ehi.

⁶ Jesús rumo aipo ehi chupe:

—Pe Tūpa roroyasar angahu tēi peico vahe, supi tupri ité Tūpa ñehe mombehusar Isaías rembicuachía aracahendar aipo ehi:

‘Co tecua pendar ava oyuru pipe tēi che mboetei yuvireco; ipihañemoñeta rumo amombri tēi che sui.

⁷ Oyerure tupri tēi yuvireco cheu.

Esepia, iporombohesa ava porocuita tēi’ ehi.

⁸ Ëgüe peye pepoipa Tūpa porocuita sui ava recocuer aracahendar rupi tēi pe guata água —ehi.

⁹ Iyavei aipo ehi iri chupe:

—Pe ramoi recocuer aracahendar pipe tēi peseyaño co coti Tūpa porocuita.

¹⁰ Esepia, Moisés aipo ehi: ‘Pembroyera iyavei peipñiviira pe ru, pe si avei no. Acoi ñehe mara vahe oyesupa upe ahe, Tomanño, ehi’ ehi aracahe.

¹¹ Pe rumo aipo peye tēi: ‘Acoi ava aipo ehi vahe vu upe, osi upe avei no: Ndiyai chira mbahe mondo água pēu. Esepia, che opacatu mbahe areco vahe Tūpa upe imondopri, ahe Corbán, ehi’ peye;

¹² pe evocoiyase, aipo ehi vahe upe, ‘Ndiyai eté oyesupa pñiviñi água’ peye.

¹³ Co nungar apo pipe Tūpa porocuita ndaperoyai. Esepia, ndapepoi potai ava recocuer aracahendar sui. Setá mbahe co nungar peyapo vite —ehi.

¹⁴ Ipare, “Perio” ehi iri ava rehi upe.

—Peyapisaca, pesenducua tupri che ñehe:

¹⁵ Ndahei ocar sui tēi ou ava recocuer monguiha água. Ahe rumo osē ipiha sui.

¹⁶ Acoi osendu pota vahe che ñehe, toyapisacaño sese —ehi.

¹⁷ Ipare oseypase ava, oi que oi pipe. Aheve semimbohe eta oporandu yuvireco co porombohesa omombehu vahe rese chupe.

¹⁸ Ahe evocoiyase aipo ehi güemimbohe upe:

—Evocoiyase pe avei no, ¿ndapesenducuai? ¿Ndapeicuai vo acoi ocar sui oi que vahe ava aviterve nomboangaipai eté?

¹⁹ Esepia niha, ndahei ipihave oso, ahe rumo oso yaviterve. Ipare osē ichui —ehi ‘opacatu tembihu aviyeño ité’ oyapave aipo ehi.

²⁰ Ipare aipo ehi:

—Ava piha sui osē vahe rumo mbahe, ahe omonguiha ava recocuer.

²¹ Esepia, ava pihañemoñetasa sui osē pihañemoñeta raisa, yemboaguasasa, mondasa, porapichisa,

²² mendasa sui yemboaguasasa, mbahe pota raisa, teco raisa, porombopasa, mbahe tēi pota raisa, mbahe rese ñemoirosa, ava rese ñemoñeta tēisa, teco ivate aisa, pihañemoñetasa nihivi vahe.

²³ Co mbahe opacatu naporai vahe yuvínose ava sui imboangaipa uca āgua —ehi.

Cuñña ndahei vahe judía viroya Jesús

²⁴ Ichui Jesús osē oso tecua Tiro coti. Aheve oi que oi pipe, ndoyecua uca potai ava upe viña; ndoicatui rumo ava sui oñemi.

²⁵ Oime cuñña viresco vahe omembrí cuññatai, ahe viresco carugar oyese; ahe cuñña oicuaese Jesús recosa, oso voi sovai oñenopiha.

²⁶ Ahe rumo ndahei judía, sirofenicia i guar ité. Ahe aipo ehi Jesús upe: “Enose che membrí sui carugar” ehi.

²⁷ Jesús rumo aipo ehi chupe:

—Tahir judío rane toipisi mbahe yuvireco. Esepia, naporai yarocua pan tahir sui cave tohu imondo āgua —ehi.

²⁸ Co cuñña aipo ehi:

—Supi eté, che Yar, cave avei rumo ohuño ité pan rahicuer oviapi vahe tahir mesavri pendar —ehi.

²⁹ Aipo ihese, aipo ehi:

—Aviye ité nde ñehe. Eyevi eso. Carugar osē nde membrí sui —ehi chupe.

³⁰ Co cuñña oyepotase güetave, osepia omembrí supave; yipive rumo osē carugar ichui.

Jesús ombogüera mbia ndayapisai, iñehe ipiti-piti vahe

³¹ Jesús oyevi oso Tiro ivi sui. Ipape osasa Sidón rupi oso, ambuae tecua eta Decápolis ivi rupi avei. Ichui oyepota ipa Galilea ve.

³² Aheve mbia ndayapisai, iñehe ipiti-piti vahe rerasosar: “Emondomi tēi nde po iharive” ehi yuvireco chupe.

³³ Ichui Jesús viraso coi cotimi ava sui. Aheve ocuā omonde yapisa pipe. Ipape omondo güendi ñapecu rese.

³⁴ Ipape omahe iva rese, ipituhe pucu aipo ehi: “¡Efata!” ehi (“timboisa” ohesave aipo ehi).

³⁵ Ahe pipeve voi yapisa tupri, oñehe tupri avei.

³⁶ “Ndapemombehui chira ambuae upe” ehi ahe mbia upe. Ahe rumo oicua ucaño ité ambuae ava upe yuvireco.

³⁷ Evocoyase ava oyemboviha guasusave, aipo ehi yuvireco: “Aviye ité rumo mbahe sembiapo. ¡Esepia, ndayapisai vahe omboapisa, iñehe ipiti-piti vahe avei omoñhengatu tupri!” ehi yuvireco.

8

Jesús oyopoi cuatro mil cuimbahe

¹ Ñepeí ari pipe setá ava oyemboya iri Jesús rese yuvireco. Ndipoi rumo mbahe icaru āgua. Sese oñehe güemimbohe eta upe aipo ehi:

² —Iparaisu catu co ava yuvireco cheu. Esepia, mbosapi ari yuvirecoi yande piri, iyavei ndipoi eté mbahe semihura.

³ Amondopase sètave sieporēhi reseve, viroviapi-api tiētera tieporēhi peri rupi yuvireco viña. Esepia, setami ava yugüeru amombri sui —ehi.

⁴ Semibohe aipo ehi yuvireco chupe:

—¿Mara yahera vo ava tohu mbahe mondo cohava ava porêhisave? —ehi.

⁵ Ahe oporandu:

—¿Mbovi vo pan pereco? —ehi.

—Orovireco siete pan —ehi semimbohe yuvireco chupe.

⁶ Evocoyase, “Peguapi ivi harive” ehi ava rehi upe. Ahese oipisi siete pan, “Aviye ndeu” ehi Tûpa upe. Ichui omboyaho-yaho pan imondo güemimbohe upe, semimbohe evocoyase omondo ava rehi upe yuvireco.

⁷ Iyavei vireco moviro pirami yuvireco, sese avei, “Aviye ndeu” ehi iri Tûpa upe. Ichui güemimbohe upe, “Pemboyaho-yaho ava upe” ehi.

⁸ Opacatu ité ava ocaru vahe ihitaro yuvireco. Ipare rumo semimbohe omboapipo iri rane sumbirer siete iruova yuvireco.

⁹ Ava rehi ocaru vahe retacuer cuatro mil tupri. Ipare Jesús, “Aviye, peso tupri” ehi ava upe.

¹⁰ Ipare voi eté yuviraso güemimbohe eta reseve carite pipe Dalmanuta ivi rese.

Fariseo eta oporandu poromondiisa rese yuvireco

¹¹ Ipare fariseo eta oyepota Jesús ñehe poepi-epi água yuvireco. Jesús recoña água, oporandu iva pendar poromondiisa rese ‘¿Tûpa sui eté pîha ou?’ oya yuvireco chupe.

¹² Sese Jesús ipituhe pucu, aipo ehi:

—¿Mahera vo co ava oipota iva pendar poromondiisa che recocuer cua água yuvireco! Namboyecuai chietera rumo que ñepei evocoi nungar mbahe pëu —ehi.

¹³ Ipare oseyaña ava. Ichui yuviroha iri carite pipe, osasapa ipa yuviraso sovai.

Fariseo porombohesa inungar pan mboapeposa

¹⁴ Jesús remimbohe sesarai pan sui yuvireco, ñepeimi tēi pan viraso güemihura yuvireco.

¹⁵ Evocoyase Jesús aipo ehi:

—Peicua catu fariseo iyavei Herodes pan mboapeposa sui —ehi güemimbohe upe.

¹⁶ Aipo ehise, semimbohe: “Pan ndayaruse revo aipo ehi yandeu” ehi-ehi tēi oyeupe yuvireco.

¹⁷ Ahe rumo oicua güemimbohe pîhañemoñetasa, aipo ehi:

—¿Mahera, “Pan ndayaruí” peye? ¿Ndapeicua vîtei vo che rembiapo? ¿Yavai vîte tie seroya água pëu?

¹⁸ Oime tēi pe resa, ndapesepiai rumo; oime tēi pe nambi, ndapesendui rumo mbahe. ¿Ndapeyemomahenduha iri vo

¹⁹ acoi amboyaho-yahose cinco pan sui ava cinco mil vahe tohu? ¿Mbovi iruova vo acoi sumbirer pemonuha iri? —ehi.

—Doce iruova —ehi yuvireco chupe.

²⁰ —Iyavei acoi amboyaho-yahose siete pan sui ava cuatro mil vahe tohu, ¿mbovi iruova vo acoi pemonuha sumbirer no? —ehi.

—Siete iruova —ehi yuvireco chupe.

²¹ Ipare aipo ehi:

—¿Ndapesenducua vîtei vo? —ehi güemimbohe upe.

Jesús ombogüera ava ndasesapisoí vahe tecua Betsaida ve

²² Oyepotase Jesús tecua Betsaida ve, ahe ramoseve voi ogüeru ndasesapisoí vahe yuvireco chupe ‘epocomi tēi sese’ oya yuvireco.

²³ Evocoyase oipopisi ndasesapiso i vahe seraso co cotimi tecua sui. Aheve omondo güendi sesa rese, omondo avei opo iharive. Ipore oporandu chupe: “¿Eresepia vo mbahe?” ehi.

²⁴ Ndasesapiso i vahe omahese, aipo ehi:

—Asepi ava inungar ivira oguata vahe yuvireco —ehi.

²⁵ Evocoyase omondo iri opo sesa rese. Ipore co mbia omahe tupri ité cute, ocuera ité, opacatu mbahe osepia tupri.

²⁶ Ichui Jesús omondo sêtave aipo ehi chupe:

—Ereyevi iri eme tecuave —ehi.

Pedro oicua uca Jesús Tûpa Rembiporavo seco rese

²⁷ Ipore yuviraso Jesús güemimbohe reseve ivi Galilea sui tecua Cesarea coti, Filipino ivi rese. Peri rupi oporandu güemimbohe upe:

—¿Mara ehi vo ava oñehe yuvireco che rese? —ehi.

²⁸ Semimbohe evocoyase omboyevi yuvireco chupe:

—Amove ava, “Juan Oporoãpiramo vahe” ehi yuvireco ndeu; ambuae evocoyase, “Elías” ehi; ambuae, “Tûpa ñehe mombehugar mboetasa” ehi yuvireco ndeu —ehi.

²⁹ Evocoyase oporandu iri güemimbohe upe:

—Pe no, ¿ava, “Co secoi” peye ru pe cheu no? —ehi.

Pedro evocoyase aipo ehi chupe:

—Nde niha Tûpa Rembiporavo Poropisrosar ereico —ehi.

³⁰ Jesús rumo, “Pemombehui rene que ñepe i ava upe” ehi.

Jesús omombehu omano ãgua

³¹ Evocoyase Jesús omboipi oporombohe: “Che, Ava Riquehir, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuaite rese oporombohe vahe remiamotarêhi aicora. Ahe avei che yuca ucara yuvireco. Acuerayevira rumo mbosapi ari rupi” ehi.

³² Ahe omboyecua tupri ité chupe. Evocoyase Pedro viraso co cotimi chupe oñehengata ãgua.

³³ Oyemboyere rumo, omahe güemimbohe eta rese, oñehengata Pedro upe aipo ehi:

—¡Esiri che sui, Carugar! Esepia, nde nandepihañemoñetai mbahe Tûpa upendar rese; ava nungar tēi nde pihañemoñeta eico —ehi.

³⁴ Evocoyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupi, topoi mbahe güemimbotar tēi aposa sui, iyavei inungar-ra curusu rese ovosira viña, toyemoingatu voi che recocuer rese oparaisu ãgua iyavei toguata tupri che rupi.

³⁵ Esepia, acoi ava güetecuer tēi raisupar, ocañi tēi etera. Acoi ava omocañi tēi vahē rumo güetecuer che recocuer rese, ñehesa ñepisirosa sui avei, ahe oñepisiora.

³⁶ ¿Aviye ai angahu pīha ava upe opacatu mbahe ivi pipendar pisi ãgua tēi, ahe ae tēi omocañi güecocuer yuvireco viña?

³⁷ ¿Mbovi pīha omondora ava güecocuer repirã viña?

³⁸ Esepia, acoi ava yuvinochi ai vahe che sui iyavei che ñehengagüer sui ava angaipā viyar ndaseco tupri vahe rovai, che avei, Ava Riquehir, êgüe ahera acoi ayevisē che Ru reco pīrata porañetesa pipe, sembiguai rehī i va pendar maranehi reseve curi —ehi.

9

¹ Ipare Jesús aipo ehi iri:

—Supi eté, oimera amove cohava ava nomano vîtei chivaherã, osepia rane itera ouse Tũpa mborerecuasa ipĩratasa pipe yuvireco curi —ehi.

Jesús ñecuñaro agüer

² Seis ari pare, Jesús viraso Pedro, Santiago, Juan reseve ivitri ivate vahe-save oyeupi. Aheve aviyeteramo tẽi oñecuñaro güemimbohe rovai.

³ Iturucuar sendí, morochí eteanga. Ndipoi eté que ava co nungar co ivi pipe turucuar oyosei vahe.

⁴ Iyavei aviyeteramo tẽi oyemboyecua Elías, Moisés reseve Jesús rese oñemoñeta yuvinoha.

⁵ Ipare Pedro aipo ehi chupe:

—Ore mbohesar, javiye ai eté cohava yaico! Toroyapo mbosapĩ teyupami: ñepeĩ ndeu nara, ambuae Moisés upe, ambuae evocoiyase Elías upe nara —ehi.

⁶ Osiquiye tẽi semimbohe yuvireco. Sese Pedro ndoicuaise oñehe ãgua, aipo ehiño tẽi.

⁷ Ahe ramoseve avei ogüeyi iva quĩha iharĩve, oyopipa tupri yuvireco. Ahe ipãhuve oyeendu ñehesa aipo ehi vahe: “Co che Rahĩr, che rembiaisu; peyapisaca catu iñehe rese” ehi vahe.

⁸ Ahe ramoseve avei omahese oivĩ yuvireco, ndosepia eté que ambuae ava, Jesús güeraño tupri ité osepia opãhuve yuvireco.

⁹ Ipare ogüeyi ivitri sui yuvireco, aipo ehi güemimbohe upe ou: “Ndape-mombehui chietera que ñepeĩ ava upe co mbahe pesepia vahe, pemombehura rumo acoi che, Ava Riquehĩr, acuerayevise voi” ehi.

¹⁰ Oyeupeñomi tẽi vireco aipo ñehesa yuvireco, ahe rumo oporandu-randu oyeupe: “¿Mara oya pĩha aipo, ‘Acuerayevira’ ehise?” ehi tẽi yuvireco.

¹¹ Evocoiyase semimbohe oporandu chupe:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvirecõ? —ehi yuvireco chupe.

¹² Evocoiyase aipo ehi chupe:

—Elías rane ité niha oura opacatu mbahe moingatu ãgua. ¿Mahera araca-hendar icuachiapri pipe aipo ehi: “Ava Riquehĩr oiporarara mbahe, yamo-tarẽhimbri avei secoira” ehi?

¹³ Che niha aipo ahe pẽu: Elías rumo ou ité, ava evocoiyase opacatu güemimbotar tẽi oyapo yuvireco sese. Ëgüe ehi opacatu yaviye aracahendar icuachiapirer sese —ehi.

Jesús ombogüera chĩhivahe caruguar rerecosar

¹⁴ Ipare oyevi yuvireco güemimbohe recosave. Aheve osepia ava rehĩi oyere guasue yuvireco sese, iyavei oime aheve Moisés porocuita rese oporombohe vahe oñehepoeipi-epi semimbohe yuvireco.

¹⁵ Ichui Jesús repiase, opacatu yuvinoña yuviraso chupe “avirave” apo.

¹⁶ Evocoiyase ahe oporandu ava eta upe:

—¿Mbahe rese vo peporandu-randu peyeupe? —ehi.

¹⁷ Ñepeĩ ipãhu pendar omboyevi chupe:

—Porombohesar, co aru che rahĩr ndeu, vireco vahe caruguar oyese, nomoñehengatu ucai vahe yepi.

¹⁸ Iyavei que iguatasa rupi co caruguar aviyeteramo tẽi opocose sese, oitĩ voi ivive iyavei sendiriyuiyusu, sãitere-tere avei; sese cüritei nipirata iri

eté. “Penosemi carugar ichui” ahe tēi nde remimbohe eta upe. Ahe rumo ndoicatui eté yuvireco —ehi.

¹⁹ Jesús omboyeví chupe:

—¿Too, ndapeyeroya tupri vitei eté che rese! ¿Mboví rupi rutei vo aico vitera pe pāhuve che ñemosasa pipe? Peru evocoi chíhivahe cheu —ehi.

²⁰ Evocoiyase ogüeru yuvireco chupe. Osepiase carugar Jesús, oiti uca iri chíhivahe ivive. Omboapayere-yere iyavei sendiriyui guasu-guasú.

²¹ Sese oporandu tu upe:

—¿Mbahese vo na ehi chupe? —ehi.

Tu evocoiyase aipo ehi:

—Ichíhivahemi suive ité.

²² Amove co carugar oiti uca tatave, ive avei yuca pota uca āgua yepi. Sese ereicatuse, ore pītiviñomi tēi catu eve ore paraisuerecosave —ehi.

²³ Jesús aipo ehi chupe:

—¿Mahera, “Ereicatuse” ere cheu! Acoi che rese oyeroya vahe upe opacatu mbahe yaposa —ehi.

²⁴ Aipo hese tu,

—¿Oroviroya niha, che pītiviñi ru eve nde reroya catu āgua! —ehi pírata chupe.

²⁵ Osepiase Jesús ava rehi, oyemboyase sese, oñehe pírata carugar upe aipo ehi:

—Carugar noñehei vahe, ndayapisai vahe, che orocuai, epoi co chíhivahe sui, ereique iri eme secocuer rese —ehi.

²⁶ Carugar sãse pucu chíhivahe yuca tupri oso. “Omano ité co chíhivahe” ehi ambuae ava yuvireco.

²⁷ Jesús rumo oipopisi imopuha; evocoiyase chíhivahe opūha tupri voi eté.

²⁸ Ichui oique oi pipe. Aheve semimbohe ahe aemi oporandu yuvireco chupe:

—¿Mahera pīha ndoromose catui eté carugar ichui? —ehi yuvireco.

²⁹ Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar carugar yaicatu imombo —ehi.

Jesús omombehu iri omano āgua

³⁰ Ichui yuvinosepase, yuviraso ivi Galilea rupi. Jesús rumo ndoyemboyeca uca potai eté que ambuae ava upe.

³¹ Esepia, güemimbohe güeraño ité ombohe aipo ehi:

—Che, Ava Riquehir, imondopri aicora che amotarēhimbar povrive, che yuca aveira yuvireco, mbosapi ari rupi rumo acuerayevira —ehi.

³² Semimbohe rumo ndosenducuai eté oyeupe ñehesa yuvireco iyavei osiquiye chupe porandu āgua yuvireco yepi.

¿Ava vo seco ivate catu vahe?

³³ Ipare oyepota tecua Capernaum ve yuvireco. Yuviroiquese oi pipe,

—¿Mbahe rese vo acoi peyeaca-aca peico peri rupi? —ehi güemimbohe upe.

³⁴ Ahe rumo noñehei tupri yuvireco chupe. Esepia, peri rupi, “¿Ava pīha ivate catu vahe?” ehi asi-asi oyeupe yuvireco.

³⁵ Evocoiyase guapisave, “Periopa” ehi güemimbohe upe, aipo ehi avei:

—Oimese pe pāhu pendar oyemboivate ai vahe, ahe rumo seco ivi coti catura opacatu sui ava eta pītiviñi āgua —ehi.

³⁶ Ipare oipisi chíhivahe güemimbohe pāhuve senoha aipo ehi:

37 —Acoi ava oipisi vahe co chihivahemi nungar che rer pipe sereco, che ité che pisi yuvireco; iyavei acoi ava che pisi vahe, ndahei che güeraño che pisi, oipisi aveira che mbousar —ehi.

Acoi ndahei vahe yande amotarëhimbar, ahe yande mboyoyasar secoi

38 Evocoyase Juan aipo ehi chupe:

—Ore mbohesar, orosepia mbia nde rer pipe omombo vahe caruguar. Ahe rumo ndoguatái cūrítei ore rupi; ore ité ndoroipotai chupe —ehi.

39 Jesús rumo,

—Aní êgüe peye —ehi—. Esepia, ndipoi eté que ambuae oyapo vahe poromondiisa che rer pipe, oicatu vahe rã oñehe rai che rese.

40 Sese ndayande amotarëhi vahe, ahe yande mboyoyasar secoi.

41 Acoi que omondo vahe i vaso pipe che rupi pe recosa pipe pëu, evocoi nungar oipisi itera porerecosa oyeupe nara —ehi.

Yaicua catura mbahe tēi apoëhi ãgua

42 “Acoi que ava omboangaipa uca vahe co chihivahemi nungar che reroyasar, iyacatu evocoi nungar ñapichisa ita mbahe mbocuhisa iyesho rese para guasu pipe imombo ãgua.

43 Sese pe po pe mboangaipa uca vahe peyasía ité peyesui. Esepia, aviye catu peiquera tecove apirëhisave ñepe pe po rese, peso rãgüer sui que ñuvirío pe po rese tata guasu apirëhisave.

44 Aheve acoi uru nomanoi vahe, tata ndogüei vahe avei.

45 Pe pi pe mboangaipa ucase, peyasía avei peyesui. Esepia, aviye catu ndape pindugüei peique tecovesave, que ñuvirío pe pi rese peique rãgüer sui tata guasu ndopai vahesave.

46 Aheve acoi uru nomanoi vahe, tata ndogüei vahe avei.

47 Pe resa avei pe mboangaipa ucase, penose ité peyesui. Esepia, aviye catu peique ñepe pe resa rese Túpa mborerecuasave que ñuvirío pe resa rese tata guasu apirëhisave pe reique rãgüer sui.

48 Aheve acoi uru nomanoi vahe, tata ndogüei vahe avei.

49 “Esepia, opacatu ava imoehesara tata nungar pipe.

50 Sese yucrí aviye ai eté. Nasehe irise rumo, ndayaicatui chira imoehe iri ãgua. Peico catu yucrí nungar mbahe tuprí pipe peyeupe nara” ehi.

10

Jesús oporombohe mendasa sui poiëhi ãgua

1 Ipape Jesús osë tecua Capernaum sui, oso Judea ivi rupi iai Jordán rovai arí sësá cotí. Aheve ava rehiñ oñemonuha iri yuvireco sese. Iyavei ombohe iri ava güecocuer rupi tuprí.

2 Evocoyase fariseo oyemboya seco rãha ãgua tēi yuvireco sese, “¿Aviye pñha cuimbahe omenda vahe opoi güembireco sui?” ehi yuvireco chupe.

3 Ahe rumo omboyeví chupe:

—¿Mara ehi vo acoi Moisés porocuita pipe? —ehi.

4 Ahe evocoyase omboyeví yuvireco chupe:

—Moisés remimombehu aipo ehi: “Pemondora pe rembireco upe cuachiar poisa resendar pe poi ãgua pe rembireco sui” ehi —ehi fariseo yuvireco chupe.

5 Evocoyase fariseo upe aipo ehi:

—Moisés omondo co porocuita pe poreroyaëhisa pipe sui pëu.

⁶ Yipisuive ité niha, ‘Tūpa oyapo opacatu mbahe, oyapo avei cuimbahe, cuña reseve.

⁷ Sese niha cuimbahe omendase, oyepepira oyesupa sui güembireco rese ité yuvirecoi água.

⁸ Evocoiyase ñuvirío yuvirecoira ñepeí ava nungar.’ Sese ndahe iri ñuvirío, ñepeí nungar ité yuvirecoira.

⁹ Evocoiyase ava Tūpa omomenda vahe oyese, ndiyai ava tēi omboyepepi yuvireco oyesui —ehi.

¹⁰ Oive yuvirecoi vitese, semimbohe oporandu iri co mbahe rese yuvirecoi chupe.

¹¹ Evocoiyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa tēi vahe güembireco sui.

¹² Acoi cuña opoise omer sui omendase ambuae cuimbahe rese, ahe oyemboaguasa tēi vahe avei —ehi güemimbohe upe.

Jesús osovasa chīhivahe

¹³ Ipare ogüeru chīhivahe Jesús upe yuvireco sese ipoco água. Semimbohe rumo, “¿Mahera vo peruño tēi chīhivahe?” ehi opiha vīracuasa pipe serusar upe yuvireco.

¹⁴ Evocoiyase Jesús osepiase, ndasorii güemimbohe upe aipo ehi:

—¡Mahera ndapeipotai iyu água! Toyugüeruño chīhivahe cheu. Esepia, co chīhivahe nungar ava yuviroiquera che Ru Tūpa mborerecuasave.

¹⁵ Supi eté, acoi ndoipisii vahe che Ru Tūpa mborerecuasa chīhivahe nungar yuvireco, ahe evocoiyase ndoyuviroiquei chietera ipipe —ehi.

¹⁶ Evocoiyase oipisii, omondo opo iharive osovasa.

Ñepeí mbia chīhivahe imbahe eta vahe oñhe Jesús upe

¹⁷ Oguata vitese Jesús yuvireco, aheseve mbia chīhivahe oña oso sovai, oñenopīha, oporandu chupe:

—Porombohesar avīye vahe, ¿mbahe vo ayapora tecovesa apirēhi vahe rereco água? —ehi.

¹⁸ Jesús evocoiyase aipo ehi ahe mbia upe:

—¿Mahera vo, “Avīye vahe” ere cheu? Oime rumo ñepeí avīye vahe ité, ahe Tūpa secói.

¹⁹ Ereicua niha Tūpa porocuaíta: ‘Ndereporoyucaí chira, nandeaguasai chira, nandemondai chira, nanderemirai chira ambuae ava rese, ndereporombopai chira, eremboyeroyara nde ru, nde si avei’ ehi vahe —ehi.

²⁰ Ahe mbia rumo,

—Porombohesar, che aipo nungar opacatu amboavīye ité che chīhivahe suive —ehi.

²¹ Evocoiyase omahe saiusave sese, aipo ehi chupe:

—Ñepeí mbahe rumo ipane vite ndeu: eso, emondopa rane nde mbahe; ahe sepi evocoiyase emondo ava iparaisu vahe upe. Ichui ererecora mbahe avīye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbia oyepepiño ichui ovīharēhisave oso. Esepia, ahe mbahe yar ité secói.

²³ Evocoiyase omahe oivīindar güemimbohe rese, aipo ehi:

—¡Yavai eté rumo ava mbahe yar reique água che Ru Tūpa mborerecuasave! —ehi.

²⁴ Semimbohe evocoiyase, “¡Mara ehi rutei!” ehi tēi iñhe renduse yuvireco. Ahe rumo omombehu iri:

—Che rahireta, iyavai eté Tūpa mborerecuasave imbahe eta vahe reique āgua ombahe eta rese tēi ipihañemoñeta vahe upe!

²⁵ Yavai rai camello upe yucuar rupi seique āgua, ava imbahe eta vahe upe rumo yavai catu che Ru mborerecuasave seique āgua —ehi.

²⁶ Aipo nungar renduse oyepihamondii guasu yuvireco. Oporandu-randu tēi oyeupe yuvireco: “¿Ava angahu pīha oñepisiora yuvireco viña?” ehi.

²⁷ Evocoyase omahe güemimbohe rese aipo ehi:

—Ava tēi upe rumo yavai aipo nungar mbahe apo āgua; Tūpa upe rumo ndayavaimi eté. Esepia, Tūpa opacatu mbahe mboavaisarēhi secoi —ehi.

²⁸ Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata āgua —ehi chupe.

²⁹ Omboyevi rumo Pedro upe:

—Supi eté co aipo ahe pēu: acoi che raisusa pipe iyavei ñehesa ñepisirosa raisusa pipe oseyapa vahe güeta, viquehir, vivri, güeindri, vu, osi, guahir iyavei oivi,

³⁰ ahe oipisira omahera co ivi pipe cien yupagüer rupi avei oi, vivri, güeindri, osi, guahir iyavei ivi. Yepe oiporarara mbahe-mbahe tēi viña. Ipare rumo tecua ambuaeve oipisi aveira tecovesa apirēhi vahe curi.

³¹ Setá vai rumo cūrtei yipindar vahe; ipa tēira yuvirecoi. Setá aveira cūrtei ipa tēi vahe, yipindar yuvirecoira curi —ehi.

Jesús omombehu imbosapisa rupi omano āgua

³² Yuvirasose Jerusalén ve, Jesús tenonde secoi güemimbohe upe. Semimbohe rumo ndoyembovīhai iyavei saquicuerindar osiquiye yuvireco. Aheve Jesús oñehe iri co cotimi güemimbohe doce yuvirecoi vahe upe. Ichui omboipi imombehu co mbahe-mbahe tēi reime āgua chupe aipo ehi:

³³ “Peicua niha, yasora tecua Jerusalén ve, aheve rumo che, Ava Riquehir, che pisira che mondo pahi eta rereciar iyavei Moisés porocuita rese oporombohe vahe povrive yuvireco. Ahe, ‘Tomano’ ehira yuvireco cheu. Ipare che mondo aveira ava ndahei vahe yande mu upe yuvireco.

³⁴ Mara ehi-ehi tēira yuvireco cheu, ondivi-ndivira, oyuvirocua-rocuara che rese, che yuca aveira yuvireco. Mbosapi ari rupi rumo acuerayevira” ehi güemimbohe upe.

Mbahe aviye vahe rese oporandu Santiago, Juan reseve yuvireco

³⁵ Ipare oyemboyase Zebedeo rahir Santiago, Juan Jesús rese aipo ehi yuvireco chupe:

—Ore mbohesar, oroipota ereyapo mbahe aviye vahe oreu —ehi.

³⁶ Ahe evocoyase,

—¿Mbahe vo peipota ayapo vaheerā pēu? —ehi chupe.

³⁷ —Ore oroipota nde mborerecua porañetesave ore mboguapira ndeyepiri eve, ñepe nde mbahe rese pocosa coti, ambuae nde mbahe rese pocoehisa coti —ehi yuvireco chupe.

³⁸ Evocoyase omboyevi:

—Pe ndapeicuai mbahe rese pe porandu. ¿Peiporara catura pīha che co mbahe-mbahe tēi aiporara vaheerā, inungar-ra que igua iro vahe aihu vaheerā viña? Iyavei, ¿peicatura pīha che āpiramosa aipisi vaheerā pisi? —ehi.

³⁹ —Taa, oroicatuño itera —ehi yuvireco.

Evocoyase ahe aipo ehi chupe:

—Supi eté peihura co mbahe iro vahe, peipisi aveira āpiramosa che aipisi vaheerā nungar.

⁴⁰ Co rumo ndiyai cheu che piri pe guapí ãgua, che mbahe rese pocosa coti, ambuae che mbahe rese pocoẽhisa coti. Che Ru Tũpa omoĩngatu güembiporavo upe nara uguapí vaheerã che ipive —ehi.

⁴¹ Evocoyase ambuae semimbohe diez yuvirecoi vahe iñehe renduse, oñemoiro Santiago, Juan upe yuvireco.

⁴² Ahe rumo, “Perio” ehi opacatu upe. Ipare aipo ehi:

—Peicua niha acoi mborerecuar guasu yuvirecoi vahe Tũpa cuaparẽhi oporocuai oporoyuca ai tẽisa pipe. Iyavei acoi ivate catu vahe oyecoapirasã iteanga omborerecuasa pipe yepi.

⁴³ Pe rumo egũe ndapeyei chira pe yeereco. Iyacatu rumo acoi ava oipota vahe ivate catu güeco ãgua pe pãhuve, ihañeco rane itera opacatu ambuae ava rese.

⁴⁴ Iyavei acoi pe pãhu pendar oipota vahe tenonde catu güeco ãgua, ihañeco tupri ranera opacatu pe pãhu pendar rese.

⁴⁵ Aherã niha che, Ava Riquehi, ayu ndahei ava che rese ihañeco ãgua; che rumo ayu ava rese che hañeco ãgua, iyavei amondo vaheerã che recocuer manosave ava eta repirã Carugar povri sui senose ãgua —ehi.

Jesús ombogüera Bartimeo sesapisoẽhisa sui

⁴⁶ Ipare oyepota tecua Jericó ve yuvireco. Ahe tecua sui yuvinosese güemimbohe reseve, ava rehi avei, aheve peripopi mbia ndasesapiso vahe Bartimeo serer vahe, Timoteo rahir, uguapí oi.

⁴⁷ Osenduse, “Jesús Nazaret pendar” hesa, osapucai pirata:

—¡Jesús, David suindar, che paraisuerecomi tẽi eve! —ehi chupe.

⁴⁸ Ava rumo oyaca-yacaño, “¡Quiriri!” ehi yuvireco chupe. Ahe rumo, —¡David suindar, che paraisuerecomi tẽi eve! —ehi pirataño ité chupe.

⁴⁹ Evocoyase osenduse iñehe, opita,

—Peñehe chupe —ehi.

Ichui oñehe yuvireco chupe:

—Eyemonguerẽhi, epũha. Esepia, oñehe aipo ndeu —ehi.

⁵⁰ Aipo oyeupe he ramoseve, omomboño oturucuar guasu, opũha yesapiha oso chupe.

⁵¹ Evocoyase oporandu ndasesapiso vahe upe:

—¿Mbahe vo ereipota ayapo vaheerã ndeu? —ehi.

Ahe evocoyase,

—Porombohesar, che mbosarecomi tẽira eve viña —ehi.

⁵² Evocoyase aipo ehi ahe mbia upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramoseve ndasesapiso vahe osareco tupri ité. Ipare osoño ité Jesús raquicuei peripopi rupi.

11

Jesús oi que Jerusalén pipe

¹ Ovirovise tecua Jerusalén yuviraso, serovicave oime ñuvirio tecuami: Betfagé, Betania avei ivitri Olivo ipimi. Aheve Jesús omondo ñuvirio güemimbohe,

² aipo ehi chupe:

—Peso evocoi tecuami yande rovaingarve. Peyepotase aheve, pesepiara guaricu ñapichimbrí imoha, ava ndoyeupi vitel vahe yuvireco sese, ahe peyorañora seru.

³ Acoi que ava: “¿Mahera vo ěgüe peye?” ehise pĕu, “Ore Yar oiporu pota, ipare niha omboyeveĭ voiñora” peyera chupe —ehi.

⁴ Evocoiyase ahe yuviraso peri rupi. Aheve guaricu ñapichimbrĭ osepia imoha yuvireco oquendipive. Ichui oyoraño seru yuvireco.

⁵ Evocoiyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

⁶ Ahe rumo Jesús ombohesa rupi tuprĭ ité omboyeveĭ yuvireco chupe. Evocoiyase, “Tovirasoño” ehi yuvireco chupe.

⁷ Ipare viraso guaricu Jesús upe, iyavei oturucuar omondo iharive yuvireco. Ahese Jesús oyeupi iharive.

⁸ Setá ava oipipira oturucuar peri rupi, ambuae ava evocoiyase oyasia pindo omondo peri rupi saperá yuvireco.

⁹ Ava senonendar, saquicuerindar avei,

—¡Imboeteipri, sovasapri tasecoi ou vahe yande Yar rer pipe! —ehi pĭrata yuvireco chupe—.

¹⁰ ¡Sovasapri yande ramoi David mborerecuasa tasecoi ou vahe oico! ¡hvave imboeteipri tasecoi! —ehi yuvireco chupe.

¹¹ Ęgüe ehi Jesús oiquese Jerusalén ve. Ipare oi que tũparo pipe. Aheve opacatu rupi mbahe osepia. Ipare yuviraso Betania ve caharuse ité doce güemimbohe rese.

Jesús vireco megua higuera ndihai vahe

¹² Ahere ayihive, yuvinosese Jesús tecua Betania sui, ndasiepoi oico.

¹³ Osepiase amombri ivira higuera so ati vahe, oso chupe ‘¿iha pĭha?’ oyapave. Ahe rumo osepia so pĕve tĕi sese. Esepia, ahe ivira upe ndosupiti vĭtei iha āgua.

¹⁴ Evocoiyase aipo ehi ahe ivira upe:

—¡Co pipe suive ndipo iri chira ava nde ha yuvirohu vaheřá! —ehi. Semimbohe osendu iñehe yuvireco.

Jesús omombopa ava mbahe mboepisar tũparo pipe sui

¹⁵ Ipare oyepota Jerusalén ve yuvireco. Aheve Jesús oiquese judío tũparo guasu pipe, omboipi ava mbahe mondosar, mbahe rerocuasar mombopa tuprĭ ocarve oico iyavei ava guarepochi recuñarosar opa ombovapĭ mesa imondo, apĭcasu mondosar renda avei omboviapi imondo.

¹⁶ Ndoipotai eté que ambuae mbahe seroiquepirá tũparo pipe.

¹⁷ Ipare oporombohe aipo ehi:

—¡Cuachiapri aracahendar pipe aipo ehi: ‘Co che řĕta yeruresa řĕtarā opacatu ava ivĭ pipendar uve nara’ ehi. Pe rumo imonda rai vahe řĕta nungar tĕi pereco —ehi.

¹⁸ Pahi eta rereciar iyavei oporombohe vahe Moisés porocuita rese osenduse, “¿Mara yahera pĭha serĕco yuca uca āgua?” ehi voi yuvireco chupe. Osiquiye rumo opacatu ava sui. Esepia, ahe ndoyembovĭhai iporombohesa rese yuvireco.

¹⁹ Pĭtu ramomise, Jesús yuvinose güemimbohe eta reseve yuviraso ahe tecua sui.

Ivira higuera ndihai vahe ipiru

²⁰ Ahere ayihive, añihiveive yuvirasose, osepia ivira higuera sapo suive ipirupa vahe yuvireco.

²¹ Evocoiyase Pedro oyemomahenduha voi iñehe agüer rese, sese aipo ehi Jesús upe:

—Ore mbohesar, esepia co ivira higuera upe ereñehe rai vahecuer, opa ité ipiru —ehi.

²² Jesús evocoyase,

—Peyeroya Tūpa rese —ehi—.

²³ Supi eté aipo ahe pēu: acoi que ava ivitri upe: ‘Esiri ave sui, eso para guasu pipe’ ehi vahe oyeroya tuprise ité aipo hesa rese, ēgüe ehi etera chupe.

²⁴ Sese aipo ahe pēu: opacatu que mbahe rese peporanduse pe yeroquisa pipe, peyeroya itera mbahe oime vaheṛā rese pēu, ahese peipisi itera.

²⁵ Acoi peyerouise, yipindar peñero rane que pe amotarēhimbar upe, ahese ēgüe ehi aveira pe Ru iva pendar iñero pe angaipa rese pēu.

²⁶ Ēgüe ndapeyeise, pe Ru iva pendar avei niñeroi chira pe angaipa rese pēu —ehi.

Jesús mborerecuasa

²⁷ Ipare oyevi Jerusalén ve yuvireco. Aheve Jesús secoise judío tūparo guasu pipe, pahi eta rerecuar, Moisés porocuita rese oporombohe vahe, ava rerecuar guasu avei oyemboya yuvireco sese.

²⁸ Aheve oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarā ndeu co nungar apō āgua? —ehi yuvireco chupe.

²⁹⁻³⁰ Evocoyase omboyevi chupe:

—Che avei aporandura mbahe rese pēu: ¿Ava vo Juan ombou ava āpiramo āgua; Tūpa piha, ava tēi tie? Pemboyeveise cheu, ahese che avei amombehura pēu ava porocuita rupi eté piha ayapo co mbahe vichico —ehi.

³¹ Evocoyase oñemoñeta aipo ehi oyeupe yuvireco: “‘Tūpa ombou’ yahese chupe viña, ahe evocoyase: ‘¿Mahera ru ndaperoyai?’ ehira yandeu.

³² ‘Ava tēi remimbou’ ndayahehi chiaveira chupe” ehi. Ahe osiquiye tēi ambuae ava sui yuvireco. Esepia, opacatu ité oicua Juan oñehe Tūpa suindar ñehesa rese yepi.

³³ Evocoyase omboyevi chupe yuvireco:

—Ndorocuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuita pipe co mbahe ayapo” ndahehi chietera pēu —ehi mborerecuar guasu upe.

12

Ava mbahe tēi oporaviqui vahe recocuer sui yembohesa

¹ Evocoyase Jesús omboyoa tecocuer ambuae ava recocuer rese aipo ehi: “Oime mbia oñoti vahe uva oivi pipe, ahe oñachi tupri sereco iyavei oyapo mbahe uva ricuer renose āgua. Oyapo avei oi ivate vahe opacatu mbahe moha āgua. Ipare oseya oivi ava oporaviqui vahe upe iporu āgua. Ichui osé, oso amombri vahesa rupi.

² Oyepotase ari uva pohosa, ahese omondo güembigui oporaviqui vahe upe imboporandu ‘tomboumi uva pohopri cheundar cheu cute’ oyapave viña.

³ Ahe rumo oipisiño, inupa-nupa imboyevi tupri tēi yuvireco.

⁴ Evocoyase ahe ivi yar omondo iri ambuae güembigui. Ahe oyapichapichaño ñaca rupi, iñehe mara-mara tēiño avei yuvireco chupe.

⁵ Ipare omondo iri ambuae. Ahe oyucaño yuvireco. Ichui omondo ati iri tēi. Ahe ipāhu pendar rese yuvirocua-rocuano yuvireco, oyucaño avei ambuae yuvireco.

⁶ “Iyavei ñepeí opíta vite, tahír ité, sembiaisu. Ahe omondo ipa ‘co omboyoyara yuvireco’ oyapave viña.

⁷ Oporaviquí vahe rumo aipo ehi oyeupe yuvireco: ‘Co aipo oipísira vu mbahe. Yayucaño, yandeu nara pãve topíta co iví’ ehi yuvireco.

⁸ Ichui oipísi, oyucaño yuvireco. Ipare ovínose sehögüer ahe miti sui co coti yuvireco.

⁹ “¿Mbahe vo evocoyase oyapora ivi yar? Osora chupe, opara oyuca oporaviquí vahe, iyavei omondopara oiví ambuae ava upe.

¹⁰ “¿Ndapeyeroquí vo pe co icuachiapri pípe? Aipo ehi niha acoi: ‘Co ita oi aposar opaño omombo yuvireco.

Ahe ita rumo avíye catu vahe oi moviracua tuprí ãgua.

¹¹ Ëgüe ehi niha yande Yar yapo.

¡Mara ehi rutei revol’ ehi icuachiapri pípe” ehi.

¹² Evocoyase oviraso pota voi Jesús soquenda ãgua yuvireco. Esepia, ahe osenducua ité oyesendar iporombohesa yuvireco. Ava sui osiquiyepave rumo opoiño yuvireco ichuí.

Fariseo osecoãha iri tēi Jesús guarepochi rese yuvireco

¹³ Ipare mborerecuar omondo fariseo iyavei mborerecuar Herodes rupindar avei Jesús upe ‘toyavi angahu oñehe’ oya yuvireco chupe.

¹⁴ Ahe yuviraso chupe aipo ehi:

—Porombohesar, ore oroicua nde supi eté vahe mbahe eremombehú eico, nde niha ndereroyai vahe ava ñehesa tēi. Esepia, “Ëgüe ehi co mbía” nderei eté ava upe iyavei ereporombohe mbahe supi tuprí vahe Tüpa remimbotar apo ãgua rese. ¿Aviyera pñha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁵ Oicua ité rumo fariseo pihañhisa, sese aipo ehi voi chupe:

—¿Mahera che moingue pota mbahe tēi pípe peye? Peru evocoyase ñepeí guarepochi cheu, tasepia —ehi.

¹⁶ Ipare fariseo güeru yuvireco chupe, ahe guarepochi repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

¹⁷ Evocoyase aipo ehi fariseo upe:

—Pemondora mborerecuar upe mbahe chupendar; Tüpa upendar mbahe evocoyase pemondora Tüpa upe —ehi.

Evocoyase oyepihamondii tēi aipo oyeupe hese yuvireco.

Saduceo oporandu Jesús upe cuerayevisa rese secoãhasave

¹⁸ Evocoyase saduceo “ndipoi eté cuerayevisa” ehi vahe yugüeru Jesús upe. Oporandu tēi angahu yuvireco chupe:

¹⁹ —Porombohesar, Moisés niha oseya güembicuachiagüer yandeu aipo ehi: “Que cuimbahe omenda vahe omanose guahiñhiseve, tivri evocoyase omen-dara sembirecocuer rese ahe viquehír omano vahecuer upe nara tahira oico.”

²⁰ Oime siete tuprí oyesuindar pãve yuvirecoi vahe. Yipíndar vahe omenda. Ichui omanoño, ndatahí eté rumo.

²¹ Ipare tivri omenda viquehír rembirecocuer rese. Ahe rumo omanoño, ndatahí avei rumo. Ëgüe ehi tuprí avei tivri imombosapisa.

²² Ëgüe ehi co siete tuprí omenda ahe cuña rese, ndatahí eté rumo yuvireco. Coiye rumo cuña omano avei no.

²³ Evocoiyase opase ocuerayevi yuvireco, ¿uma rembireco itera pīha? Esepia niha, siete tupri ité omenda téi yuvireco sese —ehi yuvireco chupe.

²⁴ Evocoiyase Jesús omboyevi chupe:

—Pe pīhañemoñeta pipe peyavi. Esepia, ndapeicuai eté Tūpa ñehe icuachipri aracahendar, ndapeicuai avei Tūpa pīratasa.

²⁵ Supi eté omano vahe ocuerayevise, chupe ndipo iri chira mendasa. Ahe rumo Tūpa rembiguai iva pendar nungar yuvirecoira ivave.

²⁶ Co cuerayevisa resendar rumo amombehura pēu: aviye ndapeyeroqui anga vahe Moisés rembicuachiagüer pipe, acoi caha rese sendi guasu vahe aviterve Tūpa aipo ehise chupe: ‘Che Abraham, Isaac, iyavei Jacob Tūpa aico’ ehi vahe.

²⁷ ¡Tūpa ndahei omano vahecuer Tūpa! ¡Ahe rumo oicove vahe Tūpa secoi! Sese pe pīhañemoñeta pipe peyavi —ehi saduceo yuvirecoi vahe upe.

Porocuita aviye catu vahe

²⁸ Ñepe Moisés porocuita rese oporombohe vahe osendu iñehe pīratase oyeupe yuvireco, oicua avei Jesús omboyevi tuprise iñehe yuvireco chupe, evocoiyase oyemboya sese oporandu chupe:

—¿Uma vo porocuita aviye catu vahe opacatu sui? —ehi.

²⁹ Jesús omboyevi chupe:

—Yipindar mborocuita aviye catu vahe aipo ehi: ‘Pesendu Israel: yande Yar Tūpa aheño ité ñepe yande Yar secoi.

³⁰ Eresaisura nde Yar Tūpa opacatu nde pihá pipe, opacatu nde recocuer pipe, opacatu nde yapisacasa pipe iyavei opacatu nde pīratasa pipe’ ehi.

³¹ Iyavei imoñuviriosa porocuita ahe co: ‘Eresaisura ambuae ava nde yeaisu nungar’ ehi. Ndipo iri ambuae porocuita aviye catu vahe co sui —ehi.

³² Evocoiyase porocuita rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepe Tūpa iyavei ndipoi eté ambuae.

³³ Iyavei yasaisura Tūpa opacatu yande pihá pipe, opacatu yande yapisacasa pipe, opacatu yande pīratasa pipe, iyavei yasaisura ava yande yeaisu nungar. Ahe ité aviye catu mbahe seropovēhepri sui iyavei opacatu porerecosa sapipri téi sui —ehi.

³⁴ Evocoiyase Jesús icuase co ava pīhañemoñeta tuprisa, aipo ehi chupe:

—Namombriimi ereico Tūpa mborerecuasa sui —ehi.

Ipare ndipo iri oyemonguerēhi vahe oporandu vahe mbahe rese yuvireco chupe.

¿Ava suindar pīha Poropīsīrosar?

³⁵ Jesús oporombohese tūparo pipe aipo ehi:

—¿Mahera ru Moisés porocuita rese oporombohe vahe: “Poropīsīrosar David suindar ité” ehi yuvireco?

³⁶ Esepia, David ité aipo ehi Espiritu Santo pīratasa pipe:

‘Yar aipo ehi che Yar upe:

Eguapī che acato coti, acoi che amondose voi eté nde amotarēhimbar nde povrive yuvireco’ ehi David aracahe.

³⁷ ¿Mahera ru, “Poropīsīrosar David suindar secoira” peye, David teieté, “Che Yar” ehise chupe? —ehi.

Ava rehii oquerēhisave ité osendu Jesús ñehe yuvireco.

Jesús oicua uca Moisés porocuita rese oporombohe vahe recocuerai

³⁸ Jesús aipo ehi oporombohesave: “Peicua catu Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo ãgua ocar rupi omboeteisa pipe yuvireco.

³⁹ Oseca avei tenda porañete catu vahe güenara otũparo pipe yuvireco yepi, iyavei carusave tenda aviye catu vahesave oguapi yuvireco yepi no.

⁴⁰ Iyavei cuña imer mano vahecuer rêta vïrocua-rocua tẽi ichui. Oarondaguã tẽi avei oyerocu pucu-pucu yuvireco. Ahe rumo oipisira Tũpa ñemoirosa ipĩrata catu vahe yuvireco curi” ehi.

Cuña imer mano vahecuer porerecosa

⁴¹ Ñepeí ari Jesús oguapi oĩ porerecosa riru rovai ava repia ãgua mara ehi oporerecosa imondo ipipe yuvireco. Aheve setá mbahe yar omondoño ité guarepochi yuvireco.

⁴² Ahe pipeve oyepota cuña imer mano vahecuer iparaisu vahe. Ahe avei omondo ñuviriomĩ guarepochi oporerecosa ipipe.

⁴³ Evocoiyase Jesús oñehe güemimbohe upe aipo ehi:

—Supi eté che aipo ahe pẽu: co cuña imer mano vahecuer iparaisu vahe setá catu guarepochi oporerecosa omondo ambuae ava eta sui co guarepochi riru pipe.

⁴⁴ Ambuae ava eta rumo oguarepochi rumbirermi tẽi omondo oporereco ãgua yuvireco; co cuña rumo oparaisusa pipe opa ité omondo oguarepochi —ehi güemimbohe upe.

13

“Imondurusara tũparo guasu” ehi Jesús

¹ Jesús osẽse tũparo guasu pipe sui, ahesẽ ñepeí semimbohe aipo ehi chupe: —Ore mbohesar, jesepia oi ita imopuhapri, icatupri ai! —ehi.

² Jesús rumo omboyeví chupe:

—¿Pesepia co oi tuvichá vahe ité? Ndpioi chietera rumo que ñepeí ita oyeha vite vahe; opacatu ité imondurusara curi —ehi.

Cañi renonde mbahe oime vaheã

³ Evocoiyase Jesús yuviraso ivitri Olivo ve, ahe ivitri tũparo guasu rovai tupri. Aheve Jesús oguapise oĩ, Pedro, Santiago, Juan iyavei Andrés oporandu co cotimĩ mbahe rese yuvireco chupe:

⁴ “¿Mbahese vo aipo mbahe yaviyera? ¿Mbahe poromondiisa rese rane vo icuasara?” ehi.

⁵ Jesús rumo omboyeví chupe: “Peicua catu, peyembopa ucai rene ambuae ava upe.

⁶ Esepia, setá ava yugüerura, ‘Che niha Poropisirosar aico’ ehi tẽira ava eta mbopa yuvireco.

⁷ “Pesenduse rumo ñehesa vavasa resendar cohave, iyavei que rupi, ndapeyembosiquiyei chietera. Esepia niha, egüe ehi rane itera; ndehi vitei chira rumo ari cañi.

⁸ Esepia, ñepeí ivi pipendar ovavara ambuae ivi pipendar rese oyeupe yuvireco; iyavei oimera ivi ririĩ opacatu-catu tẽi tecua rupi, tiavor avei. Co rumo omboipi ramomira mbahe tẽi porarasa.

⁹ “Peñearo catu. Esepia, pe rerasora mborerecuar rovai yuvireco, iyavei pe nupara tũparove yuvireco. Pe reraso aveira mborerecuareta rovai, iyavei mborerecuar ivate catu vahe rovai che recocuer sui tẽi yuvireco. Egüe peyera peñehe che recocuer rese chupe.

10 Cañi renonde rumo co ñehesa pĩsirosa resendar opacatu rane ité ava upe icua ucasara ivi rupi.

11 Iyavei, ‘¿Mbahe pĩha amombehura chupe?’ ndapeyei chira pe mondose mborerecuar rovai yuvireco. Aheve voi eté omboyecuara Tũpa pe ñehe āgua pẽu. Esepia, ndahei chira peyesui tẽi peñehe, Espĩritu Santo ité oñehera.

12 Ipare rumo ava omondoñora vivri yamotarẽhisar upe ‘toyuca yuvireco’ oya. Ēgũe ehi aveira ava guahĩr upe; tahĩr avei oyamotarẽhiñora oyesupa yuca uca āgua yuvireco che recocuer rese.

13 Opacatu avei ava ndape ambotai chira che recocuer sui tẽi yuvireco. Acoi ava oyemoviracua vaheño rumo ari ipa vahe rupi, ahe ipĩsiropri yuvirecoira.

14 “Tũparo guasu maranehi pipe pesepiase mbahe-mbahe tẽi aposa —acoi oyeroguĩ vahe, ahe tosenducua tupri yuvireco—, evocoiyase acoi yuvirecoi vahe ivi Judea rupi, toñemipa poyava ivitri rese yuvireco.

15 Acoi gũeta harĩve secoi vahe, ahe ari toique iri eme gũetave mbahe renose āgua.

16 Acoi que rupi tẽi secoi vahe, toyeve eme avei gũetave oyeaosa renose āgua.

17 Iparaisu itera cuña ipuruha vahe ahe ari pipe, imembi pĩtani vahe avei!

18 Peporandu Tũpa upe, toime eme co nungar mbahe sũhisa vahe pipe pẽu.

19 Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui; ipare ndipo iri chietera evocoi nungar.

20 Iyavei yande Yar nomombituhise ari ñaporai vahe, ndipoi chietera oñepĩsiro vahe yuvireco viña; ahe rumo gũembiporavo raisusa pipe omombituhura.

21 “Que oimese aipo ehi vahe: ‘Esepia, co Poropĩsirosar secoi’ ehi, anise, ‘Peve secoi’ ehise yuvireco pẽu, anĩ chira peroya aipo ehi vahe.

22 Esepia, yugũerura ava, ‘Che Poropĩsirosar aico’ ehi tẽi vahe, iyavei, ‘Che amombehu vahe Tũpa Ñehengagũer’ ehi angahu tẽi vahe, iyavei oyapora mbahe ava ndoyapoi vahe poromondiisa gũeco pĩratasa mboyecua āgua yuvireco. Aviyeteramo ombopa aveira ava Tũpa reroyasar.

23 ¡Peicua catura! opa aipo co senondeve amombehu pẽu” ehi.

Mara ehira Tũpa Rahĩr oyevisẽ

24 “Ahe ari pipe rumo co mbahe-mbahe tẽi pare ndoyecua iri chira ari, yasi avei ndosesape iri chira,

25 yasitata avei opara oviapi iva sui, iyavei iva resendar mbahe orĩrĩra yuvireco.

26 Ahese che, Ava Riquehĩr, iva quiha rese ayecua itera vitu che pĩratasa pipe che rendigũer porañetesa pipe avei.

27 Ipare amboura che rembiguai eta iva pendar. Ahe evocoiyase omonuhara opacatu ivi rupindar che rembiporavo yuvireco, que amombri rupi yuvirecoi vahe, que iva rese yuvirecoi vahe avei.

28 “Peyembohera ivira higuera recocuer sui: co ivira soqui ramose, yaicua cõimi ari sacu vahe yepota āgua yandeu yepi.

29 Na ehi aveira niha pẽu che ñehe rupi tupri mbahe pesepiase. Sese peicuara che, Ava Riquehĩr, cõimi eté che yeve āgua.

30 Supi eté yuvirecove vitera ava osepia vahe, co mbahe opase yaviye.

31 Iva, ivi opara ocañi; che ñehengagũer rumo imboaviyesa rane itera.

³² “Ndi poi eté rumo ava oicua vahe ari iyavei hora che yevi ãgua yuvireco, che Ru rembiguai iva pendar avei ndoicuai yuvireco, che avei ndaicuai eté. Che Ru güeraño ité rumo oicua.

³³ “Sese niha pemahemohara yepi, che rãrora peye. Esepia niha, ndicuasai che yevi ãgua.

³⁴ Inungar que mbia amombri oso pota ãgua renonde, güembiguai oseyapa güeta rãro ãgua, omondo avei ñepepepe upe iporaviqui ãgua, iyavei omondo güeta roquendipi rãro ãgua.

³⁵ Pe evocoyase pemahemohara. Esepia, ndapeicuai marase che oi yar ayevíra pëu, aviyeteramo pítu ramose, pítu mbiter, tacura ñehese, anise añihivei.

³⁶ Ndaipotai pemahemohaẽhiseve tẽi ayevíra.

³⁷ Che aipo ahe pëu, opacatu upe avei: ¡Pemahemohaño ité yepi!” ehi güemimbohe eta upe.

14

Oyemomborandu Jesús yuca ãgua rese yuvireco

¹ Ipare ñuvirio ari judío Pascua pieta ãgua ipane, ahe pieta pipe yuvirohu pan ndayapepoi vahe yepi, pahi rerecuareta, Moisés porocuita rese oporombohe vahe avei oyemomborandu: “¿Mara yahera Jesús mbopa ipisi yuca ãgua?” ehi yuvireco.

² Ambuae rumo aipo ehi yuvireco:

—Ndiyai pieta pipe ité yaipisi ava rehii yemondiiẽhi ãgua yandeu —ehi.

Cuña Jesús rese mbahe siacua vahe oipiyere

³ Ahese Jesús seci Betania ve Simón lepra víreco vahecuer rẽtave. Aheve mesave chiniseve, cuña güeru mbahe siacua vahe siru reseve sepí iteanga vahe. Ahe osovapisa rerocua, ipare oipiyere Jesús ãca rese.

⁴ Ambuae ava aheve yuvinoi vahe rumo oñemoiro tẽi aipo ehi yuvireco oyeupe:

—¿Mahera vo co omocañi tẽi mbahe siacua vahe?

⁵ Omondo vahe ité tie co tresciento ari rupindar mboraviqui reperi rupi ava iparaisu vahe pítivi ãgua viña —ehi yuvireco.

Omañeco tẽi avei ahe cuña yuvireco.

⁶ Jesús rumo aipo ehi ahe ava upe:

—Teheni, ãgüe tehiño, ¿mahera vo pemañeco tẽi? Co mbahe oyapo vahe rumo cheu aviye ité.

⁷ Ava iparaisu vahe niha yuvirecoiño itera pe pãhuve, iyavei peyapoño itera mbahe aviye vahe peyapo potase chupe; che rumo ãgüe ndahe víteñoi chira vichico pe pãhuve.

⁸ Iyavei co cuña oyapo mbahe ocatugüer rupi; opa voi omoiacua che rete che manoẽhi víteseve.

⁹ Supi eté aipo ahe pëu: ñehesa písirosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

Judas oyemoingatu Jesús mondo ãgua yamotarẽhimbar upe

¹⁰ Evocoyase Judas Iscariote, semimbohe doce vahe pãhu pendar, oso pahi eta rerecuar upe imoñeta Jesús mondo ãgua.

11 Senduse, oyembovîharete: “Yamondo guarepochi chupe” ehi voi eté yuvîreco. Evocoyase Judas oseca voi Jesús mondo âgua yamotarêhimbar upe.

Jesús caru agüer ipa vahe güemimbohe rese

12 Yîpîndar arî pan ndayapepoi vahe husa pipe, ahese avei ovesa Pascua resendar yucapri seropovêhesa yepî, ahe arî pipe semimbohe oporandu Jesús upe yuvîreco:

—¿Que vo ereipota oromoingatura carusa Pascua pieta resendar yandeu? —ehî.

13 Aipo oyeupe hese, omondo ñuvîrîo güemimbohe, aipo ehi chupe:

—Peso tecuave. Aheve pesepiara mbia vîreco vahe cambuchi pipe î. Supi pesora,

14 seiquesave aipo peyera sêta vahe upe: ‘Ore mbohesar oporandu: ¿Uma oî pipe vo Pascua pieta resendar orohura che remimbohe reseve? ehi’ peyera.

15 Evocoyase ahe omboyecuara oî guasu îvatendar imoingatupri pêu. Aheve pemoingatu mbahe yahu vaherâ —ehî güemimbohe upe.

16 Evocoyase semimbohe yuvîraso tecuave. Aheve semimombehu rupi tupri osepia mbahe yuvîreco. Ichui omoingatu carusa Pascua pieta resendar yuvîreco.

17 Pîtu ramomise, Jesús doce güemimbohe rese aheve oyepota yuvîraso.

18 Iyavei ocaruse ité mesave yuvînoî, güemimbohe upe aipo ehi:

—Supi eté aipo ahe pêu: ñepeî pe pâhu pendar yande piri ocaru vahe che mondora che amotarêhimbar upe —ehî.

19 Evocoyase semimbohe ndoyembovîhai têî yuvîreco, iyavei oporandurandu têî ñepeî-peî chupe yuvîreco:

—¿Che pîha? —ehî yuvîreco.

20 Omboyevî rumo güemimbohe upe:

—Ñepeî eté pe pâhu pendar ahe co omoaquî pan che caro pipe.

21 Supi eté che, Ava Rîquehîr, amboaviyera icuachiapri; îparaisu catura rumo acoi mbia che mondosar! Aviye catura ahe mbia ndoyesuise viña —ehî.

22 Yuvîrocaru vîteseve, Jesús oîpîsî pan, “Avîye ndeu” ehi Vu upe. Aipo ohe pare, ombohî-mbohî imondo güemimbohe upe aipo ehi:

—Peîpîsî; co che rete —ehî.

23 Ipare oîpîsî igua rîru, “Avîye ndeu” ehi Vu upe. Aipo ohe pare omondo güemimbohe upe, ipare opacatu yuvîroîhu.

24 Ahese aipo ehi:

—Co che ruvî, ahe che Ru remimbotar îpiasu vahe pêu nara. Oyepiyerera ava rehîî recocuer rese nara.

25 Supi eté aipo ahe pêu: ndaîhu irî chietera uva ricuer cheu arî oyepotase voi che Ru Tûpa mborerecuasave aîhura uva ricuer îpiasu vahe —ehî.

“Pedro, ‘Ndaicuai vahe evocoi mbia’ erera cheu” ehi Jesús Pedro upe

26 Osapucaire, opa yuvîraso îvîtrî Olivo ve.

27 Ahese Jesús aipo ehi:

—Opara pemocañî che rese yeroyasa peyesuî. Esepia, acoi icuachiapri pipe aipo ehi: ‘Ayucara ovesa rârosar, ahese oñemosai têira ovesa opacatu rupi yuvîreco’ ehi.

28 Che cuerayevîre rumo aso voi etera pe renonera Galilea ve —ehî.

29 Evocoyase Pedro aipo ehi chupe:

—Yepe ambuae opacatu nande reroya irî chira yuvîreco, che rumo êgüe ndahei chietera —ehî.

³⁰ Aipo ehi rumo Pedro upe:

—Che rumo supi eté aipo ahe ndeu: co p̄itu pipeve voi eté tacura ñehe yupagüe renondeve, “Ndaicuai vahe evocoi mbia” erera mbosap̄i oyupagüer rupi cheu —ehi.

³¹ Ahe rumo,

—Yepe che amano tẽira nde rupi viña, che rumo, “Ndaicuai vahe evocoi mbia” ndahehi chietera —ehi-ehi catuño ité chupe.

Ambuae opacatu aipo ehi tupri tẽi avei yuvireco chupe.

Jesús oyeruqui Getsemaní ve

³² Ipare yuvirasos Getsemaní ve yuvireco. Aheve Jesús aipo ehi güemimbohe upe:

—Peguap̄i cohava, che aso ranera ayeroqui peve —ehi.

³³ Aheve vıraso Pedro, Santiago, Juan oyeupi. Aheve ndoyep̄ihambovihai eté oico

³⁴ aipo ehi:

—Che cūr̄itei ndavıhai eté. Esepia, che hã oyandu ité manosa. Pepita rane cohava, iyavei pemahemohara pe yeroqui pipe —ehi güemimbohe vıraso vahe upe.

³⁵ Evocoiyase oso tenonde catumi. Aheve oyavııvı rese oso, oporandu Tũpa upe mbahe tasi vahe reimeẽhi ãgua oyeupe.

³⁶ Oyeruqui pipe aipo ehi: “Che Ru, che rembiaısu, ndeu niha mbahe ndayavai vahe ité: che renose co mbahe-mbahe tẽi sui eve; tayapo eme che remimbotar tẽi, nde remimbotar rupi catu tayapo” ehi.

³⁷ Ipare oyevi güemimbohe upe. Ahe rumo opaño yuvıroque yuvıroca. Aheve aipo ehi Pedro upe:

—Simón, ¿ereque? ¿Ndereñemosai eté vo que ñepeı hora nde ropesiı upe?

³⁸ Pemahemoha, peyeruqui mbahe tẽi pipe pe viapiẽhi ãgua. Pe niha pequerẽhi ité viña, pe retecuer tẽi rumo nipirataı p̄eu —ehi.

³⁹ Ichui oso iri oyeruqui, aipo ehi tupri avei oñehe.

⁴⁰ Ipare oyevisẽ, osesapiha iri iquesese tẽi avei. Esepia, sopesiı nom-boyeroyai eté yuvireco, aheve ndoicatuı eté iñehe mboyevı yuvireco.

⁴¹ Imbosapisa rupi oso irise aipo ehi chupe:

—¡Pequeño vite vo peyu! Aviye revo peque. Osupiti ité che, Ava Riquehir, mondo ãgua ava yangaıpa vahe povrıve.

⁴² Pepũha, yaso. Esepia, cõimi eté che amotarẽhisar upe che mondo vaherã secõi —ehi.

Jesús ipisisa

⁴³ Jesús oñehe viteseve ohã, Judas oyepota oso chupe, ahe doce pãhu pendar semimbohe, iyavei setá ava yugüeru quise pucu, ivıra reseve-seve supi. Ahe pahi eta rerecuar, Moisés porocuaıta rese oporombohe vahe, judıo rerecuařeta porocuaıta rupi oyapo yuvireco.

⁴⁴ Yıpındar rumo imondosar Judas aipo ehi: “Asovaupıte vahe rese pe-cuara. Ahe peıpisi tupri itera seraso” ehi.

⁴⁵ Oyepotase Jesús upe, oyemboya voi oso sese aipo ehi chupe:

—¡Porombohesar! —ehi sovaupıte.

⁴⁶ Aheve oıpisi Jesús yuvireco.

⁴⁷ Semimbohe secõi vahe supı ovınose oquise pucu. İpipe oyasia pahi rerecuar ivate catu vahe rembiguai nambi.

⁴⁸ Aheve Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisi ãgua. Imonda rai vahe nungar che rereco peye.

⁴⁹ Ari yacatu rupi niha pe pãhuvẽ aporombohese tũparove vichico, na ndapeyei eté cheu. Co rumo ãgũe peye icuachiapri mboaviye ãgua cute —ehi.

⁵⁰ Ahese semimbohe oñemosaipe oseyã Jesũs ahe ae tupri imoha yuvireco.

⁵¹ Mbia chĩhivahe rumo turucuar pipe gũerañomi oñemama vahe supive seci viña;

⁵² ahe avei oipisi yuvireco. Oipoequiño rumo oturucuar reya oso nani tupri.

Jesũs serasosa pahi rerecuar ivate catu vahe rovai

⁵³ Evocoyase Jesũs viraso pahi rerecuar ivate catu vahe rovai yuvireco. Aheve oñemonuha pahi eta rerecuar, judío rerecuar, Moisés porocuaita rese oporombohe vahe avei no.

⁵⁴ Pedro avei amombri rupive tẽi oiique ité oso pahi rerecuar ivate catu vahe rãta ãchisa pipe. Aheve oguapiño mbia sundao pãhuvẽ tata ipive oyephe oi.

⁵⁵ Pahi eta rerecuar rumo iyavei opacatu porandusa ivate catu vahe pendar oseca-seca tẽi ava oñehe-ñehe tẽi vaheã Jesũs rese yamotarẽhisave yuca uca ãgua yuvireco; ndoicatui eté rumo yuvireco.

⁵⁶ Iyavei setã iteanga tẽi semira yuvireco sese; oyecopi-copi tẽi rumo gũemira pipe.

⁵⁷ Amove aipo ehi tẽi yuvireco seco momara ãgua:

⁵⁸ —Ore orendu iñehe aipo ehise: ‘Che opara amonduru co tũparo ava tẽi rembiapo. Ipare rumo mbosapi ari rupi opara amopuha. Ndahe iri chira evocoyase ava tẽi rembiapo’ ehi —ehi tẽi yuvireco chupe.

⁵⁹ Ndahoyoyai rumo ambuae imombehusa rese.

⁶⁰ Ahese pahi rerecuar ivate catu vahe opũha oporandu Jesũs upe:

—¿Nderemboevii chira vo iñehe yuvireco chupe? ¿Mbahe vo aipo nde amotarẽhimbar oñehe nde rese? —ehi chupe.

⁶¹ Noñeheiño ité rumo chupe. Pahi rerecuar ivate catu vahe rumo oporandu iri chupe:

—¿Poropisrosar ité vo nde ereico, Tũpa imboeteipri Rahir? —ehi.

⁶² —Taa, ahe ité niha che aico. Pe niha che repiara peye che, Ava Riquehir, aguapise che Ru mbahe mboavaisarẽhi acato coti; ayevisẽ avei ìva quiha rese curi —ehi chupe.

⁶³ Evocoyase pahi rerecuar ivate catu vahe omondoro oturucuar aipo ehi:

—¿Mbahe iri vo yande yaipota vite yaico?

⁶⁴ Yasendupa niha aipo Tũpa upe iñehe-ñehe tẽisa, ¿mara ehi aipo evocoyase pe pihave? —ehi.

Ipare opacatu guasu ava, “¡Tomanofio ité!” ehi yuvireco chupe.

⁶⁵ Ahese amove ava ondivi-ndivi sese iyavei osesacua, ipare yuvirocuarocua sese aipo ehi yuvireco:

—¡Eicua ité ru, ava evocoi ocua nde rese! —ehi-ehi yuvireco chupe.

Sundao tũparo rãrosar avei osovapete-pete yuvireco.

Pedro, “Ndaicuai vahe evocoi mbia” ehi Jesũs upe

⁶⁶ Pedro ivive ñachimbri pipe seci. Aheve cuña oyepota ou pahi mborerecuar ivate catu vahe rembiguai chupe.

⁶⁷ Osepiase Pedro iyephehese tata ipive, omahengatu ohã sese aipo ehi chupe:

—Nde avei acoi Jesũs Nazaret pendar rupindar ereico —ehi.

⁶⁸ Ahe rumo aipo ehiño:

—Ndaicuai vahe ité rumo aipo mbia; ndaicuai avei aipo nde ñehesa —ehiño chupe.

Ichui osêse oquendipive ohã, ahese oñehhe tacura.

⁶⁹ Omahe irise co cuña mbiguai sese, ahe aipo ehi ahe pendar ava yuvirecoi vahe upe:

—Co ava niha supindar ité —ehi.

⁷⁰ Pedro rumo, “Ndahei eté che” ehiño. Iparemi tēi ambuae ava aheve yuvirecoi vahe aipo ehi iri yuvireco chupe:

—Nde ité niha supindar ereico. Esepia, nde Galilea iguar ité ereico —ehi chupe.

⁷¹ Pedro evocoyase,

—;Tūpa niha oicua, ndopombopai eté niha aipo, ndaicuai eté aipo mbia pe ñehesa! —ehi.

⁷² Aipo iheseve, tacura oñehhe imoñuviriosa rupi. Ahese Pedro oyemom-ahenduha, “Tacura ñehhe yupagüesa renondeve, mbosapi oyupagüer rupi, ‘Ndaicuai vahe evocoi mbia’ erera cheu” ihe agüer rese. Sese oyasehó iteanga.

15

Jesús serasosa Pilato rovai

¹ Cõhe potase, pahi eta rerecuar, judío rerecuar, Moisés porocuita rese oporombohe vahe iyavei opacatu ava porandusa ivate catu vahe pendar oñemonuha yuvireco. Ipare oipocua-pocua Jesús seraso Pilato upe yuvireco.

² Pilato aheve oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

³ Pahi eta rerecuar rumo omombehu-mbehu tēi mbahe sembiaviēhi yuvireco chupe.

⁴ Evocoyase Pilato oporandu iri chupe aipo ehi:

—¿Mahera vo ndereñehi eté? Esepia, setá mbahe nde rembiavi omombehu yuvireco —ehi.

⁵ Nomboyevi eté rumo Pilato upe. Evocoyase, “¿Mara ehi rutei pñha?” ehi tēi.

“¡Tayaticasa!” ehi ava Jesús upe yuvireco

⁶ Mborererecuar guasu recosa ité ñepeí ava soquendapri renose ãgua Pascua pieta pipe ava rehí porandusa rupi yepi.

⁷ Mbia Barrabás serer vahe, ahe pipeve avei soquendasa yuvireco ambuae oporapichi vahe reseve.

⁸ Ava yugüeru Pilato upe ‘tayaposa pieta pipe yaposa vahe yepi’ oyapave yuvireco.

⁹ Pilato rumo aipo ehi:

—¿Peipota amose vaherã judío rerecuar? —ehi.

¹⁰ Esepia, Pilato oicuaño ité ava rese yemoecatēhisa pipe sui pahi eta rerecuar remimondo secoise.

¹¹ Pahi eta rerecuar rumo ‘Barrabás tosē’ ombohe ati-ati uca ava yuvireco.

¹² Evocoyase Pilato oporandu ahe ava upe:

—¿Mbahe vo peipota ayapora co mbia chupe acoi, ‘Judío rerecuar’ peye vahe rese? —ehi.

¹³ Ahe rumo omboyevi Pilato upe:

—¡Tayaticasa curusu rese! —ehi ati-atiño yuvireco.

14 Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—¡Tayaticasa ité curusu rese! —ehi ati-ati iriño yuvireco.

15 Evocoyase Pilato, mbahe tupri opita água ava rese, omose uca Barrabás. Ipare oinupá iteanga uca Jesús tucumbo tupeicha nungar pipe, imondo curusu rese yatica água.

16 Ahese sundao viraso mborerecuar rēta sui ambuae oi pipe, aheve opacatu omboetasa omonuha yuvireco.

17 Aheve omboyemonde turucuar pīraumbi vahe pipe yuvireco, ipare yu piapri omonde ñaca rese.

18 Sāse avei yuvireco:

—¡Imboeteipri judío rerecuar tasecoi! —ehi angahu yuvireco chupe.

19 Iyavei yuvirocua-rocua ivira pipe ñaca rupi yuvireco sese, ondivi-ndivi avei oñenopiha-piha avei sovai yuvireco imboetisave angahu.

20 Mara-mara tēi sereco pare, ovirocua iturucuar pīraumbi vahe yuvireco ichui, ahese omonde iturucuar ité yuvireco sese. Ichui vinose ocarve yatica água yuvireco.

Jesús yaticasa curusu rese

21 Ñepe mbia Simón serer vahe Cirene pendar, Alejandro, Rufo yesupa, ahe pipe avei oyepota chupe que co coti rupi sui ou. Oñocua potase ocua viña: “Erio, terevosii curusu co Jesús vireco vahe rese” ehi voiño tēi yuvireco chupe.

22 Jesús oviraso Gólgota serer vahesave yuvireco (‘Ava Āca Cangüer’ oya-pave aipo ehi).

23 Iyavei uva ricuer oyeseha vahe mirra rese omondo tēi yuvireco chupe. Ahe rumo ndoihui eté.

24 Evocoyase oyatica yuvireco. Ipare sundao iguayíño Jesús turucuar rese ‘¿uma piha virasora oyeupe’ oyapave yuvireco.

25 Ahe oyatica añihivei la nueve rupi yuvireco.

26 Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oī.

27 Supive avei yaticasa ñuvirío imonda rai vahe ñepe mbahe rese ipocosa coti, ambuae mbahe rese ipocoēhisa coti.

28 Ēgüe ehi imboaviye icuachiapri aipo ehi vahe: “Ava mbahe-mbahe tēi aposar nungar ipāhuve serecosa” ehi.

29 Acoi ava ñocuasar iñehe-ñehe tēi, oñeaca mbovava aipo ehi yuvireco chupe:

—Nde acoi, “Opara tūparo amonduru. Ipare mbosapi ari rupi opa irira amopuha” ere acoi cuese.

30 ¡Eñepisiro ru nde ae cute; egüeyi curusu sui! —ehi yuvireco chupe.

31 Ēgüe ehi avei pahi eta rerecuar, oporombohe vahe avei Moisés porocuaita rese iñehe mara-mara tēi yuvireco chupe, aipo ehi yuvireco oyeupe:

—Oipisiro ambuae. Ahe ae rumo ndoicatu oñepisiro.

32 ¡Poropisirosar Israel rerecuar guasu, toyeeroyi ahe ae curusu sui cūritei, ahese voi seroyasara —ehi.

Iyavei supive yaticapri mara ehi-ehi tēi avei chupe.

Jesús mano agüer

³³ Osupitise rumo mbiter ari, opa tupri pïtu ivi rupi. Ëgüe ehi las tres rupi.

³⁴ Ahese tupri avei Jesús oñehe pïrata aipo ehi: “Eloi, Eloi, ¿lema sabactani?” ehi, (ahe ‘che Ru Tüpa, che Ru Tüpa, ¿mahera vo che reya eve?’ oyapave aipo ehi).

³⁵ Aheve ava yuvirecoi vahe rumo osenduse ñehe, aipo ehi yuvireco:

—Pesendu aipo Tüpa ñehe mombehusar Elías upe oñehe —ehi yuvireco chupe.

³⁶ Evocoyase ñepeï imboetasa oña oso mbahe saviyu vahe reca. Ahe omoaqui vinagre pipe imondo ivira apri rese chupe ‘toiñu’ oya:

—Ëgüe tehño rane, ¿oura pïha Elías seroyi ägua curusu sui? —ehi.

³⁷ Ahese Jesús säse pïrata. Ipare omano.

³⁸ Aheseve tüparo asiasa turucuar ivate coti sui ovo tupri.

³⁹ Iyavei sundao rerecuar Roma iguar, ahe Jesús rehögüer rese omahen-gatu ohã. Osenduse Jesús räse iyavei osepiase imano, aipo ehi:

—Supi eté catu, co mbia Tüpa Rahir ité —ehi.

⁴⁰ Iyavei cuña aheve amombrive osepia catu yuvinoha; ahe yuvirecoi María Magdalena, José si María, ahe avei Santiago chñhivahe catu vahe si iyavei ambuae cuña Salomé.

⁴¹ Co cuña eta yuvirecoiño vahe ité Jesús rupi, oipïtivii vahe avei Galilea ve yuvirecoise. Setã avei ambuae ava supi yugüeru vahe Jerusalén ve yuvirecoi.

Jesús apocatu agüer tuvïpa pipe

⁴² Pïtu ramose, ahe ari pipe oyemoingatu ava yuvireco ari mbïtuhusa upe nara yepi,

⁴³ ahese José, tecua Arimatea pendar, porandusa ivate catu vahe pendar, acoi Tüpa mborerecuasa osãro vahe oico, oquerëhisa pipe ité oi que oso Pilato upe oporandu ägua Jesús rehögüer rese.

⁴⁴ Pilato rumo oyepïhamondï tï, “Omano” hese. Oñehe sundao rerecuar upe oporandu ägua ‘¿marase vo ëgüe ehi?’

⁴⁵ Sundao rerecuar omombehuse chupe, ahese omondo sehögüer José upe.

⁴⁶ Evocoyase José virocua turucuar secose vahe. Curusu sui seroyi pare, oimama voi eté ipipe. Ipare omoingue tuvïpa ita yohopri pipe. Ichui ita yapayere vahe pipe osovapi.

⁴⁷ María Magdalena iyavei María, José si, osepiãño yapocatuse yuvireco.

16*Jesús ocuerayevi*

¹ Mbïtuhusa ari pare, María Magdalena, María, Santiago si, Salomé avei, ahe virocua mbahe siacua vahe Jesús rehögüer rese nara yuvireco.

² Iyavei añihiveive, yïpïndar ari semana pipe, oyepota Jesús ruvïpave icatu ramose yuvïraso.

³ Aheve aipo ehi oyeupe yuvireco:

—¿Ava pïha co tehögüer rovapisa virocuaru yuvireco yandeu? —ehi.

⁴ Osepiase rumo ita guasu yuvireco, ndahe irise güendave ihã,

⁵ yuvïroi quese tehögüer ruvïpave yuvireco, aheve osepia ombahe rese pocosa coti mbia chñhivahe, iturucuar pucu morochi vahe oguapise oi. Ahese cuña oyembosiquiye yuvireco.

⁶ Ahe rumo aipo ehi chupe:

—Pesiquiye eme. Pe peseca Jesús Nazaret pendar, yaticapri. Ahe rumo ocuerayevi; ndipoi eté cohave. Pesepia ru supagüer.

⁷ Peso, tapemombehu semimbohe eta upe iyavei pemombehu Pedro upe: ‘Jesús rane osora pe renonera Galilea ve. Aheve pesepiara mbahe che remimombehu rupi tupri’ peyera —ehi.

⁸ Evocoyase ahe cuña yuvinosese tuvipa sui, yuvinoña yuviraso, oriri avei osiquiyepave. Iyavei nomombehui eté ambuae ava upe osiquiyepave yuvireco.

Jesús oyemboyecua María Magdalena upe

⁹ Jesús ocuerayevire añihiveive domingu pipe, oyemboyecua yipindar María Magdalena upe, ahe ichui acoi siete tupri caruguar opa omboyepipi.

¹⁰ Ahe oso imombehu supindar upe. Ahe rumo oyaseho vite oviharêhisave yuvireco.

¹¹ Osenduse cuña ñehe: “Jesús ocuerayevi, che ité asepia” ehise, ndoviroyai eté yuvireco.

Jesús oyemboyecua ñuvirío güemimbohe upe

¹² Ipare Jesús oyemboyecua iri ñuvirío güemimbohe upe ambuae güepiaca pipe peri rupi.

¹³ Ahe avei yuviraso omboetasa upe imombehu; ndoviroya viteiño avei rumo yuvireco.

Jesús oyocuai güemimbohe

¹⁴ Coiye catumi tēi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñehengata ahe oyese yeroyaêhisa rese chupe, iyavei ocuerayevisa mombehugar reroyaêhi rese avei.

¹⁵ Ipare aipo ehi güemimbohe upe: “Peso opacatu ivi rupi, pemombehu co ñehesa pĩsirosa resendar peico.

¹⁶ Acoi viroya vahe, iyavei oñeapiramo vahe, ahe oñepisiora yuvireco; acoi ndoviroyai vahe rumo, ahe imocañipirã tēi yuvirecoira.

¹⁷ Co mbahe poromondiisa omboyecua che reroyasar yuvireco: Che rer pipe omboyepipira caruguar ava sui. Oñehe aveira ñehesa ndicuasai vahe pipe yuvireco.

¹⁸ Oipisi aveira mboi yuvireco, yuviroihuse mosa oporoyuca vahe, ndoyapoi chietera mbahe yuvireco chupe; iyavei omondose opo ava imbaheasi vahe harive, ombogüera aveira yuvireco” ehi.

Jesús oso ivave

¹⁹ Oñehe pare, yande Yar Jesús oso ivave. Aheve oguapi Vu Tüpa acato coti oĩ.

²⁰ Semimbohe evocoyase opa yuviraso opacatu ivi rupi ñehesa pĩsirosa resendar mombehu. Yande Yar avei oipitivi, iyavei mbahe poromondiisa pipe omboyecua uca ité ñehesa pĩsirosa resendar supi eté vahe. Aipo rupive.

LUCAS REMBICUACHIA JESÚS RECOUER RESENDAR SAN LUCAS

Lucas oicuachía Teófilo upe

¹⁻² Imboeteipri Teófilo, setá ava oicuachía yuvireco opacatu aracahendar mbahe imombehupri mboaviyesa cūrítei yande pāhuvé co Jesucristo recocuer resendar. Acoi ava yipisuive osepia vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu.

³ Sese che avei opa aseca tupri yipisuive opacatu co mbahe cua tupri āgua, Teófilo. Ichui che amoingatu tupri pota icuachiapri sesendar ndeu nara avei sereco.

⁴ Evocoyase nde ereicua tupri ra co porombohesa supi eté vahe acoi nde mbohe agüer.

Tūpa rembiguai omombehu Juan Oporoāpiramo vahe ha āgua

⁵ Yipindar Jesús ha renondeve, Herodes mborerecuar ivi Judea rupindar recose aracahe, ahese aipo judío pahi secoi Zacarías serer vahe. Ahe pahi Abías rupindar secoi. Sembireco aipo pahi Aarón suindar, ahe serer Isabel.

⁶ Co ñuvirío secocuer aviye tupri Tūpa upe; viroya tupri opacatu Yar porocuita yuvireco. Evocoyase ndipoi eté que ava “mara” ehi vahe yuvireco chupe.

⁷ Zacarías rumo yipisuive ndatahi vahe. Esepia, sembireco ndimembhi vahe ité, iyavei oyoya ité ocuacua-cuacuami yuvireco.

⁸ Ñepeí ari aipo osupiti icuaita tūparo pipe imboetasa reseve iporaviqui āgua Tūpa rovaque yuvireco.

⁹ Pahi recosa ité ěgüe ehi aracahe suive, ahese iporavosa Zacarías yipindar yasiapri tūparo maranehi pipe oi que vahe rā itaisi rapí āgua.

¹⁰ Itaisi rapí viteseve aipo, opacatu ava oyerure yuvireco ocarve.

¹¹ Aheseve aipo oyemboyecua yande Yar rembiguai itaisi renda maranehi ique coti chupe.

¹² Tūpa rembiguai repiase aipo, oyembosiquiyé iteanga.

¹³ Tūpa rembiguai rumo aipo ehiño chupe:

—Zacarías —ehi—, eresiquiye eme. Tūpa osendu nde yeruresa. Sese nde rembireco Isabel imembira ndeu. Ahe nde rahir rer-ra Juan.

¹⁴ Ereviharetera sese, iyavei oyemboviharetera opacatu ava yuvireco nde rahir ohase.

¹⁵ Esepia niha, nde rahir secocuer tuvichara oico Tūpa rovaque. Ndoihiu chietera uva ricuer sai vahe, iyavei que ambuae mbahe sai vahe; secoira rumo Espiritu Santo rese ohaēhi viteseve.

¹⁶ ěgüe ehira omonguerēhi setá ava judío Yar Tūpa reroya iri āgua oico.

¹⁷ Ahe virecora espíritu pīratasa oyese oyoyara Tūpa ñehe mombehusar Elías rese ‘ava guahir rese tiñero yuvireco oyeupe’ oya, ‘toyembohe avei ava ndiporeroyai vahe yuvireco seco catupri vahe aracusa mboyeroya āgua rese’ oyapave. ěgüe ehira ava mbohe imoingatu yande Yar pisi āgua sereco —ehi chupe.

¹⁸ Evocoyase,

—¿Mara ahera pīha aipo reroya? Che rumo acuacuami eté vichico, iyavei che rembireco ocuacuami avei no —ehi Tūpa rembiguai upe.

19 —Aní —ehi chupe—. Che aico Tūpa rembiguai Gabriel, Tūpa rovaindar. Ahe niha che mbou ndeu che ñehes aña iyavei co ñehesa aviye vahe mombehu āgua.

20 Nde rumo ndereroyai acoi amombehu vahe ndeu. Sese co pipe suive ité nandehengatui chira eico. Osupitise voi che remimombehugüer, acoi ohase nde rahir, ahese ramo ndehengatura —ehi aipo Tūpa rembiguai chupe.

21 Osāro pucu tēi aipo ocarve ambuae imboetasa eta yuvireco. “¿Mahera pīha nose vītei tūparo pipe sui?” ehi tēi yuvireco chupe.

22 Osēse aipo tūparo pipe sui, niñehengatui voi eté. “Ñaro osepia mbahe tūparo pipe” ehiñio ité aipo imboetasa eta yuvireco chupe. Ipo āta-āta tēi aipo oñehengatuēhise mbahe mombehu oico.

23 Ipare omboaviyese ocuaita tūparo pipe, oyevi oso güetave.

24 Coiye aipo sembireco Isabel ipuruha oico. Judío porocuaita mboyeroyasave nose iri eté ambuae ava piri poyandepo yasi rupi. Ipihañemoñeta:

25 “Yar Tūpa ité ēgüe ehi cheu ava che rese ñehēehi iri āgua yuvireco” ehi vorivetesā pipe aracahe.

Tūpa rembiguai Jesús yesu āgua omombehu

26 Coiye seis yasi pipe Tūpa omondo güembigui Gabriel tecua Nazaret ve ivi Galilea rupi

27 cuñatai ndaseco marai vahe upe iñehes aña; ahe serer María. Ahe omenda pota vahe cuimbahe mborerecuar guasu David suindar José serer vahe rese.

28 Tūpa rembiguai oi que co cuña rētave aipo ehi chupe:

—¡María, Tūpa nde rovasa, erereco mbahe icatupri vahe pītiviisa Yar Tūpa suindar! Tūpa nde rese ité secoi; nde rovasa catu opacatu cuña sui —ehi chupe.

29 Tūpa rembiguai repiase, “¿Mara oya pīha co aipo ehi cheu?” ehi tēi osiquiyepave opihañemoñeta rereco.

30 Evocoiyase Tūpa rembiguai aipo ehi chupe:

—María, eresiquiye eme. Esepia niha, Tūpa ité nde poravo nde rovasa āgua.

31 Cūrītei voirā rumo ndemembira: ererecora nde membri; ahe serer-ra Jesús.

32 Ahe niha secouvicha catu vaherā secoira; “Tūpa seco ivate vahe Rahir secoi” ehira yuvireco chupe. Iyavei niha Yar Tūpa ité omoinguera mborerecuar guasu seco āgua inungar tamoi David aracahe.

33 Mborerecuar guasu secoira judío recua rupi apirēhi vaherā; imborerecuasa niha apirēhi vaherā ité secoira —ehi.

34 Evocoiyase ahe aipo ehi:

—¿Mara ahera vo aipo che membri viña? Esepia niha, ndaico vītei vahe cuimbahe rese —ehi Tūpa rembiguai upe.

35 —Espíritu Santo ogüeyira nde harive ivā quiha nungar; Tūpa güeco pīratasa pipe nde momembira. Sese acoi ohase nde membri seco maranehi vahe, “Tūpa Rahir” hesara chupe.

36 Cūrītei nde mu Isabel avei ocuacuami pipe imembī oico; ahe niha ndimembī vahe yipīndar viña, cūrītei rumo vireco seis yasi omembī vie pipe.

37 Esepia niha, Tūpa upe ndipoi eté mbahe yavai vahe —ehi.

38 Evocoiyase María aipo ehi:

—Che Yar rembiguai aico, tayaviye ayase Tūpa remimbotar cheu nde ñehe rupi —ehi.

Aipo ihe pare, Tūpa rembiguai oyepepi oso ichui.

María oso omu Isabel piri

³⁹ Ahese María oso voi eté ivitri rupi tecua ivi Judea ve.

⁴⁰ Aheve aipo Zacarias rêta pipe oiqueste oso, oyapo “avirave” omu Isabel upe.

⁴¹ Evocoyase Isabel rie pipe omi imembi ñehe renduse. Ahese Espiritu Santo oiqueste Isabel aviterve.

⁴² Ipare osapucaí pîrata aipo ehi chupe vorivetesave:

—¡Tūpa nde rovasa cuña opacatu sui, iyavei osovasa nde membri!

⁴³ Noromohai eté che piri ereyu vaherã viña, che Yar si.

⁴⁴ Esepia, cheu “avirave” ereyapose, che membri omi voi vorivetesave che rie pipe.

⁴⁵ ¡Sovasapri ereico! Esepia, ereroya ité ñehesa ndeundar. Iyavei Tūpa omboaviyera güemimombehu nde rese —ehi Isabel chupe.

⁴⁶ Evocoyase aipo ihese,

“Che niha amboetei che Yar vichico;

⁴⁷ cheroriveté Tūpa che Pîsirosar rese.

⁴⁸ Esepia, ahe omahe che rese che reco yeminisa pipe seroyasar che recosave.

Co pipe suive, ‘Sovasapri secoi’ ehira opacatu ava yuvireco cheu.

⁴⁹ Esepia niha, Tūpa mbahe mboavaisarêhi, oyapo mbahe tuvichá vahe cheu.

¡Tūpa imboeteipri catu tasecoi yepi!

⁵⁰ Ahe oiparaisuereco opacatu omboeteisar yepi.

⁵¹ Nomboavai eté mbahe yapo.

Osecoreroyi ava oyemboivate ai tēi vahe.

⁵² Viroyi mborerecuar seco pîrata vahe pîratasa sui; ava seco mbegüemi vahe rumo osecomboivate.

⁵³ Ava yaracua pota vahe, omboaracua; ava ‘che aracua vai’ ehi vahe rumo, nomboaracuai eté.

⁵⁴ Oipitivi niha opacatu viroyasareta judío yuvirecoi vahe.

Esepia, ndasesarai eté poroparaisuerecosa mondo água

⁵⁵ güemimombehugüer rupi yande ramoi aracahendar Abraham upe, ichuindar upe avei yepi no” ehi vorivetesave pipe omu Isabel upe.

⁵⁶ Ipare María opita Isabel piri mbosapi yasi rupi. Ichui oyevi oso güêtave.

Juan Oporoãpiramo vahe haragüer

⁵⁷ Osupitise ari Isabel upe, imembira. Ahe imembi cuimباهemi.

⁵⁸ Imu iyavei icotindar oyanduse Tūpa rembiapo mbahe aviye vahe, aipo ehi yuvireco chupe: “Aviye ai catu Yar Tūpa secoi co cuña rese” ehi vorivetesave yuvireco.

⁵⁹ Ocho ari pipe aipo, ahe pîtani ombocircuncida yuvireco judío porocuaíta mboyeroyasa pipe. Ipare aipo omondo pota iyésupa Zacarias rer yuvireco sese viña,

⁶⁰ ichi rumo,

—Aní —ehiño—. Juan itera rumo serer —ehi.

⁶¹ —¿Mahera vo? Ndipoi eté rumo nde mu rer aipo nungar —ehi yuvireco chupe.

⁶² Evocoyase aipo omahe pītani yesupa rese yuvireco ‘¿m̄bahe pīha ahe omondo pota sererguā viña?’ oyapave yuvireco.

⁶³ Evocoyase aipo iyesupa oporandu ivirapemi rese sese serer oicuachía vaherā. Ahe serer oicuachía: ‘Juan sererguā’ ehi imoi. Ahesē aipo opacatu ava: “¿Mara ehi rutei pīha co?” ehi tēi oyeupe yuvireco.

⁶⁴ Ahese ramo Zacarías iñehengatu, omboipi Tūpa upe osapucaí oico.

⁶⁵ Opacatu aipo sēta cotindar oyembosiquiye tēi yuvireco, iyavei aipo opacatu Judea recua rupi omombehu-mbehu mbahe osepia vahecuer yuvireco.

⁶⁶ Mbahe osendu vahecuer rese avei aipo oporandu-randu oyeupe yuvireco: “¿Mbahe pīha aipo pītani oyapora curi?” ehi. Esepia niha, supi eté Tūpa osovasa.

Zacarías sapucaí agüer

⁶⁷ Zacarías, Espíritu Santo pīratasa pipe, oñehe Tūpa oyeupe ñehesa pipe aipo ehi:

⁶⁸ “¡Yande Yar Tūpa imboeteipri tasecoi!

¡Esepia niha, ahe ou yande judío yaico vahe pīsiro āgua!

⁶⁹ Ombou niha Poropísirosar güembiguai David suindar yandeu.

⁷⁰ Ēgüe ehi imombehu opacatu oñehengagüer mombehusar seco maranehi vahe upe aracahe.

⁷¹ Ahe yande pīsirora yande amotarēhimbar sui.

⁷² Ēgüe ehi Tūpa imbou oporoparaisuereresa yande ramoí aracahendar upe, iyavei iyemomahenduha āgua güemimbotar maranehi mombehu agüer rese.

⁷³ Evocoyase, ‘Che supi eté ayapora evocoi mbahe’ ehi yande ramoí Abraham upe aracahe

⁷⁴ yande renose āgua yande amotarēhimbar povri sui ‘tache mboetei osiquiyeēhisa pipe yuvireco’ oya;

⁷⁵ ‘toyuvirecoi che rembiepiave güeco ñvisa pipe iyavei güeco maranehisa pipe ari yacatu rupi’ oyapave.

⁷⁶ Nde, che rahir, ‘Co Tūpa ivate vahe ñehe mombehusar secoi’ ehira ava yuvireco ndeu.

Esepia, nde eremoingatura ava recocuer Yar pisi āgua senondeve eico.

⁷⁷ Supi eté nde niha eremboyecuara opacatu ava Tūpa upendar yuvirecoi vahe upe angaipa sui ñeroisa pisi āgua iñepisiro āgua.

⁷⁸ Esepia, yande Ru Tūpa, oporoparaisuereresa pipe ombou oporoespasa íva pendar yandeu yande reco mbopiasu āgua

⁷⁹ iyavei ava Tūpa cuaparēhi resape āgua ‘toyuvirecoi mbahe tupri pipe’ oyapave.

Esepia, ahe inungar ava pītumimbisave yuvirecoi vahe, ocañi tēi vaherā yuvireco”

ehi Zacarías.

⁸⁰ Ichui pītani ocuacua iyavei vireco pīratasa Espíritu suindar oyese. Ipare rumo oso oyemboerecua ívi iporupirēhi rupi. Coiye oyemboyecua omu Israel pendar upe oico.

2

Jesús yesu agüer

¹ Yipindar mborerecuar guasu Augusto oporocuai oico, “Tayecuachiasa opacatu tecua rupi” ehi.

2 Ahe yipindar yecuachiasa mborerecuar Cirenio, Siria pendar rēise.

3 Opacatu ava yuviraso güecua yacatu rupi oyecuachía āgua yuvireco.

4 Sese José avei osē Nazaret, Galilea ivi rupi sui oso ivi Judea rupindar tecua Belén ve. Esepia niha, aracahendar mborerecuar guasu David aheve oha vahecuer, iyavei José ichuindar avei secoi.

5 Ēgüe ehi oyoya yuviraso güembirecovi María rese oyecuachía āgua. María rumo imembira pota ité oico.

6 Aheve oyepota ramose, osupiti ari imembira āgua.

7 Aheve oha imembri yipindar vahe cuimbahemi. Ahese María oyao omembri turucuar pipe, ēgüe ehi imoñeno imondo mbahe mimba rembihu riru pipe. Esepia niha, ndoyosui eté oque āgua aheve yuvireco.

Tūpa rembiguai eta omombehu Jesús haragüer ovesa rārosar upe yuvireco

8 Namombriimi Belén sui ovesa rārosar yuvirecoi. Aheve osāro ovesa pītu pipe yuvireco.

9 Aviyeteramo tēi oyemboyecua Tūpa rembiguai iva pendar chupe. Tūpa porañetesa avei sendi yivii chupe yuvireco. Ahe sepiase, oyembosiquiyé iteanga tēi yuvireco ichui.

10 Ahe rumo aipo ehi chupe: “Pesiquire eme. Esepia, che ayu mbahe icatupri vahe mombehu āgua pēu pe mboviharete āgua iyavei opacatu ava mboviharete āgua avei no.

11 Co pipe oha David recua Belén ve Poropisirosar pēu nara. Ahe niha Tūpa Rembiporavo, pe Yarguā secoi.

12 Icuā āgua peyosura pītani yaopri tuprimi vahe tui mbahe mimba rembihu riru pipe” ehi.

13 Aviyeteramo tēi oyemboyecua ambuae setá Tūpa rembiguai iva pendar yivii yuvireco. Tūpa upe osapucaí yuvireco aipo ehi:

14 “¡Imboeteipri tasecoi Tūpa ivave!
¡Ivive ava Tūpa rembiaisu toyuvirecoi tupri oyeaisusa pipe!” ehi osapucaí yuvireco.

15 Opase oyevi Tūpa rembiguai ivave yuviraso, ahese ovesa rārosar aipo ehi oyeupe yuvireco:

—Yaso ru Belén ve; yasepiara aipo mbahe, acoi oicua uca vahe Yar oico yandeu —ehi yuvireco.

16 Evocoyase ipoyava yuviraso. Ipare osepia María, José, Jesús pītani avei yuvireco cute. Ahe pītani omoñenomi mbahe mimba rembihu riru pipe ino.

17 Ipare yuvinose omombehu-mbehu ambuae ava upe Tūpa rembiguai remimombehugüer pītani resendar ñehesa yuvireco.

18 Evocoyase opacatu ava oyepihamondi co ñehesa renduse yuvireco.

19 María rumo opacatu co mbahe rese oyapisacaño; ahe ehiño ité ipihañemoñetasa.

20 Oyevise ovesa rārosar yuviraso, omboetei iyavei osapucaí Tūpa upe yuvireco. Esepia niha, opacatu mbahe osendu vahe, osepia vahecuer yuvireco imombeupri rupi ité.

Jesús pītani seropovēhesa Tūpa upe tūparo pipe

21 Ocho ari pipe ahe pītani ombocircuncida yuvireco; omondo sererguā Jesús yuvireco, ahe terer tupri avei acoi Tūpa rembiguai omombehu María upe imembiehi viteseve.

²² Ipape omboaviyese ohari güetave oñemoatiro ñagua, ahe aipo ñgüe ehi Moisés porocuaita rupi yuvireco yepi, ahese vinose pītani seraso tecua guasu Jerusalén tūparo pipe seropovēhe ñagua Yar upe yuvireco.

²³ Ñgüe ehi yuvireco. Esepia, Yar porocuaita aipo ehi icuachiapri pipe aracahe: “Opacatu yipindar pītani cuimbahe mini yuviroha vahe ipehasara Tūpa upe nara yepi” ehi.

²⁴ Yuviraso oporecosa reropovēhe ñagua yuvireco yande Yar porocuaita rupi: “Ñepey oyovaichor reseve picuhi, anise ñuvirío apicasu peropovēhera” ehi vahe.

²⁵ Ahe pipe mbia Jerusalén ve secoi Simeón serer vahe. Ahe mbia aviye etepri vahe. Oyerure vahe Tūpa upe, osāro vahe avei Israel recua pendar Pīsiosar imombepri. Ahe secoi vahe ité Espiritu Santo rese.

²⁶ Ahe chupe Espiritu Santo opa uca oicua “eresepia rane itera Poropīsiosar Tūpa remimbu nde mano renondeve” ehi vahe.

²⁷ Ahe ari pipe Espiritu Santo viroguata tūparove. Oyepotase José, María reseve yuvireco tūparove Jesús pītani reropovēhe ñagua Tūpa porocuaita rupi tupri,

²⁸ ahese Simeón oyemboya oso sese, osupi ichi sui, viroyeroqui Tūpa upe señoa aipo ehi:

²⁹ “Che Yar, cūrítei che, nde rembiguai, amano tupriño itera. Esepia niha, nde remimombegüer eremboaviye ité cheu.

³⁰ Asepia ité niha Poropīsiosar vichico cute.

³¹ Nde niha erembou opacatu ava rembiepiave.

³² Ahe niha poroesapesa ité secoi.

Esepia, omboyecua mbahe supi eté vahe ava ndahei vahe judío yuvirecoi vahe upe,

iyavei omondara poromboeteisa nde recua Israel pendar judío yuvirecoi vahe upe”

ehi oyeruqui.

³³ José iyavei María ndoyembovihai tēi yuvireco pītani rese Simeón yeroqui renduse.

³⁴ Evocoyase Simeón osovasa ahe pītani iyésupa reseve. Ipape aipo ehi ichi María upe:

—Esendu, co pītani reroyaēhisa pipe setá yande mu judío oviapira mbahe tēi pipe yuvireco; ambuae rumo seroya pipe sovasapri yuvirecoira. Ahe avei omboyecua mbahe ava upe. Amove rumo viroñoora yuvireco.

³⁵ Ipape sui ava pihañemoñetasa icuasara curi. Iyavei co opacatu mbahe tasira nde piha pipe inungar quise pucu osasara nde piha viña —ehi chupe.

³⁶ Aheve avei ñaña cuacuami yaracua vahe secoi, ahe serer Ana, Fanuel rayri, Aser suindar. Ocuñataimiseve rumo omenda, iyavei secoi raimi tēi omer rese siete araviter rupive.

³⁷ Cūrítei secoi omer mano pare ochenta y cuatro araviter. Nosei eté tūparo pipe sui oico. Ñgüe ehi yande Yar mboetei pītu, ari rupi oyecuacusa pipe iyavei oyeruresa pipe avei oico no.

³⁸ Ahe evocoyase ahesa reseve avei ou pītani upe, “Aviye ndeu” ehi Tūpa upe. Ipape oñehe secocuer rese opacatu ava Jerusalén pendar osāro vahe güecua pīsiro ñagua upe oico.

³⁹ Evocoyase opacatu Moisés porocuita mboaviyere, opa oyeve Galilea pendar güecua Nazaret ve yuvireco.

⁴⁰ Ahese pītani ocuacua catumi imbahecua-ecua irimi eté oico iyavei ipĩrata catu irimi. Esepia, Tũpa osovasa ité sereco no.

Jesús chĩhivahe tũparo pipe secoi

⁴¹ Iyesupa yuviraso araviter yacatu Jerusalén ve Pascua pieta repia yepi.

⁴² Jesús doce araviter virecose, ahese viraso iyesupa Jerusalén ve oyeupi pieta repia yuvireco. Esepia, ěgũe ehi eté judío recocuer pietase yuvireco yepi.

⁴³ Ahe pieta pare voi, oyevise yuvireco güecosave, ahese Jesús opitaño Jerusalén ve; ichi rumo iyavei tu José ndoicuai eté ipitase yuvireco.

⁴⁴ “Oũño revo ava pãhu rupi” ehi yuvireco chupe viña; aipo ehiño ité ñepi ari pipe yuvireco chupe. Oseca tẽise rumo omu pãhu rupi, iyavei omboripar pãhu rupi avei no,

⁴⁵ ndoyosui eté yuvireco. Ahese oyeve iri tẽi Jerusalén ve seca yuvireco.

⁴⁶ Imombosapisa ari pipe oyosu ramo tũparo pipe yuvireco. Aheve oguapi ava Tũpa porocuita rese oporombohe vahe pãhuve oĩ; oyapisaca iñehe rese iyavei oporandu-randu ahe ava upe Tũpa Ñehengagũer rese oĩ.

⁴⁷ Evocoyase opacatu ava ndoyembovĩhai tẽi imbahecua vaisa rese yuvireco. Esepia, oporanduse mbahe rese yuvireco chupe, omboyeve tupri voi-voiño ité ñehesa.

⁴⁸ Oyosuse iyesupa, oyepihamondii yuvireco. Ahese ichi aipo ehi chupe:

—Che membri, ¿mahera vo ěgũe ere eico oreu? Nde recasa tẽi opacatu rupi, ore mopihañemoñeta ati uca eve —ehi.

⁴⁹ Evocoyase,

—¿Mahera vo che reca co coti rupi tẽi peye peico? ¿Ndapeicuai vo che Ru rẽta pipe aico vaherã? —ehi osi upe.

⁵⁰ Iyesupa rumo ndosenducuai eté aipo oyeupe hesa yuvireco.

⁵¹ Evocoyase oyeve Nazaret ve oso supi. Aheve omboyeroyaño ité oyesupa. Ichi niha opacatu co mbahe rese oyapisacaño ité.

⁵² Ahese Jesús ocuacua-cuacua iri, iyetei catu avei imbahecua catu iri avei oico no. Secoi tupri ai eté Tũpa upe iyavei ava eta upe avei no.

3

Juan Oporoãpiramo vahe secoi ivi iporupirẽhisu rupi

¹ Quince araviter pipe mborerecur guasu Tiberio recose, Poncio Pilato evocoyase mborerecur secoi Judea rupi, Herodes avei mborerecur secoi Galilea ve, tivri Felipe evocoyase mborerecur secoi Iturea ve iyavei Tracónite ve, Lisnias avei mborerecur secoi Abilinia ve.

² Anás iyavei Caifás ahe pahĩ rerecur ivate catu vahe yuvirecoi. Ahese Tũpa, “Emombehu che ñehe ava upe cute” ehi Zacarías rahĩr Juan upe oico ivi iporupirẽhisave.

³ Juan evocoyase oso opacatu iai Jordán ivi oico, supi aipo ehi ava upe: “Pemboasi pe angaipa, peyevi Tũpa upe, ahese opoãpiramora Tũpa pẽu ñero ãgua pe angaipa rese” ehi.

⁴ Co yaviye ité Tũpa ñehe mombehusar Isaías rembicuachiagũer pipendar aipo ehi vahe:

“Sendusa ivi iporupirẽhisave ava sapucaisa aipo ehi vahe:

‘Pemoingatu yande Yar raperã, pemohivi tupri avei’ ehi.

5 ‘Evocoiyase opacatu ivisocuer opara imboapiposa chupe, opacatu ivitri ivate vahe iyavei ivitri mini opara imboyoyasa tupri no.

Acoi peri ipāri vahe, ahe imohivisapara; peri ipicucu ati vahe opara imboapiposa tupri chupe.

6 Iyavei opacatu ava osendura ñehesa p̄sīrosa resendar Tūpa remimbou yuvireco cute’ ehi vahe” ehi.

7 Ava rehii yuvinosepa chupe ‘tayande āpiramo’ oyapave yuvireco viña. Ahe rumo aipo ehi: “¡Pe mboi mboetasa tēi peico! ¿Ava vo, ‘Pesera Tūpa ñemoirosa ou vaherā sui’ ehi tupri tēi p̄u?”

8 Yipindar toyecua tupri rane yande Yar upe peyevisa pe angaipa mboasisa pipe. Iyavei ndapeyeroyai chira ‘ore Abraham suindar oroico’ pe hesa rese tēi peñepisiro āgua. Esepia, Tūpa oicatuño ité co ita sui Abraham suindar nungar tupri apo āgua oyeupe nara yepi.

9 Hacha niha imoingatusa voi eté opacatu ivira iha naporai vahe sapo rupi yasia āgua yepi. Yasiapri evocoiyase imondosapara tatave” ehi.

10 —¿Mbahe p̄iha evocoiyase oroyapora ore recocuer recuñaro āgua oroico? —ehi ava rehii oporandu yuvireco chupe.

11 —Pe pereco vahe ñuvirío pe camisa, ñepepe pemondo ava ndovirecoi vahe upe; iyavei pe pereco vahe tembihu, pemboyahomi tēi ambuae ava ndovirecoi vahe upe —ehi imboyevi ava upe.

12 Yugüeru avei moviro ava sui guarepochi reroquasar ‘tayande āpiramo’ oyapave yuvireco. Ipape oporandu Juan upe mbahe rese yuvireco:

—Porombohesar, ¿mbahe vo ore oroyapora Tūpa rupi ore guata āgua oroico? —ehi yuvireco chupe.

13 Evocoiyase aipo ehi ahe ava yuvirecoi vahe upe:

—Aní perocua catu iri guarepochi p̄u imombehusa sui —ehi.

14 Iyavei amove sundao oporandu mbahe rese yuvireco chupe:

—Ore no, ¿mbahe vo ore oroyapora? —ehi.

—Ndaperocuai chietera que mbahe ambuae ava sui, ndapeñehe-ñehe tēi chira ava upe sembiapoēhi rese, iyavei peyembovihanora pe poraviqui repri rese —ehi sundao upe.

15 Ava rumo, “¿Ndahei p̄iha co Porop̄sīrosar sārombri secoi?” ehi tēi Juan upe yuvireco.

16 Juan rumo aipo ehi opacatu ava upe: “Che opoāpiramo i pipe tēi; oura rumo ambuae che raquicuei, ahe pe āpiramora Espiritu Santo tata nungar pipe. Ahe seco p̄irata catu vahe secoi che sui. Sese cheu ndiyai eté ahe ipitaquisā yora āgua ichui” ehi.

17 “Ahe güeru trigo mbovevesa ihigüer sui ipeha āgua. Sāhii evocoiyase yapocatusa, ihigüer rumo imondosa tata apirēhi vahesave” ehi ava upe.

18 Omombehu-mbehu vite ñehesa aviye vahe ava upe ‘toyemonguerēhi güecocuer recuñaro āgua yuvireco’ oya.

19 Ipape rumo Juan oñehe p̄irata mborerecuar Herodes upe secocuerai rese. Esepia, vivri Felipe rembireco Herodías rese secoi, iyavei setá ambuae mbahe naporai vahe sembiapo.

20 Sese Herodes oyapoño ambuae mbahe tēi: seroyaēhisa pipe osoquenda ucaño Juan sereco.

Jesús āpiramosa

21 Yipindar rumo voquenda viteēhiseve Juan oñapiramo setá ava oico, aheseve avei oñapiramo Jesús. Jesús yerure viteseve, aviyeteramo tēi oyemboi tupri iva.

²² Ipare Espíritu Santo ogüeyi ou iharive apिकासु nungar, iyavei oyeendu ñehesa iva sui aipo ehi vahe:

—Nde che Rahir ereico, che rembiaisu; sese aviha ité nde rese —ehi.

Ava eta oyesu vahe Jesucristo yesu renondeve

²³ Jesús virecose treinta araviter, ahesa ramo omboipi oporombohe. Ahe icuapri vahe ité José rahir secose viña. José Elí rahir secoi,

²⁴ Elí evocoyase Matat rahir, ahe Matat evocoyase Leví rahir, Leví evocoyase Melqui rahir, ahe Melqui evocoyase Jana rahir, Jana evocoyase José rahir,

²⁵ ahe José Matatías rahir, Matatías evocoyase Amós rahir, ahe Amós evocoyase Nahúm rahir, Nahúm evocoyase Esli rahir, ahe Esli Nagai rahir,

²⁶ Nagai evocoyase Maat rahir, ahe Maat Matatías rahir, Matatías evocoyase Semei rahir, ahe Semei evocoyase Josec rahir, Josec evocoyase Judá rahir,

²⁷ ahe Judá Joanán rahir, Joanán evocoyase Resa rahir, ahe Resa evocoyase Zorobabel rahir, Zorobabel evocoyase Salatiel rahir, ahe Salatiel Neri rahir,

²⁸ Neri evocoyase Melqui rahir, ahe Melqui Adi rahir, Adi evocoyase Cosam rahir, Cosam evocoyase Elmadam rahir, Elmadam evocoyase Er rahir,

²⁹ ahe Er Jesús rahir, Jesús evocoyase Eliezer rahir, ahe Eliezer Jorim rahir, Jorim evocoyase Matat rahir,

³⁰ ahe Matat Leví rahir, Leví evocoyase Simeón rahir, ahe Simeón evocoyase Judá rahir, Judá evocoyase José rahir, ahe José Jonam rahir, Jonam evocoyase Eliaquim rahir,

³¹ Eliaquim Melea rahir, ahe Melea Mena rahir, Mena evocoyase Matata rahir, ahe Matata evocoyase Natán rahir,

³² Natán David rahir, ahe David evocoyase Isaí rahir, Isaí Obed rahir, ahe Obed evocoyase Booz rahir, Booz Sala rahir, ahe Sala evocoyase Naasón rahir,

³³ Naasón Aminadab rahir, ahe Aminadab evocoyase Admin rahir, Admin evocoyase Arni rahir, Arni evocoyase Esrom rahir, ahe Esrom evocoyase Fares rahir, Fares evocoyase Judá rahir,

³⁴ ahe Judá Jacob rahir, Jacob evocoyase Isaac rahir, ahe Isaac Abraham rahir, Abraham evocoyase Taré rahir, Taré evocoyase Nacor rahir,

³⁵ ahe Nacor Serug rahir, Serug evocoyase Ragau rahir, ahe Ragau evocoyase Peleg rahir, Peleg Heber rahir, ahe Heber evocoyase Sala rahir,

³⁶ Sala Cainán rahir, ahe Cainán evocoyase Arfaxad rahir, Arfaxad evocoyase Sem rahir, ahe Sem evocoyase Noé rahir, Noé evocoyase Lamec rahir,

³⁷ ahe Lamec Musalén rahir, Musalén evocoyase Enoc rahir, Enoc evocoyase Jared rahir, ahe Jared Mahalaleel rahir, Mahalaleel evocoyase Cainán rahir,

³⁸ ahe Cainán evocoyase Enós rahir, Enós evocoyase Set rahir, ahe Set Adán rahir, Adán evocoyase Tüpa rahir.

4

Jesús recoãhasa

¹ Jesús Espíritu Santo rese ité secoi. Ahe osē iai Jordán sui oso. Ipare Espíritu viroguata ivi iporupirēhisa rupi.

² Aheve cuarenta ari secoise Caruguar osecoãha. Ndocarui avei oico. Sese ndasiepoi eté.

³ Caruguar evocoyase aipo ehi chupe:

—Tüpa Rahir ité nde recose, co ita sui eyapo pan cūrítei —ehi.

⁴ Evocoyase Jesús omboeyevi chupe:

—Che Ru ñehe rumo icuachiapri pipe aipo ehi: ‘Ndahei chira pan suiño ava yuvirecovera’ ehi —ehi Caruguar upe.

⁵ Ipare Caruguar viraso ivate vahesave. Aheve ñepeí reseve opacatu avava tēi mborerecuasa ivi pīpendar omboyecua chupe.

⁶ Ipare aipo ehi chupe:

—Che amondora opacatu ivi rupindar mborerecuar pīratasa iyavei mbahe porañete vahe nde povrive. Esepia niha, co opacatu cheu imboupri; iya ité amondo vaheṛā ava upe che remimbotar rupi.

⁷ Acoi ereñenopiḥase cheu che mboetei āgua, ahese opacatu co mbahe ereipisira nde mahera —ehi tēi Caruguar chupe.

⁸ —Icuachiapri pipe rumo: ‘Emboetei nde Yar Tüpa, ahe güeraño tupri avei eremboyeroyara’ ehi —ehi Caruguar upe.

⁹ Ipare Caruguar viraso oyeupi tecua guasu Jerusalén ve. Aheve oviroyeupi tūparo apiterve. Aheve Caruguar aipo ehi chupe:

—Tüpa Rahir ité nde recose, eviapi cohava sui.

¹⁰ Esepia niha, icuachiapri pipe:

‘Tüpa oyocuaíra güembiguai eta nde rāro āgua.

¹¹ Ahe nde mopuhara yuvireco que ñepeí ita nde momara rāgüer sui’ ehi —ehi Caruguar chupe.

¹² Evocoyase omboeyevi Caruguar upe:

—¡Aní! Icuachiapri pipe niha aipo ehi avei: ‘Nderesecoãhai chira nde Yar Tüpa’ ehi —ehi chupe.

¹³ Ahese Caruguar ndoicatu iri eté Jesús recoãha āgua oico. Ipare oyepepiño raimi tēi oso ichui.

Jesús omboipi oporombohe Galilea rupi

¹⁴ Jesús, Espíritu Santo reco pīratasa pipe, oyevi oso Galilea ve. Ipare serācua oguata opacatu tecua-tecuami rupi.

¹⁵ Esepia, ahe oporombohe judío tūparo pipe oico. Ahese opacatu ava omboetei yuvireco.

Jesús oyevi Nazaret ve

¹⁶ Ichui Jesús oyevi Nazaret ve ocuacua agüerve. Aheve judío mbıtuhusa ari pipe oique tūparove inungar oyapo yepi. Ahese opūha ‘tayeroqui icuachiapri marañehi pipe’ oya.

¹⁷ Evocoyase tūparo rese ñangarecuar pītiviisar omondo Tüpa ñehe mombehusar Isaías rembicuachía chupe. Oyorase ahe cuachiar, oyeruqui icuachiapri aipo ehi vahe pipe ohā:

¹⁸ —“Yar Espíritu secoi che rese.

Esepia niha, ahe ombou che cuaitarā cheu co ñehesa aviye vahe mombehu āgua ava iparaisu vahe upe.

Che cuaita avei ava mbahe-mbahe tēivrive yuvirecoi vahe senose āgua ichui, iyavei ava ndasesapisoi vahe ambosarecora; iyavei che cuaita ava mbahe-mbahe tēi rāsicuer oiporara vahe sui senose āgua,

¹⁹ iyavei ‘cūrítei Yar oyeimoingatu oporovasasa mondo āgua pēu’ he āgua” ehi icuachiapri pipe —ehi oyeruqui.

²⁰ Sese oyeroku pare, oyapoapipa cuachiar imondo tūparo rese ñangarecuar pītiviisar upe. Ipare oguapī oī ava rembiepiave. Ahese opacatu tūparo pīpendar omahe ati yuvireco sese.

²¹ Evocoiyase ahe oñehe aipo ehi:

—Cūrítei yavīye co icuachiapri pīpendar opacatu pe rovaque —ehi.

²² Opacatu ava oñehe tupriño ité yuvireco sese. Ndoymboviñhai tēi iñehe tupri renduse yuvireco. Oporandu-randu rumo yuvireco oyeupe:

—¿Ndahei vo acoi co José rahir tēi? —ehi yuvireco chupe.

²³ Ahe rumo aipo ehi ava upe:

—Pe aipo peyera cheu: ‘Oporombogüera vahe, eñeposano nde ae eico’ peyera. Ipare aipo peyera cheu: ‘Acoi orosundu vahe nde rembiapogüer Capernaum pipe, ãgüe ere avei eyapo cohove nde recua pipe ité’ peyera cheu —ehi.

²⁴ —Supi eté, ndipoi eté niha que ñepe yepe Tūpa ñehe mombehusar oipisi tupri vahe güecua pipe yuvireco yepi.

²⁵ Supi tupri ité Tūpa ñehe mombehusar Elías recose, iñehe rupi tupri ndoqui eté mbosapi araviter yemombitesa rupi oico. Sese oime tiavor opacatu Israel ivi rupi aracahe. Ahese setá etepri cuña imer mano vahecuer oime Israel recua rupi viña,

²⁶ Tūpa rumo nomondo Elías cuña imer mano vahecuer Israel pendar upe ipītivi ãgua. Ëgüe ehi rumo omondo cuña ndahei vahe Israel pendar ipītivi ãgua. Ahe cuña tecua Sarepta pendar, ahe Sarepta Sidón ipiimindar.

²⁷ Iyavei setá ava oime Israel recua pīpendar imbaheasi vahe lepra rerecosar yuvireco evocoi Tūpa ñehe mombehusar Eliseo recose. Evocoi ava yuvirecoi vahe rumo ndipoi eté que ñepe ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

²⁸ Ahese opacatu ava judío tūparo pīpendar oñemoiró iteanga yuvireco sese aipo mbahe renduse.

²⁹ Sese opa voi eté opūha Jesús reraso ãgua tecua pipe sui ivitri ivi socuerve yuvireco, ahe iharive tecua yaposa. Ahe ichui oiti pota yuvireco viña.

³⁰ Jesús rumo ipāhu sui osé tupriño oso.

Jesús ombogüera mbia carugar vireco vahe oyese

³¹ Ichui Jesús oso Capernaum ve, ahe tecua Galilea rupindar. Aheve ombohe ava oico mbituñusa ari pipe.

³² Ipare opacatu ava, “¡Mara ehi rutei!” ehi tēi iporombohesa renduse yuvireco. Esepia niha, ahe oñehe güeco pīratasa pipe.

³³ Aheve judío tūparo pipe oime mbia vireco vahe carugar oyese, ahe oñehe pīrata Jesús upe:

³⁴ —¡Ore mañeco tēi eme eve! ¡Mahera ereyuño tēi cohove oreu, nde, Jesús Nazaret pendar! ¿Ereyu vo ore mocañi ãgua tēi? Che orocua ité. Nde niha seco maranehi vahe ereico Tūpa suindar —ehi chupe.

³⁵ Evocoiyase,

—¡Quiriri, esé co mbia sui! —ehi oñehe pīrata carugar upe.

Ahese carugar omboviapi ahe mbia ava rovai, osé ocua ichui; nomo-marai eté rumo.

³⁶ Opacatu ava oyembosiquiye, iyavei oporandu-randu tēi mbahe rese oyeupe yuvireco:

—¿Mara ehi vo aipo oñehe oico? ¡Esepia, co mbia opīratasa pipe oyocuai carugar ava sui imose ãgua! —ehi yuvireco.

³⁷ Sese Jesús rerãcua oyandu opacatu tecua-tecuami ivirindar yuvireco.

Jesús ombogüera Simón Pedro rembireco si

³⁸ Evocoyase Jesús osê judío tũparo pipe sui oso, oique Simón Pedro rêtave. Simón rembireco si sohi iteanga ou. Evocoyase oñehe ahe pendar sese Jesús upe ‘tombogüerami tẽi’ oyapave yuvireco.

³⁹ Evocoyase Jesús oyeaivi oso chupe sohi sui imbogüera ãgua. Ocuera pare voi ahe cuña oñarapuha; ohañeco ahe ava yuvirecoi vahe rese.

Jesús ombogüera setá ava imbaheasi vahe

⁴⁰ Ari so ramomise opacatu ava imbaherasisa ambuae tẽi vahe güeru Jesús upe yuvireco. Ahe evocoyase opo omondo iyacatu iharive ñepei-peí imbogüera.

⁴¹ Iyavei setá ava sui opa omose carugar. Evocoyase carugar osapucaí tẽi aipo ehi yuvireco:

—¡Nde acói Tũpa Rahír ité ereico! —ehi.

Ahe rumo oñehe pĩrata carugar upe, nomoñehe iri. Esepia niha, carugar oicua ité ahe Tũpa Rembiporavo seco rese yuvireco.

Jesús oporombohe judío tũparo rupi oico

⁴² Ahere ayihive cõhe ramomise, Jesús osê tecua pipe sui, oso ivi iporupirẽhisave. Ava rumo oseca-secaño ité yuvireco; osupitiño ité secosave yuvireco. Oipota ahe oyesui ichoẽhi ãgua ité yuvireco vinã.

⁴³ Ahe rumo aipo ehi ava eta upe:

—Tamombehu rané catu ambuae tecuave avei ñehesa aviye vahe Tũpa mborerecuasa resendar ava upe. Esepia, aherã niha che mbousa —ehi.

⁴⁴ Ëgüe ehi Jesús oguata oporombohe Judea tũparo rupi oico.

5

Pira mboha ati agüer

¹ Ñepei ari Jesús secoi ipa Genesaret popi rupi. Aheve ava rehii oyepota yuvireco chupe, oyere ati yuvireco sese. Esepia niha, ahe osendu pota ité Tũpa Ñehengagüer yuvireco.

² Aheve oime ñuvirío carite imbehi popive. Ahe ava pira mbohasar opa yuvínose evocoi carite pipe sui yuvireco. Ipare opira mbohasa oyosei yuvinoi.

³ Evocoyase Jesús osepiase, oha Simón carite pipe iyavei aipo ehi chupe: “Tosirí catumi tẽi chíhi coi coti iai popi sui” ehi. Ipare oguapi oĩ carite pipe. Aheve ombohe ava cute.

⁴ Oñehe pare aipo ehi Simón upe:

—Yaso ipa tipí catu vahesave. Aheve erembohara pira —ehi.

⁵ Simón rumo omboyeví chupe:

—Porombohesar, orosãha tẽi niha pĩtu momba pira mboha oroico. Nde porocuaíta pipe rumo amondo irira pira mbohasa ìve —ehi.

⁶ Ëgüe ehise, pira rehii omondoromi ombohasa yuvireco.

⁷ Ahese oyaiti yuvireco omboetasa evocoi ambuae carite pipe yuvirecoi vahe upe ‘toyugüerumi yande pĩtivii’ oyapave yuvireco chupe. Ahe yugüeru chupe. Ipare opa ñuvirío carite omboapipo tupri yuvireco; seni iri rumo omondo ipive.

⁸ Co mbahe repiase, Simón Pedro oñenopiha oso sovai aipo ehi chupe:

—¡Eyepipimi tẽi che sui, che Yar! ¡Esepia, che yangaipa vahe tẽi aico! —ehi.

⁹ Esepia, Simón iyavei opacatu ava yuvirecoi vahe supi osiquiyé iteanga co pira rehii repiase yuvireco.

¹⁰ Iyavei Simón mboetasa ambuae carite pipendar ahe Santiago, Juan Zebedeo rahir yuvirecoi. Jesús rumo aipo ehiño Simón upe:

—Eresiquiye eme; co pipe suive inungar pira eremboha, ãgüe ere aveira ava reca cheu nara —ehi.

¹¹ Evocoyase opa vinose carite ivi ãtasave yuvireco, oseypañño opacatu mbahe. Ipare yuviraso supi.

Jesús ombogüera ava lepra rerecosar

¹² Ñepeí ari Jesús secoise tecua pipe, aheve oime mbia lepra vireco vahe opacatu güetecuer rese. Jesús repiase, oñenopiha oyeaivi oso chupe. Ipare oporandu aipo ehi:

—Che Yar, ereiptase, iya nde che mbogüerami eve —ehi chupe.

¹³ Evocoyase, opocose sese,

—Aipota. ¡Erecuerara cūríte! —ehi chupe.

Aipo ihe ramoseve voi eté ocuera.

¹⁴ Ipare oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahi upe. Ipare eicuavêhe nde porerecosa nde cuerasa resendar Moisés porocuaíta rupi. Ipipe sui toicua opacatu ava nde cuerasa yuvireco —ehi chupe.

¹⁵ Jesús rerãcua rumo oyembouvicha catu-catu iri eté. Evocoyase setá ava oyemboya yuvireco sese iñehe rendu ãgua ‘tayande mbogüerami tēi yande mbaherasisa sui’ oyapave yuvireco.

¹⁶ Ava rehii sui rumo amove Jesús oyepepiño ahe aemi oyerure ãgua yepi.

Jesús ombogüera ava ndoguatai vahe

¹⁷ Ñepeí ari Jesús oporombohe oico. Yar Tüpa pĩratasa vireco oyese ava mbogüera ãgua. Aheve avei oguapi yuvinoi fariseo, Moisés porocuaíta rese oporombohe vahe avei ipiri yuvireco. Ahe yugüeru opacatu Galilea tecua-tecuami rupi sui yuvireco. Ivi Judea rupi sui, tecua Jerusalén sui avei yugüeru no.

¹⁸ Ahese ava ndoguatai vahe güeru supa pipe yuvireco. Viroique pota oi pipe sovai eté seroyi ãgua yuvireco viña;

¹⁹ ndoicatui eté rumo seroique yuvireco ava rehii pãhu rupi. Evocoyase viroyeupi yeypisa rupi ahe oi ipe vahe harive yuvireco. Aheve virocua teca ichui. Supi viroyi imbaheasi vahe supa pipe imondo yuvireco opacatu ava rembiepiave sovai.

²⁰ Ahe oicuase co mbia yuvirecoi vahe oyese yeroyasa, ahese aipo ehi imbaheasi vahe upe:

—Che mboripar, che ñero nde angaipa rese ndeu —ehi.

²¹ Ichui oporombohe vahe Moisés porocuaíta rese iyavei fariseo ipihañemoñeta ati voi tēi yuvireco: “Co mbia oyemboivate ai tēi vahe Tüpa ñehe nungar pipe tēi; Tüpañño ité niha oicatu ava angaipa upe oñero ãgua” ehi tēi oyeupe yuvireco.

²² Ahe rumo oicuaño ité ahe ava pihañemoñetasa. Evocoyase aipo ehi chupe:

—¡Mahera vo pepihañemoñeta rai tēi che rese!

²³ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pãha, anise: ‘Epũha, eguata’ hesa tie?

²⁴ Tapeicua ru che, Ava Riquehîr, areco ité mborerecuasa co ivî pipe ava angaipâ upe che ñero âgua —ehî.

Evocoiyase,

—Eñarapuha, esupi nde rupa, eso nde rêtave —ehî imbaheasi vahe upe.

²⁵ Ahese opûha voi ava rovaque, osupi vupagüer. Ipare osapucâi oso güêtave Tûpa upe.

²⁶ Ahese opacatu tupri ité ava, “¡Too! ¿Mara ehi rutei pîha co?” ehi tēi imboetisave yuvireco. Iyavei osiquiyepave aipo ehi yuvireco:

—Co pipe yasepia mbahe ndayasepiaî vahe ité —ehî.

Jesús oñehe Levî upe

²⁷ Ichui osêse Jesús, osepia mbia Roma ve nara guarepochi rerocuasar Levî serer vahe, ahe guarepochi rerocuasave chini. Sepiase,

—Erio che rupi —ehî chupe.

²⁸ Evocoiyase Levî opûha. Oseyapa oporaviquisa, oso supî.

²⁹ Ipare Levî oyapo pieta guasu chupe nara güêtave. Aheve iyemborisave setâ imboetasa ava guarepochi rerocuasar iyavei ambuae ava ocaru yuvinoi ipîri.

³⁰ Pieta repiasar fariseo yuvirecoi vahe rumo iyavei ipâhu pendar Moisés porocuita rese oporombohe vahe avei, ahe omboipî semimbohe upe oñehe mara aipo ehi yuvireco chupe:

—¡Mahera ru pecaru iyavei pecahu guarepochi rerocuasar rese iyavei ambuae ava yangaipâ guasu vahe rese tēi avei no! —ehî.

³¹ Jesús rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco.

³² Esepia, che ndayui ava seco catupri vahe reca; che rumo ayu ava yangaipâ vahe reca Tûpa uve iyevî âgua yuvireco —ehî.

Yecuacusa rese ñehesa

³³ Ipare ava oporandu yuvireco chupe:

—¿Mahera vo oyecuacu serai iyavei oyerure Juan Oporoâpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehî.

³⁴ Ahe rumo omboyevî chupe aipo ehi:

—Ndiyai eté ichohopri mboyecuacu mendasave imer oicove viteseve ipâhuve.

³⁵ Oimera rumo ari imer reraso âgua ichui, ahese ramo oyecuacura yuvireco cute —ehî.

³⁶ Iyavei ambuae mbahe rese oporombohe imboyevî âgua:

—Ndiyai eté ava upe virocua vaheerâ turucuar ipiasu vahe sui ambuae turucuar cuacuami vahe apete âgua. Esepia niha, êgüe ehise evocoiyase turucuar ipiasu vahe omomara; iyavei turucuar ipiasu vahe apîrer naporai chira turucuar cuacua vahe rese —ehî—.

³⁷ Iyavei no, ndiyai eté ñoñasa uva ricuer piasu mbahe pîrer cuacua pipe no. Esepia niha, êgüe ehise, uva ricuer piasu evocoiyase opara ombopu mbahe pîrer cuacua viña, êgüe ehira oyepiyerepa, mbahe pîrer avei evocoiyase ocañi tēira viña.

³⁸ Uva ricuer piasu rumo yamondora mbahe pîrer piasu pipe.

³⁹ Iyavei ndipoi eté que ava oihu vahe uva ricuer ipiasu vahe yuvireco uva ricuer cuacua vahe yusei ai pare. Esepia niha, ava aipo, ‘Co uva ricuer cuacua vahe aviye catu vahe yepî’ ehi yuvireco —ehî ava upe.

6

Jesús remimbohe oipoho trigo mbituhusa ari pipe yuvireco

¹ Ñepeí mbituhusa ari pipe Jesús viroguata güemimbohe mbahe miti pāhu rupi. Semimbohe evocoiyase oipoho-poño yuviraso trigo rāhií. Ipare oyequií opo pipe sāhií yuvireco igua.

² Evocoiyase fariseo osepiase, aipo ehi yuvireco semimbohe eta upe:

—¡Mahera peporaviquiño tēi co mbituhusa ari pipe peico! —ehi.

³ Jesús rumo omboyeví chupe:

—Peícua tēi niha icuachiapri aracadendar mborereciar guasu David rembiapogüer resendar ñehesa ondugüer reseve ndasiepoise yuvireco.

⁴ Ahe niha oi que ité Tūpa rēta pipe, opoco pan imboeteipri Tūpa upendar rese evocoi pahi upe güeraño ipotasa vahe ihu āgua yepi. Ahe rumo ohu, ondugüer tohu avei omondo —ehi.

⁵ Iyavei aipo ehi chupe:

—Ava Riquehir mbituhusa ari rereciar ité secoi —ehi fariseo upe.

Jesús ombogüera mbia ipo nomii vahe

⁶ Ambuae mbituhusa ari pipe, Jesús oi que judío tūparo pipe oporombohe oico. Aheve mbia yasu coti ipo nomii vahe secoi.

⁷ Moisés porocuaita rese oporombohe vahe, fariseo avei omahengatu Jesús rese yuvireco ‘¿ombogüerara pīha co mbia mbituhusa ari pipe?’ oya; ‘yaiñhengapo angahu’ oyapave tēi yuvireco.

⁸ Ahe rumo oicuaño ité ipihañemoñetasa oico. Ipare aipo ehi evocoi mbia ipo nomii vahe upe:

—Epūha cohavé terehā ava pāhuve —ehi.

Ahe mbia evocoiyase opūha, opita aheve ohā

⁹ Ahese Jesús oporandu ahe ava upe:

—Aporandura mbahe rese pēu —ehi—. ¿Mbahe vo yaposara mbituhusa ari pipe yepi, mbahe tupri pīha, anise mbahe naporai vahe tie? ¿Yaiپیسیرو pīha ava recocuer; yamocañi uca tēi tie? —ehi.

¹⁰ Evocoiyase omahengatu oyese ava oyere tupri vahe rese. Ipare aipo ehi ava ipo nomii vahe upe:

—Eichoho nde yiva —ehi.

Ahe mbia evocoiyase oichoho oyiva; evocoiyase ipo ocuera tupri ité.

¹¹ Evocoiyase oñemoiro catuño ité yuvireco sese, iyavei oporandu-randu oyeupe yuvireco ‘¿mara yahera pīha imomara āgua?’ oya.

Jesús oiporavo doce tupri güemimboherā

¹² Ahe ari rupi Jesús oso ivitri ve, oyerure pītu momba tupri Vu upe oico.

¹³ Cōhese, “Perió” ehi güemimbohe eta upe. Ipāhu sui oiporavo doce tupri, ahe chupe, “Apóstol” ehi.

¹⁴ Co ahe yuvirecoi: Simón, ahe acoi Pedro avei serer; Andrés Simón rīvri; Santiago, Juan, Felipe, iyavei Bartolomé;

¹⁵ Mateo, Tomás, Santiago Alfeo rahir; Simón, ava güecua rese secatēhí vahe pāhu pendarer;

¹⁶ Judas Santiago rīvri; iyavei Judas Iscariote, ahe omondo vahe Jesús yamotarēhimbar uve.

Jesús ombohe ava rehii

¹⁷ Ipare Jesús ogüeyi ivitri sui yugüeru co doce güemimbohe reseve. Ipare opita ivi yoya tuprisave. Aheve ambuae semimbohe eta oyemboya ati yuvireco sese iyavei setá ava yuvirecoi opacatu tecua Judea rupindar,

Jerusalén rupindar iyavei yemboyasa Tiro, Sidón cotindar, ahe oyemboya avei yuvireco sese. Ahe ava êgüe ehi ñehe rendu potasave yuvireco 'tayande mbogüerami tõi yande mbaheerasisa sui' oyapave yuvireco.

18 Acoi espíritu naporai vahe remimombaraisu avei ocuera tupri yuvireco.

19 Evocoyase opacatu ava opoco pota ité sese yuvireco. Esepia niha, ahe oporombogüera opacatu güeco pïratasa pipe oico.

Ava sorivete vahe iyavei ava ndoyembovïhai vahe

20 Ipare omahe Jesús güemimbohe rese aipo ehi chupe:

"Perorivete catu pe iparaisu vahe. Esepia niha, Tüpa mborerecuasa pëu nara ité secoi.

21 "Perorivete catu cüriteindar ndasiepoi vahe. Esepia niha, pehïtarora peico curi.

"Perorivete catu pe acoi ava cüritei oyaseho vahe. Esepia niha, peviharetera coipe peico.

22 "Perorivete catu pe acoi ava pe amotarêhise, pe mboyepepiñose avei oyesui yuvireco, ñehe-ñehe tैसे yuvireco pëu pe amotarêhisave, iyavei acoi viroïrose pe rer mbahe tõi pipe che, Ava Riquehïr, recocuer sui tõi yuvireco.

23 Peyembovïhaño iyavei perorivete catuñora ahe ari pipe peico. Esepia niha, ipare peipisira porerecosa tuvichá vahe ivave. Êgüe ehi tupri avei evocoi ava ramoï aracahendar mara-mara tõi Tüpa ñehe mombehusar sereco yuvireco" ehi.

24 "¡Peparaisu catu rumo cüritei mbahe yar peico vahe! ¡Esepia niha, pemboavïye pe rorivetesa peico!

25 "¡Peparaisu catu acoi pe ihïtaro vahe cüritei! ¡Esepia niha, ndaperiepoi chira peico coipe!

"¡Peparaisu catu acoi peviha vahe pe pietase cüritei! ¡Esepia, peyasehora pe viharêhisa pipe peico coipe!

26 "¡Peparaisu catu acoi peipisi vahe pe mboeteisa opacatu co ivi pipendar ava tõi sui! ¡Esepia niha, êgüe ehi tupri tamoi Tüpa ñehe mombehusar angahu tõi vahe upe yuvireco aracahe!" ehi.

Iyacatu yasaisu yande amotarêhimbar

27 "Pe che ñehe rese peyapisaca vahe upe rumo aipo ahe: Pesaisu ava pe amotarêhimbar; peyapo tupri mbahe aviye vahe ava nape ambotai vahe upe.

28 Peporandu Tüpa porovasasa rese ava pëu ñehe-ñehe tõi vahe upe nara; peyerure Tüpa upe pëu mbahe tõi oyapo vahe recocuer rese.

29 Acoi que pe amotarêhimbar pe rovapetese, co cotindar avei pemoporêhïñora chupe. Iyavei acoi que ava virocuaño tैसे pe yeasosa pe sui, toviraso avei pe yemondesa güemimbotar rupi" ehi.

30 "Acoi oporanduse que pe mbahe rese yuvireco pëu, pemondoño avei chupe. Iyavei acoi que ava virocuaño tैसे pe mbahe pe sui, ndapeporandui chira pëu imboyevi ägua rese.

31 Acoi mbahe peipota vahe ambuae ava oyapo vaherã pëu, ahe tupri avei peyapora chupe.

32 "Acoi ava pe raisupar güeraño pesaisu catu tैसे, ndipoi eté mbahe aviye vahe ipipe. Esepia niha, ava naporai vahe êgüe ehi yuvireco yepi.

33 Anise, acoi ava mbahe tupri ai oyapo vahe pëu, chupe güeraño mbahe tupri peyapose, ¿mbahe vo evocoyase oime aviye vahe ipipe? Esepia niha, ava angaipa viyar avei êgüe ehi yuvireco yepi.

34 Acoi pemondoño tēise mbahe ava upe ‘tomboyevī mbahe cheu’ pe hesave, ¿mbahe vo evocoiyase oime aviye vahe ipipe? Esepia niha, ava angaipa viyar ēgüe ehi avei yuvireco.

35 Pe rumo pesaisu catura ava pe amotarēhisar, peyapoñora mbahe aviye vahe chupe. Iyavei pemondoño itera mbahe chupe, ‘Tasāroño rane mbahe cheu imboyevī āgua vichico’ ndapeyei chietera. Ahese oimera porerecosa aviye catu vahe pēu. Pe evocoiyase Tūpa seco ivate catu vahe rahir peicora. Esepia niha, ahe aviye etepri vahe ava ‘aviye ndeu’ ndehi vahe upe iyavei ava yangaipa guasu vahe upe avei.

36 Pe peporoparaisuereco inungar pe Ru Tūpa oporoparaisuereco yepi’ ehi.

Ndiyai ambuae ava seroñrosa

37 “Ndiyai, ‘Oyavi ité mbahe’ peye voiño tēi ambuae ava upe. Evocoiyase Tūpa, ‘Oyavi mbahe’ ndehi chira pēu. Pemocañi uca tēi eme ambuae ava. Evocoiyase Tūpa ndape mocañi tēi chira. Peñeroño catu ambuae ava upe, ahese Tūpa iñero itera pēu.

38 Pemondose mbahe ava upe, evocoiyase Tūpa omondoño itera mbahe aviye vahe pēu inungar-ra omondo pe mbahe riru pipe pēu sāhambri tupri aviye vahe viña. Ēgüe ehira mbahe imondo pēu. Tūpa oicua tupri itera pēu inungar pe mbahe pemondo ambuae ava upe” ehi.

39 Ipare Jesús omombehu co ambuae porombohesa: “¿Oicatu pīha ñepe ndasesapiso vahe ambuae ndasesapiso vahe roguata? ¡Aní eté! Esepia, oyoya voi oviapira que ivicuar pipe yuvireco viña.

40 Ñepe yepe niha ava oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osupitira ombohesar” ehi.

41 “¿Mahera ambuae ava rembiavimi rese tēi pemahe? Iya rumo peyese rane mbahe tuvicha catu vahe pesepiara.

42 Ndiyai pēu, ‘Che toropitivi mbahe nde rembiavi rese’ peye vahe rā chupe. Esepia, pe peyavi guasu catu mbahe. ¡Pe Tūpa reroyasar angahu tēi peico vahe! Penose uca rane pe rembiavi tuvicha catu vahe peyesui, ahese ramo ambuae ava rembiavi tahimi vahe moingatu peicatura” ehi oporombohe.

Ava recocuer icuasa sembiapo rese

43-44 “Ivira aviye vahe icuasa iha rese. Esepia, ivira aviye vahe, iha aviye avei; ivira naporai vahe, iha naporai avei no. Supi eté ndipohosai ivira sāchi ati vahe sui higuera ha, iyavei ndahipohosai uva, yu pāhu sui.

45 Ēgüe ehi avei ava upe. Ava aviye vahe oyapo mbahe tupri. Esepia, ahe vireco mbahe tupri opīha pipe yepi. Iyavei acoi ava ndaseco pōrai vahe oyapo mbahe tēi. Esepia niha, ahe vireco mbahe tēi eté opīha pipe yepi. Esepia niha, pe pīha pipe sui tēi osē pe ñehe āgua” ehi.

Ava oyemoviracua vahe iyavei ndoyemoviracuai vahe Jesús reroyasave

46 “¿Mahera vo, ‘Che Yar, che Yar’ peye tēi peico cheu; ipare ndapeyapoi eté mbahe che remimombehu?

47 Amombehura rumo mbahe pēu uma nungar tupri ité acoi ava ou vahe cheu che ñehe rese oyapisaca vahe, iyavei oyapo ité vahe mbahe che remimombehu:

48 ahe inungar tupri ité acoi ava oyapo vahe güetara ita harive yepi. Yipindar rumo oyoho picucu rane ité ita harive imopuha āgua. Yepe ahe oi upe oyepota tēi ivitu ai, amarusu reseve oinupa pīrata tēi, nomboyerochai eté rumo. Esepia niha, vireco ité ovīracuasa.

49 Acoi ava che ñehengagüer rese ndoyapisacai vahe rumo, ahe ndoyavii acoi ava oyapo vahe güetara ivi cuhi harive tēi, ndovirecoi eté ovīracuasa. Ipare amar, ivitu ai reseve oinupa pīratá, opaño omonduru; ocañi tēi eté evocoiyase” ehi Jesús ava mbohe.

7

Jesús ombogüera chñivahe sundao rerecuar Roma iguar remimboacua

1 Jesús oñehepase ava upe oico, oso Capernaum ve.

2 Ahe tecua pīpe sundao rerecuar ndahei vahe judío secoi vireco vahe güemimboacua güembiaisu. Ahe imbaheasi guasu ité ou; omano pota ité.

3 Jesús rerācua anduse rumo, oyocuai moviro tēi omboripar judío imboetipri chupe iñehe āgua ‘toumi tēi che remimboacua mbogüera’ oyapave.

4 Ahe judío evocoiyase oyemboya Jesús rese yuvireco iyavei oporandu yuvireco chupe aipo ehi:

—Ore mboripar sundao rerecuar oipota nde ereyapomi tēira mbahe icatupri vahe chupe viña.

5 Esepia niha, ore raisu iyavei ahe teieté oyapo uca tūparo oreu nara —ehi yuvireco chupe.

6 Evocoiyase oso ahe yuvirecoi vahe rupi. Virovise rumo sēta yuvireco, ahese sundao rerecuar omondo ambuae omboripar chupe. Imboripar evocoiyase omombehu iñehe aipo ehi vahe: “ ‘Che Yar, ereyemañecoi rene. Esepia niha, ndiyai eté che rēta pīpe nde reique āgua.

7 Sese niha che teieté ndasoi nde reca. Nde ñehe pīpe tēi rumo che remimboacua erembogüerara.

8 Esepia, che avei niha areco che cuaita. Iyavei areco sundao che voya. Eso peve, ahese ñepeu upe, ahe evocoiyase oso voi eté; ambuae upe: Erio, ahese, ou voiño ité cheu. Ipare, Ereyapora co mbahe, ahese che rembiguai upe, ahe evocoiyase che reroyaño voi’ ehi ore mboripar” ehi Jesús upe yuvireco.

9 Aipo oyeupe hese Jesús, “¡Too!” ehi. Ipare aipo ehi vupindareta upe:

—Supi eté ndasepiai vahe ité co mbia che reroya tupri vahe nungar judío eta pñhuve —ehi.

10 Yuviroyevipase sundao rerecuar mboripar sētave yuvireco, aheve osepia evocoi semimboacua yuvireco ocuera tuprise.

Jesús ombogüerayevi cuña imer mano vahecuer membri cuimbahe

11 Ipare voi Jesús oso tecua Naín ve, iyavei semimbohe yuvirasoño ité supi ava rehii reseve avei no.

12 Virovise tecua oso, osepia tehögüer ava virocuase yuvireco ñoti āgua. Ahe cuña imer mano vahecuer membri ñepeu vahe ité viña. Tecua pīpendar setá iteanga ava yuviraso supi.

13 Cuña repiase rumo, oiparaisuereco. Ipare aipo ehi chupe:

—Ereyaseho eme —ehi.

14 Evocoiyase oyemboya oso, opoco tehögüer riru rese. Sese ovosii vahe evocoiyase viropitaño yuvireco chupe. Ipare aipo ehi tehögüer upe:

—Mbia chñivahe, che aipo ahe ndeu: ¡Eñarapuha! —ehi.

15 Evocoiyase omano vahecuer oñarapuha oī iyavei oñehe no. Ichui Jesús omondo ichi upe.

16 Opacatu tupri ité ava oyembosiquiye sepiase yuvireco:

—Cūrítei oyemboyecua Tūpa ñehe mombehisar seco ivate vahe yande pñhuve cute —ehi yuvireco.

Iyavei,

—Tūpa niha ou güecua p̄itivii āgua oico —ehi avei yuvireco.

¹⁷ Ipare co Jesús rerācua yandusa opacatu Judea rupi, yivirindar rupi avei no.

Juan Oporoāpiramo vahe omondo vupindar Jesús recocuer cua uca āgua

¹⁸ Juan avei oyandu opacatu co mbahe oico. Esepia niha, supindareta omombehupa co mbahe yuvireco chupe.

¹⁹ Evocoyase omondo ñuvirío vupindar Jesús upe mbahe rese porandu āgua ‘¿nde ité vo Tūpa Rembiporavo aipo sārombri ereico, anise oime tie ambuae orosāro vahe?’ oyapave.

²⁰ Evocoyase oyepota yuviraso Jesús upe aipo ehi yuvireco chupe:

—Juan Oporoāpiramo vahe ore mbou ndeu co mbahe rese porandu āgua: ¿Nde ité vo Tūpa Rembiporavo ereico imombehupri ereyu vahe, anise ambuae p̄iha orosārora oroico? —ehi yuvireco chupe.

²¹ Ahe ari p̄ipeve voi Jesús ombogüera setá ava imbaherasisa sui oico, ava carugar rerecosar sui avei no. Iyavei ava ndasesap̄iso i vahe setá ombogüera.

²² Ahe se ramo aipo ehi chupe cute:

—Peso, pemombehupa Juan upe mbahe pe rembiepia iyavei pesendu vahe: “Ndasesap̄iso i vahe osareco tupri cūrítei yuvireco, ip̄ari-p̄ari vahe oguata tupri, iyavei lepra rerecosar ocuerapa tupri, ndayap̄isai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehupa p̄isirosa resendar ñehesa” peyera chupe.

²³ ¿Oviharetera acoi ava oyeroyāño vahe che rese! —ehi Juan rupindar upe.

²⁴ Juan rupindar yuviraso pare, Jesús omboip̄i imombehu ava upe Juan recocuer: “¿Pesepiase Juan recocuer ava porēhisave, capihiata ivitu ombovambova vahe nungar p̄iha?”

²⁵ Anise, ¿pesepia tie iturucuar porañete ai vahe iyemboeteise? Ēgüe ehi vahe rumo secoi mborerucar guasu guap̄isave yepi.

²⁶ ¿‘Mara ehi secocuer’ peye vo chupe? ¿Tūpa ñehhe mombehusar ité p̄iha? Ahe ité, iyavei evocoi niha ivate catu vahe Tūpa ñehhe mombehusar sui.

²⁷ Ahe chupe ité Tūpa icuachiap̄ri arachendar p̄ipe aipo ehi: ‘Amondora che ñehhe mombehusar nde renondeve nde raperā moingatu āgua’ ehi.

²⁸ Aracahe suive ndipoi eté ivate catu vahe Juan sui. Yepe ahe ivate catu vahe viña, Tūpa mborerucasave rumo ava seco mbegüemi catu vahe ivate catu ichui.

²⁹ “Co ñehhe renduse opacatu ava, opacatu guarepochi reroquasar yuvirecoi vahe avei oñeapiramo uca vahecuer Juan upe yuvireco: ‘Supi eté Tūpa aviye vahe ité’ ehi eté yuvireco cute.

³⁰ Fariseo eta rumo iyavei Moisés porocuita rese oporombohe vahe ahe noñeapiramo uca potai vahe Juan upe yuvireco, ahe v̄iroñroño Tūpa remimbotar oyeupendar yuvireco.

³¹ “¿Mbahe rese p̄iha amboyoyara ava recocuer cūríteindar? ¿Mara ehi p̄iha secocuer?”

³² Ahe inungar ch̄ihivahe iguayi t̄ei vahe ocar rupi. Ipare oñehhe pucu-pucu omboripar upe yuvireco aipo ehi: ‘Oromoñehhe t̄ei mimb̄i p̄eu, ndapep̄ivoi eté rumo; iyavei orosapuca i t̄ei sapucaisa viharēhisa resendar p̄eu, ndapeyasehoi avei’ ehi.

³³ Esepia, ou Juan Oporoāpiramo vahe oico. Ahe ndohui vahe pan iyavei ndohui vahe uva ricuer. Pe evocoyase, ‘Co mbia carugar vireco vahe’ peye tupri t̄ei chupe no.

³⁴ Coiye che ayu, Ava Riquehir, acaru iyavei aihu tupri avei. Ipape, ‘Co mbia icaru guasu ai vahe secoi, iihu guasu ai vahe avei no’ peye cheu; ‘Ava angaipa viyar mboripar tēi iyavei ava guarepochi rerocuasar mboripar tēi’ peye avei cheu.

³⁵ Ava Tūpa mbahecuasa vireco vahe rumo icuasara sembiapo rese” ehi.

Fariseo Simón serer vahe rētave Jesús secoi

³⁶ Fariseo Simón serer vahe oñehe Jesús upe: “Terecarumi che piri” ehi. Jesús evocoyase oso sētave oguapi oi mesave.

³⁷ Ahese cuña angaipa viyar evocoi tecua pendar secoi vahe oyandu ichose Simón rētave icaru āgua. Sese viroyepota aheve mbahe siacua vahe siru pipe seraso sepirusu vahe chupe.

³⁸ Aheve oyashó ite oñenopiha Jesús pive iyavei güesai pipe opa tupri omoaqui ipi. Ipape opaño omombiru oha apri pipe ichui, iyavei oipirupite, oipiyere avei mbahe siacua vahe ipi rese.

³⁹ Sepiase fariseo, ipihañemoñeta tēi: “Co mbia Tūpa ñehe mombehusar itese, oicuaño itera co cuña opoco vahe oyese ndipihai vahe viña” ehi tēi fariseo chupe.

⁴⁰ Evocoyase aipo ehi fariseo upe:

—Simón, amombehu potami mbahe ndeu —ehi.

—Aviye Porombohesar, emombehu ru cheu —ehi.

⁴¹ Evocoyase Jesús aipo ehi chupe:

—Ñuvirio mbia oime virocua guarepochi mbia guarepochi mondosar sui yuvireco. Ñepe virocua guarepochi quiniento tupri mboraviqui repirā ichui. Ambuae evocoyase cincuenta rupive virocua.

⁴² Ipape ndoicatu irise ité imboyevi āgua yuvireco chupe, evocoi mbia guarepochi mondosar iñeroño chupe yuvireco —ehi—. Esāha, emombehu cheu, ¿uma evocoyase osaisu catura mbia guarepochi mondosar? —ehi fariseo upe.

⁴³ —Cheu ndoyavi guarepochi virocua catu vahe ichui —ehi Simón.

—Taa, supí eté aipo ere —ehi Simón upe.

⁴⁴ Evocoyase omahe cuña rese aipo ehi Simón upe:

—¡Emahe co cuña rese! Aiquese acoi nde rēta pipe, nde nderembouimi eté i che pisei āgua cheu; co cuña rumo güesai pipe oyosei che pi. Ipape omombiru oha apri pipe ae no.

⁴⁵ Iyavei nde ndache rovarupitei eve; co cuña rumo, acoi nde rēta pipe che reique ramomiseve che pirupite voi eté.

⁴⁶ “Nde nderemondo mbahe siacua vahe che āca rese; co cuña rumo opa tupri voi oipichi mbahe siacua vahe che pi rese.

⁴⁷ Sese co cuña opa oipisi ñerosa oangaipa guasu rese. Esepia, che raisú iteanga. Acoi ava upe nañerosa tupri vahe rumo, ahe ndoporoaisu tupri avei” ehi.

⁴⁸ Ahese aipo ehi cuña upe:

—Oime nde angaipa upe ñerosa ndeu —ehi.

⁴⁹ Evocoyase ambuae ava ichohopri oguapi vahe yuvinoi aheve, ahe aipo ehi oyeupe yuvireco:

—¡Uma pīha co mbia iñero vahe ité angaipa upe! —ehi.

⁵⁰ Jesús rumo aipo ehiño cuña upe:

—Nde yeroyasa pipe ereipisi písirosa. Sese eso tupriño eico —ehi.

8

Cuña oipitívii vahe Jesús yuvireco

¹ Ipare Jesús oguata opacatu tecua rupi, omombehu ñehesa aviye vahe Tūpa mborerecuasa resendar oico. Doce vahe apóstol supive yuvirecoi.

² Cuña avei yuvirasu supi, ahe ombogüera vahecuer carugar rerecoa sui imbaherasisa sui avei no. Ahe ipāhuve avei María secoi, Magdalena serer yoapisa vahe, ahe ichui osē vahecuer siete tupri carugar;

³ iyavei Juana Cuza rembireco, ahe mbia Herodes mbahe rese ñangarecuar; Susana iyavei ambuae setá cuña oipitívii mbahe güembireco pipe yuvireco.

Yembohesa mbahe miti rese tecocuer mboyoyasa

⁴ Setá ava yuvinose tecua yacatu rupi pipe sui Jesús repia āgua yuvireco. Ipare oñemonuha guasuse yuvireco, ahese Jesús setá mbahe rese omboyoyaya oporombohe aipo ehi:

⁵ “Ñepe mbia osē omaheti oico. Ahe otiapi-apise mbahe rāhii oso, moviro oiti peri rupi. Ahe opa tēi oicambe yuvireco, iyavei vīrai opa tēi yuvirohu.

⁶ Iyavei moviro tēi oiti ivi nayanai vahesave ita pāhuve. Sese cūrítei sorí; opaño rumo ipiru. Esepia niha, ivi nañaquii chupe.

⁷ Iyavei ambuae oiti yu pāhuve. Ipare oyoya tupri sorí yuvireco; yu rumo opaño oyopi.

⁸ Ambuae rumo oiti ivi aviye vahesave. Ipare sorise, iha vai eté yuvireco; ahe iha retacuer amove cien tupri ité ñepe-peí mbahe miti sui osē” ehi.

Aipo ohe pare, Jesús oñehe pīratá iteanga aipo ehi: “¡Acoi ava osenducua pota vahe che ñehe, toyapisacaño sese!” ehi ava rehii upe.

¿Mahera pīha co yembohesa imboyoyasa ambuae mbahe rese?

⁹ Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi.

¹⁰ Evocoiyase omboveyi chupe: “Pēu Tūpa oicua uca ité mbahe ndicuasai vahe omborerecuasa resendar; ambuae ava rumo ambohe tēi ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvireco’ viya” ehi.

Jesús omombehu tupri yembohesa mbahe tisa resendar

¹¹ “Co yembohesa resendar aipo oyapave aipo ehi: Mbahe rāhii ahe inungar Tūpa Ñehengagüer;

¹² iyavei mbahe rāhii peri rupi seitipri, ahe inungar acoi ava osendu tēi vahe Tūpa Ñehengagüer yuvireco oyapave. Ipare rumo o vīrai chupe, ahe inungar carugar o vahe chupe opaño oyaracua mocañi Tūpa Ñehengagüer sui ‘toviroya eme iyavei toñepisiro eme yuvireco’ oyapave tēi.

¹³ Acoi mbahe rāhii seitipri ita mahugüer rupi, ahe inungar acoi ava osendu tēi vahe Tūpa Ñehengagüer yuvireco iyavei oipisi tupri oviharetasa pipe yuvireco viña no. Ahe rumo inungar co mbahe miti ndovirecoi vahe guapo ovīracua āgua; viroya raimi tēi yuvireco. Oyepotase rumo mbahe tēi chupe, oyepipi voiño yuvireco ichui.

¹⁴ Acoi mbahe rāhii seitipri yu pāhu rupi, ahe inungar acoi osendu tēi vahe. Ipare rumo oyemboyepi uca mbegüefio ambuae mbahe rese opihañemoñetá iteangasa pipe tēi, ombahe eta rese iyavei güemimbotarai mbahe tēi potasa pipe avei. Ēgüe ehi ahe ava inungar mbahe miti ndihai vahe ité.

15 Acoi mbahe rāhii seitipri rumo ivi aviye vahesave, ahe inungar ava vireco vahe opihañemoñetasa aviye vahe iyavei oyemoingatu voi Tūpa Ñehengagüer rese oyapisaca āgua yepi; viroya tupri ité no; yuvirecoiño ité sese. Ēgüe ehise, oyapo mbahe aviye vahe yuvireco” ehi.

Yembohesa tataendi resendar

16 “Ndiyai eté ava upe guataendi omoendise omoha vahe que mbahe pipe, “Tamondo che rupavrive” ndehi eté chupe; osupiño ivate imoi opacatu oi pipe yuviroique vahe resape āgua.

17 Esepia, ndipoi eté mbahe ñomipri, ndayasepiai vahe rā curi. Iyavei yaposa vahe imombehupirēhi, icuasaño itera curi.

18 “Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroya oyese, ichui serocusaño itera” ehi oporombohe.

Jesús si, tivireta avei

19 Ichui Jesús si iyavei tivireta oyepota secosave yuviraso. Ndiyai eté rumo chupe yuviraso vahe rā yuvireco ava rehii sui.

20 Oime rumo ambuae ava imombehusar chupe,

—Nde si, nde rivireta reseve nde repia pota tēi ocarve yuvireco —ehi chupe.

21 Ahe rumo aipo ehi chupe:

—Acoi ava osendu vahe che Ru Ñehengagüer yuvireco, viroya tupri vahe avei, ahe che si, che rivri yuvirecoi —ehiño Jesús chupe.

Jesús omombituhu i ohitu vahe, ivitu ai reseve

22 Ñepe arí Jesús oha carite pipe güemimbohe eta reseve. Ipare aipo ehi:

—Yaso peve ipa rovai —ehi.

Evocoyase ahe yuviraso.

23 Yuviroguata viteseve, oqueño Jesús ou. Ahese ipa pipe aviyeteramo tēi ivitu ai omboha guasu-guas carite pipe i, omondo pota ité ipive viña.

24 Evocoyase semimbohe yuviraso imomba aipo ehi chupe:

—¡Pporombohesar! ¡Pporombohesar! ¡Yande rerasora moco carite ipive! —ehi yuvireco.

Ahese omahe. Ipare oñehe pīrata ivitu ai upe iyavei i ohitu vahe upe: “¡Pepituhu!” ehi. Aheseve voi opituhu tupri.

25 Evocoyase aipo ehi güemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyeño, ndoyembovihaiño iyavei oporandu-randu tēi oyeupe yuvireco:

—¡Mara ehi vahe pīha co mbia! Esepia niha, ivitu ai, para guasu avei omboyeroya —ehi tēi oyeupe yuvireco.

Mbia Gerasa iguar vireco vahe carugar oyese

26 Coiye oyepota yuviraso Gerasa ivi rese cute, ahe ambuae ipa coti ivi Galilea rovai.

27-29 Aheve mbia tecua iguar carugar vireco vahe secoi. Aracahe suive nani tupri ité secoi iyavei ndopitai vahe ité oi pipe yepi; ēgüe ehi rumo ahe tehōgüer ruvipa rupindar tēi secoi. Setá rupi carugar ombohe ité sereco yepi. Yepe ava oipocuhacua-acua carena pipe sereco, ipi rupi avei no ‘toviraso iri eme carugar’ oyapave yuvireco chupe viña, ahe rumo ombosando-sandoño ité iyavei carugar omoñemi ucaño ava porēhisa rupi sereco. Evocoyase Jesús osēse carite pipe sui, osovaichi ahe mbia. Sepiase rumo, ahe mbia oñenopiha voi oso sovai oñehe pīrata chupe:

—¡Eyepipi che sui, Jesús, Tũpa seco ivate catu vahe Rahir! ¡Che mombaraisui rene eve! —ehi. Esepia, Jesús opa oyocuai caruguar sereco ‘tosẽ ichui’ oyapave.

³⁰—¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri caruguar yuviroique yaviterve.

³¹⁻³² Oimese rumo cuchi setá ocaru vahe ivitri ruambesave, caruguar evocoyase oporandu chupe aipo ehi: “Toroiqueñomi tẽi co cuchi aviterve” ehi yuvireco chupe ‘tayande mondo eme cañi tẽisa apirẽhi vahe pipe’ oyapave viña. “Peiqueño sese” ehi caruguar upe.

³³ Ahese opa yuvinose mbia sui yuviroique cuchi aviterve cute. Aheseve voi cuchi opa yuvinoña yuviraso ivivate sui ipa pipe. Aheve ipive opa tẽi eté ocañi yuvireco.

³⁴ Cuchi rãrosar osepiase ahe mbahe yuvireco, opa yuvinoña yuviraso co mbahe mombehu tecua pipe ava upe, cove rupi avei no.

³⁵ Ipare setá ava yugũeru aipo mbahe oime vahecuer repia. Oyepotase rumo secosave yuviraso, aheve osepia ahe mbia caruguar rerecosarer oguapi oĩ ñipiimi, oyemonde tupri, yãracua tupri avei oico. Ahese oyembosiquye tẽi yuvireco.

³⁶ Acoi ava osepia vahecuer, ahe opa mbahe omombehu yuvireco co mbia caruguar rerecosar cuera agũer.

³⁷ Ahese opacatu ava Gerasa pendar, yivirindar avei Jesús upe, “Esiri cohave sui” ehi yuvireco. Esepia niha, osiquiyé iteanga yuvireco ichui. Evocoyase oha carite pipe. Ipare osoño.

³⁸ Yipindar rumo evocoi mbia caruguar vireco vahecuer, “Tasomi tẽi nde rupi” ehi viña. Ahe rumo, “Epitaño” ehi.

³⁹—Eyevi nde rõtave, emombehupa opacatu mbahe Tũpa oyapo vahecuer nde rese —ehi.

Ahe mbia evocoyase oso opacatu tecua rupi, Jesús oyeupe mbahe apo agũer mombehu.

Jesús ombogũera Jairo rayri iyavei cuña iturucuar rese opoco vahe

⁴⁰ Oyevise Jesús ipa rovai oso, aheve ava rehii oviharetasa pipe oipisi tupri yuvireco. Esepia niha, ava opacatu ité osãro yuvireco.

⁴¹ Ahese Jairo serer vahe oyepota oso Jesús upe, evocoi judío tũparo rese yangarecuar secoi vahe. Ahe mbia oñenopiha sovai oso, oporandu chupe ‘tosomi tẽi che rõtave che rayri mbogũera’ oyapave.

⁴² Esepia niha, vireco guayri ñepeiimi vahe ité, doce araviter vireco vahe. Ahe omano potami eté ou.

Osose Jairo rõtave, aheve peri rupi ava rehii yuvirasofno supi; oyemboti tupri ité yuvireco.

⁴³ Ahe ipãhu rupi oime cuña doce araviter rupi suvi yepiyere-yere vahe. Opa-opa tẽi omondo ombahe ocuera água repirã yepi; ndocueraí eté rumo.

⁴⁴ Ahe cuña evocoyase oyemboya oso saquicuei coti opoco iturucuar popi rese. Ipare ahe pipeve voi opituhu suvi ichui.

⁴⁵ Evocoyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoyase aipo ehi chupe:

—Porombohesar, ava rehii mo oyemboya nde rese iyavei nde moañi-añii yuvireco opacatu rupi —ehi.

46 —Che rumo aicua oime ava opoco vahe che turucuar rese. Esepia, ayandu che pīratasa osēse che sui —ehi Pedro upe.

47 Ahe cuña ndoicatuī oñemi. Sese oririī oñenopiha sovai. Oyemombehu chupe opacatu ava rovaque: “Che apoco nde turucuar rese. Esepia, ‘Acuera tuprira apocose iturucuar rese’ ahe ndeu” ehi.

48 Ahese aipo ehi cuña upe:

—Che rayri, erecuera tupri ité. Esepia niha, che rese ereyeroya ité. Sese eso tupriño —ehi cuña upe.

49 Jesús ñehe viteseve, ahese oyepota aheve mbia Jairo rēta sui aipo ehi Jairo upe oso:

—Omano nde rayri cute. Eremañeco tēi iri rene Porombohesar —ehiño Jairo upe.

50 Evocoyase iñehe renduse aipo ehi Jairo upe:

—Aní eresiquiye; nde che rese yeroyasa pipe ité nde rayri ocuerayevira —ehi.

51 Oyepotase Jairo rētave oso, aheve ndomoiñgue uca potai eté ava oyeupi. Pedro, Santiago, Juan iyavei cuñatai yesupa upeño oipota seique āgua.

52 Aheseve opacatu ava oyaseho ati, ndoyembovihal tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

53 Ava rumo opuca ete-eteño seroyaēhisave yuvireco. Esepia niha, ahe oicua ité imanose yuvireco viña.

54 Evocoyase oipopisi cuñatai. Ipare aipo ehi chupe:

—¡Cuñatai, eñarapuha! —ehi.

55 Ahe evocoyase oñarapuha voi eté ocuerayevi. Ipare Jesús, “Pembocaru” ehi iyepota upe.

56 Iyesupa evocoyase, “¿Mara ehi rutei pīha co?” ehi tēi yuvireco chupe. Jesús rumo omombehu chupe: “Ndapemombehui chietera que ñepeī ava upe” ehi.

9

Jesús doce güemimbohe omondo Vu Tūpa mborerecuasa resendar mombehu āgua

1 Jesús opa omonuha güemimbohe doce vahe oyeupe. Ipare omondo opīratasa opacatu upe carugar ambuae-ae tēi vahe imboyepepi āgua ava sui iyavei ava mbogüera āgua imbahehasisa sui.

2 Opa omondo Vu Tūpa mborerecuasa resendar mombehu āgua, ava imbahehasi vahe mbogüera āgua avei.

3 Yipindar rumo aipo ehi chupe:

—Ndaperasoi chira mbahe pe guatasa rupi: que mbococa, mbahe riru, tembiñu, que guarepochi avei no. Perasora rumo ñepeī güeraño pe turucuar; ndahei chira ñuviriño peraso.

4 Pepitami ranera ñepeī oi pipe güeraño tecua yacatu peico.

5 Acoi ava ndape moingue uca potaise güeta pipe yuvireco, peyepipiñora ichui iyavei peipipetera pe pi sui ivi cuhi ‘toicua Tūpa ñemoirosa oyeupendar yuvireco’ pe hesave —ehi güemimbohe eta mondo.

6 Evocoyase opa yuvinose yuviraso, iyavei oñemosai opacatu tecua rupi omombehu Tūpa Ñhengagüer pīsirosa resendar yuvireco iyavei ombogüera-güera ité ava imbahehasisa sui opacatu oguatasa rupi yuvireco.

Herodes, “¿Mara ehi pīha?” ehi Jesús upe

⁷ Co mborerecuar guasu Herodes oyandu opacatu mbahe Jesús rembiapo. Evocoiyase, “¿Mara ahera pîha?” ehi tēi. Esepia niha, aipo, “Juan ocuerayevi” ehi yuvireco chupe.

⁸ Ambuae aipo ehi: “Tūpa ñehe mombehusar Elías, ahe tēi oñemoporēhi iri” ehi yuvireco. Ambuae aipo ehi: “Que ñepeí Tūpa ñehe mombehusar arachendar revo, ahe tēi ocuerayevi” ehi yuvireco viña.

⁹ Herodes rumo aipo ehi:

—Che niha ayasia uca Juan ãca —ehi—. ¿Uma rerãcua pîha evocoiyase ayandu? —ehi tēi.

Sese Herodes osepia pota ité Jesús.

Jesús oyopoi cinco mil cuimbahe

¹⁰ Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepipi ava rehii sui, viraso ivi iporupirēhisave tecua Betsaida cofive.

¹¹ Ahe ava rehii rumo oyanduse yuvireco, yuvirasño saquicuei. Evo-coiyase, “Perioño” ehi chupe. Ipare oñehe Vu Tūpa mborerecuasa rese ava upe iyavei ombogüerapa ava imbaherasisa sui.

¹² Caharuse co doce semimbohe oyemboya yuvireco sese aipo ehi chupe: —¿Ndiyai vo eremondopa ava, topituhu yuvireco iyavei toseca mbahe güemihura tecua-tecuami cōi vahesa rupi? Esepia niha, cohave ndipoi eté mbahe —ehi yuvireco chupe.

¹³ Ahe rumo aipo ehi güemimbohe eta upe:

—Pe pemondora mbahe semihura yuvireco —ehi.

Semimbohe aipo ehi yuvireco chupe:

—Poyandepomi tēi rumo pan orovireco, ñuviriomi tēi avei pira, toroso ayase co ava opacatu remihura rerocua —ehi yuvireco chupe.

¹⁴ Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi —ehiño.

¹⁵ Ëgüe ehi semimbohe yuvireco chupe. Ipare oguapi opacatu ava yuvireco.

¹⁶ Evocoiyase oipisi poyandepo pan iyavei ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe imondo ãgua yuvireco.

¹⁷ Evocoiyase opacatu ava ocaru vahe ihitaropa tēi yuvireco. Ipare semim-bohe omboapipopa doce tupri iruova sembihu rumbirer yuvireco.

Pedro, “Jesús, Tūpa Rembiporavo Poropisirosar secoi” ehi

¹⁸ Ñepeí ari pipe Jesús oyoerqui ahe ae güemimbohe pãhuve. Ahese oporandu güemimbohe upe:

—¿Mara ehi vo ava oñehe yuvireco che rese? —ehi.

¹⁹ —Amove ava, “Juan Oporoãpiramo vahe” ehi yuvireco ndeu; ambuae, “Elías” ehi yuvireco ndeu, iyavei ambuae, “Aviyeteramo que ambuae Tūpa ñehe mombehusar arachendar ocuerayevi” ehi yuvireco ndeu —ehi.

²⁰ Evocoiyase oporandu güemimbohe upe:

—Pe no, ¿“Ava co secoi” peye ru pe cheu no? —ehi.

—Nde niha Tūpa Rembiporavo Poropisirosar ereico —ehi Pedro imboyeve chupe.

Jesús omombehu omano ãgua

²¹ Ahe rumo aipo ehi güemimbohe eta upe: “Pemombehui rene Tūpa Rembiporavo che recosa ava upe” ehi.

²² Iyavei aipo ehi chupe:

—Che, Ava Riquehir, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuaita rese oporombohe vahe remiamotarēhi aicora. Ahe avei che yuca ucara yuvireco; mbosapí ari rupi rumo acuerayevira —ehi.

²³ Ipare aipo ehi opacatu upe:

—Acoi uguata potá vahe che rupi, topoi mbahe güemimbotar tēi aposa sui iyavei inungar-ra curusu rese ovosiira viña, toyemoingatu voi che recocuer rese oparaisu água ari yacatu rupi iyavei toguata tupri che rupi.

²⁴ Esepia, acoi ava güetecuer tēi raisupar ocañi tēi itera; acoi ava omocañi tēi vahe rumo güetecuer che recocuer rese, ahe oñepisirora.

²⁵ Esepia, ¿aviye ai angahu piña ava upe opacatu mbahe co ivi pipendar pisi água tēi, ahe ae tēi omocañise güecocuer yuvireco viña?

²⁶ Esepia, acoi ava yuvinochi ai vahe che sui iyavei che ñehengagüer sui avei no, che avei, Ava Riquehir, ēgüe ahera ichui acoi ayevise che reco pīratasa pipe, che Ru reco pīrata porañetesa pipe avei sembiguai rehi iva pendar maranehi reseve curi.

²⁷ Supi eté, oimera amove cohava ava nomano vīte chivaherā, osepia rane itera ouse Tūpa mborerecuasa yuvireco curi —ehi.

Jesús ñecuñaro agüer

²⁸ Ocho ari pare Jesús oyeupi ivitri rese oso oyerure água. Pedro, Santiago iyavei Juan ahe vīraso oyeupi.

²⁹ Oyerure vīteveve, oñecuñaro sepiaca. Iturucuar evocoyase sendi, morochí eteanga.

³⁰ Ahese ñuvirío ava oyemboyecua yivii imoñeta yuvinocha. Evocoi ava yuvirecoi vahe ahe Moisés, Elías avei.

³¹ Oyere tupri sendigüer iporañetesa yuvireco sese, iyavei co ñuvirío mbia oñehe imano água rese yuvireco chupe: “Nde niha ereyemomborarara nde mano água Jerusalén pipe eico” ehi yuvireco chupe.

³² Yepe Pedro, ondugüer reseve sopesii eteanga yuvireco viña. Aviyeteramo tēi opa sopesii yuvireco ichui. Ahese osepia Jesús porañetesa yuvireco iyavei co ñuvirío mbia yuvinocha vahe yivii no.

³³ Evocoi mbia oyepepise ichui yuvireco, ahese Pedro aipo ehi chupe:

—Ore mbohesar, javiye ai eté cohava yaico! Toroyapo mbosapí teyupami: ñepei ndeu nara, ambuae Moisés upe, ambuae evocoyase Elías upe nara —ehi.

Pedro rumo ndoicuai eté aipo ohesa.

³⁴ Iyavei iñehe vīteveve, aviyeteramo tēi iporēhi iva quiha, oyopipa tupri ité. Evocoyase osiquiye tēi yuvireco.

³⁵ Ipāhuve oyeendu ñehesa aipo ehi vahe: “Co che Rahir, che Rembiporavo ité; peyapisaca catu iñehe rese” ehi.

³⁶ Opase osendu co ñehesa yuvireco, ahese osepia Jesús, ahe ae ihāise yuvireco. Semimbohe rumo oyeupe tēi ovireco yuvireco; ndomombehu vīte eté ava upe mbahe osepia vahecuer yuvireco.

Jesús ombogüera chíhivahe caruguar rerecosar

³⁷ Ahere ayihive, ogüeyise ivitri sui yuvireco, setá ava oyugüeru Jesús rovaichi yuvireco.

³⁸ Ahese mbia ava pāhuve aipo ehi pīrata voi eté:

—Porombohesar, ereyapomira mbahe icatupri vahe cheu viña. Esepia, che rahir ñepeimí vahe ité;

³⁹ carugar rumo opoco sese, omoase pucu-pucu uca yepi iyavei omoeōha-ōha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui.

⁴⁰ Amombehu tēi niha nde remimbohe upe ‘tomboyepipimi tēi carugar ichui’ che yapave viña; nomboyepipi eté rumo ichui yuvireco —ehi.

⁴¹ Ahe omboyevi:

—¡Too, ndapeyeroya tupri vitei eté che rese, co coti tēi vite pe pihañemoñetasa! ¿Mbovi rupi rutei vo aico vitera pe pāhuve che ñemosasa pipe? Eru nde rahir cohave cheu —ehi ahe mbia upe.

⁴² Chīhivahe oyemboyase rumo sese, carugar omboviapi voi imondo ivive, imoeōha iri. Jesús rumo oñehe pīrata carugar upe imose āgua chīhivahe sui. Ahe se chīhivahe ocuera tupri ité. Ipare omboyevi tu upe.

⁴³ Ahese opacatu ava, “¡Mara ehi rutei!” ehi tēi yuvireco Tūpa pīratasa rembiapo aviye vahe repiase.

Jesús omombehu iri omano āgua

Opacatu ava ndoyembovi hai vitesese yuvireco, ahese aipo ehi güemimbohe upe:

⁴⁴ —Pesendu tupri che ñehe; peresarai eme ichui: che, Ava Riquehir, imondopri aicora che amotarēhimbar povrive —ehi.

⁴⁵ Semimbohe rumo ndosenducuai eté oyeupe ñehesa yuvireco. Esepia niha, Tūpa ndoipotai eté senducua āgua chupe; osiquiye chupe oporandu āgua yuvireco yepi.

¿Ava vo seco ivate catu vahe?

⁴⁶ Coiye semimbohe eta omboipi oyeecopi-copi yuvireco ‘¿ava ité piha ivate catu vahe rā curi?’ oyapave.

⁴⁷ Jesús rumo oicuaño ipihañemoñetasa yuvireco. Evocoyase oipisi chīhivahemi seru oipive imoha.

⁴⁸ Ipare aipo ehi güemimbohe eta upe:

—Acoi ava oipisi vahe co chīhivahemi nungar che rer pipe sereco, che ité che pisi yuvireco; iyavei acoi ava che pisi vahe, oipisi aveira che mbousar. Esepia, acoi ava seco mbegüemi catu vahe pe pāhu pendar, ahe aviye catu vahe —ehi.

Acoi yande mboyoyasar; ahe ndahei yande amotarēhisar

⁴⁹ Evocoyase Juan aipo ehi chupe:

—Ore mbohesar, orosepia niha mbia ombogüera vahe carugar pīratasa sui ava nde rer pipe oico; ore rumo ndoroipotai chupe evocoyase seco āgua. Esepia niha, ndahei yande rupindar secoi —ehi.

⁵⁰ Jesús rumo,

—¡Aní ndapeipotai chupe! —ehi—. Esepia niha, evocoi nungar ava ndahei yande amotarēhisar; ahe rumo yande mboyoyasar —ehi güemimbohe eta upe.

Jesús oñehengata Santiago upe, Juan upe avei

⁵¹ Virovise rumo ari ivave Jesús so āgua, ahese ahe aipo ehi: “Yaso ru Jerusalén ve cūrtei” ehi.

⁵² Evocoyase omondo ava güenonera. Ahe yuviraso tecua Samaria ivi rupi ipituhu āgua moingatu viña;

⁵³ Samaria iguar rumo nomoingue potai eté güetave yuvireco. Esepia, oicua Jerusalén ve ichose yuvireco.

⁵⁴ Co mbahe naporai vahe repiase rumo, semimbohe Santiago iyavei Juan oporandu yuvireco chupe:

—Ore Yar, toromboumi tata iva sui co ava mocañi ãgua —ehi yuvireco chupe viña.

⁵⁵ “¡Aní!” ehi oyemboyere chupe.

⁵⁶ Ipare yuvirasó ambuae tecuave.

Oguata pota vahe Jesús rupi

⁵⁷ Yuvirasose peri rupi aipo ehi mbia Jesús upe:

—Che Yar, che nde rupi aso pota opacatu nde guatasa rupi —ehi.

⁵⁸ Ahe rumo aipo ehi:

—Aguara vireco güetara, vñrai avei vireco guaiti; che rumo, Ava Riquehir, ndarecoi que che rêta che pituhu ãgua —ehi chupe.

⁵⁹ Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatara nde rupi —ehi.

⁶⁰ —Aní —ehi—. Acoi omano vahe nungar ahe ae toñeñetiño yuvireco; nde rumo eso, emombehuño ñehesa Tüpa mborerecuasa resender ava upe —ehi.

⁶¹ Evocoyase ambuae aipo ehi chupe no:

—Che Yar, che aguata pota nde rupi; yipindar rumo aso ranera che rêtave mbahe moingatu che so ãgua —ehi.

⁶² —¡Aní! —ehi ahe mbia upe—. Esepia, inungar acoi oipisi vahe ivi mboyeresa imohivi tupri ãgua, omahese rumo guaquicuei coti, evocoi nungar naporai Tüpa mborerecuasave yuviroique vaherã —ehi.

10

Jesús oyocuai setenta y dos tupri güemimbohe

¹ Ipare yande Yar oiporavo setenta y dos ava ñepeipei tecua rupi ñuvirío-río güenonera.

² Yipindar rumo aipo ehi: “Supi eté mbahe imonuhapirã setá iteanga; sese oporaviqui vahe rumo moviromi tēi. Sese peporandu mbahe miti Yar upe, tombou ava imonuha ãgua” ehi.

³ “Peso, opomondo ovesami nungar ava mbahe mimba oñaro vahe nungar pãhuve.

⁴ Perasoí rene mbahe riru iyavei guarepochi siru reseve. Ndapemon-dugüei chiaveira pe pitaqui; iyavei aní pepita ‘avirave’ apo ava upe peri rupi.

⁵ Acoi peiquese que oi pipe, yipindar rumo peyapo ranera: ‘Avirave. Tüpa tape rovasa’ peyera.

⁶ Acoi aheve oimese ava aviye vahe, ahe oipisira Tüpa porovasasa; anise evocoyase ndipoi chira porovasasa chupe nara.

⁷ Acoi pe pisise, aheve ité pepitañora; pecarura iyavei peihura ahe sembiereco. Esepia, ava poraviquise imboepisa chupe. Sese ndapeguatai chira ambuae ava rêta rupi-rupi tēi. Ñepeí oi pipe güeraño pepitañora.

⁸ Acoi que tecuave peyepotase, ahe pendar pe repia potañose yuvireco, acoi ahe ombouse mbahe yuvireco tapehu, pehuñora ichui.

⁹ Ahe pendar imbaheasi vahe evocoyase pembogüerara, iyavei aipo peyera chupe: ‘Tüpa mborerecuasa namombriimi pe sui’ peyera.

¹⁰ Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera:

¹¹ ¡Co pe recua pipendar ivi chimborer oya vahe ore pi rese oroi pipete oreyesui, peicua catu, ore hesa pipe. Peicua tupri rumo Tüpa mborerecuasa namombriimi pe sui’ peyera chupe.

12 Supi eté acoi ari cañi oyepotase, oimera Tūpa ñemoirosa ahe tecua pendar upe ivate catu vahe ava tecua Sodoma pendar sui” ehi güemimbohe eta upe.

Opacatu tecua ndiporeroyai vahe

13 “¡Peparaisu ava tecua Corazín pendar, pe avei peparaisu tecua Betsaida pendar! Esepia, acoi poromondiisa pe pãhuve yapopri yaposara yipive tecua Tiro, Sidón ve viña, ahe tecua pendar aracaheve anga omondera turucuar viharêhisa resendar, tanimbu avei omondora oãca rese oangaipa mboasisa pipe yuvireco viña no.

14 Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pipe coiye.

15 Pe avei no tecua Capernaum pendar, ¡pemoha co ivave pe reco ãgua viñal ¡Pe mombosapara rumo ivicuar ipicucu catu vahesave!

16 “Acoi ava oyapisaca vahe pe ñehe rese yuvireco, ahe evocoyase oyapisaca avei che ñehe rese. Iyavei acoi ava pe mboyepipiño vahe oyesui, ahe evocoyase che avei che mboyepipi oyesui yuvireco. Acoi ava rumo che mboyepipiño vahe oyesui, ahe evocoyase che mbousar avei omboyepipiño oyesui” ehi güemimbohe upe.

Oyevipa iri ava setenta y dos vahe

17 Oyevipase ava setenta y dos vahe, oviharetessave aipo ehi yuvireco chupe:

—¡Ore Yar, caruguar avei eté niha ore mboyeroya etepri yuvireco nde rer pipe! —ehi.

18 Evocoyase aipo ehi güemimbohe eta upe:

—Taa, asepia ité niha caruguar rerecuar oviapise iva sui overa vahe nungar.

19 Che niha amondo pĩratasa pẽu peguata vaheerã mboi iyavei mbahe rumbiquĩape hari rupi opacatu pe amotarêhisar pĩratasa reroyi ãgua, que mbahe pe momaraêhi ãgua avei.

20 Peyemboviharetei rene carugareteta pe mboyeroyase. Iya rumo peyemboviha pe rer iva pendar icuachiapri rese —ehi güemimbohe eta upe.

Jesús oviharete

21 Che Ru pipeve voi Jesús, Espíritu Santo rese, voriveteseta pipe aipo ehi: “Che Ru, che oromboetei. Ndé niha iva Yar, ivi Yar avei no. Esepia niha, ereñomi co mbahe ava oyesui tẽi mbahe oicua vahe sui iyavei co ivi pipendar ava imbahecua vai vahe sui avei no. Eremboyecua rumo co mbahe ava ndoyembohe tupri vahe upe nde rese oyeroyase. Ahe niha ereipota ité, che Ru” ehi.

22 “Opacatu mbahe che Ru ombou cheu. Iyavei ndipoi ava che cua vahe tahir che recose; che Ru güeraño ité rumo che cua. Ndipoi avei che Ru oicua tupri vahe yuvireco no; che güeraño ité aicua. Iyavei acoi que ava upe aicua uca potase, aicua uca tupri aveira” ehi ava eta upe.

23 Evocoyase omahe güemimbohe eta rese, chupe güeraño aipo ehi: “Perorivete catu co mbahe pesepia vahe rese.

24 Esepia niha, setá etepri ava Tūpa ñehe mombehusar yuvirecoi vahe iyavei mborecuar guasu eta aracahendar osepia pota tẽi mbahe pe rembiepia; ndosepiaí eté rumo yuvireco. Osendu pota tẽi co pe remiendu yuvireco; ahe rumo ndosendií avei yuvireco” ehi güemimbohe upe.

Jesús porombohesa Samaria iguar recocuer sui

²⁵ Iyavei no Tūpa porocuita rese oporombohe vahe oso Jesús upe secoãha ãgua, mbahe rese oporandu:

—Porombohesar, ¿mara ahera vo vichico teco apirẽhi vahe rereco ãgua? —ehi chupe.

²⁶ Ahe omboyevi:

—¿Mara ehi vo Moisés porocuita icuachiapri pipe? ¿Mara ehi vo ereyeroquise ipipe? —ehi oporombohe vahe upe.

²⁷ Evocoyase oporombohe vahe omboyevi:

—“Eresaisura nde Yar Tūpa opacatu nde pihá pipe, opacatu nde recocuer pipe, opacatu nde pĩratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuita —ehi chupe.

²⁸ —Supi eté —ehi—. Eremboyevi tupri ndeyeupe porandusa cheu. Eremboaviyese evocoi, ahese ererecora tecovesa apirẽhi vahe —ehi co mbia upe.

²⁹ Co mbia rumo oyeepe pota. Sese aipo ehi chupe:

—¿Ava vo aipo che cotindar secoi? —ehi.

³⁰ Evocoyase omboyevi chupe:

—Oime mbia Jerusalén sui oso vahe Jericó ve. Ahe peri rupi yuvinose ava ndipihai vahe yuvireco chupe. Ahe vırocuapa imbahe yuvireco ichui, iturucuar opacatu reseve; iyavei yuvırocuaro-cuava yuvireco sese. Ipare oyuca seni seya peri rupi yuvıraso.

³¹ Ahese judıo pahi ou ahe peri rupi. Evocoi mbia repiase rumo, co coti rupi oñacuasaño oso.

³² Egüe ehi tupri avei ambuae mbia pahi pıtivıisar levita, osepiase, oñacuasa tupriño avei oso no.

³³ Ipare rumo mbia sepiapotapirẽhi Samaria iguar oso ahe peri rupi avei. Ahe osepiase, oiparaisuereco.

³⁴ Evocoyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipare osupi güeimba harıve oaprıve, vıraso ava quesave. Aheve ihañeco sese.

³⁵ Ahere ayihive Samaria iguar osose, omondo guarepochi ahe pendar oi yar upe. Ipare aipo ehi chupe: “Esãro tuprimi tẽi co ava cheu. Acoi ndehañeco catuse sese, amboepe catu irira che yevise ndeu” ehi sãta vahe upe.

³⁶ Indó, ¿uma vo co evocoyase mbosapi yuvirecoi vahe oyemboava acoi ava ndipihai vahe remimombaraisu upe? —ehi.

³⁷ Evocoyase ahe mbia aipo ehi:

—Acoi mbia oiparaisuereco vahe iparaisu vahecuer —ehi.

—Supi eté —ehi chupe—. Eyapo tupri avei nde co nungar eico —ehi Jesús co Moisés porocuita rese oporombohe vahe upe.

Jesús oso Marta iyavei María rẽtave

³⁸ Ipare Jesús güemimbohe eta reseve oguata vite oyepota cuña recosave yuvıraso, ahe cuña rer Marta. Ahe omoingue tupri güeta pipe.

³⁹ Icupihir evocoyase María serer. Ahe oguapi Jesús pıve iñehe rendu oĩ.

⁴⁰ Marta rumo oyembopihavıracua opacatu mbahe rese oico. Ipare oyemboya oso Jesús rese opihavıracuasa pipe aipo ehi chupe:

—Che Yar, ¿aviye ai vo evocoi che cupihir chini tẽi nde piri che poravıqui vıteseve? Emombehu chupe, tou, tache pıtivıi rane —ehi chupe.

⁴¹ Omboyevi rumo Marta upe aipo ehi:

—Marta, Marta, ¿mahera vo ereyemañeco etepri tẽi setá mbahe apo ãgua eico?

⁴² Iya rumo ñepeí mbahe yaposa. Co nde cupihir oiporavo ahe mbahe aviye catu vahe oyeupe che ñehe renduse; ndipoi chietera que ava virocua vaheerã ichuí —ehi Jesús Marta upe.

11

Jesús ombohe güemimbohe eta yerure ãgua rese

¹ Ñepeí ari Jesús oyerure. Iyerure pare semimbohe aipo ehi chupe:

—Ore Yar, ore mbohemi tēi ore yerure ãgua rese eve inungar Juan ombohe güemimbohe eta sereco yepi —ehi chupe.

² —Aviye —ehi—. Peyeroquise, aipo peyera:

‘Ore Ru Tūpa, ivave ereico vahe, imboeteipri nde rer tasecoi.

Tou nde mborerecuasa oreu.

Tayaposa nde remimbotar co ivi pipe, iva pendar nungar.

³ Embou ore rembihu ari yacatundar oreu.

⁴ Iyavei ndeñero ore angaipa rese oreu.

Esepia niha, ore oreñero opacatu ore amotarēhimbar upe.

Ore mboangaipa ucai rene eve, ore renose catu mbahe tēi sui eve’ peyera —ehi

⁵ Iyavei aipo ehi no:

—Inungar co perecora pe mboripar viña. Ipare pesora ahe sētave pītu mbit̄er rupi aipo peyera chupe: ‘Che mboripar, emboumi tēi mbosapi pan cheu tamboyevire ndeu.

⁶ Esepia, ambuae che mboripar oyepota ou che rētave; ndarecoi eté rumo mbahe amondomi vaheerã chupe’ peyera chupe.

⁷ Ipare ahe, ‘Che mañeco tēi rene eve. Esepia, opa ayoquenda, iyavei co che rahir opa aropituhu seru. Sese ndiyai apūha mbahe mondo ndeu’ ehiñora pēu viña.

⁸ Supi eté, yepe nopuhai chietera mbahe mondo pēu pe mboripar secose viña, opūhaño itera rumo ‘tache mañeco iri eme’ oyapave. Ipare omondoño itera opacatu mbahe pe porandusa pēu.

⁹ Sese aipo ahe pēu: Peoporandura mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ēgūe peyera peyeroquisa pipe Tūpa upe, ahese imboisara mbahe mbou ãgua pēu.

¹⁰ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyerokuva pipe omota vahe oquenda Tūpa upe, chupe imboisara.

¹¹ “Oimese tahi vahe pe pāhuve, tahir oporanduse pira rese vu upe, ¿omondora pīha mboi tēi guahir upe viña?

¹² anise, ¿omondora pīha oporanduse mbahe rupiha rese, mbahe rumbiquiāpe tēi chupe viña?

¹³ ¡Aní! Esepia, pe yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar omondo catura Espiritu Santo acoi ava oyeupe porandusar upe!” ehi güemimbohe eta upe.

“Jesús vireco caruguar pīratasa oyese” ehi tupri tēi ava yuvireco

¹⁴ Ambuae ari pipe, Jesús osepia mbia caruguar nomoñehengatui vahe. Evocoiyase omose caruguar ichuí. Aheseve voi iñehengatu. Ipare ava rehii sepiase, ndoyembovihai tēi yuvireco.

¹⁵ Amove rumo ava aipo ehi tēi yuvireco: “Beelzebú, caruguar rerecuar pīratasa pipe revo omboyepipi caruguar oico” ehi tēi yuvireco chupe.

16 Ambuae ava secoãhasa pipe oporandu yuvireco chupe: “Eyapo ru mbahe nde rembiapo iva pendar nde recocuer cua ãgua” ehi tẽi.

17 Ahe rumo oicuaño ipihañemoñetasa. Evocoiyase aipo ehi chupe: “Que mborerecuar guasu povri pendar ovava-vavase oyeupe oyeamotarẽhisave yuvireco, ahese evocoi mborerecuar pĩratasa ocañi tẽira. Iyavei ava omu rese ae oyeamotarẽhi vahe, oyemocañi aveira yuvireco no.

18 Êgüe ehi avei niha carugar. Esepia, serecuar omboyepepise opovri pendar, ovavara oyeupe yuvireco viña. Ahese oyemocañi tẽira yuvireco. Co ñehesa aipo ahe pẽu. Esepia pe, ‘Beelzebú pĩratasa pipe tẽi opa omose carugar ava sui oico’ peye tẽi cheu.

19 Êgüe ahese rumo viña, ¿ava pĩratasa pipe ru evocoiyase pe voya omboyepepi carugar ava sui? Pe voya ae omboyecuaa pe ñehe pe rembiavi yuvireco pẽu.

20 Che rumo Tũpa pĩratasa pipe carugar amboyepepi ava sui. Sese cũritei Tũpa mborerecuasa oyepota itẽ pẽu.

21 “Inungar oime ava ipĩrata etepri vahe, iyavei viereco oyeroyasa. Ipipe osãro güeta opacatu mbahe ipĩpendar avei icañiẽhi ãgua.

22 Acoi ouse rumo ambuae ipĩrata catu vahe chupe, ahe osecoreroyise, opa virocua iyeroyasa ichui. Evocoiyase güembierocua ahe opa vi-raso oyeupe.

23 “Acoi ava ndache mboyoyai vahe, ahe che amotarẽhimbar yuvirecoi; iyavei acoi ava ndosecai vahe ava cheu, ahe omosai tẽi yuvireco che sui” ehi.

Carugar oyevi iri güeco agüerve

24 “Acoi osẽse carugar ava sui, uguata tẽi ivi ipiru vahe rupi opituhu ãgua reca. Ipare rumo ndoyosuise, ipihañemoñeta oyeupe, ‘Ayevi irĩra che reco agüerve vicho’ ehi.

25 Aheve oyevise, osepia iri secocuer inungar oi sahuvapri tupri.

26 Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tẽi catu itẽ secocuer yipindar güeco agüer sui” ehi Jesús ava rehii upe.

Tũpa Ñehengagüer viroya vahe sovasapri secoira

27 Oñehe viteseve aipo mbahe rese, cuña ava rehii pãhu pendar oñehe pĩrata aipo ehi:

—¡Evocoi mbia sui ereha vahe iyavei nde mboacua vahe, ahe sovasapri tasecoi! —ehi chupe.

28 Ahe rumo aipo ehi:

—¡Acoi osendu vahe itẽ che Ru Tũpa Ñehengagüer iyavei viroya vahe itẽ, ahe sovasapri secoira che Ru Tũpa rovaque! —ehi ahe cuña upe.

Ava eta ndaseco pĩrai vahe oporandu poromondiisa rese yuvireco

29 Ava rehii oyere ati vitese Jesús rese yuvireco, ahe aipo ehi: “Pe cũriteindar ava ndaseco pĩrai vahe, peporandu tẽi poromondiisa che recocuer cua ãgua rese. Che rumo namboyecuai chira ambuae poromondiisa pẽu. Jonás recocuer rese güeraño opomomahenduhara.

30 Inungar Jonás poromondiisa secoi ava Nĩnive pendar upe, êgüe ehi aveira niha Ava Riquehir reco pipe oimera poromondiisa ava cũriteindar upe.

31 Acoi ari cañi pipe cuña mborerecuar guasu irohi coti secua vahe porandusave omombehura co ava cũriteindar cañia ãgua. Esepia, ahe ou amombri ivi sui Salomón mbahecuaasa rendu ãgua; cũritei rumo oime ivate catu vahe cohava Salomón sui.

³² Iyavei ari cañi pipe ava tecua Nínive pendar porandusave omombehura ava cūrteindar cañipa água. Esepia niha, omboasise oangaipa, oyeve Tūpa upe yuvireco Jonás omombehuse Tūpa Ñehengagüer chupe; cūrteitei rumo oime ivate catu vahe Jonás sui pe pāhuve” ehi.

Tesapesa yande retecuer resendar

³³ “Ndayañomi chira tataendi que imoendi imoi; ndayamondoi chiaveira que mbahevriye. Iyacatu rumo yamondora ivate tataendi rendave ‘tosesape opacatu ava oique vahe oi pipe’ yande yapave.

³⁴ Iyavei pe resa inungar tataendi pe retecuer upe. Esepia, aviyese pe resa, opacatu pe retecuer upe osesape. Acoi imarase rumo, pe retecuer pītumimbi vahe nungar tēi.

³⁵ Sese peicua catu co poroesapesa pereco vahe, tape rereco eme pītumimbi vahe nungar.

³⁶ Co supi eté vahe osesape tuprise opacatu pe pihave, ndipoise que pītumimbisa nungar mbahe ipipe, evocoyase ahe inungar tataendi osesape vahe opacatu pe recocuer pipe. Ahese ndipoi que pītu vahe pēu” ehi.

Jesús omombehu fariseo iyavei Moisés porocuaíta rese oporombohe vahe recocuerai

³⁷ Opase oñehe Jesús, fariseo viraso güetave imbocarú. Oiquese sētave oso, oguapí mesave oí.

³⁸ Ocaru renondeve ndoyepoise rumo, ahese fariseo ndoyembovihai tēi nomboaviyeise judío porocuaíta.

³⁹ Ahe rumo aipo ehi fariseo upe:

—Inungar igua rīru iyavei tembihu rīru icupe rupi tēi yoseipri, ipipe rumo iquīha opitaño ité, egūe ehi tupri avei pe recocuer pe monda raisave mbahe-mbahe tēi pe reco pipe.

⁴⁰ ¡Pe ndayaracuai vahe peico! ¿Ndapeicuai vo pe rete aposar, pe piha aposar avei?

⁴¹ Sese pemondo porerecosá ava iparaisu vahe upe pe recatēhiēhisa pipe. Evocoyase ipipe sui opacatu imoatirombri peicora.

⁴² “¡Peparaisu pe fariseo! Esepia, yepe pe remití sui pemondo peyacatu ñepeí-peí diez vahe sui Tūpa upe viña, pe rumo ndaperoyai teco ñvisa iyavei peseyaño tēi Tūpa poroaisusa. Iyacatu rumo peyapora evocoi mbahe pe porerecosá sui pe poiēhisa pipe viña.

⁴³ “¡Peparaisu pe fariseo! Esepia, peipota pe renda porañete catu vahe pe guapí água tūparo pipe, iyavei peipota pēu opacatu ‘avirave’ oyapora ava pe mboeteisave ocar rupi yuvireco.

⁴⁴ “¡Peparaisu! Esepia, pe recocuerai inungar tehōgüer ruvípa icuaēhise ava oguata ihari rupi yuvireco” ehi chupe.

⁴⁵ Evocoyase Moisés porocuaíta rese oporombohe vahe,

—Porombohesar —ehi—, aipo eremombehu vahe pipe niha ava ore amotarēhiño yuvireco —ehi.

⁴⁶ Ahe rumo aipo ehi:

—¡Peparaisu avei pe Moisés porocuaíta rese oporombohe vahe! Esepia, pemondo porocuaíta yavai vahe ava upe; pe rumo evocoyase ndapeipitiviimi eté ahe ava imboaviye água rese yuvireco.

⁴⁷ “¡Peparaisu! Esepia, pemoingatu Tūpa ñehe mombehusar ruvípagüer peico Tūpa mboeteisa angahu pipe tēi. Pe ramoí teieté rumo oyuca yuvireco.

⁴⁸ Evocoiyase pemboyecua co pe ramoi eta pihañemoñeta agüer secocuer moña pipe peico. Esepia, ahe oyuca Tüpa ñehe mombehusar yuvireco. Pe evocoiyase cüritei pemoingatu vite suvipagüer peico.

⁴⁹ “Sese Tüpa ombahecuaa pipe aipo ehi: ‘Amondora che ñehe mombehusar, apóstol avei ndiporeroyai vahe upe. Ahe ipāhu pendar oyucara yuvireco. Iyavei ambuae mara-mara tēi virecora yuvireco’ ehi.

⁵⁰ Esepia, ava ndiporeroyai vahe cüriteindar upe ité omondora oñemoirosa opacatu oñehe mombehusar yucagüer rese aracahe suive, cüriteindar avei oyucase yuvireco.

⁵¹ Abel yuca agüer suive oyepotara Zacarías yuca agüerve oso. Ahe oyuca tūparo maranehi rocar mbahe reropovēhesa rovai. Supi eté aipo ahe pēu: Tüpa opara omondo oñemoirosa ahe yuca agüer rese ava ndiporeroyai vahe cüriteindar upe curi.

⁵² “¡Pepara! su pe Moisés porocuita rese oporombohe tēi vahe! Esepia, pe mbahecuaa aviye soquendapri pereco ava sui. Pe niha ndaperoyai, iyavei ambuae ava upe ndapeipotai seroya āgua” ehi chupe.

⁵³ Ipare Jesús osē oso ichui. Ahese Moisés porocuita rese oporombohe vahe iyavei fariseo eta oñemoiró iteanga yuvireco sese. Ahe omañeco tēi, oporandu-randu mbahe rese yuvireco chupe,

⁵⁴ osecōāha-āha tēi mbahe pipe ‘toyavi angahu oñehe yandeu’ ohesa pipe yuvireco.

12

Fariseo recocuer rese Jesús oñehe

¹ Ahe pipeve avei ava oñemonuha atí iteanga oyemboti tupri oyemombo guasu-guasú yuvireco. Yipindar Jesús güemimbohe upe rane omboipi oñehe: “Peñaro tupri fariseo pan mboapeposa nungar sui. Esepia, ahe ndoyavii supi tupri vahe viña; ndahei eté rumo.

² Esepia, yposa vahe imombehupirēhi cüritei icuasaño itera curi. Iyavei mbahe ñomipri icuasaño aveira no.

³ Supi eté opacatu mbahe pemombehu vahe pītumimbisave, ahe sendusa tuprira ari pipe coiye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesa pipe, serosapucaisara oi harive opacatu ava rovaque” ehi.

¿Uma sui pñha siquiyesara?

⁴ “Iyavei aipo ahe pēu, che mboripareta: ndapesiquiyei chira acoi ava pe yuca potasar sui. Esepia, ipare ndoicatu iri ambuae mbahe apo āgua pēu.

⁵ Che rumo amombehura pēu uma sui pesiquiyera: acoi oicatu vahe omborerecuasa pipe pe yuca pare pemondo tata guasuve. Ahe ichui eté pesiquiyera.

⁶ “Pe pemondo poyandepo vīrai ñuvirío guarepochi rupivemi tēi yepi. Tüpa rumo ndasesarai eté que ñepei sui.

⁷ Tüpa niha oicua ñepei-pe yande ha retacuer. Sese, pesiquiye eme; pe niha ivate catu vahe ité peico opacatu vīrai sui” ehi.

“Che aroya ité Jesucristo” ehi vahe opacatu ava rovaque

⁸ “Acoi ava ‘che aroya Jesús’ ehi vahe opacatu ava rovaque, che avei, Ava Riquehir, ‘Co che reroyasar secoi’ aipo ahera che Ru upe sembiguai rovaque.

⁹ Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoyase, ‘Co ndahei che reroyasar secoi’ ahe aveira che Ru Tūpa upe sembiguai rovaque” ehi.

¹⁰ “Iyavei opacatu oñehe-ñehe tēi vahe che, Ava Riqueh̄ir, rese, ahe chupe oimeño ñeroisa. Acoi que ava iñehe-ñehe tēi vahe rumo Espiritu Santo amotarēhisave, ahe chupe ndipoi chietera ñeroisa” ehi.

¹¹ “Acoi pe amotarēhisar che recocuer sui tēi pe rerasose porandusave pe recoña ñgua yuvireco, anise mborerecuar mbahe moingatusar rovai, que ambuae mborerecuareta upe avei no, ‘¿Mbahe p̄iha amombehura?’ ndapeyei chira.

¹² Esepia niha, ahe p̄ipeve voi Espiritu Santo pe mbohera aviyeteramo tēi mbahe mombehu ñgua rese” ehi güemimbohe eta upe.

Ñearosa mbahe pota raisa sui

¹³ Ñepe mb̄ia ava reh̄ii p̄ahu pendar aipo ehi Jesús upe:

—Porombohesar, emombehumi che r̄iqueh̄ir upe, tomboyahomi tēi mbahe che mombahesa cheu —ehi.

¹⁴ Ahe rumo omboyev̄i chupe:

—Che mboripar, che ndachecuaítai mbahe moingatu ñgua, mbahe mboyaho-yaho ñgua avei —ehi ahe mb̄ia upe.

¹⁵ Ipare aipo ehi:

—Peñearo tupri opacatu mbahe pota raisa sui. Esepia niha, ndahei mbahe rereco ati ñgua pe recocuer —ehi.

¹⁶ Ipare omboyoya ambuae mbahe rese imbohe: “Oime mb̄ia mbahe yar, iha tupri ai eté semiti.

¹⁷ Ahese ipihañemoñeta oico oyeupe: ‘¿Mara ahera p̄iha che rembipoho rereco?’ ehi tēi. ‘Ndareco iri eté yapocatu ñgua’ ehi.

¹⁸ Ipare ipihañemoñeta cute: ‘Aicua mbahe che rembiaporã. Opara aroyi tembihu rēta. Ichui ayapo irira ambuae tuvichá catu vahe. Aheve ayapocatura che remiti r̄ah̄ii opacatu mbahe areco vahe avei no.

¹⁹ Evocoyase aipo ahera cheyeupe: Che mboripar, oime setá mbahe cheu arav̄iter momba-momba ñgua; sese cūritei apituhura vichico, acarura, acapura iyavei ayembov̄iharetera no, ahera’ ehi.

²⁰ Tūpa rumo aipo ehira chupe: ‘Mb̄ia, nandearacuai eté eico, co p̄itu p̄ipeve voi eté eremanora. Co mbahe nde rembiapocatu, ¿ava mahera p̄iha evocoyase?’ ehira chupe.

²¹ Ëgüe ehi eté niha que ava oyeupeñomi tēi mbahe omonuha ati vahe, iparaisu rumo Tūpa rovaque” ehi ahe mb̄ia upe.

Tūpa osãro opacatu guah̄ir

²² Ipare aipo ehi Jesús güemimbohe upe: “Co amombehura p̄eu: Ndapeyemomahenduha guasu ai chira pe remihura rese pe recove ñgua, pe turucuarã rese tēi avei no.

²³ Yande recovesa rumo av̄iye catu vahe tembihu sui; yande retocuer avei av̄iye catu turucuar sui no.

²⁴ Pesepia v̄irai: nomahetii vahe, nomonuhai vahe avei, ndov̄irecoi vahe avei mbahe r̄ah̄ii rēta yuvireco. Tūpa rumo omoime mbahe itohu. ¡Pe rumo ivate catu vahe ité peico v̄irai sui!

²⁵ Ndipoi eté que ñepe pe p̄ahu pendar oicatu vahe opihañemoñetá iteangasa pipe tēi güecocuer mbosav̄iño ñgua.

²⁶ Supi eté ndapeicatuise yapo, ndiyai peyemomahenduha guasu ai mbahe rese.

27 “Pemahecia ru mbahe potri caha pipendar rese: ndoporaviqui eté iyavei ndoipiai oturucuarã. Iyavei no yepe mboreceuar guasu Salomón vireco setá mbahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese.

28 Tüpa niha omboporañete raimi tēi mbahe potri caha pipendar. Ichui sapisapaño horno pipe. ¡Ahe rumo omondo catura turucuar pēu, pe ava nimbahe reroya tuprii vahe!

29 Sese, ‘¿Mbahe pīha yahura, mbahe pīha yamondera?’ ndapeyei chira pe yemomahenduha guasu aisa pipe.

30 Esepia, ava Tüpa reroyasarēhi co ivi pipendar aipo nungar mbahe reseño tēi ipihañemoñeta yuvireco yepi. Pe Ru Tüpa rumo oicua ité pēu mbahe ipane vahe.

31 Aviye catu rumo pesecara pe Yar Tüpa povrive pe reco āgua, ahese omboura que mbahe ipane vahe pēu” ehi.

Ivave mbahe eta oime vahe yandeu

32 “Aní pesiquiye, che ovesa nungar, yepe pe moviromi tēi peico viña, pe Ru rumo oporoaisusa pipe oipota opovrive pe rereco āgua.

33 Pemondopa mbahe pereco vahe ava oipota vahe upe. Ipare pemondo sepi avei iparaisu vahe upe. Ahe yapocatusa ivave mbahe riru ndituyui vahe nungar pipe. Aheve ava imonda rai vahe ndoiquei chira ñomi āgua pe sui iyavei mbahe rasoi nomomarai chiaveira.

34 Esepia, pe mbahe pe rembiereco setá catu vahesa rupi-rupi pe pihañemoñeta yepi” ehi.

Peyemoingatu Tüpa Rahir yevi āgua

35 “Peyemoingatu tupri che yevi āgua. Inungar tataendi ndogüei vahe, pemboyecua tupriño ité che recocuer pe recocuer pipe ava upe.

36 Peico imboacuapri güerecuar osāro vahe nungar mendasa sui iyevisse, oquenda imotase, omboi voi vahe yuvireco chupe.

37 Aviye itera serecuar upe osepiase iyemoingatu voi; evocoyase serecuar ae niha ihañecora sese, omboguapira mesave imbocarú.

38 Yepe serecuar oyepotara pītu mbiter ou viña, anise añihiveive, ahe rumo osāroño itera chupe imboi āgua yuvireco. Evocoyase serecuar aviye ai etera chupe.

39 Peyapisaca tupri co rese: acoi oi yar oicuaese mbahe hora imonda vahe yepota āgua, ahese opitara imonda vahe rāro güeta pipe sui mbahe renoseñhi āgua.

40 Ēgüe peye aveira peyemoingatu che yevi āgua. Esepia niha, che, Ava Riquehir, aporoesapiha tēira vitu curi” ehi Jesús viroyasareta upe.

Mbiguai omboaviye vahe ocuaita iyavei nomboaviyei vahe

41 Evocoyase Pedro oporandu Jesús upe aipo ehi:

—Che Yar, ¿oreuñomi pīha eremombehu co porombohesa eremboyoya vahe ambuae mbahe rese, opacatu upe tie? —ehi.

42 Evocoyase omboyevi Pedro upe aipo ehi: “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarã güeta pipendar rese hañeco āgua ‘tembihu tomondo che rēta pipendar upe che porocuita rupi’ ohesave.

43 Acoi omboaviyese ocuaita, ahese oviharetera güerecuar yevise.

44 Supti eté niha, serecuar oyocuita opacatu ombahe rese hañeco āgua.

45 Ahe mbiguai rumo ‘ndoyepota vītei chira revo che rerecuar’ oya omboetasa cuimbahe iyavei cuña omboipi mara-mara tēi sereco iyavei ocaru, oihu tēi osavaipo-ipoño avei oico.

46 Ipare rumo serecuar oyepotara imahemohaēhiseve; ahese omombaraisu catura inupa sereco, inungar acoi ndiporeroyai vahe rerecosa yepi” ehi.

47 “Acoi mbiguai oicua tēise mbahe güerecuar remimbotar, noyemoingatuise rumo iyavei ndoviroyaise oico, ahe evocoyase serecuar oinupara.

48 Acoi mbiguai nomboaviyei vahe ocuaita icua tupriēhisa pipe, nañemoirosa rutei chira chupe. Esepia niha, acoi imondosa catu vahe icuaitarā, porandusa catura chupe. Acoi oyeroya catu vahe, oporandu catu aveira sese” ehi.

Jesús reroyasa pipe sui oimera yeamotarēhisa

49 “Che ayu tata nungar yavai vahe reru āgua co ivi pipendar upe ‘joyandu tarahu yuvireco cute viña!’ viya.

50 Aique ranera rumo mbahe tēi che recoāhasa pipe, jēgüe ahera che paraisú itera imboaviye āgua!

51 ‘Mbahe tupri ai revo güeru co ivi pipe’ ndapeyei chira cheu. Ēgüe ehi rumo che ayu che sui ava yeamotarēhi āgua.

52 Esepia niha, co pipe suive ité que poyandepo tupri revo oñemu yuvirecoi vahe amove oyeamotarēhira yuvireco che recocuér sui: mbosapi oyamotarēhira ñuvirío vahe, ñuvirío vahe evocoyase oyamotarēhira mbosapi vahe yuvireco.

53 Que ava oyamotarēhira guahir, anise tahir evocoyase oyamotarēhira vu; cuña oyamotarēhira omembri, imembri evocoyase oyamotarēhira osi; sovayar oyamotarēhira vovayar” ehi güemimbohe upe.

Iva pendar poromondiisa mboyecuasa

54 Ipare Jesús aipo ehi ava rehii upe: “Pe pesepiase mbahe pītu ari sosa coti sui opūhase, ahese, ‘Oquira’ peye. Ēgüe ehi eté oqui.

55 Iyavei acoi ivitu oipeyuse irohi coti sui, ahese, ‘Sacú iteangara’ peye. Ipare ēgüe ehi eté.

56 ¡Pe Tūpa reroyasar angahu tēi peico vahe! Pe niha peicua mbahe iva rese oyecua vahe tēi iyavei ivi rese mbahe oyecua vahe tēi mombehu, ¡mahera ru ndapeicuai peyeupe mbahe cūritei oimé vaherā mombehu peico!” ehi.

Peñero pe amotarēhimbar upe

57 “¿Mahera napesāha ranei pe ae ité co mbahe supi eté vahe?

58 Acoi que ava nde amotarēhisar nde soho ucase nde mondo āgua mborerecuar rovai, emoingatu tupri voi mbahe eico chupe tenondeve nde rerasoēhi āgua sovai; anise, mborerecuar nde mondora ava naporai vahe rarōsar upe. Ahe evocoyase nde roquendara.

59 Supi eté nderesēi chietera acoi eremboepipase voi eté eresēra ichui” ehi ava rehii upe.

13

Aviye catu ité yañecuñaro

1 Ahe pipeve avei yuviraso ava Jesús repia. Ahese omombehu Pilato mbia Galiléa pendar yuca uca agüer: Ahe mbia viropovēhese mbahe mimba yucapri yuvireco chupe. Ahe suvi oyeseha mbahe mimba ruvi rese.

² Ipare Jesús aipo ehi chupe: “Pemoha co pe: Mbahe tēi oime vahe evocoi mbia Galilea pendar upe, yangaipa guasu catu rese ambuae güecua pendar sui ěgüe ehi mbahe chupe viña.

³ ¡Aní rumo! Acoi ndapemboasiise pe angaipa Tūpa upe pe yeví ãgua, pe avei opara pecañi tēi.

⁴ Peroya avei acoi ava dieciocho tupri yuvirecoi vahe omanopase Siloé torre oviapise iharave, ‘Ahe yangaipa catu yuvireco ambuae ava Jerusalén pipendar sui’ peye viña no.

⁵ Aní rumo; acoi ndapemboasiise pe angaipa Tūpa upe peyeví ãgua, pe avei opara pecañi tēi” ehi.

Yembohesa ivira higuera ndihai vahe resendar

⁶ Evocoiyase Jesús omombehu mbahe omboyoya oporombohe ambuae mbahe rese aipo ehi: “Oime mbia vireco vahe ivira higuera oco pipe. Setá ari ahe oso sepia ‘¿iha pīha?’ oyapave. Ndosecai eté rumo iha sese.

⁷ Ahese aipo ehi mbia oco rārosar upe: ‘Esendu, che ayu pīhi tēi higuera ha reca mbosapi araviter rupi. Ndasepai eté rumo que ñepeí iha sese yepi’ ehi. ‘Eyasiapa; ndiyai ihāi tupri tēi cohava’ ehi.

⁸ Ico rarōsar rumo omboyeví chupe aipo ehi: ‘Che rerecuar, ěgüe tehiño vite tēi rane co araviter; amonguhira ivi chupe. Ipare amondora ivi sū vahe mbahe repochi resendar sese.

⁹ Ahese revo ambuae araviter ihara cute; anise ité rumo, ereyasia ucaño itera’ ehi ico rārosar güerecuar upe” ehi Jesús ava mbohe.

Jesús ombogüera cuña oyecuhapami vahe mbituhusa ari pipe

¹⁰ Ñepeí mbituhusa ari pipe Jesús oporombohe judío tūparo pipe.

¹¹ Aheve oime cuña imbaheasi vahe, dieciocho araviter rupi ahe mbahehasisa vireco, carugar tēi omboyeapami uca sereco. Sese ndoicatu opūha tupri oguata.

¹² Osepiase rumo Jesús, “Erio” ehi chupe.

—Cuña, cūritei nanembaheasi iri eico cute —ehi.

¹³ Evocoiyase omondose opo sese, aheseve voi cuña oyemohivi. Ipare omboetei Tūpa oico.

¹⁴ Judío tūparo rerecuar rumo oñemoiro ahe cuña mbogüerasa rese mbituhusa ari pipe. Sese aipo ehi ava eta upe:

—Oime niha seis ari mboraviqui ãgua; ahe ari pipe peyura peposano ãgua, ndahei chira mbituhusa ari pipe —ehi.

¹⁵ Evocoiyase ahe mbia upe omboyeví aipo ehi:

—Pe Tūpa reroyasar angahu tēi peico vahe, ¿nomboihui vo pe pāhu pendar acoi güeimba tivi yavei guaricu mbituhusa ari pipe yuvireco yepi no?

¹⁶ Co rumo cuña, Abraham suindar Carugar omombaheasi vahe dieciocho araviter suive sereco, ¿ndiyai eté pīha evocoiyase imbogüerasa mbituhusa ari pipe? —ehi tūparo pendar rerecuar upe.

¹⁷ Aipo ehise, opacatu yamotarēhisar yuvinochi tēi yuvireco ichui. Ambuae ava rumo oyembovīhaño opacatu Jesús rembiapo osepiase yuvireco.

Yembohesa mostaza rāhi suindar

¹⁸ Evocoiyase Jesús aipo ehi avei: “¿Mbahe nungar pīha Tūpa povri pendar, iyavei mbahe rese vo amboyara?”

¹⁹ Oyoya tupri ité mostaza rāhi rese, inungar acoi mbia oñoti vahe oco pipe. Ichui ocuacua, tuvichá iteanga. Ahe sāca rese vírai rehii oyapo guaitirā” ehi oporombohe.

Yembohesa pan mboapeposa sui

²⁰ Evocoiyase Jesús aipo ehi iri: “¿Mbahe rese pīha amboyoyara Tūpa povri pendar?”

²¹ Oyoya tupri co pan mboapeposa rese, acoi cuña omboyeseha tupri vahe mbosapí sâhambri trigo cuhi rese opacatu imboapepo âgua yepi” ehi oporombohe.

Jesús peri icâhimi vahe nungar

²² Ipore Jesús osoño Jerusalén ve, opīta-pīta tecua yacatu rupi oporombohe oico.

²³ Ahe supi ichose, ñepei mbīa oporandu chupe aipo ehi:

—Che Yar, ¿supi eté pīha moviromi tēi ava oñepisiora yuvireco? —ehi.

Ahe evocoiyase omboyevi chupe:

²⁴ —Peyemoviracua tupri catu peique âgua oquendipi cāhimi rupi. Esepia niha, supi eté setá ava osâha tēira yuviroique vaheṛā ahe oquenda rupi yuvireco viña, ndoyuviroique catui chira rumo yuvireco.

²⁵ Supi eté ahe inungar oī yar ouse oquenda mboya viña. Amove ava evocoiyase ocarve yuvirecoi vite vahe omōta tēira oquenda, ‘Ore yar, emboimi tēi oreu’ ehi tēira yuvireco. Ahe rumo aipo ehiñora chupe: ‘Aní, ndopocuai vahe rumo pe’ ehiñora chupe.

²⁶ Evocoiyase ahe aipo ehi tēira yuvireco: ‘Ore niha orocarua vahe, oroihu vahe nde piri, iyavei ore mbohe ore rocar rupi eve yepi’ ehi tēira yuvireco chupe.

²⁷ Ahe rumo aipo ehira: ‘Ñepei reseve niha acoi, Ndogocuai vahe, ahe pēu. ¡Pesiri che sui, pe opacatu mbahe-mbahe tēi aposar!’ ehiñora chupe.

²⁸ Pe rumo imomboprira pe recouer Tūpa povri sui, sese peyaseho tēira, peyemoaitere tēira peico pēsepiase Abraham, Isaac, Jacob iyavei opacatu Tūpa ñehe mombehusareta yuvirecoise Tūpa povrive ivave.

²⁹ Iyavei ava yugüerura añihivei coti sui, caharu coti sui, norte coti sui iyavei irohí coti sui, ahe evocoiyase yuviroguapira ocaru Tūpa mborerecuasave ipiri yuvireco.

³⁰ Supi eté amove ava ndoyavi ipa tēi vahe seique âgua ivave Tūpa piri viña, ahe ranengatu rumo yuviroiqueño itera ipipe iyavei amove ava tenonde catu vahe ndoyavi ahe rane oique vaheṛā ivave viña. Ahe rumo ipa tēi yuviroiquera —ehi Jesús ava rehí upe.

Jesús oyaseho Jerusalén pendar rese

³¹ Ahe arí pipe oyepota moviro fariseo aipo ehi tēi Jesús upe yuvireco:

—Eyepepiño ave sui. Esepia, Herodes niha nde yuca pota oico —ehi tēi yuvireco chupe.

³² Ahe rumo,

—Peso, tapemombehu aipo mbīa aguara nungar tēi upe: ‘Esepia, co pipe iyavei ayihive amboyepiñora ava sui caruguaireta vichico, ambogüerañora ava imbaherasisa sui, curi ayihive evocoiyase amombara che cuaita’ peyera.

³³ Che rumo aporaviquiño itera co pipe, ayihive iyavei curi ayihive vichico. Ipore asora Jerusalén ve. Esepia niha, ndiyai Tūpa ñehe mombehusar omano co coti tēi Jerusalén sui yuvireco —ehi.

³⁴ “¡Too rutei pe Jerusalén pendar, peyuca vahe Tūpa ñehe mombehusar, iyavei ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive, êgüe ahe pota tēi pe rereco viña, pe rumo ndapeipotai eté!

³⁵ Sese seyapirā tēi peicora. Iyavei ndache repiai chiaveira peye acoi, ‘Imboeteipri Yar remimbou tasecoi’ peyese voi che repia irira peye” ehi Jerusalén pendar upe.

14

Jesús ombogüera mbia iruru sui

¹ Ñepeí mbituhusa ari pipe Jesús oso ocaru mborerecuar fariseo rētave. Aheve ambuae fariseo eta oiviro yuvireco.

² Aheve avei mbia iruru vahe secoi.

³ Evocoyase Jesús oporandu Moisés porocuita rese oporombohe vahe upe iyavei fariseo eta upe avei aipo ehi:

—¿Ipotasa vo mbituhusa ari pipe imbaheasi vahe mbogüera água; aní tie? — ehi.

⁴ Ahe rumo noñeheño yuvireco chupe. Aheve ahe opoco imbaheasi vahe rese, ombogüera. Ipare, “Eso tupriño” ehi chupe.

⁵ Fariseo eta upe evocoyase aipo ehi:

—¿Ava pīha pe pāhu pendar novinose voi chira güeimba guaricu, anise tivi oviapise ivicuar pipe mbituhusa ari pipe viña? — ehi.

⁶ Aheve nomboyeví catuí eté ñehe yuvireco chupe.

Jesús ombohe mendasave ichohopri yuvireco

⁷ Ava ichohopri oiporavo-ravo güenara imboyeroyapri catu vahe mesave oyeupe nara yuvireco. Ahe sepiase aipo ehi Jesús imboaracua:

⁸ —Acoi que yande soho ucasa mendasa pietasave yuvireco, ndayaguapi chira ava imboeteipri catu vahe renda harive. Esepia, aviyeteramo que ambuae ava ichohopri oyeopotara yande sui imboeteipri catu vahe yuvireco.

⁹ Ipare yande soho ucasar aipo ehira yandeu: ‘Epūha evocoi sui, co mbia toguapi eipeve’ ehira yandeu. Evocoyase yande yachī tēira yaso ipami tēi yaguapi.

¹⁰ Yande soho ucasa rumo yuvireco, yaguapira evocoyase ipa; yande soho ucasar ouse, aipo ehira yandeu: ‘Mbori, erio cohava tenda imboeteipri catu vahesave ore piri’ ehira. Ēgüe yahera imboeteipri yaico acoi ava yuviroguapi vahe rovaque yande piri.

¹¹ Esepia niha, acoi ava oyemboivate ai vahe opara seco reroyisa; acoi ava seco mbegüe vahe rumo, ahe seco mboivate catusara curi — ehi.

¹² Ipare aipo ehi avei ichohosar upe:

—Ereyapo potase pieta, ndereichoho ucai chira nde mboripar, que nde rivri, que nde mu iyavei que nde rēta cotindar imbahe eta vahe. Esepia niha, ahe omboyevira ndeu, nde soho ucara oyeipri yuvireco; ěgüe ehira evocoyase mbahe imboyevipa yuvireco ndeu.

¹³ Ereyapose rumo pieta, ereichoho ucara ava iparaisu vahe, ava ipo ichutu vahe, anise ipi chutu vahe, ipāri-pāri vahe, ndasesapisoí vahe avei.

¹⁴ Esepia niha, ahe ndoicatui mbahe mboyeví yuvireco ndeu. Opase rumo ocuerayeví ava seco catupri vahe yuvireco, aheve ereviharetera eico. Esepia, ereipisira mbahe aviye vahe Tūpa suindar — ehi.

Jesús oporombohe carusa rese

¹⁵ Ñehe renduse rumo, ñepeí mbia yuviroguapi vahe mesave, ahe aipo ehi Jesús upe:

—¿Sovasapri catu ava Tūpa piri ocaru vahe imborerecuasave! — ehi.

¹⁶ Evocoyase aipo ehi ahe mbia upe:

—Oime mbia oyapo vahe carusa guasu, oichoho uca ava setá oyepiri.

¹⁷ Ipare oyepotase ari caru água, ahese aipo ehi güembiguai mondo: ‘Toyugüerupa che piri ichohopri. Esepia niha, mbahe opa oingatu cute’ ehi.

¹⁸ Opacatu rumo ava, Eñemosañomi tēi cheu’ ehi pāve yuvireco. Yipindar mbia aipo ehi: ‘Che rumo arocua ivi; iya ité aso sepia. Sese eñemosañomi cheu’ ehi chupe.

¹⁹ Ambuae mbia aipo ehi: ‘Che arocua ramo diez tupri tiví, ahe asãha ranera. Sese eñemosañomi cheu’ ehi chupe.

²⁰ Ambuae aipo ehi no: ‘Che amenda ramomi vichico. Sese tēi ndasoi chira’ ehi.

²¹ Oyeveise mbiguai, opa tupri omombehu mbahe güerecuar upe. Ahese serecuar aipo ehi oñemoirosa pipe güembiguai upe: ‘Eso voi evocoyase opacatu ocar rupi. Supi sui eru ava iparaisumi vahe, que ava ipo chutu vahe, anise ipi chutu vahe, que ndasesapisoi vahe, anise que ava ipāri-pāri vahe avei no’ ehi.

²² Coiye ava reru pare aipo ehi mbiguai güerecuar upe: ‘Che rerecuar, aroya ité nde che cuaita; ipane vite rumo ava’ ehi.

²³ Evocoyase aipo ehi güembiguai upe: ‘Eguata iri ambuae peri tecua ivirindar rupi avei toyugüerumi che rētake yuvireco che piri, tomboapipopa ité che rēta yuvireco’ ehi.

²⁴ ‘Esepia niha, acoi yipindar ava aichoho uca vahe ndipoi chietera que ñepeí ocaru vaheṛá che piri’ ehi güembiguai upe —ehi Jesús ahe mbia mbohe.

Yavai Cristo rupi guata água

²⁵ Ava rehí Jesús raquicuei uguata yuvireco. Sese ahe oyemboyere aipo ehi ava upe:

²⁶ “Acoi oimese que ava oipota vahe che rupi uguata água, tache raisu catu que ambuae ava sui, que oyesupa, osí, güembireco, guahireta, vivireta iyavei güeindireta sui, oyesui avei. Ēgüe ndehise, evocoyase ndiyai chupe che remimbohe seco água.

²⁷ Iyavei que ava noñemosañomi vahe mbahe-mbahe tēi upe oiporarase ari yacatu rupi inungar-ra ocurusu rese ovosí vahe viña che rupi uguata água, ahe chupe ndiyai che remimbohe seco água” ehi.

²⁸ “Que ava pe pāhu pendar omopuha potase oi, ¿ndoyapisaca ranei chira ‘¿amomba angara pīha?’ oyapave?”

²⁹ Esepia niha, omondose oi renara yipindar. Ipare rumo nomboaviye catuise, ahese opacatu ava sepiase viroñora

³⁰ aipo ehira yuvireco: ‘Aye evocoi mbia omopuha pota tēi oi viña, ndoicatu ité rumo imboaviye’ ehira yuvireco chupe.

³¹ Iyavei que mborerecuar guasu diez mil sundao vireco vahe oyepi potase ambuae mborerecuar veinte mil ava vireco vahe sui, oyapisaca ranera yipindar icua tupri água ‘¿yaicatura pīha setá catu vahe rese yavava?’ ohesave.

³² Esepia, ndoicatuise, evocoyase ambuae mborerecuar guasu amombri vite secoise, omondora mbahe mombehusar mbahe tupri rese porandu água chupe.

³³ Ēgüe ehi avei pe recocuer ndapeseya potaise pe mbahe opacatu, ēgüe ehi vahe ndahei eté che remimbohe” ehi.

Yande recocuer inungar yucrí

³⁴ “Yucrí avíye vahe ité yandeu; nasehe irise rumo, ndayaicatuí chietera imoehé iri água.

³⁵ Naporai eté ivi upe nara; ndiyai avei ivi mbahe repochi resendar rese oyesehá vaheerá. Evocoiyase ahe imombopri tēi vaheerá. Sese aipo ahe acoi ava oyapisaca pota vahe, toyapisacaño” ehi.

15

Porombohesa ovesa ocañi tēi vahe resendar

¹ Opacatu ava sui guarepochi reroquasar yuvirecoi vahe iyavei ava eta yangaipa guasu vahe, oyemboya Jesús rese ñehe rendu água yuvireco.

² Sese fariseo yuvirecoi vahe iyavei Moisés porocuita rese oporombohe vahe yuvireco, ahe oviroiro tēi yuvireco aipo ehi:

—Co mbia ombori pota rai ava yangaipa guasu vahe tēi oico yepi, ocaru avei ipáhuve no —ehi.

³ Evocoiyase Jesús omombehu ovesa resendar yembohesa:

⁴ “Que ñepeí pe páhuve víreose cien ovesa güeimba, ipare co ocañira ñepeí íchui viña, oseyá ranera evocoiyase evocoi noventa y nueve tēi avíye vahesave seco água. Ípare oyevíra ocañi vahe reca oso, oyosu rane itera viña.

⁵ Oyosuse, osupira oachihive vorívetesa pípe.

⁶ Ípare oyepotase güetave, omonuhara omboripareta, ocotindareta avei no. Ípare aipo ehira chupe: ‘Yayembovihara che píri. Esepia niha, ayosu ité ovesa ocañi vahecuer cute’ ehira.

⁷ Supi eté égüe ehi aveira oime torívetesa guasu catu ivave acoi ñepeí ava yangaipa guasu vahe oñecuñarose güecocueraí sui noventa y nueve yuvirecoi tupri vahe sui yuvireco” ehi.

Yembohesa guarepochi ocañi vahe resendar

⁸ “Acoi que cuña omoañise ñepeí guarepochi diez tupri víreco vahe sui, omoendirá tataendi. Ípare osahuvara oi, oseca mbegüera, oyosu rane itera.

⁹ Evocoiyase oyosuse, omonuhara omboripareta, ocotindareta avei no chupe aipo ehira: ‘Yayembovihara che píri. Esepia niha, ayosu guarepochi che sui ocañi vahecuer cute’ ehira.

¹⁰ Supi eté égüe ehi aveira oime torívetesa Túpa rembiguai íva pendar rehi upe que ñepeí ava yangaipa guasu vahe oñecuñarose güecocueraí sui” ehi.

Yembohesa mbia rahir ocañi vahe resendar

¹¹ Aipo ehi avei oporombohe: “Oime mbia víreco vahe ñuvirío guahir.

¹² Chihivahe catu vahe aipo ehi oyosupa upe: ‘Che ru, embou mbahe che mombaheha cheu’ ehi. Iyesupa evocoiyase omboyaho ombahe imondo chupe.

¹³ Ípare coiye catumi, omonuhapa opacatu ombahe. Ichui oso amombri ambuae tecuave. Aheve oguarepochi oiporupa tēi ombahe pota raisa pípe.

¹⁴ Acoi oiporupa tēise rumo opacatu ombahe, ahesé oime tiavor ahe ivi rupi. Ahe evocoiyase ndasíepoi tēi oico.

¹⁵ Evocoiyase oso mboraviqui reca mbia píri aheve. Ahe mbia evocoiyase omondo ocove güeimba cuchi ráro água.

¹⁶ Aheve oyemohitaro pota tēi cuchi rembihi pípe oico viña. Ndiipoí eté rumo omondo vahe chupe.

¹⁷ Evocoiyase oyemomahenduha tēi güeta pendar oporaviqui vahe rese: ‘¡Che ru rétave oporaviqui vahe rumo co omoumbire guasu-guasú tēi güembihu yuvireco! ¡Che rumo che yuca pota tēi che ríeporēhi che rereco cohavel’

¹⁸ Sese ayevíra che ru rēṭave. Aipo ahera chupe: Ayemboangaipa Tūpa rese, nde rese avei no.

¹⁹ Ahese che ndahe iri chira nde rahír nungar aico; iyacatu revo ndeu, oporavíqui vahe nungar tēi che rerecoñora eve, ahera' ehi.

²⁰ Evocoiyase oyeví iri oso vu rēṭave cute.

“Amombrí vitemi tahír recose rumo iparaisu catu chupe, oña voi oso guahír rovaíchi, oyaco osovaupite avei.

²¹ Ahese tahír aipo ehi chupe: ‘Che ru, ayemboangaipa Tūpa rese, nde rese avei; ndiya iri nde rahír che reco āgua’ ehi.

²² Tu rumo aipo ehi güembiguaí upe: ‘Peso, taperumi aviye catu vahe turucuar pemboyemonde, pemonde avei cuã penda sese, pitaquí avei.

²³ Iyavei guaca iquíra catu vahe peyuca. ¡Yayapora pieta guasu!’ ehi.

²⁴ ‘Esepia, co che rahír aviye omano vahe secoi viña, cūrítei rumo oyeví iri cheu’ ehi. Ēgüe ehi opacatu sorivete yuvireco pieta apo.

²⁵ “Tahír cuacua catu vahe rumo ocove vite secoi. Oyevíse ou güēta rerovícave, osendu voi ipieta guasu vahe yuvireco.

²⁶ Evocoiyase oporandu mbiguaí upe mbahe oime vahe rese.

²⁷ ‘Nde rivrí mo co oyeví tuprí iri ou. Sese nde ru oyuca uca guaca iquíra vahe iyevisa resendar’ ehiño.

²⁸ Evocoiyase tíquehír oñemoirosa pípe, ndoique potai oyesupa uve oí pípe; tu rumo osēño ité ocarve ‘eique’ oya chupe.

²⁹ Evocoiyase tahír omboyeví chupe aipo ehi: ‘Che niha setá aravíte rupi oropítiví vichico nde mboyeroyasave viña, nderemboumi eté rumo que mbahe cheu, que mbahe mímba angara viña che mboripar rese ore pieta āgua’ ehi vu upe.

³⁰ ‘Indó, cūrítei oyepota ndeu nde rahír, omocañi tēi vahe nde guarepochi cuña ndipíhai vahe rese tēi. Ahe eremboetei catú che sui; ereyuca uca rutei guaca iquíra vahe chupe’ ehi.

³¹ “Evocoiyase tu: ‘Eyapísacaño, che rahír, nde niha nderesírí vahe che sui. Opacatu che arco vahe rumo nde mbahe ité yepi.

³² Cūrítei rumo iyacatu ité yande rorivetesave yayapora pieta. Esepia, co nde rivrí ocañi tēi vahecuer rese yamahe iri’ ehi guahír upe” ehi Jesús ava eta mbohe.

16

Mbahe yar mbahe rese ñangarecuar ndoyemboaracuai vahe resendar yembohesa

¹ Jesús aipo ehi avei güemimbohe eta upe: “Oime mbía imbahe eta vahe. Ahe víreco mbía ombahe eta rese ñangarecuar. Ahe chupe ava yugüeru mbahe mocañi tēi agüer mombehu.

² Evocoiyase serecuar ñepeí opítivíisar omondo seca, ahe güeruse, ‘¿Mbahe vo aipo ereyapo eico; ayandu cūrítei nde rerācua? Emoingatupa tuprí voíño nde poravíquisa resendar cheu’ ehi, ‘Nandehañeco iri chira cohava mbahe rese cheu’ ehi, ‘Nandehañeco iri chira cohava mbahe rese cheu’ ehi chupe.

³ Evocoiyase mbahe rese ñangarecuar: ‘¿Mara ahera píha co evocoiyase vichico imomboprí che recose che poravíquisa sui? Ndareco iri rumo píratasa cheyese iví rese che poravíqui āgua. Achí eteanga aveira rumo mbahe rese che porandu āgua’ ehi tēi.

⁴ ‘Aicua rumo cute mara ahera vichico: che poravíquisa sui opa che momboise, oimera che písi tuprí vaheerā oyepírí’ ehi.

5 Evocoiyase oñehe ñepei-peí güerecuar sui mbahe vinose tēi vahe rese chupe. Yipindar vahe upe oporandu: ‘¿Mboví mbahe erenose tēi yande rerecuar sui?’ ehi.

6 ‘Cien tuprí chereve aceite siru tuvichagüe vahe rese’ ehi. Evocoiyase, ‘Eguapí ru, co oime cuachiar sesendar nde yecuachía agüer. Emondoro, eyapo iri ambuae cincuenta rupindar año’ ehi chupe.

7 Ichui ambuae mbahe vinose tēi vahe upe oporandu no: ‘¿Mboví mbahe vo erenose tēi yande rerecuar sui?’ ‘Cuatro ciento quintar rupindar’ ehi. Evocoiyase, ‘Co oime cuachiar sesendar. Yaicuachiará rumo tresciento veinte quintar rupindar’ ehi.

8 Evocoiyase serecuar oyanduse, ‘Too, oicua ité mbahe apo’ ehi ombopasa rese ombahe rese ñangarecuarer ndipihai vahe upe. Esepia, ahe oyemoingatu voi oyeupe mbahe moingatu ñgua. Supi eté ava ndoicuai vahe Tüpa oicua catu mbahe moingatu ñgua oyeupe Tüpa reroyasar sui.

9 “Sese che aipo ahe pēu: peiporu pe guarepochi pereco vahe co ivi pipe pe mboripar reime ñgua. Ichui opa tēise pe guarepochi, oimera pe pisi vaherã teco apirēhisave.

10 “Acoi ava mbahe tuprí chíhi oyapo vahe, ahe oyapo tuprí catura mbahe tuvichá vahe. Iyavei acoi ēgüe ndehi vahe chíhi vahe rese, ēgüe ndehi chiaveira mbahe tuvichá vahe rese.

11 Evocoiyase ndapemboaviyese co ivi pipendar pe cuaita guarepochi rese, ahese ndaperecoi chira ivave mbahe rese hañeco ñgua.

12 Iyavei acoi ndapemboaviye tupriise pe cuaita ambuae ava mbahe rãro pipe, ¿ava pñha evocoiyase omondora pe mbahe ité pēu viña?

13 “Iyavei ndipoi chietera ñepei mbiguai mboyeroya vahe ñuvirío güerecuar. Esepia, ñepei osaisu catura imboyeroyasa pipe, ambuae evocoiyase ndoyambotai chira imboyeroya potaēhisa pipe. Ēgüe peye avei ndapeicatu Tüpa mboyeroya guarepochi pota raisa pipe” ehi güemimbohe eta upe.

14 Aipo ñehesa renduse, fariseo yuvirecoi vahe oguarepochi raisusa pipe oviroiro yuvireco.

15 Evocoiyase aipo ehi fariseo eta upe: “Pe co ava rembiepiave pe recocuer aviye angahu pe reco viña. Tüpa rumo oicua opacatu pe pñhañemoñetas. Esepia, yepe ava rovaque ndoyavii aviye ai vahe pe recocuer viña, Tüpa uve rumo mbahe tēi eté” ehi.

Mborocuita iyavei Tüpa mborerecuasa rese ñehesa

16 “Yipisuive Moisés porocuita iyavei Tüpa ñehe mombehusar porombohesa Juan recosa rupive opa. Ichuive tuprí ité rumo imombehusa ñehesa aviye vahe Tüpa mborerecuasa resendar, sese ava iquerēhi catu cūritei aheve yuviroique vaherã.

17 “Yavai catura que ñepei Tüpa porocuita mboaviyēhi ñgua co íva, ívi opa vaherã sui” ehi.

Jesús oporombohe mendasa sui poiēhi ñgua

18 “Acoi opoi vahe güembireco sui, omendase ambuae cuña rese, ahe oyemboaguasa tēi vahe. Iyavei acoi omendase cuña omenda vahecuer rese tēi, oyemboaguasa tēi vahe avei” ehi Jesús.

Ava mbahe yar iyavei Lázaro

19 “Iyavei oime mbia mbahe yar, ahe oyemonde turucuar aviye vahe pipe oyemboetēi eteanga, iyavei ari yacatu oyapo pieta opacatu mbahe rese oyemboetēi aisa pipe.

²⁰ Oime avei mbia iparaisu ité vahe Lázaro serer vahe. Ahe mbia icaracha ati vahe imboguapisa ivive imoi mbahe yar roquendipive.

²¹ Co mbia iparaisu catu vahe aipo ehi oyeupe, ‘Tomboumi tēi que güembihu rahicuer oviapi vahe mesa sui’ ehi mbahe yar upe viña. Aheve mbahe yar reimba cave oyemboya sese, icaracha osere yuvireco.

²² Omanose co mbia iparaisu vahe, ahese Tüpa rembiguai eta oviraso yuvireco Abraham piri ivave. Mbahe yar avei omano, opa oñoti yuvireco.

²³ “Ahese oso Tüpa ñemoirosave. Aheve oparaisuse, omahe ivate coti, osepia amombri aracahendar Abraham Lázaro reseve.

²⁴ Evocoyase osapucái pĩrata: ‘¡Che ramoi Abraham, che paraisuerecomi tēi eve! Emboumi tēi Lázaro che ãpecu morohisa ãgua ive ocuã pipe. Esepia, che paraisu etepri co tata pĩratagüer pipe vitu’ ehi.

²⁵ Evocoyase Abraham omboyevi aipo ehi chupe: ‘Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaisumi tēi oico’ ehi. ‘Cüritei rumo Lázaro oviharete oico cohava, nde evocoyase nde paraisu eipeve eico.

²⁶ Iyavei oime co ivicular ipicucu vahe rasaēhi ãgua oreu iyavei pēu no’ ehi.

²⁷ “Ahe mbia aipo ehi: ‘Che ramoi Abraham, emondomi tēi Lázaro

²⁸ che rivri poyandepo vahe upe, chupe iñehe ãgua. Ahe tosecuñaro güecocuer yugüeruēhi ãgua co tecocuer mbahe tēisave’ ehi.

²⁹ Abraham rumo, ‘Vireco niha Moisés porocuita iyavei Tüpa ñehe mombehusar rembicuachiagüer yuvireco. ¡Ahe toviroya yuvireco!’ ehiño chupe.

³⁰ Evocoyase, ‘Taa, che ramoi Abraham, que omano vahecuer pãhu pendar rumo yuvirasose chupe, ahe evocoyase omoingatura güecocuer yuvireco viña’ ehi.

³¹ Abraham rumo aipo ehi chupe: ‘Acoi ndoyapisaca potaise Moisés porocuita rese iyavei ambuae Tüpa ñehe mombehusar remimombehu rese no, ndoviroyai chiaveira que ava omano vahecuer ocuerayevise yuvireco’ ehi Abraham ava mbahe yar upe” ehi.

17

Iparaisu itera ava oporomboangaipa uca vahe

¹ Jesús aipo ehi güemimbohe eta upe: “Oimeño itera poroãtoisa che reroyasar reiti ãgua. ¡Ahe imboangaipa ucasar rumo iparaisu itera!

² Iyacatu evocoi nungar ava ñapichisa ita mbahe mbocuhisa iyesho rese para guasu pipe imombo ãgua chihivahemi nungar mboangaipa uca rãgüer sui.

³ ¡Sese peñearo tupri!

“Acoi nde mboetasa Tüpa reroyasar oyemboangaipase, pemboaracuara. Omboasi pare oyevisse güecocuer tupri pipe, ahese peñerora chupe.

⁴ Supi eté acoi que ambuae ava pe amotarēhi vitese rumo siete yupagüer ñepeiri ari pipe, acoi ouse pēu siete yupagüer avei, ‘Ēgüe ndahe iri chira’ ehise, peñero chupe” ehi Jesús güemimbohe upe.

Yayeroyase Tüpa rese oime pĩratasa

⁵ Co doce tupri apóstol aipo ehi chupe:

— Emboumi oreu Tüpa rese ore yeroya catu ãgua — ehi yuvireco chupe.

⁶ Evocoyase yande Yar omboyevi chupe:

— Supi eté, Tüpa rese pe yeroyasa, yepo ndoyavi chira mostaza rãhi tahimi vahe viña, co ivira tuvicha vahe upe rumo, ‘Eyeapoho ave sui. Eso eñeñeti

para guasu aviterve' peyese Tüpa rese pe yeroyasa pipe, ahe evocoyase pe mboyeroya itera —ehi.

Ambuae ava rese hañecosar cuaita

7 “Inungar que pe pãhu pendar virecora güembiguaí oporaviquí vahe iví mboyerove cove, anise que guaca rãro yuvi rupi viña; ichuí iyevise, ¿Eique, eguapí terocarú ehira pãha serecaru chupe?”

8 Aní eté, ahe rumo aipo ehiñora chupe: ‘Emoingatu voi mbahe che tohu, che toihurã avei. Ipare nde erecarura, ereihura’ ehira chupe.

9 ‘Aviye ndeu’ ndehi chietera icuai pare chupe.

10 Ègüe peye avei mbiguai nungar pe opacatu Tüpa pe cuaitarã ombou vahe mboaviyere, ‘Yande niha mbiguai tẽi yaico. Esepia, yande cuaita mboaviyesar tẽi yaico’ peyeñora” ehi.

Jesús ombogüera diez tupri ava lepra pipe imbaheasi vahe

11 Osose Jesús Jerusalén ve, oguata iví Samaria iyavei iví Galilea rupi.

12 Oyepotase tecuamive oso, ahese yuvínose diez ava lepra pipe imbaheasi vahe yuvireco chupe. Amombrive rumo opitaño yuvireco ichuí.

13 Osapucái yuvireco chupe aipo ehi:

—¡Jesús, Porombohesar, ore paraisuerecomi tẽi eve! —ehi.

14 Sepiase aipo ehi lepra vireco vahe upe:

—Peyevi, peso, tapeyemboyecua pahí eta yuvirecoi vahe upe —ehi.

Oyevise rumo yuviraso, opa ocuera tupri ombaherasisa sui yuvireco.

15-16 Evocoyase ñepeí ipãhu pendar, Samaria pendar, osepiase ocuerasa, oyevi chupe osapucái pĩrata Tüpa upe imboeteisave. Oñenopiha oso sovai, oyavi, “Aviye ndeu” ehi Jesús upe.

17 Evocoyase ahe aipo ehi:

—¿Ndahei vo acói diez tupri opa ocuera ombaherasisa sui yuvireco? ¿Aique que ru ambuae nueve yuvirecoi vahe?”

18 ¡Co mbia ambuae iví pendar güeraño rumo oyevi ‘aviye ndeu’ ohesave Tüpa uve! —ehi.

19 Evocoyase aipo ehi ahe mbia upe:

—Eñarapuha, eso tupriño. Nde poreroyasa pipe niha erecuera eico —ehi Jesús chupe.

Tüpa mborerecuasa yande pãhuve secoi

20 Ñepeí ari pipe fariseo eta, “¿Marase vo aipo oura Tüpa omborerecuasa pipe mbahe moingatu ãgua?” ehi Jesús upe yuvireco. Ahe omboyevi chupe:

—Tüpa mborerecuasa ndahei acói yasepia vahe.

21 ‘Co secoi, aheve secoi’ ndapeyei chira chupe. Esepia, ahe oicove ité pe pãhuve —ehi fariseo eta upe.

22 Ipare aipo ehi güemimbohe eta upe:

—Oimera ari pe peipota tẽira aico vahe rã pe píri que ñepeí ari rupi che, Ava Riquehír, che recosa pipe; ndache repiái chira rumo peye.

23 Iyavei ava, ‘Co secoi, aheve aipo secoi’ ehi tẽira yuvireco cheu. Ndape-saquícue moñai chira rumo.

24 Esepia, inungar acói overa vahe osesape guasu íva rese ocua yepi, ègüe ahera che, Ava Riquehír, vitu ari osupitise che yevi ãgua curi.

25 Yipíndar rumo co iví pipe che paraisu ranera ava cüriteindar mara-mara tẽi che rerecose yuvireco che repiá potaẽhisave.

26 Inungar ava Noé recose yuvirecoi aracahe, ègüe ehi tupri aveira che, Ava Riquehír, yevi ãgua renonde.

²⁷ Esepia, ocaru, oiñu, omendaño avei yuvireco. Oyepotase rumo ari ipapapri amarusu viapi ñgua, ahese Noé yuviroique arca pipe. Ambuae ava rumo opa ocañi tēi yuvireco.

²⁸ Ēgüe ehi avei aracahe Lot recose, ava ocaru tēi, oiñu tēi, virocua tēi mbahe omahera yuvireco iyavei mbahe mondosar tēi, mbahe tīsar tēi, oi aposar tēi avei yuvirecoi oyapīsaçehisa pipe.

²⁹ Osēse rumo Lot tecua Sodoma sui, aviyeteramo tēi oviapi tata amar nungar iva sui. Opa tupri oyuca ava rehii aracahe.

³⁰ Ēgüe ahe aveira aviyeteramo tēi che, Ava Riquehir, ayemboyecuaa curi.

³¹ “Ahe ari pipe acoi ava güeta harive seci vahe, ahe toi que iri eme güeta pipe ombahe renose. Iyavei ava que rupi tēi seci vahe, toyevi iri eme güetave.

³² Sese peyemomahenduha co aracahendar Lot rembireco rese.

³³ Opacatu güecocuer osaisu vahe, ahe ocañi tēira. Iyavei setecuer tēi ocañi vahe, ahe rumo oñepisiora” ehi.

³⁴ “Ahe pītu pipe oimera que ñuvirío ava vupave yuviroque vahe yugüeru: ñepi acoi che reoyasar serasosara, ambuae rumo opitara.

³⁵ Ahese avei ñuvirío cuña ohichora yuvireco: ñepi serasosara, indugüer rumo opitara.

³⁶ Ēgüe ehi aveira ñuvirío ava amombri güecua sui yuvirecoi vahe: ñepi serasosara, indugüer rumo opitara” ehi.

³⁷ Aipo ñehesa renduse, oporandu yuvireco chupe:

—Ore Yar, ¿que vo aipo ěgüe ehira mbahe curi? —ehi.

Ahe evocoiyase,

—Mbahe rehögüer reimesave uruvu oñemonuha atira yuvireco —ehi güemimbohe eta upe.

18

Jesús omboyoya yeruresa cuña imer mano vahecuer iyavei mborerecuar mbahe moingatusar recocuer rese

¹ Jesús omboyoya ambuae ava recocuer sui querēhisa pipe yerureño ñgua ari yacatu rupi

² aipo ehi: “Ñepi tecuave oime mbia mborerecuar mbahe moingatusar ndosiquiyei vahe Tūpa sui, ambuae ava sui avei.

³ Ahe tecuave avei oime cuña imer mano vahecuer. Ahe oso co mborerecuar rētave, ‘Oime ava oyapo mbahe tēi eté cheu, tomboepi cheu’ ehi chupe.

⁴ Yipindar rumo noipitivi potai. Coiye catu rumo cuña ombopihaviracua tēise, ipihañemoñeta iri: ‘Yepe che ndasiquiyei vahe Tūpa sui, ava sui avei ndasiquiyei vahe ité,

⁵ amoingatuñora rumo mbahe co cuña che mañeco tēisar upe. Ayapoñora semimbotar cheu iyu pihēhi ñgua’ ehi opihañemoñetasave” ehi.

⁶ Ipare yande Yar aipo ehi: “Peyapisaca aipo mborerecuar naporai vahe ñehē rese.

⁷ Tūpa avei niha omoingatura mbahe güembiporavo oyeupe yeruresar ari, pītu rupindar upe yepi. Nosaro tēi chiranera opitivi ñgua yuvireco.

⁸ Supi eté Tūpa omoingatu voira mbahe avīye vahe yande porandusa pipe yandeu. Co rumo che, Ava Riquehir, ayevise co ivi pipe vitu, oimera ava moviromi tēi oyeroya vite vahe che rese yuvireco” ehi Jesús.

Yembohesa fariseo sui iyavei guarepochi rerocuasar sui

⁹ Ichui Jesús oporombohe iri ambuae ava recocuer rese. Esepia, oime amove ava aviye ai angahu secoi oyeupe viña, iharive rumo viroiro ambuae ava.

¹⁰ “Ñuvirío ava yuviraso tūparove oyeroku. Ñepeí ava fariseo, ambuae evocoyase ava sui guarepochi rero cuasar.

¹¹ Evocoyase fariseo oso tenonde ava rembiepiave oyeroku aipo ehi: ‘Tūpa, aviye ndeu, che ndahei ambuae ava nungar che recocuér; ndachemondai vahe, ndachereco rai vahe, ndacheaguasa-guasa tēi vahe. Iyavei ndahei eté che recocuer co mbia ava sui guarepochi rero cuasar nungar tēi aico no.

¹² Iyavei ñuvirío yupagüer ñepeí semana pipe ayecuacu ité nde recocuer rese, iyavei ñepeí-peí cien guarepochi che poraviqui repri aipisi vahe sui amboyaho diez che porerecosa ndeu’ ehi.

¹³ Ava sui guarepochi rero cuasar rumo opitaño amombri ichui. Aheve nomahēi iva rese oyeroku ñgua oangaipa mboasisa pipe. Oyepochihanupana aipo ehi: ‘¡Tūpa, che paraisuerecomi eve, che angaipa viyar aico!’ ehi oyeroqui” ehi.

¹⁴ “Sese aipo ahe pēu: co mbia ava sui guarepochi rero cuasar opa oipisi ñerosa Tūpa suindar güetave oso. Fariseo rumo aní eté. Esepia niha, opacatu acoi oyemboivate ai vahe, opara seco rero yisa. Acoi ava seco mbegüe vahe rumo seco mboivate catusara curi” ehi.

Jesús osovasa chihivahe eta

¹⁵ Iyavei chihivahe güeru Jesús uve yuvireco sovasapirā. Evocoyase semimbohe osepiase yuvireco, “¿Mahera vo peruño tēi chihivahe?” ehi opihaviracuasa pipe serusar upe yuvireco.

¹⁶ Jesús rumo aipo ehi:

—¡Mahera ndapeipotai iyu ñgua! Toyugüeruño chihivahe cheu. Esepia, co chihivahe nungar ava yuviroiquera che Ru Tūpa povrive.

¹⁷ Supi eté acoi ndoipisi vahe che Ru Tūpa mborerecuasa chihivahe nungar yuvireco, ahe evocoyase ndoyuviroiquei chietera ipipe —ehi.

Ñepeí mbia mborerecuar imbahe eta vahe omoñeta Jesús

¹⁸ Ñepeí mbia mborerecuar oporandu Jesús upe:

—Porombohesar aviye vahe, ¿imbahe vo ayapora tecovesa apirēhi vahe rereco ñgua? —ehi.

¹⁹ Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepeí aviye vahe ité, ahe Tūpa secoi.

²⁰ Ereicua niha co porocuita aipo ehi vahe: ‘Nandeaguasai chira, ndereporoyucaí chira, nandemondai chira, nanderemirai chira ambuae ava rese, eremboyoyara nde ru, nde si avei’ ehi vahe —ehi chupe.

²¹ Ahe mbia rumo,

—Che aipo nungar opacatu amboaviye ité che chihivahemi suive —ehiño chupe

²² Aipo ihese rumo,

—Ipane vite mbahe ndeu —ehi—. Emondopa rane nde mbahe, ahe sepri evocoyase eremondora ava iparaisu vahe upe. Ichui ererecora mbahe aviye vahe ivave cute. Ipare ereguatara che rupi —ehi chupe.

²³ Aipo oyeupe hese rumo, ahe mbia ndoyembovihai tēi. Esepia niha, mbahe yar ité secoi.

²⁴ Sese omahe aipo ehi:

—¡Yavai eté rumo ava mbahe yar reique ãgua che Ru Tũpa mborerecuasave! —ehi—.

²⁵ Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mborerecuasave seique ãgua —ehi.

²⁶ —¿Ava angahu pĩha evocoiyase oñepisirora yuvireco viña? —ehi sendusar chupe.

²⁷ Evocoiyase ahe chupe aipo ehi:

—Ava tẽi upe mbahe yavai eté, Tũpa upe rumo ndayavaimi eté —ehi.

²⁸ Evocoiyase Pedro aipo ehi:

—Che Yar, ore rumo opa oroseya ore mbahe nde rupi ore guata ãgua —ehi chupe.

²⁹ Evocoiyase aipo ehi güemimbohe upe:

—Supi eté acoi oseya vahe que güëta, güembireco, viquehĩ, vivri, oyesupa, que guahĩ Tũpa mborerecuasa rese,

³⁰ ahe setá iteanga catu oipisira mbahe aviye catu vahe co ivi pipe oseya vahe sui. Ipore rumo tecua ambuaeve oipisi aveira tecovesa apirẽhi vahe curi —ehi.

Jesús omombehu iri omano ãgua

³¹ Evocoiyase yande Yar opa viraso co cotimi doce güemimbohe. Aheve aipo ehi: “Cũritei yasora tecua Jerusalén ve yaico, aheve omboaviyera co Tũpa ñehe mombehusar rembicuachiagüer co che, Ava Riquehĩ, resendar ñehesa.

³² Che imondopri aicora ndaheĩ vahe yande mu upe mara-mara tẽi che rereco ãgua. Che roeroĩro-ĩrora iyavei ondivi-ndivira yuvireco che rese” ehi.

³³ “Iyavei che nupa-nupara. Ipore che yucara yuvireco. Imombosapisa ari pipe rumo acuerayevira omano vahe pãhu sui” ehi.

³⁴ Semimbohe rumo ndosenducuai eté iñehe yuvireco. Esepia niha, yavai eté senducua ãgua yuvireco chupe.

Jesús ombogüera ñepeĩ mbia ndasesapisoi vahe

³⁵ Evocoiyase Jesús ovirovise tecua Jericó oso, aheve mbia ndasesapisoi vahe oguapĩ oĩ peri popive porerecosa oyeupe mondo ãgua rese.

³⁶ Osenduse ahe ndasesapisoi vahe ava rehĩ piambu, aheve, “¿Mbahe vo pẽu?” ehi ava upe.

³⁷ Ahe evocoiyase, “Jesús, Nazaret pendar, ocuara co rupi” ehi yuvireco chupe.

³⁸ Evocoiyase ahe güendapeve oñehe pĩrata:

—¡Jesús, David suindar, che paraisuerecomi tẽi eve! —ehi chupe.

³⁹ Evocoiyase ava tenonde oguata vahe oyaca-yacaño, “Quiriri” ehi yuvireco chupe. Ahe rumo,

—¡David suindar, che paraisuerecomi tẽi eve! —ehi pĩrataño ité chupe.

⁴⁰ Evocoiyase Jesús opitase aheve, oyocuai ava seru ãgua. Ovirovise seru yuvireco, aipo ehi ndasesapisoi vahe upe:

⁴¹ —¿Mbahe vo ereipota ayapo vaherã ndeu? —ehi.

—Che Yar, che mbosarecomi tẽira eve viña —ehi chupe.

⁴² —¡Esareco, erecuera niha! Esepia, ereyeroya ité che rese —ehi chupe.

⁴³ Ahe ramoseve ndasesapisoi vahe, osareco tupri ité; osoño ité Jesús rupi imboetisave. Opacatu ava osepia vahe avei omboetei Tũpa yuvireco.

1 Ichui Jesús oique tecua Jericó pipe oguata oico.

2 Aheve mbia mbahe yar Zaqueo serer vahe secói. Ahe ava sui guarepochi rero cuasar rerecuar.

3 Osepia pota tēi Jesús ‘taicua ité’ oya viña. Ndoicatu rumo opucuehise ava rehii páhuve sepia água.

4 Evocoyase ahe oña tenonde oso ‘tasepia ité’ oyapave, oyeupi ivira rese ivate oĩ senonera.

5 Evocoyase oyepotase, omahe Zaqueo rese ivate chinise, aipo ehi chupe:

—Zaqueo, egüeyi poyava. Esepia, asora nde rētave nde piri —ehi.

6 Aipo oyeupe he ramoseve, Zaqueo ogüeyi voi vorivetesá pipe oipisi.

7 Sepiase rumo opacatu ava, “Yangaipa guasu vahe rētave tēi oso” ehi yuvireco chupe.

8 Evocoyase Zaqueo opūha aipo ehi chupe:

—Che Yar, esendu rane, amboyaho tuprira che mbahe eta ava iparaisu vahe upe; mbahe añomi vahecuer avei, ayapirasa catu-catura irungatu rupi imboyeveí água —ehi chupe.

9 —Co pipe Tūpa oipisiro ité co mbia. Esepia, ahe niha Abraham suindar avei secói.

10 Esepia, che, Ava Riquehir, ayu co ivi pipe ava ocañi tēi vahe pīsiro água —ehi Jesús Zaqueo upe.

Guarepochi sui yembohesa

11 Aipo ñehesa rendu viteseve, Jesús oporombohe ambuae tecocuer re-sendar rese. Esepia, virovi Jerusalén, “Oyepota voi etera revo Tūpa mborerecuasa” ehi ava yuvireco viña.

12 Ahe rumo aipo ehi ava upe imbohe: “Oime mbia imboyeroyapri, ahe senoipri oso vahe rā amombri oivi pendareta rerecuarā oyevise.

13 Oso água renonde oichohopa uca diez tupri güembiguai. Ahese opa omondo ñepeipei upe guarepochi sepirusu vahe, aipo ehi chupe: ‘Peporaviqui co guarepochi rese imboeta água che yevise nara’ ehi. Ipare oso.

14 Setá ava rumo secua pendar saquicuei tēi viroiro yuvireco. Sese omondo moviro ava ‘tomombehú: Ore rumo ndoroipotai ore rerecuarā secói água, tehi yuvireco’ oya viña.

15 “Ahe rumo mborerecuar guasu güecosa pipe oyeve ou cute. Opa uca oichoho oguarepochi pisisarer ‘¿mbovi-mbovi pñha oipisi oyacatu yuvireco?’ oya.

16 Evocoyase yipindar mbia guarepochi oipisi vahe ou voi chupe, ‘Che rerecuar, nde guarepochi oyemboeta diez rupi cheu’ ehi.

17 Evocoyase mborerecuar guasu omboyeveí chupe: ‘Mbiguai aviye vahe ereico, nde cuaita co nde poraviquisa chíhimi vahe eremboaviye ité. Sese ereicora diez tecua guasu pendar rese hañeco água’ ehi chupe.

18 Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe.

19 Aipo ehi tupri avei ahe chupe: ‘Nde evocoyase ereicora cinco tecua pendar rese hañeco água’ ehi.

20 “Ipare voi ambuae ou chupe, ‘Che rerecuar, ndo co nde guarepochi aipoqueño turucuar mi pipe sereco.

21 Esepia, che asiquiye nde sui. Nderecatēhi mete ai vahe mbahe rese. Ambuae ava poraviqui sui tēi iyavei acoi ndahei vahe mbahe nde remiti, ichui tēi avei ereipisi mbahe ndeyeupe nara yepi’ ehi chupe.

²² Evocoiyase mborerecuar guasu aipo ehi chupe: ‘Nde mbiguai ndaseco pōrai vahe ereico. Nde ñehe sui aicuara nde recócuer. Ereicuase ěgüe che hesa viña,

²³ evocoiyase, ¿mahera ru ndereyapocatui che guarepochi guarepochi apocatusave che yevise voi senose āgua cheu imboyeví catumi āgua viña?’ ehi.

²⁴ Evocoiyase, ‘Perocua guarepochi ichui. Pemondora acoi diez rupi guarepochi omboeta vahe upe’ ehi vupindar upe.

²⁵ Supindar rumo aipo ehi: ‘Ore rerecuar, ovireco rumo evocoi diez tupri avei iharive guarepochi’ ehi tēi yuvireco chupe.

²⁶ Evocoiyase mborerecuar, ‘Co rumo supi eté vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara’ ehi.

²⁷ ‘Acoi ava che amotarēhimbar, ndache potai vahe mborerecuarā yuvireco, ahe opara peru cohava che rovai yucapa āgua’ ehi” ehi Jesús ava eta upe.

Jesús oique Jerusalén pipe

²⁸ Jesús aipo ohe pare, oguata vite oso Jerusalén coti.

²⁹ Evocoiyase coie catu tecua Betfagé iyavei Betania rerovicave, ivitri Olivo ipiimi, aheve omondo ñuvirío güemimbohe

³⁰ aipo ehi chupe:

—Peso co tecuamive, yande rovaingarve. Peyepotase aheve, pesepiara guaricu ñapichimbri imoha ava ndoyeupi vitei vahe yuvireco sese. Ahe peyorañora seru.

³¹ Acoi, ‘¿Mahera vo peyora?’ ehise que ava pēu, ‘Yar oiporu pota’ peyeñora chupe —ehi güemimbohe upe.

³² Evocoiyase semimbohe yuviraso, semimombehu rupi tupri ité osepia mbahe yuvireco.

³³ Evocoiyase oyorase guaricu,

—¿Mahera vo peyora ore reimba? —ehi iyar yuvireco.

³⁴ —Yar oiporu pota —ehiño yuvireco chupe.

³⁵ Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyeupi sese oso āgua.

³⁶ Oyeupise oso guaricu harive, oipipira ava oturucuar peri rupi senonera imboetei guasusave yuvireco.

³⁷ Ovirovise ivitri Olivo sui ogüeyi āgua oso, opacatu ava seroyasar supi oguata vahe omboipi osapucái yuvireco vorivetesave mbahe poromondiisa sembiapogüer rese Tüpa upe

³⁸ aipo ehi yuvireco:

—¡Sovasapri seci mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tüpa tasecoi! —ehi.

³⁹ Evocoiyase amove fariseo yuvirecoi vahe supi aipo ehi chupe:

—Porombohesar, eñehe nde rupi oguata vahe upe imonguiriri āgua —ehi tēi yuvireco.

⁴⁰ Evocoiyase aipo ehi:

—Supi eté amombehu pēu: co ava iquiririse yuvireco, ita rumo evocoiyase osapucái pīratarā che mboeteisave —ehi.

⁴¹ Oyeputa senimise tecua Jerusalén ve, ahe tecua repiase, oyaseho sese

⁴² aipo ehi: “¡Pesenducua tarahu co co ari pipe teco tuprisa amondo pota vahe pēu viña, cūrítei rumo ocañi tupriño pe sui, ndapeicatui eté sepia!” ehi oyaseho.

43 “Oimera rumo ari imombehupri naporai vahe pëu curi. Pe amotarêhimbar oñachi irira pe recua. Ipore oyere tuprira yuvireco pe rese pëu ovava ãgua.

44 Iyavei yuviroiquera pe recua pipe, opara pe rêta omonduru yuvireco, pe yuca aveira yuvireco. Ndipoi chietera ita que ñepeï oya vahe ambuae rese. Esepia, ndapeicuai eté Tûpa ouse pëu pe písïro ãgua” ehi Jerusalén pendar rese oyaseho.

Jesús omombopa ava mbahe rerecosar tûparo pipe sui

45 Ichui Jesús oi que judío tûparo guasu pipe. Aheve omboipi ava mbahe mondosar mombopa tupri ocarve oico

46 aipo ehi:

—Icuachiapri aracahendar pipe aipo ehi: ‘Che rêta yeruresa rêtarã’ ehi. Pe rumo, imonda rai vahe rêta nungar tēi pereco —ehi.

47 Ichui ahe tûparo guasu pipe ari yacatu oporombohe oico. Aheve avei rumo pahi eta rerecuar yuvirecoi vahe, Moisés porocuaita rese oporombohe vahe iyavei tecua rerecuar guasu yuvirecoi vahe, ‘¿Mara yahera pîha yuca uca ãgua viña?’ ehi yuvireco chupe.

48 Ndoicatu rumo yuvireco. Esepia, ava rehii oyapisaca iporombohesa rese yuvireco.

20

Jesús mborerecuasa

1 Ñepeï ari Jesús judío tûparo guasu pipe güecose, ombohe ava eta, omombehu ñehesa písïrosa resendar oico. Ahese yugüeru pahi eta rerecuar guasu yuvireco iyavei Moisés porocuaita rese oporombohe vahe, ava rerecuar guasu yuvirecoi vahe avei

2 aipo ehi:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã? —ehi ahe ava yuvireco chupe.

3 Ahe omboyevi chupe:

—Che avei aporandura mbahe rese pëu. Pemboyevira cheu —ehi—.

4 ¿Ava vo Juan ombou ava ãpiramo ãgua: Tûpa pîha, ava tēi tie? —ehi ahe ava yuvirecoi vahe upe.

5 Ahese, “¿Mara yahera pîha?” ehi-ehi tēi oyeupe yuvireco. “ ‘Tûpa’ yahese chupe, ‘¿Mahera ru ndaperoyai?’ ehira yandeu.

6 Anise, ‘Ava tēi remimbou’ yahese chupe, opacatu seroyasar evocoyase yande api-apira ita pipe yuvireco. Esepia, ava, ‘Juan omombehu vahe ñehesa Tûpa suindar’ ehi eté yuvireco chupe” ehi tēi oyeupe yuvireco.

7 Evocoyase ahe ava, “Ndooricuai rumo Juan mbousar, que sui oporoãpiramo oico” ehiño yuvireco chupe.

8 Sese aipo ehi ahe ava upe:

—Sese che avei, ‘Ahe iporocuaita pipe co mbahe ayapo’ ndahei chietera pëu —ehi mborerecuar guasu upe.

Ava mbahe tēi oporaviqui vahe recocuer sui yembohesa

9 Ipore Jesús oñehe ava eta upe ambuae ava recocuer rese aipo ehi: “Oime mbia oñoti vahe uva oivi pipe. Ipore oseya oivi ava oporaviqui vahe upe iporu ãgua. Ichui oso pucu que amombri vahesa rupi.

10 Evocoyase oyepotase ari uva pohosa, ahese omondo ñepeï güembiguai oporaviqui vahe upe imboporandu ‘tomboumi uva pohopri cheundar cheu

cute' oyapave viña. Ahe rumo oinupa-nupaño imboyeve tupri tēi yuvireco serecuar upe.

¹¹ Ipare ambuae güembigui omondo iri no. Ahe oinupa-nupaño, iñehe mara-mara tēi avei ipogüer tēi imboyeve imondo yuvireco.

¹² Ichui omondo iri tēi imombosapisa rese ambuae güembigui no. Ahe oyapicha-pichaño imosē imondo yuvireco.

¹³ “Coive miti yar aipo ehi: ‘¿Mara ahera pīha? Amondora revo che rahir, che rembiaisu. Ahe tie revo, osepiase, omboyeroyara yuvireco’ ehi.

¹⁴ Evocoyase ahe ava tahir repiase, ‘Co aipo oipisira vu mbahe. Yayucaño. Yandeu nara pāve topita co ivi’ ehi oyeupe yuvireco.

¹⁵ Evocoyase ovīnose miti pāhu sui, oyuca ité yuvireco.

“¿Mbahe vo evocoyase oyapora ivi yar ahe ava naporai vahe upe?

¹⁶ Oura evocoyase ahe ava mocañipa āgua, omondora ambuae ava upe oivi rese oporaviqui vaheerā” ehi.

Aipo renduse,

—¿Egüe tehi eme! —ehi ava yuvireco chupe.

¹⁷ Omahese rumo ahe ava rese aipo ehi:

—¿Mara oya vo co aipo ehi icuachiapri aracahendar pipe?:

‘Co ita oi aposar opaño omombo yuvireco, ahe ita rumo aviye catu vahe oi moviracua tupri āgua’ ehi.

¹⁸ Acoi que oviapi vahe evocoi ita harive, opa tēira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecuareta upe.

¹⁹ Pahī eta rerecuar guasu iyavei oporombohe vahe Moisés porocuita rese, iñehe viteseve, oipisi pota tēi Jesús yuvireco. Esepia, osenducua ité oyesendar iporombohesa yuvireco. Osiquiyēño rumo avā rehī sui yuvireco.

Judío rerecuar osecoāha iri tēi Jesús guarepochi rese yuvireco

²⁰ Ahe judío rerecuar evocoyase omondo ava ndaseco asimi angahu vahe iviro, chupe iñehe āgua ‘toyavi angahu oñehe’ oya viraso vaheerā mborerecuar Pilato rovai.

²¹ Ahe evocoyase,

—Porombohesar, ore oroicua nde ñehe iyavei nde porombohesa supi eté vahe. Iyavei nderemboaviratīi vahe nde ñehe yepi. Nde rumo ereporombohe mbahe supi tupri vahe Tūpa recocuere rese.

²² ¿Aviyera pīha yamondo guarepochi Roma pendar mborerecuar ivate catu vahe upe viña? ¿Anī tie? —ehi yuvireco chupe.

²³ Opa rumo oicua iñehe porombopasa tēi. Sese,

²⁴ —Pemboyecua ru ñepeī guarepochi cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborerecuar guasu —ehiño yuvireco chupe.

²⁵ —Taa, pemondo ru mborerecuar uve chupendar, iyavei Tūpa upendar pemondoño ité Tūpa upe —ehi ahe ava upe.

²⁶ Ndoyavi uca catui eté iñehe ava rovaque ipisi āgua yuvireco. Ahe rumo oyeupe imboyeve, iquiriripa tupriño oyepihamondiisa pipe yuvireco.

Porandusa cuerayevisa rese

²⁷ Ipare saduceo, ahe “ndipoi eté cuerayevisa” ehi vahe, yugüeru Jesús upe. Oporandu tēi angahu yuvireco chupe:

28 —Porombohesar, Moisés niha oseyá güembicuachiagüer yandeu aipo ehi: ‘Que cuimbahe omenda vahe omanose guahiêhiseve, tivri evocoyase omen-dara sembirecocuer rese. Ahe viquehir omano vahecuer upe nara tahira oico’ ehi.

29 Evocoyase oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiêhiseve.

30 Ichui tivri omenda sese. Ahe omanoño avei guahiêhiseve.

31 Ipare imombosapisa tivri omenda iri tãi sese. Êgüe ehi tupriño avei chupe. Ambuae ichuindar êgüe ehi tupri avei omanopa yuvireco guahiêhiseve.

32 Coiye cuña avei omano cute.

33 Evocoyase opase ocuerayevi yuvireco, ¿uma rembireco itera pïha omen-dase opacatu siete yuvirecoi vahe rese? —ehi saduceo yuvireco chupe.

34 Ahe rumo omboyeve chupe:

—Co ivi pipe cuimbahe iyavei cuña omenda vahe yuvireco yepi.

35 Ocuerayevi pare oicatu vahe ivave yuviroique vaheerã, chupe ndipo iri chira mendasa.

36 Iyavei nomano chietera aheve. Esepia, yuvirecoira Tüpa rahir, Tüpa rembiguai eta iva pendar nungar yuvireco.

37 Moisés rembicuachía agüer pipe niha caha pãhu sendi vahe resendar oicua uca cuerayevisa yandeu. Aheve aipo ehi: “Ahe niha yande ramoi arachendar Abraham, Isaac, Jacob Tüpa” ehi.

38 ¡Tüpa ndahei omano vahe Tüpa! ¡Ahe rumo oicove vahe ité Tüpa secoi! Esepia, chupe opacatu yuvirecove vahe —ehi saduceo upe.

39 Evocoyase moviro Moisés porocuita rese oporombohe vahe aipo ehi: —Supi eté aipo ere, Porombohesar —ehi yuvireco chupe.

40 Sese niquerêhi iri eté mbahe rese oporandu âgua yuvireco chupe.

¿Ava suindar pïha Poropïsirosar?

41 Evocoyase Jesús aipo ehi ahe ava upe:

—¿Mahera ru, “Poropïsirosar David suindar ité” ehi yuvireco?

42 David teieté niha aipo ehi güembicuachía pipe:

‘Yar aipo ehi che Yar upe:

Eguapi che acato coti

43 acoi che amondose voi eté nde amotarêhimbar ñenopiha âgua nde povrive yuvireco’ ehi David aracahe.

44 ¿Mahera ru, “Poropïsirosar David suindar secoira” peye? David teieté, “Che Yar” ehise chupe —ehi Jesús ahe ava upe.

Jesús oicua uca Moisés porocuita rese oporombohe vahe recocuerai

45 Opacatu ava oñehe rendu viteseve, Jesús aipo ehi güemimbohe upe:

46 “Peicua catu co Moisés porocuita rese oporombohe vahe sui. Esepia, ahe oturucuar ipuca vahe rese oguata pota rai yuvireco yepi, iyavei oipota oyeupe ‘avirave’ apo âgua ocar rupi omboeteisa pipe yuvireco. Oseca avei tenda porañete catu vahe güenara otüparo pipe, carusave avei oseca tenda aviye catu vahe yuvireco.

47 Iyavei vïrocua-rocuña tãi cuña imer mano vahecuer rëta ichui. Oarondaguã tãi avei oyerocuqui pucu-pucu yuvireco. Ahe rumo oipisira Tüpa ñemoirosa ipirata catu vahe yuvireco curi” ehi güemimbohe eta upe.

21

Cuña imer mano vahecuer iparaisu vahe porerecosa

¹ Ipare Jesús osepia ava imbahe eta vahe omondose oporerecosa guarepochi riru pipe yuvireco.

² Aheve avei cuña imer mano vahecuer iparaisu vahe, omondo ñuviriomi guarepochi oporerecosa.

³ Evocoyase Jesús aipo ehi:

—Supi eté co cuña iparaisu vahe omondo catu oporerecosa opacatu mbahe yar sui.

⁴ Esepia, ava imbahe eta vahe, oguarepochi rumbirer tēi omondo oporerecosa Tūpa upe yuvireco. Co cuña rumo oparaisusa pipe virecomi vahe guarepochi oyeupe, opacatu ité omondo oporereco āgua Tūpa upe —ehi.

Jesús omombehu tūparo guasu monduru āgua

⁵ Evocoyase amove semimbohe oñehe yuvireco tūparo guasu recocuer rese: “Co tūparo niha icatupri vahe, ita mopuhapri, porerecosa sui opacatu mbahe icatupri ipipe” ehi yuvireco. Jesús rumo aipo ehi:

⁶ —Oimera ari opacatu co mbahe cūrteite pesepia vahe pipe ndipoi chitera que ñepe ita oyeha vite vahe; opacatu ité imondurusara curi —ehi güemimbohe eta upe.

Cañi renonde sepiasara setá mbahe poromondiisa iva rese

⁷ Evocoyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

⁸ Evocoyase aipo ehi güemimbohe eta upe: “Peicua catu, peyembopa ucai rene catu. Esepia, setá ava yugüerura, ‘Che niha Poropĩsirosar aico, cūrteite osupiti ari imombehupri yandeu’ ehi tēira yuvireco. Ndaperoyai chira rumo ava aipo ehi vahe.

⁹ Acoi peyanduse vavasa iyavei tecua pipendar oyeupe vavase, ndapeyembosiquiyei chira rumo serācua anduse ichui. Evocoi nungar rane ité niha oimera. Ndehi vitei chira rumo ari cañi” ehi.

¹⁰ “Ñepeivi pipendar ovavara ambuae ivi pipendar rese oyeupe yuvireco.

¹¹ Ahese avei oimera ivi ririñi tuvichá vahe, tiavor, mbaherasisa opacatucatu tēi tecua rupi. Iyavei pesepiara iva rese mbahe pe mboisiquiyē vahe, poromondiisa tuvichá vahe avei curi.

¹² “Co mbahe-mbahe tēi reime renondeve rumo pe pisira yuvireco che recocuer sui mara-mara tēi pe rereco āgua. Pe reraso aveira pēu porandu āgua tūparove, pe roquenda aveira, iyavei pe rerasora mborerecuar rovai, mborerecuar ivate catu vahe rovai avei yuvireco che recocuer sui tēi.

¹³ Ipipe pemombehua che recocuer chupe yuvireco.

¹⁴ ‘Aipo ahera añehe’ ndapeyēi chira pepihañemoñeta rereco pe yeepi āgua.

¹⁵ Esepia, che amondora che mbahecuasa pe ñehe āgua. Ndoicatui chitera evocoyase pe amotarēhimbar imboyevi yuvireco pēu.

¹⁶ Pe amotarēhira rumo pe yesupa, pe mu, pe rivri, pe riquehir, pe mboripar avei. Iyavei oyucara amove pe pāhu pendar yuvireco.

¹⁷ Opacatu ava ndape ambotai chira che recocuer sui tēi yuvireco.

¹⁸ Nocañiñi chitera rumo que ñepeivi pe ha pe āca sui.

¹⁹ ¡Peyemoviracua evocoi nungar mbahe upe pe ñepisiro āgua!

²⁰ “Iyavei pesepiase ava Jerusalén rese sundao oyere tuprise, peicuara evocoyase mbahe-mbahe tēi reime āgua yuvireco chupe.

²¹ Evocoyase Judea ve yuvirecoi vahe toñemipa poyava voi ivitri rese yuvireco ichui; tecua Jerusalén pipe yuvirecoi vahe, ahe toyuvínose poyava avei ichui. Iyavei acoi que rupi yuvirecoi vahe, ahe toyeví iri eme yuvireco.

²² Esepia, ahe ari oimera Tūpa ñemoirosa. Ahe omboaviyera icuachiapri arachendar pipe imombehupri.

²³ ¡Paraisu itera ahe ari pipe cuña ipuruha vahe, imembí pītani vahe avei! Esepia, oimera tecoasisa co ivi pipendar upe, ñemoirosa tuvichá vahe ahe ava recocuer rese.

²⁴ Iyavei quise pucu pipe setá ava omanora yuvireco iyavei ambuae setá ava ipisipri serasosara ambuae ivi rese amombrisave. Iyavei ambuae ivi pipendar ava ndahei vahe judío yuvirecoi vahe oiporu itera tecua Jerusalén acoi osupitise voi eté ari imombehupri yuvireco chupe” ehi.

Ava Riquehir yevisa

²⁵ “Iva rese iporēhira poromondiisa, ari rese, yasi rese, yasitata rese; iyavei ivi pipe, opacatú tecua rupi ava ndayaracua iri chira yuvireco. Oyembosiquiye guasu-guasú tēi aveira yuvireco para guasu riapugüer renduse.

²⁶ Ahese ava setá yaracua cañi tēira osiquiyepave yuvireco opihañemoñeta guasu aise co ivi pipe mbahe oime vaherá sui. Ahese avei iva resendar opacatu mbahe oririra.

²⁷ Ahese ramo opacatu ava che, Ava Riquehir, che repiara yuvireco, agüeyise iva quiha rese che pīratasa rendigüer porañetesa pipe.

²⁸ Omboipise evocoi nungar mbahe, peyemonguerēhi catura, peyemopase pe querēhisa pipe. Esepia, pe renosesa pihaivíra mbahe tēi sui” ehi.

²⁹ Iyavei oporombohe ambuae mbahe rese: “Peicua tupri higuera ivira recocuer, anise que ambuae ivira avei.

³⁰ Co ivira soqui ramosé, yaicua cōimi ari sacú vahe yepota āgua yandeu yepi.

³¹ Na ehi aveira pēu che ñehe rupi tupri mbahe pesepiase. Sese peicuara Tūpa mborecuasa cōimi eté secoise.

³² “Supi eté yuvirecove vítera ava osepia vahe co mbahe opase yaviye.

³³ Iva, ivi opara ocañi, che ñehengagüer rumo imboaviyesa rane itera” ehi güemimbohe upe.

³⁴ “Peicua catu, aní pemboavai etepri pe mbahe reroya āgua mbahe tēi aposa pipe, pe caguar tēisa pipe, co ivi pipendar tecocuer rese pe pihañemoñeta tēisa pipe avei. Evocoyase topoēsapiha eme

³⁵ inungar ivonde oviapi vahe ahe ari pipe. Esepia, opacatu ava eta upe oimera evocoi nungar mbahe.

³⁶ Sese peyemoingatu, peyeroqui ari rupi co mbahe tēi sui pe yepēpi āgua, pe yemboycua tupri āgua che, Ava Riquehir, rovai” ehi güemimbohe eta upe.

³⁷ Ēgüe ehi Jesús oporombohe ari rupi tūparo guasu pipe. Pītu pipe evocoyase opita ivitri Olivo rese.

³⁸ Iyavei opacatu ava yuviraso añihiveive tūparo guasu pipe iñehe rendu āgua yepi.

22

Yemborandusa Jesús yuca āgua

¹ Ovírovise Pascua pieta pan ndayapepoi vahe hu āgua,

² ahese pahi rerecuareta, Moisés porocuita rese oporombohe vahe avei ava sui osiquiyepave, oseca-seca tēi Jesús yuca āgua yuvireco.

³ Evocoyase Carugar oi que Judas piha piŕe, ahe acoi doce tupri semimbohe pãhu pendar Iscariote serer vahe.

⁴ Ahe oso pahi eta rerecar yuvirecoi vahe upe, tũparo rãrosar yuvirecoi vahe upe avei imoñeta ãgua, “Tamondo Jesús pe povrive” ehi.

⁵ Ahe evocoyase oyemboviharere yuvireco. “Yamondo guarepochi chupe” ehi voi eté yuvireco.

⁶ Judas evocoyase, “Aviye” ehi. Oseca voi ava porẽhiseve Jesús mondo ãgua yamotarẽhimbar upe.

Yande Yar caru agüer ipa vahe

⁷ Oyepota ari yipindar vahe pan ndayapepoi vahe hu ãgua. Ahe piŕeve avei ovesa Pascua pieta resendar yucapri seropovẽhesa yepi.

⁸ Evocoyase Jesús omondo güemimbohe Pedro, Juan reseve aipo ehi:
—Peso, tapemoingatu yande caru ãgua Pascua pieta resendar —ehi.

⁹ Semimbohe rumo,
—¿Que vo ereipota oromoingatura? —ehi yuvireco chupe.

¹⁰ Evocoyase aipo ehi:

—Peyepotase tecua piŕe, aheve pesepiara mbia vireco vahe cambuchi piŕe i. Pesora sêtave supi.

¹¹ Aipo peyera peñehe oi yar upe: “Ore mbohesar oporandu: ‘¿Uma oi piŕe vo Pascua pieta resendar orohura che remimbohe rese?’ ehi” peyera.

¹² Evocoyase ahe omboyecura oi guasu, ivatendar pẽu. Aheve pemoin-gatura yande caru ãgua —ehi güemimbohe upe.

¹³ Ipare ahe yuviraso, semimobehu rupi tupri ité osepiya mbahe. Aheve omoingatu carusa Pascua pieta resendar yuvireco.

¹⁴ Osupitise icaru ãgua apóstol reseve yuviroguapi mesave.

¹⁵ Evocoyase aipo ehi:

—¿Cueseve tẽi eté niha aipota acaru vaherã pe piŕi Pascua pieta resendar rese che mano ãgua renonde!

¹⁶ Esepia niha, ndayapo iri chira pieta Pascua resendar acoi yaviyese voi eté Tũpa mborerecuasa piŕe —ehi.

¹⁷ Evocoyase oipisi igua riru, “Aviye ndeu” ehi Vu upe, iyavei aipo ehi:
—Co amondora pẽu, perova-rova peyacatu.

¹⁸ Esepia, co piŕe suive ndaihu iri chira uva ricuer acoi ouse voi Tũpa mborerecuasa —ehi.

¹⁹ Ipare oipisi pan, “Aviye ndeu” ehi Vu upe. Aipo ohe pare ombohi-mbohi imondo güemimbohe upe.

—Co che rete, omboyecua imondopirã pe recocuer rese. Na peyera pe mahenduhasa piŕe che rese yepi —ehi.

²⁰ Ëgüe ehi avei carusa pare yapo igua riru rese aipo ehi:

—Co igua riru piŕendar omboyecua che Ru remimbotar ipiasu vahe pẽu nara, ahe che ruvi ipiyerepirã pe recocuer rese nara.

²¹ Cũritei rumo oime mbia mesave yande piŕi che mondo vaherã che amotarẽhimbar upe.

²² Supi eté imboaviyesa itera che, Ava Riquehir, rese ñehesa yipive imombe-hupri. ¡paraisu catura rumo acoi mbia che mondosar! —ehi.

²³ Evocoyase aipo ehise, semimbohe oporandu-randu tẽi oyeupe: “¿Ava piha ãgüe ehi?” ehi tẽi yuvireco.

¿Ava vo ivate catu vahe?

²⁴ Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco.

²⁵ Evocoyase Jesús aipo ehi: “Ava mborerecuar co ivi pïpendar oyocuai pïrata ava yuvireco yepi. Ahe chupe rumo, ‘Mbahe tupri aposar’ ehi yuvireco.

²⁶ Pe rumo ëgüe ndapeyei chira. Acoi oyemboivate pota vahe, toye-mochihivaheño güeco mbegüesa pïpe. Acoi ava cuaisar, tihañeco catu ambuae ava rese.

²⁷ ¿Uma pïha ivate catu vahe: co mesave oguapi vahe ocaru yuvireco? ¿Sese ihañeco vahe tie? Acoi mesave oguapi vahe niha. Che rumo co aico pe pâhuve inungar pe rese ihañeco vahe.

²⁸ “Pe rumo peico vahe che rupi yepi opacatú che recoãhasa pïpe.

²⁹ Sese che amondo pëu pe mborerecuasa inungar che Ru ombou cheu che mborerecuã ägua.

³⁰ Esepia, pecarura iyavei peihura che mborerecuasave che pïri. Iyavei peguapïra opacatu judío recocuer rese porandu ägua” ehi güemimbohe upe.

Jesús, “‘Ndaicuai vahe evocoi mbia’ erera cheu” ehi Pedro upe

³¹ Aipo ehi avei yande Yar:

—Simón, Simón, esendu: Carugar oporandu pe recoãha ägua rese.

³² Che rumo ayeroqui nde rese nde yeroyasa paneëhi ägua. Ereyevise cheu, emonguerëhi catu ambuae nde rivireta imoviracua uca ägua yuvireco oyese —ehi Pedro upe.

³³ —Che Yar, che rumo ayemoingatu voi eté nde rupi che so ägua nde roquendasave iyavei che mano ägua nde rupi —ehi Pedro chupe.

³⁴ —Pedro, supi eté amombehu ndeu: co pïpe, tacura ñehe renondeve, nde, “Ndaicuai eté evocoi mbia” erera mbosapi oyupagüer rupi cheu —ehi.

Vïrovi ité Jesús recoãha ägua

³⁵ Evocoyase Jesús oporandu güemimbohe eta upe:

—Opomondose acoi mbahe rïru porëhi, guarepochi rïru porëhi, ambuae pe pïtaqui ndugüer rerasoëhise, ¿ipane vo acoi mbahe ahese pëu? —ehi.

—Aní eté —ehi yuvireco chupe.

³⁶ Evocoyase,

—Cüritei, acoi mbahe rïru vireco vahe, toviraveño, guarepochi rïru vireco vahe, toviraveño avei; acoi ndovirecoi vahe quise pucu, tomondo oyeaosa quise repirã.

³⁷ Supi eté amombehu pëu: iyacatu ité imboaviye tupri ägua co che rese ñehesa imombehupri aipo ehi vahe: ‘Ava vireco ndaseco pörai vahe nungar yuvireco’ ehi vahe. Supi eté yaviyera co icuachiapirer che resendar —ehi.

³⁸ Evocoyase semimbohe aipo ehi yuvireco:

—Ore Yar, cohave oime ñuvirío quise pucu —ehi.

—Ahe güeraño ité avïye —ehi güemimbohe eta upe.

Jesús oyeroqui Getsemaní ve

³⁹ Ipare Jesús osë oso ivitri Olivo ve. Ahe ivitrive oso yepi, aheve semimbohe yuviraso yuvireco supi.

⁴⁰ Oyepotase aheve yuvireco, Jesús aipo ehi güemimbohe upe:

—Peyeroqui angaipa pe yapoëhi ägua —ehi.

⁴¹ Ipare oyepëpi güemimbohe sui, inungar ita imombosa vahe amombrïmi, aheve oñenopiha, oyeroqui

42 aipo ehi: “Che Ru, ereipotase, che renose eve co mbahe tēi sui; tayapo eme che remimbotar tēi, nde remimbotar rupira rumo” ehi.

43 Evocoiyase oyemboyecua Tūpa rembiguai chupe, seco momirata āgua.

44 Mbahe-mbahe tēi porarasa pipe oyerōqui catu. Ahe sacuvor inungar tuvī osē ichui otiqui ivīve.

45 Oñarapuhase oyerōquisa sui, oyevi oso güemimbohe uve. Ahe rumo opaño yuviroque yuvirocua oviharēhisa pipe.

46 Evocoiyase,

—Mahera opaño peque! Peñarapuha, peyerōqui catu pe viapiēhi āgua mbahe tēi pipe —ehi güemimbohe upe.

Jesús oipisi yuvireco

47 Jesús ñehe vitesese, oyepota ati ava yuvireco chupe. Judas doce semimbohe pāhu pendar tenonde secoi. Ahe oyemboya oso sese sovaupite āgua.

48 Evocoiyase aipo ehi Judas upe:

—Judas, ¿mahera vo che, Ava Riquehir, rovaupitesa pipe che mondo eve che amotarēhimbar upe? —ehi.

49 Semimbohe eta rumo, mbahe-mbahe tēi repiase, oporandu yuvireco:

—Ore Yar, ¿yavavara yande quise pucu pipe? —ehi yuvireco chupe.

50 Ñepeí rumo supindar, pahi rerecuar ivate catu vahe rembiguai nambi yasū cotindar oyasia.

51 Ahe rumo,

—Tehení, evocoi rupive —ehi güemimbohe eta upe.

Ipare opoco inambi rese ombogüera voi.

52 Ichui aipo ehi güecasar opacatu pahi eta rerecuar upe, tūparo rārosar upe, tecua pipendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye?

53 Aicose tūparo pipe pe pāhuve ari yacatu rupi, na ndapeyapoi eté co nungar cheu. Avīyeño rumo, oyepota ité niha pēu imombehupri Carugar pīratasa pipe mbahe-mbahe tēi apō āgua —ehi.

Pedro, “Ndaicuai vahe evocoi mbia” ehi Jesús upe

54 Evocoiyase Jesús oipisi yuvireco, oviraso pahi eta rerecuar ivate catu vahe rētave yuvireco. Pedro rumo amombri rupive tēi osaquicue moñaño oso.

55 Aheve ñachimbri pipe oyatapri yuvireco, oyere tupri tata rese oyephe yuvinoi. Aheve avei Pedro ipāhuve chini.

56 Evocoiyase cuña mbiguai, osepiase Pedro, omahe tupri iri sese aipo ehi:

—Co ava avei niha acoi Jesús rupindar —ehi.

57 Ahe rumo aipo ehíño:

—Cuña, ndaicuai vahe ité ahe mbia —ehi.

58 Iparemi tēi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tēi, ndahei eté rumo che supindar aico —ehi.

59 Ñepeí hora paremi tēi, ambuae aipo ehi chupe:

—Supi eté rumo co ité supi secoi vahe. Esepia, Galilea iguar ité niha —ehi.

60 Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe vitesese, oñehe tacura.

⁶¹ Evocoyase yande Yar oyemboyere sese. Ahe ramoseve oyemomahenduha: “Co pipe tacura ñehe renondeve, ‘Ndaicuai vahe’ erera mbosapi oyupagüer rupi cheu” ihe agüer rese.

⁶² Ahese osê, oyasehó iteanga oso.

Sãrosar mara-mara tẽi Jesús vîreco yuvîreco

⁶³ Evocoyase ava Jesús rãrosar iguayî tẽi yuvîrocua-rocua yuvîreco sese.

⁶⁴ Osesacua yuvîreco. Ipare oporandu yuvîreco chupe:

—¡Eicua ité ru, ava evocoi ocua nde rese! —ehi yuvîreco chupe.

⁶⁵ Iyavei setá mbahe rese oñehe-ñehe tẽi yuvîreco chupe.

Jesús serasosa ava ñemonuhasa ivate catu vahesave

⁶⁶ Ahe ari pipe, cõhese, oñemonuha ava judío rerecuar, pahi eta rerecuar iyavei opacatu Moisés porocuaite rese oporombohe vahe yuvîreco Jesús reraso uca água ava ñemonuhasa ivate catu vahesave, oporandu mbahe rese yuvîreco chupe:

⁶⁷ —¿Supi eté vo nde Poropĩsirosar ereico? Emombehu ru oreu —ehi yuvîreco chupe.

—Amombehu rumo pẽu, ndache reroyai chietera peye —ehi judío rerecuar upe—.

⁶⁸ Inungar che aporanduse mbahe rese pẽu, pe avei ndapemboyevîi chietera cheu viña no.

⁶⁹ Co pipe suive rumo che, Ava Riquehir, aguapira Tũpa mbahe mboavaisarẽhi acato coti —ehi.

⁷⁰ Ichui opacatu ava oporandu yuvîreco chupe:

—Evocoyase, ¿nde ité ereico Tũpa Rahir? —ehi.

—Supi eté niha aipo aipo peye cheu —ehi mborerecuareta upe.

⁷¹ Evocoyase ahe aipo ehi yuvîreco:

—¡Indó! ¿Ava iri vo evocoyase mbahe omombehura yandeu? Yasendu niha ñehe ité cute —ehi mborerecuar oyeupe yuvîreco.

23

Jesús serasosa mborerecuar Pilato rovai

¹ Evocoyase opacatu ava opũha yuvîreco Jesús reraso água mborerecuar Pilato rovai.

² Aheve oiñehengapo aipo ehi yuvîreco:

—Orosepia co mbia oipihãñemoñeta rerova ati uca ava yande recua rupindar aipo ehi: “Pemondoi rene Roma pendar mborerecuar ivate catu vahe upe guarepochi” ehi. Iyavei, “Che Poropĩsirosar mborerecuar ivate catu vahe aico” ehi oico —ehi yuvîreco Pilato upe.

³ Evocoyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboyevî Pilato upe.

⁴ Evocoyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbia que mbahe oyapo vaherã —ehi

⁵ Ahe ava eta rumo,

—Supi eté opacatu ava oipihãñemoñeta mboyeaviratí uca opacatu tecua rupindar. Yipindar ombõipi Galilea rupi oico. Cũritei co Judea ve ãgũe ehiño ité —ehi ava eta Pilato upe yuvîreco.

Jesús imondosa mborerecuar Herodes rovai

⁶ Pilato osenduse aipo ñehesa oporandu, “¿Supi eté pñha co mbia Galilea iguar?” ehi.

⁷ “Ahe pendar ité” ehise yuvireco chupe, ahese omondo Herodes upe, ahe acoi mborerecuar Galilea rupindar. Ahese avei secoi Jerusalén ve.

⁸ Herodes sorivete Jesús repiase. Esepia, setá ari osepia pota tēi serācua anduse yepi. Evocoiyase oipota ité poromondiisa oyapo vaherā oyeovaque viña.

⁹ Sese oporandu ati mbahe rese chupe. Nomboyevii eté rumo Herodes upe.

¹⁰ Aheve opacatú pahi eta rerecuar iyavei Moisés porocuita rese oporombohe vahe eta seroñrosave oñemoñeta-ñeta tēi sese Herodes rovaque yuvireco.

¹¹ Evocoiyase Herodes osundao eta reseve iñehe mara-mara tēi Jesús upe sese oguayi tēisa pipe yuvireco. Omboyemunde avei turucuar iporañete vahe pipe yuvireco. Ëgüe ehi imboyevi Herodes Pilato upe.

¹² Ahe ari pipe suive oyemori Pilato Herodes rese. Ndoyeambotai vahe tie yipindar yuvireco viña.

“¡Tayaticasa!” ehi Jesús upe yuvireco

¹³ Evocoiyase Pilato opa uca omonuha opacatu pahi eta rerecuar, judío rerecuareta, opacatu ava eta avei.

¹⁴ Ipare aipo ehi chupe:

—Pe niha peru co mbia cohava cheu, ‘Omañeco tēi ava secua rupi’ peye. Che rumo aporandu tēi pe rovaque mbahe rese chupe. Ndipoi eté rumo mbahe sembiapo naporai vahe pe remimombehu rupi.

¹⁵ Herodes avei, ‘Ndipoi mbahe sembiapo naporai vahe imano ãgua’ ehi. Sese omboyeviiño Jesús imbou cheu.

¹⁶ Ainupa ucara rumo. Ipare amoseñora —ehi Pilato.

¹⁷ Pascua pieta pipe iya ité Pilato ava upe ñepe soquendapri mose ãgua.

¹⁸ Opacatú guasu rumo ava oñehe pñrata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

¹⁹ Co mbia Barrabás tecua pipe mbahe tēi mopuhasa sui iyavei oporapichisa sui oyeoquenda uca vahe.

²⁰ Pilato rumo omose pota Jesús viña. Sese oporandu iri ava upe imose ãgua.

²¹ Ahe rumo osapucaí pñrata catu yuvireco:

—¡Aní, tayaticasa! ¡Tayaticasa curusu rese! —ehi ati-atiño yuvireco.

²² Imombosapisa rese Pilato oñehe iri:

—¿Mbahe ité vo oyapo naporai vahe? Ndipoi eté niha que mbahe sembiapo yuca ãgua, ainupa uca tēira rumo. Ipare amoseñora —ehi.

²³⁻²⁴ Ava rehii rumo osapucaí pñratá catu yuvireco, “Tayaticasa ité” ehi-ehiño yuvireco. Sese chupe, “Tayaposa evocoiyase semimbotar yuvireco” ehiño Pilato ava eta upe.

²⁵ Ëgüe ehi imose co mbia Barrabás, acoi soquendapri mbahe-mbahe tēi mopuhasa sui, iporapichisa sui avei ava remimbotar rupi. Ipare omondo Jesús sãrosar upe ava remimbotar apo ãgua sese.

Jesús yaticasa curusu rese

²⁶ Oime mbia Simón serer vahe Cirene iguar ou vahe que co coti rupi sui. Ovirasose Jesús yuvireco yatica ãguave, ahe mbia upe, “Nde terevosii curusu rese Jesús raquicuei” ehi voiño tēi yuvireco.

²⁷ Ava rehii yuviraso saquicuei. Cuña avei setá oyaseho oviharēhisave yuvireco sese.

²⁸ Omahese rumo cuña rese aipo ehiño chupe:

—Cuña Jerusalén iġuar, peyasehoi rene che rese. Peyese ae peyaseho, pe membri rese avei.

²⁹ Esepia, oura ari naporai vahe. Ahese aipo peye tēira: ‘Aviye catu acoi cuña nimembii vahe iyavei ndoicuai vahe imocambu omembri’ peye tēira.

³⁰ Ahese avei ava ivitri uve aipo ehira yuvireco: ‘¡Toviapi ore harive!’ ehira osiquiyepave. Iyavei ivivate vahe upe: ‘¡Tore mi!’ ehi tēira yuvireco.

³¹ Esepia, ēgüe ehise ivira yivive vitesse, ¿mara ehira vo catu oipise? —ehi cuña eta upe.

³² Iyavei viraso ñuvirío mbia ndaseco pōrai vahe supive yaticapirā yuvireco.

³³ Oyepotase Ava Āca Cangüer serer vahesave, aheve oyatica curusu rese yuvireco. Iyavei oyatica ñuvirío mbia, ñepeí mbahe rese ipocosa coti, ambuae evocoyase mbahe rese ipocōehisa coti.

³⁴ Ahese Jesús aipo ehi:

—Che Ru, ndeñero co ava upe sembiapo rai rese. Esepia, ndoicuai co mbahe güembiapo yuvireco —ehi.

Sundao evocoyase iguayñio Jesús turucuar rese oyeupe imboyaho-yaho āgua yuvireco.

³⁵ Ava rehii osepia yuvireco; mborerecuareta avei seroñrosave aipo ehi yuvireco chupe:

—Oipisiro ambuae ava, toñepisiro ru ahe ae ité cute Tūpa Rembiporavo Poropisirosar güecosa pipe —ehi yuvireco.

³⁶ Iyavei sundao seroñropare omondo vinagre itoihu yuvireco,

³⁷ iyavei aipo ehi yuvireco chupe:

—¡Nde niha aipo ava judío eta rerecuar guasu ereico! ¡Eñepisiro ru nde ae ité! —ehi sundao eta yuvireco chupe.

³⁸ Curusu rese ñaca harive icuachiapri aipo ehi oñ: “Co judío rerecuar guasu” ehi.

³⁹ Evocoyase ndaseco pōrai vahe yaticapri iñehe mara tēi chupe aipo ehi:

—¡Nde Poropisirosar ereicose, eñepisiro ru nde ae, ore avei ru ore pisiro eve! —ehi chupe.

⁴⁰ Ambuae evocoyase aipo ehi voi ondugüer uve:

—¿Nderesiquiyeimi rutei vo Tūpa sui? Nde avei niha ocañi tēi vaherā.

⁴¹ Yande rumo co yande rembiapo sui tēi mara-mara tēi yande rereco yuvireco; co mbia rumo mbahe sembiapoēhi pipe sui tēi na ehi serecosa —ehi ondugüer upe.

⁴² Evocoyase aipo ehi iri:

—Jesús, che paraisuerecomi tēi eve nde eremboipise nde mborerecuasa —ehi.

⁴³ Evocoyase omboyevi chupe:

—Supi eté co pipe ereicora tecua apirēhi vahesave che rupi —ehi Jesús ahe mbia upe.

Jesús mano agüer

⁴⁴ Osupitise rumo mbiter ari, opa tupri pītu ivi rupi; las tres pipe rumo opa icatu.

⁴⁵ Ari avei ogüe tupri, turucuar guasu tūparo asiāsa avei mbiter rupi tupri ovo.

46 Evocoyase Jesús oñehe pĩrata:

—¡Che Ru, amondo che espíritu ndeu! —ehi.

Aipo ohe pare voi omano.

47 Evocoyase Roma iguar sundao rerecuar osepiase co mbahe poromondiisa Tũpa mboeteisa pipe aipo ehi:

—Supi eté co mbia ndaseco marai vahe —ehi.

48 Iyavei opacatu ava supindar yuvirecoi vahe osepiase co nungar mbahe, oyepochiha nupa-nupa tẽi oyepĩhamondiisa pipe yuvireco.

49 Opacatu avei ava oicua vahe Jesús, ipãhuve cuña Galilea sui yugũeru vahe, osepiãno tẽi amombrive co nungar mbahe yuvireco.

Jesús apocatu agũer tuvĩpa pipe

50-51 Oime mbia aviye etepri vahe, ahe serer José, tecua Arimatea pendar. Ahe tecua ivi Judea pipendar, judío rerecuar ñemonuhasa ivate catu vahe pendar secoci. Ahe mbia viroya vahe ité Tũpa ombou vaheã omborerecuasa pipe mbahe moingatu ãgua. Sese ndahei ipihañemoñeta rupi co mborerecuar oyapo vahe mbahe Jesús upe yuvireco.

52 Evocoyase ahe oso Pilato rõtave oporandu ãgua Jesús rehögũer rese.

53 Curusu sui seroyi pare voi, oimama turucuar secose vahe pipe, ipoyava imondo tuvĩpa pipe ita guasu yohopri ndiporusa vitei vaheve yuvireco.

54 Esepia, ahe ari omoingatu mbahe mbituhusa ari upe nara, ahe mbituhusa rumo osupiti pota ité.

55 Cuña yugũeru vahe Jesús rupi Galilea sui, yuvirasõno ité suvipave, osepia sehögũer apocatuse yuvireco.

56 Oyevise güetave yuvireco omoingatu mbahe siacua vahe tehögũer re-sendar ipichi ãgua.

24

Jesús ocuerayevi

Ahe cuña opituhu mbituhusa ari pipe judío porocaita reroyasave yuvireco. ¹ Cõhe ramomise domingu pipe, oyevi yuvirasõno tuvĩpave mbahe siacua vahe reseve.

² Oyepotase yuvireco tuvĩpave, osepia soquendasa ita guasu ndipo irise güendagũerve.

³ Evocoyase yuviroique voi tuvĩpa pipe. Ndoyosui rumo yande Yar rehögũer yuvireco.

⁴ Ndoyembovĩhai tẽi; ndoicatu iri. Ahese aviyeteramo tẽi osepia ñuvirio mbia iturucuar sendi vahe oipive yuvireco.

⁵ Opaño ñaca iviso ivi coti yuvireco osiquiyepave. Evocoyase co mbia aipo ehi yuvireco chupe:

—¡Mahera peseca tuvĩpa pãhu rupi ava oicove vahe!

⁶ Ndpioi mo cohave; ocuerayevi mo ahe. Peyemomahenduha iñehengagũer ivi Galilea rupi omombehu vahecuer rese,

⁷ “Che, Ava Riquehir, imondoprira ava angaipa viyar povrive, iyavei che aticara curusu rese yuvireco. Mbosapi ari pare rumo acuerayevira” ehi acoi —ehi cuña upe yuvireco.

⁸ Evocoyase cuña oyemomahenduha voi Jesús ñehengagũer rese yuvireco.

⁹ Oyevise tuvĩpa sui yuvireco, omombehu opacatu co once apóstol yuvirecoi vahe upe, opacatu ambuae upe avei.

¹⁰ Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago si María iyavei ambuae cuña eta no.

11 Apóstol upe rumo oyeupe mombehuse aviye aipo ehi tēi vahe; ndoviroyai eté yuvireco.

12 Pedro rumo yandu ramoseve voi, osē, oña oso tuvípave. Omahese tuvípa pípe, turucuar güeraño osepia co cotimi tuisse. Evocoiyase oyepíhamondí tēi “¿mara ehi rutei píha?” oya oyeví oive oso.

Jesús oyemboyecua ñuvirío güemimbohe upe tecua Emaús piar rupi

13 Ahe ari pípeve caharuse, ñuvirío semimbohe yuvíraso tecua Emaús ve. Ahe once kilómetro tecua Jerusalén sui.

14 Ahe perí rupi oñemoñeta yuvíraso opacatu co mbahe oime vahecuer rese.

15 Oñemoñeta viteseve, Jesús teieté oyemboya sese, oguata supi.

16 Yepe osepia tēi, ahe rumo ndoyepiacua ucai eté chupe.

17 Evocoiyase Jesús oporandu chupe:

—¿Mbahe rese vo pe ñehe etepri pe guatasa rupi peico? —ehi.

Aipo hese, opita, ndovíhai yuvínoha.

18 Ipāhu pendar Cleofas serer vahe omboyeví chupe:

—Nde güeraño revo Jerusalén ve ereico vahe ndereicuai mbahe oime vahe tecua pípe —ehi.

19 Evocoiyase,

—¿Mbahe vo oime yandeu? —ehi.

—Jesús mo Nazaret pendar, ahe Tūpa ñehe mombehusar seco pírata vahe opacatu mbahe apo água, mbahe mombehu água avei Tūpa rovaque iyavei opacatu ava rovaque.

20 Omondo pahí rerecuar iyavei yande rerecuareta yamotarēhisave yuca uca água curusu rese yuvireco.

21 Ore rumo oroyeroya ité sese. “Ahe yande písirora yande amotarēhimbar sui” orohé chupe víña. Cūrítei rumo opa mbosapí ari yucare.

22 Ore pāhu pendar cuña ndore mbovíhai eté oyevíse suvípa sui yuvireco. Esepia, yipíndar yuvírasose añihiveive tuvípave,

23 ndoyosui eté sehögüer yuvireco. Ahese aipo osepia Tūpa rembiguai aipo ehi vahe yuvireco chupe: “Jesús mo oicove cūrítei” ehi. Ahe evocoiyase yugüeru imombehu oreu.

24 Iyavei ambuae ore ndugüer yuvírasose tuvípave cuña remimombehu rupi tuprí avei. Ndosepiai eté rumo Jesús yuvireco —ehi Cleofas chupe tuprí ité.

25 Evocoiyase aipo ehi ahe ñuvirío mbia upe:

—¡Ndapeicuai eté rumo pe píha pípe seroya tuprí água opacatu Tūpa ñehe mombehusar remimombehugüer!

26 ¿Ndapeicuai vo Poropísirosar iparaisu rane itera mbahe-mbahe tēi vírecosa pípe güecua porañetesave güeique água renondeve? —ehi.

27 Ipare opa omombehu icuachiaprí Moisés cuachiar pípendar iyavei opacatu Tūpa ñehe mombehusar cuachiar pípendar oyese ñehe agüer.

28 Oyepotase ahe tecuave yuvíraso, Jesús rumo aviye oguataño vite vaherã senonde.

29 Co mbia rumo oñehe yuvireco chupe:

—Epitaño ore píri, caharu etepri. Pítura moco ndeu —ehi yuvireco chupe.

Evocoiyase oíque, opitaño ipíri yuvireco.

30 Oguapise yuvínoi mesave, oipisí pan, “Aviye ndeu” ehi Tūpa upe. Ipare ombohi co ñuvirío mbia upe imondo.

³¹ Ahese voi semimbohe omahecua ramo yuvireco sese, ahe rumo cūrteimi ndoyemboyecua iri sovai chupe.

³² Evocoiyase aipo ehi oyeupe yuvireco:

—Yande mbopihañemoñeta pīratami eté peri rupi oñehese yandeu co tecocuer icuachiapri rese —ehi yuvireco.

³³ Ipare ndopita pucu iri; oyevíño voi yuviraso tecua Jerusalén ve. Aheve osepia once tupri vahe apóstol, omboetasa avei.

³⁴ Ahese oñemonuha vahe aipo ehi yuvireco:

—Supi eté rumo yande Yar ocuerayevi. Esepia, oyemboyecua ité Simón upe —ehi.

³⁵ Evocoiyase ahe avei omombehu, “Oreu avei oyemboyecua oroguatase peri rupi. Ombohise pan ore piri, ahese ramo orocua” ehi yuvireco omboetasa upe.

Jesús oyemboyecua güemimbohe eta upe

³⁶ Ahe oñehe viteseve yuvireco co tecocuer rese, ahese Jesús oyemboyecua chupe aipo ehi:

—Avirave, mbahe tupri pipe tapeico —ehi güemimbohe eta upe.

³⁷ Ahe rumo oyembosiquiye guasu yuvireco ‘hägüer revó’ oyapave.

³⁸ —¡Mahera pesiquiye! ¡Mahera pereco vite pe poreroyaëhisa pe piha pipe!

³⁹ Pemahe che po rese, che pi rese avei. Che ité niha co aico. Pepoco ru che rese. Tache reroya ru peye. Esepia, ava hã ndovirecoi voho iyavei ocangüer; che rumo areco ité —ehi güemimbohe eta upe.

⁴⁰ Aipo ohe viteseve omboyecuapa opo, opi avei chupe.

⁴¹ Ahe rumo vorivetesa pipe iyavei oyepihambosiquiye vitesa sui ndoviroya tupri vitei eté yuvireco. Evocoiyase aipo ehi:

—¿Perecomi vo mbahe yande caru ãgua? —ehi güemimbohe upe.

⁴² Evocoiyase omondo pira apiremi oyi vahe yuvireco chupe.

⁴³ Ipare oipisi, ohu opacatu güemimbohe rovaque.

⁴⁴ Ipare aipo ehi:

—Co rese acoi añehe vichico cuese pe rese aico vitese che mano renondeve. Yaviye ranera opacatu ñehesa che resendar Moisés porocuita cuachiapri pipe, iyavei Tüpa ñehe mombehusar yuvirecoi vahe rembicuachiagüer pipe, Salmo pipe avei —ehi.

⁴⁵ Ëgüe ehi evocoiyase opacatu osenducua uca arachendar icuachiapirer güemimbohe upe

⁴⁶ aipo ehi:

—Co icuachiasa Poropĩsirosar iparaisura omano ãgua. Ipare mbosapi ari pare ocuerayevira.

⁴⁷ Jerusalén sui tupri opacatu ivi yacatu rupi imombehusara serer pipe, “Pemboasi pe angaipa, peyevi Tüpa upe pëu ñeroi ãgua” hesara.

⁴⁸ Pe niha peico opacatu co nungar mbahe repiasar imombehu ãgua.

⁴⁹ Che amboura che Ru remomombehu pe harive. Pepitañora rumo cohava tecua Jerusalén ve acoi peipisise voi pīratasa iva suindar —ehi güemimbohe eta upe.

Ívave Jesús so agüer

⁵⁰ Evocoiyase Jesús yuvinose tecua sui yuviraso tecua Betania popive. Aheve ñuvirio opo omopuha, osovasa mbahe tupri reime ãgua chupe.

⁵¹ Ipare oyepepi güemimbohe sui. Ahe ramoseve serasosa ivave.

⁵² Semimbohe evocoiyase osapucaí imboetéisave. Ipare oyeveí Jerusalén ve vorivetesa pípe yuvireco.

⁵³ Iyaveí ahe ari yacatu rupi yuviraso tũparo guasu pípe osapucaí Tũpa mboetéisave yuvireco yepi. Aipo rupive.

JUAN REMBICUACHIA JESUS RECOUER RESENDAR SAN JUAN

Tūpa Ñehe oyeapo ava

¹⁻² Jesús yipisuive ité Tūpa Ñehe secói. Ahe oicove mbahe apoēhi viteseve Tūpa rese. Esepia, ahe niha Tūpa secói.

³ Ipípe avei Tūpa opacatu mbahe oime vahe oyapo; ndipoi eté mbahe sembiapoēhi.

⁴ Jesús niha vireco tecovesa apirēhi vahe oyese. Ahe tecovesa tesapesa nungar secói opacatu ava upe.

⁵ Ahe tesapesa omboyecua tecocuer supi eté vahe p̄tumimbi nungar mbahe naporai vahe aposar p̄huvé. Ahe mbahe tēi aposar rumo ndoicatui eté secopi yuvireco.

⁶ Oime mbia Tūpa remimbou. Ahe Juan serer vahe.

⁷ Ahe rumo ou co tesapesa cua uca āgua ‘toviroya opacatu ava yuvireco’ ohesave.

⁸ Ahe rumo ndahei eté tesapesa; imombehusar tēi rumo secói.

⁹ Co tesapesa supi eté vahe osesape opacatu ava. Ahe ou ité co ivi p̄ipe.

¹⁰ Yepe tie ipípe yapopri opacatu ava viña, sembiapo rumo ndoicuai co ivi p̄ipe secoise yuvireco.

¹¹ Supi eté ouse güecuave, secua pendar ae rumo ndoipisii yuvireco.

¹² Opacatu rumo acoi oipisi vahe seroyasave yuvireco, ahe chupe omondo ñeñarosa Tūpa rahir secó āgua yuvireco.

¹³ Ndahei rumo co ivi p̄ipendar rahir nungar que oha vahe ambuae ava remimbotar p̄ipe tēi. Ahe rumo Tūpa rahir ité yuvirecoi.

¹⁴ Ipare ahe Tūpa Ñehe, oyeapo ava, oicove yande p̄huvé co ivi p̄ipe oporoaisusave mbahe supi eté vahe aposa p̄ipe. Iyavei orosepia ité seco porañetesa. Co seco porañetesa oipisi vahe Vu sui Tahir ñepeí vahé güeco p̄ipe.

¹⁵ Juan niha oñehe sese ava upe aipo ehi: “Co uve niha acoi aipo ahe vahe cuese: ‘Acoi ou vaheṛā che raquicuēi, ahe ivate catu vahe che sui. Esepia, yipive ité secói che yesuēhi viteseve’ ahe” ehi.

¹⁶ Esepia, opacatu ité yaipisiño iporovasasa tuvichá vahe ombouño vahe ité yandeu ari yacatu rupi yepi.

¹⁷ Mborocuaíta yaipisi Moisés sui; porovasasa rumo iyavei mbahe supi eté vahe, ahe güeru Jesucristo yandeu.

¹⁸ Ndipoi eté ava osepia vahe Tūpa; Tahir ñepeí vahe, secói vahe ité ip̄iri, ahe oicua uca yandeu.

Juan Oporoāpiramo vahe oñehe Jesucristo rese

¹⁹ Judío rerecuar guasu tecua Jerusalén pendar oyocuai pahi eta iyavei ip̄it̄ivisareta imondo Juan uve ‘¿Ava vo nde? tehi yuvireco chupe’ oyapave icua āgua.

²⁰ Ahe rumo oyemombehu ité aipo ehi:

—Che ndahei eté Porop̄is̄irosar aico —ehi.

²¹ Evocoiyase oporandu iri yuvireco:

—¿Ava ité vo nde? ¿Nde tie Elías erico? —ehi.

—Ndahei eté che ahe aico —ehi.

Evocoiyase,

—¿Nde tie acoi Tüpa ñehe mombehúsar ou vaheerã? —ehi yuvireco chupe.

—Aní eté —ehi.

²² —¿Ava rutei vo evocoiyase nde? ¡Emombehu oreu ore oromombehu vaheerã ore mbousar uve! ¿Mbahe ité vo eremombehura ndeyesuindar oreu? —ehi yuvireco chupe.

²³ —Che aico oñehe vahe ivi iporupirêhisa rupi aipo ahe: ‘Pemoingatu pe recocuer yande Yar yepotase nara’ ahe pëu. Ahe inungar acoi Tüpa ñehe mombehúsar Isaías aipo ehi vahe aracahe —ehi.

²⁴ Ahe yuviraso vahe chupe, fariseo remimondo yuvirecoi,

²⁵ oporandu yuvireco chupe:

—Evocoiyase ndahehi niha aipo nde Poropírosar, ndahehi avei Elías, ndahehi eté Tüpa ñehe mombehúsar imombehupri ereico. ¿Mahe ru evocoiyase ereporoãpiramo? —ehi yuvireco chupe.

²⁶ Evocoiyase fariseo upe aipo ehi:

—Che rumo i pipe aporoãpiramo; oime rumo mbia pe pãhuve ndapeicuai vahe.

²⁷ Ahe co ivi pipe ou vaheerã che raquicuei. Che rumo ndahehi eté seco catupri vahe aico ipitaquisã yora ãgua —ehi.

²⁸ Co opacatu mbahe yaposa tecua Betania ve, iai Jordán rovai añihivei coti. Aheve Juan oporoãpiramo yepi.

Tüpa remimbu Ovesa nungar opacatu ava angaipa repirã

²⁹ Ahere ayihive Juan osepia Jesús oyemboyase oyese aipo ehi: “¡Pesepia, co Tüpa remimbu Ovesa nungar seropovêhepirã opacatu ava angaipa mocañi ãgua!

³⁰ Añehese sese aipo ahe: ‘Che raquicuei oura mbia ivate catu vahe che sui. Esepia, yipive vahe ité che sui’ ahe acoi cuese.

³¹ Che rumo yipindar ndaicuai ahe yande remiaro ou vaheerã. Sese niha aporoãpiramo i pipe vichico imboyecua ãgua che mu judío yuvirecoi vahe upe” ehi.

³² “Che asepia Espíritu Santo ogüeyise íva sui inungar apicasu, opita tupri iharive” ehi.

³³ “Yipindar rumo ndaicuai eté. Tüpa che cuai vahe rumo che poroãpiramo ãgua i pipe, aipo ehi cheu: ‘Acoi eresepiase Espíritu Santo ogüeyise, opítase mbia harive, ahe mbia oporoãpiramora Espíritu Santo pipe’ ehi.

³⁴ Che niha asepia ité. Sese, ‘Co Tüpa Rahir ité secoi’ ahe pëu” ehi.

Yipindar vahe Jesús remimbohe

³⁵ Ahere ayihive Juan secoi aheve avei ore ñuvirío mbia oroico vahe reseve.

³⁶ Jesús ore cuãse, Juan aipo ehi oreu:

—¡Pesepia, ndo co mbia Tüpa remimbu Ovesa nungar seropovêhepirã! —ehi oreu.

³⁷ Aipo ihe ramoseve, oroguata voi eté supi.

³⁸ Evocoiyase omahe guaquicuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoiyase,

—Porombohesar, ¿que vo nde recosa? —orohe chupe.

³⁹ —Yaso, tapesepia ru —ehi oreu.

Evocoiyase oroso, oroyepota las cuatro pipe secosave. Aheve ore pítu ité ipiri.

⁴⁰ Simón Pedro rivri, Andrés, ahe che ndugüer ahese.

⁴¹ Ahe rane aipo oseca viquehir Simón aipo ehi chupe:

—Orosepia ité Poropĩsirosar —ehi ('Cristo' oyapave).

⁴² Ipare voi, vıraso Simón Jesús uve. Osepiase, Jesús aipo ehi chupe:

—Nde Simón, Juan rahır, ndererguã rumo Cefas —ehi ('Pedro' oyapave).

Jesús oñehe Felipe upe, Natanael upe avei oyeupi iguata ãgua

⁴³ Ahere ayihive voi Jesús ipihañemoñeta oso ãgua ivı Galilea rupi. Aheve osepia Felipe, aipo ehi chupe:

—Erio che rupi —ehi.

⁴⁴ “Avıye” ehi Felipe, ahe Pedro iyavei Andrés reca Betsaida pendar secoi.

⁴⁵ Ipare oso Natanael reca, aipo ehi chupe:

—Orosepia Poropĩsirosar, sesendar acoi Moisés oicuachía cuachiar porocuaita resendar pipe aracahe, oicuachía avei sesendar Tũpa ñehe mombehusareta yuvireco. Ahe Jesús, José rahır, tecua Nazaret pendar —ehi.

⁴⁶ Natanael rumo aipo ehi:

—¿Oime pĩha yuvinose vahe ava avıye vahe Nazaret pendar? —ehi.

—Yaso, teresepia ru —ehi Natanael upe.

⁴⁷ Acoi oyepota senise Natanael ou, Jesús sepiase, aipo ehi voi chupe:

—Co mbıa secoi judío ete ité, ndoporombopai vahe —ehi.

⁴⁸ —¿Mara ere che cua eve? —ehi Natanael chupe.

—Che oroepia yıpive Felipe nde reca renondeve ivıra hıgueravrıve ereicose —ehi Natanael upe.

⁴⁹ —Porombohesar, ınde niha Tũpa Rahır ereico, Israel iguar rereciar guasu! —ehi Natanael chupe.

⁵⁰ —ıChe reroya voi eté acoi, “Oroepia ivıravrıve” che he sui tẽi eve! Eresepıara rumo co mbahe sui avıye catu vahe —ehi.

⁵¹ Iyavei aipo ehi opacatu upe:

—Supi eté pesepiara ıva oyemboi tuprise iyavei Tũpa rembiguai eta igüeyise che, Ava Rıquehır, upe, iyeıvise avei ivave yuvireco —ehi.

2

Mendasa tecua Caná ve

¹ Ipare imombosapısa arı pipe, oime mendasa tecua Caná ve, Galilea ivı rupi. Jesús sı avei secoi aheve,

² iyavei Jesús ore semimbohe oroico vahe reseve ore soho avei yuvireco aheve.

³ Ęgüe ehi rumo opa tẽi uva ricuer. Evocoyase Jesús sı,

—Ndipo iri uva ricuer —ehi chupe.

⁴ —Cuña, ¿mahera vo aipo ere cheu? Che remimbotar rumo arı ndoyepota vıtei cheu —ehi osi upe.

⁵ Ichı rumo aipo ehi ava igua rese ihañeco vahe upe:

—Peyapo opacatu semimbotar pe cuaise —ehi.

⁶ Aheve oime seis cambuchi guasu ita cuhi apoprı, ñepeı-peı cambuchi pipe oıque cincuenta litro, amove oıque setenta litro ı ipıpe. Ahe judío oıporu pıetase oyepoi ãgua yuvireco Tũpa porocuaita mboavıye ãgua yepı.

⁷ Evocoyase ahe ava igua rese ihañeco vahe upe aipo ehi:

—Pemboapıpopa co cambuchi ı pipe —ehi.

Omboapıpopa tuprı yuvireco.

⁸ Evocoyase aipo ehi ava ihañeco vahe upe:

—Penosemi chíhi, peraso pıeta rese hañecosar uve —ehi.

Ęgüe ehi eté yuvireco.

⁹ Ihañeco vahe pieta rese osãha i oyeapo vahe uva ricuer. Ndoicuai eté que sui osê ahe uva ricuer; igua rese ihañeco vahe güeraño tupri oicua yuvireco. Evocoiyase pieta rese hañecosar oñhehe cuimbahe omenda vahe upe

¹⁰ aipo ehi chupe:

—Opacatu ava omondo uva ricuer aviye catu vahe yipindar. Ipape acoi ava hñaropase yuvireco, omondo ndasepiñ vahe. Nde rumo ereyapocatupaño aviye catu vahe, ahe cūrítei ramo erenose —ehi.

¹¹ Co yipindar vahe poromondiisa Jesús oyapo vahe aheve. Ipape omboye-cua güeco pñratasa. Sese semimbohe viroya ité yuvireco.

¹² Ipape oso tecua Capernaum ve, ichi avei, tivri reseve supive, iyavei ore semimbohe eta oroso supí. Aheve oroico moviro ari tēi.

Jesús omombopa ava mbahe rerecosar tūparo pipe sui

¹³ Ipape judío upendar Pascua pieta yepota senise, Jesús oso Jerusalén ve.

¹⁴ Aheve osepia tūparo guasu pipe corero ivipi rupi guarepochi rese mbahe mimba eta mondosar; guaca, ovesa iyavei apicasu. Aheve avei mbia guarepochi recuñarosar yuvinoi.

¹⁵ Co mbahe repiase rumo, Jesús oyapo tucumbo omombopa tupri tūparo sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otiapi-apii iguarepochi ivi rupi, iyavei imesa opa omombo.

¹⁶ Apicasu mondosareta uve aipo ehi:

—¡Penosepa co mbahe cūrítei ave sui! —ehi—. ¡Aní che Ru rēta mbahe mondosa tēi pereco! —ehi.

¹⁷ Aipo hese, ore yomomahenduha ñehesa icuachiapri aracahendar aipo ehi vahe rese: “Nde rēta rese che recatēhisa sui che mocañira” ehi vahe.

¹⁸ Evocoiyase judío mborerecuar yuvirecoi vahe oporandu yuvireco chupe:

—¿Mbahe vo ereyapora nde mborerecuasa moporēhi ñgua oreu cūrítei? —ehi yuvireco chupe.

¹⁹ Evocoiyase,

—Pemondurupa co tūparo, che evocoiyase mbosapi ari rupive amopuha irira —ehi judío eta upe.

²⁰ Aipo hese, mborerecuar aipo ehi yuvireco chupe:

—Co tūparo rumo imopuhasa cuarenta y seis araviter rupi, ¿ereicatura pñha aipo nde imopuha iri mbosapi ari rupive? —ehi yuvireco chupe.

²¹ Oñehese Jesús tūparo rese, güete upe tēi rumo aipo ehi.

²² Ocuera yevise rumo manosa sui, ore oryomomahenduha ñhehe agüer rese. Sese oroviroya sesendar ñehesa icuachiapri pipe iyavei semimombe-güer.

Jesús oicua opacatu ava recocuer

²³ Jesús secói vitese Jerusalén ve Pascua pieta pipe, setá ité ava viroya osepiase poromondiisa sembiapo yuvireco.

²⁴ Ndoyeroyai eté rumo ahe ava eta rese. Esepia, opacatu ité ava recocuer oicua.

²⁵ Ndipoi eté que ambuae ava pihañemoñeta mombehu ñgua chupe. Esepia, ahe ité opa oicua.

¹ Oime mbia fariseo, Nicodemo serer vahe, ahe mbia mborerecuar judío pãhuvē secoi vahe.

² Ahe oso Jesús piri pĩtu pipe, aipo ehi chupe:

—Porombohesar, oroicua ité Tũpa nde mbose ore mbohe ãgua —ehi—. Esepia, ndipoi eté que ava oicatu vahe evocoi nungar poromondiisa apo Tũpa oyese secoẽhise —ehi.

³ Evocoiyase,

—Supi eté aipo ahe ndeu: acoi ava ndoyesu piasu iri vahe, ndoiqei chietera Tũpa mborerecuasave —ehi Jesús chupe.

⁴ Oporandu rumo aipo ehi:

—¿Mara ehira vo aipo ava oyese piasu iri ocuacua pipe viña? —ehi—. ¿Oicatu irira piha osi aviterve oi que oyese iri ãgua? —ehi Jesús upe.

⁵ Jesús omboyeve chupe:

—Supi eté aipo ahe ndeu: acoi ava i pipe iyavei Espĩritu pipe ndoyesu vahe, evocoi nungar ndoyuviroi quei chira Tũpa mborerecuasave.

⁶ Acoi oyese vahe co ivi pipendar oyesupa sui, inungar tupri avei ahe; Espĩritu pipe oyese vahe rumo, ahe espĩritu.

⁷ Ereyepihamondi rene, ‘Peyesu piasu irira’ ahese ndeu.

⁸ Co rumo inungar ivitu oi peryu vahe güemimbotar rupi. Yepe sendusa siapu, ndicuasai rumo que sui turi, que oso no. Ëgüe ehi avei ava oyese vahe Espĩritu pipe —ehi Jesús chupe.

⁹ —¿Mara ehi piha aipo evocoiyase? —ehi Jesús upe.

¹⁰ —iNde niha porombohesar ivate vahe Israel pendar ereico, nderesenducai eté rumo co nungar mbahe! —ehi chupe—.

¹¹ Supi eté aipo ahe ndeu: ore oromombehu mbahe oroicua vahe, orosepia vahe ité. Pe rumo ndaperoyai eté ore remimombehu.

¹² Añeche tẽi niha mbahe co ivi pipendar rese pẽu; ndache reroyai eté rumo peye. Tahetru revo mbahe i va pendar amombehuse pẽu ndaperoyai chietera viña —ehi.

¹³ “Esepia, ndipoi eté ambuae ava ivave oyeupi vahe; che güeraño, Ava Riquehir, i va sui agüeyi vahe pẽu.

¹⁴ Inungar Moisés osupi ivate mboi rahanga ivi iporupirẽhisa rupi aracahe. Ëgüe ehi aveira che, Ava Riquehir, rerecosa ivate che rupira yuvireco

¹⁵ opacatu ava che reroyasar tecovesa apirẽhi rereco ãgua yuvireco” ehi Jesús Nicodemo upe.

Tũpa poroaisusa ava upe nara

¹⁶ “Supi eté Tũpa osaisú iteanga opacatu ava. Sese ombou Guahir ñepi vahe ‘tocañi tẽi eme che Rahir reroyasar yuvireco’ oya, ‘tovireco tecovesa apirẽhi vahe’ ohesave.

¹⁷ Esepia, nombou Tũpa Guahir co ivi pipe ava mocañi tẽi ãgua; ahe rumo ombou ava piñiro ãgua.

¹⁸ “Ava viroya vahe Tũpa Rahir, ndahei eté ocañi tẽi vaherã; acoi ava ndoviroyai vahe rumo, oipisi itera cañisa yuvireco Tũpa Rahir ñepi vahe reroaẽhisa pipe.

¹⁹ Ëgüe ehi etera chupe yuvireco. Esepia, tesapesa supi eté vahe ou co ivi pipe, ahe ava rumo oipota catu mbahe Carugar suindar pitumimbi vahesave güeco ãgua yuvireco.

²⁰ Supi eté acoi opacatu ava oyapo vahe angaipa, ndosepia potai tesapesa, iyavei ndoyemboyai tesapesa rese yuvireco oangaipa mboyecua potaëhisave.

²¹ Acoi ava yuvirecoi vahe rumo mbahe supi eté vahe aposa pipe, oyemboya tesapesa rese yuvireco mbahe Tüpa remimbotar oyapo vahe cua uca ägua opacatu ambuae ava upe —ehi.

Juan Oporoãpiramo vahe oñehe iri Jesús rese

²² Ipare Jesús oso güemimbohe eta rese ambuae tecua rupi-rupi ivi Judea ve. Aheve secoi pucu raimi oporoãpiramo.

²³ Iyavei Juan oporoãpiramo vite Enón ve, Salim rerovicave. Esepia, aheve tuvichá i oime. Aheve ava yugüeru oñeapiramo uca ägua.

²⁴ Co rumo mbahe yaposa Juan roquendaëhi vitesevé.

²⁵ Evocoyase Juan remimbohe omboipi ambuae omu judío rese oyeecopipopi vahehá i pipe ñeapiramosa resendar sui tēi yuvireco.

²⁶ Sese yuviraso Juan uve aipo ehi:

—Ore mbohesar, acoi secoi vahe nde rese iai Jordán rovai, sese acoi ereñehe oreu, cūritei ahe oporoãpiramoño tēi iyavei opacatu yuviraso supi —ehi semimbohe yuvireco chupe.

²⁷ Evocoyase aipo ehi güemimbohe upe:

—Ava ndoicatui mbahe apo Tüpa nombouise chupe.

²⁸ Pesendu tupri ité che ñehe cuese: “Che ndahei Poropísirosar aico, che rumo senonde imboupri tēi aico” ahesé pēu.

²⁹ Esepia, acoi mendasa oimese, vireco vahe güembirecovi ahe imevi, osenduse rumo imboripar iñehe yivii ohã, oyemboviharete sese. Ëgüe ahe avei che cūritei, ayemboviharete Jesús rese.

³⁰ Ahe niha seco ivate catu-catuño itera ari rupi oico; che rumo ivi coti catu aicora ichui —ehi Juan güemimbohe upe.

Iva suindar ou vahe

³¹ Iva suindar ou vahe ivate catu ité opacatu sui. Co ivi pipe oyesu vahe rumo co ivi pipendar ité. Sese niha mbahe ivi pipendar rese tēi oñehe. Acoi ou vahe rumo iva sui, ivate catu ité opacatu sui.

³² Iyavei mbahe güembiepia osendu vahe reseño ité oñehe. Ndiptoi eté rumo semimombehu viroya vahe yuvireco.

³³ Acoi ava viroya vahe rumo iñehe, “Supi tupri ité Tüpa omombehu mbahe” ehi.

³⁴ Co Tüpa remimbou niha omombehu Tüpa ñehe. Esepia, Tüpa omondo ité oEspíritu sese.

³⁵ Tüpa osaisu Guahir iyavei opacatu mbahe omondo ipove.

³⁶ Opacatu ava viroya vahe Tüpa Rahir, vireco ité tecovesa apirëhi; acoi ndoviroyai vahe rumo, ndovirecoi chietera co tecovesa. Ahe rumo oipisira Tüpa ñemoirosa ipirata vahe ité yuvireco.

4

Jesús oñehe Samaria pendar cuña upe

¹ Fariseo eta oyandu yuvireco Jesús vireco catuse ava oyeupi oguata vahe iyavei oporoãpiramo catuse avei Juan sui

² (ndahei eté rumo Jesús oporoãpiramo; semimbohe tēi rumo ëgüe ehi yuvireco).

³⁻⁴ Jesús oicuase aipo nungar, osẽ Judea sui, oyevi iri ivi Samaria rupi, Galilea ve yuviraso.

⁵ Aheve Samaria ivi rese oyepota tecua Sicar serer vaheve yuvireco. Ahe tecua rerovicave oime ivi Jacob omondo vahecuer guahir José upe aracahe.

⁶ Aheve oime ivicuar, chupe, “Jacob iguagüer” ehi yuvireco. Ahe igua rembe rese Jesús oguapĩ mbiter ari potase ocueraise oi.

⁷⁻⁸ Semimbohe eta rumo opacatu yuviraso tecuave mbahe tembihu rocua. Aheseve cuña, Samaria pendar, oyepota iguave i renose. Ahese Jesús aipo ehi chupe:

—Emboumi chĩhi nde i taihu —ehi.

⁹ Cuña, Samaria pendar, rumo omboyevi chupe:

—¿Mahera vo, “Embou i taihu” ere cheu? Nde rumo judío; che cuña coha pendar aico —ehi chupe. (Esepia, judío noñehei vahe ité ava Samaria pendar upe yuvireco yepi.)

¹⁰ Evocoiyase omboyevi cuña upe:

—Ereicuase Tũpa porerecosa ndeundar viña iyavei ereicuase ahe ava ndeu i rese oporandu vahe, nde evocoiyase ereporandura sese chupe. Ahe evocoiyase omondora i ndopai vahe ndeu viña —ehi cuña upe.

¹¹ —Ndererecoi rumo i renose ãgua. Esepia, co igua ipicucú ité. ¿Que sui vo aipo evocoiyase eremboura i ndopai vahe cheu viña? —ehi cuña chupe—.

¹² Esepia, co igua ore ramoi Jacob oseya oreu. Cohave suiño ité niha ahe oiũ, tahir avei oiũ yuvireco ichui iyavei opacatu seimba. ¿Nde pĩha ivate catu ereico ichui? —ehi cuña chupe.

¹³ —Opacatu ava oiũ vahe co i, ihuseiño itera yepi, —ehi cuña upe—.

¹⁴ Acoi ava oiũ vahe rumo i che remimondo, ndihusei iri chietera. Esepia, che amondo vahe i ndopai vaherã ité. Ahe omboura tecovesa ndopai vahe ava upe —ehi cuña upe.

¹⁵ —Nde ava, emboumi ahe i taihu che husei iriẽhi ãgua, tanose iri eme i cohava sui —ehi.

¹⁶ —Eso rane nde mer reca, seseve peyu cohava —ehi cuña upe.

¹⁷ —Ndarecoi rumo che mer —ehiño cuña chupe.

—Supi eté aipo ere, ndererecoi eté nde mer.

¹⁸ Esepia, cinco tupri erereco nde mer iyavei cũritei erereco vahe nde resendar tẽi. Supi eté aipo ere: “Ndarecoi che mer” ere cheu —ehi cuña upe.

¹⁹ —Nde ava avĩye moco Tũpa ñehe mombehusar ereico cheu —ehi—.

²⁰ Ore ramoi eta omboetei Tũpa co ivitri rese yuvireco. Pe rumo, judío peico vahe, “Jerusalén ve yamboeteira Tũpa yepi” peye —ehi.

²¹ —Che reroya eve cuña, virovĩ ari pẽu peso iriẽhi ãgua Tũpa mboetei co ivitri rese iyavei Jerusalén ve.

²² Pe Samaria pendar peico vahe pemboetei tẽi pe rembiguaẽhi. Ore rumo oroicua oromboetei vahe. Esepia, ñepisiroso ou judío sui.

²³ Oyepota rumo ari cute, ahe ité co cũritei co pipe suive supi eté Tũpa omboetei vahe, Tũpa Espĩritu pipe omboeteira yuvireco. Supi eté Tũpa, “Ègũe tehi che mboetei yuvireco” ehi.

²⁴ Esepia, Tũpa niha Espĩritu secoi. Sese acoi omboetei vahe oyapora Espĩritu pipe supi tupri vahe ité yuvireco —ehi cuña upe.

²⁵ Cuña evocoiyase aipo ehi chupe:

—Che aicua Poropĩsĩrosar yu ãgua (ahe ‘Cristo’). Acoi ahe ouse, omombehu tupri ra opacatu mbahe yandeu —ehi cuña chupe.

²⁶ —Che niha ahe aico añehe vahe ndeu —ehi cuña upe.

²⁷ Aheseve semimbohe eta oyevi yuvireco, nombovihaipri güemimbohe cuña rese oñemoñetase. Ndipoi eté rumo que “¿mahahe rese vo peñemoñeta?” ehi vahe, que “¿mahera vo ereñehe co cuña upe?” ehi vahe yuvireco chupe.

²⁸ Ahese cuña oseya tupriño ocambuchi, oso güecuave aipo ehi ava eta upe:

²⁹ —Perio, tapesepia pe ava omombehupa tupri vahe che recocuer cheu. ¿Ndahei pñha ahe Poropisrosar? —ehi omu eta upe.

³⁰ Evocoiyase ava rehii yuvinose tecua sui, yuviraso Jesús recosave sepia.

³¹ Ava yepotaēhi viteseve, semimbohe eta,
—Ore mbohesar, ecarumi —ehi tēi yuvireco chupe.

³² —Oimera rumo ambuae mbahe cheu che moviracua āgua. Ahe ndapeicuai vahe —ehi güemimbohe eta upe.

³³ Semimbohe aipo hese oporandu-randu tēi oyeupe yuvireco:

—¿Oime pñha que ava güeru vahe mbahe semihura? —ehi tēi yuvireco.

³⁴ Güemimbohe upe rumo aipo ehi:

—Che moviracuasa rumo che mbousar porocuita, ahe ayapora iyavei amboaviye rane itera iporaviqui —ehi—.

³⁵ Esepia, pe aipo peye: ‘Ipane vite irungatu yasi mbahe miti ha monuha āgua’ peye yepi; che rumo aipo ahe pēu: pemahe pe ivirindar ava eta rese. Opa ité opñha omoingatu yuvireco, ahe inungar mbahe miti ha yaviye vahe.

³⁶ Acoi oporaviqui vahe Tūpa upe ava hā pisi āgua rese, ahe oipisira sepri yuvireco iyavei semimonuha tecovesa ndopai vaheve nara ité yuvirecoira. Evocoiyase ava upe oñehe vahe iyavei oipisi vahe ava hā ivave nara, oyoya guasu oviharetera ipisipri rese yuvireco.

³⁷ Supi eté co ñehesa aipo ehi vahe: ‘Ñepei eté omaheti vahe; imonuhasar rumo ambuae ité’ ehi.

³⁸ Che opocuai ava hā pisi āgua ambuae ava poraviquisave; yipindar rumo ambuae oporaviqui ité yuvireco sese. Pe evocoiyase peique iporaviqui agüer rupi —ehi güemimbohe eta upe.

³⁹ Setá ava tecua Sicar pendar Samaria pipe viroya cuña ñehe sui yuvireco, “Opacatu mbahe che rembiapo omombehu cheu” ñhesa sui.

⁴⁰ Evocoiyase ava rehii Samaria pendar yuviraso chupe ‘epitami ore piri’ oya. Evocoiyase opita ipiri ñuvirío ari rupi.

⁴¹ Setá catu iri ava viroya yuvireco ñehe ité renduse.

⁴² Evocoiyase ava eta aipo ehi cuña upe yuvireco:

—Cūritei oroviroya ité cute, ndahei nde ñehe suiño oroviroya. Esepia, ore ité orosendu ñehe cute, oroicua avei ahe supi eté opacatu ava pñsrosar ou vahe —ehi ava eta cuña upe yuvireco.

Jesús ombogüera mborerecuar rahir

⁴³ Ñuvirío ari pare, Jesús osē ivi Samaria sui, osoño ivi Galilea ve.

⁴⁴ Ahe ae ité aipo ehi: “Tūpa ñehe mombhehurar ndasaisusai ivi rese yuvireco yepi” ehi.

⁴⁵ Oyepotase oivi Galilea ve, ahe pendar ava oipisi tupri yuvireco. Esepia, setá osepia opacatu mbahe sembiapo Pascua pietase Jerusalén ve.

⁴⁶ Evocoiyase oyevi iri tecua Caná ve Galilea ivi rese, aheve acoi i tēi oyapo uva ricuer. Tecua Capernaum ve oime mbia mborerecuar guasu ivirindar. Ahe vireco guahir imbaheasi vahe.

⁴⁷ Oyanduse co mbia mborerecuar Jesús yepota Judea sui ivi Galilea ve, ahe ramoseve oso voi seca ‘toso che rētave, tombogüerami che rahir omano pota vahe cheu’ oya.

48 Evocoyase aipo ehi ahe mborerecuar upe:

—Pe ndache reroyai eté peye ndapesepiaise mbahe poromondiisa che rembiapo —ehi.

49 —Che Yar, eyu poyavañomi tēi che rahir mano viteēhiseve —ehi mborerecuar chupe.

50 —Eyevi nde rētave; nde rahir oicove —ehi mborerecuar upe.

Aheve viroya voi oyeupe ñehesa. Sese oyevi voi eté güētave.

51 Amombri seco viteseve, yuvinoña voi sovaichi sembiguai imombehu:

—ñde rahir oicove! —ehi yuvireco chupe.

52 Evocoyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

53 Aheve mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahir oicove’ ehi” ehi. Evocoyase ahe iyavei opacatu imu eta viroya Jesús yuvireco.

54 Co imoñuviriosa poromondiisa oyapo Jesús güecocuer cua uca ñgua ivi Judea sui oyeveise Galilea ve.

5

Jesús ombogüera ava ndoguatai vahe tecua Betzata pendar

1 Ipare oime judío pieta guasu Jerusalén ve, aheve Jesús oso.

2 Ahe tecua roquendipi, Ovesa serer vahe coti, oime ivicuar i vireco vahe, serer hebreo ñehē pipe Betzata. Ahe sese oyere tupri poyandepo oquendipi yapayere vahe pãve.

3 Aheve ava eta imbaheasi vahe oñeno yugüeru ivi rupi: ndasesapisoi vahe, ndoguatai vahe, ndipindugüei vahe avei i ñemomiisa osáro yuvireco yepi.

4 Esepia, amove tēi Tüpa rembiguai ogüeyi ahe ivicuarve i momii ñgua, “Acoi ahe rane ocui vahe i ñemomiiseve ive, ocuera voi eté ombaherasisa sui” ehi yuvireco chupe.

5 Aheve oime mbia ombaherasisa vireco vahe treinta y ocho araviter rupi.

6 Osepiaise Jesús, oicua voi eté vireco pucuse ombaherasisa. Evocoyase oporandu chupe:

—¿Ereipota vó nde cuera ñgua? —ehi chupe.

7 Imbaheasi vahe omboyeve:

—Nde mbia, ndipoi eté que ava che mongui vaherã i pipe i ñemomiise. Asãha tēi ‘tacui’ viya. Ambuae rane-raneño rumo yuvirocui che sui yepi —ehi.

8 Evocoyase,

—Epüha, esupi nde rupa, eguata —ehi imbaheasi vahe upe.

9 Ahe ramoseve ahe mbia ocuera tupri, osupi vupa, uguata voi oico. Mbituhusa ari pipe tupri rumo egüe ehi.

10 Evocoyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevosii ñgua —ehi yuvireco chupe.

11 Ahe mbia evocoyase,

—Che mbogüerasar rumo aipo ehi cheu: ‘Esupi nde rupa, eguata’ ehi cheu —ehi judío eta upe.

12 —¿Uma vo aipo ehi ndeu? —ehi judío yuvireco chupe.

13 Ahe mbia rumo ndoicua iri ombogüerasar. Sese ndoicatui imboyeve ñgua. Esepia, Jesús aviyeteramo tēi ndoyecua iri ava rehi pãhuve.

14 Coiye rumo Jesús osepia iri tüparove ahe mbia, aipo ehi chupe:

—Ereicua co nde cuerasa cūrítei, aní ereyemboangaipa iri mbahe tēi catu reime iri āgua ndeu —ehi chupe.

¹⁵ Ahe mbia evocoyase oso voi eté judío eta rereciar upe ‘Jesús che mbogüera’ oya.

¹⁶ Sese judío osaquicue moña iyavei oyuca pota yuvireco mbituhusa ari pipe iporombogüera rese tēi.

¹⁷ Ahe rumo aipo ehi:

—Che Ru niha oporaviquiño ité co ari rupi iyavei che aporaviquiño avei —ehiño judío upe.

¹⁸ Aipo hese, judío, “Yayuca ité” ehi. “Esepia, ndahei mbituhusa ari güeraño nomboyeroyai, ahe rumo oyeapo Tūpa nungar, Tūpa uve ‘che Ru’ ohe angahu tēisa pipe” ehi yuvireco chupe.

Tūpa Rahir mborerecuasa

¹⁹ Evocoyase Jesús aipo ehi judío upe: “Supi eté aipo ahe: Tūpa Rahir ndoicatui eté mbahe apo oyesui tēi, Vu rembiapo mbahe oicua; aheño tupri avei oyapo yepi.

²⁰ Esepia, Tu Guahir raisupave omboyecua opacatu mbahe güembiapo chupe iyavei omboyecuaño vite itera mbahe poromondiisa tuvicha catu vahe sembiaporã, ‘¡Mara ehi rutei co!’ pehe tēi āgua chupe.

²¹ Esepia, che Ru ombogüerayevi omano vahe iyavei omondo tecovesa chupe. Ēgüe ehi avei Tahir omondo tecovesa ava upe güemimbotar rupi.

²² Iyavei Tu nomondo iri ava upe sembiapo repri. Esepia, ombou Guahir upe opacatu pīratasa ava upe sembiapo repri mondo āgua.

²³ Ēgüe ehi Guahir upe opacatu ava imboetei āgua yuvireco inungar Tu imboeteipri. Acoi ava Tahir nomboetei vahe, Tu imbousar avei nomboetei yuvireco.

²⁴ “Supi eté aipo ahe pēu: acoi oyapisaca vahe che ñehe rese, viroya vahe avei che mbousar, ahe virecora tecovesa apirēhi vahe; ndahei chietera imocañipri. Esepia, osē manosa sui oipisi tecovesa.

²⁵ Supi eté aicua uca pēu: oura ari imombeupri, cūrítei eté co ari oyepota, ava eta omano vahecuer osendura Tūpa Rahir ñehe. Acoi osendu vahe, oicoveño itera.

²⁶ Esepia, Tu vireco tecovesa oyese. Ēgüe ehi avei Guahir upe imondo tecovesa rereco āgua.

²⁷ Ombou avei imborerecuasa āgua chupe ava recocuer rese iporandu āgua. Esepia, ahe Ava Riquehir secói.

²⁸ Peyepihamondi rene aipo che hesa sui. Esepia, oyepotara ari imombeupri, ahese opacatu ava omano vahecuer osendura ñehe.

²⁹ Ahese yuvinosera vuvipa sui. Oyapo vahe mbahe tupri, ocuerayevira yuvireco tecovesa apirēhi rereco āgua; acoi oyapo vahe rumo mbahe naporai vahe, ocuerayevira yuvireco Tūpa ñemoirosa pisi āgua” ehi Jesús judío rereciar upe.

Jesús omboyecua tupri omborerecuasa

³⁰ “Che ndaicatui mbahe apo cheyesui tēi. Che, ‘Pe peyavi vahe mbahe, peipisira che Ru ñemoirosa’ ahe ava ndaseco pōrai vahe upe che cuaita rupi iyavei che amombehu vahe supi tupri ité. Esepia, che ndaipotai che remimbotar tēi mbahe apo āgua. Che Ru, che mbousar remimbotar rumo ayapo.

³¹ Que cheyese ae tēi añehese, ahese ndache reroyai chira peye viña.

³² Oime rumo ambuae che mombehusar. Ahe supi eté che mombehu pe seroya água; ahe Juan.

³³ Pe niha, pemondo ava chupe imboporandu mbahe rese. Ahe semi-mombehu niha supi tupri vahe ité.

³⁴ Yepe ahe supi eté viña, che rumo ndayeroyai ava tēi che mombehusa rese. Che rumo aipota peñepisiro água. Sese aipo ahe pēu.

³⁵ Juan niha inungar tataendi, ēgüe ehi omboyecua mbahe supi eté vahe. Sese pe peyembovīha raimi tēi iporombohesa tesapesa nungar pipe peico.

³⁶ Che rumo areco che yecua ucasar aviye catu vahe Juan sui. Ahe niha co mbahe ayapo vahe yepi. Ahe sese che Ru che cuai yapo água. Co mbahe ayapo vahe, ahe ité omboyecua che Ru Tūpa che mbousar.

³⁷ Iyavei che Ru avei eté che cua ucasar. Ahe iñehe rumo ndapesendui vahe ité, iyavei ahe ndapesepiai eté.

³⁸ Iñehengagüer icuachiapri avei ndoiqueei eté pe rese. Ipipe niha ndache reroyai eté peye che Ru che mbouse.

³⁹ Pe peicua tupri pota icuachiapri ‘icuapa tupri pipe revo tecovesa apirēhi yarecora’ peye viña. Co rumo cuachiar che mombehu vahe:

⁴⁰ pe rumo ndapeyu potai eté cheu co tecovesa apirēhi rereco água.

⁴¹ “Ndaipisii eté ava che mboeteisa tēi.

⁴² Iyavei opocua Tūpa ndapesaisuisse.

⁴³ Che niha ayu che Ru rer pipe. Pe rumo ndache reroyai eté peye. Ouse rumo que ambuae ava oyesui tēi oñehe vahe, evocoi nungar tēi peroyara.

⁴⁴ Ndapeicatu eté che reroya água peye. Esepia, pe ae tēi peyemboetei; ndapesecai eté Tūpa ñepe vahe suindar yemboeteisa.

⁴⁵ Ndapepīhañemoñetai chira che pe recocer mombehu água rese che Ru rovai. Moisés peroya vahe ité niha oicuachía pe Tūpa reroyaēhisa chupe imombehu água.

⁴⁶ Peroyase rumo Moisés ñehe viña, che avei che reroyara peye viña. Esepia, Moisés niha oicuachía che resendar ñehesa.

⁴⁷ Ndaperoyaise ahe sembicuachía, evocoyase ndapeicatu chietera che remimombehu reroya água” ehi Jesús oamotarēhimbar upe.

6

Jesús oyopoi cinco mil ava

¹⁻⁴ Ipare Pascua pieta ipiimi aipo Jesús osasa ipa Galilea serer vahe oso, ahe serer avei Tiberias. Ava rehii avei yuviraso saquicuei. Esepia, osepia ité yuvireco oyapose mbahe poromondiisa guasu imbaheasi vahē mbogüerese. Oyepotase ivi rese yuviraso, evocoyase oyeupi ivitri rese. Aheve oguapi opacatu güemimbohe eta reseve yuvinoi.

⁵⁻⁶ Omahese ava rehii oyeupindar rese, ahese aipo ehi Felipe upe:

—¿Que vo yarocuara mbahe tembihu co opacatu ava upe nara? —ehi secoãhasave.

Ahe rumo oicua ité mbahe güembiaporã.

⁷ Evocoyase Felipe omboyevi chupe:

—Dosciento denario pan ndosupitii chietera que chñhi-chñhimi ava retacuer viña —ehi.

⁸ Aipo hese, ñepe semimbohe pāhu pendar, Simón Pedro rivri, Andrés aipo ehi chupe:

⁹ —Co chñhivahe vireco cinco pan, iyavei ñuvirío pira, ¿iyacatura vo co ava retacuer? —ehi.

¹⁰ Evocoiyase aipo ehi:

—Pemombehu opacatu upe toguapí yuvireco —ehi güemimbohe upe.
Capihi reimesave opa omboguapí yuvireco cinco mil ava.

¹¹ Evocoiyase oipisi cinco vahe pan, “Aviye ndeu” ohe pare Vu Tüpa upe, opa ombohi-mbohi imondo ava rehii upe. Ëgüe ehi avei pira upe, imondopa semimbotar rupi-rupi yuvireco.

¹² Opase ava ihítaro,

—Pemonuhapa sumbirer iyemombucaëhi ägua —ehi güemimbohe upe.

¹³ Evocoiyase omonuha doce iruova sumbirer yuvireco pan cincomi vahe sui.

¹⁴ Evocoiyase ava eta co poromondiisa guasu Jesús rembiapo repiase, aipo ehi yuvireco:

—Supi eté co uve revo acoi: “Oura Tüpa ñehe mombehusar ivi pipe” ehi icuachiapri aracahendar pipe —ehi yuvireco.

¹⁵ Jesús rumo oicuase ava opĩratasa pipe tēi güeraso pota ägua mborerrecuar guasu vireco ägua oyeupe nara yuvireco, ahese oyeupi iri oso ivate catu. Aheve ahe ae güeco ägua.

Jesús uguata i hari rupi

¹⁶ Pĩtu ramose ogüeyi yuviraso Jesús remimbohe ipave,

¹⁷ yuviroha carite pipe sasa ägua yuvireco tecua Capernaum ve yuviraso. Ahese pĩtu ité. Jesús rumo ndoyeví vitei eté.

¹⁸ Ahese oipeyu pĩrata ivitu, i avei ohitu pĩrata.

¹⁹ Yuviraso pucumi tēi cinco, anise seis kilómetro rupi. Ahese osepia Jesús yuvireco osupiti senise carite. Ahe i hari rupi uguata oso chupe. Evocoiyase osiquiye ité yuvireco ichui.

²⁰ Ahe rumo aipo ehi güemimbohe upe:

—¡Che Jesús aico, pesiquiyei rene! —ehi.

²¹ Evocoiyase sorivete yuvireco carite pipe seroha. Iparemi tēi oyepota yuviraso oyuvirasosave.

Ava eta oseca Jesús

²² Ahere ayihive ava rehii opĩta vahe sovai yuvireco, “Semimbohe año rumo yuviraso ñepi vahe carite pipe. Jesús rumo ndosoi eté güemimbohe rupi” ehi tēi yuvireco.

²³ Aheseve rumo ambuae carite viroyepota seru yuvireco tecua Tiberias pendar, acoi Jesús ava remihura pan reroheroqui agüer rerovicave.

²⁴ Evocoiyase ava rehii oicuase Jesús semimbohe reseve iporēhise yuvireco, yuviroha yuviraso ägua co ambuae carite pipe tecua Capernaum ve seca.

Jesús, pan nungar; tecovesa apirēhi vahe secoi

²⁵ Oyepotase ava rehii ipa rovai, aheve osepia Jesús yuvireco.

—Ore mbohesar, ¿marase vo ereyepota cohave? —ehi yuvireco chupe.

²⁶ Evocoiyase aipo ehi chupe:

—Supi eté aipo ahe pēu. Pe rumo che reca peye che pe mbocarusa rese tēi,, ndaheí co che poromondiisa reroayasave ité peico pota che rupi.

²⁷ Pepraviqui eme catu tembihu ndasecosei vahe rese; iyacatu rumo pepraviqui tembihu secose vahe rese omondo vahe tecovesa apirēhi. Co tembihu che, Ava Riquehir, amondora pēu. Esepia, che Ru Tüpa omboyecua ité che ichuindar aicose —ehi.

²⁸ Aipo hese,

—¿Mbahe mboraviqui vo oroyapora Tūpa upe? —ehi yuvireco.

²⁹—Tūpa oipota pe che reroyara peye che semimbou che recose —ehi ava eta upe.

³⁰ Evocoyase,

—¿Mbahe poromondiisa vo eremboyecua irimiria oreu orosepia vaheṛā nde reroya tupri catu āgua?

³¹ Esepia, aracahe ore ramoi eta yuvirohu ivi iporupirēhisa rupi. Icuachiapri aracahendar pipe omombehu: ‘Omondo pan iva pendar semihura’ ehi —ehi ava eta yuvireco chupe.

³²—Supi eté amombehu pēu: ndahei Moisés omondo pan iva pendar chupe, che Ru rumo omondo chupe. Cūritei che Ru ombou pēu pan supi eté vahe iva sui.

³³ Esepia, co pan ombou vahe Tūpa iva suindar ité. Ahe omondora tecovesa ivi pipendar upe —ehi ava eta upe.

³⁴ Evocoyase,

—Ore mbohesar, embouño catu co pipe suive aipo pan oreu —ehi yuvireco chupe.

³⁵—Che ité ahe pan aico tecovesa mondo āgua. Acoi ou vahe cheu ndiyumbiasi iri chietera iyavei acoi che reroya vahe ndihusei chiaveira.

³⁶ Aipo ahe niha acoi pēu. Yepe pe che repia peye viña, pe rumo ndache reroyai eté peye.

³⁷ Opacatu ombou vahe ava che Ru cheu, cheu ité yugüerura; acoi yugüeru vahe cheu, aipisira; ndamomboi chietera cheyesui.

³⁸ Esepia, ndayui iva sui mbahe che remimbotar apo āgua tēi; ayu rumo che mbousar porocuaita apo āgua.

³⁹ Che Ru che mbousar ndoipotai que ñepeí ava ombou vahe cheu amocñira. Ahe semimbotar rumo che ambogüerayevira ahe ari ipa vahe pipe.

⁴⁰ Che Ru oipota avei opacatu ava oyeroya vaheṛā che, Tūpa Rahir, che recosa rese. Ipipe vireco aveira tecovesa apirēhi vahe yuvireco. Supi eté ambogüerayevira ari ipa vahe pipe curi —ehi ava eta upe.

⁴¹ Evocoyase judío eta oñehe-ñehe tēi sese yuvireco, “Che pan aico, agüeyi vahe iva sui” ihesa rese

⁴² aipo ehi:

—Co niha acoi Jesús, José rahir. Yande yaicua ité tu, ichi avei. ¿Mahera ru, “Che agüeyi vahe iva sui” ehi no? —ehi yuvireco chupe.

⁴³ Evocoyase judío eta upe aipo ehi:

—Pepoiño che roeroisa sui.

⁴⁴ Ndipoi chietera que oicatu vahe ou cheu, nomonguerēhise che Ru che mbousar; omonguerēhi vahe rumo oicatu yugüeru cheu. Ahe ambogüerayevira ari ipa vahe pipe.

⁴⁵ Tūpa ñehe mombehusar cuachiar pipe aipo ehi: ‘Tūpa pe mbohera opacatu’ ehi. Sese acoi osendu vahe che Ru ñehe, oyembohe vahe avei sese, evocoi nungar yugüerura cheu.

⁴⁶ “Ndipoi eté que ñepeí ava osepia vahe che Ru; acoi ichui ou vaheño ité, ahe güeraño tupri ité osepia.

⁴⁷ Supi eté aipo ahe pēu: acoi che reroya vahe vireco tecovesa apirēhi.

⁴⁸ Che pan nungar aico amondo vahe tecovesa.

⁴⁹ Aracahe pe ramoi eta niha yuvirohu ité tembihu maná serer vahe ivi iporupirēhisa rupi. Ahe rumo opa iriño ité omano yuvireco.

⁵⁰ Che rumo añehe pan ìva sui ogüeyi vahe rese, acoi ava ohu vahe, nomanoi chietera.

⁵¹ Ahe pan oicove vahe niha che aico ìva sui ogüeyi vahe; acoi ohu vahe co pan, oicovera apirêhi vahe ité. Co pan amondo vahe ité, ahe che rete ité. Ahe amondora ava recocuer rese” ehi judío eta upe.

⁵² Aipo hese, judío rerecuar oyeecopi-copi yuvireco aipo ehi:

—¿Mara ehira vo aipo co imbou tēi güete yande tohu viña? —ehi yuvireco.

⁵³ —Supi eté aipo ahe pēu: ndapehuise Ava Riquehir rete, ndapehuise avei suvi, ndaperecoi chietera tecovesa.

⁵⁴ Acoi ohu vahe che rete, oihu vahe avei che ruvi, vireco tecovesa apirêhi iyavei che ambogüerayevira ari ipa vahe pipe.

⁵⁵ Esepia, che rete supi eté vahe tembihu; che ruvi supi eté vahe avei igua.

⁵⁶ Acoi ohu vahe che rete, oihu vahe avei che ruvi, secoi che rese, che avei aico sese.

⁵⁷ Che Ru, che mbousar, vireco tecovesa. Ichui che aicove; ãgüe ehi aveira che husar che sui yuvirecovera.

⁵⁸ Añehe pan ìva sui ogüeyi vahe rese. Co pan ndahei maná pe ramoi eta yuviróhu vahe nungar. Esepia, yande ramoi opaño ité omano yuvireco. Acoi ohu vahe rumo co che rete, oicovera apirêhi vahe ité —ehi ava eta upe.

⁵⁹ Jesús oporombohe co mbahe rese judío ñemonuhasave tecua Capernaum ve.

Ñehesa tecove apirêhisa resendar

⁶⁰ Osenduse co yembohesa, setá Jesús rupi oguata vahe aipo ehi oyeupe yuvireco:

—Aipo semimombehu yavai eté seroya ãgua; ¿ava vo viroya tēira viña? —ehi yuvireco.

⁶¹ Jesús rumo oicua voi eté ñehe-ñehe tēise co mbahe rese yuvireco, evocoyase oporandu:

—¿Pemboasiño tie che ñehe?

⁶² ¿Mara peyera pīha che repiase peye che, Ava Riquehir, ayeupise che reco agüerve vicho viña?

⁶³ Espiritu ité niha omondo tecovesa; yande retecuer rumo ãgüe ehi tēi vahe. Co amombehu vahe pēu ahe espíritu iyavei tecovesa.

⁶⁴ Oime vite rumo amove pe pãhuve ndache reroyai vahe —ehi ava rehi upe.

Esepia, Jesús oicua ité yipisuive uma ndoviroyai chira, oicua avei uma ava omondora yamotarêhimbar upe

⁶⁵ aipo ehi:

—Sese niha acoi aipo ahe pēu: “Ndipoi chietera que ava ou vahe ité che Ru nomonguerêhise imbou” ahe —ehi.

⁶⁶ Ichuive tupri Jesús rupi oguata vahe setá oseya yuvireco; ndoguata iri eté yuvireco supi.

⁶⁷ Evocoyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

⁶⁸ Simón Pedro rumo omboyevi chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apirêhi vahe.

⁶⁹ Ore nde reroyasar ité oroico iyavei oroicua nde ndaseco marai vahe, Tūpa supi eté vahe remimbou ereico —ehi Pedro chupe.

70 —Che niha opoporavo doce peico vahe, ñepei rumo pe pãhu pendar carugar ité —ehi Simón upe.

71 Jesús oñehe Simón Iscariote rahir, Judas, rese. Yepe doce semimbohe pãhu pendar viña, ahe rumo omondora ava yamotarêhimbar upe.

7

Jesús ndoviroyai tivri yuvireco

1 Ipare Jesús uguata ivi Galilea rupi. Ndoico potai eté ivi Judea rese. Esepia, aheve ava judío eta oseca ité ‘yayuca’ oya yuvireco.

2-3 Virovise judío pieta guasu teyupa apo água yuvireco, ahesse tivri aipo ehi yuvireco chupe:

—Erepita eme cohave. Eso ivi Judea ve; ahe pendar nde rupi uguata vahe avei tosepia poromondiisa nde rembiapo yuvireco.

4 Esepia, acoi oyapo pota vahe mbahe, noñomi eté mbahe güembiapo. Nde ereyapo ité mbahe poromondiisa. Sese iya eremboyecua opacatu ava upe —ehi tivri yuvireco chupe.

5 Seroyaêhisave tēi avei tivri aipo ehi yuvireco chupe.

6 Evocoyase vivri upe aipo ehi:

—Ndehi vitei rumo ari che so água. Pe guata água rumo opacatu ariño tēi aviye.

7 Esepia, pe ndape amotarêhii eté ava co ivi pipendar; che rumo che amotarêhi ité yuvireco. Esepia, che amboyecua ité mbahe sembiapo naporai vahe chupe.

8 Pesoño pe pieta repia; che rumo ndaso vitei chira. Esepia, ndosupiti vitei ari cheundar —ehi vivri upe.

9 Evocoyase Jesús opitaño Galilea ve.

Jesús oso omu judío eta pietasave

10 Vivireta so pare, Jesús avei oso pietasave. Ndoymboyecuai eté rumo ava upe.

11 Judío eta oseca tēi yuvireco pietasave aipo ehi:

—¿Que pãha acoi mbia? —ehi tēi yuvireco.

12 Ava rehii pãhuve setá iteanga oñehe yuvireco sese. Amove aipo ehi yuvireco: “Ahe mbia aviye vahe”; ambuae rumo aipo ehi: “Ndahei aviye vahe; ahe rumo ombopa tēi vahe ava” ehi yuvireco.

13 Nomboyecuai eté rumo oñehe yuvireco sese güerecuar sui osiquiyepave.

14 Pieta mbiterse, Jesús aviyeteramo tēi oiique ava pãhuve tũparo pipe ava mbohe.

15 Judío eta rerecuar evocoyase,

—¡Too, mara ehi rutei! —ehi tēi—. ¿Mara ehi vo co mbahecuá iteanga? ¡Ndoymbohe vahe niha yande yeroquisave! —ehi tēi yuvireco.

16 Judío rerecuar upe rumo aipo ehi:

—Che porombohesa ndahei cheyesuindar tēi, ahe rumo che mbousar suindar —ehi—.

17 Que ñepei pe pãhu pendar oyapo potase Tũpa remimbotar, oicua che porombohesa ndahei vahe che suindar, ahe Tũpa suindar ité.

18 Esepia, acoi ava oñehe vahe oyesui tēi, ahe ‘tache mboetei ava yuvireco’ ohesave tēi egüe ehi. Co ava rumo “tomboetei che mbousar” ehi vahe, ahe supi eté vahe; ndipoi eté porombopasa iporombohesa pipe.

19 “Moisés niha omondo tēi mborocuita pëu. Que ñepei pe pãhu pendar rumo ndipoi eté omboyero vahe. ¿Mahera ru che yuca pota peye?” ehi.

20 —¿Nde erereco caruguar ndeyese! ¿Ava vo nde yuca pota? —ehiño ava eta yuvireco chupe.

21 Aipo ehi ava upe:

—Cuese acoi ayapose mbahe mbítuhusa ari pípe, ahese, “¿Too, mahera ãgüe ehi!” peyeño acoi cheu.

22 Pe avei rumo amove peporavíqui mbítuhusa ari pípe peporombocircuncidase porocuita Moisés omondo vahe reroyasave. (Ahe circuncisión rumo ndahei Moisés suindar, ahe rumo yípive vahe pe ramoí suindar ité.)

23 Oyepotase rumo chíhivahe mbocircuncida água mbítuhusa ari pípe tupri pëu, peyapoño rane ité mborocuita mboaviye água. ¿Mahera ru cheuño pemboasi ñepeí mbía mbítuhusa ari pípe ambogüera tupri vahe rese?

24 “Oyavi evocoi” peye voi rene catu ava upe; peicua tupri rane ‘¿supi eté pñha?’ pe yapave —ehi Jesús ava eta upe.

Jesús oñehe güecocuer Tüpa suindar rese

25 Evocoyase amove Jerusalén pendar mbía aipo ehi oyeupe yuvireco:

—¿Ndahei vo acoi co oseca tēi yuca água yuvireco? —ehi—.

26 Ahe ité co niha co ava pãhuvẽ oñehe oico, ndipoi eté que mara ehi vahe yuvireco chupe. ¿Omoha pñha mborerecuar co mbía Poropĩsirosar seco água yuvireco?

27 Yande rumo yaicua que sui turi. Acoi ouse rumo Poropĩsirosar ité coiye, ndipoi chietera que ava oicua vahe iyusa —ehi yuvireco.

28 Evocoyase aipo renduse oporombohe vitesese tũparove, oñehe pĩrata aipo ehi:

—¿Pe niha aipo, “Oroicua vahe” peye; “Oroicua avei iyusa” peye cheu! Ndayui rumo che remimbotar sui tēi. Oime rumo che mbousar, ahe seroy-apri ité. Ahe pe ndapeicuai vahe.

29 Che rumo aicua ité. Esepia, che ichui ayu iyavei ahe ité che mbou pëu —ehi.

30 Aipo ihese, oipisi pota yuvireco soquenda água viña. Aní eté rumo. Esepia, ndoyepota vitei ihari chupe.

31 Setá iteanga rumo ava viroya iyavei aipo ehi yuvireco:

—Ouse Poropĩsirosar, ¿oyapo catura pñha mbahe poromondiisa co mbía sui? —ehi yuvireco.

Fariseo oyocuai sundao tũparo rãrosareta Jesús písi água

32 Fariseo eta osendu ava ñehesa Jesús resendar yuvireco. Ahe ité iyavei pahí eta rerecuar omondo sundao tũparo rãrosar Jesús písi água yuvireco.

33 Jesús rumo aipo ehi:

—Aicove vitemira pe rese chíhi rupive. Ipare voi ayevira che mbousar píri vicho —ehi—.

34 Che reca tēira peye, ndapeicatui chietera rumo che reca. Esepia, ndapeicatui chiaveira peso vaheřã che recosave —ehi ava eta upe.

35 Evocoyase judío oporandu-randu oyeupe yuvireco:

—¿Que pñha aipo osora yande sui seca iriēhi água? ¿Osora tie que amombri yande mu oñemosai vahe pãhu rupi ambuae ava ndahei vahe yande mu mbohe água?

36 ¿Mara oya pñha evocoyase aipo, ‘Che reca tēira peye, ndapeicatui chietera rumo che reca. Esepia, ndapeicatui chiaveira peso vaheřã che recosave’ ehi yandeu? —ehi-ehi tēi oyeupe yuvireco.

Espíritu ïai ndopai vahe nungar

³⁷ Pieta ipa, ahe imboeteisa catu vahe, ahe ari pīpe Jesús oñehe pīrata ohā aipo ehi:

—Acoi que ava ihusei vahe, toyugüeru cheu. Che evocoiyase tamboihu —ehi—.

³⁸ Esepia, inungar aipo ehi vahe icuachiapri pīpe, che reroyasar pīha sui osēra iaí ndopai vahe nungar —ehi.

³⁹ ‘Che reroyasar oipisira Espiritu curi’ ohesave aipo ehi. Espiritu rumo ndou vītei ahese. Esepia, Jesús ahese ndoyevi vītei avei güecosa porañetesave.

Ava rehii oyemboyaho Jesús recocuer sui yuvireco

⁴⁰ Osenduse ava rehii aipo nungar, amove aipo ehi:

—Supi eté co mbia Tūpa ñehe mombehusar imombehupri ou vahe —ehi yuvireco chupe.

⁴¹ Ambuae aipo ehi:

—Co Poropīsīrosar ité —ehi yuvireco.

Ambuae rumo aipo ehi yuvireco:

—¿Mahera aipo Galilea sui tēi oura Poropīsīrosar viña? —ehi—.

⁴² Icuachiapri pīpe rumo aipo ehi Poropīsīrosar oyesura mborerecuar guasu David sui iyavei ahera Belén pendar, David recua pendar itera —ehi.

⁴³ Evocoiyase ava oyemboyaho-yaho yuvireco Jesús recocuer sui tēi.

⁴⁴ Amove ava viraso pota tēi yuvireco soquenda; ndipoi eté rumo ēgüe ehi vahe yuvireco chupe.

Judío rerecuar ndoviroyai Jesús yuvireco

⁴⁵ Sundao tūparo rārosar oyeve yuvireco Jesús recosa sui. Fariseo eta iyavei pahi eta rerecuar evocoiyase oporandu yuvireco chupe aipo ehi:

—¿Mahera vo ndaperui! —ehi yuvireco chupe.

⁴⁶ Sundao tūparo rārosar evocoiyase aipo ehi:

—¿Ndipoi eté que ava oñehe vahe ahe mbia nungar! —ehiño yuvireco.

⁴⁷ Fariseo eta iyavei mborerecuareta evocoiyase aipo ehi yuvireco:

—¿Pe avei eté rumo peyembopa uca chupe? —ehi—.

⁴⁸ Ndipoi eté niha ore mboetasa mborerecuar iyavei fariseo viroya vahe yuvireco.

⁴⁹ Co ava rehii tēi ēgüe ehi yuvireco. Ahe rumo ndoicuai vahe Tūpa porocuaita yuvireco, sese iñemoirosavrive ité yuvirecoi —ehi sundao tūparo rārosar upe yuvireco.

⁵⁰ Evocoiyase Nicodemo, acoi oso vahe pītu pīpe Jesús pīri, ahe avei eté fariseo pāhuve secoi, ahe aipo ehi:

⁵¹ —Yandeundar porocuaita mboaviye āgua ndiyai, “Ereyavi mbahe” yahe voñe tēi que ava mbahe sembiapocuaēhi vīteseve —ehi.

⁵² Evocoiyase omboyeve yuvireco:

—¿Nde avei tie erico Galilea pendar? Eyembohe tupri icuachiapri pīpe. Ipīpe eresepiara ndipoi eté que ñepei ou vahe Galilea sui Tūpa ñehe mombehusar —ehi mborerecuareta Nicodemo upe yuvireco.

Cuña oyemboaguasa tēi vahe resendar

⁵³ Ipare opa yuviraso ñepei-peí güeta rupi.

8

¹ Jesús rumo oso ivitri Olivo ve.

² Ahere ayihive cōhese, oyeve tūparove. Ahese opacatu ava oyemboya yuvireco sese. Ahe evocoiyase oguapí oī oporombohe.

³ Evocoyase Moisés porocuita rese oporombohe vahe, fariseo eta avei güeru Jesús upe cuña oyemboaguasa tēi vahe yuvireco ava rehii rovai,

⁴ aipo ehi yuvireco chupe:

—Porombohesar, co cuña iyemboaguasase cuimbahe rese osesapiha ñepe i ava.

⁵ Moisés porocuita rumo ore cuai co nungar cuña yuca āgua ita pipe. ¿Mara ere vo catu nde co nungar upe? —ehi fariseo eta yuvireco chupe.

⁶ Ahe rumo secoāhasave tēi aipo ehi yuvireco 'toyavi angahu oñehe yandeu' oya tēi. Ahe rumo oyaivi, ombahecuachía ocuā pipe ivi rese.

⁷ Evocoyase oporandu vitesa ava yuvireco, opūha aipo ehi:

—Que ñepe pe pāhu pendar ndoyemboangaipai vahe, ahe rane toyapi ita pipe —ehi.

⁸ Oyaivi iri, ombahecuachía ivi rese.

⁹ Osenduse rumo judío rerecuareta, omboipi ñepe-pe yuvinose yuvireco, cuacua catu vahe sui rane yuvinose. Opacatu yuvinosepase, Jesús güerañomi cuña rese opita yuvireco.

¹⁰ Evocoyase opūhase, ahese aipo ehi chupe:

—Cuña, ¿que que ru ava? ¿Ndi poi eté que ñepe opita vahe nde mocañi āgua? —ehi

¹¹ —Aní eté, che Yar, ndi poi eté —ehi.

Evocoyase aipo ehi chupe:

—Che avei ndoromocañi tēi potai. Sese cūríte eso, ereyapo iri eme angaipa —ehi cuña upe.

Jesús tesapesa ava upe secoi

¹² Jesús oñehe iri ava eta upe aipo ehi:

—Che aico tesapesa ava eta upe. Acoi che rupi secoi vahe virecora tesapesa omondo vahe tecovesa apirēhi vahe iyavei ndaseco iri chietera pītumimbisa nungar mbahe-mbahe tēi vahe pipe —ehi.

¹³ Evocoyase fariseo eta aipo ehi yuvireco:

—Nde ereñehe ndeyese ae tēi. Sese nde ñehesa ndaseroyaprii eté —ehi yuvireco chupe.

¹⁴ —Che ñehe rumo supi vahe ité. Yepe cheyese ae añehe viña, che rumo aicua que sui ayu, que asora no. Pe rumo ndapeicuai eté.

¹⁵ Pe peseca ava rembiapo cua tupri āgua ava tēi pihañemoñeta rupi. Che rumo ndayui evocoi nungar mbahe apo.

¹⁶ Asecase ava rembiapo cua tupri āgua, ahe supi tupri vahe ité. Esepia, ndahei che ae tēi ēgüe ahe, che Ru, che mbousar rumo secoi che rese.

¹⁷ Porocuita pēu icuachiapri pipe aipo ehi: “Que oimese ñuvirío ava oyoya tupri omombehu vahe mbahe, ahese voi seroyasara” ehi.

¹⁸ Supi eté che ae ité niha añehe cheyese viña, che Ru, che mbousar, reseve rumo oyoya tupri oroñehe —ehi.

¹⁹ Aipo ihese, oporandu yuvireco chupe:

—¿Que vo aipo nde Ru? —ehi yuvireco.

—Pe ndachē cuai eté peye, che Ru avei ndapeicuai. Che cuase rumo peye viña, che Ru avei peicuarā viña —ehi fariseo eta upe.

²⁰ Jesús aipo ehi tūparo pipe, guarepochi monuhapri riru ipive oporombohe ohā. Ndi poi eté rumo ahese osoquenda vahe rā. Esepia, ndoyepota vitei eté ahese ihari chupe.

Jesús, “Che sosave pe ndapeicatu chira peso” ehi

²¹ Jesús aipo ehi iri:

—Che asose, che reca tēira peye. Pe rumo opara pemanu pe angaipa reseve. Che sosave ndapeicatui chietera peso vaheṛā —ehi.

²² Aipo ihese, judío eta aipo ehi yuvireco:

—¿Oyeyucara pīha ahe ae; ayeve pīha aipo ehi yandeu? —ehiño yuvireco chupe.

²³ —Pe rumo ivi pendar peico; che rumo ivatendar ité aico. Iyavei pe co ivi pipendar tēi avei peico; che rumo ndahei eté co ivi pipendar aico.

²⁴ Sese niha acoi aipo ahe pēu: “Pemanopaño itera pe angaipa reseve” ahe. Esepia, ndache reroyaise peye, pe angaipa reseve ité pemañoṛa —ehi fariseo eta upe.

²⁵ Aipo ihese,

—¿Ava ité vo nde ereico? —ehiño yuvireco chupe.

—Yipisuve niha acoi amombehu vichico pēu.

²⁶ Setá iteanga areco che ñehe āgua pēu mbahe pe rembiavi rese. Che mbousar niha supi eté vahe. Ahe iñehe asendu vahe, amombehu opacatu ava upe —ehi fariseo eta upe.

²⁷ Ahe rumo ndosenducuai eté Vu rese iñehese yuvireco.

²⁸ Sese aipo ehi fariseo upe:

—Pesupise rumo Ava Riquehir ivira rese, ahese voi peicuara che recocuer, ahese avei peicuara cheyesui tēi mbahe ndayapoise; che rumo amombehu che Ru che mbohesa güeraño.

²⁹ Che mbousar niha che rupive ité secoi; ndache reyai eté. Esepia, ayapoño ité mbahe semimbotar yepi —ehi ava eta upe.

³⁰ Aipo ihese, setá iteanga ava viroya yuvireco.

Ava Tūpa rahir ité yuvirecoi vahe iyavei ava angaipa pipe tēi yuvirecoi vahe

³¹ Evocoyase Jesús aipo ehi judío eta viroyasar upe:

—Peico tuprise che ñehe rupi, peicora che remimbohe supi eté vahe.

³² Peicua aveira mbahe supi eté vahe. Ahe evocoyase pe renosera mbiguai nungar pe recosa sui —ehi.

³³ Judío evocoyase aipo ehi:

—Ore rumo Abraham suindar ité oroico, ndoroicoi vahe ité que ava rembiguai tēi. ¿Mahera ru aipo nde, “Pesēra mbiguai nungar pe recosa sui” ere oreu? —ehiño judío eta yuvireco chupe.

³⁴ Evocoyase aipo ehi:

—Supi eté aipo ahe pēu: acoi opacatu ava oyemboangaipa vahe, inungar mbiguai tēi, ēgüe ehi oangaipa rereco yuvireco.

³⁵ Mbiguai tēi ndahei güerecuar rēta pipe nara ité; tahir rumo opitaño itera güēta pipe nara.

³⁶ Sese Tahir pe renosese mbiguai tēi pe recosa sui, supi eté ndapeico iri mbiguai nungar.

³⁷ Aicua niha Abraham suindar pe recosa. Pe rumo che yuca potaño peye. Esepia, ndaperoyai eté che ñehe.

³⁸ Che niha amombehu che Ru mbahe omboyecua vahe cheu, pe avei peyapo mbahe pe yesupa remimombehu —ehi judío eta upe.

³⁹ —¿Ore yesupa rumo Abraham! —ehi judío eta yuvireco chupe.

—Abraham suindar ité peicose, peyapora mbahe sembiapo nungar viña.

⁴⁰ Che rumo, “Tūpa che mbohe mbahe supi eté vahe rese” ahe tēi pēu. Pe evocoyase che yuca potaño ité peye. ¡Abraham rumo ndoyapoi eté co nungar mbahe!

⁴¹ Esepia, pe peyapo mbahe peyesupa rembiapo tēi eté —ehi.

Evocoiyase ava aipo ehi yuvireco:

—¡Ndahei rumo ore oyesu tēi vahe oroico; ore rumo orovireco ñepeño ité ore yesupa, ahe Tūpa! —ehiño yuvireco.

⁴² Evocoiyase aipo ehi co judío eta upe:

—Tūpa ité pe yesupase rumo, che raisura peye viña. Esepia, che ayu Tūpa sui. Sese cūrítei cohava aico. Ndahei cheyesui tēi ayu, Tūpa rumo che mbou.

⁴³ ¿Mahera pīha ndapesenducua catui eté mbahe che remimombehu? Esepia, ndapeyapisaca potai eté che ñehe rese.

⁴⁴ Peyesupa niha Carugar ité, sese niha pe ahe tupri avei peico. Peyapo pota mbahe semimbotar tēi. Esepia, Carugar yipisuive ité oporoyuca serai vahe. Ndoypoi vahe ité mbahe supi tupri vahe, noñehei avei mbahe supi eté vahe rese. Semirasa iñehe ité. Esepia, semirañete ai vahe ité; ahe ité niha yipindar semira tēi vahe.

⁴⁵ Che rumo añehese mbahe supi tupri vahe rese, ndache reroyai eté peye.

⁴⁶ ¿Ava pīha pe pāhu pendar oicua mbahe che rembiavi? ¡Aní eté! Che añehe mbahe supi eté vahe rese pēu, ¿mahera ru evocoiyase ndache reroyai eté peye?

⁴⁷ Acoi ava Tūpa suindar, ahe osendu pota rai iñehe; pe rumo ndahei eté Tūpa suindar peico. Sese ndapesendu potai eté iñehe —ehi Jesús judío eta upe.

Poropīsīrosar yipive catu vahe Abraham sui

⁴⁸ Evocoiyase judío eta aipo ehi Jesús upe yuvireco:

—Supi eté, ore oroicua nde Samaria iguar tēi ereico, carugar ité erereco ndeyese —ehi yuvireco chupe.

⁴⁹ —Che ndarecoi eté carugar cheyese. Che rumo che Ru amboetei; pe rumo ndache mboetei eté peye.

⁵⁰ Iyavei che ndasecai ava che mboetei āgua. Oime rumo ñepeoi opota vahe. Ahe niha omondora ava rembiapo reprī chupe.

⁵¹ Supi eté aipo ahe pēu: acoi omboyeroya vahe che ñehe, nomanoi chietera yuvireco —ehi judío eta upe.

⁵² Evocoiyase judío omboyevī yuvireco chupe aipo ehi:

—Cūrítei oroicua ité cute nde ererocese carugar ndeyese. Esepia, Abraham iyavei opacatu Tūpa ñehe mombehúsar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere?

⁵³ ¿Nde tie ivate catu ereico ore ramoi Abraham sui? Esepia, ahe omano ité iyavei ambuae Tūpa ñehe mombehúsar omanopa ité yuvireco. ¡Mbahe angahu vo co evocoiyase eremoha ndeyese! —ehi yuvireco chupe.

⁵⁴ —Che ae tēi ayemboeteise mbahe che rembiapo pipe, ahese ndahei chira supi vahe viña. Che Ru rumo che mboetei, chupe ité: “Ore Tūpa” peye.

⁵⁵ Pe rumo ndapeicuai eté. Che rumo aicua. “Ndaicuai” ahese, evocoiyase semirañete ai vahe aicora viña inungar pe peico. Che rumo supi eté aicua. Sese niha amboyeroya iñehe.

⁵⁶ Esepia, pe ramoi Abraham oyemboviha ‘asepiara ihari oyepotase’ oya cheu. Osepia ité niha. Sese oviharete ité —ehi judío eta upe.

⁵⁷ Evocoiyase judío eta:

—¿Mara erera vo aipo Abraham repia ndererecomi vīteise cincuenta araviter? —ehiño yuvireco chupe.

⁵⁸ —Supi eté aipo ahe pēu: che aicove vahe Abraham yesuēhi vīteseva —ehi.

⁵⁹ Aipo ihese, oipisipa ita yuvireco yapi āgua. Ahe rumo ahe ramoseve oñemi ava eta pāhuve, osēño ité oso tūparo sui.

9

Jesús ombogüera mbia ohasa suive ndasesapisoi vahe

¹ Jesús oguatase ocar rupi, osepia mbia ohasa suive ndasesapisoi vahe.

² Ore semimbohe oroico vahe, oroporandu chupe:

—Ore mbohesar, ¿mahera pīha co mbia ndasesapisoi eté oha? ¿Oyesupa angaipa sui pīha? ¿Oangaipa sui ae tie? —orohe chupe.

³ —Ndahei eté oangaipa sui, ndahei avei oyesupa angaipa sui; co rumo ēgüe ehi Tūpa mbahe sese mboyecua āgua.

⁴ Sese oime vitese ari yandeu che mbousar poraviquisa apo āgua, iya ité ahe yayapo. Esepia, pītura, ahese ndayaicatui chietera mbahe apo.

⁵ Co ivi pipe che recove vitese rumo, che aico ava upe tesapesa nungar —ehi oreu.

⁶ Aipo ohe pare, ondivi ivive, güendi pipe omoaqui vahe ivi omondo ndasesapisoi vahe resa rese.

⁷ Ipare aipo ehi chupe:

—Eso, tereyovai igua Siloé serer vahe pipe —ehi (ahe serer ‘imondopri’ oya aipo ehi).

Ndasesapisoi vahe evocoyase oso, oyovai. Oyevise ichui, omahe tupri ité.

⁸ Evocoyase sēta ivirindar iyavei ava oicua vahe sesapisoēhise oporanduse guarepochi rese aipo ehi yuvireco:

—¿Ndahei vo acoi co uguapī oī guarepochi rese oporandu yepi? —ehi yuvireco.

⁹ Amove ambuae ava aipo ehi:

—Taa, ahe ité —ehi.

Ambuae rumo aipo ehi yuvireco:

—Ndahei ahe. Aviye tupri ité rumo ahe —ehi.

Ahe mbia rumo aipo ehi:

—Taa, che ité niha ahe aico —ehi.

¹⁰ Evocoyase oporandu yuvireco chupe:

—¿Mara ere vo co esareco? —ehi.

¹¹ —Acoi mbia, Jesús serer vahe, ahe omoaquimi güendi pipe ivi, oipichi che resa rese aipo ehi cheu: ‘Eso igua Siloé ve, eyovai’ ehi. Evocoyase aso, ayovaise, ahese amahe tupri ité —ehi.

¹² —¿Que vo ahe mbia? —ehi yuvireco chupe.

—Ndaicuai, ¿que vo catu? —ehiño ava güeta cotindar uve.

Fariseo oporandu ndasesapisoi vahe cuera agüer rese yuvireco

¹³⁻¹⁴ Mbituhusa ari pipe aipo Jesús omoaquimi güendi pipe ivi ndasesapisoi vahe mbogüera āgua. Sese viraso ndasesapisoi vahecuer fariseo eta rovai yuvireco.

¹⁵ Fariseo oporandu iri yuvireco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güendi pipe omoaqui vahe che resa rese. Ichui ayovai. Ipare voi asareco —ehi.

¹⁶ Evocoyase ambuae aipo ehi yuvireco chupe:

—Aipo mbia ndahei eté revo Tūpa suindar. Esepia niha, nombotei eté mbituhusa ari —ehi yuvireco.

Ambuae evocoyase aipo ehi yuvireco:

—¿Mara ehira aipo poromondiisa apo ava yangaipa vahe viña? —ehiño yuvireco.

Oyeavirati tēi ipihañemoñetasa.

17 Sese oporandu iri ndasesapısoi vahecuer upe yuvıreco aipo ehi:

—Nde no, ¿mara ehi nde pıhañemoñeta co mbıa rese? —ehi.

Ahe evocoiyase aipo ehi:

—Che amoha ité Tũpa ñehe mombehusar secose —ehi.

18 Ahe fariseo rumo ndoviroyai eté icuerasa yuvıreco, oichoho uca rane ité iyepısupa yuvıreco.

19 Chupe oporandu aipo ehi:

—¿Pe rahır ité vo co? ¿Ndasesapısoi oha? ¿Mara ehi vo co cūrıteı osareco no? —ehi iyepısupa upe yuvıreco.

20 —Ore rahır ité niha co, ndasesapısoi oha.

21 ¿Mara ehi vo catu co cūrıteı osareco? iyaveı ¿ava vo catu ombogüera? ¿Ndroıcuai eté! Peporandu chupe. Ocuacua niha; ahe ae oıcuı uca pẽu —ehiño iyepısupa yuvıreco fariseo upe.

22 Iyepısupa rumo osıquıyepave tẽi aipo ehiño yuvıreco. Esepıa, fariseo opa ité oyemoıngatu yuvıreco ava “Jesús Poropısirosar secıı” ehi vahe oñemonuhasa sui ñepei reseve imombo ägua.

23 Sese niha iyepısupa aipo ehiño yuvıreco: “Peporandu chupe. Ocuacua niha” ehiño.

24 Evocoiyase fariseo güeru uca iri acoı mbıa imbogüeraprı yuvıreco, aipo ehi yuvıreco chupe:

—Emombehuño oreu Tũpa rovaque mbahe supı tuprı vahe. Esepıa, ore oroıcuı ité evocoi mbıa angaıpa viyar seco rese —ehi.

25 Ahe evocoiyase omboıyevı chupe:

—Che ndacıuı eté angaıpa viyar tie revo. Co güeraño catu che aıcuı: che ndacheresapısoi vahecuer aıco; cūrıteı rumo asareco —ehi.

26 Evocoiyase oporandu iri yuvıreco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvıreco chupe.

27 —Amombehu niha acoı pẽu. Pe rumo ndache reroyai eté peıye. ¿Mahera vo peıpota amombehu vite vaheřã pẽu? ¿Pe aveı tie peguata pöta supı? —ehi fariseo eta upe.

28 Ahese oñehe rai tẽi yuvıreco chupe:

—Nde ahe mbıa rupındar tẽi ereıco. Ore rumo yande ramoı aracahendar Moısés rupı oroguata vahe.

29 Esepıa, oroıcuı ité Tũpa oñehese Moısés upe. Aipo mbıa rumo ndoroıcuı eté que sui osẽ —ehi yuvıreco chupe.

30 —ıMara peıye ruteı pe ndapeıcuı que suıdar ahe! Che rumo che mbosareco.

31 Supı eté, yaıcuı Tũpa ndosenduı eté ava angaıpa viyar ñehe; ava omboteısar iyaveı vıroyasar ñehe güeraño ité niha osendu.

32 Esepıa, ndıpoi eté que avaño tẽi ava oıesu sui ndasesapısoi vahe ombogüera vahe.

33 Ahe rumo ndaheıse Tũpa suıdar ou vahe viña, ndoıcatuı chıetera revo mbahe apo viña —ehi fariseo eta upe.

34 Evocoiyase fariseo eta aipo ehi yuvıreco chupe:

—¿Nde co oangaıpa reseve öha vahe tẽi, ore mbohe pöta mbahe rese eve? —ehi.

Ipare omose ñepei reseve oñemonuhasa sui yuvıreco.

Jesús reroyasarẽhi ndasesapısoi vahe nungar tẽi

35 Jesús oıcuı ndasesapısoi vahecuer mombosa. Vupıtıse aipo ehi chupe:

—¿Ereyeroya nde Ava Riquehir rese? —ehi.

³⁶ Mbia evocoyase aipo ehi chupe:

—Che mbohesar, emombehumí cheu; tayeroya catu ru sese —ehi.

³⁷ —Eremahe niha co sese; che ité ahe aico —ehi ndasesapisoí vahecuer upe.

³⁸ Evocoyase mbia oñenopiha sovai:

—Orovíroya, che Yar —ehi chupe.

³⁹ Ichui aipo ehi:

—Che ayu co iví pipe mbahe supí tuprí vahe apo ãgua; ava ndasesapisoí vahe nungar upe mbahe supí eté vahe che Ru suíndar mboyecua ãgua iyavei ava oicua tēi vahe mbahe Tūpa suíndar mboesapisoēhi iri ãgua —ehi.

⁴⁰ Evocoyase ambuae fariseo eta yuvirecoí vahe cōimi ichui osenduse aipo ñehesa, oporandu yuvireco chupe:

—¿Ore avei tie ndasesapisoí vahe nungar oroico? —ehi.

⁴¹ Evocoyase omboyeví ahe fariseo upe:

—Peicose ndasesapisoí vahe nungar viña, “Peyaví mbahe” ndehi chietera Tūpa pe angaipa rese pēu viña. Pe rumo, “Ore oroicua tuprí Tūpa suíndar mbahe” peye tēi. Sese Tūpa, “Peyaví mbahe” ehi eté pēu —ehi Jesús fariseo eta upe.

10

Jesús ovesa rãrosar nungar

¹ “Supí eté aipo ahe pēu: acoi ava co coti rupi tēi yuvíroique vahe ovesa rēta pipe, ahe imonda rai vahe tēi yuvirecoí.

² Oique vahe rumo oquendipi rupi eté, ahe sãrosar ité secoí.

³ Oquendipi rãrosar omboi chupe. Evocoyase ovesa rãrosar oñehe serer rupi güeimba ovesa upe senose ãgua sēta sui. Ahe evocoyase oicua ñehhe yuvireco.

⁴ Güeimba ovesa renose pare uguata senonde; seimba ovesa evocoyase uguata saquícuerive. Esepia, oicua ité ñehhe yuvireco.

⁵ Ndoguatai eté rumo oyarēhi rupi yuvireco; yuvinoña-noñaño ichui. Esepia, ndoicuai eté ñehhe” ehi

⁶ omboyoya güecocuer ovesa rãrosar rese. Ava rumo ndosenducuai eté yuvireco.

Jesús ava rãrosar aviye vahe

⁷ Evocoyase Jesús aipo ehi iri: “Supí eté, aipo ahe pēu: che año ité oquendipi nungar aico ovesa upe.

⁸ Opacatu ava yugüeru vahe che renonde, imonda rai vahe nungar tēi yuvirecoí. Ava cheunda rumo ndovíroyai eté yuvireco.

⁹ Che rumo oquenda nungar aico. Acoi oique vahe che rupi, ahera ipĩsiropirã yuvirecoí. Iyavei inungar acoi ovesa oique vahe güeta pipe, ichui osē capihí reca ãgua igua yepi, egüe ehira che reroyasar yuvireco.

¹⁰ “Imonda rai vahe rumo omonda ãgua tēi ou, oporoyuca ãgua, mbahe mocañi ãgua tēi avei. Che rumo ayu ‘tovireco ava tecovesa ndopai vahe rã ité yuvireco’ viya.

¹¹ Che ité ava rãrosar aviye vahe aico. Sese ayemoingatú tuprí che recocuer mondo ãgua ava cheundar repirã;

¹² acoi guarepochi repirã tēi oporaviqui vahe rumo, osepiase mahembiar oñaro ai vahe, oseyapaño güemiario, oña oso. Esepia niha, ovesa ndahei eté

seimba, ndahei avei eté ahe sãrosar ité secói. Evocoyase mahembiar oñaro ai vahe omondi-mondi eté ipisi ãgua.

13 Evocoi mbia oñaño. Esepia, guarepochi repirã tẽi oporaviqui. Sese niha ndosaisui eté güemiaro ovesa.

14-15 “Che rumo ava rãrosar aviye vahe ité aico; che Ru che cua ité. Che evocoyase aicua avei che Ru. Sese che avei aicua che reimba ovesa eta. Ahe avei che cua yuvireco. Che niha amondo che recocuer sepirã yuvireco.

16 Areco avei ambuae ité che reimba ovesa. Ahe avei aru pota che mboyeroya vaheã yuvireco. Ahese ñepeí reseve guasu che remiaro yuvirecoira.

17 “Che Ru niha che raisu ité. Esepia, amondo itera che recocuer manosave. Ipare rumo acuerayevira.

18 Ndoicatui chira ava ahe ae tẽi che yuca ãgua; che teieté rumo amondora che recocuer che remibotar rupi eté. Che areco ité piratasa imondo ãgua, che cuerayevi iri ãgua avei. Sese ité niha che Ru che cuai” ehi güemimbohe eta upe.

19 Osenduse judío eta aipo nungar ñehesa, opa ipihañemoñeta yoavirati yuvireco.

20 Setá iteanga ipãhu pendar aipo ehi:

—¿Mahera vo co pemboyeroya? Vireco ité carugar oyese, ndayaracuai eté —ehi yuvireco chupe.

21 Ambuae rumo aipo ehi yuvireco:

—Ndipoi eté rumo que ava na ehi vahe oñehe carugar rerecosar. ¿Omboe-sapio tite carugar rerecosar ava? —ehi amove judío yuvireco Jesús upe.

Judío rerecuar ndoyambotai Jesús yuvireco

22 Ari sôhisa vahe pipe tecua Jerusalén ve tũparo rovasagüer pieta oyepota.

23 Ahese Jesús oguata oico tũparo Salomón oyapo vahecuer rocupe ivi rupi.

24 Evocoyase judío rerecuareta oyere tupri yuvireco sese aipo ehi yuvireco chupe:

—¿Marase rutei vo eremombehu tuprira Poropĩsirosar nde recosa oreu? Emombehu tupri catu ñepeí reseve oreu —ehi yuvireco chupe.

25 —Amombehu niha acoi pẽu, ndache reroyai eté rumo peye. Mbahe ayapo vahe che Ru mborerecuasa pipe omboyecua ité Poropĩsirosar che recosa;

26 pe rumo ndache reroyai eté peye. Esepia, pe ndahei eté che remiaro ovesa peico.

27 Che remiaro ovesa rumo oicua che ñehe. Che avei aicua ahe yuvireco. Ahe evocoyase che rupi oguata yuvireco.

28 Amondo avei tecovesa apirẽhi yuvireco chupe icañiẽhi ãgua; ndipoi chietera que ava virocua iri vaheã che sui.

29 Che Ru niha ombou cheu. Esepia, ahe ipirata catu opacatu ava sui. Ndipoi chietera que ñepeí ava oicatu vahe serocua che Ru sui.

30 Che Ru iyavei che orico ñepeño ité —ehi judío rerecuareta upe.

31 Aipo ihese, judío rerecuareta osupipa iri ita yuvireco yapi ãgua.

32 Ahe chupe rumo aipo ehi:

—Setá mbahe poromondiisa aviye vahe pe rovaque ayapo che Ru piratasa pipe. ¿Uma che rembiapo aviye vahe sui che api-ápí pota peye ita pipe? —ehi judío rerecuareta upe.

33 Judío rerecuareta omboyevi yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo egüe orohera ndeu. Esepia, nde ereñehe rai tẽi Tũpa

rese. Nde moco ava tēi ereico. Nde rumo ereyeapo Tūpa ndeyeupe ae —ehi yuvireco chupe.

³⁴ Evocoyase aipo ehi ahe ava upe:

—Pēundar mborocuaita icuachiapri pīpe niha aipo ehi: ‘Che aipo ahe pēu: pe tūpa pāve ité peico’ ehi.

³⁵ Yaicua niha icuachiapri pīpendar ndiyai yayamotarēhi. Esepia, Tūpa aipo ehi: ‘Pe tūpa pāve ité peico’ ehi evocoi ava oñehe pīsisa upe.

³⁶ Che niha che Ru Rembiporavo aico. Ahe che mbou co ivi pīpe. ¿Mahera ru evocoyase, ‘Nde ereñehe rai tēi Tūpa rese’ peye cheu, ‘Che Tūpa Rahir aico’ ahese pēu?

³⁷ Esepia, acoi ndayapoise mbahe che Ru remimbotar, ahese ndache reroyai chietera peye viña.

³⁸ Yepe ndache reroyai chira che recocuer rese peye viña, mbahe ayapose rumo ahe tēi peroyara. Sese tapeicua ñepei reseve che Ru secoise che rese iyavei che sese che recosa —ehi oamotarēhimbareta upe.

³⁹ Osoquenda pota iri yuvireco viña; Jesús rumo osoño ipāhu sui.

⁴⁰ Oyevi iai Jordán rovai. Aheve acoi Juan yīpindar oporoāpiramo. Aheve opita.

⁴¹ Ava rehī yuvirasō sepia, aipo ehi yuvireco:

—Yepe Juan ndoyapoi mbahe poromondiisa viña. Opacatu mbahe omombehu vahe rumo co mbīa resendar supi eté —ehi yuvireco.

⁴² Setá iteanga ava Jesús viroya yuvireco aheve.

11

Lázaro mano agüer

¹ Oime ava imbaheasi vahe serer Lázaro, tecua Betania pendar. Güeindri Marta iyavei María reseve yuvirecoi aheve.

² Ahe María, oipiyere vahe mbahe siacua vahe yande Yar pi rese. Ipape oiquiti oha pīpe.

³ Ahe seindri omondo oñehe Jesús upe yuvireco aipo ehi:

—Ore Yar, nde mboripar, nde rembiaisu, imbaheasi ou —ehi.

⁴ Ahe osenduse aipo ehi:

—Co mbaherasisa rumo ndahei ahe imano āgua ité. Ēgüe ehi rumo Tūpa reco porañetesa mboyecua āgua iyavei Tahir reco porañetesa mboyecua āgua avei —ehi.

⁵ Yepe osaisú iteanga Marta icupihir reseve iyavei iquivri Lázaro viña,

⁶ oyanduse rumo Lázaro mbaherasisa, opita viteño ité ñuvirio ari güecosave.

⁷ Ipape omombehu ore supi oroico vahe upe:

—Yayevi iri ivi Judea rupi —ehi.

⁸ Ore rumo aipo orohe chupe:

—Ore mbohesar, cuesemi tēi acoi judío rerecuareta ahe pendar nde yuca pota ita pīpe yuvireco; ¿cūríte co ereso pota iri aheve? —orohe chupe.

⁹ Oreu rumo aipo ehi:

—Ñepei ari niha vireco doce hora. Supi eté acoi oguata vahe ari pīpe ndoyepiapi eté. Esepia, osepia ité co ivi resapesa;

¹⁰ acoi oguata vahe rumo pītu pīpe, oyepiapi eté. Esepia, ipane tesapesa chupe —ehi oreu.

¹¹ Ipape aipo ehi:

—Yande mboripar Lázaro oque tēi. Che rumo amomahera —ehi.

¹² Evocoyase ore aipo orohe chupe:

—Ore Yar, oque tēise, ocuerara —orohe.

¹³ ‘Omano ité’ oyapave tēi aipo ehi. Ore rumo orepilhañemoñeta: “Oque tēi revo” orohe chupe viña.

¹⁴ Ipare rumo omombehu tupri ité aipo ehi oreu:

—Lázaro omano ité.

¹⁵ Aviharete che ndaicoise aheve. Esepia, ěgüe ehise ité aviye catura pëu pe che reroya āgua. Yaso ru catu sepia —ehi oreu.

¹⁶ Evocoyase Tomás, Gemelo serosa vahe, aipo ehi ore imboetasa oroico vahe upe:

—Yaso avei ru yande yamano vaheerā supi —ehi.

Jesús cuerayevisa seci iyavei tecovesa

¹⁷⁻¹⁸ Betania namombriimi Jerusalén sui, tres kilómetro tupri. Evocoyase ore oroyepota senise ahe tecuave, orendu “cūrítei irungatu ari opa Lázaro tīre” ehi vahe.

¹⁹ Setá judío yuviraso Marta iyavei María piri iquivri mano agüer sui imboviha āgua.

²⁰ Oicuase Marta Jesús yepota seni, oso voi eté sapeve; María rumo opitaño oi pipe.

²¹ Evocoyase Marta aipo ehi voi chupe:

—Che Yar, ehi cohave ereicose, nomanoi chietera revo ore quivri viña.

²² Che rumo aicua Tūpa omboura opacatu nde porandusa ndeu —ehi Marta chupe.

²³ —Nde quivri rumo ocuerayevi irira —ehi Marta upe.

²⁴ —Supi eté aicua niha ocuerayevira opacatu omano vahecuer reseve ari ipa vahe pipe —ehi Marta.

²⁵ —Che niha cuerayevisa aico iyavei tecovesa. Acoi ava che reroya vahe, yepe omano tēira viña, oicoveño itera rumo.

²⁶ Acoi che reroya vahe güecoveseve, nomanoi chietera. ¿Eeroya aipo che hesa? —ehi Marta upe.

²⁷ —Oroviroya ité, che Yar. Nde niha Poropĩsirosar ereico Tūpa Rahir, ore remiaro ereyu vaheerā co ivi pipe oreu nara —ehi Marta Jesús upe.

Jesús oyaseho Lázaro ruvipa rovai

²⁸ Aipo ohe pare, Marta oso ocupihir María reca, chupeñomi aipo ehi:

—Porombohesar oicove cohave, “Tou” ehi ndeu —ehi chupe.

²⁹ Evocoyase María oso voi eté sepia.

³⁰ Jesús rumo ndoique vitei eté tecua pipe; Marta rese oyoepiasave viteño ité seci.

³¹ Osepiase María sē poyava, judío eta sētave yuvirecoi vahe imbovihasar yuviraso voi saquicuerive, “Oquivri ruvipave revo osora oyaseho” ehi yuvireco viña.

³² Evocoyase María oyepotase chupe, oñenopiha sovai aipo ehi:

—Che Yar, ehi revo ereicoveño itese cohave, che quivri nomanoi chietera viña —ehi María chupe.

³³ Osepiase María yaseho iyavei judío eta yuviraso vahe supi, opiha pipe oyandu ité oviharēhisa.

³⁴ Evocoyase oporandu:

—¿Que vo peñoti? —ehi chupe.

Ahe aipo ehi yuvireco chupe:

—Ore Yar, erio, teresepia —ehi.

³⁵ Ahesé Jesús oyaseho.

36 Judío evocoyase aipo ehi yuvireco:

—¡Esepia, osaisu ité! —ehi oyeupe yuvireco.

37 Ambuae rumo ipāhu pendar aipo ehi yuvireco:

—Co mbia omomahe vahe acoi mbia ndasesapisoi vahe, ¿ndoicatu chira pīha Lázaro manoēhi āgua mbahe apo cuese rahe viña? —ehi yuvireco.

Lázaro mbogüerayevi agüer

38 Jesús oyemboya suvipave oviharēhisa pīpe; ahe suvipa ita hopri, so-
vapisa ita avei.

39 —Perocua sovapisa ita ichui —ehi.

Marta, omano vahe reindri, rumo aipo ehi:

—Che Yar, iné ité revo. Esepia, opa niha irungatu ari imanore —ehi.

40 —¿“Che reroyase eve, Tūpa pīratasa eresepiara” ndahei vo acoi ndeu? —
ehi Marta upe.

41 Aipo ihe pare, virocua ita yuvireco ichui. Evocoyase omahe iva rese
aipo ehi:

—Che Ru, “Aviye ndeu” ahe ndeu. Esepia, eresendu che ñehe.

42 Che aicua nde eresenduño ité che ñehe yepi, che rumo aipo ahe co ava eta
rembiepiave ‘toviroya avei nde che mbousa co ivi pīpe yuvireco’ che yapave
—ehi.

43 Aipo ohe pare, oñehe pīrata aipo ehi:

—¡Lázaro, esē eipeve sui! —ehi.

44 Omano vahe evocoyase osē voi opacatu turucuar omamasa reseve.
Jesús evocoyase aipo ehi ava upe:

—Peyorapa imamasa ichui, toguata —ehi.

Judío rerecuareta oyemomborandu Jesús pisi āgua yuvireco

45 Osepiase co poromondiisa, judío eta yuviraso vahe María rupi setá ité
Jesús viroya yuvireco.

46 Ipāhu pendar rumo moviro yuviraso voi ava fariseo rerecuareta uve
sembiapo mombehu āgua.

47 Evocoyase fariseo rerecuareta iyavei pahi rerecuareta oñemonuha
guasu yuvireco aipo ehi:

—¿Mara yahera vo sereco? Co mbia setá ité oyapo poromondiisa oico.

48 Ndayayapoise mbahe chupe, opacatu tiēte ava viroyara yuvireco viña
iyavei aviyeteramo mborerecuar Roma iguar yanduse, yugüerura yande
tūparo mondurupa iyavei omocañi tēi uca aveira yande recua yande sui —
ehi oyeupe yuvireco.

49 Ñepe rumo mbia ipāhu pendar Caifás serer vahe, ahe ité pahi eta
rerecuar ivate catu vahe ahe araviter pīpe, aipo ehi ava upe:

—Pe ndapeicuai eté mbahe,

50 ndapesenducuai avei co tecocuer; aviye catura ñepe mbia omanose
yande recouer rese, ndahei que opacatu yande mocañi tēi āgua —ehi om-
boetasa eta upe.

51 Ahe rumo ndahei oyesui tēi aipo ehi; Tūpa ité aipo ombohe uca. Esepia,
ahe ité mborerecuar guasu chini ahese. Sese aipo ehi: “Jesús omanora yande
recouer rese” ehi.

52 Iyavei ndahei chira ahe ava reseño, omanora opacatu ava Tūpa Rahir
oñemosai tēi vahe ñepe reseve imonuha āgua.

53 Ēgüe ehi ahe ari pīpeve judío eta rerecuar oyemoingatupa voi yuca āgua
yuvireco.

⁵⁴ Sese ndoguata iri ava judío eta pãhu rupi. Ahe rumo osê ìvi Judea sui, oso ìvi iporupirêhi vahe rerovicave, tecua Efraín ve. Aheve opacatu oropita supi.

⁵⁵ Virovise judío Pascua pieta apo ãgua, setá iteanga ava ambuae tecua rupindar yuviraso tecua Jerusalén ve oyecocuer moatiro ahe pieta mboetei ãgua renondeve.

⁵⁶ Oseca têi Jesús yuvireco. Ipore tũparove yuviroiquese, oporandu-randu oyeupe yuvireco:

—¿Mara peye pe, oura pãha pieta repia, aní chira tie? —ehi-ehi oyeupe yuvireco.

⁵⁷ Yipive rumo fariseo rerecuar iyavei pahí rerecuar oyocuai ava, “Pesepiase Jesús, pemombehu voi oreu ipisi ãgua” ehi yuvireco chupe.

12

Ñepeí cuña omondo Jesús rese mbahe síacua vahe

¹ Seis ari ipane vites Pascua pieta ãgua, Jesús oso tecua Betania ve, aheve acoi Lázaro ombogüerayevi.

² Eipeve ocaru yuvireco Jesús mboeteisave. Marta ihañeco sese; Lázaro evocoyase ocaru yuvinoi mesave ipiri.

³ Evocoyase María güeru medio litro mbahe síacua vahe nardo, sepí iteanga vahe. Omondo ipi rese. Ipore oiquíti ohavapri pipe ichui. Síacúa iteanga evocoyase opacatu oi pipe.

⁴ Evocoyase ore mboetasa Judas Iscariote, ahe acoi omondo vaherã ava yamotarêhimbar uve, aipo ehi:

⁵ —¿Mahera vo ndimondosai co mbahe síacua vahe tresciento denario rupi ava iparaisu vahe pítivii ãgua? —ehi.

⁶ Judas rumo ndahei ava iparaisu vahe raisupave aipo ehi. Ahe rumo imonda rai vahe têi. Setá rupí guarepochi virocua güembiporugã têi.

⁷ Evocoyase Jesús aipo ehi:

—Toyapoño cheu. Esepia, ahe che mano ãgua renonde êgüe ehi cheu.

⁸ Yuvirecoveño itera ava iparaisu vahe pe pãhuve yepi; che rumo ndaico pucu iri chira pe pãhuve —ehi Judas upe.

Pahí rerecuar oyamotarêhi Lázaro yuvireco

⁹ Setá iteanga ava judío oyandu yuvireco Jesús rerãcua Betania ve secoise. Sese yuviraso aheve; ndahei Jesús repia güeraño yuviraso, êgüe ehi rumo imbogüerayevipri Lázaro repia avei.

¹⁰ Evocoyase pahí rerecuar, “Yayuca avei Lázaro” ehi yuvireco oyeupe.

¹¹ Esepia, ahe ichui têi niha setá iteanga judío oyepepi pahí rerecuar sui Jesús reroya ãgua yuvireco.

Jesús oi que Jerusalén pipe

¹² Ava rehí yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota ãgua ahe tecuave yuvireco.

¹³ Ahese oyasia pindo yuvireco. Oyacatu viraso Jesús rovaichi ãgua, osapucái yuvireco chupe:

—¡Imboeteipri, sovasapri secói ou vahe yande Yar Tũpa rer pipe! ¡Tũpa tosovasa Israel rerecuar guasu! —ehi yuvireco.

¹⁴ Yipindar rumo opa Jesús oseca uca guaricumí. Ipore oyeupi sese icuachiapri arachendar rupi tupri ité aipo ehi vahe:

15 “Pesiꝓuꝓei rene, Sión pendar; pesepia, pe rerecuar guasu guaricumí harive ou pēu” ehi.

16 Yipindar, ore semimbohe eta, ndorosenducuai eté co aracahendar imombehupri. Ipape rumo oyeveise güecosa porañetesave, ahese oremahenduha aracahendar sesendar icuachiapri rese, “Supi eté omombehu” orohe tēi sepiase.

17 Acoi ava yuvirecoi vahe Jesús rupi, Lázaro mbogüerayevisa osepia vahecuer, ahe opa omombehu-mbehu ambuae ava upe yuvireco.

18 Sese ava eta yuvinose voi sovañchi ipisi ãgua. Esepia, oicua ité ahe mbahe poromondiisa guasu yapose yuvireco.

19 Evocoyase fariseo rerecuareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, ipacatu guasu ité ava oguata cūrítei yuvireco supí! —ehi yuvireco.

Oime griego oseca vahe Jesús yuvireco

20 Griego oime ava rehií pãhuve yuviraso vahe pieta repia Tũpa mboetei ãgua tecua Jerusalén ve.

21 Ahe oyemboya Felipe, Betsaida pendar rese, ahe tecua Galilea pipendar. Ipape aipo ehi yuvireco chupe:

—Nde mbia, orosepia potami aipo Jesús —ehi.

22 Felipe evocoyase oso imombehu Andrés upe; ichui yuviraso ñuvirío voi Jesús upe imombehu.

23 Evocoyase chupe aipo ehi:

—Oyepota ari cheundar che, Ava Riquehir, che yevi iri ãgua che recua porañetesave.

24 Supi eté aipo ahe pēu: inungar acoi trigo rãhií nañotisaise, ahese ndihai chietera; ñotise rumo, ahese iha vaira.

25 Acoi ava osaisuse rumo güecocuer tēi, ocañi tēira; acoi ndosaisui vahe rumo güecocuer co ivi pipendar tēi che recocuer rese, evocoi nungar virecora tecovesa apirēhi.

26 Acoi ava che mboyeroya pota vahe, toguata che rupi yuvireco. Esepia, acoi che mboyeroysar yuvirecoi vahe, ahe avei yuvirecoira che piri ivave. Che Ru Tũpa evocoyase omboeteira ahe sereco —ehi chupe.

Jesús omombehu omano ãgua

27 “¡Cūrítei ayandu ité mbahe-mbahe tēi oime vaheřã cheu! ‘¿Mara ahera pĩha?’ ahe tēi. ¿Aipo ahera: ‘Che Ru, che pĩsiro eve cūrítei cheu oime vaheřã mbahe tēi sui’ ahera viña? ¡Che rumo aicua evocoi nungarã ité ayu!

28 Che Ru, emboyecua nde pĩratasa nde rer porañetesa mboetei ãgua” ehi oyerqui.

Ichui oyeendu iva sui ñehesa aipo ehi vahe: “Ēgüe ahe niha amboyecua che pĩratasa vichico, Ēgüe ahe iri aveira” ehi.

29 Aheve ava yuvirecoi vahe, “Osunu revo” ehi yuvireco viña; ambuae ava, —Tũpa rembiguai revo oñehe Jesús upe —ehi yuvireco.

30 Evocoyase aipo ehi ava eta upe:

—Ndahei cheundar ñehesa pesendu, ahe rumo pēundar.

31 Cūrítei oimera ñemoirosa co ivi pipendar ndache reroyai vahe upe, cūrítei avei imombosara Carugar co ivi pipendar imborerocua sui.

32 Acoi che rupise ivate, opacatu ava arura cheyeupi —ehi.

33 Aipo ñehesa pipe omboyecua tupri ité mara ehira omano.

34 Aipo ihese ava eta aipo ehi:

—Ore rumo orosendu mborocuaíta icuachiapri pïpe aipo ehi vahe: “Poropïsirosar apirêhi vaheṛā ité” ehi. ¿Mahera ru aipo nde: “Ava Riquehîr osupîra ivate yuvireco” ere no? ¿Uma ru aipo Ava Riquehîr, ambuae tie? — ehi ava eta yuvireco chupe.

³⁵ Evocoyase aipo ehi ava upe:

—Pe pereco vitemira chîhi rupive tesapesa pe pâhuve. Peguata catu supî seime viteseve. Aviyeteramo pe resapiha tēira pītumimbi vahe. Esepia, acoi oguata vahe pītumimbisa rupî, ndoicuai que güecosa.

³⁶ Peroya co tesapesa cūrîtei pereco viteseve, ipipe ité pe reco âgua —ehi.

Aipo ohe pare, Jesús osē ava rehîi pâhu sui; ndoyemboyecua iri chupe.

Setá judío rereciar ndoviroya vitei eté Jesús yuvireco

³⁷ Yepe Jesús setá iteanga oyapo mbahe poromondiisa judío rereciar rovaque viña, ahe rumo ndoviroyai eté yuvireco.

³⁸ Esepia, imboaviyesa rane itera Tûpa ñehe mombehusar Isaías rembicuachiagüer aipo ehi vahe:

“Che Yar, ava ndoviroyai yande ñehe yuvireco iyavei ndoviroyai nde pîratasa eremboyecuasé chupe” ehi.

³⁹ Co rese avei ava ndoicatui eté senducua yuvireco. Inungar oicuachía Isaías aipo ehi:

⁴⁰ “Tûpa nomboesapisoí ava iyavei nombopihañemoñeta tupri iri mbahe rese yuvireco.

Sese ndosepiacuai eté mbahe, ndosenducuai avei mbahe, ndoyevî catui yuvireco chupe ombogüera âgua” ehi.

⁴¹ Isaías aipo ehi. Esepia, osepia ité Jesús reco porañetesa. Evocoyase ahe oñehe sese.

⁴² Setá ité rumo judío viroya yuvireco, seco ivate vahe avei. Ahe rumo nomboyecuai eté seroyasa yuvireco fariseo rereciar sui osiquiyepave ‘aviyeteramo yande mombora ñemonuhasa sui ñepeí reseve yuvireco’ oya.

⁴³ Esepia, ahe oipota catu ava tēi suindar yemboeteisa Tûpa suindar yemboeteisa sui yuvireco.

Jesús ñehe reroyasa rese porandusara

⁴⁴ Yipîndar rumo, Jesús oñehe vitese ava rehîi upe, oñehe pîrata aipo ehi: “Acoi che reroya vahe ava, ndahei che güeraño che reroya, ahe rumo che Ru avei, che mbousar, viroya yuvireco.

⁴⁵ Iyavei acoi che repia vahe, che mbousar avei osepia.

⁴⁶ Che tesapesa aico. Ayu co ivî pïpe ava che reroyasar pītumimbisave yuvirecoiñhi âgua.

⁴⁷ Acoi osendu vahe che ñehe, nomoinguei vahe rumo oyese, ndahei che amocañira. Esepia, ndayui ava co ivî pïpendar mocañi âgua, che rumo ayu ipîsiro âgua.

⁴⁸ Acoi ava che reroïro vahe, ndoviroyai vahe avei che ñehe, oime rumo imocañi âgua: Co che ñehesa supî eté vahe reroyaēhisa pïpe oyemocañi ucara arî ipa vahe pïpe.

⁴⁹ Esepia, che nañehei eté cheyesui tēi; che Ru, che mbousar rumo che cui che ñehe âgua, che porombohe âgua avei.

⁵⁰ Che aicua co cheundar porocuaíta güeru tecovesa apirêhi ava upe. Sese niha amombehu che Ru che cuaisa” ehi Jesús ava rehîi upe.

13

Jesús oyosei güemimbohe pi

¹ Pascua pieta renonde Jesús oicua ité ohari yepota co ivi reya āgua oso vaheṛā Vu piri. Ahe osaisu vahe ité ava oyeupendar co ivi piṛpe yepi. Ēgüe ehi saisu ari ipa vahe rupi.

²⁻⁴ Carugar oiṛque ité Simón rahir, Judas Iscariote, piha piṛpe imondo āgua yamotarēhimbar uve. Jesús rumo oicua ité Vu Tūpa sui ousa, oicua avei oyeve iṛi āgua Vu Tūpa piṛi iyavei Tu omondo opacatu omborerecuasa chupe. Sese ocaruse güemimbohe eta reseve, mesa sui opūha, osequi oturucuar yohasa. Ipare omonde ambuae turucuar vumbicuasa rese.

⁵ Evocoyase omondo i yepoisa riru piṛpe, oyosei güemimbohe pi, omombiru turucuar vumbicuasa rese viṛeco vahe piṛpe oico.

⁶ Ichui Simón Pedro pi oyosei potase, ahe aipo ehi chupe:

—Che Yar, ¿nde co ereyoseira che pi? —ehi chupe.

⁷ —Nde rumo nderesenducuai mbahe che rembiapo cūritei. Ipare rumo eresenducuaṛa —ehi Pedro upe.

⁸ Pedro rumo aipo ehi chupe:

—¿Che pi rumo ndereyosei chietera! —ehi.

—Ndayosei rumo nde pi, ndahei chietera evocoyase che rupindar ereico —ehi Pedro upe.

⁹ Pedro evocoyase aipo ehi:

—¿Che Yar, aní catu che pi año ereyosei; eyosei che po, che rova avei! —ehi chupe.

¹⁰ —Acoi oyasupa ramo vahe rumo, ahe ndiquihai eté. Sese ndiyai oyasu iṛi. Ipi güeraño rumo iya yoseisa. Ēgüe peye ndipoi eté mbahe pe rese; ndaopacatui rumo ēgüe peye —ehi.

¹¹ Ahe aipo ehi: “Ndaopacatui rumo ēgüe peye” ehi. Esepia, oicua ité uma omondora yamotarēhimbar upe.

¹² Güemimbohe pi sei pare, omondo iṛi oturucuar yohasa, oguapi mesave aipo ehi:

—¿Peicua vo co mbahe ayapo vahe pēu? —ehi—.

¹³ Pe niha, “Ore mbohesar, ore Yar” peye cheu. Supi eté niha. Esepia, ahe ité che aico.

¹⁴ Yepe supi eté, che pe mbohesar, pe Yar avei aico viña, ayosei rumo pe pi. Sese pe avei ñepeí-peí peyacatu peyosei aveira pe pi.

¹⁵ Che niha ‘na tehi avei yuviṛeco’ viya opombohe pe rereco, ēgüe ahe pēu.

¹⁶ Supi eté aipo ahe pēu: ava mbiguai tēi, ahe ndahei ivate catu güerecuar sui; ēgüe ehi avei imboupi; ndahei ivate catu secoi ombousar sui.

¹⁷ Pesenducuaṛe co nungar mbahe, peyapo tupriṛe, ahese peviharete catura peico —ehi.

¹⁸ “Che nañehēi opacatu pe rese, che rumo aicua uma yuviṛecoí vahe che rembiporavo. Icuachiapri rumo yaviyera: ‘Acoi ocaru vahe che piṛi, oyemboyere che amotarēhi’ ehi vahe.

¹⁹ Senondeve amombehu pēu. Evocoyase ēgüe ehise ité cheu, che reroyara peye che ité niha aipo ahe vahe vichico.

²⁰ Supi eté aipo ahe pēu: acoi che remimondo oiṛpisi tupri vahe, ahe che pisi tupri avei; acoi ava che pisi vahe, oiṛpisi tupri avei che Ru yuviṛeco” ehi.

Jesús omombehu: “Ñepeí pe pāhu pendar che mondora che amotarēhimbar upe” ehi

21 Aipo ohe pare, Jesús ndoyembovihai eté iyavei mbahe oime vaherã omboyecua tupri ité,

—Supi eté aipo ahe pëu: ñepei pe pãhu pendar che mondora che amotarẽhimbar upe —ehi.

22 Evocoyase ore oromahe-mahe tẽi oreyses, “¿Ava upe pãha aipo ehi?” orohe tẽi oreyeupe.

23 Che sembiaisu catu yípive acaru vĩte.

24 Ipare Pedro oyaiti-iti ‘¿Ava upe vo aipo ere? tehi chupe’ oyapave cheu.

25 Evocoyase che asiri catu irimi yípive, aporandu chupe:

—Che Yar, ¿ava ité vo? —ahe.

26 Ahe aipo ehi cheu:

—Cũritei amoaquira pan rahicuer imondo tohu, ahe ité che mondora —ehi cheu.

Aipo ohe pare omoaqui pan rahicuer imondo Simón Iscariote rahir, Judas, upe.

27 Judas oipisise pan, oguapi voi eté Carugar sese. Evocoyase aipo ehi Judas upe:

—Evocoi ereyapo pota vahe, eyapo voiño ité ru —ehi chupe.

28 Que ñepei rumo mesave orocarua vahe, ndorosenducuai eté aipo ihesa.

29 Esepia, Judas guarepochi riru rãrosar secoi yepi. Sese amove ore pãhu pendar ipihañemoñeta: “Tererocua mbahe pietase nara’ anise, ‘emondo mbahe ava iparaisu vahe upe nara’ aipo oya revo omose imondo” ehi yuvireco chupe viña.

30 Pan pisi pare, Judas osẽ voi eté oso pĩtuse.

Porocuita ipiasu vahe

31 Judas sã pare, Jesús aipo ehi:

—Cũritei oyecuara che, Ava Riquehir, reco porañetesa. Che Ru Tũpa reco porañetesa avei oyecuara che rese.

32 Acoi amboyecuase che Ru Tũpa reco porañetesa, ahe avei omboyecuara che reco porañetesa, ãgũe ehira imboyecua pihaivi.

33 Che rahireta, che rembiaisu, ndaico pucu iri chira pe rese. Che reca tẽira peye; inungar acoi judío rerecuar upe aipo ahe: “Ndiyai chietera peso che sosave” ahe.

34 Sese co amondo porocuita ipiasu vahe pëu ñepei-peï peyeaisu ãgua inungar che opoaisu.

35 Peyeaisuse ñepei-peï, opacatu tupri ité ava oicuara yuvireco che remimbohe supi eté pe recosa —ehi.

Jesús, “Ndaicuai eté co mbia’ erera cheu” ehi Pedro upe

36 Pedro oporandu Jesús upe:

—Che Yar, ¿que vo aipo eresora? —ehi chupe.

Ahese omboyevi Pedro upe:

—Cũritei ndiyai peso vaherã che sosave che rupi; pesorera rumo che rupi curi —ehi.

37 —Che Yar, ¿mahera ru cũritei voi ndiyai nde ruri che so ãgua? ¡Ayemoingatu ité amano vaherã nde rese! —ehi Pedro chupe.

38 —¿Supi eté pãha ereyemoingatu ité che rese nde mano ãgua? Nde rumo cõhe potase tacura ñehe renondeve, mbosapi oyupagüer rupi, “Ndaicuai eté co mbia” erera cheu —ehi Pedro upe.

14

Jesús, Tūpa raper yandeu

¹ Ipare Jesús aipo ehi opacatu oreu: “Pepihañemoñeta atii rene; peyeroya Tūpa rese, che rese avei peyeroya.

² Esepia, che Ru rêtave setá oime pe reco ãgua; êgüe ndehise rumo, namombehui chira aipo pëu viña. Sese che asora pe recuarã moingatu.

³ Moingatu pare ayevíra pe reca che recosave pe reraso ãgua cheyipiri.

⁴ Pe peicua que vo asora iyavei peicua mara peyera pe yepota ãgua che recosave” ehi oreu.

⁵ Tomás rumo aipo ehi chupe:

—Che Yar, ndoroicuai rumo que vo eresora. ¿Mara orohera vo aipo icua ore so ãgua? —ehi.

⁶ —Che niha peri aico supi eté vahe iyavei tecovesa. Che rupi güeraño ité peyepotara che Ru upe —ehi—.

⁷ Pe peicua tuprise ité che recocuer viña, peicua aveira che Ru viña no. Cūrítei suive rumo peicua, pesepia avei cute —ehi oreu.

⁸ Evocoyase Felipe aipo ehi chupe:

—Che Yar, torosepia ité ru aipo nde Ru. Ahese aviyera oreu —ehi.

⁹ —Felipe, setá ari aico pe rese, ¿ndapeicua vítei eté vo che recocuer? Acoi ava che repia vahe, ahe osepia ité che Ru; ¿mahera ru evocoyase, “Torosepia rane ité nde Ru” ere víte cheu no?

¹⁰ ¿Ndache reroyai vo peye che Ru rese ité aicose, che rese avei che Ru secoise? Opacatu mbahe amombehu vahe pëu, ndahei cheyesui tēi amombehu. Che Ru secoi vahe che rese, ahe ité oyapo güemimbotar che recocuer rese —ehi—.

¹¹ Che roroya peye che Ru rese che recose, ahe avei secoise che rese. Anise, che roroyañomi tēi catu peye mbahe che rembiapo rese —ehi—.

¹² Supi eté aipo ahe pëu: acoi ava che roroya vahe, ahe avei oyapora mbahe che rembiapo nungar, tuvicha catura rumo. Esepia, che asora che Ru piri —ehi—.

¹³ Acoi peporanduse que mbahe rese che rer pipe, che amondoño itera pëu. Ipipe che amboyecuará che Ru reco pīratasa.

¹⁴ Che ayapora que mbahe che rer pipe pe porandusa —ehi oreu.

Jesús, “Che amboura Espiritu Santo pëu” ehi viroyasar upe

¹⁵ “Che raisuse ité peye, pemboyeroya catu che porocuaíta.

¹⁶ Che aporandura che Ru upe ombou vaheerã Espiritu supi eté vahe pe pītívii ãgua, ahe secoi vaheerã ité pe rese.

¹⁷ Ava Tūpa ndoicuai vahe rumo, ndoicatui chietera ipisi. Esepia, ndosepiaí, ndoicuai avei yuvireco. Pe rumo peicua ité. Esepia, ahe ité secoi pe rese. Ipare oique itera pe piha pipe.

¹⁸ “Ndopoeyai chira pe güeraño tēi; ayevíra niha pe rese aico vaheerã.

¹⁹ Chīhi tēi oime víte ari che roroyasarēhi che repia víte vaheerã yuvireco. Ipare rumo ndache repia iri chira yuvireco. Pe rumo che repiaño itera peye iyavei peicoveño itera. Esepia, che aicoveño avei.

²⁰ Ahe ari pipe peicuara che Ru rese che recosa, che rese pe recosa avei iyavei che aicose pe rese.

²¹ Acoi oicua vahe che porocuaíta, omboyeroya vahe avei, ahe omboyecua ité che raisusa yuvireco. Che Ru osaisura che raisusar; che avei asaisura, ayemboyecua aveira chupe” ehi.

²² Judas (ndahei vahe rumo Iscariote) aipo ehi:

—Che Yar, ¿mahera oreuño ereyemboyecua; mahera ru ndereyemboyecua iri chira ava nde reroyasarēhi upe? —ehi chupe.

²³ Evocoyase aipo ehi Judas upe:

—Acoi che raisu vahe, omboyeroya vahe che ñehe yuvireco, che Ru evocoyase osaisura iyavei che Ru reseve oroyura oroico vaheṛā sese.

²⁴ Acoi ndache raisui vahe, ahe ndoviroyai avei che ñehe yuvireco. Co ñehesa pesendu vahe ndahei cheyesui tēi; ahe rumo che Ru, che mbousar suindar —ehi.

²⁵ “Pe rese che reco vitesa, opa co mbahe amombehu vichico pēu.

²⁶ Espiritu Santo rumo, Poropitiviisar, che Ru ombou vahe che rer pipe, ahe pe mbohera opacatu mbahe aviye vahe rese. Pe momahenduha aveira opacatu pēu che ñehe agüer rese.

²⁷ “Aseya teco tuprisa pēu, ahe che reco tuprisa; ndahei rumo avaño tēi rembiapo nungar amondo pēu. Aní, ‘¿Mara yahera pīha?’ peyera; aní chiveira pesiquiye.

²⁸ Pesendupa niha acoi, ‘Asora, ipare ayevi irira pe rese aico vaheṛā’ che hesa. Supi eté che raisuse peye, peviharetera peicuase che Ru piri che sosa. Esepia, ahe ivate catu vahe ité che sui.

²⁹ Sese amombehupa voi co mbahe tenondeve pēu, ēgüe ehise ité, ahese peroyara.

³⁰ “Namombehu pucu iri chira mbahe pēu. Esepia, ou ité co ivi pipe oporocuai tēi vahe. Ahe rumo ndahei ivate catu vahe che sui

³¹ ‘toicua ava che reroyasarēhi che Ru raisusa yuvireco’ che hesa pipe. Ayapoño ité che Ru che cuaita.

“Pepūha. Yaso cohava sui” ehi güemimbohe eta upe.

15

Jesús uva hi nungar

¹ Ipare Jesús oñehe iri oreu aipo ehi: “Che aico inungar uva hi supi eté vahe; che Ru evocoyase inungar sese ihañeco vahe secoi.

² Ahe oyasia sāca ndihai vahe ichui yepi; iha vahe rumo omoatiro tupri iha catu āgua.

³ Pe pe recocuer imoatiroproi ité che pe mbohesa pipe.

⁴ Peicoño ité catu che rese inungar che aicoño ité avei pe rese. Uva rāca oise ohi sui, ndiha iri ahe ae tēi; pe avei ēgüe peyera peyepese che sui” ehi oreu.

⁵ “Che niha uva hi nungar aico; pe evocoyase sāca nungar peico. Acoi secoi vahe che rese, che avei aico sese. Inungar mbahe miti iha atí vahe, ēgüe ehira ahe. Supi eté ndapeicatui chietera che porēhi mbahe apo.

⁶ Acoi ndasecoi vahe che rese, ahe imombosara inungar acoi uva rāca yipi vahe. Ipore imonuhasa sapi āgua” ehi oreu.

⁷ “Pe peicoñose ité che rese ndaperesaraise avei che porombohesa sui, peporandño mbahe pe remimbotar rese, ahese imondosara pēu” ehi.

⁸ “Che Ru oipisira omboetisa pe sui acoi peyapo tuprise opacatu che remimbotar. Pemboyecua evocoyase che remimbohe supi tupri vahe pe recosa.

⁹ Che opoaisu ité, inungar che Ru che raisu. Sese peicoño ité catu che poroaisusa pipe.

¹⁰ Esepia, pemboyeroyase che porocuita, peicoveño itera co che poroaisusa pipe. Inungar che che Ru amboyeroya che cuaisa iyavei aicoveño ité che Ru poroaisusa pipe vichico.

11 “Che aipo ahe pëu ‘tovireco che vihasa oyese yuvireco’ viya; ‘toyem-boviharete catu yuvireco’ che hesa pipe.

12 Co che porocuaita: Peyeaisu ñepeí-peí, inungar che opoaisu.

13 Ndipoi eté que poroaisusa ivate catu vahe co sui omondose que ava güecocuer omboripar rese nara.

14 Pe che mboyeroyase peye, ahese che mboripar peico.

15 ‘Pe mbiguai peico’ ndahe iri pëu. Esepia, mbiguai ndoicuai eté mbahe güerecuar pihañemoñetasa. Sese, ‘Che mboripar’ ahe pëu. Esepia, aicua ucapa ñehesa che Ru cheu omombehu vahe pëu.

16 Pe niha ndache poravoi peye. Che rumo opoporavo iyavei opocuai peporaviqui vahe rã ava reru ägua cheu ‘che rese ité toyuvirecoi’ che yapave. Evocoyase che Ru omboura mbahe pe porandusa che rer pipe pëu.

17 Co rese opocuai: Peyeaisu catu ñepeí-peí peyacatu” ehi Jesús güemimbohe upe.

Jesús amotarëhimbar; supindar amotarëhimbar avei

18 “Acoi ava ndoicuai vahe Tüpa pe amotarëhise, peicuaño che rane che amotarëhi yuvireco yipindar.

19 Pe peico vitese ava Tüpa ndoicuai vahe pähuve, evocoyase pe raisu aira yuvireco viña. Che rumo opoporavo ipähu sui yuvireco. Sese tēi ndape ambota iri yuvireco. Esepia, pe ndahe iri ipähu pendar peico.

20 Peyemomahenduha pëu aipo che hesa rese: ‘Ndipoi eté que mbiguai ivate catu vahe güerecuar sui’ ahe. Che niha yipindar yamotarëhimbrí aico, pe avei pe amotarëhira yuvireco. Acoi omboyeroya vahe rumo che porombohesa, pe porombohesa avei omboyeroyara yuvireco.

21 Co opacatu mbahe che recocuer sui tēi ägüe ehira pëu. Esepia, ndoicuai niha che mbousar yuvireco.

22-24 “Che ndayuse ahe ava upe mbahe sembiavi mombehu viña, evocoyase, ‘Peyavi mbahe’ ndehi chira Tüpa chupe yuvireco viña. Che rumo ayu ité, amombehu mbahe sembiavi yuvireco chupe, ayapo avei mbahe ava ndoyapoi vahe yuvireco ipähuve; ahe rumo yepe ösepia co mbahe yuvireco viña, che amotarëhiño, che Ru avei oyamotarëhi yuvireco. Sese, ‘Pereco ité mbahe pe rembiavi peyese’ ehi Tüpa chupe. Esepia, acoi che amotarëhi vahe, che Ru avei oyamotarëhi yuvireco.

25 Co rumo ägüe ehi. Esepia, imboaviyesa rane itera ñehesa sesendar icuachiapri pipe aipo ehi vahe: ‘Mbahe apoëhi pipe sui tēi che amotarëhi yuvireco’ ehi vahe.

26 “Acoi ambose rumo Poropitiviisar, Espíritu supi eté vahe che Ru sui pëu, ahe omombehura che recocuer.

27 Pe avei pemombehura che recocuer. Esepia, yipisuive ité peico che rupi” ehi.

16

1-2 “Pe mocañiehi ägua che rese pe yeroyasa aipo ahe opacatu co mbahe imombehu pëu: pe mombora judío rerecuar oñemonuhasa sui yuvireco, pe yuca aveira yuvireco. Ahe rumo omohara, ‘Tüpa uve nara revo na yahe’ ehira yuvireco viña.

3 Evocoi rumo ägüe ehira yuvireco che Ru cuaëhi pipe iyavei che cuaëhi pipe yuvireco.

4 Amombehu aipo pëu acoi ägüe ehise, peyemomahenduhara che remi-mombehugier rese.

Espíritu Santo rembiapo

“Yipisuive rumo namombehui co mbahe pëu. Esepia, aicoveño ité pe rese.

⁵ Cūrítei rumo asora che mbousar piri iyavei ndipoi que ñepeí pe pãhu pendar ‘¿que vo aipo eresora?’ ehi vahe cūrítei cheu.

⁶ Pe rumo ndapeyembovihaiño aipo mbahe amombehuse pëu.

⁷ Supi eté rumo aipo ahe pëu: aviye catura pëu che asose. Esepia, ndasoise viña, ndoui chietera pe rese Poropitiviisar. Asose rumo, che amboura pëu.

⁸ Ouse ahe, oicua ucara ava che cuaëhisar upe yangaipa, oicua uca aveira tecocuer ívisa iyavei cañisa ndaseco pōrai vahe upendar.

⁹ Oicua ucara yangaipa chupe ndache reroyaise yuvireco;

¹⁰ oicuara rumo che reco ihivi tupri vahe yuvireco. Esepia, asora che Ru recosave, ahese pe ndache repia iri chietera peye;

¹¹ iyavei oicuara Tūpa poromocañisa. Esepia niha, Caruguar, ahe co ivi pipendar rerecuar oipisira che Ru Tūpa ñemoirosa.

¹² “Setá iteanga mbahe oime amombehu vaheerã pëu. Pe rumo ndapeicatuí chira cūrítei senducua.

¹³ Ouse rumo Espiritu supi eté vahe, ahe pe mbohera mbahe supi eté vahe rese. Esepia, noñehei chira oyesui tēi, ahe rumo omombehura mbahe osendu vahe güeraño, oicua uca aveira mbahe coiye oime vaheerã.

¹⁴ Ahe che mboeteira. Esepia, oicua ucara opacatu mbahe cheundar pëu.

¹⁵ Opacatu mbahe che Ru vireco vahe, che mbahe. Sese niha, ‘Espiritu oipisira opacatu mbahe cheundar, oicua uca aveira pëu’ ahe.

¹⁶ “Aviyeteramo tēi ndache repia iri chira peye. Ipare rumo coiye catumi che repia irira peye” ehi oreu.

Yepe semimbohe ndovihai chira viña, coiye catu rumo oviharetera yuvireco

¹⁷ Evocoiyase ore oporandu-randu tēi oreyeupe aipo orohe:

—¿Mara oya pīha: ‘Aviyeteramo tēi ndache repia iri chira peye’ ehi yandeu; ipare rumo aipo coiye catumi yasepiara iyavei aipo osora Vu piri no?

¹⁸ ¿Mara oya vo aipo: ‘Aviyeteramo tēi’ ehi? Ndayasenducuai mo aipo íñehesa —orohe oreyeupe.

¹⁹ Ipare rumo ‘oporandura co mbahe rese yuvireco cheu’ oya aipo ehi voi oreu:

—¿‘Ipare rumo coiye catumi che repia irira peye’ che he agüer rese co pe porandu vite peyeupe? —ehi—.

²⁰ Supi eté aipo ahe pëu: peyasehora pe viharëhisa pipe, ava angaipa viyar rumo ovihareteñora yuvireco. Yepe pe, ndapevihal chira viña, coiye catu rumo peviharetera.

²¹ Inungar acoi que cuña imembira potase, tasi chupe oyepotase ari imembira água; pītani oha pare rumo, nimahenduha iri tasicuer rese; soriveteño omembri rese.

²² Egüe peye avei; pe cūrítei tasi avei pëu, ayevi irira rumo pe repia água, ahese peviharetera. Ahe viharetesa ndipoi chietera que ava virocua vaheerã pe sui.

²³ “Ahe ari pipe, ndapeporandu iri chietera mbahe rese cheu. Supi eté aipo ahe pëu: che Ru ombourã opacatu mbahe pëu che rer pipe peporanduse.

²⁴ Cūrítei rumo ndapeporandu vitei mbahe rese che rer pipe. Peporandu catu sese, ahe neipisira. Ipipe sui perorivete catura.

Jesucristo mbahe-mbahe tēi recopisar

²⁵ “Opacatu mbahe rese niha amboyoya tecocuer pëu. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe pëu che Ru recocuer resendar.

²⁶ Ahe ari pipe pe peporandura mbahe rese che rer pipe; che rumo, 'Ayerquirira pe rese che Ru upe' ndahei pëu.

²⁷ Esepia, che Ru ae ité pe raisu. Pe raisu ité niha. Esepia, pe che raisu peye, che reroya avei che Ru Tüpa sui che yuse peye.

²⁸ Asê che Ru sui co ivi pipe vitu; cūrítei rumo aseyara co ivi, ayevíra che Ru upe" ehi oreu.

²⁹ Evocoiyase ore aipo orohe chupe:

—Indó, aipo rupi ereñehe tupri catu ité; nderemboyoya iri ambuae mbahe rese imombehu oreu.

³⁰ Supi eté ereicua opacatu mbahe, ereicua avei ore porandusa. Evo-coiyase ndiya iri ore porandu água mbahe rese ndeu. Sese oroviroya Tüpa sui nde yusa —orohe chupe.

³¹ —¿Evocoiyase che reroya ité peye? —ehi—.

³² Supi eté oyepota ari cute, co pipe ité peyemosaipara che sui; che reyara che aemi peye. Ndahei rumo che ae aico. Esepia, che Ru secoi che rese.

³³ Amombehu co opacatu pëu che rese mbahe tupri pipe pe reco água. Peparaisu itera co ivi pipe; peyemonguerêhi catura rumo. Esepia, che opa ité asecoi co ivi pipendar mbahe tēi —ehi.

17

Jesús oyeróqui güemimbohe rese

¹ Aipo ohe pare, Jesús omahe iva rese aipo ehi: "Che Ru, oyepota ari cute. Che mboetei eve, ipipe sui avei che nde Rahir toromboetei.

² Supi eté niha, nde erembou che mborecua água opacatu ava ivi pipendar harive iyavei tecovesa apirêhi mondo água opacatu ava nde cheu erembou vahe upe.

³ Co niha tecovesa apirêhi, tande cua nde Tüpa ñepeí supi eté vahe nde recose yuvireco, tache cua avei nde che mbouse yuvireco.

⁴ "Che niha oromboetei co ivi pipe, iyavei ayapo nde che cuaisa.

⁵ Sese che Ru, embou irimi cūrítei che reco porañete água, inungar acoi yipindar areco vahe nde rese ivi apoêhiseve.

⁶ "Co nde rembiporavo ava co ivi pipendar pãhu sui erembou vahe cheu; orocua ucapa chupe. Yipindar ndeundar yuvirecoi. Ipare nde erembou cheu. Ahe viroya ité nde ñehe yuvireco.

⁷ Cūrítei oicuapa opacatu mbahe nde suindar cheu erembou vahe yuvireco.

⁸ Esepia, amombehu ité nde ñehe erembou vahe cheu; ahe viroya ité yuvireco, viroya avei nde che mbousa yuvireco.

⁹ "Che ayeroquí cheu nde remimbou rese ndeu. Esepia, ndeundar ité yuvirecoi; ndayeroquí rumo ambuae ava che reroyasarêhi rese.

¹⁰ Opacatu ava cheundar, ndeundar avei; ndeundar evocoiyase cheundar. Ahe sese che reco porañetesa oyecua.

¹¹ "Che ndapítai chira co ivi pipe; ahe rumo opítara cohava yuvireco. Che evocoiyase asora nde piri. Che Ru, seco marañehi vahe, esáro nde pírátasa pipe nde remimbou cheu oyese yuvirecoi tupri água inungar yande yaico.

¹² Aicose co ivi pipe, asáro tupri nde rer pírátasa cheu erembou vahe pipe; chemahemoha yuvireco sese mbahe tēi sui. Ndipoi eté que ñepeí ocañi tēi vahe; acoi yipive ocañi vaheño ité rumo ocañi tēi; nde ñehe rupi tupri ité êgüe ehi.

13 “Cūritei asora nde recosave. Co ivi pipe che reco vītese rumo, amombehu co mbahe chupe ‘tovireco che viharetesa yuvireco’ che yapave.

14 Che niha amombehu nde ñehe yuvireco chupe. Ava che reroyasarēhi rumo oyamotarēhiño yuvireco. Esepia niha, ndahe iri Carugar povri pendar yuvirecoi inungar che ndahei ipovri pendar aico.

15 ‘Enose ava Carugar povri pendar pāhu sui’ ndahei ndeu, che rumo aipota eresepira Carugar sui.

16 Inungar che ndahei Carugar povri pendar aico, ěgüe ehi avei ahe yuvireco.

17 Eipeha tupri angaipa sui ndeyeupe nara yuvireco ñehesa supi eté vahe reroyase. Nde ñehesa niha supi tupri vahe ité.

18 Inungar nde che mbou eve ava co ivi pipendar pāhuve, ěgüe ahe avei che imondo ava pāhuve yuvireco.

19 Amondo ité che recocuer ndeu nara ‘toyemondo catu yuvireco chupe co ñehesa supi tupri vahe reroya pipe’ viya.

20 ‘Ndayeroqui co che remimbohe reseño ndeu, ayeroqui avei rumo ambuae ava che reroyasar ñehesa sui che reroya vaherā rese.

21 Aporandu avei ndeu toyuvirecoi tupri ité yuvireco oyese inungar ñepe vahe, ěgüe tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipipe sui ava co ivi pipendar toviroya nde che mbousa yuvireco.

22 Che reco porañetesa nde erembou vahe cheu, ahe tupri avei amondo yuvireco chupe ñepe vahe nungar yuvirecoi āgua, inungar yande ñepe vahe yaico.

23 Che aico yuvireco sese, nde evocoyase ereico che rese ahe yuvirecoi tupri āgua inungar ñepe vahe. Ipipe sui ava co ivi pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

24 “Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepia vaherā teco porañetesa cheu erembou vahe yuvireco. Nde niha yipive ité che raisu eve ivi apoēhiseve.

25 Che Ru, seco catupri vahe, ava co ivi pipendar tēi nande cui yuvireco; che rumo orocua ité, co avei oicua nde che mbousa yuvireco.

26 Orocua uca chupe, orocua ucaño vite itera rumo. Evocoyase nde che raisusa tovireco avei yuvireco, che avei taico yuvireco sese” ehi Jesús oyerogui güemimbohe recocuer rese.

18

Jesús oipisi yuvireco

1 Aipo ohe pare, Jesús ore renose ore reraso iembī Cedrón rovai. Aheve oime mbahe miti rēta, ipipe Jesús ore reroique ore reraso.

2 Iyavei Judas omondo vaherā yamotarēhimbar upe oicua avei aheve secosa. Esepia, setá rupi Jesús rese oroñemonuha aheve yepi.

3 Sese Judas oyepotaño ité aheve sundao rehī reseve iyavei sundao tūparo rārosar pahī rerecuar iyavei fariseo eta remimondo opacatu oyoepisa reseve yuvirecoi, guataendi reseve-seve avei yuviraso.

4 Yipive ité rumo oicua oyeupe mbahe oime vaherā. Sese osē voi eté yuvireco chupe oporandu:

—¿Ava vo peseca? —ehi.

5 Ahe ava rehī omboyevi yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehii upe.

Judas ipãhuve secoi imondo ãgua yamotarẽhimbar upe.

⁶ “Che niha ahe aico” ehise ava upe; guaquiçuei coti pãve opa oviapi yuvireco.

⁷ Evocoyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

⁸ Aipo ihese,

—“Che niha ahe aico” ahe pẽu —ehi—. Che che recase peye, pepocoi rene catu co ambuae rese, toyuvirasopaño —ehi.

⁹ Co rumo iñehe mboaviye ãgua ãgüe ehi: “Acoi che Ru ombou vahe cheu, nocañii eté que ñepeí che sui” ehi.

¹⁰ Evocoyase Simón Pedro vireco vahe guise, vinose, oyasia Malco serer vahe nambi yasu cotindar, ahe pahi rerecuar ivate catu vahe rembiguai.

¹¹ Pedro upe rumo aipo ehi:

—Emondo iri guise siru pipe —ehi—. Che Ru niha co mbahe yavai vahe ombou cheu. Añemosañi itera chupe —ehi.

Jesús serasosa mborerecuar Anás rovai

¹² Evocoyase sundao rerecuar, osundao eta reseve iyavei judío tũparo rãrosar oipisi Jesús yuvireco, oipocua.

¹³ Yipindar viraso Anás rêtave yuvireco. Esepia, ahe Caifás rovayar. Ahe araviter pipe aipo Caifás pahi eta rerecuar ivate catu vahe secoi.

¹⁴ Caifás ité aipo ehi omboetasa upe: “Yandeu aviye catu itera que ñepeí mbia omanose yande rese” ehi.

Pedro, “Ndaicuai co mbia” ehi Jesús upe

¹⁵ Ore Pedro rese orosoño ité Jesús raquiçuei. Che rumo pahi eta rerecuar rëta pipendar opa ité che cua yuvireco. Sese aiçueño ité Jesús raquiçuei mborerecuar rêtave vicho.

¹⁶ Pedro rumo opitaño oquendiçive ocarve. Che rumo pahi eta rerecuar che cua ité yuvireco. Evocoyase asẽ, aporandu oquendiçipi rãrosar uve Pedro reique ãgua rese.

¹⁷ Evocoyase oquendiçipi rãrosar oporandu Pedro upe:

—¿Ndahei vo nde avei co ava rupindar? —ehi chupe.

—Aní, ndahei che ahe —ehi oquendiçipi rãrosar upe.

¹⁸ Sõhisá iteanga ahe pĩtu pipe. Evocoyase mborerecuar rembiguai iyavei sundao eta oyatapĩ yuvireco oyepehe ãgua. Pedro avei aheve ipãhuve oyepehe tata ipive ohã.

Pahi eta rerecuar ivate catu vahe oporandu Jesús upe secocuer rese

¹⁹ Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe.

²⁰ Jesús rumo aipo ehi chupe:

—Che niha añehe opacatu rupi, opacatu ava eta rovaque avei. Esepia, aporomboheño ité niha ava ñemonuhasa rupi, tũparo guasu pipe avei. Indó, che nañemi eté añehe vaheerã.

²¹ ¿Mahera vo evocoyase cheu tẽi ereporandu? Eporandu catu che ñehe rendusar upe. Ahe tomombehu che oyeupe ñehesa yuvireco ndeu. Ahe niha oicua che ñehe agüer yuvireco —ehi.

²² Aipo ihese, ñepeí mbia sundao osovapete aipo ehi chupe:

—¿Aipo ere rutei pahi rerecuar ivate catu vahe upe imboyevi? —ehi chupe.

²³ Evocoiyase omboyevi ahe mbia upe:

—Ñehese mbahe tēi rese, emombehu che ñehhe raisa; che rumo ñehhe tupri ité, ¿mahera vo evocoiyase che rovapete eve? —ehi.

²⁴ Evocoiyase Anás omondo pahi eta rerecuar ivate catu vahe Caifás upe ipocuasa reseve.

Pedro, “Ndaicuai co mbia” ehi vite Jesús upe

²⁵ Ahese Pedro oyepeheño vite ohā tata ipive. Aheve aipo ehi yuvireco chupe:

—¿Ndahei vo nde ité evocoi ava rupindar ereico? —ehi.

Pedro rumo,

—Aní, ndahei che ahe aico —ehiño.

²⁶ Ipape mbia pahi rerecuar ivate catu vahe rembiguai, inambi asiapri mu aipo ehi chupe:

—¡Aviye acoi nde ité oroepia vahe mbahe miti rēta pipe supi! —ehi chupe.

²⁷ Pedro rumo, “Aní, ndahei eté che” ehi iriño. Aipo iheseve, tacura oñehhe.

Jesús serasosa Pilato rovai

²⁸ Evocoiyase viraso Jesús Caifás rēta sui Roma pendar mborerecuar guasu recosave yuvireco. Cōhe potase ēgüe ehi. Judío rumo ndoyuviroiquei eté mborerecuar recosave oyemboangaipaēhi āgua. Esepia, ahe icuaita yuviroiquese, ndiyai chietera Pascua resendar ovesa roho hu āgua yuvireco chupe viña.

²⁹ Sese Pilato osē ava upe aipo ehi:

—¿Mbahe vo sembiapo ñaporai vahe? —ehi.

³⁰ Ahe omboyevi yuvireco chupe:

—Seco catuprise, ndorogüerui chietera ndeu viña —ehi yuvireco chupe.

³¹ Evocoiyase aipo ehi ava upe:

—Peraso, pe ae peyapo mbahe pēundar ité porocuita rupi sese —ehi.

Judío rerecuar evocoiyase omboyevi yuvireco:

—Ore judío oroico vahe upe rumo ndipotasai oroyuca vahe rā que ava —ehi.

³² Ēgüe ehi Jesús ñehhe imano āgua resendar yaviye.

³³ Ahese Pilato oi que iri oi pipe, güeru uca Jesús oyeupe oporandu chupe:

—¿Nde ité vo judío rerecuar ivate catu vahe ereico? —ehi.

³⁴ —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.

³⁵ —¡Che ndahei eté judío aico! Nde recua pendar ae niha pahi eta rerecuar nde reru yuvireco cheu. ¿Mbahe vo evocoiyase ereyapo? —ehi Pilato chupe.

³⁶ —Che mborerecuasa rumo ndahei co ivi pipendar. Co ivi pipendarse viña, che rupindareta ovavara che amotarēhimbar upe che repisave yuvireco viña. Che mborerecuasa rumo ndahei eté coha pendar —ehi.

³⁷ Ahese Pilato aipo ehi chupe:

—Evocoiyase nde mborerecuar guasu ité ereico —ehi.

—Nde niha aipo, “Mborerecuar guasu ereico” ere cheu. Aherā niha che aha co ivi pipe mbahe supi eté vahe mombehu āgua. Opacatu ava viroya vahe mbahe supi eté vahe, osenduño ité che ñehesa yuvireco —ehi Pilato upe.

³⁸ Pilato rumo,

—¿Mbahe vo aipo supi eté vahe? —ehi chupe.

“¡Tayaticasa!” ehi ava eta Jesús uve yuvireco

Aipo ohe pare, Pilato osẽ iri judío eta upe oñehe aipo ehi:

—Che ndayosui eté co mbia rese mbahe sembiavi.

39 Pe rumo peicua amose ñepeí ava soquendapri Pascua pieta pipe yepi; ¿peipota amose vaheerã judío rerecuar? —ehi.

40 Aipo ihese, opacatu osapucaí pĩratá yuvireco aipo ehi:

—¡Evocoi aní! ¡Barrabás catu emose! —ehiño yuvireco.

Barrabás rumo imonda rai vahe secoi.

19

1 Evocoiyase Pilato oporocuai Jesús nupa água.

2 Sundao eta omonde ñaca rese yu piapri iyavei omboyemonde turucuar pĩraumbi vahe pipe yuvireco.

3 Ipare oyemboya sese aipo ehi:

—¡Imboeteipri judío Rerecuar tasecoi! —ehi angahu sovapete-pete yuvireco.

4 Pilato evocoiyase osẽ iri ava upe aipo ehi:

—Pesepia, anose pẽu pe icua água che ndayosui eté mbahe sembiavi —ehi.

5 Evocoiyase vinose yu piapri oãca rese turucuar pĩraumbi vahe reseve senoha ava upe. Ahe se Pilato aipo ehi:

—¡Ndo co aipo mbia cute! —ehi.

6 Osepiase pahi eta rerecuar, sundao rerecuar avei, omboipi osapucaí:

—¡Tayaticasa! ¡Tayaticasa! —ehi pãve voi yuvireco chupe.

Pilato evocoiyase aipo ehi ava upe:

—Peraso, peyatica pe ae. Esepia, che ndayosui eté mbahe sembiavi —ehi.

7 Judío rerecuar rumo omboyevi yuvireco:

—Ore rumo orovireco mborocuaíta. Ipipe omanoño itera. Esepia, oyeapo tẽi Tũpa Rahir —ehi yuvireco.

8 Aipo ñehesa renduse, Pilato oyembosiquiyé catu.

9 Viroique iri oi pipe seraso. Aheve oporandu chupe:

—¿Que pendar ité vo nde ereico? —ehi.

Ahe rumo nomboyevi iri eté ñehe chupe.

10 Evocoiyase Pilato aipo ehi chupe:

—¡Mahera ndereñehi eté cheu! ¿Ndereicuai vo che mborererecuar aico nde atica uca água, mbahe tẽi sui nde renose água avei? —ehi Pilato chupe.

11 —¡Aní! Ndererecoi chietera nde mborerecuasa che harive Tũpa nomboise ndeu viña. Sese niha ava che mondosar ndeu oyemboangaipa catu nde sui yuvireco —ehi Pilato upe.

12 Ahe ramoseve, Pilato osãha iri tẽi Jesús renose água; judío rerecuar rumo osapucaí voiño yuvireco chupe:

—¡Acoi eremosese co mbia, ndahei chietera nde mborererecuar ivate catu vahe mboripar ereico! ¡Opacatu oyemborererecua tẽi vahe, ahe evocoiyase mborererecuar ivate catu vahe amotarẽhimbar tẽi yuvirecoi! —ehiño yuvireco chupe.

13 Evocoiyase Pilato osenduse aipo ihesa, vinose uca Jesús ocarve, uguapi mborererecuar guasu renda harive. Ahe mbahe rese porandusa rer hebreo ñehe pipe Gabata 'ita apopri' oya.

14 Mbiter ari Pascua pieta água Pilato aipo ehi judío eta upe:

—¡Ndo co pe rerecuar cute! —ehi.

15 Ahe rumo osapucaí pĩratá aipo ehi yuvireco:

—¡Tomanó! ¡Tomanó ité! ¡Tayaticasa! —ehi yuvireco chupe.

Pilato rumo aipo ehi chupe:

—¿Evocoiyase ayatica ucarã pe rerecuar? —ehi.

Pahi eta rerecuar rumo omboyevi yuvireco chupe:
—¡Ore ndorovireco iri ambuae mborerecuar, Roma pendar mborerecuar ivate catu vahe güeraño ité orovireco! —ehi yuvireco.

16 Ipape Pilato omondo sundao upe yatica uca ägua. Ichui vıraso yuvireco.

Jesús yaticasa curusu rese

17 Evocoiyase Jesús vinose curusu seraso “Ava Äcagüer” serer vahesave (ahe serer hebreo ñehe pipe Gólgota).

18 Aheve oyatica yuvireco. Seseve avei oyatica ñuvirío ava yuvireco, ñepeipei yique ivil.

19 Pilato oicuachía uca omondo curusu rese aipo ehi vahe: “Co Jesús, Nazaret pendar, judío Rerecuar guasu” ehi.

20 Setá iteanga ava oyerocuı co icuachiapri rese yuvireco. Esepia, icuachiasa hebreo, latín iyavei griego ñehe pipe. Iyavei yaticasa namombriimi eté tecua sui.

21 Sese pahi eta rerecuar aipo ehi Pilato upe yuvireco:

—Anı, ‘Judío Rerecuar guasu’ ere icuachía; iyacatu rumo, ‘Oyeapo pota tēi vahe judío Rerecuar guasu’ erera icuachía imoi —ehi yuvireco chupe.

22 Pilato rumo omboyevi:

—Co aicuachía vahe, ägüe ehiño itera oı —ehi.

23 Jesús atica pare evocoi irungatu sundao, omonuha iturucuar oyeupe imboyaho ägua yuvireco. Oipisi avei iturucuar ivrı pendar nimbovıvisai vahe, ñepeı reseve pucuño tēi vahe.

24 Sundao eta aipo ehi oyeupe yuvireco:

—Yamondoro eme; aviye catu yandeguayıño sese, ¿ava ité pıha oipisira? —ehi yuvireco.

Ägüe ehi icuachiapırer imboaviye yuvireco aipo ehi vahe: “Omboyahoyaho ava che turucuar iyavei iguayı yuvireco sese” ehi vahe. Supı tuprı ité ägüe ehi sundao yuvireco.

25 Curusu ivıpıve yuvirecoi ichı, ichı cupıhır, María Cleofas rembireco, María Magdalena avei.

26 Osepiase osı iyavei che repiase yıpıve, che güembiaisu, aipo ehi osı upe:

—Che sı, evocoi nde membırä ererectora —ehi chupe.

27 Ipape voi aipo ehi cheu:

—Evocoi nde sı —ehi.

Ichuıve tuprı amoıngue ichı che rētave asãro vaherä.

Jesús mano agüer

28 Ipape Jesús oicua ité Vu remimbotar yaviyepa iyavei icuachiapırer mboaviye ägua aipo ehi:

—Che huseı —ehi.

29 Aheve oıme mbahe rıru. İpipe savapıpo vinagre oı. Co vinagre pipe omoaquı mbahe saviyu vahe yuvireco omondo ivıra rese, osupı, imondo iyuruve yuvireco.

30 Osupıte pare aipo ehi:

—Opa yaviye cute —ehi.

İpare voi ñaca ivıso omano.

Sundao oñaruca cutu lanza pipe Jesús

31 Ñepeı arı Pascua pieta uve ipane vahe pipe aipo ägüe ehi. Sese judío ndoıpotai ava retecuer pıta curusu rese mbıtuhusa arı pipe. Esepia, ahe mbıtuhusa arı imboeteıprı guasu ité. Sese Pilato upe oporandu yuvireco

ahe oyocuai vaheṛã sundao curusu rese yaticapri rētima mope āgua ‘toman’ oyapave curusu sui setecuer reroyipa āgua yuvireco.

³² Evocoyase sundao yuvirasopa ñuvirio mbia Jesús rese yaticasa vahe yuvireco. Ahe sētima rane opa omope yuvireco.

³³ Oyemboyase rumo Jesús rese, “Omano ité” ehiño yuvireco chupe. Sese nomopei sētima yuvireco.

³⁴ Ñepe sundao rumo oicutu yiqueve lanza pipe. Ahe ramoseve voi osē suvi, i reseve.

³⁵ Che asepia vahe ité; supi eté aipo ahe. Evocoyase amombehu pēu pe seroya āgua.

³⁶ Esepia, co mbahe ēgüe ehi icuachiapirer mboaviye āgua aipo ehi vahe: “Ndimopesai chietera que ñepe icangüer” ehi vahe aracahe.

³⁷ Iyavei ambuae icuachiapri aipo ehi: “Osepiara ava eta icutupri yuvireco” ehi.

Jesús yapocatusa ita hopri pipe

³⁸ Ipare José, tecua Arimatea pendar, oporandu Pilato upe Jesús rehögüer reraso āgua rese. José aipo Jesús rupindar. Ndoyecua ucai rumo omboetasa judío eta upe pahi rerecuar sui osiquiyepave. Pilato evocoyase, “Aviye, eraso” ehi chupe. Evocoyase José oso viraso sehögüer.

³⁹ Nicodemo avei oipitivi, acoi oso vahe Jesús upe pituse. Ahe güeru mbahe sñacua vahe mirra, áloe rese oyeseha vahe, treinta kilo, sehögüer rese nara.

⁴⁰ Ēgüe ehi José, Nicodemo reseve viraso sehögüer yuvireco iyavei oimama tupri turucuar secose vahe imoiacuapri pipe yuvireco. Ēgüe ehi judío oyapo ava omano vahe tĩ āgua yuvireco yepi.

⁴¹ Namombrii Jesús aticasa sui oime mbia remiti rēta. Aheve ité oime tuvipa ita hopri, ipiasu vahe iporupirēhi.

⁴² Ipipe omoingue Jesús rehögüer yuvireco. Esepia, ahe tuvipa cōimi eté ichui iyavei virovi ité judío pituhusa ari.

20

Jesús cuerayevisa

¹ Domingu pipe María Magdalena oso tuvipave pĩtu vitemiseve. Ahe osepia ita tuvipa rovapisa ndahe irise güendave ihã.

² Evocoyase ahe cuña oña oso Simón Pedro upe, cheu avei aipo ehi: —¡Viraso tuvipa sui yande Yar yuvireco! ¡Ndoroicuai que vo catu omondo yuvireco! —ehi.

³ Evocoyase Pedro rese oroña oroso tuvipave.

⁴ Che rumo aña catu Pedro sui. Che rane evocoyase ayepota tuvipave.

⁵ Aiviro tēi, turucuar güeraño rumo asepia aheve. Ndaiquei rumo ipipe.

⁶ Ipare Pedro oyepota che raquicuei, oique voi tuvipa pipe. Ahe avei osepia turucuar imama agüer tēi.

⁷ Iyavei osepia turucuar ñaca mamasa. Ndahei eté setecuer mamasa rese tui; ahe rumo co coti ité ipoquesa tupri ou.

⁸ Evocoyase che avei aique; asepia ēgüe ehi vahe. Ahese aroya voi eté.

⁹ Ore rumo ndorosenducua vitei eté icuachiapri: “Ocuereyevira omano vahe pāhu sui” ehi vahe.

¹⁰ Ipare oroyevipa oroso ore rētave.

Jesús oyemboyecua María Magdalena upe

11 María rumo, ore raquicuei ou vahe, opitaño ité tuvipa ipive, oyaseho. Oyasehoseve oiviro iri tuvipa pipe,

12 ahese osepia ñuvirío Tüpa rembiguai iturucuar morochí vahe oguapi yuvinoi sehögüer rupagüerve. Ñepeí oguapi oĩ ñaca rupagüer coti, ambuae ipi rupagüer coti.

13 Ahe Tüpa rembiguai oporandu yuvireco chupe:

—Cuña, ¿mahera vo ereyaseho? —ehi.

Ahe aipo ehi:

—Esepia, che Yar rehögüer viraso yuvireco iyavei ndaicuai que vo catu omondo yuvireco —ehi.

14 Aipo oheseve, oyemboyere, osepia Jesús aheve secoise; “Jesús co secoi” ndehi eté rumo chupe.

15 Evocoiyase oporandu María upe:

—Cuña, ¿mahera vo ereyaseho? ¿Ava vo ereseca? —ehi chupe.

Ahe omoha ‘co mbahe miti rēta rārosar revo’ oya viña, aipo ehi chupe:

—Nde ererasose sehögüer, emombehuñomi tēi cheu que vo eremondo.

Aheve taso seca —ehi chupe.

16 Evocoiyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pipe chupe:

—¡Rabuni! —ehi (‘Porombohesar’ ohesave).

17 Evocoiyase María upe,

—Erepocoi rene che rese. Esepia, ndayeupi vitei che Ru recosave. Esoño, emombehu che reroyasar upe: “Jesús oyeupira Vu Tüpa recosave” erera chupe. Che Ru, pe Ru avei; che Tüpa, pe Tüpa avei —ehi.

18 Evocoiyase María Magdalena ou imombehu: “Asepia yande Yar” ehi iyavei opa omombehu mbahe semimombehu oreu.

Jesús oyemboyecua güemimbohe upe

19 Ahe ari pipeve, domingu pipe, pītuse, ore ore ñemonuhasave oroye- quenda tupri judío rerecuareta sui ore siquiyepave. Ahese Jesús oi que ore pāhuve. Ore mboavirave.

—¡Peico tupri! —ehi oreu.

20 Aipo ohe pare, omboyecua opo, oi que avei oreu. Ahese orerorivete yande Yar repiase orico.

21 Ipare aipo ehi iri:

—¡Peico tupri! Inungar che Ru che mbou, ñgüe ahe aveira co che pēu —ehi oreu.

22 Ichui ore peyu:

—Peipisi Espiritu Santo —ehi—.

23 Peñeroise que ava upe, ahese ahe oipisira ñeroisa; napeñeroise rumo que ava upe, ahe evocoiyase ndoipisii chira ñeroisa —ehi oreu.

Tomás osepia yande Yar icuerayevisé

24 Ñepeí ore mboetasa rumo Tomás icōi vahe, ndipoi eté ore pāhuve Jesús oyemboyecua oreu.

25 Ipare ore aipo orohe chupe:

—Orosepia yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuā quiravo cuarer pipe iyavei amoinguese che po yique cutu agüerve, ahese ramó aroyara —ehiño oreu.

²⁶ Ocho ari pare, ore oroñemonuha iri oi pīpe oroico. Aheve ramo Tomás secoi ore pāhuve. Yepe oroyeoquenda tupri ité viña, Jesús rumo oi queño ité ou ore pāhuve, ore mboavirave aipo ehi:

—¡Peico tupri! —ehi oreu.

²⁷ Ipare aipo ehi Tomás upe:

—Esepia che po, emoingue nde cuā quiravo cuarerve; embou ave nde po, emoingue avei che ique cutu agüerve. “Tachequerēhi eme seroya āgua” nderei chira cheu; ¡che reroya eve! —ehi.

²⁸ Evocoyase Tomás aipo ehi:

—¡Che Yar Tūpa! —ehi chupe.

²⁹ Ahese aipo ehi Tomás upe:

—¿Cūrítei che reroya che repiase eve cute? ¡Aviye catu ava che repiaēhi pīpe che reroya vahe! —ehi chupe.

Co icuachiapri Jesús reroya āgua

³⁰ Jesús oyapo setá ambuae poromondiisa ore rovaque. Ahe rumo ndaicuachiai cō cuachiar pīpe.

³¹ Co rumo aicuachía ‘toviroya Jesús, Poropīsirosar, Tūpa Rahir secosa; ipīpe tovireco tecovsa yuvireco’ che yapave.

21

Jesús oyemboyecua siete güemimbohe upe

¹ Ore sore ivi Galilea ve, Jesús oyemboyecua iri oreu ipa Tiberia ve.

² Ahese oyeseve Simón Pedro yuvirecoi, Tomás ahe acoi icōi vahe, Natanael, ahe aipo tecua Caná pendar ivi Galilea rese, ñuvirio ore Zebedeo rahir oroico vahe iyavei ambuae ñuvirio Jesús remimbohe.

³ Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, oroha carite pīpe. Ahe pītu pīpe rumo ndorombohai eté pira.

⁴ Cōhe potase rumo, Jesús oyemboyecua imbehi ivi. Ore rumo ndoroicuai eté Jesús secose.

⁵ Evocoyase aipo ehi oreu:

—Mbía chīhivahe, ¿ndapembohaimi eté pira? —ehi.

—Aní eté —orohe chupe.

⁶ Evocoyase aipo ehi:

—Pemondo pira mbohasa ive pe asu coti. Ahese pembohara —ehi.

Ēgüe orohe, ipare voi, “¡Too!” orohe, ndorovinose catui eté ipi sui pira mbohasa oroico. Esepia, savapipo tupri ité pira ipīpe.

⁷ Evocoyase che, sembiaisu, aipo ahe Pedro upe:

—¡Yande Yar niha evocoi! —ahe.

Pedro che ñehe rendu ramoseve voi, omonde oturucuar. Esepia, yipīndar nani secoi; opo ive oso chupe.

⁸ Ore evocoyase orovroyepota ité carite ndatipimisave, oroichoho pira rehi imbohasa pīpe seraso, cien metro tēi oroico imbehi sui.

⁹ Orovinosese ivi ātasave, orosepia tātapii harive pira, pan reseve.

¹⁰ —Peru moviro evocoi pira penose ramo vahe —ehi oreu.

¹¹ Evocoyase Simón Pedro oha carite pīpe, oichoho ndatipisave pira guasu rehi imbohasa pīpe, ciento cincuenta y tres tupri; yepe setá viña, imbohasa rumo ndosoroi eté.

¹² Evocoyase aipo ehi:

—Perio, tapecarumi rane —ehi oreu.

Ndipoi eté que ñepeí ore pãhuve “¿ava vo nde ereico?” ehi vahe chupe. Esepia, oroicuaño ité yande Yar secose.

¹³ Chupe ore sore, oipisi pan, ombou oreu, ãgüe ehi avei pira imbou oreu.

¹⁴ Co rese Jesús oyemoyecua mbosapi rupi oreu ocuerayevire.

Jesús osecoãha Pedro

¹⁵ Ore caru pare, Jesús oporandu Simón Pedro upe:

—Simón, Juan rahir, ¿che raisu catu ité eve co mbahe sui? —ehi.

—Taa, che Yar, ereicua niha che nde raisusa —ehi Pedro chupe.

—Ndehañeco tupri ru catu che reroya ramomi vahe rese yuvireco —ehi.

¹⁶ Imoñuviriosa rupi oporandu iri chupe:

—Simón, Juan rahir, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro chupe.

—Evocoyase esãro tupri che reroysar yuvireco —ehi.

¹⁷ Imombosapisa rupi oporandu iri chupe:

—Simón, Juan rahir, ¿che raisu vo eve? —ehi.

Aipo oyeupe hese, Pedro ndoyembovihal ité aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoyase ndehañeco tupri catu che reroysar rese —ehi—.

¹⁸ Supi eté aipo ahe ndeu: nde chihivahe catu vite, ereyemonde vite nde ae, ereguata vite avei nde remimbotar rupi; nde cuacua catusé rumo, ereyeviamoatara, ambuae evocoyase nde mboyemondera, nde reraso aveira nde so potaehisave —ehi.

¹⁹ Jesús rumo omboyecua aipo ohe pipe mara ehira Pedro omano Tüpa mboetisave curi. Ipare,

—¡Erio che rupi! —ehi Pedro upe.

Jesús remimbohe saisupri

²⁰ Che Jesús rembiaisu ité aico, che ité acoi carusa ipa vaheve yipive añ acoi aporandu chupe: “Che Yar, ¿ava vo nde mondora nde amotarẽhimbar upe?” ahe acoi chupe. Aguatase Pedro raquicuei, oyemboyere che repia.

²¹ Ahese oporandu chupe:

—Che Yar, evocoi no, ¿mbahe oimera chupe? —ehi cheu.

²² Evocoyase omboyevi Pedro upe:

—Che aipotase secove vite ãgua che yevise nara, ¿mara vo nde ererecora viña? Nde catu, eguataño che rupi —ehi.

²³ Sese ambuae Jesús reroysar ipihañemoñeta tẽi aipo che namanoi chiva-herã ité yuvireco viña. Jesús rumo ndahei ‘nomanoi chietera’ ohesave aipo ehi cheu; ahe rumo, “Aipotase secove vite ãgua che yevise nara, ¿mara vo nde ererecora viña?” ehi.

²⁴ Che ité amombehu co mbahe, che avei aicuachía iyavei yaicua supi tupri vahe ité che remimombehu.

²⁵ Oime avei ambuae mbahe setã Jesús rembiapo, que opacatũ icuachiasave viña, ndiyai chietera revo ivi viña. Aipo rupive.

APOSTOL REMBIAPO LOS HECHOS

Tūpa omboura Espíritu Santo viroyasar upe

¹ Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yipindar sembiapocuer amombehu ndeu iyavei yipisui iporombohe agüer.

² Ocuerayevire, ivave oso renondeve, Jesús omombehu oporocuita Espíritu Santo pīratasa pīpe güembiporavo apóstol upe sembiaporã.

³ Oyemboyecua güembiporavo upe omanore. Setá rupi omboyecua tupri ocuerayevisa chupe. Semimbohe osepia yuvireco imanore cuarenta ari rupi. Ahese omombehu Tūpa mborerecuasa resendar güemimbohe upe.

⁴⁻⁵ Oicove vitese yuvireco sese, aipo ehi chupe:

—Pesēi rene Jerusalén sui. Tomboaviye rane che Ru Tūpa güemimombehu, ahe acoi amombehu pēu. Juan niha pe āpiramo i pīpe tēi; Tūpa rumo Espíritu Santo pīpe pe āpiramora. Movíromi tēi ari ipane vite imondo āgua pēu —ehi güemimbohe upe.

Jesús oso ivave

⁶ Oñemonuhase apóstol yuvireco sese, oporandu yuvireco chupe:

—Ore Yar, ¿erembou irira vo cūrítei Israel iguar upe pīratasa iyeyecuai āgua? —ehi semimbohe yuvireco chupe.

⁷ Ahe rumo aipo ehi chupe:

—Ndiyai ahe ari cua āgua pēu. Esepia, Tūpa año ité vireco omborerecuasa ahe mbahe apo āgua.

⁸ Peipisira rumo Tūpa pīratasa oiquese Espíritu Santo pe pīha pīpe. Ahese pemombehu tuprira che recocuer Jerusalén pendar upe, Judea pendar, Samaria pendar iyavei opacatu co ivi pīpendar upe avei no —ehi chupe.

⁹ Aipo ihe pare, omahe apóstol yuvireco sese, aheseve Tūpa víraso ivave. Ichui Jesús oique iva quiha pāhuve. Evocoyase ndosepia iri eté yuvireco cute.

¹⁰ Omahe viteseve yuvinoha ivave ichosa rese, aviyeteramo tēi ñuvirío mbia, iturucuar morochí vahe, oyemboyecua apóstol ipive yuvinoha

¹¹ aipo ehi yuvireco chupe:

—Galilea iguar, ¿mahera vo pemahe vite iva rese pehã? Evocoi Jesús, inungar Tūpa víraso ivave pe sui, ēgüe ehi aveira niha ogüeyi ou co ivi pīpe coipe —ehi yuvireco chupe.

Jesús remimbohe oiporavo Matías, Judas recuñara yuvireco

¹² Evocoyase apóstol oyevi yuviraso Jerusalén ve ivitri Olivo sui, ahe ihamombrigüer ñepeí kilómetro tēi. Supivemi imombehusa judío guata āgua mbıtuhusa ari pīpe yepi.

¹³ Yuviroiquese Jerusalén ve, oyeupipa oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahir, Simón ahe Zelote iyavei Judas, Santiago rahir yuvirecoi.

¹⁴ Co opacatu ari yacatu rupi oñemonuha oyoya gasu oyoeroqui āgua yuvireco yepi Jesús rivri, ichi, ambuae cuña reseve avei.

¹⁵ Evocoyase ñepeí ari pīpe oñemonuha gasu ciento veinte ava yuvireco. Ipāhuve Pedro opūha aipo ehi ava upe:

¹⁶ “Che mu eta Jesucristo reroyasar, iya ité co imboaviyesa Tüpa Ñehengagüer Judas recocuer resendar. Ahe imombehupri David upe Espíritu Santo pipe aracahe. Evocoi Judas víraso vahe Jesús amotarêhimbar ipisi uca água.

¹⁷ Ahe acoi secoi yande pãhuve co mboraviquisa rese yande pítivii água avei viña.

¹⁸ Evocoi güembiapo ai repri pipe omboepi ivi. Ipare ñaca iviso oviapi oso ivive, oyetiapiipa.

¹⁹ Opacatu ava Jerusalén pendar oicua Judas recocuer yuvireco. Sese co ivi upe, ‘Acéldama’ ehi yuvireco oñehe pipe ‘Ívi Tuví resendar’ oyapave.

²⁰ Esepia, icuachiapri Salmo pipe aipo ehi:

‘Taseyasa sêta yuvireco.

Tipo iri eme ava ipipe’ ehi.

Iyavei ambuae aipo ehi:

‘Toime ambuae secoyar iporaviqui rãgüer pisi água’ ehi vahe.

²¹ “Evocoiyase cohava oime ava yande Yar Jesús secoi viteses yande pãhuve

²² ñapiramosa suive yuvirecoiño vahe ité yande rupi iyavei ivave ichosa osepia vahe avei yuvireco. Ahe tiporavosa ñepeí ipãhu pendar yande rupi icuerayevi agüer mombehu água” ehi omboetasa upe.

²³ Evocoiyase oiporavo ñuvirío mbia yuvireco: ahe José Barsabás, serosa Justo; ambuae rer Matías.

²⁴ Ipare oyerogui yuvireco aipo ehi: “Nde, ore Yar, opacatu ava piha ereicua. Emboyecua cohava nde rembiporavo oreu; ¿uma vo ereipota

²⁵ eremondo vaheerã icuaitarã apóstol seco água Judas recuñara? Ahe oangaipa pipe oyemocañi uca tēi vahe oico” ehi Tüpa upe yuvireco.

²⁶ Evocoiyase osãha iporavo yuvireco. Matías ité vinose iporavopri sui yuvireco. Ichui tupri ité oiique once apóstol pãhuve.

2

Espíritu Santo güeyi agüer

¹ Oyepotase Pentecostés pieta, opacatu Jesús reroyasar oñemonuha oi guasu pipe yuvireco.

² Aheve oi pipe aviyeteramo tēi ivitu ipírata vahe nungar siapu guasu ou iva sui. Ahe siapugüer oyendupa tupri oi pipe.

³ Ahese oyecua tata rendigüer nungar opacatu aheve yuvirecoi vahe harive.

⁴ Ahese avei Tüpa omoingue evocoi ava piha pipe oEspíritu Santo. Ichui ahe Espíritu omoñehe uca ambuae ñehesa pipe yuvireco.

⁵ Ahe ari pipe setá iteanga judío yuvirecoi Jerusalén ve omboaviye vahe ocuaita Tüpa mboeteisa, ahe oñemonuha vahe opacatu ivi rupindar yuvireco.

⁶ Mbahe siapu guasu vahe renduse, oñemonuha ati tēi yuvireco oyese. Ndoymboaracuai tēi yuvireco ambuae ava oñehe pipe ñehese.

⁷ “¡Too!” ehi tēi oyepihamondiisa pipe yuvireco. Sese aipo ehi oyeupe:

—¿Ndahei vo acoi co ava Galilea iguar oñehe vahe yuvireco?

⁸ ¿Mahera piha co ñepeí-peí oñehe yande ñehe pipe yuvireco? —ehi tēi oyeupe yuvireco—.

⁹ Esepia, cohava yuvirecoi vahe: Partias pendar, Media pendar, Elam pendar, Mesopotamia pendar, Judea pendar, Capadocia pendar, Ponto pendar, Asia pendar,

¹⁰ Frigia pendar, Panfilia pendar, Egipto pendar, Libia cotindar, ahe Cirene cōquivotindar. Iyavei Roma pendar,

¹¹ judío yuvirecoi vahe, ambuae judío aracuasa reroyasar avei, Creta pendar, Arabia pendar. ¡Yande yasendu opacatu yandeu ñehe yuvireco yande ñehe pipe Tūpa rembiapo icatupri vahe! —ehi.

¹² Opacatu oyepihamondi, ndoicuai opihañemoñeta ãgua yuvireco.

—¿Mara ehi pñha co na oya yuvireco? —ehi-ehi tēi yuvireco oyeupe.

¹³ Ambuae ava rumo seroïrosa pipe aipo ehiño yuvireco:

—¡Osavaipo mo evocoi yuvireco! —ehi.

Pedro ñehe ava upe

¹⁴ Evocoiyase Pedro opñha opacatu once vahe apóstol pñhuve, ñehe pñrata aipo ehi: “Che mu judío eta, opacatu Jerusalén pendar avei, peicua co mbahe amombehu vaheñ pñ; peyapisaca tupri che ñehe rese:

¹⁵ ndosavaipoi moco co mbia yuvireco. ¿Ndapesepiai vo añihivei vite cñritei’?

¹⁶ Co niha Tūpa ñehe mombehusar Joel oicuachía vahe aracahe:

¹⁷ ‘Tūpa aipo ehi:

Coie, ari cañi renonde, amondora che Espñritu Santo opacatu ava upe.

Ipñratasa pipe pe rahir, pe rayri ñehera yuvireco.

Mbia chñihivave osepiara oquer pendar nungar mbahe yuvireco.

Oime aveira queraisa supi eté vahe cuacua vahe upe.

¹⁸ Supi eté ahe ari pipe amondora che Espñritu che rembiguai cuimbahe upe, che rembiguai cuña upe avei.

Ipape ñehera yuvireco che rese ipñratasa pipe.

¹⁹ Amboyecuaru poromondiisa ìva rese.

Ëgñe ahe aveira poromondiisa mboyecua ìvi pipe:

tuvi, tata iyavei tñtachi.

²⁰ Yande Yar ari tuvichá vahe imboeteipri renonde ohara pñtu, yasi oyeapora tuvi nungar.

²¹ Opacatu ava, che Yar che pñtivñi eve, ehi vahe, ahe ñeñepisirora yuvireco’ ehi Joel icuachía aracahe.

²² “Pe Israel suindar, pesendu che ñehe: Jesús, Nazaret pendar, oyapo poromondiisa tuvichá vahe, mbahe yavai vahe Tūpa pñratasa pipe pe pñhuve güeco maranehi mboyecua ãgua. Ahe niha peicua opacatu.

²³ Ipape rumo evocoi Jesús imondosa pñu yuca ãgua. Ahe rumo Tūpa remimbotar rupi. Esepia, yipive ité Tūpa oicua pe peipisira yuca uca ãgua curusu rese ava naporai vahe upe.

²⁴ Tūpa rumo ombogñerayevi manosa sui. Esepia, manosa ndoicatui seroco ãgua.

²⁵ Supi eté mborerecuar guasu David ñehe Jesús recocuer rese aracahe aipo ehi:

‘Che aicua che Yar che rese secoi che acato coti mbahe tēi pipe che viapiñhi ãgua yepi.

²⁶ Sese avihañi ité vichico, asapucai avei che rorivetesu pipe.

Iyavei che yeroya tuprisave asñrora mbahe avñye vahe che recove iri ãgua.

²⁷ Esepia, nde ndereseyai chira che hñ omano vahe pñhuve, nderemonduyu ucai chiaveira nde rembiguai seco maranehi vahe retocuer.

²⁸ Co tecovesa ereicua uca cheu.

Che mbovihara eve nde rese che recose’ ehi David aracahe.

²⁹ “Che mu eta, supi eté yande ramoi David omano, ñotisa ita hopri pipe aracahe. Ahe suvipa ove vite cohava yande pñhuve.

³⁰ David rumo Tūpa ñehe mombehusar, oicua Tūpa oyeupe aipo ehi vahe: ‘Supi eté aipo ahe ndeu: nde suindar oimera mborerecuar guasu nde recuñara’ ehi vahe.

³¹ Ahe ndoyavii osepia vahe ité Poropĩsirosar cuerayevisa. Evocoiyase aipo ehi oñehe sese: ‘Ihã ndopitai chira omano vahe pãhuve iyavei setecuer ndituyui chira’ ehi aracahe.

³² Evocoi Jesús, Tūpa remimbogüerayevi secõi. Ahe imombehusar opacatu ore oroico.

³³ Ipare Tūpa viñaso oacato coti imboguapi. Ahe oipisi imombehupri Espĩritu Santo Vu sui. Evocoiyase ahe opa omondo co ava yuvirecoi vahe upe. Ahe pesepia, pesendu avei cūrítei peico.

³⁴ Esepia, evocoi oso vahe ivave ndahei David. Ahe ae rumo aipo ehi aracahe:

‘Yar aipo ehi che Yar upe:

Eguapi cohave che acato coti che piri.

³⁵ Asecopipa uca ranera nde amotarẽhimbar ndeu, ehi Yar che Yar upe’ ehi David aracahe.

³⁶ “Pe tapeucasapa, ticusapa avei opacatu Israel recua rupi, supi eté evocoi Jesús curusu rese peyatica vahecuer, ahe Tūpa omoingo opacatu yande Yarã iyavei yande pĩsĩro ãgua” ehi Pedro ava rehi upe.

³⁷ Aipo renduse, tasí iteanga ipiha pipe yuvireco. Evocoiyase oporandu chupe, ambuae imboetasa upe avei yuvireco:

—Ore mu, ¿mbahe vo oroyapora evocoiyase? —ehi.

³⁸ Evocoiyase aipo ehi ahe ava upe:

—Pemboasi pe angaipa; peyevi Tūpa upe. Iyavei peñeapiramo opacatu Jesucristo rer pipe. Evocoiyase Tūpa iñerora pe angaipa rese. Iyavei omondora Espĩritu Santo pẽu.

³⁹ Esepia, co ñehesa imombehupri, ahe pẽu nara, pe suindar upe nara iyavei opacatu amombri Tūpa sui yuvirecoi vahe upe nara avei, ahe acoi opacatu yande Yar Tūpa oyeupe nara güeru pota vahe —ehi.

⁴⁰ Eẽgüe ehi oñehe vite ava mboaracua aipo ehi:

—¡Peyepipi co ava secocuer co coti tẽi vahe sui! —ehi chupe.

⁴¹ Acoi ava viroya vahe co ñehesa, oñeapiramo uca yuvireco. Ahe arĩ pipe oyemboeta iri tres mil ava yuvireco Jesús viroya vahe rese.

⁴² Opacatu viroya tupri ité apóstol porombohesa. Opacatu guasu avei oyeaisu tupri yuvireco, oyerõqui iyavei oñemonuha oyeupe pan mboyaho-ya ãgua yuvireco yepi.

Yipindar vahe Jesús reroyasar recocuer

⁴³ Opacatu oyembosiquiye imboeteisa pipe yuvireco. Esepia, apóstol oyapo setá poromondiisa ‘toicua Tūpa suindar yande porombohesa yuvireco’ oyapave.

⁴⁴ Opacatu Jesús reroyasar ipihañemoñeta tupri ité ombahe rese yuvireco güecocuer upe nara.

⁴⁵ Omondo ambuae ava upe oivĩ iyavei ombahe eta yuvireco. Sepri omondo oyeupe mbahe panesa rupi-rupi.

⁴⁶ Arĩ yacatu rupi judío tũparove oñemonuha yuvireco. Iyavei oĩ yacatu rupi avei oñemonuha oyoya guasu pan mboyaho ãgua. Ipare oyoya guasu ocaru yuvireco oyembovihasa pipe, opihañemoñeta tupriisa pipe avei.

⁴⁷ Osapucal yuvireco Tūpa upe yepi iyavei opacatu ava osaisu Jesús reroyasar yuvireco. Yande Yar evocoiyase arĩ rupi omboeta catu ava iñepisiro ãgua Jesucristo viroya vahe pãhuve.

3

Ndoguatai vahe cuerasa

¹ Ñepeí ari aipo, caharuse las tres pipe, Pedro, Juan reseve oyoya yuviraso judío tūparove. Ahe hora pipe judío oyeroqui yuvireco yepi.

² Ahe tūparo roquendipi rer Porañete. Aheve ari yacatu rupi viraso ñepeí ava oyesu suive ndoguatai vahe ‘tomondo guarepochi ava tūparove yuviroique vahe yuvireco chupe’ oyapave.

³ Ahe ndoguatai vahe omahe Pedro, Juan rese tūparove seique potase, oporandu guarepochi rese chupe.

⁴ Pedro, Juan avei rumo omahengatu yuvireco sese. Pedro aipo ehi chupe: —Emahe ore rese —ehi.

⁵ Evocoiyase ahe mbia omahengatu sese ‘omboura revo que mbahe cheu’ oya viña.

⁶ Aipo ehi rumo ndoguatai vahe upe:

—Che ndarecoi guarepochi, oro avei. Co areco vahe rumo amondora ndeu: Jesucristo, Nazaret pendar, rer pipe epūha, eguata —ehi chupe.

⁷ Evocoiyase oipisi ipo yasu cotindar imopuha. Ahe ramoseve opa tupri ipi, ipiñuha avei oviracua.

⁸ Evocoiyase opūha, opo, uguata; oique oso tūparove supi. Opo-opo vorivetesave iyavei osapucai Tūpa upe.

⁹ Opacatu ava osepia yuvireco iguatase iyavei Tūpa upe isapucaise.

¹⁰ Omahecuase sese, “¡Too!” ehi tēi yuvireco. Iyavei ndoyembovihal aviyeteramo tēi icuerase yuvireco. Esepia, evocoi ava oicuapa tūparo roquendipi Porañete serer vahesave chinise mbahe rese iporanduse yuvireco yepi.

Pedro oñhe ava rehi upe tūparo Corero Salomón serer vahevriye

¹¹ Ndoguatai vahecuer ndoyepipi potai Pedro, Juan sui. Yuvinoña ati, oyepihamondií ava sepia tūparo Corero Salomón serer vaheve yuvirecoise.

¹² Pedro evocoiyase aipo ehi ava upe: “Che mu, ¿mahera vo peyemondií? ¿Mahera vo ore repia ati peye? Ndojaví co ore pīratasa pipe tēi iyavei Tūpa rese ore pihañemoñeta tuprisa pipe tēi orombogüera vahe co mbia pēu viña.

¹³ Tūpa, ahe acoi Abraham, Isaac iyavei Jacob viroya yuvireco aracahe iyavei opacatu yande ramoí eta avei no, ahe niha omondo güeco pīratasa tuvicha catu vahe Guahir Jesús upe. Pe rumo acoi pemondoño mborerecuar Pilato povriye. Acoi omose potase, pe evocoiyase ndapeipotaiño imose água chupe.

¹⁴ Ahe seco maranehi vahe, seco ívi vahe renose rāgüer pipe, peporandu: ‘Tosē oporapichi vahe’ peye.

¹⁵ Ēgüe peye acoi tecovesa ombou vahe yuca. Tūpa rumo ombogüerayevi omano vahe pāhu sui. Ahe niha ore oromombehu oroico pēu.

¹⁶ Co Jesús rer rese yeroya pipe ité niha oipisi pīratasa co mbia ndoguatai vahecuer opacatu pe pesepia vahe iyavei peicua vahe. Jesús rese yeroyasa pipe ité niha co pe rembiepiave ocuera tupri” ehi ava upe.

¹⁷ “Che mu eta, che aicua acoi pe peipitíví vahe pe rerecuar Jesús yuca uca água pe ícua tupriéhi pipe cuese.

¹⁸ Ēgüe ehi Tūpa imboaviye aracahendar opacatu oñhe mombehusar upe güemimombegüer: ‘Che Rembiporavo Poropīsiosar oiporarara mbahe-mbahe tēi rasicuer omano’ ehi vahe.

¹⁹ Sese pemboasi pe angaipa; peyevi Tūpa upe. Ipīpe sui tomocañi pe angaipa pe sui. Aviyeteramo co sui omboura yande Yar pe reco morohisa āgua,

²⁰ ombou aveira Jesús, ahe yipisuipe iporavopri pe pĩsiro āgua.

²¹ Cūrīte rumo Jesucristo ivave vīte secōi acōi Tūpa opase voi omoingatu opacatu mbahe iyevi āgua. Aipo ehi acōi imoñehe uca aracahendar ñehe mombehusar ndaseco marai vahe.

²² Moisés yande ramoī yuvirecōi vahe upe aipo ehi imombehu aracahe: ‘Yande Yar Tūpa omopuhara ñepeī ñehe mombehusar pe pāhuve che nungar. Ahe ñehe pesendura, pemboyeroya catu aveira.

²³ Opacatu ndoviroyai vahe ñehe Tūpa omocañira güembiporavo pāhu sui’ ehi.

²⁴ “Ēgüe ehi opacatu Tūpa ñehe mombehusar Samuel suive aracahe omombehu avei co ari cūrīteī yasepia vahe yuvireco.

²⁵ Pēu nara niha Tūpa ñehe mombehusar remimombehugüer aracahendar. Pēu nara avei acōi Tūpa omombehu vahe güemimbōtar yande ramoī eta upe. Esepia, aipo ehi Abraham upe aracahe: ‘Opacatu ava co ivi pipendar ahe sovasapri yuvirecoira nde suindar sui’ ehi.

²⁶ Acōi Tūpa Guahir ombogüerayevise, pēu rane ombou pe rovasa āgua ‘toseyapa ñepeī-peī güecocuerai yuvireco’ oya” ehi Pedro ava rehī upe.

4

Pedro, Juan serasosa mborerecuar rovai

¹⁻² Pedro, Juan reseve ñehe vīteseve ava rehī upe, ahese oñemoirosa pīpe pahī eta, tūparo rārosar sundao rerecuar, saduceō avei oyugüeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayevi; sese oime cuerayevisa omano vahe pāhu sui” ehi.

³ Ichui oipisi seraso soquenda yuvireco ‘ayihive voi yanosera mbahe rese porandu āgua’ ohesa pīpe. Esepia, caharuse tēi osoquenda yuvireco.

⁴ Setá rumo ava ñehesa osendu vahe vīroya yuvireco. Ahe cuimbahe seroyasar retacuer güeraño senī cinco mil.

⁵ Ahere ayihive mborerecuareta oñemonuha yuvireco Jerusalén ve: judío rerecuar, pahī eta rerecuar, Moisés porocuaita rese oporombohe vahe,

⁶ pahī rerecuar ivate catu vahe Anás, Caifás, Juan, Alejandro, opacatu omu reseve.

⁷ Evocoyase güeru ucase Pedro iyavei Juan opāhuve yuvireco, oporandu yuvireco chupe:

—¿Ava pe cuaita pīpe vo, ava rer pīpe avei vo co mbahe peyapo? —ehi.

⁸ Evocoyase Pedro, Espíritu Santo pīratasa pīpe, aipo ehi chupe:

—Pe, mborerecuareta co tecua pipendar, pe avei pahī rerecuar:

⁹ peporandu niha co ava imbaheasi vahe ndoguata catui vahe mbogüera agüer rese oreu —ehi chupe—.

¹⁰ Evocoyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pīpe. Ahe niha peyatica uca vahecuer curusu rese. Tūpa rumo ombogüerayevi iri omano vahe pāhu sui.

¹¹ Co Jesús pe remieroño, ahe rumo yande vīracuasa. Pe evocoyase inungar oi mopuhasar omomboño vahe ita avīye catu vahe oi movīracuasa rāgüer yepi.

12 Ndipoi que ambuae ava sui poropĩsirosa, Jesús güeraño ité oicatu oporopĩsiro. Esepia, Tũpa nomboui ambuae ava tẽi co ivi pipe yande pĩsiro ãgua —ehi.

13 Mborerecuar osepiase iyembosiquiyeehisa yuvireco, “¿Mara ehi pĩha co mbia? ¡Ava tẽi, ndoyembohei vahe niha!” ehi tẽi yuvireco chupe. Ichui oicua Jesús remimbohegũer secose yuvireco.

14 Iyavei acoi ava semimbogũeragũer supive ité secoise, sese ndoicatu chupe oñehe mara ãgua yuvireco.

15 Ipare, “Pesẽ ocarve” ehi mborerecuareta yuvireco chupe. Ahe güeraño evocoyase opita oi pipe oñemoñeta yuvireco sese

16 aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondiisa oyapose yuvireco. Ndiyai eté, “Ëgũe ndehi” yahe chupe.

17 Yambosiquiyee ava upe Jesús rer rese iñehe iriẽhi ãgua yuvireco. Ipipe sui ava tosendu iri eme Jesús resendar ñehesa yuvireco —ehi.

18 Aipo ohe pare, “Perio” ehi yuvireco chupe. “Pesendu, co pipe suive peñehe iri eme tupri iyavei pembohe iri eme avei ava Jesús rer pipe” ehi yuvireco chupe.

19 Omboyeviño rumo oñehe yuvireco chupe:

—¿Mara ehi pe pihave? ¿Uma pĩha aviye catu Tũpa rovai? ¡Pe porocuaite tie oroviroya catura Tũpa ore cuaisa sui!

20 Ndiyai rumo mbahe ore rembiepia, mbahe orosendu vahe avei mombehuẽhi ãgua oreu —ehi.

21 Aipo ihese, mborerecuar ombosiquiyee catu tẽi yuvireco. Ichui rumo omose tupriño. Esepia, ava omboetei guasu Tũpa yuvireco co imbaheasi vahe mbogũera repiase. Sese ndoicatu eté mbahe apo yuvireco chupe.

22 Evocoi ava oipisi vahe Tũpa poromondiisa ocuera ãgua, ahe oñaro catu cuarenta araviter vireco vahe sui.

Jesús reroyasar oporandu Tũpa upe siquiyeehisa rese yuvireco

23 Yuvinosese Pedro, Juan avei, oyevi yuviraso omboetasa piri. Aheve oñemonuhasave opa omombehu pahi rerecuar oyeupe ñehe mara-mara tẽisa yuvireco.

24 Aipo rendu pare, oyoya guasu oyerogui yuvireco Tũpa upe aipo ehi: “Ore Yar, nde niha Tũpa opacatu iva, ivi, para guasu, opacatu ipor reseve aposar ereico.

25 Nde Espĩritu Santo pipe aipo eremombehu uca nde rembiguai mborerecuar David upe aracahe:

‘¿Mahera vo co ava ndahei vahe judío oyamotarẽhi yuvireco?

¿Mahera vo ipihañemoñeta rai tẽi yuvireco?

26 Mborerecuar guasu eta, ambuae mborerecuar reseve co ivi pipendar oñemonuha yuvireco yande Yar Tũpa iyavei sembiporavo amotarẽhi ãgua’ ehi aracahe.

27 “Ëgũe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepia, oñemonuha yuvireco nde rembiguai aracaheve nde Rembiporavo Poropĩsirosar Jesús, seco maranehi vahe, amotarẽhi ãgua.

28 Ëgũe ehi yapo opacatu nde pihañemoñeta aracahendar rupi tupri ité yuvireco.

²⁹ Iyavei cūrítei, ore Yar, emaha ore amotarēhisar rese. Embou nde pīratasa nde rembiguai oroico vahe upe siquiyēhisa pipe nde ñehengagüer mombehu vite āgua.

³⁰ Ipare, nde pīratasa pipe, embogüera imbaheasi vahe iyavei eyapo mbahe poromondiisa yavai vahe nde rembiguai Jesús rer maranehi pipe” ehi yuvireco oyerogui.

³¹ Iyeroqui pare, Tūpa omboriri opacatu mbahe ñemonuhasave yuvireco chupe. Ahese Espiritu Santo opa oique yuvireco sese. Sese osiquiyēhisa pipe omombehu tupri Tūpa Ñehengagüer yuvireco.

Jesús reroyasar ombahe opacatu oyeupe nara vireco yuvireco

³² Setá iteanga Jesús reroyasar yuvireco. Opacatu oyoya tupri ipihañemoñeta yuvireco. Ndipoi eté “co güeraño co che mbahe” ehi vahe; opacatu seroyasar mbahe rumo opacatu mbahe.

³³ Jesucristo apóstol omombehu vite ipīratasa pipe icuerayevi agüer yuvireco. Ipipe Tūpa osovasa catu vite opacatu yuvireco.

³⁴ Ndipoi eté ipāhu pendar mbahe ndovirecoi vahe. Esepia, opacatu ivi vireco vahe iyavei oi omondo,

³⁵ ahe sepri omondo apóstol upe yuvireco yepi. Ahe evocoyase omboyahoyaho opacatu upe mbahe ipané vahe rupi-rupi yuvireco.

³⁶ Ēgüe ehi ava judío ramoi Leví suindar, Chipre pendar, José serer vahe, apóstol osero, “Bernabé” ehi yuvireco chupe (‘poromboviharar’ oya aipo ehi),

³⁷ ahe mbia omondo oivi, güeru sepri apóstol upe.

5

Ananías iyavei Safira yemboangaipa agüer

¹ Ambuae ava rumo, Ananías serer vahe, güembireco Safira reseve omondo ivi yuvireco.

² Ahe mbia rumo omboyaho sepri, ñepeiyahocuer vireco oyeupe nara, ambuae iyahocuer vīraso apóstol upe, sembireco avei oicua tēi opacatu.

³ Evocoyase Pedro aipo ehi chupe:

—Ananías, imahera ereroya Carugar nde piha pipe Espiritu Santo mbopa āgua, eremboyahoño tēi nde ivi repri guarepochi ndeyeupe nara!

⁴ ¿Ndahe vo nde mbahe ité ivi viña? Eremondo ité niha, evocoyase nde mbahe ité guarepochi. ¡Mahera ereyapo co nungar! Ndahe va upe nde remira, Tūpa upe ité rumo nde remira —ehi chupe.

⁵ Osenduse Pedro ñehesa, oviapi sehögüer oso sovai. Ahese opacatu oyandu vahe osiquiyē tēi yuvireco.

⁶ Ipare mbia chñhivahe yugüeru, osupi sehögüer, oipoque seraso yuvireco ñoti āgua.

⁷ Mhosapi hora pare, sembireco Safira serer vahe oique oi pipe. Ndoicua vitei rumo omer mano.

⁸ Ahese Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoi rupive ité niha oromondo —ehiño avei cuña chupe.

⁹ Evocoyase aipo ehi ahe cuña upe:

—¡Mahera peyemboyoya pe pihañemoñetas rese pe secoãha ãgua yande Yar Espiritu! Coi yugüeru nde mer tísarer. Nde avei nde reraso ãgua yuvireco eipeve —ehi chupe.

¹⁰ Ahe ramoseve avei oviapi sehögüer Pedro rovai. Mbia chihivahe yuviroquese, oipoque voifño ité sehögüer seraso imer iviñi ñoti ãgua yuvireco.

¹¹ Opacatu Jesús reroyasar, ambuae ava avei oyembosiquiye guasu yuvireco yanduse.

Setá poromondiisa yaposa

¹² Evocoyase apóstol pipe Tüpa omboyecua uca setá poromondiisa ava pãhuve yuvireco. Opacatu Jesús reroyasar oñemonuha judío tüparo ique, Salomón serer vahesave yuvireco.

¹³ Opacatu ambuae ndoyemboyai yuvireco sese osiquiyepave. Ava rehii rumo, omboetei eteanga apóstol yuvirecoi vahe yuvireco.

¹⁴ Oyemboeta catu yande Yar reroyasar setá cuimbahe, setá avei cuña.

¹⁵ Iyavei ava rehii vïnose yuvireco imbaheasi vahe supa reseve-seve Pedro renonera, “Oñocuase Pedro, aviyeteramo omohara ihägüer. Ahese revo ombogüerara” ehi yuvireco oyeupe.

¹⁶ Ava Jerusalén ivirindar avei güeru omonuha setá imbaheasi vahe, carugar rese yuvirecoi vahe apóstol upe imbogüerapirã. Ahe evocoyase opacatu ombogüera yuvireco.

Apóstol yamotarëhipri yuvirecoi

¹⁷ Ichui tõi pahî rerecuar ivate catu vahe, saduceo yuvirecoi vahe oñemoiro yuvireco apóstol upe ava rese güecatëhisave.

¹⁸ Sese oipisi osoquendapa uca yuvireco.

¹⁹ Ipare rumo, pïtu pipe, Tüpa rembiguai ïva pendar ou omboi oquenda, vïnose ichui, aipo ehi chupe:

²⁰ “Peso tüparo guasuve, pemombehu avei ava upe co ñehesa tecocuer piasu resendar” ehi chupe.

²¹ Co mbahe rendu pare, supî tupri ité oyapo yuvireco. Cõhe ramoseve yuviraso judío tüparo guasuve ava mbohe ãgua.

Ahesave pahî rerecuar ivate catu vahe, supindar avei osenoi opacatu tecua pipendar mborerecuar ñemonuha ãgua ivate catu vahesave; omondo yuvireco güembiguai apóstol reru ãgua soquendasa sui aheve nara viña.

²² Oyepotase rumo sembiguai yuvireco, oseca tõi soquendapri. Ichui oyevi tõi yuvireco imombehu

²³ aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendipi rupi sãrosar osãro tupri ité viña. Oromboise rumo oquenda, ndipoi eté ava soquendapri ipipe —ehi tõi yuvireco.

²⁴ Osenduse, pahî rerecuar ivate catu vahe, tüparo rãrosar rerecuar, pahî rerecuareta avei yuvireco, ipihañemoñeta tõi: “¿Que rupi vo opoira co mbahe sui yuvireco?” ehi tõi yuvireco oyeupe.

²⁵ Aheseve ñepei mbia oyepota imombehu:

—Evocoi pesoquenda vahecuer, ahe mbia cüritei oporombohe tüparove yuvireco —ehi chupe.

²⁶ Evocoyase tüparo rãrosar rerecuar, sembiguai avei yuviraso seru ãgua mbahe tupri pipe, “Aviyeteramo yande api-api tiëtera ava yuvireco yaru raise” ehi yuvireco.

²⁷ Viroyepotase yuvireco ñemonuhasa ivate catu vahesave, ahese evocoi pahi rerecuar ivate catu vahe aipo ehi chupe:

²⁸ —Ore mborerecuar tecua pipendar, ndoroipotai peporombohe evocoi mbia recocuer rese. Pe rumo pembohe opacatu Jerusalén pendar secocuer rese serer pipe. Pemombehu avei ava rehí upe ore mborerecuar oroyuca uca evocoi mbia —ehi pahi rerecuar chupe.

²⁹ Pedro, omboetas reseve, omboeyeví pahi rerecuar ivate catu vahe upe yuvireco:

—Ore cuaita ité Tūpa mboyeroya, ndahei chira rumo ava tēi rane oromboyeroaya —ehi yuvireco chupe—.

³⁰ Yepe peyatica, peyuca uca Jesús curusu rese viña, yande Ru Tūpa rumo acoi yande ramoi eta viroya vahe, ahe ité ombogüerayevi.

³¹ Ipare osecomboivate ivave oacato coti imboguapi imoi. Ahe niha Mborerecuar guasu, Poropīsiosar avei ‘tomboasi oangaipa, toyevi cheu, toipisi angaipa resendar ñeroisa yuvireco’ oya Tūpa Israel suindar upe.

³² Ore Tūpa rembiapo repiasarer imombehu āgua oroico, Espíritu Santo avei oñehe ore ñehe rupi ava upe, ahe acoi Tūpa ombou vahe viroyasar upe —ehi.

³³ Osenduse mborerecuar aipo ñehesa, oñemoiró iteanga yuvireco. Oyuca pota opacatu apóstol yuvireco viña.

³⁴ Mborerecuar pāhu pendar rumo oime mbia fariseo, Gamaliel serer vahe, ahe Moisés porocuita rese oporombohe vahe iyavei imboeteipri catu vahe. Ahe opūha oporocuai, “Toyuvinose raimi ocarve apóstol” ehi.

³⁵ Ipare aipo ehi ambuae mborerecuareta upe:

—Che mu, judío, peicua catu, yandepihañemoñeta tupri rane mbahe apo āgua renondeve co mbia upe yuvireco —ehi—.

³⁶ Peyemomahenduha Teudas recocuer rese. Esepia niha, acoi oyemboivate aisa pipe viroguata cuatrociento ava oyeupi aracaco. Ipare acoi oyuca yuvireco. Ahese supindar opa oñemosai tēi yuvireco. Ahe peve secocuer opa.

³⁷ Coiye catu, omombehuse mborerecuar Roma pendar ava retacuer cua āgua, ahese Judas, Galilea pendar, oyemomborerecua. Setá avei ava oguata yuvireco supi. Ahe avei rumo oyuca yuvireco, opa tupriño avei supindar oñemosai tēi yuvireco —ehi—.

³⁸ Sese cūrítei peyapoi rene mbahe co ava upe. Yaseyaño. Esepia, evocoi mbahe sembiapo ndipocopi chira oyapose opíratasa pipe tēi yuvireco.

³⁹ Tūpa suindarse rumo ndapemombituhu catui chietera. Peicua catu, aní chira yayamotarēhi Tūpa ipipe —ehi omboetas upe.

Aipo ihese, opacatu imboetas viroya yuvireco.

⁴⁰ Ichui rumo güeru iri apóstol inupa uca āgua iñehe iriñehi āgua Jesucristo rese yuvireco. Inupa pare opa omose yuvireco.

⁴¹ Ipipe apóstol ovihareté iteanga yuvireco. Esepia, Tūpa ombou chupe iparaisu āgua yuvireco Jesús rer rese iyeroyasa sui tēi.

⁴² Ipare ndopoi eté arí yacatu Poropīsiosar Jesús recocuer mombehusa sui yuvireco. Omombehuño ité tūparo pipe iyavei opacatu ava rēta rupi yuvireco.

6

Siete iporavosa iparaisu vahe pītivii āgua yuvireco

¹ Ahe araviter pipe aipo oyemboetase Jesús reroyasar yuvireco, griego pipe oñehe vahe oñehe rai oyeupe hebreo pipe oñehe vahe rese yuvireco: “Niñañeco tuprii ore mu imer mano vahecuer rese ari yacatu mbahe poropitiviisa imondosase chupe” ehi oñehe yuvireco.

² Evocoiyase doce apóstol omonuhapa uca opacatu Jesús reroyasar. Aheve aipo ehi yuvireco chupe:

—Ndiyai rumo ore oropoi tēi Tūpa Ñehengagüer mombehusa sui mbahe poropitiviisa mondo ãgua rese tēi —ehi yuvireco—.

³ Sese ore rivireta, peiporavo siete mbia seco aviye vahe pe pãhu sui, yaracua vahe iyavei Espiritu Santo viroya vahe ité opiha pipe. Ahe mbia tiñañeco co mboraviquisa rese yuvireco.

⁴ Ore evocoiyase, oroyerureñora iyavei oroporomboheño itera Tūpa Ñehengagüer rese —ehi yuvireco.

⁵ Opacatu oipotaño yuvireco ñehesa oyeupendar. Ichui osonoi Esteban yuvireco, ahe oyeroya ité Tūpa rese iyavei viroya ité Espiritu Santo opiha pipe. Ichui oiporavo Felipe, Prócoro, Nicanor, Timón, Parmenas iyavei Nicolás evocoi mbia Antioquía pendar, ahe viroya vahecuer judío aracuasa.

⁶ Ichui virasopa apóstol upe yuvireco. Ahe omondo opo iharive oyeriqui yuvireco sese.

⁷ Ahese Tūpa Ñehengagüer oyemosai catu tecua pipe. Ichui oyemboeta catu iri avei Jesús reroyasar yuvireco Jerusalén ve. Setá avei judío pahi viroya iñehengagüer yuvireco.

Esteban pisisa

⁸ Co mbia, Esteban, vireco ité Tūpa pĩratasa iyavei Tūpa porovasasa oyese. Oyapo avei mbahe promondiisa, yavai vahe opacatu ava pãhuve.

⁹ Evocoiyase Jerusalén ve oime judío tũparo Mbiguaigüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivirindar yuvirecoi vahe reseve oñehepoepi-epi Esteban yuvireco.

¹⁰ Ndoicatui rumo iñehe recopi ãgua yuvireco. Esepia, ahe oñehe mbahecuasa Espiritu Santo omondo vahe pipe.

¹¹ Evocoiyase yamotarẽhimbar omboepi ambuae ava upe semira tēi ãgua sese yuvireco. “ ‘Ore orosendu co mbia oñehese mbahe naporai vahe rese Moisés amotarẽhisave, Tūpa amotarẽhisave avei’ aipo peyera peñehe” ehi yuvireco chupe.

¹² Evocoiyase ahe ava oyamotarẽhi uca opacatu ava mborerecuar reseve iyavei judío porocuita rese oporombohe vahe upe avei yuvireco. Ichui oipisi yesapiha Esteban seraso mborerecuar uve porandusa ivate catu vahesave yuvireco.

¹³ Iyavei oseca mbia semira tēi vahe oñehe vaherã sese yuvireco. Ahe aipo ehi:

—Co mbia oñehe-ñehe tēi yande tũparo guasu imaranehi vahe amotarẽhisave, Moisés porocuita amotarẽhisave avei.

¹⁴ Ore orosendu iñehe: “Jesús Nazaret pendar omocañira tũparo guasu iyavei Moisés yande mbohosa avei aipo osecuñarora” ehi —ehi yuvireco chupe.

¹⁵ Ahese opacatu mborerecuar oñemonuha vahe yuvinoi aheve omahe Esteban rese yuvireco. Omahese aipo yuvireco sese, ndoyavii sepiaca Tūpa rembiguai iva pendar rova.

7

Esteban oñehe oyeepisa pipe

¹ Evocoiyase pahi rerecur ivate catu vahe oporandu chupe: “¿Supi eté vo aipo nde ñehe mara eico?” ehi chupe.

² Ahese omboyeví chupe: “Che mu eta, peyapisaca che ñehe rese: Tüpa imboeteipri oyemboyecua yande ramoí Abraham upe aracahe. Mesopotamia ve secoi vitesse, icho renondeve Harán ve seco água,

³ aipo ehi chupe: ‘Eso nde recua sui; eseyapa nde mu; eso evocoi tecuave che amboyecua ndeu’ ehi Tüpa chupe.

⁴ Evocoiyase osê Caldea ivi sui oso tecua Harán ve güeco água. Omano pare tu Harán ve, Tüpa ombou cohava yande recosave.

⁵ Yepe oyepota tēi cohava aracahe, Tüpa rumo nomondoimi eté que chíhi ivi chupendar chupe. ‘Co ivi amondora ndeu nde mano pare nde suindar upe nara’ ehi Tüpa chupe (ahe rumo ndatahi vitei ahese).

⁶ Tüpa aipo ehi avei chupe: ‘Nde suindar yuvirecoira ambuae ava recua rupi, ahe pendar ava secua vahe rembiguairã semimombaraisugã tēi avei yuvirecoira cuatrociento araviter rupi’ ehi.

⁷ Tüpa rumo aipo ehi avei Abraham upe: ‘Che rumo, aicuara evocoi ava nde suindar mombaraisusar upe yuvireco. Ipare yuvinosera ipovri sui che mboetei iri água cohava yuvireco’ ehi Tüpa chupe aracahe.

⁸ Tüpa oyocuai güemimbotar pipe Abraham guahir mbocircuncida água rese. Sese Abraham mbocircuncida guahir Isaac iha pare ocho ari pipe. Isaac égüe ehi avei guahir Jacob upe. Jacob égüe ehi avei guahireta upe, ahe doce vahe Israel suindar” ehi.

⁹ “Ipare yuvirecoi vahe yande ramoí Jacob rahir omondo vivri guarepochi repirã yamotarēhisa pipe yuvireco. Ahe tivri rer José omondo vahe Egipto pendar upe yuvireco. Tüpa rumo secoiño ité sese.

¹⁰ Ichui vinose opacatu iparaisusa sui. Omondo ombahecua chupe iyavei seco aviye tupri água Egipto pendar mborerecurar guasu faraón upe. Evocoiyase faraón ipotasa pipe omoingue mborerecurar seco água opacatu ava ivi Egipto pendar cuai água iyavei güēta pipendar cuai água avei.

¹¹ “Ipare ou tiavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoí ndoyosui mbahe güemihura yuvireco.

¹² Oyanduse rumo Jacob Egipto ve oime vitesse trigo, ahese omondo guahir aheve seca, ahe yande ramoí yuvirecoi vahe. Ahe yipindar ichosa Egipto ve yuvireco.

¹³ Ichui yuviraso yupagüe irise Egipto ve, ahese José oyecua uca viquehir upe. Egüe ehi faraón upe oicua uca uma sui oyesu.

¹⁴ Evocoiyase José güeru uca oyesupa Jacob iyavei opacatu omu, ahe imu retacuer setenta y cinco tupri.

¹⁵ Egüe ehi Jacob yuviraso Egipto ve yuvirecoi água opacatu guahir reseve. Aheve omano iyavei opacatu yande ramoí eta omano yuvireco aracahe.

¹⁶ Imano pare rumo, suminogüer viraso icangüer yuvireco tecua Siquem ve. Aheve oñoti yuvireco. Aheve acoi Abraham virocua tuvipa Hamor rahir sui aracahe” ehi mborerecurar upe.

¹⁷ “Ipare, virovise ari ipapapri Tüpa Ñehengagüer Abraham upendar, ahese yande ramoí setá catu-catu iri oyesu Egipto ve yuvireco aracahe.

¹⁸ Ipare oporocuai ambuae mborerecurar guasu Egipto ve. Ahe ndoicuai vahe ité yande ramoí José.

¹⁹ Evocoi mborerecuar guasu ombopa yande ramoi eta aracahe. Omombaraisu avei oyucapa uca israelita rahir cuimbahe pītani. Ahe oyocuai iyesupa aipo ehi: 'Peseya pe rahir oha ramomi vahe, tomanoño' ehi yande ramoi upe aracahe.

²⁰ Aheseve avei aipo Moisés oha. Ahe pītani aviye ité Tūpa uve. Ihare, iyesupa mbosapi yasimi rupive vireco oyeše güētave yuvireco.

²¹ Oseyase rumo iyesupa ive yuvireco, ahese faraón rayri oseca ahe i rupi sui. Ichui vinose seraso güētave, omboacua omembrī nungar ité sereco.

²² Ichui Egipto pendar yaracua vahe opacatu ombahecuasa rese ombohe tupri Moisés sereco yuvireco. Evocoiyase Moisés ipīrata ité oñehese iyavei oyapose mbahe.

²³ "Virecose rumo Moisés cuarenta araviter, ipihañemoñeta: 'Tasepia rane che mu israelita cohave yuvirecoi vahe' ehi.

²⁴ Ipare aheve osepia Egipto pendar oinupa-nupa imu sereco yuvireco. Ahese oyuca Egipto pendar omu repicave.

²⁵ Ahe rumo, 'Oicua revo che mu Tūpa vinose uca āgua Egipto sui yuvireco cheu' ehi viña. Imu rumo nomohai eté Moisés vinose āgua yuvireco evocoi ava po sui.

²⁶ Ahere ayihive oso omu pāhuve. Aheve osepia ñuvirío mbia ovavase oyeupe yuvireco. Ahe rumo oipota tēi iñero āgua oyeupe yuvireco viña, aipo ehi chupe: 'Che mu, oñemu mo peico, ¿mahera vo pevava peyese ae?' ehi tēi chupe.

²⁷ Oyemoviracua catu vahe rumo omombo oyesui. Ichui ahe aipo ehi chupe: '¿Ava vo nde moingue ore pāhuve ore rerecuarā ore recocuer moingatu āgua?' ehi chupe.

²⁸ '¿Che yuca pota avei tie eve inungar ereyuca evocoi Egipto pendar irapipe!' ehi chupe.

²⁹ Osenduse rumo co iñehe, oñemi voi eté oso Egipto sui ambuae ivi Madián ve. Aheve opita pucu. Ahe ivi rumo ndahei secua ité. Aheve oyesu ñuvirío tahir.

³⁰ "Omboaviyese cuarenta araviter Madián ve, Tūpa rembiguai oyemboycua iviri Sinai rerovicave ivi iporupirēhisave caha rese tata rendigüer pāhuve chupe.

³¹ Osepia mbahe sendi vahe oyepihamondii, oyemboya catu sese sepia tupri āgua viña. Ahese osendu Yar ñehe aipo ehi vahe:

³² 'Che nde ramoi Tūpa aico. Nde ramoi Abraham, Isaac iyavei Jacob che reroya vahecuer yuvireco' ehi. Evocoiyase Moisés oriri osiquiyesa pipe nomahe pota iri sese.

³³ Evocoiyase Yar aipo ehi chupe: 'Esequi nde pitaqui. Esepia, ivi nimarai vahesave ereico' ehi chupe.

³⁴ 'Che asepia tupri ité Egipto ve nde mu che rembiporavo paraísuse; asendu avei ipoāse tēisa yuvireco yepi. Sese agüeyi ndeu nde oromondora aheve senosepa āgua' ehi Tūpa Moisés upe aracahe.

³⁵ "Yepe yande ramoi ndoviroya potaiño ité yuvireco, '¿Ava vo nde moingue ore rerecuarā ore recocuer moingatu āgua?' ehiño yuvireco chupe, Tūpa ité rumo oyocuai güembiguai imbogüeyi tata rendigüer pāhuve imoñehe Moisés upe iporocuai āgua, ava renosepa āgua avei ivi Egipto pendar mborerecuar povri sui.

³⁶ Ipare ahe ité vinose yande ramoi eta Egipto sui, oyapo avei mbahe poromondiisa aheve 'toicua Tūpa yuvireco' oya, para guasu Pira vaheve avei

oyapo poromondiisa iyavei ivi iporupirēhisa rupi avei cuarenta araviter rupi.

³⁷ Ahe avei aipo ehi israelita upe: ‘Tūpa vinosera pe pāhu sui ñepei oñehe mombehusar che nungar’ ehi.

³⁸ Ahe avei acoi ivi iporupirēhisa rupi ava pāhu rupi secoi. Chupe avei oñehe Tūpa rembiguai ivitri Sinaí ve yande ramoi rese; ahe avei oipisi ñehesa tecovesa resendar yandeu imbou āgua.

³⁹ “Yande ramoi eta rumo nomboyeroa potai eté Moisés yuvireco. Ipihañemoñetaño ité Egipto ve oyevi āgua rese yuvireco.

⁴⁰ Evocoiyase aipo ehi Aarón upe yuvireco: ‘Eyapomi catu ava tūpa rahanga oreu ore reroguata āgua’ ehi yuvireco chupe. ‘¿Que vo catu Moisés, ore renosesarer Egipto sui, secoi? Omano tie revo’ ehi tēi israelita yuvireco aracahe.

⁴¹ Ipare oyapo uca mbahe rahanga guaca repiaca nungar oyeupe yuvireco. Oyuca mbahe mimba ahe mbahe rahanga upe viropovēhe vahērā yuvireco iyavei oyemboviha pieta apo yuvireco güembiapo ucagüer rese tēi.

⁴² Sese Tūpa opoiño ahe ava sui, ‘Toyerure evocoiyase yasi, yasitata upe yuvireco’ ehiño chupe. Aipo ehi niha oñehe mombehusar icuachiapri pipe: ‘Pe peico vahe israelita, ndahei cheu peyuca mbahe mimba seropovēhe āgua cuarenta araviter pipe ivi iporupirēhisa rupi.

⁴³ Pe rumo che mboeteiēhisa pipe peraso tūpa rahanga Moloc rēta iyavei yasitata rahanga Refán pe ae tēi peyapo vahe pe tūpaguā.

Sese che opovinosera pe recua sui pe mondo Babilonia cupe coi coti’ ehi Tūpa chupe aracahe.

⁴⁴ “Ivi iporupirēhisa rupi yande ramoi eta vireco Tūpa porocuaita rēta oyeupive yuvireco aracahe mbahe mimba pিরer apopri. ‘Na peyera yapo’ ehi Moisés upe. Evocoiyase iñehe rupi tupri oyapo uca.

⁴⁵ Ahese coipe catu yande ramoi eta vireco co oi Tūpa rēta mbahe pিরer apopri yuvireco iyavei Josué rupi yugüeru vahe güeruño ité avei yuvireco, omosepase Tūpa ambuae ava co yande recuavi sui. Ēgüe ehiño vite ité ahe seroco yuvireco mborerecuar guasu, David, secoise aracahe.

⁴⁶ Ahe David aviye ité Tūpa upe, oyapo pota setarā ‘toime tūparoguā yande ramoi Jacob rembieroya upe’ oya.

⁴⁷ Tahir Salomón rumo omopuha ité ahe tūparo.

⁴⁸ Tūpa rumo, seco ivate vahe, ndasecoi vahe tūparo ava tēi rembiapo pipe. Inungar acoi omombehu vahe Tūpa ñehe mombehusar aracahe aipo ehi:

⁴⁹ ‘Iva che renda iyavei ivi che pirunga.

¿Mbahe nungar oi vo peyapora cheu? ehi yande Yar.

¿Que vo evocoiyase che pituhu āgua?

⁵⁰ Che niha opacatu co mbahe aposar aico’ ehi Tūpa icuachiapri pipe” ehi mborerecuar upe Esteban.

⁵¹ Ichui aipo ehi chupe: “Pe rumo ndapeyapisaca potai vahe ité peico. Oime tēi pe nambi, pe piha avei, ipipe rumo ndapeicuai eté Tūpa. Peico Espíritu Santo amotarēhimbar tēi inungar pe ramoi aracahe yuvirecoi.

⁵² ¿Uma profeta revo ndovireco meguai pe ramoi yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cūrítei ou ndaseco marai vahe cute. Pe avei evocoiyase ahe yuca uca āgua peporocuai.

⁵³ Pe pereco tēi Tūpa porocuaita acoi Tūpa rembiguai güeru vahe yuvireco; ahe rumo ndaperoyaiño ité peico” ehi Esteban opacatu mborerecuar upe.

Esteban mano agüer

⁵⁴ Osendupase mborerecuar iñehe, omboasí iteanga yuvireco; oñeaimboterepri ité yamotarēhisave yuvireco.

⁵⁵ Esteban rumo vireco ité Espiritu Santo oyese. Evocoyase iva rese omahese, osepia Tüpa porañetes. Osepia avei Jesús opüha ohä Tüpa acato coti.

⁵⁶ Evocoyase aipo ehi:

—¡Pesepia! Asepia inungar iva imboipri. Aheve asepia Ava Riquehir Vu acato coti ihäi —ehi.

⁵⁷ Mborerecuareta rumo osapucaí pĩrata, oyopiño oapisacuar yuvireco ichui. Aheve yuvinoña guasu yuvireco chupe.

⁵⁸ Viraso güecua ivi yuvireco. Aheve oseya oyeaosa Saulo pive ‘tosãro’ oya yuvireco chupe. Ipare oyapi-yapi ita pipe yuca yuvireco.

⁵⁹ Oapi-apiseve, Esteban oyerure Tüpa upe: “Che Yar Jesús, eipisi che hä” ehi.

⁶⁰ Ipare oñenopiha, oñehe pĩrata Tüpa upe: “¡Che Yar, ndeñero co ava che amotarēhisar angaipa upe!” ehi.

Aipo ohe pare, omano.

8

¹ Iyavei Saulo, “Peyuca ité” ehi catu-catu aheve ohä.

Saulo oseca Jesús reroyasar mocañipa água oico

Ahe ari pipeve omboipi Jesús amotarēhimbar seroyasar reca mara-mara tēi catu sereco água yuvireco Jerusalén ve. Evocoyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco.

² Oime ava Tüpa mboeteisar yuvirecoi vahe, ahe víraso Esteban rehögüer ñoti yuvireco. Ití pare, oyasehó iteanga yuvireco sese.

³ Ahe pipeve avei aipo Saulo omombaraisu ava Jesús reroyasar yuvirecoi vahe seroya ucaēhi água viña. Yuviroique-iqueño tēi aipo sēta rupi cuimbahe, cuña mbotiriri senose soquenda água yuvireco.

Samaria pendar osendu ñehesa Jesucristo recocuer resendar yuvireco

⁴ Ava oñemosai vahecuer rumo Jerusalén sui omombehuño ité ñehesa písirosa resendar que yuvirasosa rupi yuvireco.

⁵ Felipe oso Samaria rupi. Aheve omombehu ava upe: “Evocoi Jesús Tüpa Rembiporavo ava písiro água” ehi.

⁶ Ahese ava rehii oñemonuha Felipe ñehe rendu água yuvireco. Oyapisaca tupri iñehe rese yuvireco. Esepia, osepia mbahe sembiapo poromondiisa.

⁷ Iyavei setá ava carugar reecosar sui omose carugar. Osēse ava sui, sãse yuvireco. Iyavei setá ava nomii vahe, ndoguatai vahe avei ombogüera.

⁸ Evocoyase oviharete ahe tecua pipendar yuvireco.

⁹ Aheve rumo mbia, Simón serer vahe, yipive ipaye ai oico, ombosiquiye quíye ava Samaria pendar. “Che seco ivate vahe aico” ehi angahu ava mbopa.

¹⁰ Evocoyase opacatu ava, cuacua vahe iyavei chñhivahe catu vahe oyapisaca tupri iñehe rese, aipo ehi yuvireco: “Co niha Tüpa pĩratasa tuvicha vahe” ehi oyeupe yuvireco.

¹¹ Omboyeroya pucu ité yuvireco. Esepia, opayesa pipe ava ombosiquiye etepri oico yepi.

¹² Oyepotase rumo Felipe Samaria ve omombehu ñehesa aviye vahe Tüpa mborerecuasa resendar, Jesucristo recocuer resendar avei. Ahese ava rehii viroya yuvireco. Ipare oñeapiramo ité yuvireco cuimbahe, cuña avei.

¹³ Ahe Simón avei viroya. Oñeapiramo pare, oso Felipe rupi. Co mbahe poromondiisa iyavei Tüpa suindar ndayasepia vahe rese oyepihamondii.

¹⁴ Jerusalén ve apóstol yuvirecoi vahe oyandu Samaria ve setá ava oipisise Tüpa Ñhengagüer yuvireco. Evocoyase omondo aheve omboetasa Pedro iyavei Juan yuvireco.

¹⁵ Oyepotase aheve yuvireco, oyerure opacatu ava Jesús reroyasar rese ‘Espíritu Santo toipisi yuvireco’ oya.

¹⁶ Esepia, Espíritu Santo ndogüeyi vitei yuvireco sese; oñeapiramoño tēi vite yande Yar Jesús rer pipe yuvireco.

¹⁷ Pedro iyavei Juan oyerurese, omondo opo iharive yuvireco. Ahese Espíritu Santo ogüeyi yuvireco sese.

¹⁸ Ahe osepiase, Simón omondo pota guarepochi chupe,

¹⁹ aipo ehi:

—Cheu avei pemboumi tēi evocoi pīratasa, amondose che po que ava harive, togüeyi avei Espíritu Santo sese yuvireco —ehi Simón.

²⁰ Omboyeví rumo Simón upe:

—¡Tocañipa nde guarepochi nde reseve! Esepia, ndepihañemoñeta co Tüpa ombou vahe oreu, ererocua vaherã nde guarepochi pipe viña —ehi chupe—.

²¹ Ndeu ndiyai co nungar mbahe apo água. Esepia, nde pihañemoñetasa ndahei ihívi vahe Tüpa rovaque.

²² Sese epoi nde pihañemoñeta raisa sui, eyerure Tüpa upe. Aviyeteramo ñerora ndeu —ehi—.

²³ Aicua nde piha naporai vite iyavei nde pihañemoñeta raisa pipe vite ereico —ehi chupe.

²⁴ Evocoyase Simón omboyeví chupe:

—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

²⁵ Yande Yar ñehesa mombehu pare ahe tecua pendar upe, apóstol omombehu-mbehu co ñehesa písirosa resendar Samaria pipendar tecua rupi yuvireco. Êgüe ehi oyepota yuviroyevi Jerusalén ve yugüeru.

Felipe omombehu Jesucristo recocuer Etiopía pendar upe

²⁶ Ipare Tüpa rembiguai oyemboyecua Felipe upe aipo ehi chupe: “Epüha, eso irohi coti nde yepota água evocoi peri ogüeyi vahe oso Jerusalén sui, Gaza ve” ehi. Evocoi Gaza piar osasa ivi iporupirēhi rupi oso.

²⁷ Evocoyase opüha oso peri rupi. Aheve osovaichi ñepi ava, ahe seco ivate vahe guarepochi apocatusar Etiopía pendar cuña mborerecuar upe nara yepi, ahe mbia oso vahe Jerusalén ve Tüpa mboetei água.

²⁸ Oyevise ocãreto pipe, oyerocuqui Tüpa ñeha mombehusar Isaías rembicuachiagüer rese ou.

²⁹ Evocoyase Espíritu aipo ehi Felipe upe: “Eyemboya cãretomi rese” ehi.

³⁰ Evocoyase virovise ahe ava, osendu iyeroqui Isaías rembicuachiagüer pipe oĩ. Ahese oporandu chupe:

—¿Eresenducua aipo Tüpa Ñhengagüer nde yeroquisa eĩ? —ehi chupe.

³¹ Etiopía pendar mbia omboyeví chupe:

—¿Mara ahera vo che senducua viña ndipoise imombehu tuprisar cheu? —ehi chupe.

Ipare, “Erio, eyeupi, tereguapi cohava che piri” ehi Etiopía pendar chupe.

³² Ahe Isaías rembicuachía oyerogui vahe pipe aipo ehi:

“Inungar ava viraso ovesa yuca água, êgüe ehi avei ahe mbia seraso yuca água yuvireco.

Iyavei inungar ovesa nasasei eté guagüer rerocuase, êgüe ehi avei ahe mbia noñehi eté.

³³ Osecomomini yuvireco, ndipoi ava sepisar.

Ndipoi ichuindar.

Esepia, omocañi co ivi sui yuvireco” ehi Isaías rembicuachía pipe.

³⁴ Oyerogui pare ahe Etiopía pendar oporandu chupe:

—Emombehu mi cheu: ¿Ava rese pñha aipo Isaías oñehi: oyese ae pñha, ambuae ava rese tie? —ehi.

³⁵ Evocoyase co ñehesa sui omombehu ñehesa aviye vahe Jesús recocuer resendar Etiopía pendar upe.

³⁶ Ipare oguata catuse yuvireco, Etiopía pendar osepia i. Aheve ahe aipo ehi chupe:

—Esepia co i tui. ¿Ndiyai vo cohava che ãpiramomi tñi eve viña? —ehi.

³⁷ Ahese omboyevi chupe:

—Ereya itese opacatu nde pñha pipe, iya ité ndeu —ehi.

—Aroya ité niha Jesucristo ahe Tupa Rahir secoi —ehi.

³⁸ Evocoyase omombita uca ocãreto, ichui ogüeyi ive yuviraso. Aheve Etiopía pendar Felipe oñapiramo.

³⁹ Yuvínose i sui, yande Yar Espiritu viraso ahe Etiopía pendar sui. Aheve ndosepia iri; êgüe ehiño vorivete oso peri rupi.

⁴⁰ Felipe rumo oyemboyecua Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. Êgüe ehi oyepota Cesarea ve oso.

9

Saulo ñecuñaro agüer

¹ Jerusalén ve rumo Saulo oñemoiró iteanga vite yande Yar reroyasar upe oico. Oyucapa potaño ité. Sese oso pahi rerecuar ivate catu vahe upe,

² oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer Piasu rupi cuimbahe, cuña yuvirecoi vahe” ehi. “Taipiñipa seru cohava nde rer pipe” ehi, “evocoyase eremombehura cuachiar pipe Damasco pendar tupa ro rerecuar upe” ehi pahi rerecuar ivate catu vahe upe.

³ Êgüe ehi yuvínose Jerusalén sui, yuviraso Damasco ve ambuae ava reseve. Virovi potase rumo Damasco yuviraso, aviyeteramo tñi osesape guasu iva sui chupe.

⁴ Evocoyase oviapi oso ivive. Osendu iva pendar ñehesa aipo ehi vahe: “Saulo, Saulo, ¿mahera vo che moña-moña eve?” ehi chupe.

⁵ Evocoyase oporandu chupe: “¿Ava vo nde ereico, nde mbia?” ehi. “Che Jesús, che niha có che moña che rereco eve” ehi chupe.

⁶ “Epñha, eique Damasco ve. Aheve amombehu ucara mbahe nde rembiagua ndeu” ehi chupe.

⁷ Ava rumo, yuviraso vahe supi, osiquiyé iteanga osenduse ñehesa iva suindar yuvireco. Esepia, ndosepia eté ivate oñehi vahe yuvireco.

⁸ Ipare Saulo opñha, omahe tñi; ndoicatui rumo mbahe repia. Ichui supindar oipiñi iyiva rese seraso Damasco ve yuvireco.

⁹ Aheve mbosapí ari ndasesapísoi, ndocarui, ndoihui avei oico.

¹⁰ Aheve mbia Jesucristo reroyasar Ananías serer vahe secoi. Ahe iquer nungarve oyemboyecua yande Yar aipo ehi chupe: “¡Ananías!” ehi. “Co aico, che Yar” ehi imboyeve chupe.

¹¹ Evocoyase yande Yar aipo ehi chupe: “Epūha, eso calle Ihīvi serer vahe rupi. Eporandu Judas rētave Saulo, tecua Tarso pendar, rese. Ahe oyerocui cūritei.

¹² Oquerve angahu osepia mbia Ananías serer vahe omondose opo iharive omboesapíso iri” ehi.

¹³ Evocoyase omboyeve chupe: “¡Too! Che Yar, setá rumo evocoi mbia recocuer omombehu yuvireco cheu. Mbahe tēi oyapo vahe nde reroyasar reco maranehi upe Jerusalén ve.

¹⁴ Cūritei ou rutei ahe mbia pahi rerecuar porocuita rupi opacatu nde rer rese oyeroya vahe roquendapa āgua” ehi.

¹⁵ Yande Yar rumo aipo ehi chupe: “Eso. Esepia, aiporavo evocoi mbia che recocuer rese oñehe vahe rā ava ndahei vahe judío upe iyavei serecuar guasu yuvirecoi vahe upe, judío upe avei.

¹⁶ Che ae amboyecua setá mbahe tēi chupe oiporara vahe rā che remimbotar mboaviye āgua” ehi yande Yar chupe.

¹⁷ Evocoyase oso secosave. Oiquese ahe oi pīpe, oso, omondo opo Saulo rese aipo ehi chupe:

—Che rivri, Saulo, yande Yar Jesús oyemboyecua vahe ndeu peri rupi nde yuse, ahe che mbou ndeu nde mboesapíso iri āgua. Toique avei catu Espíritu Santo nde rese —ehi Saulo upe.

¹⁸ Ahese voi eté pira pírer nungar mbahe oviapipa sesa sui. Ahese voi sesapíso iri. Ichui opūha. Ipore voi Ananías oñapiramo.

¹⁹ Ipore Saulo ocaruse, ipírata catu iri. Moviro ari tēi opita iri Jesús reroyasar piri Damasco ve.

Saulo omombehu Jesús recocuer Damasco ve

²⁰ Ipore voi oso oñehe judío tūparo yacatu rupi Damasco ve aipo ehi: “Jesús Tūpa Rahir ité secoi” ehi ahe pendar ava upe.

²¹ Ava opacatu osendu vahe iñehe,

—¿Mara ehi pīha co? —ehi tēi yuvireco—. ¿Ndahei vo acoi co mbia Jerusalén ve Jesús reroyasar mara-mara tēi vireco vahe? ¿Ndahei vo acoi co avei ou cohava ava Jesús reroyasar ha pendar pisi āgua serasopa āgua avei Jerusalén ve pahi rerecuar upe viña? —ehi yuvireco chupe.

²² Saulo rumo omombehu tupri catu Jesús recocuer. Osecopi opacatu omu Damasco pendar. Omboyecua catu chupe Jesús Tūpa Rembiporavo ava pīsiro āgua secosa. Sese ndoicatui judío iñehe mboyeve yuvireco.

Saulo oñemi omu sui oamotarēhise

²³ Setá ari pare judío ahe pendar omboguai yuca āgua Saulo yuvireco viña.

²⁴ Ahe rumo oyandu omboguaisa judío osārose tecua āchisa roquendipive ari, pītu momba yuvireco yuca āgua viña.

²⁵ Jesús reroyasar rumo pītu pīpe tecua tapia āchisa oyere tupri vahe tecua rese, icupe rupi ombogüeyi iruova guasu pīpe imoñemi imondo yuvireco.

Saulo Jerusalén ve secoi

²⁶ Coiye Saulo oyepota Jerusalén ve. Aheve oyemboya pota tēi Jesucristo reroyasar rese. Osiquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tupri tēira yandeu” ehiño oyeupe yuvireco.

²⁷ Ipare rumo Bernabé viraso Saulo apóstol yuvirecoi vahe upe. Aheve Bernabé omombehupa chupe aipo ehi: “Co mbia Saulo osepia yande Yar peri rupi iyavei yande Yar oñehe chupe. Ichui co oñehe osiquiyeeñhisa pipe Damasco ve Jesús recocuer rese” ehi.

²⁸ Evocoyase Saulo opita aheve ipiri. Ari yacatu rupi apóstol rupi oguata yepi, iyavei omombehu yande Yar recocuer osiquiyeeñhisa ve.

²⁹ Oñehepoepi avei secocuer rese judío griego pipe oñehe vahe yuvireco. Ichui rumo oyuca potaño yuvireco.

³⁰ Oicuase rumo Jesucristo reroyasar yuvireco, viraso voi eté Saulo Cesarea ve. Ichui omondo Tarso ve yuvireco.

³¹ Evocoyase opacatu Jesús reroyasar yuvirecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemoviracua tupri catu yuvireco yande Yar mboeteisa pipe, Espíritu Santo oipítivii iyemboeta catu água yuvireco.

Eneas mbogüera agüer

³² Pedro oguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar.

³³ Aheve osepia mbia Eneas serer vahe, ahe ndoguatai vahe. Vupave tēi tui vahe ocho araviter rupi.

³⁴ Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoingatu nde rupa —ehi chupe.

Eneas evocoyase oñarapuha voi.

³⁵ Osepiase opacatu Lida pendar, Sarón pendar co ndoguatai vahecuer guatase, viroyapa voi eté yande Yar yuvireco.

Dorcas cuerayevi agüer

³⁶ Ahe araviter pipe Jope ve cuña Tabita serer vahe secoi, griego ñehe pipe rumo Dorcas serer. Ahe Jesucristo reroyasar secoi. Ahe secocuer aviye vahe oporopítivii yepi.

³⁷ Imbaheasi guasu rumo. Coiye omano. Ipare ava sehögüer oyosei yuvireco. Ichui viroyeupi oi ivate vahesave seraso yuvireco.

³⁸ Jope namombriimi Lida sui. Evocoyase oyanduse Jesús reroyasar Jope pendar Pedro Lida ve secoise, ahese omondo ñuvirio mbia seru poyava água Jope ve yuvireco.

³⁹ Evocoyase Pedro oso supi yuvireco oyepota yuviraso Jope ve. Aheve viroyeupi oi ivateve seraso tehögüersave yuvireco. Opacatu cuña imer mano vahecuer oyere ati voi, oyaseho Pedro ivii yuvireco. Omboyecua avei oturucuar ihari pendar reseve Dorcas rembiapogüer yuvireco chupe.

⁴⁰ Ipare Pedro omosepa rane opacatu ava ocarve. Ahese ahe ae oñenopiha, oyerure Tüpa upe. Ichui omahe ahe cuña omano vahe rese aipo ehi chupe: —¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oi.

⁴¹ Ahese oipisi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuerayevi” ehi chupe.

⁴² Serācua oyanduse opacatu Jope rupi yuvireco, setá ava yande Yar viroya yuvireco.

⁴³ Evocoyase Pedro opita setá ari aheve, mbia mbahe pিরer mopitasar, Simón serer vahe, piri.

10

Pedro iyavei Cornelio

1 Tecua Cesarea ve mbia Cornelio serer vahe secói, ahe cuartel Italiano serer vahe pendar cien sundao rerecuar.

2 Ahe mbia omboetei Tüpa opacatu guahir, güembireco reseve yepi. Iyavei omondoño ité judío pítiviñ água guarepochi, oyeróqui avei Tüpa upe yepi.

3 Ñepeí ari, caharuse las tres rupi, osepia oquer nungar pipe Tüpa rembiguai güecosave aipo ehi chupe: “¡Cornelio!” ehi.

4 Omahengatuse sese, “¿Mbahe, che Yar?” ehi osiquiyepave. Tüpa rembiguai rumo omboyeví chupe: “Tüpa oipisi nde yerüresa; osepia avei nde poroparaisuerecosa” ehi chupe.

5 “Émondo mbia Jope ve Simón reca. Ahe serer avei acói Pedro.

6 Ahe secói ambuae Simón, mbahe pírer mopítasar píri. Ahe sêta para guasu popíve chini” ehi chupe.

7 Osose Tüpa rembiguai ichui, Cornelio oñehe ñuvírío güembiguai upe iyavei ñepeí sundao Tüpa mboeteisar upe, sese acói oyeroya vahe yepi.

8 Opacatu Tüpa rembiguai ñehe mombehu pare, omondo Jope ve.

9 Ahere ayihive vírovise Jope yuvíraso, Pedro oyeupi oi ípe vahe haríve mbíter ari senise oyeróqui água.

10 Vieporêhise ocaru pota víña. Omoingatu víteseve rumo semihura yuvíreco, avíyeteramo tēi osepia mbahe oquer pendar nungar:

11 ahese osepia íva oyemboise, ahe ichui turucuar tuvicha vahe pipe ogüeyí mbahe, ñapíchimbri ípopi yacatu ou chupe.

12 Ahe turucuar pipe, osepia opacatu mahembiar vai, mboi, vírai vai tēi avei.

13 Ahese osendu ñehesa aipo ehi vahe: “Pedro, epūha, eyuca, ichui ehu” ehi chupe.

14 Pedro rumo omboyeví chupe: “Aní, che Yar, che rumo ndahui vahe ité co mbahe roho ava remimbotarêhi ndihusai vahe yepi” ehi chupe.

15 Osendu iri ñehesa aipo ehi vahe chupe: “Tüpa remimbotacupri upe, ‘Ava remimbotarêhi, ndihusai vahe’ nderei chira” ehi.

16 Ègüe ehi mbosapi oyupagüer rupi chupe. Ipáre turucuar oyeví ívave oso.

17 Pedro ípíhañemoñeta vítese mbahe osepia vahecuer rese oquer nungar pipe: “¿Mbahe rese píha co oyemboyecua cheu?” ehi vite oíco. Aheseve Cornelio remimondo oporandu-randu pare yuvíreco, oyepota Simón rēta roquendípíve yuvíreco.

18 Oñehe pucu oi pípendar upe yuvínoha: “¿Ave vo Simón, ahe Pedro serer vahe, secói?” ehi yuvíreco.

19 Ípíhañemoñeta víteseve Pedro mbahe oyemboyecua vahecuer rese, Espírítu Santo aipo ehi chupe: “Pedro, esendu rane, pe mbosapi mbia nde reca yuvíreco.

20 Eyemoingatu, egüeyi chupe, eso supi. ‘¿Asora píha?’ erei rene. Esepia, che ambou evocói mbia nde reca” ehi Espírítu Santo Pedro upe.

21 Evocoiyase ogüeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

22 Ahe evocoiyase omboyeví ñehe yuvíreco chupe:

—Ore oroyu sundao rerecuar Cornelio ore cuaisa pipe, ahe mbia seco ívi vahe, Tüpa mboeteisar opacatu judío osaisu, oípotá rai yuvíreco. Tüpa rembiguai oyocuai nde rese ereso vaheřá sêtave, ahe osendu vaheřá nde ñehesa —ehi yuvíreco Pedro upe.

²³ Evocoyase omoinguepa, omombitapa oyepiri ñepepi p̄itu. Ahere ayihive oso supi, moviro Jesús reroyasar Jope pendar yuviraso avei supi Cesarea ve yuvireco.

²⁴ Ahere ayihive oyepotase Cesarea ve, yuviraso s̄tave. Cornelio rumo os̄aro opacatu omu eta rese yuvireco iyavei omboriparete güembisoho reseve avei.

²⁵ Oyepotase s̄tave oso, Cornelio rane os̄e voi, osovāichi, oñenopiha sovai imboeteisa pipe.

²⁶ Pedro rumo aipo ehi chupe:

—Ep̄uha, che niha nde nungar avei aico —ehi chupe.

²⁷ Evocoyase ahe omoñeta seroi que seraso oi pipe. Aheve ava oñemonuha vahe setá osepiá yuvireco.

²⁸ Ahe ava upe aipo ehi:

—Pe peicua judío porocuaita aipo ehi vahe: “Peiquei rene ndahei vahe judío p̄iri. Aní chiveira pembori evocoi ava peico” ehi acoi —ehi Cornelio r̄eta pipendar upe—. T̄upa rumo omombehu cheu che quer nungar pipe: “‘Ava remimbotar̄ehi peico’ erei rene ambuae ava upe” ehi cheu.

²⁹ Pe pemondo ava che reca. Che evocoyase nacheat̄ehi che yu ãgua p̄eu. Sese che aicua pota, ¿mahera vo che reru uca peye? —ehi.

³⁰ Evocoyase Cornelio aipo ehi chupe:

—Opa co irungatu ari, caharuse co hora rupi tupri avei, che cohava che r̄etave aicose, ndacarui eté che yerure ãgua T̄upa upe. Aheseve oyemboyecua mbia T̄upa rembiguai iturucuar rendí iteanga vahe cheu.

³¹ Ahe aipo ehi cheu: “Cornelio, T̄upa osendu nde yeruresa iyavei oicua avei nde poroparisuerecosa.

³² Emondo nde rembiguai Johe ve Simón Pedro serer vahe reca. Ahe oicove ambuae Simón r̄etave, ahe mbahe p̄irer mopitasar. Ahe s̄eta para guasu popive chini” ehi cheu.

³³ Sese amondo voi eté nde reca ãgua. Aviye nde ereyu cohava. C̄uritei co opacatu yaico cohava T̄upa rovaque. Orosendu pota opacatu nde ñehe yande Yar nde cuai vahe nde ñehe ãgua oreu —ehi Cornelio chupe.

Pedro oñehe Cornelio r̄etave

³⁴ Evocoyase Pedro aipo ehi chupe:

—Aicua cute, supi eté T̄upa nombayahoi yande raisu.

³⁵ Sese ambuae ivi pipendar omboetei vahe T̄upa, oyapo vahe avei mbahe tupri yuvireco, ahe oipisira T̄upa.

³⁶ Aracahe T̄upa oñehe avei Israel suindar upe, omombehu ñehesa tupri yeamotar̄ehiñehisa resendar Jesucristo rembiaporã sui, ahe opacatu ava co ivi pipendar yuvirecoi vahe Yar.

³⁷ Pe peicua tupri ité co mbahe oime vahe opacatu judío ivi rupi. Ahe omboipi Galilea ve Juan ñeapiramosa mombehu pare.

³⁸ Peicua revo T̄upa omondo Jesús Nazaret pendar upe op̄iratasa, oEsp̄iritu Santo avei. Ipare Jesús oguata opacatu rupi mbahe tupri apo oico. Om-bogüera avei opacatu ava iparaisu vahe caruguar povrive yuvirecoi vahe. Esepia, T̄upa seci sese.

³⁹ Ore orosepia opacatu Jesús rembiapogüer Judea ivi rupi, tecua Jerusalén pipe avei. Aheve imu oyatica uca curusu rese yuca yuvireco.

⁴⁰ T̄upa rumo ombogüeraveyi imombosapisa ari pipe. Ipare omboyecua iri oreu.

⁴¹ Nomboyecuai rumo opacatu ava upe, omboyecua ore sembiporavo oroico vahe upeñomi. Ore p̄iri niha ocaru, oihu avei ocueraveyi pare.

⁴² Iyavei ahe ore cuai: “Pemombehu ava upe. Co che Jesucristo, Tūpa Rembiporavo, aico opacatu ava recocuer rese porandu āgua oicove vite vahe, omano vahe avei” ehi oreu.

⁴³ Ahe secocuer avei opacatu Tūpa ñehe mombehugar omombehu yuvireco aracahe aipo ehi: “Opacatu acoi seroyasar, ahe virecora Tūpa ñeroisa serer pipe angaipa rese yuvireco” ehi —ehi Pedro Cornelio rēta pipe yuvinoi vahe upe.

Espíritu Santo oique ava ndahei vahe judío pīha pipe

⁴⁴ Pedro oñehe viteseve, Espíritu Santo ogüeyi opacatu ava osendu vahe rese.

⁴⁵ “¡Too! Evocoyase ndahei vahe judío upe avei Tūpa omondo Espíritu Santo inungar ombou yandeu” ehi Jesús reroyasar judío yuvirecoi vahe Pedro rupi yugüeru vahe yuvireco.

⁴⁶ Esepia, osendu ahe oñehese ñehesa ndicuasai vahe pipe yuvireco Tūpa upe.

⁴⁷ Evocoyase aipo ehi vupindar upe:

—¿Oime pīha ndoipotai vahe co ava ñeapiramo āgua yande pāhu pendar? Esepia, co oipisi Espíritu Santo yuvireco inungar yande —ehi vupindar upe.

⁴⁸ Sese,

—Yañapiramopa Jesucristo rer pipe yuvireco —ehi.

Ipare Cornelio rēta pipe yuvinoi vahe aipo ehi: “Epita vitemi moviro ari ore piri” ehi yuvireco chupe.

11

Pedro remimombehu Jerusalén pendar Jesús reroyasar upe

¹ Evocoyase ambuae apóstol iyavei Jesús reroyasar Judea ve yuvirecoi vahe oyandu yuvireco ava ndahei vahe judío viroya avei Tūpa Ñhengagüer yuvireco.

² Oyevise rumo Pedro Jerusalén ve oso, ahese setá judío Jesucristo reroyasar viroiro sovai eté yuvireco,

³ aipo ehi:

—¡Mahera eresño tēi eté ndahei vahe judío piri! Iyavei nde erecaruño tēi eté ipāhuve yuvireco no —ehi yuvireco chupe.

⁴ Pedro rumo omombehu tupri yipisui opacatu mbahe güembiepia yuvireco chupe aipo ehi:

⁵ —Che, tecua Jope ve aicose, ayerure. Ahese che quer nungarve asepia turucuar tuvicha vahe nungar ipopi yacatu ñapichisa vahe ogüeyi ou che rovai iva sui.

⁶ Asepia ipipe opacatu mahembiar ihupirēhi, mbahe mimba, mboi, vīrai vai tēi avei —ehi—.

⁷ Iyavei ahese asendu ñehesa aipo ehi cheu: “Pedro, epūha, eyuca, ehu” ehi cheu.

⁸ Che rumo aipo ahe chupe: “Aní, che Yar, che rumo ndahui vahe ité co mbahe roho ava remimbotarēhi yepi” ahe chupe.

⁹ Ichui asendu iri ñehesa: “Tūpa remimbotatupri upe, ‘Ava remimbotarēhi’ erei rene” ehi cheu.

¹⁰ Egüe ehi mbosapi oyupagüer rupi cheu. Ipare opacatu oyevi iri ivave oso.

¹¹ Aheseve avei mbosapi mbia imboupri Cesarea sui oyepota yuvireco che recosave che reca.

¹² Espiritu Santo che cuai che so ãgua che atêhiêhisa pîpe supi yuvireco. Co seis mbia Tûpa reroyasar, yande mu, yuviraso avei che rupi. Ipare aheve oroyepotase oroso, oroique Cornelio rêtave.

¹³ Ahe omombehu oreu osepia vahecuer güetave Tûpa rembiguai oyemboycua vahe sovai iyavei aipo ehi vahe chupe: “Emondo mbia tecua Joje ve Simón Pedro reru ãgua.

¹⁴ Ahe omombehura ndeu nde ñepisiro ãgua iyavei opacatu nde rêta pendar ñepisiro ãgua avei” ehi Tûpa rembiguai Cornelio upe –ehi–.

¹⁵ Añehe ramoseve chupe, Espiritu Santo ou sese yuvireco inungar yande rese ou aracaco.

¹⁶ Evocoyase che chemahenduha voi eté yande Yar ñehengagüer rese aipo ehi vahecuer: “Supi eté i pîpe Juan oporoãpiramo, pe rumo Espiritu Santo pîpe peñeapiramora” ehi vahe.

¹⁷ Tûpa Espiritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Tûpa ayamotarêhira –ehi Pedro omu upe.

¹⁸ Osenduse rumo co Pedro ñehe, imu noñehe iri sese yuvireco. Ahe rumo, –¡Too, evocoyase Tûpa ombou avei ndahei vahe judío upe secocuer reñaño ãgua, tecovesa apirêhi vahe rereco ãgua! –ehi Tûpa mboeteisa pîpe yuvireco.

Ava Jesús reroyasar Antioquía ve

¹⁹ Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotarêhimbar oyamotarêhi catu yuvireco. Evocoyase amove Jesús reroyasar yuviraso oñemi Fenicia ve, ambuae Chipre ve, ambuae Antioquía ve. Oguatasa rupi omombehuño ité judío upe güeraño Jesús recocuer yuvireco.

²⁰ Amove oñemosai vahe Chipre pendar iyavei Cirene pendar oyepota tecua Antioquía ve yuvireco. Omombehu rumo ndahei vahe judío upe avei ñehesa aviye vahe yande Yar Jesús recocuer resendar yuvireco.

²¹ Yande Yar pîratasa vireco yuvireco. Evocoyase setá ava viroya; oseya ité yipîndar güembieroya yuvireco yande Yar reroya ãgua.

²² Serãcua oyepotase Jesús reroyasar upe Jerusalén ve, ahese omondo Bernabé yuvireco Antioquía ve.

²³ Oyepotase aheve, osepia Tûpa sovasase. Ahese sorivete aipo ehi chupe: “Peyemoviracua catu yande Yar rese. Peyapo semimbotar opacatu pe piha pîpe” ehi chupe yuvireco.

²⁴ Bernabé aviye etepri vahe, viroya ité Espiritu Santo iyavei oyeroya ité yande Yar rese. Evocoyase setá ava oyemboya yande Yar rese yuvireco.

²⁵ Ipare oso Tarso ve Saulo reca.

²⁶ Oyosuse, güeru Antioquía ve. Aheve oyemboya yuvireco ambuae viroya vahe rese imbohe ãgua ñepe araviter rupi. Setá ava oyembohe ipiri yuvireco. Ahese Jesús reroyasar Antioquía pendar upe yipîndar, “Cristo reroyasar” ehi yuvireco.

²⁷ Aheseve Tûpa ñehe mombehusar yugüeru Antioquía ve Jerusalén sui.

²⁸ Ñepe ipãhu pendar, Agabo serer vahe, opûha aipo ehi Espiritu Santo pîratasa pîpe chupe: “Oura tiavor guasu opacatu ivi rupi” ehi, (ahe tiavor oyepota mborerecuar guasu Claudio recose).

²⁹ Evocoyase Jesús reroyasar Antioquía pendar omondo pota voi guarepochi Jesús reroyasar Judea pendar pîtivii ãgua yuvireco ocatugüer rupi.

³⁰ Ëgüe ehi yande Yar reroyasar rãrosar Judea pendar upe porerecosa mondo. Bernabé, Saulo ahe porerecosa vïraso yuvireco.

12

Santiago mano agüer iyavei Pedro roquenda agüer

¹ Ahe araviter pipe avei mborerecuar guasu Herodes omboipi Jesús reroyasar mombaraisu.

² Ahese oyuca uca quise pucu pipe Santiago, ahe Juan riquehir.

³ Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi.

⁴ Pedro roquenda pare omondo irungatu imar sui irungatu-ngatu sundao omondo sãro ägua yuvireco. Mborerecuar ipihañemoñeta: “Opase co Pascua pieta, amboyecua ucara ava rovaque” ehi viña.

⁵ Evocoyase Pedro opita voquendasave sãrombri tupri chini. Jesús reroyasar rumo oyerocu pirata Tüpa upe yuvireco sese.

Tüpa omose uca Pedro soquendasa sui

⁶ Ahe ari vinose potase Herodes Pedro soquendasa sui, ahe pïtu pipe Pedro oque ñuvirío sundao guãrosar rese. Ñapichisa ñuvirío carena pipe ou, ñuvinohambe avei sãrosar soquendasa roquendipive.

⁷ Aviyeteramo tēi Tüpa rembiguai oyemboyecua ique viteseve chupe. Ahese sendi guasú iteanga soquendasa pipe. Ahe oñatoi Pedro iqueve imomahe: “¡Epüha poyava!” ehi chupe. Ipühase, opa voi oyerã carena ipo sui.

⁸ Ahese Tüpa rembiguai aipo ehi chupe: “Eyemonde, emonde nde pitaqui” ehi. Evocoyase Pedro omonde. Ipare aipo ehi iri: “Emonde avei nde yeoasa, eyu che raquicuei” ehi chupe.

⁹ Ëgüe ehi oso saquicuei. Ahe rumo ndoicuai Tüpa rembiguai oyeupe Ëgüe ehise. Ndoyavii iquerve tēi Ëgüe ehi vahe chupe.

¹⁰ Ichui yuvïnose, oñocua yipïndar guãrosar yuvireco. Ipare yuvïraso catumi ambuae imoñuvirïosa guãrosar oñocua avei. Oyepota oquenda guasu guarepochi apoprive ocarve yuvïnose ägua yuvireco. Ahe oquenda oyemboi ahe ae ité chupe yuvireco. Ipare yuvïnose yuvïraso pucumi ocarusu rupi. Aviyeteramo tēi Tüpa rembiguai ndoyecua iri chupe.

¹¹ Evocoyase Pedro aipo ehi oyeupe: “¡Too! Supi eté Tüpa ombou cheu güembiguai che renose ägua Herodes povri sui. Tüpa che pïsiro judío rerecuar che yuca rãgüer sui” ehi oyeupe.

¹² Oyese opihañemoñeta pare, oso, oyepota Juan Marcos si María rêtave oso. Aheve setã ava oñemonuha oyerocu yuvireco sese.

¹³ Oñehese Pedro oquenda ocar cotindarve, cuñatai, Rode serer vahe, osē imboi ägua chupe.

¹⁴ Osenduse rumo Pedro ñehe, oquenda omboi rãgüer sui, oña oique oi pipe vorivetesave, omombehu: “Pe Pedro ihãi oquendipive” ehi oi pipendar upe.

¹⁵ Ahe rumo,

—¿Nanderocoi vo eico? —ehiño yuvireco chupe. “¡Aní! Supi eté” ehiño Rode chupe.

—Ndahei ahe, Tüpa rembiguai mo aipo sãrosar —ehiño yuvireco chupe.

¹⁶ Aheseve Pedro oñehe viteño ité oquendipive ohã. Ichui omboise oquenda yuvireco chupe cute, oyembosiquiye iriño tēi sepiase yuvireco.

¹⁷ Pedro rumo opo omopuha imonguiriri āgua. Ichui opa omombehu yande Yar opĩsĩro agüer voquendasa sui chupe yuvireco. Ipare aipo ehi chupe:

—Pemombehupa Santiago upe iyavei ambuae Jesús reroyasar upe —ehi. Ichui oseño, ambuae oso.

¹⁸ Cõhese sundao oyepĩhamondii eteanga yuvireco. “¿Que pĩha Pedro?” ehi tẽi oyeupe yuvireco.

¹⁹ Ipare Herodes omondo sundao Pedro reca. Ndoyosui eté rumo yuvireco. Evocoyase Herodes porocuita rupi oporandu tupri sãrosar upe: “¿Que vo secõi?” ehi tẽi chupe. Sese oyocuai ambuae sundao opacatu ahe sãrosar yucapa āgua. Ipare Herodes osé Judea sui oso Cesarea ve oyemboerecua.

Herodes mano agüer

²⁰ Yipĩndar rumo Herodes ndasori eté ava Tiro pendar upe, Sidón pendar upe avei. Evocoyase ahe pendar oyoya ipiñañemoñeta yuviraso vaheerã mborerrecuar rovai. Ahe evocoyase oyembori Blasto rese yuvireco, ahe mborerrecuar Herodes mboyoyasar. Ahe oporandu Blasto upe Herodes moñero uca āgua rese yuvireco. Esepia, Herodes porocuita sui oipisi mbahe güemihura yuvireco.

²¹ Herodes evocoyase omombehu ari oñehe vaheerã chupe. Osupitise ahe ari, omonde sese iturucuar mborerrecuar secosa resendar yivirĩndar yuvireco. Ipare güenda imboeteipri harive oguapi oĩ. Aheve oñehe ava rehii upe.

²² Evocoyase ava rehii osapucui pĩrata yuvireco aipo ehi: “¡Co mbia oñehe vahe ndahei ava tẽi, Tũpa ité!” ehi yuvireco Herodes upe imboeteisave.

²³ Ava aipo iheseve voi, ñepei Tũpa rembiguai oyapo mbaherasi guasu chupe. Ichui mbahe rasoĩ ocaru yaviter rupi yuvireco. Esepia, nombotei eté Tũpa. Sese omano.

²⁴ Tũpa Ñehengagüer rumo imombehusa catu opacatu rupi.

²⁵ Iyavei Bernabé, Saulo ocuita mboaviye pare, viroyevi Juan Marcos seraso yuvireco.

13

Tũpa oiporavo Bernabé, Saulo oyeupe mboraviqui apo āgua

¹ Evocoyase Jesús reroyasar Antioquia pendar pãhuve oime Tũpa Ñehengagüer mombehusar, sese oporombohe vahe avei. Ahe Bernabé, Simón (chupe, “Avaũ” ehi yuvireco), Lucio evocoi Cirene pendar, Manaén (ahe mbia oyoya ocuacua mborerrecuar Herodes, Galilea pendar reseve) iyavei Saulo.

² Ñepei ari opacatu Jesús reroyasar oñemonuhase yande Yar mboetei āgua, oyecuacu avei, ahese Espĩritu Santo aipo ehi chupe: “Peiporavo Bernabé iyavei Saulo. Evocoi mbia aiporavo cheyeupe mboraviqui apo āgua” ehi Espĩritu Santo yuvireco chupe.

³ Evocoyase oyerõqui pare, omondo opo yuvireco iporavõpri ãca harive sovasa āgua. Ipare omondo yuvireco ambuae tecua rupi Jesús recocuer mombehu āgua.

Apóstol yuvirecoi Chipre rupi

⁴ Evocoyase Bernabé, Saulo Espĩritu Santo remimondo yuviraso Seleucia ve. Ichui yuviraso carite pipe caha pãhu Chipre ve.

⁵ Oyepota yemboyasa Salamina ve yuviraso. Aheve omombehu Tūpa Ñehengagüer judío tūparo rupi yuvireco. Juan avei oso supi ipitívii ãgua.

⁶ Opase ité oguata caha pãhu Chipre pīpe yuvireco, oyepota ambuae tecua Pafos serer vahesave yuviraso. Aheve judío ipaye vahe Barjesús serer vahe osepia yuvireco. Ahe oporombohe tēi: “Che añehe Tūpa Ñehengagüer rese” ehi tupri tēi vahe.

⁷ Ahe ipaye vahe oicove Chipre pendar mborerecuar Sergio Paulo serer vahe piri, ahe mborerecuar yaracua vahe. Ahe güeru uca Bernabé, Saulo avei Tūpa Ñehengagüer rendu potasave oyeupe.

⁸ Ipaye vahe rer griego ñehe pīpe Elimas. Ahe ndoviroya ucai güerecuar upe ñehesa supi eté vahe.

⁹ Evocoyase Saulo, Pablo serer vahe, vireco ité vahe Espíritu Santo opīha pīpe, omahe tupri sese.

¹⁰ Ipare aipo ehi chupe:

—¡Nde iporombopa serai vahe ereico! ¡Ndi pīhai vahe, Carugar rahir tēi ereico! Opacatu mbahe aviye vahe amotarēhisar tēi avei ereico no. ¡Mahera nderepoi potai yande Yar porombohesa supi eté vahe roerōrosa sui.

¹¹ Eyapisaca, cūrītei yande Yar nde mombaraisura. Nande mboesapīsoi chira moviro ari rupi. Ichui ndereicatu iri chietera ari rendigüer repia ãgua —ehi Pablo chupe.

Aipo ehi ramoseve voi, opacatu pītumimbi chupe. Oñehe tēi ava güeraso ãgua upe.

¹² Ahe mbahe repiase, mborerecuar viroya yande Yar. Oyepīhamondi porombohesa yande Yar resendar renduse.

Pablo, Bernabé reseve yuvirecoi Antioquía ve Pisidia ivi pīpe

¹³ Evocoyase Pablo, supindar avei, yuviraso carite pīpe Pafos sui Panfilia rupindar Perge ve. Juan rumo oseya oyevi Jerusalén ve oso.

¹⁴ Perge sui yuviraso Antioquía ve, ahe namombrii Pisidia sui. Aheve, mbituhusa ari pīpe, yuviroique judío tūparove oguapi yuvinoi.

¹⁵ Oyeroqui pare Tūpa porocuita resendar cuachiar pīpe, Tūpa ñehe mombehusar cuachiar pīpe avei, tūparo pendar rerecuar omondo oñehe Pablo upe:

—Ore mu, perecese mbahe pemombehu vahe rã co ava monguerēhi ãgua, pemombehumi yandeu cūrītei —ehi.

¹⁶ Evocoyase Pablo opūha ohã. Omopuha avei opo ‘toyapisaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tūpa mboeteisar, pensendu che ñehe —ehi—.

¹⁷ Israel iguar Tūpa oiporavo yande ramoi oyeupe nara, ahe Egipto ivi pīpe omboeta secua ambuae vahe secosa pīpe. Ipare opīratasa pīpe vīnosepa ahe ivi sui aracahe.

¹⁸ Ipare Tūpa oñemosañe yande ramoi reco ai upe cuarenta aravīter rupi, oguatase yuvireco ivi iporupirēhisa rupi.

¹⁹ Ipare omocañi ava eta Canaán pīpendar siete tupri yuvirecoi vahe serecuar reseve-seve. Ipare omondo Canaán ivi yande ramoi upe nara.

²⁰ Ēgüe ehi cuatrocientos cincuenta aravīter rupi yapo yuvireco —ehi.

“Ipare Tūpa ombou ava recocuer moingatusar oporocuai vahe rã. Ipa vahe ipãhu pendar serer Samuel aracahe. Ahe Tūpa ñehe mombehusar avei.

²¹ Ahese yande ramoi eta oporandu yuvireco Tūpa upe mborerecuar guasu rese. Evocoyase Tūpa omondo Saúl chupe, ahe Cis rahir, ahe yande ramoi Benjamín suindar secoi. Oporocuai cuarenta araviter rupi oico.

²² Ipare Tūpa virocuva imborerecuasa ichui; omondo David upe yande ramoi cuai āgua. Ahe secocuer rese aipo ehi: ‘Co David, Isaí rahir, oyapo che remimbotar yepi. Ahe omboaviyera che porocuaita’ ehi Tūpa.

²³ Ahe David suindar sui, Tūpa ombou Jesús Israel iguar pīsīro āgua. Aracaheve Tūpa omombehu co yande ramoi upe.

²⁴ Yande Yar yu renondeve, Juan omombehu opacatu Israel iguar upe: ‘Pemboasi pe angaipa, peyevi Tūpa upe pe ñeapiramo āgua’ ehi chupe.

²⁵ Juan omboaviye senimise ocuaita, aipo ehi ava upe imombehu: ‘Pepihañemoñeta revo: co ité yande pīsīrora, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipitaquisā yora āgua ipi sui’ ehi Juan” ehi judío tūparo pendar upe imombehu.

²⁶ “Che mu eta, pe Abraham suindar iyavei ndahei vahe Abraham suindar Tūpa mboeteisar, opacatu yandeu nara ombou Tūpa co ñehesa pīsīrosa resendar.

²⁷ Jerusalén pendar rerecuar avei ndoicuai evocoi Jesús Tūpa remimbou secoise yuvireco. Iyavei ndosenducuai Tūpa ñehhe mombehusar cuachiar pipe oyeroquise mbītuhusa ari yacatu yuvireco. Ichui ahe ae oyuca uca yuvireco. Ēgüe ehi imboaviye Jesús rese Tūpa ñehhe mombehusar rembicuachiagüer pipendar yuvireco.

²⁸ Yepe ndoyosui mbahe sembiapo rai yuca uca āgua yuvireco viña, ahe rumo oporanduño Pilato upe yuca uca āgua rese yuvireco” ehi.

²⁹ “Ichui omboaviyese opacatu icuachiapri pipendar yuvireco, ovīroyi uca curusu sui ñoti āgua yuvireco.

³⁰ Tūpa rumo ombogüerayevi iri.

³¹ Setá ari rupi oyemboyecua oyeupi oguata vahe upe, evocoi ava yugüeru vahe supi Galilea sui, Jerusalén ve. Cūrīte ahe ava ité omombehu Jesús recocuer ava upe yuvireco” ehi tūparo pendar upe.

³² “Sese che mu eta, cūrīte oromombehu pēu evocoi ñehesa aviye vahe Tūpa omondo vahe yande ramoi upe aracahe.

³³ Tūpa omboaviye ramo güemimombegüer yande Israel suindar yaico vahe upe, ombogüerayevise Jesús. Evocoi güemimombehu oicuachía uca Salmo moñuvīrosos pipe aipo ehi: ‘Co pipe nde che Rahir ereico; che nde Ru aico’ ehi Tūpa chupe.

³⁴ Tūpa omombehu avei güemimbogüerayevi sete tuyuēhi āgua icuachiapri pipe aracahe aipo ehi: ‘Che niha oroovasara acoi David upe che ñehhe maranehi supi tupri vahe mboaviye āgua’ ehi.

³⁵ Sese omombehu avei ambuae icuachiapri pipe: ‘Nde, Tūpa, ndereseyai chira nde rembiguai Ava seco maranehi vahe reté ituyupa āgua’ ehi.

³⁶ Supi eté, David omboaviye ocuaita ava rese ohañecosa pipe yepi. Ipare omano. Evocoyase oyapocatu tuvīpave imu pāhuve yuvireco. Ahe setecuer rumo opaño ité ituyu” ehi.

³⁷ “Acoi Tūpa ombogüerayevi vahe retecuer rumo ndituyui eté” ehi tūparo pendar upe imombehu.

³⁸ “Sese, che mu eta, peyapisaca, tapeicua evocoi Jesús recocuer sui oime ñeroisa angaipa rese yandeu. Ahe co amombehumī pēu. Moisés porocuaita sui ndipoi ñeroisa angaipa rese yande reco mohīvi āgua.

³⁹ Jesús recocuer sui rumo oime ñeroisa ñepeī-peī viroya vahe upe” ehi.

40 “Peicua catu co mbahe sui, toviapi eme pe harive acoi Tūpa ñehe mombehusar rembicuachiagüer pipe aipo ehi vahe:

41 ‘Esepia, pe seroïrosar peico vahe. Peyepihamondii, ipare pecañi tẽira. Esepia, che ayapora mbahe pe recoveseve. Yepe ambuae omombehu tupri itera pẽu che rembiaporã viña, pe rumo ndaperoyai chietera’ ehi Tūpa” ehi Pablo tũparo pendar upe.

42 Yuvinosose potase tũparo sui, omombita Pablo yuvireco: “Teremombehu irimi eromombehu vahe ñehesa ambuae mbituhusa ari pipe oreu” ehi yuvireco chupe.

43 Yuvinosese ava rehii tũparo sui, setami judío iyavei ambuae oyembojudío vahe yuviraso Pablo, Bernabé rupi yuvireco. Ahese, “Peico tupri catu Tūpa pe rovasasa pipe” ehi ava upe yuvireco.

44 Ambuae mbituhusa ari pipe seni opacatu ava ahe pendar oñemonuha yuvireco Tūpa Ñehengagüer rendu ãgua.

45 Osepiase ava rehii, judío rerecuar oñemoiró iteanga Pablo upe, supindar upe avei yuvireco. Viroiro Pablo ñehe ava upe yuvireco.

46 Evocoyase Pablo, Bernabé reseve oñehe yuvireco judío upe osiquiyeeñisave:

—Tūpa ore cuai pẽu rane ore ñehe ãgua. Pe rumo ndapeyapisaca potai ñehengagüer rese. Ipape sui ndiyai peipisi tecovesa apirẽhi vahe. Evocoyase orosora, oroñehe ava ndahei vahe judío upe.

47 Esepia, yande Yar ombou ore cuaitarã co ñehesa rese aracahendar aipo ehi vahe:

‘Che oroporavo tataendi nungar nde reco ãgua ndahei vahe judío yuvirecoi vahe upe pisirosa reroguata ãgua opacatu ivi rupi’ ehi.

48 Ava ndahei vahe judío osenduse co ñehesa, oviharete yuvireco, omboetei avei Tūpa Ñehengagüer. Opacatu ava iporavopri tecovesa apirẽhi vahe pisi ãgua, ahe viroya yuvireco.

49 Evocoyase Tūpa Ñehengagüer omombehu opacatu ahe ivi rupi yuvireco.

50 Judío rumo omonguerẽhi cuña imboyeroyapri Tūpa mboeteisar iyavei mbia seco ivate vahe Pablo, Bernabé mose uca ãgua güecua sui yuvireco yamotarẽhisave.

51 Ahese Pablo, Bernabé oipipete opitaqui ivi sui yuvireco ‘Tūpa toicua mbahe sembiapo ai rese yuvireco chupe’ oya. Ichui yuviraso Iconio ve.

52 Jesús reroyasar rumo oviharete yuvireco, vireco ité Espiritu Santo oyese yuvireco.

14

Pablo, Bernabé reseve omombehu Tūpa Ñehengagüer Iconio ve yuvireco

1 Pablo, Bernabé oyepota Iconio ve yuviraso. Aheve yuviroique judío tũparo pipe, omombehu tupri yande Yar recocuer yuvireco. Sese setã va viroya ñehesa yuvireco judío, ndahei vahe avei judío.

2 Judío ndoviroyai vahe rumo oipihañemoñeta rerova yuvireco ava ndahei vahe judío Pablo, Bernabé iyavei ambuae Jesús reroyasar amotarẽhi ãgua.

3 Ahe rumo opita pucu yuvireco Iconio ve, omombehuño yande Yar recocuer osiquiyeeñisave yuvireco. Aheve Tūpa ombou opiratasa mbahe yavai vahe apo ãgua chupe ‘ichui toicua yuvireco Pablo, Bernabé che poroaisusa mombehuse’ oyapave.

⁴ Ahe tecua pendar rumo ipihañemoñeta yoivi yuvireco: ñepei judío pihañemoñetasa rupindar; ambuae evocoyase apóstol pihañemoñetasa rupindar yuvireco.

⁵ Oime judío iyavei ndahei vahe judío oyemboyoya mborerecuar rese mara-mara tēi sereco āgua yuvireco, “Ita pipe avei yayapi-yapi” ehi yuvireco chupe viña.

⁶ Oyanduse rumo yuvireco, oñemi voi yuviraso Licaonia rupi, Listra ve, Derbe ve, ipopi rupi avei.

⁷ Supi omombehu ñehesa aviye vahe Jesús resendar yuvireco.

Pablo yapi-yapisa ita pipe Listra ve

⁸ Listra ve yuvirecoise, oime mbia oha ramomi suive ndoguatai vahe. Ahe mbia oguapi oĩ

⁹ oyapisaca Pablo ñehe rese. Ahese Pablo omahengatuse sese, oicua ndoguatai vahe oyeroya ité Tūpa rese ocuera āgua.

¹⁰ Evocoyase aipo ehi pĩrata chupe:

—¡Epūha! —ehi.

Ahese opo, opūha, uguata voi.

¹¹ Osepiase ava rehii mbahe sembiapo yuvireco, osapucaí pĩrata Licaonia ñehe pipe yuvireco:

—¡Tūpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

¹² Ipihañemoñeta yuvireco Bernabé ahe tūpa Zeus iyavei Pablo ahe tūpa Hermes viña. Esepia, Pablo oñehe vahe.

¹³ Ahese co tūpa Zeus pahi güeru tivi, mbahe potri avei. Ahe tecua tapia roquendave, ahé Zeus tūparo tecua pipe ava reiquesa rupi chiní. Oyuca pota tivi Pablo, Bernabé mboetei āgua yuvireco viña.

¹⁴ Oicuae rumo Bernabé, Pablo, ahese omondoro oturucuar yuvinoña ava pāhuve; oñehe pĩrata yuvireco:

¹⁵ —Mbia, ¿mahera ěgüe peye oreu? —ehi—. Ore rumo ava tēi pe nungar avei oroico. Oromombehu: “Pepoi co mbahe ěgüe ehi tēi vahe mboeteisa sui; peroya Tūpa supi eté vahe” orohe pēu. Ahe oyapo vahe iva, ivi, para guasu, opacatu ipor reseve.

¹⁶ Aracahe rumo Tūpa, “Ěgüe tehi uguata ndahei vahe judío opihañemoñetasa rupi yuvireco” ehi viña.

¹⁷ Tūpa rumo ndasesarai ava upe mbahe tupri apo āgua sui. Ahe ombou amar pēu mbahe miti ha aviye āgua yepi. Ěgüe ehi mbahe tembihu imbou iyavei viharetasa pēu —ehi ava upe yuvireco.

¹⁸ Yepe aipo omombehu yuvireco chupe, ava rehii rumo seniño ité tivi oyuca yuvireco chupe imboetei āgua viña.

¹⁹ Ahese oyepota moviro judío Antioquía sui, Iconio sui avei. Oipihañemoñeta rorova ava rehii yuvireco. Ichui oyapi-yapi ita pipe Pablo yuvireco. Ipare ombotiriri seraso yuvireco tecua ivii. Ipihañemoñeta: “Yayuca ité” ehi yuvireco chupe viña.

²⁰ Oyere tupri Pablo rese Jesús reroyasar yuvireco. Ahe rumo oñarapuha, oique iri oso tecua pipe. Ahere ayihive yuvinoise oyevi yuviraso Bernabé reseve Derbe ve.

²¹ Omombehu tuprise co ñehesa icatupri vahe Derbe rupi, setá ava viroya yande Yar yuvireco. Ipare oyevi yugüeru Listra rupi, Iconio rupi avei, oyepota Antioquía ve yuvireco.

²² Ahe supí omonguerēhi catu opacatu Jesús reroyasar yuvireco, aipo ehi imombehu: “Yepe ava yande mombaraisura yuvireco viña, yaroyaño itera rumo Jesucristo. Sese peseya eme ité seroyasa. Yandeu aviye catu ité mbahe-mbahe tēi pipe yande recose Tūpa mborerecuasave yande reique āgua” ehi yuvireco Jesús reroyasar upe.

²³ Ipare oiporavo ava Jesús reroyasar rāro āgua ñepei-peí ñemonuhasa rupi. Oyeroquí iyavei oyecuacu. Ipare viropovēhe yande Yar upe iporaviquí āgua yuvireco.

Pablo, Bernabé oyeví yuvireco Antioquía ve Siria ivi rese

²⁴ Ipare yuviraso Pisidia rupi, oyepota Panfilia ivi rese.

²⁵ Omombehu Tūpa Ñehengagüer yuvireco Perge ve. Ipare yuviraso Atalia ve.

²⁶ Ahe ichui yuviraso carite pipe Antioquía ve, ahe tecua pipe yipindar imondopri Tūpa upe sovasapri yuvirecoi mboraviquí apo āgua. Aheve tupri avei imboaviye pare oyeví yuvireco.

²⁷ Oyepotase Antioquía ve yugüeru, omonuha opacatu Jesús reroyasar yuvireco. Aheve omombehu opacatu Tūpa mbahe oyapo vahe oyese yuvireco iyavei aipo ehi: “Yande Yar ombou avei ava ndahei vahe judío upe Guahir reroya āgua yuvireco” ehi yuvireco omboetas upe.

²⁸ Aheve Pablo, Bernabé opita pucu yuvireco ipiri.

15

Jesús reroyasar oñemonuha Jerusalén ve yuvireco

¹ Evocoiyase moviro mbia Jesús reroyasar judío yugüeru Judea sui Antioquía ve. Ahe ombohe Jesús reroyasar yuvireco aipo ehi: “Aracahe Tūpa oyocuai Moisés yande ramoí cuai āgua: ‘Pembocircuncida opacatu pe mu cuimbahe cheu nara’ ehi Tūpa aracahe” ehi yuvireco. “Cūritei acoi ēgüe ndapeyese Jesús reroyasar upe, noñepisiroi chietera yuvireco” ehi Antioquía pendar upe yuvireco.

² Pablo, Bernabé reseve rumo oñehe pīrata yuvireco chupe. Noinin-gatu catuise rumo mbahe yuvireco, ahese Jesús reroyasar omondo Pablo, Bernabé iyavei ambuae omboetas Jerusalén ve apóstol upe iyavei Jesús reroyasar rārosar upe aipo mbahe moingatu āgua yuvireco.

³ Ēgüe ehi Jesús reroyasar Antioquía pendar yocuai imondo yuvireco. Oñocuaase Fenicia, Samaria avei yuviraso, oguataasa rupi omombehu-mbehu Jesús reroyasar upe ndahei vahe judío recocuer yuvireco aipo ehi: “Setá ava ndahei vahe judío opa oseya arachendar aracuasa Tūpa rupi oguata āgua yuvireco” ehi. Ahese opacatu Jesús reroyasar oyembovīharete yuvireco senduse.

⁴ Yuviroyepotase Jerusalén ve, apóstol, Jesús reroyasar rārosar iyavei ambuae Jesús reroyasareta oipisi tupri yuvireco. Aheve omombehu Tūpa mbahe oyapo vahe oyese yuvireco.

⁵ Osenduse rumo, moviro Jesús reroyasar fariseo opūha voi aipo ehi yuvireco chupe:

—Aní —ehi—. Pembocircuncida rane ité catu opacatu Jesús reroyasar ndahei vahe judío —ehi yuvireco—. Peyocuai avei opacatu ambuae Moisés porocuaita mboaviye āgua yuvireco —ehiño ité yuvireco.

⁶ Ahese apóstol, Jesús reroyasar rārosar avei oñemonuha oyemomborandu āgua aipo mbahe rese yuvireco.

⁷ Yemomborandu viteseve, Pedro opūha ipāhuve aipo ehi:

—Che mu, peicua niha aracaco Tūpa che poravo pe pāhu sui co ñehesa poropīsirosa resendar mombehu āgua ava ndahei vahe judío upe ‘toviroya yuvireco’ oyapave.

⁸ Tūpa oicua ité opacatu ava pihañemoñetasa. Chupe avei omondo Espiritu Santo inungar yandeu. Ipipe sui yaicua Tūpa oipisi avei ahe ava oyeupe nara —ehi—.

⁹ Evocoyase, “Judío aviye catu vahe ava ndahei vahe judío sui” ndehi Tūpa. Esepia, opacatu oyoya pāve Tūpa upe yaico. Sese omoatiro ipihañemoñeta rai sui oyese yeroyasa pipe.

¹⁰ ¡Pe tie pesecoña pota Tūpa! ¡Mahera peyocuai uca pota co Jesús reroyasar mbahe yavai rai vahe apo āgua! Aní rumo. Esepia, yande ramoi ndoicatu Tūpa porocuita mboaviye āgua yuvireco, yande avei ěgüe yahe —ehi—.

¹¹ Co rumo, yaroyase yande Yar Jesucristo, yande pīsirora oporoaisusa pipe, inungar co ava ndahei vahe judío yuvirecoi —ehi Pedro.

¹² Evocoyase opacatu oyemonguiriri yuvireco, osendu Bernabé, Pablo ñehesa, mbahe sembiapo avei yuvireco. Evocoyase omombehu ndayasepiai vahe poromondiisa Tūpa oyapo uca ava ndahei vahe judío pāhuve yuvireco chupe.

¹³ Osendupase iñehe yuvireco, ahese Santiago aipo ehi:

—Che mu, Jesús reroyasar, peyapisacami che ñehe rese:

¹⁴ Simón omombehu yandeu Tūpa osaisu avei ava ndahei vahe judío. Sese oiporavo ahe ava oyeupe nara —ehi—.

¹⁵ Oyoya tupri Tūpa ñehe mombehusar rembicuachiagüer rese. Ñepe ipāhu pendar oicuachía aracahe aipo ehi:

¹⁶ ‘Coiyé catu ayevira vitu. Ahese ayapo piasu irira che rēta David oyapo uca vahecuer, ahe oi imocañipirer. Ambopiasu irira oitipa vahecuer yuvireco.

¹⁷ ěgüe ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ipehapri reseve.

¹⁸ Evocoi yande Yar rembiaporā icuapri aracahe suive’ ehi Tūpa ñehe mombehusar aracahe.

¹⁹ “Sese chepihñemoñeta iya ndayayocuai chira Moisés porocuita rupi oñecuñaro vahe rā ndahei vahe judío Tūpa rupi oguata āgua yuvireco” ehi.

²⁰ “Aviye rumo yaicuachiasé chupe co mbahe resendar güeraño: Pehui rene mbahe mimba yucapri mbahe rahanga tēi upe seropovēhepri iyavei ndapeguasai chira, pehui rene mbahe mimba yucapri suvi renosepirēhi, mbahe ruvi avei” ehi.

²¹ “Esepia, opacatu tecua rupi yuvirecoi ava omombehu vahe Moisés porocuita ñepe-pe mbituhusa ari pipe judío tūparo pipe aracahe suive. Aipo rupive” ehi Santiago.

Icuachiapri ndahei vahe judío upe nara

²² Ahese apóstol, Jesús reroyasar rārosar, ambuae Jesús reroyasar avei omondo pota opāhu pendar Pablo, Bernabé rupi Antioquía ve yuvireco. Oiporavo yuvireco ñuvirio mbia, ahe Judas Barsabás iyavei Silas. Ahe imboyeroyapri omboetasa pāhuve yuvireco.

²³ Ahe supi aipo ehi icuachía imondo yuvireco:

“Ore apóstol, Jesús reroyasar rārosar, pe mboetasa oroico vahe. Pe mboaviravesal, ndapemarai revo pe ndahei vahe judío Antioquía pendar, Siria pendar, Cilicia pendar avei.

²⁴ Oroyandu amove ava ore pãhu pendar pe mañeco tẽi aipo oporombohesa pipe yuvireco. Ahe ava ndahei ore ocuaita pipe yuviraso pẽu pe pihañemoñeta rerova.

²⁵ Sese oyoya orepihañemoñeta oroiporavo ñuvirio mbia ore rembiaisu ore rivri Bernabé, Pablo rupi imondo eipeve pẽu.

²⁶ Ahe acoi oyemondo vahe mbahe-mbahe tẽi povrive yande Yar Jesucristo recocuer rese yuvireco.

²⁷ Oromondo Judas, Silas avei pẽu: ahe teieté omombehura opacatu cuachiar pipendar pẽu yuvireco.

²⁸ Aviye Espiritu Santo upe, oreu avei co porocuita güeraño oromondo vahe rese pẽu. Ndape cuaisa pota iri rumo ambuae mborocuita rese.

²⁹ Pehui rene mbahe mimba yucapri seropovëhepri mbahe rahanga tẽi upendar, ndapehui chiaveira mbahe ruvi, mbahe mimba yucapri suvi renosepirẽhi vahe iyavei ndapeaguasai chira. Pepoise evocoi mbahe naporai vahe sui, oimera mbahe tupri pẽu. Aipo rupive. Peico tupri” ehi.

³⁰ “Aviye” ohe pare, yuviraso, oyepota Antioquia ve. Aheve opase omonuha Jesús reroyasar yuvirecoi vahe omondo cuachiar yuvireco chupe.

³¹ Ahe cuachiar rese oyeroquise, oyembovïharete yuvireco.

³² Judas, Silas Tũpa suindar ñehesa mombehusar avei yuvirecoi. Sese ombovïharete catu iyavei omonguerẽhi catu avei ahe ava yuvireco oñehe pipe.

³³ Opitase moviro ari aheve, Jesús reroyasar Antioquia pendar aipo ehi: “Aviye. Peyevi tupri pe mbousar upe” ehi yuvireco chupe.

³⁴ Silas rumo opita potaño ité aheve.

³⁵ Pablo, Bernabé avei opita viteño ité aheve yuvireco, ahe setá ambuae Jesús reroyasar reseve imbohe vite ãgua yande Yar resendar ñehesa rese yuvireco.

Imoñuviriosa Pablo guata agüer Jesús recocuer mombehu ãgua

³⁶ Coiye Pablo aipo ehi Bernabé upe:

—Yaso, yasepia iri Jesús reroyasar opacatu yande Yar ñehengagüer yamombehu vahecuer rupi, ¿mara ehi pïha ahe yuvireco? —ehi.

³⁷ Ahese Bernabé viraso pota Juan Marcos oyeupi viña.

³⁸ Nomboyoyai rumo Pablo ipihañemoñeta rese. Esepia, cuese Juan Marcos oseyano oyepotase yuvireco Panfilia ve. “Taipitiviiño iporaviquisa rese” ndehi chupe.

³⁹ Nomoingatuisse mbahe oyeupe yuvireco, oyepepiño yuvireco oyesui. Ahese Bernabé viraso Marcos oyeupi carite pipe Chipre ve.

⁴⁰ Pablo rumo oiporavo Silas oyeupi icho ãgua. Yuvinose ãgua Antioquia sui, Jesús reroyasar ahe pendar aipo ehi yuvireco chupe: “Tape rovasa Tũpa oporoaisusa pipe” ehi yuvireco imondo.

⁴¹ Ipare yuviraso Siria, Cilicia rupi Jesús reroyasar monguerẽhi catu ãgua yuvireco.

16

Timoteo oso Silas ndugüerã Pablo rupi

¹ Pablo ondugüer reseve yuviraso Derbe ve, Listra ve avei. Aheve osepia Jesús reroyasar, Timoteo serer vahe, judía, Jesús reroyasar membri. Iyesupa rumo griego.

² “Evocoi Timoteo aviye etepri” ehi Jesús reroyasar Listra pendar, Iconio pendar avei yuvireco chupe.

³ Pablo viroguata potaño ité Timoteo oyeupi. Sese seroguata renondeve, ombocircuncida uca seroïroëhi ägua judío yuvirecoi vahe upe. Esepia, opacatu oïcua Timoteo ru griego secose yuvireco.

⁴ Evocoyase opacatu tecua iguatagüer rupi omombehu ahe mborocuaita apóstol, Jesús reroyasar rãrosar Jerusalén pendar ombou vahe yuvireco chupe.

⁵ Sese Jesús reroyasar ahe tecua rupindar oyemoviracua catu yuvireco Jesús reroyasa pipe iyavei oyemboeta catu yuvireco ari rupi.

Tüpa omondo uca Pablo Macedonia ve iquer nungar pipe

⁶ Espíritu Santo ndoipotai Asia rupi yuviraso vahe rä Tüpa Ñehengagüer mombehu ägua. Sese oyahuva yuviraso Frigia rupi, Galacia rupi avei.

⁷ Ëgüe ehi oyepota Misia popive yuvireco. Ichui yuviraso pota tēi Bitinia ve. Jesús Espíritu rumo ndoipotai icho ägua supi.

⁸ Ahese osasaviño yuviraso Misia sui carite guasu yemboyasa Troas ve oyepota ägua yuvireco.

⁹ Oyepotase aheve, ahe pĩtu pipe Pablo oquer nungar pipe osepia mbia, Macedonia pendar, “Ereyumira Macedonia ve ore pĩtivii ägua viña” ehi ohã chupe.

¹⁰ Ipare ore oroyemoingatu voi eté Macedonia ve ore so ägua. Esepia, ore oroicua ité Tüpa aheve ore mondora ñehesa pĩsirosa resendar mombehu ägua.

Pablo, Silas Filipino ve yuvirecoi

¹¹ Oroso carite pipe Troas sui oromohiviño voi oroso evocoi ivi para guasu Samotracia ve. Ahere ayihive oroyepota Neápolis ve.

¹² Ichui oroso ivi rupi Filipos ve, ahe tecua seroyapri catu vahe ambuae tecua sui, ahe ivi Macedonia rupindar. Aheve Roma iguar oyeyecuai, oyocuai avei opacatu tecua ivirindar ava yuvireco. Aheve moviro ari tēi oroico.

¹³ Mbituhusa ari pipe orosé evocoi tecua sui iai popive. “Aheve oñemonuhara judío oyerocuqui ägua” orohe. Aheseve cuña oñemonuha yugüeru. Aheve oroyepota chupe, oroguapi ipãhuve. Ipare oromombehu co ñehesa pĩsirosa resendar yuvireco chupe.

¹⁴ Ñepeï imboetasa, Lidia serer vahe, Tiatira pendar, oyapisaca ore ñehe rese oi. Ahe Tüpa mboeteisar secoi, turucuar suendi vahe mbovendesar avei secoi. Yande Yar omohivi ipihañemoñetasa iyapisaca ägua Pablo remimombehu rese.

¹⁵ Sese ñapiramosa, opacatu sēta pendar reseve. Ipare ore mombita pota güëtave.

—Che reroyase peye yande Yar reroyasar che recose, pepitara che rētave —ehi oreu.

Ëgüe ehi ore monguerēhi. Sese oropita sētave ipiri.

¹⁶ Ipare ambuae ari oroso irise oroyeroqui ägua, cuñatai ore rovañchi, ahe cuñatai carugar pĩratasa pipe mbahe mombehusar. Oicatu ava upe mbahe oime vahe rä mombehu. Omombehuse mbahe, setá oipisi sepri guarepochi güerecuar yuvirecoi vahe upe nara yepi.

¹⁷ Ahe cuñatai ou ore raquicuei,

—¡Co ava Tüpa ivate catu vahe upendar oporaviqui yuvireco omombehu: “Na ehira Tüpa yande pĩsiro” ehi yuvireco! —ehi pucu-pucu ore mombehu ava upe.

18 Setá ari ěgüie ehi oico oreu. Omañeco tēise rumo Pablo, oyemboyere chupe cute, aipo ehi icarugar upe:

—Che orocuai Jesucristo rer pipe: esē co cuñatai sui —ehi.

Aheseve voi carugar osē ichui.

19 Evocoiyase cuñatai rerecar oyanduse, “Ndoipisi uca iri chira guarepochi yandeu” ehi yuvireco. Imboasipave oipisi Pablo, Silas mborerecar upe ocarusuve seraso yuvireco.

20 Ipare mborerecar yuvirecoi vahe upe aipo ehi yuvireco:

—Co ñuvirío mbia orogüeru vahe peu, judío tēi yuvirecoi. Ayeve omboaivu guasu tēi yuvireco yandē recua pipe.

21 Oporombohe güecocuer rese yuvireco. Secocuer rumo naporai oreu. Ore Roma iguar orico, sese ndoroicatui secocuer moña āgua —ehi yuvireco mborerecar upe.

22 Evocoiyase ava eta oyamotarēhi Pablo iyavei Silas yuvireco iyavei mborerecar, “Pesequi iturucuar ichui. Ipare peinupara ivira pipe” ehi.

23 Inupá iteanga pare, osoquenda yuvireco. Oyocuai pīrata soquendapri rārosar yuvireco, “Esāro tupri” ehi yuvireco chupe.

24 Aipo oyeupe he ramoseve, soquendapri rārosar omoingue Pablo, Silas oi ava nose catui vahesa pipe. Aheve omopaha cepo pipe.

25 Ahe pītu mbiter rupi rumo Pablo, Silas oyerocui, osapucaí Tūpa mboetisave yuvireco. Ambuae ava soquendapri evocoiyase osenduño tēi yuvireco isapucái.

26 Ahese aviyeteramo tēi ivi oriríi eteanga. Opa omomara ava roquendasa moviracuasa, opacatu oquenda oyemboi iyavei opacatu carena oyera soquendapri sui.

27 Ahese soquendapri rārosar omahe yesapiha. Osepiase oquenda imboipri, ahese vinose oquise pucu siru sui oyeyuca āgua viña. Esepia niha, “Opacatu ité revo soquendapri yuviraso” ehi viña.

28 Pablo rumo,

—¡Ereyapoi rene mbahe tēi ndeyeupe! ¡Esepia, opacatu oroicoveño cohave! —ehi pucu soquendapri rārosar upe.

29 Evocoiyase soquendapri rārosar, “Emboumi tataendi” ehi ondugüer upe. Ichui oña oique, oriríi, osiquiyepave oñenopiha Pablo, Silas rovai oso.

30 Vinose pare soquendasa sui oporandu chupe:

—Mbia, ¿mara ahera vo che ñepisiro āgua vichico? —ehi chupe.

31 —Eroya yandē Yar Jesucristo. Ichui ahe nde pīsirora, nde rēta pendar avei —ehi yuvireco chupe.

32 Ahese omombehu yuvireco Tūpa Ñehengagüer soquendapri rārosar upe, opacatu sēta pendar upe avei.

33 Ahe pītu pipeve avei soquendapri rārosar viraso oyeupi, yapichasa oyoseipa chupe. Ahese Pablo, Silas oñapiramo guārosarer, sēta pendar avei yuvireco.

34 Viraso pare sārosar güētave, ombocarú. Ahe sēta pendar avei oviharete ité yuvireco Tūpa reroyasa rese.

35 Cōhese mborerecureta omondo sundao ava rese icuairi soquendasave yuvireco. Oyepotase yuvireco, aipo ehi: “Emosepa evocoi mbia judío” ehi.

36 Ahese soquendapri rārosar omombehu co ñehesa Pablo upe:

—Mborerecar ombou yuvireco ñehesa cheu pe mose āgua. Peso tupriño peico —ehi chupe.

37 Omboyeví rumo chupe,

—Ore niha romano oroico viña, ore nupasa rumo opacatu ava rovaque. Ndoporandu rane angai eté rumo mbahe rese oreu. Ore roquendapa voíño tēi yuvireco. Ipare aipo ava rembiepiaēhive tēi ore mosepa uca pota viña. ¡Aní eté rumo! Ahe teieté ru toyugüeru ore mose āgua —ehi soquendapri rārosar upe.

³⁸ Ipare sundao ava rese icuaipri omombehu güerecuareta upe Pablo ñehe. Oyanduse Pablo, Silas romano secose, osiquiyé iteanga yuvireco.

³⁹ Ahese ahe teieté yuviraso Pablo, Silas oyeupe ñero āgua rese yuvireco: “Peso tupriño ore recua sui” ehi yuvireco chupe.

⁴⁰ Pablo, Silas yuvinosese voquendasa sui, yuviraso iri Lidia rētave. Oñemonuha irise ambuae Jesús reroyasar pāhuve, omonguerēhi catu yuvireco. Ipare yuviraso ichui.

17

Ava yaivu guasu tēi Tesalónica ve yuvireco

¹ Oguatase Pablo iyavei Silas, oñocua Anfípolis iyavei Apolonia rupi yuviraso. Ēgüe ehi oyepota tecua Tesalónica ve yuvireco. Aheve oime judío tūparo.

² Secocuer rupi eté mbituhusa ari pipe Pablo oique judío tūparove, oñemoñeta ava eta upe mbosapí mbituhusa ari rupi Tūpa Ñehengagüer rese.

³ Omboyecua tupri imombehu Tūpa Rembiporavo ava písiro āgua iparaisu rane itera, omanora, ipare rumo ocuerayevi iriño itera. Ipare aipo ehi:

—Jesús, acoi amombehu vahe pēu, ahe ité niha Tūpa Rembiporavo ava písiro āgua —ehi.

⁴ Amove ipāhu pendar seroyasa pipe oyemboya sese yuvireco. Setá avei ava griego yuvirecoi vahe, Tūpa mboeteisar judío aracuasa reroyasar avei. Ipāhuve setá avei cuña oyemboetei vahe oyemboya sese yuvireco.

⁵ Judío rumo ndoviroyai vahe oñemoirombave secatēhi ava rese yuvireco. Sese omonuha ava yuvireco tēi vahe, ndipihai vahe yuvireco. Imonuha pare, ahe omboaiyu guasu uca tēi ahe ava upe opacatu güecua pipe yuvireco. Yuviraso Jasón rētave Pablo, Silas reca, vinose pota ava rehí pāhuve yuvireco viña.

⁶ Ndoyosuisse rumo aheve yuvireco, virasoño Jasón, ambuae Jesús reroyasar avei güecua rerecuar rovai yuvireco. Viroāse guasu sereco yuvireco,

—¡Evocoi mbia Pablo iyavei Silas virova vahe ava recocuer opacatu tecua rupi yuvireco, cūrítei oyepotapa yuvireco cohave!

⁷ Co Jasón omombituhu güētave. ¡Opacatu co yuvirecoi vahe ndoviroyai Cesar porocuaíta yuvireco iyavei omombehu yuvireco: “Oime ambuae mborerecuar guasu, ahe Jesús” ehi niha aipo yuvireco! —ehi yuvireco mborerecuar upe.

⁸ Aipo ñehesa renduse, oyepihamondii guasu ava eta, mborerecuar avei tecua pipendar yuvireco.

⁹ Mborerecuar rumo oipisipase guarepochi Jasón sui, ambuae Jesús reroyasar sui avei, ahese opa omose.

Pablo, Silas omombehu Tūpa Ñehengagüer Berea ve yuvireco

¹⁰ Ahe pítu pipeve voi ava Jesús reroyasar omondo Pablo, Silas tecua Berea ve yuvireco. Oyepotase aheve, yuviroique judío tūparo pipe.

11 Berea pendar ava aviye catu ava Tesalónica pendar sui. Ēgüe ehi ipisi ohāpisiēhisa pipe ñehesa yuvireco iyavei ari yacatu rupi oseca Tūpa Ñehengagüer pipe ‘¿supi eté pīha Pablo ñehesa?’ oyapave yuvireco.

12 Evocoyase setá avei Pablo ñehe reroyasar iyavei setá griego viroya yuvireco, ndahei cuimbahe güeraño, cuña oyemboetei vahe avei.

13 Judío Tesalónica pendar rumo oyandu yuvireco Pablo porombohesa Tūpa Ñehengagüer rese Berea ve. Sese yuviraso aheve imboaiyu guasu tēi uca āgua ava upe yuvireco.

14 Evocoyase Jesús reroyasar Berea pendar Pablo viroguata poyava voi tecua sui para guasu coti yuvireco. Silas iyavei Timoteo rumo opīta viteño aheve yuvireco.

15 Evocoyase Pablo rupi yuviraso vahe viroyepota Atenas ve seraso. Ahe ichui viroyevi Pablo ñehe Silas upe iyavei Timoteo upe avei yuvireco yuvirasos voi āgua Pablo piri ahe tecuave yuvireco.

Pablo Atenas ve secoi

16 Pablo osāro viteseve Silas iyavei Timoteo Atenas ve oico, ndoyemboihai osepiase opacatu rupi tūpa rahanga-anga tēi.

17 Sese judío tūparo pipe omombehu Jesús recocuer judío eta upe iyavei ambuae Tūpa mboeteisar upe avei. Iyavei ari yacatu omoñeta ava osepia vahe ocarusu rupi ava ñemonuhasave ahe tecua pipe.

18 Evocoyase amove mbia oyembohe vahe epicúreo aracuasa rese iyavei mbia oyembohe vahe estoico aracuasa rese oñemoñeta Pablo rese yuvireco. Amove aipo ehi Pablo upe yuvireco seroñirosave:

—¿Mbahe rese angahu pīha co mbia iñehe papa rai ava upe oico? —ehi.

Ambuae aipo ehi yuvireco:

—Ndoyavii co mbia oñehe vahe ambuae ava Tūpa rese tēi —ehi yuvireco.

Esepia, omombehu Jesús recocuer iyavei cuerayevisa resendar.

19 Evocoyase ahe oyembohe vahe viroyeupi Pablo Areópago serer vahe save seraso yuvireco. Aheve ava oñemonuhasave aipo ehi yuvireco chupe:

—¿Ndiyai vo eresenducua uca tupri catumira co porombohesa piasu resendar oreu viña?

20 Supi eté niha eremombehu mbahe ndorosendu vitei vahe, ore orocua tupri pota, ¿mara oyapave ité vo aipo ehi? —ehi yuvireco Pablo upe.

21 Atenas pendar iyavei yugüeru vahe Atenas ve, oyembohe pota serai vahe yuvireco. Ahe oñemoñetaño, omombehuño mbahe oyeupe yuvireco yepi iyavei osendu pota rai ñehesa ipiasu vahe. Aheño ité ipihañemoñetasa yuvireco.

22-23 Evocoyase Pablo opūha ahe ava pāhuve aipo ehi:

“Pesendu rane Atenas iguar. Aguatase ocar rupi asepia pe tūpa eta pemboetei vahe. Aheve asepia ñepei tūpa upe seropovēhepri renda. Sese asepia icuachiapri aipo ehi oī: ‘Tūpa ndicuasai vahe upendar’ ehi. Evocoi Tūpa ndapeicua vitei vahe, ahe secocuer niha amombehu pēu” ehi.

24 “Evocoi Tūpa oyapo vahe co ivi, opacatu mbahe ipor avei. Ahe niha ivi, iva Yar secoi. Sese ndasecoi tūparo ava tēi rembiapo pipe.

25 Ndahei ava rembiapo pipe sui tēi oicove. Esepia, ndipoi mbahe ipane vahe chupe. Ahe ité niha opacatu upe ombou tecovesa, pītuhesa iyavei opacatu mbahe oime vahe ivi, ivave” ehi.

26 “Tūpa oyapo opacatu-catu tēi ava ñepei ava sui ava yesu āgua opacatu ivi rupi. Omondo ivi ava yemboerecua āgua ñepei-peu upe. Ari avei omondo co ivi pipe iyemboerecua āgua yuvireco chupe.

²⁷ Ëgüe ehi ava upe ‘tache reca yuvireco’ oya, ‘ipipe sui aviyeteramo che reroyara yuvireco’ oyapave. Ëgüe ehi rumo Tüpa yande resevemi eté.

²⁸ Esepia niha, Tüpa sui yaicove, ipĩratasa pipe yayembovava, ichui avei yareco yande recovesa, inungar oicuachía amove pe recua pendar yuvireco, aipo ehi: ‘Yaico ité Tüpa suindar’ ehi yuvireco.

²⁹ Sese yande Tüpa suindar yaicose, ‘Co mbahe rahanga oro apopri iyavei guarepochi, ita apopri, ahe revo Tüpa’ ndayahei chira. Esepia, mbahe rahanga ava rembiapo tēi, ndahei Tüpa” ehi.

³⁰ “Pe ramoi ndoicua tupriise yuvireco aracahe, Tüpa oñemosañõ mbahe sembiapo rese chupe. Cũritei rumo oyocuai opacatu ava co ivi pipendar ‘tomboasi oangaipa, toyevi yuvireco cheu’ oya.

³¹ Esepia, ahe oiporavo ari opacatu ava recocuer rese porandu uca ãgua güecocuer ivi tupriisa pipe ñepei güembiporavo upe. Ahe ombogüerayevi güembiporavo omano vahe pãhu sui ‘toicua opacatu ava güecocuer rese iporandu ãgua’ oya” ehi Atenas pendar upe.

³² Osenduse yuvireco cuerayevisa resendar, ahese oime ava oyoyai catu yuvireco seroĩrosave. Ambuae rumo aipo ehi yuvireco:

—Torosendu irimi aipo ñehesa curi —ehi yuvireco.

³³ Sese Pablo osē ipãhu sui oso.

³⁴ Moviro rumo mbia oyemboya sese, viroya ité vahe iñehesa yuvireco. Ahe ipãhuve secoi mbia Dionisio serer vahe, ahe Areópago pãhu pendar iyavei cuña Dámaris serer vahe. Ambuae oime vite yuvireco seroyasar.

18

Pablo Corinto ve secoi

¹ Coiye catu Pablo osē Atenas sui, oso Corinto ve.

² Aheve oyoepia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yügüeru ramo rumo Italia sui güembireco Priscila reseve. Yuvinose ñepei tecua Italia rupindar Roma sui oyocuaise mborerecar guasu Claudio: “Toyuvinose ité opacatu judío Roma sui” ehise. Pablo oso,

³ opita Aquila piri oporaviqui ãgua. Esepia, Pablo, Aquila avei ahe mbahe pírer mbovivisar pãve yuvirecoi.

⁴ Mbituhusa ari yacatu rupi Pablo omombehu Jesucristo recocuer ava upe judío tũparo pipe ‘toviroya Jesús judío iyavei ndahei vahe judío yuvireco’ oyapave.

⁵ Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu ãgua rese güerañõ judío eta upe aipo ehi: “Jesús niha Tüpa Rembiporavo ava písiro ãgua secoi” ehi.

⁶ Iñehe-ñehe tēi rumo seroĩrosave yuvireco chupe. Sese Pablo oipipete oturucur sovaque ‘oimera mbahe tēi pēu’ oya, iyavei aipo ehi chupe yuvireco: —Pe ae niha peseca Tüpa ñemoĩrosa peyeupe pe recocuerai sui. Ndahei rumo che resera mbahe. Esepia, che amboaviyē tupri che cuaita pēu. Che rumo, co pipe suive, amombehu catuño itera co ñehesa ava ndahei vahe judío upe vichico —ehi Pablo judío upe.

⁷ Evocoyase Pablo osē judío tũparo sui, oi que mbia Ticio Justo serer vahe rētave, ahe Tüpa mboeteisar avei secoi. Ahe sēta judío tũparo iqueve.

⁸ Crispo, ahe judío tũparo rerecar viroya avei yande Yar, opacatu sēta pendar avei viroya yuvireco. Setá ambuae Corinto pendar avei viroya osenduse iñehesa yuvireco. Seroya pare, oñeapiramopa uca yuvireco.

⁹ Ñepei p̄itu p̄ipe yande Yar oñehe Pablo upe iquer nungarve: “Eresiquiyei rene, ereñehe ava upe, che mombehuño eve, erepoi rene che mombehusa sui.

¹⁰ Esepia, che nde reseve aico. Sese ndiyai ava upe nde momara uca ãgua. Supi eté che areco setá che rahirã co tecua p̄ipe” ehi yande Yar chupe.

¹¹ Evocoiyase op̄ita ñepei arav̄iter yemombitesa rupi Corinto ve oico. Aheve ombohe Tũpa Ñehengagũer rese ahe pendar ava.

¹² Galión mborerecuar secose opacatu Acaya rupi, judío oñemonuha Pablo amotarẽhisave. Ichui viraso ahe mborerecuar upe porandusa ivate catusave yuvireco,

¹³ aipo ehi yuvireco chupe:

—Co mbia oip̄ihañemoñeta rerova tẽi ava oTũpa mboetei ãgua. Ndahei rumo Roma pendar porocuaita rupi ãgũe ehi yuvireco —ehi yuvireco seroĩrosave chupe.

¹⁴ Oñehe pota tẽi viña, Galión rane rumo oñehe judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemonguerẽhira che yapisaca ãgua pe remimombehu rese viña.

¹⁵ Pe rumo peporandu cheu mbahe pe yembohesa resendar, pe Tũpa rer resendar iyavei pe Tũpa porocuaita resendar rese tẽi. Pemoingatu pe ae pe recocuer; ndaipotai aipo nungar mbahe moingatu ãgua —ehi Galión ahe ava upe.

¹⁶ Ipare opa omboyepipi porandusa sui.

¹⁷ Ahese opacatu griego oip̄isi judío tũparo rerecuar Sóstenes yuvireco. Ipare yuvirocua-rocua Galión rovai ahe peve yuvireco sese. Galión rumo, “Mara etemo che areco viña” ehiño chupe.

Pablo yevi irisa Antioquía ve

¹⁸ Pablo secui pucu vite pare Corinto ve, “Asora vichico cute” ehi Jesús reroyasar upe. Ipare yuviraso Aquila, Priscila reseve. Oyepotase Cencrea ve yuvireco para guasu pop̄ive, aheve Pablo oñeapipa tupri oñehe mboaviye ãgua. Ipare yuviraso carite p̄ipe Siria ve.

¹⁹ Siria piar rupi yuviraso Efeso ve. Aheve opita Aquila, Priscila yuvireco. Ichui Pablo oique judío tũparo p̄ipe Jesús resendar ñehesa mombehu ãgua chupe yuvireco.

²⁰ Ahe pendar omombita pota vite tẽi yuvireco viña, Pablo rumo ndopita potai aheve.

²¹ Evocoiyase, “Av̄iye, taso rane” ehiño chupe yuvireco. “Tũpa oipotase cheu, ayeví irira vitu pe p̄iri” ehi.

Ipare oso Efeso sui carite p̄ipe.

²² Oyepotase Cesarea ve, oso Jerusalén ve “av̄irave” apo ãgua Jesús reroyasar upe. Ipare oso Antioquía ve.

²³ Opita pucu pare aheve, osẽ, oguata iri Galacia rupi, Frigia rupi opacatu Jesús reroyasar monguerẽhi catu ãgua.

Apolos omombehu Jesús recocuer Efeso ve

²⁴ Aheseve avei judío Apolos serer vahe oso Efeso ve, ahe Apolos, Alejandría iguar. Oñehe tupri ai vahe, oicua tupri avei Tũpa Ñehengagũer.

²⁵ Ahe oyembohe vahe avei yande Yar recocuer rese. Omombehu oquerẽhisa p̄ipe secocuer ava upe, oporombohe tupri ai avei sese. Ahe rumo oicua Juan oãpiramo agũer gũeraño tẽi.

²⁶ Ahe osiquiyeēhisave judío tūparo pipe omombehu Tūpa Ñehengagüer. Osenduse Aquila, Priscila iñehesa, omombita yuvireco oyepiri. Ahe se omombehu tupri catu Tūpa recocuer chupe yuvireco.

²⁷ Oso potase Apolos Acaya coti, ahe se Jesús reroyasar Efeso pendar omonguerēhi catu. Oyapo cuachiar Acaya pendar upe imondo yuvireco sese hañeco tupri āgua. Ipare oyepota oso Acaya ve. Aheve oime ava Tūpa guaisusa pipe sui viroya vahe Jesús yuvireco. Ahe ava Apolos oipitivi seroya tupri catu āgua yuvireco.

²⁸ Omboyecua opacatu rovaque judío pihanemoñetasa co coti tēi vahe. Ahe se opa osecopi oñehe pipe ahe ava. Esepia, Tūpa Ñehengagüer pipe omboyecua ité: “Jesús Tūpa Rembiporavo ava pisiro āgua secoi” ehi eté judío eta upe.

19

Pablo omombehu Jesús recocuer Efeso ve

¹ Evocoyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroyasar.

² Evocoyase oporandu ahe ava upe:

—¿Peipisi vo Espíritu Santo pe piha pipe peroyase Jesús? —ehi chupe.

—Ore ndorosendui eté aipo Espíritu Santo resendar ñehesa —ehiño yuvireco chupe.

³ Ichui oporandu iri chupe:

—Evocoyase, ¿mbahe nungar vo āpiramosa peipisi? —ehi.

—Juan poroāpiramosa oroipisi —ehi ahe ava yuvireco chupe.

⁴ Evocoyase aipo ehi ahe ava upe:

—Juan niha oñapiramo acoi omboasi vahe oangaipa oyevisé Tūpa upe. Ipare rumo omombehu ava upe: “Peroya ahe eté vahe ou vaheṛā che raquicuei” ehi. Ahe ou vaheṛā, “Jesús upe” aipo ehi —ehi Pablo chupe.

⁵ Osenduse Pablo ñehe, opacatu oñeapiramo uca Jesucristo rer pipe yuvireco.

⁶ Omondose Pablo opo iharive yuvireco, ahe se ogüeyi Espíritu Santo, oique ipiha pipe yuvireco. Ipare aviyeteramo tēi oñehe ambuae ñehesa pipe iyavei omombehu Tūpa suindar ñehesa yuvireco.

⁷ Ēgüe ehi Tūpa ahe doce mbia yuvirecoi vahe upe.

⁸ Mbosapi yasi rupi Pablo oique omombehu Tūpa Ñehengagüer judío upe osiquiyeēhisave itūparo pipe ipihanemoñeta rerova āgua Tūpa mborerecuasa resendar reroya āgua rese.

⁹ Amove rumo judío ipihaviracua ité seroyaēhi āgua yuvireco. Ipipe iñeheñehe tēiño co tecocuer ipiasu vahe mombehusa rese yuvireco ava rehii rovaque. Evocoyase Pablo oyepipi ichui, vinosepa oyeupi Jesús reroyasar yeroquisa Tirano serer vahesave seraso. Aheve ari yacatu rupi oñehe yepi.

¹⁰ Ēgüe ehi ñuvirío araviter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer.

¹¹ Tūpa omondo güeco pīratasa Pablo upe poromondiisa apo āgua.

¹² Sese pañueru iyavei turucuar Pablo rese imbopyari, ahe serasosa imbaheasi vahe upe imbogüera āgua. Carugar avei opa yuvinose yuvireco ichui.

¹³ Amove oime judío oguata vahe ocar rupi carugar mose āgua ava sui. Sese nara oiporu pota yande Yar Jesús rer yuvireco.

14 Evocoyase aipo ehi carugar upe: “Pablo Jesús recocuer omombehu vahe rer pipe, ‘Peyepipi co mbia sui’ ahe pëu” ehi. Ëgüe ehi pota avei siete Eceva rahir mbahe apo yuvireco viña. Ahe iyepupa judío pahi rerecuar secói.

15 Carugar rumo omboyevi chupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño carugar chupe.

16 Aheseve ahe cuimbahe carugar vireco vahe opo ipãhuve oso. Opacatu opiratasa pipe opa ité osecopi siete mbia yuvirecoi vahe. Omomara-mara tēi uguayiehisa pipe imonanipa tupri imondo.

17 Co mbahe sembiapo rēracua opa oyepota opacatu Efeso pendar upe, judío upe, ava ndahei vahe judío upe avei. Evocoyase oyembosiquiye guasu yuvireco. Ipipe sui opacatu oicua yande Yar Jesús rer yuvireco.

18 Setá Jesús viroya ramo vahe yugüeru opacatu mbahe güembiapocuer naporai vahe mombehu yuvireco

19 iyavei setá ipaye vahe Jesucristo viroyase, omonuhapa ocuachiar ombo-payasa resendar sapi ãgua opacatu ava rovaque yuvireco. Sapi pare, opa ahe cuachiar repri vinose yuvireco. Ahe sepri cincuenta mil tupri ari mboraviqui repri.

20 Ëgüe ehi Tüpa opiratasa pipe ombouvicha oñehengagüer iyavei iñehe pīratasa oyecua catu ava rese.

21 Ipare Pablo ipihañemoñeta Jerusalén ve oso ãgua ivi Macedonia, Acaya rupi. “Coie catu aheve che reco viteseve, ichuive che asora Roma ve” ehi.

22 Evocoyase omondo ñuvirío opitivisar Timoteo, Erasto Macedonia ve güenonera. Ahe rumo opita vitemi Asia rupi oico.

Ava Efeso pendar yaivu guasu yuvireco

23 Ahe ari pipe Efeso pendar yaivu guasu yuvireco co tecocuer ipiasu vahe rese.

24 Aheve mbia Demetrio serer vahe secói. Ahe oyapo Artemisa rēta rahanga guarepochi apopri guarepochi pisi ãgua. Ambuae ava mbahe rahanga aposar oipisi tupri avei oporaviqui repri ipiri yuvireco.

25 Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, ava mboaiyu guasu uca ãgua. “Pe mbia, peicua yayapose mbahe Artemisa nungar, yaipisi tupri yande poraviqui repri” ehi omboetasa upe.

26 “Peicua avei Pablo opa ovirova ava eta piha Artemisa mboeteisa sui ‘ndahei Tüpa ité’ ohesa pipe yande rembiapo uve. Ndahei rumo cohapeño ëgüe ehi, opacatu Asia rupi ëgüe ehi avei imombehu.

27 Aviyeteramo mbahe tēi oimera yandeu yande poraviquisa mocañi tēi ãgua, tüparo guasu Artemisa upendar aviyeteramo ocañi tēi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo rumo ava nomboetei iri chira, iyavei viroiroma yande rembiapo catuprisa yuvireco” ehi.

28 Osenduse aipo ihe ava yuvireco, oñemoirosa pipe virosapucai aipo ehi yuvireco: “¡Imboeteipri catu Artemisa yande recua pendar tasecoi!” ehi yuvireco.

29 Opacatu Efeso rupi ava yaivu guasu tēi. Osapucai vahe oipisi Gayo iyavei Aristarco, ahe ñuvirío Pablo rupindar yugüeru vahe Macedonia sui. Oipisise, omombo-mombo seraso yuvireco ava ñemonuha guasusave.

30 Pablo oi que pota tēi ava rehii pãhuve, ambuae Jesús reroyasar rumo nomoingue uca potai yuvireco.

³¹ Iyavei moviro mborerecuar imboripar Asia rupindar omondo oñehe chupe aipo ehi: “Ereiquei rene ava ñemonuhasa guasuve” ehi avei yuvireco chupe.

³² Ñemonuhasave amove ava osapucaí pĩrata ñepei mbahe rese, amove osapucaí ambuae mbahe rese. Esepia, yaivu tēi yuvireco. “¿Mahera vo evocoiyase yañemonuha?” ehi tēi setá ipāhu pendar yuvireco.

³³ Amove rumo ava rehii pāhuve yuvirecoi vahe judío, ahe ombohe-mbohe imoañi-añi imondo Alejandro mbahe mombehu āgua ava rehii rovaque yuvireco. Alejandro evocoiyase omopuha tēi opo ava monguiriri āgua viña. Osepi pota omu judío ava rehii rovaque viña.

³⁴ Ava rehii rumo oicuae Alejandro judío secose yuvireco. Opatatu guasu osapucaí pĩrata yuvireco. “¡Imboetepri catu Artemisa yande recua pendar tasecoi!” ehi pucu-pucu yuvireco. Ēgüe ehi ahe osapucaí ñuvirío hora rupi rutei yuvireco.

³⁵ Evocoiyase tecua pipendar mbahe cuachiasar oicatuse ava monguiriri āgua, aipo ehi chupe: “Peyapisaca mbia pe Efeso pendar, ndipoi ava ndoicuai vahe yande Artemisa tūparo rese yande hañecosa iyavei sahanga iva sui oviapi vahe rese avei hañecosa.

³⁶ Ndipoi niha ava, ‘Aní’ ehi vaherā che remimombehu rese. Sese peyemonguiririño, peyapoi rene mbahe pe yapisacaēhisave.

³⁷ Peruño tēi eté co ñuvirío mbia cohava, ndoyapoi rumo mbahe tēi Artemisa upe yuvireco. Nimondai mbahe rese itūparove, ndoviroñroi avei serer yuvireco.

³⁸ Sese Demetrio iyavei oporaviqui vahe supi ahe oñemoirose que ava upe, toyuviraso rane ava recocuer moingatusar upe yuvireco; aheve tomoingatu güecocuer yuvireco.

³⁹ Pemoingatu potase que ambuae mbahe, peso ranera yemomboranduse imoingatu āgua.

⁴⁰ Mborerecuar rev oyardura yande rembiapo co pipe, ‘¿Mahera peaivu guasu tēi? ¿Che amotarēhimbave tie ēgüe peye?’ ehi tiētera yandeu. Oporanduse yandeu, ndayaicatui chitiētera imboyevi āgua iñehe chupe. Esepia niha, co yañemonuha yande remimbotar tēi cohava” ehi chupe.

⁴¹ Aipo ihe pare, omomba aheve oñemonuhasa yuvireco.

20

Pablo guata agüer Macedonia, Grecia rupi

¹ Ava aivu guasu pare, Pablo, “Toyugüeru” ehi ava Jesús reroyasar upe. Aheose omboaracua ahe ava. Chupe, “Aviye” ohe pare, oso Macedonia ve.

² Oguatase Macedonia rupi, omonguerēhi-rēhi avei ambuae Jesucristo reroyasar yuvirecoi vahe tecua-tecua rupi. Ipape oyepota Grecia ve oso.

³ Aheve opita mbosapi yasi. Oso potase Siria ve carite pipe, judío ipihañemoñeta mara sereco āgua rese yuvireco. Oyanduse, carite pipe oso rāgüer sui, oyevi iri oso Macedonia ve ivi rupi.

⁴ Yuviraso moviro mbia supi, ipāhuve ñepei Berea pendar, Pirro rahir Sópater; ñuvirío Tesalónica pendar, Aristarco, Segundo; ñepei Derbe pendar, Gayo; ñuvirío Asia pendar, Tíquico, Trófimo. Timoteo oso avei supi.

⁵ Evocoi mbia yuviraso Pablo renondeve sãro āgua Troas ve.

⁶ Pieta pan ndayapepoi vahe hu pare, orosē tecua Filipo sui carite pipe, cinco arı rupi oroyepota Troas ve. Ahe tecuave oropita siete arı rupi.

Pablo Troas ve secoi

⁷ Domingu pipe, ore oroñemonuha pan hu ãgua. Ahese Pablo oporombohe oico pïtu mbïter rupi. Esepia, ahe osê pota ahere ayihive voi ichui.

⁸ Ahe oi ivate vahesave ñemonuhasa pipe setá tataendi.

⁹ Mbïa chïhivahe, Eutico serer vahe, metanave uguapï oï. Pablo rumo oñehe pucú iteanga. Evocoyase omboopesïi ahe chïhivahe. Ipare oquê; avïyeteramo têi oviapi oi ivate vahe mbosapïsa sui. Ahese ava ogüeyï sehögüer rupi ivi sui yuvireco.

¹⁰ Evocoyase Pablo ogüeyï ou chupe, oñeno oso sese icuhaguã. Ipare aipo ehi Jesús reroyasar upe:

—PesiQUIYEI rene; nomanoi moco —ehi.

¹¹ Ipare oyeupi iri oso ombohi pan igua. Ichui oñehe pucu vïte. Omomba cõhe senise; ipare oso cute.

¹² Evocoyase co mbïa chïhivahe vïroyevise secosave, opacatu oyembovïha guasu catu yuvireco. Esepia, nomanoi eté.

Pablo yuvïraso Troas sui Mileto ve

¹³ Pablo oso pota ivi rupi, ore ranengatu rumo oroso carite pipe Aso ve. Aheve oroyepota Pablo reraso ãgua semimbotar rupi.

¹⁴ Oroyoepïase aheve, oha carite pipe ore pïri. Ichui oroso cute Mitilene ve.

¹⁵ Ahere ayihive carite pipe oroñocua Quïo oroso. Ambuae ari rese oroyepota Samos ve. Ichui oroso no oroyepota Mileto ve.

¹⁶ Pablo ipoyava. Esepia, oïpota Jerusalén ve Pentecostés pieta pipe tupri güeco ãgua. Sese Efeso oroñacuasãño oroso.

Pablo ñehesa Jesús reroyasar rãrosareta Efeso pendar upe

¹⁷ Mileto ve ore recose, Pablo omondo oñehe Efeso ve ‘toyugüeru Jesús reroyasar rãrosar cheu’ oya.

¹⁸ Oyepotase yuvireco chupe, aipo ehi: “Peïcua niha che recocuer aviye ité yïpisuïve ari che reique ramosa resendar co Asia ve.

¹⁹ Ari yacatu rupi aporavïquï yande Yar upe pe pãhuvê vichico che reco asïêhisave che yasehosa pipe. Yepe judïo che mboguai etepri che recoãhasave pe recuave yuvireco viña,

²⁰ che rumo ndaicatui ñehesa aviye vahe mombehuêhi pëu mbahe aviye ãgua yepi. Che opombohe ava rehï rovaque, opombohe aveï ñepêi-peï pe rêta rupi yepi” ehi.

²¹ “Amombehu ñehesa judïo upe, ava ndahei vahe judïo upe aveï aipo ahe: ‘Pemboasï pe angaipa; peyevï TÛpa upe, peroya aveï yande Yar Jesús’ ahe” ehi.

²² “CÛritei asora Jerusalén ve vichico. Aheve che so ãgua Espïritu che cuai che pïha pipe. ‘¿Mara ehira pïha yuvireco peve cheu?’ aipo ahe.

²³ Co güeraño che aïcua: opacatu tecua che sosa rupi Espïritu Santo aipo ehi cheu che roquenda ãgua iyaveï che mombaraisu ãgua yuvireco yepi” ehi.

²⁴ “Ndacherecatêhïi rumo cheyese che mano ãgua. Che rumo amboaviye potaño ité che poravïquisã TÛpa upe, ahe yande Yar Jesucristo che cuai vahe co ñehesa icatupri vahe mombehu ãgua. Co TÛpa oporoaisusa pipe ombou ñepêi vahe Guahïr ava pïsiro ãgua” ehi.

²⁵ “Opa niha TÛpa mborerecuasa amombehu pëu. Che rumo aïcua ndache repïa iri chira peye.

²⁶ Sese tapeicua cūrītei: ndayavīi eté che cuaita mboaviye āgua co tecocuer aviye vahe mombehu pipe pēu.

²⁷ Esepia, ndaicuacui eté Tūpa Ñehengagüer mombehu; che rumo amombehuño ité opacatu Tūpa recocuer pēu.

²⁸ Sese peñearo tupri, pesāro avei opacatu Jesús reroyasar Espiritu Santo porocuaíta rupi. Inungar ovesa rārosar, ēgüe peye tuprira sāro. Ahe Tūpa remimboepi yuvirecoi. Esepia, Jesús oipiyere vuvī opacatu ava angaipā repirā.

²⁹ Aicua che opoeyare, oyugüerura ambuae ava mahembiar oñaro ai vahe nungar pe pāhuve opacatu Jesús reroyasar mocañipa pota āgua.

³⁰ Oime aveira que ava pe pāhu pendar pe mbopa pota aveira yuvireco pe reraso āgua oyeupi.

³¹ Sese pemahemoha tupri peyese. Pemahenduha acoi opomboaracua tuprise mbosapi araviter rupi, pītu, ari yacatu rupi avei che yasehosa pipe pe rereco” ehi.

³² “Sese, che rivireta, opoeyara Tūpa povrive iyavei iñehesa iporovasasa resendar pipe. Ahe pe moviracua catura pe rereco iyavei omboura opacatu mbahe güemimombehu pēu opacatu ambuae güembiporavo reseve.

³³ Ndahei pe guarepochi, que oro iyavei pe turucuar pota raisa pipe aso pe pāhuve.

³⁴ Peicua niha acoi che po pipe ité aporaviqui che recove āgua, che rupindar recove āgua avei.

³⁵ Ēgüe ahe amboyecua che recocuer pēu. Supi avei ēgüe peyera; yaporaviqui tupri iparaisu vahe rese hañeco āgua. Pepihañemoñeta acoi yande Yar Jesús remimombehu rese: ‘Sorivete catu ava iporereco vahe, mbahe oipisi vahe sui’ ehi aracahe” ehi Efeso pendar Jesús reroyasar rārosar upe.

³⁶ Oñehe pare, oñenopiha oyerure āgua opacatu omboripar reseve.

³⁷⁻³⁸ Ndoyembovīhai eté, “Ndache repia iri chira peye” oyeupe ihese. Sese opacatu oyasehó iteanga yuvireco, oyaco-yaco, osovaupite-pite iri tēi avei yuvireco saisupave. Ipape yuvirasño ité yuvireco supi carite yemboyasave.

21

Pablo so agüer Jerusalén ve

¹ Evocoyase oroseyase ore rivireta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso.

² Aheve orosepia carite oso vaheṛā Fenicia ve, ahe ipipe oroha, oroso.

³ Orosasase para guasu oroso, orosepia caha pāhu guasu Chipre serer vahe. Ahe oroñocua yande mbahe rese pocoēhisa coti, oroso ivi Siria ve, para guasu rovai. Carite rumo seroyemboyasa tecua Tiro ve ipipendar mbahe reya āgua.

⁴ Aheve orosepia Jesús reroyasar yuvirecoi vahe. Ahese oropita siete ari ipiri. Yepe ahe Jesús reroyasar aipo ehi Pablo upe yuvireco: “Espiritu Santo oñehe oreu. Evocoyase eresoi rene Jerusalén ve” ehi yuvireco chupe viña,

⁵ siete ari pare rumo, orosoño ité para guasu popive. Opacatu Jesús reroyasar yugüeru, güembireco, guahir reseve-seve ore rupi. Aheve oroñenopiha ore yerure āgua.

⁶ “Aviye, toroso rane” ore he pare chupe yuvireco, oroha carite pipe. Ahe evocoyase oyevi yuvirasno güetave.

⁷ Tiro sui oroso Tolemaida ve. Oroyepotase, oroso Jesús reroyasar repia āgua. Aheve oropita ñepeí ari.

8 Ahere ayihive oroso Cesarea ve. Aheve oroiue, oropita Felipe rēta ve, ahe oguata vahe Jesús recocuer mombehu. Ahe mbia iporavopri secoi aracaco ambuae seis yuvirecoi vahe pāhuve.

9 Evocoi Felipe vireco irungatu guayri ndomendai vahe. Tayri Tūpa ñehe mombehusar pāve yuvirecoi.

10 Oropitase setá arimi ipiri, ahese oyepota Judea sui mbia Agabo serer vahe oreu. Ahe avei Tūpa ñehe mombehusar secoi.

11 Ouse ore pāhuve, virecoa Pablo rumbicuasa ichui. Ipípe oñapichi opi, ope avei. Ahese aipo ehi oreu:

—Espíritu Santo oicua uca cheu, na ehira judío Jerusalén pendar co tumbicuasa yar apichi yuvireco iyavei omondora ava ndahei vahe judío upe —ehi Agabo imombehu oreu.

12 Orosenduse aipo ihe, ore, evocoi Cesarea pendar avei, oromombehu Pablo upe: “Erosoi rene Jerusalén ve” orohe tēi chupe.

13 Ombovevi rumo oreu:

—¡Mahera peyaseho che rese, ndache mbovihal peye! Che rumo ayemoin-gatu voi che apichi uca āgua, che mano āgua rese avei Jerusalén ve yande Yar Jesús recocuer rese —ehi oreu.

14 Ndoroicatuise ipihañemoñetasa rerova āgua, oropoiño ichui aipo orohe:

—Tayaposa ayase yande Yar remimbotar —oroheño chupe.

15 Ipare cute oroyemoin-gatu ore so āgua Jerusalén ve.

16 Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rēta ve. Ahe ore moingue oyepiri. Ahe yipive ité viroya yande Yar oico.

Pablo ombori Santiago

17 Oroyepotase Jerusalén ve, ahe pendar Jesús reroyasar nihapisii ore pisi yuvireco.

18 Ahere ayihive Pablo, ore avei oroso Santiago repia. Aheve yuvirecove avei opacatu Jesús reroyasar rārosar Jerusalén pendar.

19 Pablo, “Avirave” ehi opacatu oñemonuha vahe upe. Ipare omombehu tupri yipisuive oyeupe Tūpa mbahe oyapo uca vahe ava ndahei vahe judío pāhu rupi.

20 Osenduse, omboetei guasu Tūpa yuvireco. Omombehu Pablo upe yuvireco:

—Che mu, ereicua setá iteanga judío viroya Jesús yuvireco. Ahe setacuer setá catu mil vahe sui cute. Opacatu evocoi ava iquerēhi vahe Moisés porocuita arachendar mboaviye āgua yuvireco —ehi—.

21 Osendu tēi nde rembiapo yuvireco. Omombehu tēi avei aipo nde he yande mu ambuae tecua rupindar yuvirecoi vahe upe: “‘Peseya Moisés porocuita. Pembocircuncidá iri rene pe rahir. Peico iri rene yandé recocuer arachendar pipe’ aipo ehi tēi oico” ehi nde mombehu yuvireco —ehi Pablo upe yuvireco—.

22 ¿Mara yahera vo? Esepia, oyandura nde yepotasa cohava yuvireco.

23 Aviye catu ereyapora ore porocuita oromombehu vahe ndeu. Oime irungatu mbia ore pāhuve. Ahe mbia omboaviyera güemimombehu Tūpa upe yuvireco.

24 Eraso co mbia ndeyepi, eñemoatiro supi eso, emboepi avei mbahe Tūpa upe icuavēhepri. Ahese ahe mbia oicatura oñeapi yuvireco. Eremboaviyese evocoi mborocuita, opacatu judío nde reroyara, oicua ara va semira tēise

mbahe nde rembiapo rese yuvireco. Oicua aveira, nde ereroya vite Moisés suindar mborocuaifa —ehi yuvireco chupe—.

²⁵ Ndoroyocuai rumo ava Jesús reroyasar ndahei vahe judío evocoi nungar mbahe rese. Esepia, opa icuachiasa chupe: “Pehui rene mbahe mimba yucapri mbahe rahanga tēi upendar seropovēhepri, pehui rene mbahe ruvi, pehui rene mbahe mimba yucapri suvi renosepirēhi vahe iyavei peaguasai rene” orohe chupe —ehi yuvireco.

Judío oipisi Pablo tūparo guasu pipe yuvireco

²⁶ Evocoyase Pablo viraso ahe irungatu mbia yuvirecoi vahe oyeupi. Ahere ayihive oyoya oñemoatiro yuvireco. Ipape yuviroique judío tūparo guasu pipe, omombehu yuvireco pahi upe: “Oroñemoatiro ramo. Sese oroyevira siete ari pipe oromombase ore ñemoatirosa. Ahese oromondo pota ndeu porerecosa Tūpa porocuaita rupi icuavēhepirā” ehi yuvireco pahi upe.

²⁷ Opa potase evocoi siete ari, judío Asia pendar osepia Pablo tūparo pipe yuvireco. Ahese omoñemoiro uca opacatu ava rehii tūparo pendar. Ipape ipisise,

²⁸ sāse yuvireco: “¡Ore mu, ore pītivii peye co mbia oroipisi vahe rese! Esepia, oguata opacatu rupi. Oñehe tēi yande rese, Moisés porocuaita rese, yande tūparo rese avei iyavei viroique ava ndahei vahe judío yande tūparo pipe. Sese omonguiha tēi yande tūparo maranehi” ehi yuvireco chupe.

²⁹ Co rese aipo ehi. Esepia, cuese osepia Pablo viroguatase Tróximo oyeupi, ahe mbia Efeso pendar ndahei vahe judío. Sese ipihañemoñeta ‘Pablo viroguata ava ndahei vahe judío yande tūparo pipe’ oya yuvireco viña.

³⁰ Opacatu Jerusalén pendar ndasorii yuvireco. Cūriteimi ava yuvinoña guasu tūparove. Oipisi Pablo ombotiriri senose tūparo pipe sui yuvireco. Ahese omboya voi guaquicuei tūparo roquenda yuvireco.

³¹ Oyuca potase yuvireco, ahese yaivu rēracua oyepota sundao rereciar guasu upe.

³² Cūriteimi sereciar viraso sundao, yuvinoña yaivu vahe upe yuviraso. Osepiase ava sundao rereciar guasu, isundao avei yuvireco, ndoyuvirocua iri Pablo rese yuvireco.

³³ Ahese ahe sundao rereciar guasu oyemboya oso Pablo rese, oipisi uca. Ipape oyocuai osundao, “Tapeicuhacua ñuvirío carena pipe” ehi. Evocoyase oporandu ava upe: “¿Ava vo co mbia? ¿Mbahe vo oyapo pēu?” ehi judío eta upe.

³⁴ Ahese amove ava ñepe mbahe rese oñehe, ambuae, ambuae mbahe rese tēi yuvireco. Evocoyase sundao rereciar ndoicatu supi eté vahe mbahe rendu āgua yaivu guasu vahe pāhuve. Sese, “Peraso cuartelve” ehi.

³⁵ Viroyepotase yuepisave, ichui osupi sundao oachihive seraso yuvireco ava rehii ñemoiró iteangasa sui.

³⁶ Ava rehii rumo yuvirasoño ité saquicuei, “¡Tomano!” ehi pucu-pucu yuvireco chupe.

Pablo oyoepi ava rehii rovaque

³⁷ Omoingue potase Pablo cuartel pipe yuvireco, aipo ehi sundao rereciar guasu upe:

—¿Iyacatu vo yañemoñeta raimi? —ehi.

Evocoyase, omboyevi mborereciar chupe:

—¿Ereicua vo griego ñehe? —ehi—.

³⁸ ¿Ndahei vo nde Egipto pendar, vavasa oyapo vahecuer ereico? Nde revo acoi ereraso oporoyuca vahe pãve cuatro mil tupri ivi iporupirêhisa rupi – ehi sundao rerecuar chupe.

³⁹ Evocoiyase,

–Che judío, tecua Tarso pendar aico. Ahe tecua Cilicia pîpendar imboeteipri vahe secoi. Eyapomi mbahe icatupri vahe cheu, tañehemi rane catu ava upe –ehi.

⁴⁰ Evocoiyase mborerecuar, “Aviye” ehi chupe. Ipare opûha yeupisa harive, omopuha opo ava eta monguiriri âgua. Ahese oyapisaca tupri ava rehîi yuvireco. Ahe ava upe oñehe hebreo ñehe pipe aipo ehi:

22

¹ “Che mu eta, peyapisaca, che añehemira che yoepi âgua pëu cûritei” ehi.

² Oñehe hebreo ñehe pipe. Sese osenduse, oyapisaca tupri catu yuvireco.

³ “Che judío aico. Aha Cilicia ivi pipe Tarso ve. Cohave rumo acuacua, Jerusalén pipe, Gamaliel che mbohe oyerôquisave. Aheve ayembohe tupri yande ramoi porocuaita rese. Ahe che mbohesa pipe avei ayembohe Tûpa mboetei âgua rese vichico inungar pe peico cûritei.

⁴ Che yîpindar aseca-seca catu ava co Tecocuer Piasu rupi oguata vahe yamotarêhisave. Supitisave, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco.

⁵ Pahi rerecuar ivate catu vahe iyavei opacatu tecua pendar rerecuar oicua che reco yuvireco. Ichui niha aipisi cuachiar aru vaherã yande mu tûparo rerecuar Damasco pendar upe, ‘Taso Damasco ve pahi rerecuar rer pipe ava Jesús reroyasar pisi âgua. Ichui tarupa cohove imombaraisu âgua’ ahe viña.

Pablo omombehu oñecuñaro agüer

⁶ “Evocoiyase aso Damasco ve. Ahe ipiar rupi arovise vicho mbîter arî rupi, aviyeteramo têi osesape guasu îva sui oreu.

⁷ Ahese aviapi ivive. Asendu avei ñehesa: ‘Saulo, Saulo, ¿mahera vo che amotarêhi etepri eve?’ ehi vahe cheu.

⁸ Ahese aporandu: ‘¿Ava vo nde ereico, Mbia?’ ahe chupe. ‘Che Jesús, Nazaret pendar aico. Che niha che amotarêhi etepri che rereco eve’ ehi cheu.

⁹ Che rupindar osepia sendigüer, osiquiye avei yuvireco ichui. Ndosendui rumo ñehesa cheundar yuvireco.

¹⁰ Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epûha, êso Damasco ve. Aheve ava opara omombehu mbahe nde rembiaporã’ ehi cheu.

¹¹ Sendí iteanga vahe, ndache mboesapisoise, ahese che rupindar che po pisi che reraso Damasco ve yuvireco” ehi.

¹² “Aheve mbia, Ananías serer vahe, ou cheu. Ahe Tûpa mboyeroyasar ité, viroya tupri vahe avei iporocuaita; sese opacatu judío secua pendar: ‘Co mbia aviye vahe ité’ ehi yuvireco chupe.

¹³ Oyepotase, aipo ehi: ‘Che rivri, Saulo, esareco iri’ ehi. Aheseve iporêhi iri mbahe cheu.

¹⁴ Ipare aipo ehi: ‘Yande ramoi rembieroya, yande Ru Tûpa, nde poravo güemimbotar cua âgua. Oipota avei eresepia vaherã ichuindar ava seco ivi vahe, eresendu aveira iñehe’ ehi.

¹⁵ Nde evocoiyase eremombehura secocuer opacatu ava upe; eremombehura nde rembiepia, eresendu vahe avei’ ehi cheu.

¹⁶ Evocoiyase, cûritei ndiya iri eresãro’ ehi. ‘Epûha, toroãpiramo. Eporandu yande Yar upe nde reco moatiro âgua nde angaipa sui’ ehi Ananías cheu.

“Tūpa che mondo ava ndahei vahe judío upe” ehi Pablo

¹⁷ “Coiyé catu, ayeví irise Jerusalén ve, ayerure tūparo guasu pipe. Ahese che quer nungarve asepia mbahe.

¹⁸ Asepia yande Yar. Ahe aipo ehi cheu: ‘Nde poyava, eso voi Jerusalén sui. Esepia, Jerusalén pendar ndoyapísaca potai chira eremombehuse ñehesa che resendar’ ehi Jesús cheu.

¹⁹ Che aipo ahe chupe: ‘Che Yar, opacatu che cua nde reroyasar roquenda-quendase, ainupa-nupa ucase avei aguatase judío tūparo yacatu rupi’ ahe.

²⁰ Aipo ahe avei chupe: ‘Oyucase Esteban yuvireco, ahe nde recocuer mombehúsar, che ahese asepia. Chepihañemoñeta rupi aviyeño oyucase yuvireco. Sese asãro yucasar yeosa vihã’ ahe chupe.

²¹ Che Yar rumo omboyeví cheu: ‘Eso, oromondora coi rupi ava ndahei vahe judío pãhuve’ ehi che Yar cheu” ehi Pablo ava rehí upe.

Pablo sundao rereciar guasu povrìve secoi

²² Aipo rupi osendu ñehe yuvireco. Ahese rumo osapucái pĩrata yuvireco chupe: “¡Tomano co mbia! ¡Toicove vite iri eme co ivi pipe!” ehi yuvireco chupe.

²³ Osapuca-pucái, osequiipa oyeaosa oñemoĩrombave yuvireco iyavei omombo-mombo ivi culhi ivate coti yuvireco yamotarẽhimbave.

²⁴ Ahese sundao rereciar guasu omoingue uca cuartelve, aipo ehi osundao upe: “Peinupa, ahese revo omombehura mbahe sui vo sãse ati yamotarẽhimbave ava yuvireco chupe” ehi osundao upe.

²⁵ Oñapichise rumo inupa ãgua yuvireco, Pablo omombehu ñepeí sundao rereciar upe:

—Yepe che judío, che rumo romano avei aico. ¿Iyacatu pĩha peinupara romano chupe mbahe rese poranduẽhiseve? —ehi mborerereciar upe.

²⁶ Osenduse ñehe, oso voi omombehu güerereciar upe.

—Eicua catu, aipo mbia romano secoi —ehi.

²⁷ Evocoyase sundao rereciar guasu ou chupe:

—¿Supi eté vo aipo nde romano ereico? —ehi.

—Taa, ahe ité niha aico —ehi.

²⁸ Ahese sundao rereciar guasu aipo ehi chupe:

—Che rumo setá guarepochi amondo romano che reco ãgua —ehi.

—Che rumo che ha ramo suive, romano aico —ehiñõ sundao rereciar upe.

²⁹ Ahese oinupa pota vahe osiquiyepave oyepepi yuvireco ichui; sundao rereciar guasu avei oicuae Pablo romano secosa rese, osiquiye ñapichi ucase.

Pablo oyoepi judío porandusa ivate catu vahesave

³⁰ Ahere ayihive sundao rereciar guasu oicua tuprì pota: ¿Mbahe sui pĩha judío oyamotarẽhi Pablo yuvireco? Evocoyase oyora. Ahese oyocuai porandusa pendar ivate catu vahe ahe opacatu judío pahi rereciar, opacatu ambuae judío rereciar iñemonuha ãgua yuvireco. Ahese ovĩraso uca Pablo yuvireco chupe.

23

¹ Aheve Pablo omahengatu ava oñemonuha vahe rese ohã aipo ehi chupe: —Che mu, che rembiapo mbahe tuprì Tūpa rovaque areco yepi che pihañemoñeta tuprisa pipe —ehi.

² Ahese Ananías, ahe pahi rereciar ivate catu vahe, yipì pendar uve, “Peiyurupete” ehi.

³ Ahese Pablo omboyeví chupe:

—¡Tüpa nde nupara, nde aviye tupri tēi angahu vahe ereico! Nde mbahe rese porandu āgua cheu porocuaíta rupi ereí. Evocoiyase, ¿mahera ereporocuai che yurupete āgua mborocuaíta mboyeroyaēhisa pipe? —ehi chupe.

⁴ Yivirindar aipo ehi yuvireco chupe:

—¡Ereñehe rai rutei seroírosa pipe co Tüpa rembiporavo, co yande pahi rerecuar ivate catu vahe upe! —ehi yuvireco.

⁵ Ahese omboyeví chupe:

—Che mu, ndaicuai co oñehe vahe pahi rerecuar ivate catu vahe secose. Esepia, icuachiapri pipe aipo ehi yandeu: ‘Peñehe rai eme pe rerecuar upe’ ehi —ehi.

⁶ Ahese oicuase oñemonuha vahe pāhuve amove oime saduceo, amove fariseo. Ahese oñehe pīrata chupe:

—Che mu, che fariseo aico iyavei fariseo che yesupa yuvirecoi. Oroviroya avei ava ocuereyeví vahe rā curi. Sese revo co imboasipave oporandu mbahe rese yuvireco cheu —ehi.

⁷ Aipo he ramoseve voi, fariseo, saduceo oñeñehoepepi-epi yuvireco. Sese oyemboyaho yuvireco.

⁸ Esepia, saduceo ndoviroyai vahe cuerayevisa iyavei “ndipoi Tüpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco.

⁹ Sese sãse guasu yuvireco. Ahese oime amove opūha vahe Moisés porocuaíta rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tēi. Aviyeteramo espíritu que Tüpa rembiguai revo oyemboyecua mbahe mombehu āgua chupe —ehi yuvireco.

¹⁰ Yaivu guasu catu-catu irise yuvireco, ahese sundao rerecuar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pāhu sui, pemoingue iri cuartel pipe” ehi.

¹¹ Ahe pītu pipe, yande Yar oyemboyecua chupe aipo ehi: “Eyemonguerēhi catu, Pablo, inungar che mombehu nde siquiyeēhisa pipe cohava Jerusalén ve, ēgüe ere aveira che mombehu Roma ve” ehi.

Omboguai Pablo yuca āgua yuvireco

¹² Ahere ayihive setá judío oñemonuha, omboguai Pablo yuca āgua yuvireco: “Tüpa rovaque ndayayucaise Pablo, ndayacarui chira, ndayaihui chiaveira; yayucase voi, yacarura, yaihura” ehi yuvireco.

¹³ Ahe ava aipo ehi vahe retacuer setá catu cuarenta sui.

¹⁴ Ichui yuviraso pahi rerecuar upe, tecua pendar rerecuar upe avei aipo ehi:

—Oromboguai Tüpa rovaque Pablo; ndorocarui chira ndoroyucaise —ehi yuvireco chupe—.

¹⁵ Sese pe, ambuae porandusa ivate catu vahe pendar avei peporandu ahe sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osēse, oroquētirora sese. Oyepotase ou, oroyucara —ehi yuvireco.

¹⁶ Pablo rihir rumo oyanduse sēracua, oso cuartelve chupe imombehu.

¹⁷ Ahese Pablo oñehe sundao rerecuar upe aipo ehi imombehu chupe: —Erasomi tēi co mbia chihivahe sundao rerecuar guasu upe. Omombehu pota mbahe chupe —ehi.

¹⁸ Evocoiyase mborerecuar viraso ahe chihivahe güerecuar upe aipo ehi:

—Pablo soquendapri oñehe cheu aipo ehi: “Eraso co mbia chĩhivahe sundao rerecuar guasu upe” ehi. Co chĩhivahe omombehu pota mbahe ndeu —ehi.

¹⁹ Ahese mborerecuar guasu oipisi ipo rese, viroyepipi ambuae sui, oporandu chupe:

—¿Mbahe vo eremombehu pota cheu? —ehi.

²⁰ Evocoiyase ahe aipo ehi:

—Judío rerecuar oyemboyoya yuvireco. Oporandu angahu tẽira Pablo rese seraso iri ãgua ñemonuhasa ivate catu vahesave ayihive yuvireco. “Oroporandu pota iri Pablo upe sembiapo rese” aipo ehi tẽira yuvireco ndeu —ehi—.

²¹ Ndereroyai chira ahe iporandusa yuvireco. Esepia, cuarenta sui setá catu ava oquẽtiro vaheerã yuvireco sese. Omboguai eté yuca ãgua yuvireco. Ndocarui, ndoihui chira aipo ndoyucaise yuvireco. Cũritei oyemoingatu, osãro viteño nde porocuita yuvireco —ehi mbia chĩhivahe chupe.

²² Ipare sundao rerecuar guasu omboyevi imondo, aipo ehi chupe: “Eremombehui rene ambuae ava upe eremombehu vahe cheu” ehi.

Pablo imondosa mborerecuar guasu Félix rovai

²³ Sundao rerecuar guasu ñuvirío opovri pendar sundao rerecuar upe aipo ehi yocuai: “Pemoingatu doscientos sundao Cesarea ve yuviraso vaheerã opi rese, ambuae setenta sundao cavayu harive iyavei doscientos tupri toguata lanza resendar yuvireco. Ipare pesopara pĩtuse las nueve pipe” ehi.

²⁴ “Pemoingatu uca avei cavayu Pablo yeupi ãgua. Ëgũe peye pesãro tuprira seraso yande rerecuar Félix upe” ehi.

²⁵ Evocoiyase sundao rerecuar guasu oicuachía Félix upe imondo. Aipo ehi chupe:

²⁶ “Imboeteipri ore rerecuar Félix. Che, Claudio Lisias, amondo che mahenduhasa ndeu.

²⁷ Iyavei co amombehu pota ndeu: judío oipisi co mbia yuvireco yuca ãgua viña. Che rumo aicua romano seco rese, ahese araso sundao sepi ãgua judío eta sui

²⁸ ‘¿mbahe rese pĩha ndoyambotai yuvireco?’ viya. Sese araso judío porandusa ivate catu vahe pendar upe ñemonuhasave yuvireco.

²⁹ Ahese aicua yamotarẽhisa judío porocuita sui tẽi iyavei ndoyapoi mbahe tẽi oreu. Sese ndiyai yuca ãgua oreu, soquenda ãgua avei.

³⁰ Ayanduse rumo judío oquẽtiro sese yuvireco, amondo voi evocoi mbia ndeu. Ipare amombehu yamotarẽhisar upe: ‘Peporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

³¹ Evocoiyase ahe pĩtu pipe sundao viroguata Pablo ocuaita rupi yuvireco, viraso Antĩpatris ve yuvireco.

³² Ahere ayihive sundao yuviraso vahe opi rese oyevi yugũeru cuartelve. Sundao cavayu ari pendar gũeraño rumo yuvirasoño vite.

³³ Viroyepotase Cesarea ve, omondo cuachiar mborerecuar guasu upe yuvireco. Aheseve avei Pablo omondo yuvireco chupe.

³⁴ Oyeroqui pare mborerecuar cuachiar rese, oporandu Pablo upe: “¿Que pendar vo nde ereico?” ehi. “Che Cilicia cotindar aico” ehi.

³⁵ —Oyepotase nde amotarẽhisar yuvireco, asendura nde yoepisa —ehi Félix chupe.

Evocoiyase oyocuai opĩtiviisar Pablo rãro ãgua gũetave Herodes rembia-pogũer pipe.

24

Pablo oyoepi mborerecuar Félix rovai

¹ Cinco ari pare, Ananías, ahe pahi rerecuar ivate catu vahe, tecua pipendar rerecuar avei yugüeru Cesarea ve. Ou avei mbia ava mbahe aposar p̄itiviasar oñehe vahe rā Pablo amotarēhi uca āgua, ahe serer Tértulo. Ahe yugüeru Pablo recocer mombehu āgua mborerecuar Félix upe.

² Evocoyase Félix güeru uca Pablo. Ahese Tértulo omboipi sese oñehe aipo ehi Félix upe:

—Nde imboyeroyapri ereico. Av̄iye ndeu nde porocuai tuprisa rese. Es-epia, ndipoi vavasa ore recua rupi. Ereyapo uca avei ore recua pipe mbahe iporañete vahe nde poroaisusa pipe.

³ Opacatu rupi nde ereyapo tupri vahe oroipisi. Sese, “Av̄iye ndeu” orohe ndeu, imboyeroyapri Félix.

⁴ Ndorombita pucu potai rumo che ñehe pipe. Sese eyapisaca raimi tēi catu che ñehe rese —ehi—.

⁵ Oroyandu co mbia ava mañeco tēisar oguata opacatu ivi rupi. Ore judío, ore mboyaho ore yeamotarēhi uca āgua, ahe Jesús, Nazaret pendar, reroyasar rerecuar —ehi—.

⁶ V̄iroique avei ava ndahei vahe judío ore tūparo pipe. Ēgüe ehi ore tūparo momara. Sese co oroipisi —ehi—.

⁷ Evocoi sundao rerecuar guasu Lisias rumo oyepota ore pāhuvē. Ahe op̄iratasa pipe vinose ore po sui,

⁸ aipo ehiño oreu: “Peso, tapemombehu co mbahe sembiapo Félix upe” ehi. Nde avei ereporandura sembiapo rese mbahe sui eté vo ēgüe orohe chupe —ehi Tértulo.

⁹ Aipo ehi tupri avei ambuae judío yugüeru vahe yuvireco supi.

¹⁰ Ipare Félix oyaiti Pablo upe ‘toñehe’ oyapave. Ahese oñehe:

—Aicua nde ereporocuai setá arav̄iter ore recua rupi. Sese ayoepira nde rovaque che rorivetesa pipe —ehi Félix upe—.

¹¹ Nde ereicua tupri potase, ereporandura supi eté co pipe doce ari ramo opa che yepotare Jerusalén ve Tūpa mboetei āgua.

¹² Co judío oicua yuvireco nañehengatai ava upe tūparo guasu pipe, namboav̄u ucai avei ava ambuae judío ñemonuhasa rupi iyavei que ambuae ava Jerusalén pendar —ehi—.

¹³ Co mbia ndoicatui eté mbahe che rembiavi mombehu seroya tupri āgua yuvireco ndeu.

¹⁴ Co rumo amombehu vahe ndeu: che amboetei Tūpa, ore ramoi rembieroya Tecocuer Piasu pihañemoñetasa rupi. Co judío upe rumo: “Co porombohesa co coti tēi vahe” ehi. Che rumo aroya ité opacatu icuachiapri porocuita pipendar iyavei Tūpa ñehe mombehusar rembicuachiagüer avei —ehi—.

¹⁵ Inungar co mbia, ēgüe ahe tupri avei aicua Tūpa ombogüerayevira ava omano vahecuer seco av̄iye vahe, ndaseco p̄orai vahe avei coiye.

¹⁶ Sese ayemoviracua tupri che pihañemoñetasa rereco tupri catu āgua yepi Tūpa rovaque, ava rovaque avei.

¹⁷ “Setá arav̄iter pare ayevi che recua Jerusalén ve ava iparaisu vahe upe porerocosa mondo āgua. Ahese avei mbahe m̄imba ayuca uca Tūpa upe seropov̄ehe āgua.

¹⁸⁻¹⁹ Evocoyase moviro judío Asia pendar che repia yuvireco Jerusalén ve tūparo pipe judío porocuita rupi che ñemoatiro pare. Ndiptoi ahese ava

rehii che rupi, namboai vu guasu ucai avei ava. Ahe che repia vahe rumo iya yugüeru ndeu che mombehu, que virecose che amotarêhisa yuvireco viña.

²⁰ Anise, aviyeteramo co oyepota vahe cohave yugüeru, omombehura ndeu que mbahe che rembiavi yuvireco pahî rerecuar guasu ñemonuhasave che reiquesendar” ehi.

²¹ “Co rese revo oñemoiro yuvireco cheu aipo ahe pîratase ipãhuve: ‘Che aroya ava ocuerayevira coiye. Sese che reraso pe rovai co pipe che recoãha ãgua yuvireco’ ahese” ehi Félix upe.

²² Félix oicua tupri co Tecocuer Piasu. Sese osendu pare aipo ñehesa, ndoyapo pota vitei mbahe, aipo ehiño ava upe:

—Oyepotase Lisias, ahe sundao rerecuar guasu, ahese voi aicua tupri catura aipo mbahe sembiapo —ehi Félix ava upe.

²³ Evocoyase oyocuai sundao rerecuar Pablo rãro ãgua: “Eremondomira rumo que mbahe semimbotar apo ãgua chupe iyavei imboripar yugüeruse, tihãnecoño yuvireco sese. Êgüe ere sãro” ehi Félix sãrosar upe.

²⁴ Moviro arî pare Félix viroyepota güembireco Drusila, ahe judía avei. Ahese Félix güeru uca Pablo, osendu pota iñhe Jesucristo reroyasa resendar yuvireco.

²⁵ Pablo rumo omombehuse chupe teco ñvisa resendar, teco ñearosa resendar avei iyavei aipo ehise: “Tüpa oporandura mbahe yande rembiapogüer rese yandeu arî cañise coiye” ehise, ahese Félix osiquiyepave aipo ehi Pablo upe:

—Esoño rane. Arecose arî nde ñhehe rendu iri ãgua, orogüeru uca irira —ehiño.

²⁶ Félix ipihañemoñeta yepi ‘Pablo revo omboura guarepochi cheu osê ãgua’ oya viña. Sese osãro pucu tõi. Iyavei setá oyupagüer güeru uca oyeupe oñemoñeta ãgua sese.

²⁷ Ñuvirío araviter pare rumo, Porcio Festo oi que Félix recuñara. Ahese Félix judío mboviha ãgua, oseya Pablo soquendasave.

25

Festo rovai Pablo imondosa

¹ Mbosapi arî oyepotare Festo osê Cesarea sui, oso Jerusalén ve.

² Aheve oyepotase, pahî rerecuareta, judío rerecuareta avei omombehu Pablo recocuer yuvireco chupe.

³ Ipare oporandu chupe: “Emboumi uca Pablo cohave oreu” ehi yuvireco ‘yayuca perî rupive’ oyapave yuvireco viña.

⁴ Festo rumo aipo ehi chupe: “Aní. Esepia, Pablo Cesarea ve soquendasao oico iyavei che ayevi piaivira vicho aheve” ehi.

⁵ —Sese pemondo pe rerecuar che rupi. Naporaise co mbia rembiapo, aheve tomombehu yuvireco cheu sembiapocueraî sereco mara ãgua —ehi Festo chupe.

⁶ Evocoyase Festo opita Jerusalén ve ocho arî rupi revo, anise diez arî. Ipare oyevi oso Cesarea ve. Ahere ayihive ouapî güendave ava reco moingatu ãgua oî. Ahese oyocuai Pablo reru ãgua.

⁷ Oyepotase Pablo oso, ahese judío yugüeru vahe Festo rupi, oyemboya yuvireco sese. Ahese omombehu-mbehu tõi Festo upe Pablo rembiapo yuvireco, ndoicatui eté rumo seroya uca ãgua yuvireco.

⁸ Esepia, Pablo aipo ehi oyoepisave:

—Ndayemboangaipai judío porocuita rese, judío tũparo rese, yande rerecuar guasu Roma pendar Cesar rese avei —ehi.

⁹ Festo rumo omboviha pota judío, sese oporandu Pablo upe:

—¿Ndequerēhi vo Jerusalén ve ereso vaherā? Aheve co mbahe nde rembiapo rese aporandura ndeu —ehi chupe.

¹⁰ Ahe rumo omboyevi chupe:

—Cūritei aico cohava romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ereicua ndipoi eté mbahe tēi ayapo judío amotarēhisave —ehi—.

¹¹ Ayapose que mbahe naporai vahe, aviyēño che yuca uca āgua eve; ndayapoise rumo co judío omombehu vahe yuvireco ndeu, ndiyai che mondo āgua evocoi ava povrive eve. Che rumo aso pota mborerecuar Cesar ivate catu vahe upe cheu mbahe rese porandu āgua —ehi.

¹² Ahese Festo oñemoñeta opitiviisar oporomboaracua vahe rese, ipare omombehu Pablo upe:

—Ereso pota Cesar upe. Aviye, eresora evocoyase —ehi chupe.

Pablo mborerecuar Agripa rovai

¹³ Evocoyase moviro ari pare, evocoi mborerecuar guasu Agripa, cuña Berenice rese, oyepota Cesarea ve “avirave” apo āgua Festo upe yuvireco.

¹⁴ Opitase yuvireco setá ari Cesarea ve, Festo omombehu Agripa upe Pablo recouer. Aipo ehi chupe:

—Oime ñepeí mbia soquendapri oseya vahe Félix cheu —ehi—.

¹⁵ Arose Jerusalén ve, judío pahi rerecuareta, tecua pendar rerecuareta avei omombehu yuvireco cheu secocuerai, ‘Tayucasa, tehi chupe’ oya yuvireco viña —ehi—.

¹⁶ Ahese aipo ahe yuvireco chupe: “Ndiyai eté romano mborerecuar onondo vaherā que ava uve sese oñemoñeta vahe rese mbahe moingatuēhi renondeve. Toyoepi rane omombehusar rovai, tomombehu tupri rane opacatu güecocuer” ahe judío upe —ehi—.

¹⁷ Sese yugüeruse cohava yuvireco, aporandu voi pota secocuer rese chupe. Evocoyase ñepeí ari pare aguapi che rendave porandusave. Ahese ayocuai che pitiiviisar evocoi mbia reru āgua —ehi—.

¹⁸ Evocoyase opūha sese oñemoñeta vahe sembiapo ai mombehu āgua. Asendu renondeve che pihañemoñeta: “Oyapo revo mbahe naporai vahe” ahe viña. Ndipoi eté rumo mbahe sembiapo —ehi—.

¹⁹ Mbahe sembieroya tēi omombehu yuvireco. “Evocoi Jesús omano” ehi ava yuvireco. Pablo rumo aipo ehi imombehu: “Jesús oicoveño ité” ehi.

²⁰ “¿Mara ahera piha co sembiapo moingatu?” ahe tēi. Sese aporandu chupe: “¿Ndequerēhi vo Jerusalén ve mbahe nde rembiapo rese porandu āgua ndeu?” ahe chupe —ehi—.

²¹ Pablo rumo oporandu cheu Cesar upe oso āgua. Oipota mborerecuar ivate catu vahe oyeupe mbahe güembiapo rese porandu āgua. Sese asoquenda ucaño vite sereco imondo āgua Cesar upe —ehi Agripa upe.

²² Evocoyase Agripa aipo ehi chupe:

—Asendu pota avei ahe mbia ñehe —ehi.

Ahe aipo ehi chupe:

—Ayihive voi teresendu —ehi.

²³ Ahere ayihive, Agripa oyepota, Berenice rese yugüeru chupe inungar opivondi vahe, êgüe ehi yuviroique mborerecuar ñemoñetasave sundao rerecuar iyavei opacatu tecua pipendar ava seco ivate catu vahe reseve. Ahese Festo oyocuai opitiviisar Pablo reru ãgua yuvireco,

²⁴ aipo ehi:

—Ore rerecuar guasu Agripa iyavei opacatu ambuae yuviroique vahe, peyapisaca: pesepia co mbia. Co mbia rese judío eta oñehe tēi yuvireco Jerusalén ve iyavei cohave Cesarea ve. Osapucái pīrata tēi yuvireco ‘itomano ité evocoi!’ oya yuvireco cheu —ehi—.

²⁵ Ndayosui rumo mbahe sembiapo yuca uca ãgua iyavei oporandu oso ãgua mborerecuar ivate catu vahe Cesar upe. Sese che ayemoingatu ité imondo ãgua chupe.

²⁶ Ndarecoi rumo mbahe naporai vahe aicuachía vaheṛā imondo ãgua chupe. Sese aru uca co mbia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeteramo oimera mbahe icuachiapirā sesendar Cesar upe nara —ehi—.

²⁷ Chepihañemoñeta amondose co mbia chupe, naporai cheu ndipoise mbahe sembiapo ai —ehi Festo Agripa upe.

26

Pablo omombehu güecocuer Agripa rovai

¹ Evocoiyase Agripa aipo ehi Pablo upe:

—Emombehuño nde yoepisa cheu —ehi.

Ahese Pablo omopuha opo oñehe ãgua aipo ehi:

² “Ore rerecuar Agripa, ayoepira che rorivetasave judío che rese ñemoñetañeta tēisa sui mbahe che rembiapoēhi rese nde rovai.

³ Esepia, ereicua tupri opacatu judío recocuer, ipihañemoñetasa avei. Sese eyapisacami nde reco mbegüesa pipe che ñehe rese” ehi.

Pablo omombehura güecocuer oñecuñaro viteēhisendar

⁴ “Opacatu judío che cua vahe yuvireco, oicua tupri che recocuer che chihivahe suive che recuave iyavei Jerusalén ve aicose yuvireco.

⁵ Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recua rupi’ ehira yuvireco viña.

⁶ Sese cūrítei che reru nde rovai yuvireco che recocuer rese nde porandu ãgua. Esepia, aroya Tūpa remimombehugüer ore ramoi uve omombehu vahe aracahe” ehi.

⁷ “Doce ore ramoi suindar opacatu judío yuvirecoi, osāro vite evocoi Tūpa remimombehugüer avīye vahe yuvireco. Sese yuviroique tūparove ari, pītu pipe avei Tūpa mboetei ãgua yuvireco. Ore rerecuar Agripa, eyapisaca tupri che ñehe rese. Evocoi Tūpa remimombehugüer reroyasa sui judío eta semiramira tēi che amotarēhisave che rese yuvireco” ehi.

⁸ “Iyavei opacatu pe, ¿mahera pe avei ndaperoyai Tūpa porombogüeraveisa?” ehi.

Pablo omombehu yipindar Jesús reroyasar amotarēhi agüer

⁹ “Yipindar che avei che pihañemoñeta rai aracaco mbahe tēi apo ãgua rese ava Jesús, Nazaret pendar, rer amotarēhisave.

10 Ēgüe ahe Jerusalén ve. Ombose pahí rerecuar oporocuaíta cheu, ahese serer pípe setá Jesús reroiyasar asoquenda; iyavei ambuae ava oyucase Jesús reroiyasar yuvireco, ‘Toyucaño yuvireco’ ahe voíño ité che” ehi.

11 “Setá rupi amombaraisu Jesús reroiyasar ‘tamomboipa ava seroyasa sui yuvireco’ che hesa pípe tēi. Ēgüe ahe aguata opacatu tūparo rupi, ambuae tecua rupi avei yamotarēhisa pípe” ehi.

Pablo omombehu güeco recuñaro agüer

12 “Evocoiyase aso avei Damasco ve Jesús reroiyasar mombaraisu āgua, pahí rerecuar ombouse oporocuaíta apo āgua cheu” ehi.

13 “Mbiter ari rupi rumo, aguatase Damasco piar rupi, asepia mbahe sendí vahe íva sui. Ari sui osesape catu cheu, che rupindar upe avei.

14 Orovíapipase ívive, asendu ñehesa aipo ehi vahe hebreo ñehe pípe cheu: ‘Saulo, Saulo, ¿mahera vo ereyapo mbahe-mbahe tēi cheu? Ereyapose evocoi mbahe tēi, nde ae ereyemombaraisu’ ehi cheu.

15 Evocoiyase amboyeví: ‘¿Ava vo nde ereico, mbia?’ ahe chupe. Omboyeví cheu: ‘Che Jesús aico, che niha co che amotarēhi eve.

16 Epūha, co rese ayemboyecua ndeu, tasecoi che rembiguai, che yapave. Tomombehu avei co mbahe osepia vahe iyavei tomombehu avei co mbahe amboyecua vaheerā chupe curi, víya ndeu’ ehi.

17 ‘Oropīsírorra judío sui iyavei oromondora ava ndahei vahe judío upe. Ereguatase ipāhuve, oropīsíro aveira’ ehi cheu.

18 ‘Oromondora, tache cua yuvireco, che yapave iyavei toguata iri eme pītumimbi vahe nungar rupi; toguata catu tesapesa rupi yuvireco. Ipípe sui toyuvireco iri eme carugar povrive yuvireco; toguata catu Tūpa rupi; ēgüe tehi che roroya yuvireco. Ahese oipísira ñeroisa oangaipa rese yuvireco iyavei oipísira Tūpa porrecosa oime vaheerā opacatu che rembipeha rupive’ ehi Jesús cheu” ehi Agripa upe.

Pablo víroya mbahe güembiepia

19 “Evocoiyase, che rerecuar Agripa, che quer nungarve asepia vahe íva pendar, aroya ité.

20 Aipo ahe ava upe: ‘Pemboasi pe angaipa; peyeví Tūpa upe. Peicove tupri, ipípe sui toicua avá yuvireco pe ñecuñarosa’ ahe. Aipo ahe Damasco pendar upe rane añehe, ipare Jerusalén pendar upe iyavei Judea rupindar upe, coiye catumi ava ndahei vahe judío upe.

21 Sese tēi judío che písi tūparo pípe che yuca pota yuvireco” ehi.

22 “Tūpa che pītiviisa pípe rumo aicoveño ité supi, amombehu-mbehu vite Tūpa recocuer opacatu ava seco ívi coti catu vahe upe, seco ívate catu vahe upe avei. Namombehu eté que mbahe co coti tēi Tūpa ñehe mombehusar iyavei Moisés, ‘Oimera mbahe aviye vahe’ íhe agüer sui.

23 Aracahe omombehu yuvireco: ‘Tūpa Rembiporavo Poropīsírosar omano ranera’ ehi. Ahe rumo yípindar ocuerayevi vaheerā omano vahe pāhu sui. Omombehu aveira tesapesa ñepísírosa resendar ore mu judío yuvirecoi vahe upe iyavei ava ndahei vahe judío upe avei” ehi Agripa upe.

Pablo osecuñaro pota tēi Agripa recocuer

24 Aipo ehise Pablo oñehe oyoepisave, Festo oñehengataño chupe aipo ehi: —¡Nande mboaracuai moco nde mbahecua vaisa! —ehiño chupe.

25 Ahe rumo omboyeví chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supi eté vahe, ndahei che aracuaēhisave —ehi Festo upe—.

²⁶ Co mborerecuar revo oicua tupri avei che remimombehu. Sese ndasiquiyei opacatu co mbahe mombehu āgua chupe. Esepia, opacatu co mbahe yaposa vahe ndahei ñomipri tēi.

²⁷ Ore rerecuar Agripa, ¿ereroya vo evocoi Tūpa ñehe mombehusar rembicuachía? Che aicua ereroya ité —ehi Agripa upe.

²⁸ Ahese Agripa omboyeví chupe:

—Moviro tēi ñehesa ipane cheu Jesús reroya āgua —ehi chupe.

²⁹ Ahe omboyeví Agripa upe:

—Ipanese que moviro tēi, anise setá vite ñehesa ndeu iyavei opacatu osendu vahe che ñehe co pipe, ēgüe ehi tarahu Tūpa pēu viña che nungar pe reco āgua. Ndahei chira rumo soquendapirā peico —ehi.

³⁰ Aipo ihe pare, mborerecuar guasu iyavei ambuae mborerecuar Berenice reseve iyavei opacatu sendusar opūha yuvireco.

³¹ Oyepepi pare, oñemoñeta co coti aipo ehi yuvireco:

—Evocoi mbia ndoyapoi eté mbahe. Sese ndiyai yucapirā; ndiyai avei soquendapirā viña —ehi yuvireco oyeupe.

³² Ahese Agripa aipo ehi:

—Ahe ndoporanduisse Cesar upe oso āgua rese, yamoseño itera niha viña —ehi Festo upe.

27

Pablo imondosa Roma ve

¹ Evocoiyase mborerecuar opihañemoñeta omboyoya yuvireco ore mondo āgua carite pipe Italia ve. Sese omondo Pablo iyavei ambuae ava soquendapri yuvireco mbia Julio serer vahe upe. Ahe mbia sundao rehi rerecuar secói, ahe yuvirecoi vahe rer Mborerecuar upendar.

² Oroha carite pipe, ahe Adramitio sui yuviraso pota vahe Asia ve. Mbia Tesalónica pendar, Aristarco serer vahe, oha avei ore rupi, ahe secua Macedonia ivi rupi.

³ Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguata tupri nde mboripar rēta rupi nde rese ihañeco tupri āgua yuvireco” ehi chupe.

⁴ Sidón sui orosirise, oroso Chipre ivi rupi ivitu sui ore ñemoha āgua. Oroso pota tēi ari sosa coti rupi, ndoroicatui rumo. Esepia, oipeyu pīrata ivitu icoti sui.

⁵ Evocoiyase oroguata para guasu pipe Cilicia, Panfilia ivi rupi. Ipare oroyepota tecua Mira yemboyasave, ahe Mira, Licia ivi pipe.

⁶ Aheve sundao rerecuar oyosu carite ou vahe Alejandría sui, oso vaherā Italia ve. Evocoiyase ahe ipipe opa voi ore mboha.

⁷ Ichui oroguata mbegüe setá ari. Oroporaviquí iteanga oreypota āgua Gnido rovai. Ivitu oipeyu pīrata vite. Sese oroyahuva Creta coti, oroñocua tecua Salmón rovai rupi. Ēgüe orohe oroso Creta cupe rupi.

⁸ Supi yavai rai ore guata āgua, ipare oroyepota yemboyasa Yemboyasa Aviye vahe serer vahesave. Ahe ichui namombrii tecua Lasea.

⁹ Ore yepota āgua aheve, setá ari oromocafi. Ahese ivitu naporai catu oreu cute. Esepia, virovi ari naporai catu vahe. Sese Pablo aipo ehi carite pipendar upe:

10 —Mbia, naporai iri chira revo yande guata vite ãgua. Yaguata vitesse, yamocañira carite, ivosiita reseve, yande avei eté aviyeteramo yacañi tẽira —ehi.

11 Sundaõ rerecuar rumo nomboyeroyai iñehe, ahe omboyeroya catu carite roguatar, carite yar avei.

12 Ahe yemboyasa naporai ivitu ai rãro ãgua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasãro ivitu ai” ehi yuvireco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi avei yepi.

Ivitu ai para guasu pipe

13 Oipeyu mbegüemise ivitu irohi coti sui, ipihañemoñeta yuvireco, “Yaicatuño ité yande yepota ãgua” ehi yuvireco viña. Ahese orosirise ore yemboyasa sui, oroso Creta ivii rupi.

14 Coiyemi tẽi rumo oyepota ivitu ai oreu Creta coti sui. Ahe ivitu ai ou norte ique coti sui.

15 Oyepotase oreu, ndoroicatu iri eté sovaichi. Evocoyase, “Tayande rerasoño” orohe chupe.

16 Oroñoocua caha pãhumi serer Cauda. Ahe oroñoocuasave oroviroha sãi ore caritemi ore carite guasu pipe.

17 Orosupire, ahe oicuhacua carite guasu inicha pipe yuvireco. Ipare ipihañemoñeta yuvireco ‘carite oyeupi tiẽtera ivi cuhi Sirte serer vahe harive’ oya. Sese opa viroyi imombitasa yuvireco. Ahese ivitu ore roguataño.

18 Ivitu rumo ombohitú iteanga para guasu. Sese ahese ayihive oporaviqui vahe omboipi carite vosiita mombo yuvireco.

19 Imombosapisa ari pipe, omombo vite mbahe carite resendar yuvireco.

20 Setá ari ndoyecuai ari, yasitata avei oreu. Ivitu ai ndopaiño ité avei. Opa ité ore pihañemoñeta mocañi, “Yacañi tẽi etera para guasu pipe” orohe viña.

21 Setá ari ore caruẽhi pare, Pablo opũha aipo ehi carite pipendar upe: —Mbia, ehi acoi che reroya vaira peye viña, nayasẽise Creta sui, ahese ndipoi chira co mbahe yandeu cũritei viña —ehi—.

22 Cũritei, peyemonguerẽhi catuño. Esepia, ndipoi chira yande pãhu pendar omano vahe, carite güeraño rumo ocañi tẽira.

23 Ayihi pisa oyemoporẽhi cheu Tũpa rembiguai semimbou, chupendar che aico, chupe avei aporaviqui.

24 Ahe aipo ehi cheu: “Pablo, eresiquiyei rene. Ereyepotaño itera Cesar upe. Tũpa oipisiro aveira opacatu nde rupindar carite pipendar” ehi cheu.

25 Mbia, ayeroya Tũpa rese. Esepia, ahe omboaviye itera oñehesa cheu. Sese peyemonguerẽhiño —ehi—.

26 Yande mohañira rumo imbehi coti caha pãhumi rese yande mondo —ehi.

27 Nũvirio semana ivitu ore reroguata pare ahe pĩtu mbiter pipe para guasu Adriático rupi oroicose, carite pipe oporaviqui vahe ipihañemoñeta yuvireco ‘yarovi revo ivi yaico’ oya.

28 Sese osãha para guasu ripigüer yuvireco. Ahe tipigüer treinta y seis metros tupri. Ipare osiri irimi yuvireco. Aheve osãha iri, tipigüer veintisiete metros tẽi. Ahese oicua, “Yarovi ivi” ehi yuvireco.

29 Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiyepave omombo irungatu carite mombitasa tuvicha vahe ipive yuvireco. “¡Omocohe voi tarahu Tũpa yandeu viña!” orohe tẽi.

³⁰ Oñemi potase oporaviqui vahe carite guasu sui yuvireco, viroyi caritemi mbahemohasa. Ombopa pota tēi ambuae carite pipendar yuvireco viña, “Oromombora carite renonendar imombitasa” ehi tupri tēi yuvireco.

³¹ Pablo rumo aipo ehi sundao rerecuar upe, sundao eta upe avei imobehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

³² Ahese sundao eta oyasia caritemi sã oiti ive imondo yuvireco.

³³ Cõhe ramose Pablo aipo ehi opacatu upe:

—Cũritei ñuvirio semana pemomba pecaruēhi peico ‘¿mara yahera pñha co yaico?’ pe hesa pipe.

³⁴ Evocoiyase pehuñomi mbahe cute pe ñepisiro ãgua. Acoi ocañise carite, yande rumo nayacañi chira iyavei que ñepe pe ha nocañi chietera —ehi Pablo.

³⁵ Aipo ehi pare, oipisi pan, “Aviye ndeu” ehi Tũpa upe ihu ãgua. Ahe imbohi pare, ohu.

³⁶ Evocoiyase opacatu ava oyemonguerēhi yuvireco ocaru ãgua.

³⁷ Ore retacuer doscientos setenta y seis tupri.

³⁸ Ore caru pare, oporaviqui vahe opa omombo trigo carite vosiita para guasu pipe iposiiēhi ãgua yuvireco.

Carite ocañi

³⁹ Cõhese, osepiase ivi, “¿Que pñha yaico?” ehi tēi yuvireco. Oyosuse rumo yãcua vahe, ipipe oime ivi cuhi ipiru vahe. Aheve yuviroique pota tēi yuvireco viña.

⁴⁰ Oyasia ahe carite mombitasa cuasa carite sui yuvireco, omonguhi carite mbohahuvasa, osupi carite resendar turucuar imboguatasta yuvireco. Evocoiyase oroique oroso yãcua vahe pipe.

⁴¹ Oroguatase rumo, oroyapi ivi cuhi. Aheve carite opãha ité sese. Ndoica-tui eté seroyevi yuvireco iyavei carite rupita i ohitu vahe opa tupri oyoca.

⁴² Ahese sundao eta, “Aviyeteramo soquendapri ohita tiētera, oñemi yuvireco. Sese yayucapa” ehi yuvireco chupe viña.

⁴³ Sundao rerecuar rumo ndoipotai Pablo mano ãgua, sese, “Teheni” ehi, “peyucai rene soquendapri” ehi. “Ohita oicua vahe rane toyuvirocui ive, toyuvinose ivi rese yuvireco” ehi.

⁴⁴ “Ambuae evocoiyase ivirape, carite yecacuer rese toyasecoño yuvinose ãgua ivi rese” ehi. Ēgüe orohe orosēpa ivi rese oroso.

28

Caha pãhu Malta ve Pablo seci

¹ Ore ñepisiropare, ahese ramo oroicua caha pãhu rer Malta revo rahe.

² Ahe pendar ava nihapisi ore repiase yuvireco. Oquí iteanga, sõhisa avei. Ahese oyatapı guasu yuvireco, “Perio, tapeyepemi” ehi yuvireco oreu.

³ Evocoiyase Pablo omonuha yepaha seru, omondo potase rumo tatave, ahese osē aviyeteramo tēi sacucuer sui mboi ahe eté vahe chupe, oipomama ichuhu.

⁴ Osepiase mboi ichuhuse ahe pendar yuvireco, ahese, “Co mbia revo oporapichi vahe ité. Yepe oñepisiro para guasu sui viña, Tũpa rumo oichuhu uca mboi upe ‘tomano’ oya” ehi yuvireco viña.

⁵ Ahe rumo omomboño mboi tatave imondo oyesui. Ipare nomomaraño ité.

⁶ Ahe pendar opacatu osãro tēi yuvireco, “Irurura chupe, ahese oviapira, omanora revo” ehi yuvireco chupe viña. Osãro pucu tēi yuvireco, Pablo rumo nimaraiño ité. Ahese, “Ndahei vo co mbia tūpa ité co seci” ehi tēi yuvireco chupe.

⁷ Evocoyase mbia Publio serer vahe, ahe opacatu caha pāhu Malta pendar ava rerecuar seci. Ivi namombriimi ichui. Ahe nihapisi ore repia güetave iyavei ihañeco tupri ai ore rese mbosapi ari rupi.

⁸ Aheve ore recoseve Publio yesupa sohi iteanga ou, sepochiivi avei. Evocoyase Pablo oi que chupe. Ahese oyeroqui Tūpa upe sese, omondo opo iharive. Ēgüe ehi imbogüera.

⁹ Oyanduse ahe icuera yuvireco, ahese ambuae imbaheasi vahe evocoi caha pāhu pendar yugüeru chupe, ahe ombogüerapa avei.

¹⁰ Ahe pendar oyemboava etepri yuvireco oreu. Ipare ore ha āgua ambuae carite pipe, opacatu mbahe ore guatasa rupi ipanehi āgua ogüeru yuvireco oreu.

Pablo oyepota Roma ve

¹¹ Co carite mbosapi yasi osãro vahe ari mbahe tēi vahe pituhu āgua. Ipipe oroso. Ahe carite yugüeru Alejandria sui. Ahe ichi rese ñuvirio itūpa rahanga yuvireco: ñepe rer Cãstor, ambuae evocoyase Pólux.

¹² Ahese oroso oroyepota yemboyasa Siracusa ve. Aheve oropita mbosapi ari.

¹³ Ichui orosē oroso oroyepota Regio ve. Ahere ayihive ivitu oipeyu irohi coti sui. Sese oroyepota Puteoli ve ambuae ari pipeve.

¹⁴ Aheve orosepia ambuae Jesús reroyasar. Ore mombita güetave yuvireco ñepe semana. Ipare oroso Roma ve ivi rupi.

¹⁵ Jesús reroyasar Roma pendar yipive ore andu yuvireco. Sese moviro yugüeru Foro de Apio ve, ambuae yugüeru Tres Tabernas ve ore rape penda āgua yuvireco. Sepiase, Pablo, “Aviye ndeu” ehi Tūpa upe.

¹⁶ Oroyepotase Roma ve, sundao rerecuar co coti omondo Pablo ñepe sundao upe sãro uca āgua.

Pablo omombehu Roma ve Tūpa Ñehengagüer

¹⁷ Mbosapi ari pare Pablo omonuha opacatu judío rerecuar Roma pendar. Ahese oñhe chupe:

—Che mu eta, ndayapoi mbahe tēi judío Jerusalén pendar upe, narioi avei yande ramoi recocuer viña. Che roquendas rumo iyavei imondopri aico Romano sundao rerecuar povrive.

¹⁸ Ahe mborerecuar oporandu che recocuer rese yuvireco. Oicuase che recocuer, opoi pota tēi che sui yuvireco viña. Esepia, ndoyosui eté mbahe che rembiapo che yuca āgua yuvireco.

¹⁹ Evocoi judío rumo ndoipotaiño ité chupe. Ahese ayu pota cohava Cesar upe che yoepi āgua. Nayamotarēhi uca potai rumo che mu Jerusalén pendar Cesar upe —ehi—.

²⁰ Che yoepi āgua oposoho uca. Opomñeta pota yande remiario rese. Co Tūpa Rembiporavo ava pisiro āgua resendar reroyasa rese carena pipe ñapichimbri aico —ehi—.

²¹ Ahese ahe ava omboyevi yuvireco chupe:

—Ndoroipisi eté cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recocuer resendar yuvireco oreu —ehi—.

²² Opacatu rupi ava viroĩro pe rembieroya piasu yuvireco. Sese orosendu pota nde pihañemoñetasa —ehi yuvireco chupe.

²³ Oiporavo ari ñehe ãgua yuvireco. Osupitise ari chupe, setá catu ava oñemonuha yuvireco secosave. Ahese omombehu Tũpa mborerecuasa resendar iyavei Jesús recocuer Moisés porocuita icuachiapri pipe sui iyavei Tũpa ñehe mombehusar rembicuachía pipe avei ‘toviroya yuvireco’ oyapave. Ëgüe ehi imombehu ari momba.

²⁴ Amove osendu vahe viroya yuvireco, ambuae rumo ndoviroyai eté yuvireco.

²⁵ Opihañemoñetasa nomboyoyaise yuvireco, yuvínosepa pota. Ahese aipo ehi ahe ava upe:

—Supi eté Isaías omombehu Espiritu remimombehu pe recocuer resendar pe ramo upe aracahe aipo ehi:

²⁶ “Eso nde mu pãhuve.

Emombehu aipo ere:

‘Yepe pesendu tẽira mbahe viña,
ndapesenducuai chira rumo.

Iyavei pesepia tẽira mbahe viña,
ndapemahecuai chira rumo sese’ ere chupe.

²⁷ Esepia, co ava ipiharátá iteanga seroyaẽhisave.

Ndoyemboapisaiño yuvireco.

Iyavei osapivi tupriño mbahe sui, ndosepia potai mbahe aviye vahe yuvireco.

Ndosenducua catui eté avei ñehesa supi eté vahe.

Evocoiyase ndoyevi potai cheu güecocuer moingatu yuvireco” ehi Espiritu Santo

remimombehu chupe aracahe —ehi—.

²⁸ Sese tapeicua co pipe suive Tũpa omboyecua ucara oporopĩsirosa ava ndahei vahe judío upe. Ahe niha oyapĩsacara imombehusa rese yuvireco —ehi chupe.

²⁹ Aipo ihe pare, judío yuvínose ñehe rese oyecopi-copi yuviraso.

³⁰ Ipare Pablo opita ambuae ava rêtave ñuvirío araviter rupi omboepi oque ãgua oico. Aheve nihapĩsi opacatu ava rese oyepĩri oyepotase yepi.

³¹ Omombehu Tũpa mborerecuasa resendar iyavei oporombohe opacatu yande Yar Jesucristo recocuer resendar osiquiyẽhisa pipe. Ndipoi eté que ava omombituhu vahe Pablo ñehese.

PABLO REMBICUACHIA ROMA PENDAR UPE ROMANOS

Pablo mahenduhasa Roma pendar Jesús reroyasar upe

1 Che Pablo, Jesucristo rembiguai, aicuachía co che ñehe pëu. Tüpa che poravo apóstol che reco água ñehesa poropisirosa resendar mombehu água.

2 Tüpa niha yipisuive omombehu uca co ñehesa ava oñehe mombehusar upe icuachiapri maranehi pipe aracahe.

3 Ahe ñehesa Tüpa Rahir Jesucristo resendar. Ahe ava güecosa pipe ité oyesu ou mborerecuar guasu David suindar sui;

4 ocuerayevise oespíritu maranehi pipe, ahe se opirataso pipe omboyecua tupri ité Tüpa Rahir güecosa. Ahe niha yande Yar Jesucristo.

5 Ahe ichui Tüpa ombou che oporopitiviisa apóstol che reco água, che cuai avei ava ndahei vahe judío upe Guahir recocuer mombehu água opacatu ivi rupi sese yeroya uca água 'ipipe sui toviroya che Rahir yuvireco' oya.

6-7 Pe Roma pendar peico vahe, pe avei senoipri ipáhuve peico Jesucristo rese peico vaherã. Pe niha Tüpa rembiaisu peico. Oipota avei pe reco catupri água oyeupe nara. Peipisi catu porovasasa, teco tuprisa yande Ru Tüpa suindar, yande Yar Jesucristo suindar avei.

Pablo oso pota Jesús reroyasar repia Roma ve

8 Che yipindar yande Yar Jesucristo rer pipe, "Aviye ndeu" ahe Tüpa upe pe rese. Esepia, opacatu ivi rupi icuapri sese pe yeroyasa.

9 Iyavei Tüpa oicua pe rese ari rupi che yeroquisa. Chupe ité niha mbahe ayapo opacatu che piha pipe, amombehu Tahir resendar ñehesa aviye vahe vichico.

10 Aporanduno ité semimbotar rupi pe piri che so água rese chupe yepi.

11 Esepia, che aso pota ité Espiritu suindar mbahecuasa mondo pëu pe pñitivi água 'toyemoviracua tupri catu Cristo rese yuvireco' che yapave.

12 Che aipota ité yande ñepeipei yañepitivi catu água Cristo rese yande yeroyasa yareco vahe pipe.

13 Che rivireta, che aipota peicua setá rupi che so pota tēisa pe piri yepi. Cūrítei rumo ndaicutuño vite ité. Che rumo aipota, "Toime que che poraviquisa sui Cristo rese oyemoviracua catu vahe yuvireco ipáhuve" ahe pëu, inungar opacatu ambuae ivi rupi egüe ahe ava ndahei vahe judío upe vichico.

14 Che cuaita ité niha opacatu ava upe che ñehe água, tecua pipendar yuvirecoi vahe upe iyavei ndayaracua vitei vahe upe, imbahecua vahe upe, nimbahecua vahe upe avei no.

15 Sese pe Roma ve peico vahe upe avei ayemonguerēhi voi eté co ñehesa pñisirosa resendar mombehu água.

Ñehesa pñisirosa resendar pirataso

16 Che nachī eté co ñehesa pñisirosa resendar aviye vahe sui. Esepia, ahe Tüpa pirataso opacatu viroyasar pñisiro água, judío rane yipindar, ipare opacatu ambuae ava-ava tēi avei.

17 Supi eté co ñehesa omboyecua Tüpa ava reco mbocatuprisa. Oyese yande yeroyasa pipeño ité egüe ehī yandeu. Esepia, icuachiapri arachendar aipo

ehi: “Acoi ava seco catupri vahe Tūpa rese oyeroyasa pipe sui oicoveño itera apirēhi” ehi.

Opacatu ava rembiavi resendar

¹⁸ Supi eté niha yande Aposar oñemoirosa ipirata vahe ombou itera iva sui opacatu ava viroyasarēhi upe, ndaseco pōrai vahe upe avei, mbahe gümbiapo ai sui ndoicua uca potai vahe co ñehesa supi eté vahe ambuae ava upe yuvireco.

¹⁹ Ahe oicua tupri tēi mbahe Tūpa suindar yuvireco. Esepia, Tūpa ité niha omboyecua chupe.

²⁰ Ēgüe ehi eté Tūpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo sui ve oime vahe rese. Sese yaicua ahe Tūpa ité secoi iyavei ipiratasa apirēhi vahe. Sese ava angaipa viyar ndiyai, “Eñemosañō tēi rane oreu” ehi vaherā yuvireco chupe.

²¹ Esepia, yepe ahe oicua tēi Tūpa yuvireco viña, nomboetei rumo Tūpa secosa rese. “Aviye ndeu” ndehi avei yuvireco chupe. Iyavei ipihañemoñeta mbahe ēgüe ehi tēi vahe rese. Ipīpe sui mbahe ndosenducua catu iri eté yuvireco.

²² Yepe, “Ore mbahecua vai” ehi tēi viña, ndoicuai eté rumo mbahe ipīpe yuvireco.

²³ Esepia, ahe Tūpa nomanoi vahe seco porañete vahe mboetei rāgüer sui, omboetei ava ocañi tēi vaherā rahanga yuvireco iyavei vīrai, opacatu mbahe mimba, mboi tēi avei omboetei yuvireco.

²⁴ Sese Tūpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboeteiñehisa pipe yuvireco.

²⁵ Esepia, mbahe supi vahe reroya rāgüer sui temira tēi viroya catu yuvireco. Iyavei Tūpa ité mboyeroya rāgüer sui omboetei catu mbahe sembiapocuer tēi yuvireco. Yaposar ité ru timboeteisa catu yepi.

²⁶ Sese Tūpa opoi eté ichui, “Toyapoño poromochisa mbahe tēi güemimbotarai pipe yuvireco” ehi chupe. Evocoiyase cuña avei cuimbahe rese güeco rāgüer sui yuvirecoi oyese ae.

²⁷ Cuimbahe avei cuña rese güeco rāgüer sui yuvirecoiño avei oyese ae iyavei oipota raiño ité evocoi güeco raisa yuvireco. Evocoi nungar aposa sui oyemomara ahe ae yuvireco.

²⁸ Iyavei, “Tūpa supi eté vahe” ndehise seroyañehisa pipe yuvireco, Tūpa evocoiyase opoi eté ichui ‘toyapoño ayase mbahe ndipotasai vahe güeco raisa pipe yuvireco’ oya chupe.

²⁹ Ahe evocoiyase yuvirecoi opacatu mbahe-mbahe tēi pipe; oyemboaguasa-guasa tēi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tēi ava upe. Ahe oñemoiro ambuae ava mbahe pota raisave tēi, oporapichi, ivava serai, iporombopa serai, ipihañemoñeta ava reco momara āgua tēi iyavei imahechiroi ai ipīpe yuvireco.

³⁰ Iyavei ambuae ava cupe cotive mara ehi-ehi tēi vahe, ahe Tūpa amotarēhisar yuvirecoi, viroiro avei ava, oyemboivate ai, oyecomboivate ai tēi avei oñehē pipe yepi, oseca-seca tēi mbahe naporai vahe güembiaporā, nomboyeroyai avei oyeseupa yuvireco,

³¹ ndoyapisaca potai eté Tūpa suindar ñehesa rese, nomboaviyeyi avei oñehe, ndosaisui avei que ava, niñeroi avei ava upe, ndoiparaisuercoi eté ava yuvireco.

³² Oicua tēi Tūpa “oimera evocoi nungar aposar upe cañisa” ehi vahe, oyapo viteño rumo mbahe tēi yuvireco iyavei ambuae ava oyapose mbahe tēi, ovihareteño sepiase yuvireco.

2

Tūpa omondo ava upe sembiapogüer rupi tupri ité

¹ Oimese que pe pāhu pendar ‘co oyapo mbahe tēi; tocañi’ ohesave ambuae upe, ahese ahe ae oyemocañi tēi uca. Esepia, ahe inungar tupri avei.

² Yaicua rumo Tūpa omocañise evocoi nungar mbahe tēi aposar recocuer, ahe evocoyase oyapo mbahe supi tupri vahe.

³ Pe opase ava recocuer pesenoi, pe avei rumo ñgüe peye tupri peico. Pe avei eté evocoyase ndapeñemi chietera Tūpa ñemoirosa sui.

⁴ ¿Peroiro tie Tūpa oyapo vitese mbahe aviye vahe oñemosase, seco mbegüe tupri ai vitese avei pēu? ‘Tosecuñaro güecocuer yuvireco’ oyapave rumo ñgüe ehi pēu.

⁵ Pe rumo pepiharāta viteño ité Tūpa upe pe yevi potaēhi āgua. Sese pereco catu viteño ité Tūpa ñemoirosa peyese, acoi ari oyepotase Tūpa güeco tuprisa pipe yande renoipara yande mocañi āgua, anise yande pīsiro āgua curi.

⁶ Ahese opara omboepi ñepeipei yande rembiapogüer rupi yandeu.

⁷ Omboura tecovesa apirēhi vahe yandeu yasecase teco ori, Tūpa suindar poromboeteisa iyavei mbahe apirēhi vahe yande mbahe tupri aposa pipe.

⁸ Ombou aveira oñemoirosa ava ndiporomboyeroyai vahe upe, ahe acoi co ñehesa supi eté vahe reroya rāgüer sui viroya vahe mbahe tēi.

⁹ Judío opacatu mbahe-mbahe tēi aposar ranengatu oiporarara mbahe rasicuer yuvireco, iparera ndahei vahe avei judío.

¹⁰ Tūpa rumo opacatu seco catupri vahe upe omondora imboetei āgua ‘toipisi teco ori iyavei toyuvirecoi mbahe tupri pipe’ oya chupe. Yipindar rumo judío eta upe rane omondora, iparera ndahei vahe judío upe.

¹¹ Esepia, Tūpa ndayande mboyoaviratii yande rereco.

¹² Ñgüe ehi eté, opacatu oyemboangaipa vahe Moisés porocuita porēhi oyemocañi tēira yuvireco. Acoi oyemboangaipa vahe Moisés porocuita rereco pipe yuvireco, ahe porocuita pipe avei opara ocañi tēi porandusave yuvireco coipe.

¹³ Esepia, osenduño tēi vahe porocuita ndahei seco catupri vahe yuvireco. Viroya vahe ité rumo porocuita, ahe seco catupri vahe yuvirecoi.

¹⁴ Supi eté acoi ndahei vahe judío yuvirecoi vahe yepe ndovirecoi co porocuita yuvireco viña, ahe rumo co porocuita rupi tupri oyapose mbahe, ahe evocoyase inungar porocuita vireco vahe yuvireco.

¹⁵ Esepia, güembiapo catupri pipe omboyecua porocuita virecose opiha pipe. Opihañemoñeta pipe avei oyandu porocuita mboaviyesa. Ahe ipipe avei oyandu mbahe güembiavi, ichui avei oyemonguerēhi mbahe aviye vahe apose.

¹⁶ Ahe ari cañi pipe Tūpa oyocuai ucara opacatu ava rembiapo cuaēhisa reprimi pisi āgua Jesucristo upe, co ñehesa pīsirosa resendar amombehu vahecuer rupi tupri ñgüe ehira curi.

Ñehesa judío resendar, Moisés porocuita resendar avei

¹⁷ Pe rumo, “Judío aico” peye vahe, peyeroya opacatu Moisés porocuaíta mboaviyesa pipe pe reco catupri água Tüpa rovaque viña. Iyavei ipipe peyecomboivate ai Tüpa rese peicose.

¹⁸ Peicua semimbotar. Ahe porocuaíta pe mbohe avei mbahe aviye catu vahe poravo água.

¹⁹ Pe, “Aicatu ité ndasesapisoí vahe nungar ava ndayaracuai vahe mboaracua iyavei ava angaipa viyar pítumimbi vahe nungarsave tēi resape água” peye tēi.

²⁰ “Aicatu avei ava mbahe ndosenducuai vahe mboaracua iyavei ava chíhivahemi nungar mbohe água. Esepia, areco co mborocuaíta víreco vahe opacatu mbahecuasa iyavei mbahe supi tupri vahe ité” peye tēi avei.

²¹ Pe pembohe vahe ambuae ava, ¿mahera ru ndapeyembohei pe ae? Pe pemómbehu vahe ambuae ava mondaēhi água, ¿mahera ru pe ae avei pemonda no?

²² Pe, “Ndiyai pe aguasa” peye; pe teieté avei rumo ēgüe peye. Ndapesepia potai eté mbahe rahanga; pe avei rumo opa peñomi mbahe sepi vahe itüparo pipe sui.

²³ Peyecomboivate ai co mborocuaíta rerecosa rese; ndapemboetei rumo Tüpa ipipe ahe mborocuaíta mboaviyeēhi pipe.

²⁴ Supi eté icuachiapri arachendar pipe aipo ehi: “Pe sui tēi ava ndoicuai vahe Tüpa iñehe-ñehe tēi serer maranehi rese yuvireco” ehi.

²⁵ Supi eté co tecocuer cuaca circuncisión reNDAR ahe aviye angara pēu, peroya tupri itese Moisés porocuaíta viña. Ndaperoya tupriise rumo, pe evocoiyase inungar ndapeyembocircuncidai vahe peico.

²⁶ Acoi ava ndoyembocircuncidai vahe, ahe rumo víroyase porocuaíta, ahe seroyapri inungar imbocircuncidapri yuvirecoi.

²⁷ Acoi ndoyembocircuncidai vahe, oyapose rumo mborocuaíta yuvireco, ahe evocoiyase omombehura pe cañi água yuvireco. Esepia, yepe pereco Tüpa porocuaíta viña, pe rumo ndapemboaviyei eté.

²⁸ Judío supi eté vahe yaicose, ndahei yande yesupa judío recocuer rupi güeraño ēgüe yahera. Iyavei circuncisión supi eté vahe ndahei yande retecuer rese güeraño tēi avei no.

²⁹ Judío ete ité rumo opihá pipe ité víroya Tüpa. Iyavei circuncisión supi eté vahe, Espiritu rembiapo yande piha pipe, ndahei porocuaíta icuachiapri rembiapo tēi. Evocoiyase judío supi eté vahe oipisira omboeteisa Tüpa suindar ité, ndahei ava tēi suindar.

3

¹ Evocoiyase, ¿mbahe vo co aviye judío yande reco água? ¿Yande yembocircuncidasa piha aviye?

² Supi eté. Esepia, yipindar Tüpa omondo oñehe judío eta upe imboaviye água.

³ Amove yepe ipāhu pendar nomboaviyeise ocuaíta viña, ¿Tüpa avei tie ēgüe ehira?

⁴ ¡Aní eté! Tüpa rumo supi tupri vahe ité secoi, yepe que ava opacatu semirañete ai tēi yuvireco. Esepia, icuachiapri arachendar pipe aipo ehi: “Supi tupri vahe Tüpa’ ehira nde ñehe rese yuvireco. Sese ereiquese ava porandusave, eresē tupriñora eso ichui” ehi.

⁵ Yande reco rai pipe tēi yamboyeuase Tüpa reco tupriisa, ¿mara yahera vo evocoiyase? ¿“Tüpa ndahei supi tupri vahe yande reco raisa rese yande

nupa” yahera tie? (Che rumo aipo ahe inungar-ra ava co ivi pipendar tēi viña.)

⁶ ¡Aní eté! Esepia, Tūpa ndaheise supi tupri vahe viña, ndiyai chietera yande recocuer rese porandupa tupri āgua chupe viña.

⁷ Aviyeteramo oimera ava aipo ehi vahe: “Yande remira pipe sui tēi ava omboetei catuse Tūpa supi eté vahe, ¿mahera pīha evocoiyase angaipa viyar nungar yande rerecora viña?” ehi.

⁸ “Yayapora ayase mbahe naporai vahe mbahe tupri reime āgua” ehi. Amove ava, “Pablo ondugüer reseve aipo ehi eté oporombohe” ehi tupri tēi yuvireco oreu. Aipo ehi tēi vahe rumo. Iya ité oipisira cañisa yuvireco.

Opacatu yande angaipa viyar yaico

⁹ ¿Mara ehi ru evocoiyase? ¡Yande judío yaico vahe ndahei eté ivate catu yande recocuer opacatu ambuae ava-ava tēi sui! Esepia, opa amboyecua Tūpa rovaque opacatu angaipa viyar yaico que judío, que ndahei vahe judío avei.

¹⁰ Supi eté icuachiapri aracahendar pipe aipo ehi:

“¡Ndipoi eté ava seco catupri vahe, que ñepeí angara viña!

¹¹ Ndipoi avei que ava Tūpa recocuer osenducua tupri vahe.

Ndipoi avei Tūpa oseca vahe yuvireco.

¹² Opacatu ava oguata mbahe tēi pipe yuvireco, co coti tēi avei secocuer yuvireco.

¡Ndipoi eté que ava mbahe tupri aposar, que ñepeí angara viña!

¹³ Ñehesa mbahe tēi eté, inungar tuvipa ndasovapisai vahe.

Oñehesa pipe oporombopa yuvireco.

Ahe ñehesa evocoiyase inungar mboi naporai vahe oporomocañi tēi vahe.

¹⁴ Ipipe oñehe rai opihaviracua iteangasa pipe yuvireco.

¹⁵ Ndayipitii oporapichi āgua yuvireco.

¹⁶ Setá ava omomara, omombaraisu avei oguatasa rupi yuvireco.

¹⁷ Iyavei ndoicuai eté güeco tupri āgua yuvireco.

¹⁸ Ndipihañemoñetai eté Tūpa sui osiquiye āgua yuvireco” ehi.

¹⁹ Yande niha opa yaicua opacatu co mbahe omombehu vahe mborocuita aracahendar pipe, omombehu co porocuita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tūpa ñemoirosa pisi āgua yuvireco’ ohesave aipo ehi.

²⁰ Esepia, ndipoi chietera que ñepeí seco aviye vahe Tūpa rovaque co porocuita mboaviye pipe. Ahe mborocuita rumo oicua uca yande angaipa viyar yande reco.

Cristo rese yande yeroya pipe Tūpa yande pīsirora

²¹⁻²² Cūrítei rumo Tūpa oicua uca yandeu ndahe iri mborocuita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayande mboyoavii eté. Yipive ité ahe imombehupri secoi porocuita aracahendar pipe, iñehe mombehusareta rembicuachiagüer pipe avei.

²³ Supi eté yande opacatu yayapo angaipa, ndayasupitii eté Tūpa reco porañetesa.

²⁴ Ahe rumo oporoaisusa pipe, “Ereyavi mbahe che ñemoirosa pisi āgua” ndehi iri yandeu. Esepia, ahe yande pīsiro uca Guahir Jesucristo upe. Yande rumo ndayamboepii eté yande raisusa chupe.

25-26 Tūpa rumo ombou Guahir Cristo oipiyere vaheṛā vuvi yande angaipa rese ñero āgua. Sese yande yeroya pipe oime ñeroisa yandeu. Ipipe omboyecua güeco ïvi tuprisa. Yipisuiṛe rumo güeco asiēhisa pipe oñemosañō arachendar ava angaipa upe; cūritei rumo omboyecua ité güeco ïvisa yandeu, seco ïviño ité seco catupri vahe yande rerecose Tahir rese yande yeroya pipe.

27 ¡Evocoiyase ndiyai eté yande yecomboivate ai āgua sovaque! Esepia, ndahei porocuaita mboaviye rese ēgüe ehi, ahe rumo Cristo rese yande yeroya pipe ēgüe ehi yandeu.

28 Sese yaicua Tūpa, “Ereyavi mbahe che ñemoirosa pisi āgua” ndehi iri Cristo rese yande yeroyase yandeu, ndahei mborocuaita mboaviyesa sui tēi.

29 ¡Tūpa niha opacatu ité ava Tūpa, ndahei ore judío oroico vahe Tūpa güeraño!

30 ¡Supi eté ñepeño ité secoi: sese yayeroyase Cristo rese, oyoya guasuño ité, “Ereyavi mbahe che ñemoirosa pisi āgua” ndehi chira yandeu, yepera imbocircuncidapri viña, anise que ndahei vahe imbocircuncidapri viña no!

31 Ndahei rumo, “Ēgüe ehi tēi vahe” yahe evocoi mborocuaita upe Jesucristo reroyasa pipe. Ipipe rumo yamboyecua evocoi mborocuaita ēgüe ndehi tēi vahe.

4

Abraham recouer sui yembohesa

1 Iyavei, ¿mara ehi pīha yande ramoi Abraham recouer aracahe?

2 Acoi mbahe güembiapo pipe sui tēi oipisise güeco tupri āgua Tūpa sui, oyemboivate aira oico ipipe viña. Ndiyai eté rumo ēgüe ehi Tūpa rovaque.

3 Esepia, icuachiapri arachendar pipe aipo ehi: “Abraham oyeroya ité Tūpa rese. Sese Tūpa, ‘Co seco catupri vahe’ ehi chupe” ehi.

4 Co rumo yande yayapose mboraviqui, ahe yaipisi vahe ndahei porerecosa tēi, ahe rumo mboraviqui repri ité yaipisi.

5 Yande rumo, yayeroyase Tūpa rese, Tūpa evocoiyase yande pisira, ‘co seco catupri vahe’ ohesave. Esepia, ahe ēgüe ehi vahe ité oyese oyeroya vahe upe, yepē ndoyapoi chira mbahe aviye vahe chupe viña.

6 David mborerecuar arachendar avei oñehe ava rorivetesā rese Tūpa seco catupri vahe nungar pisisa rese. Ahe rumo ndahei mbahe sembiagüer rese tēi oipisi.

7 Ahe aipo ehi aracahe:

“¡Sorivete acoi ava Tūpa iñeroise yangaipa rese, iyavei ndoyemomahenduha irise yangaipa rese chupe!

8 ¡Sorivete avei ava, ‘Nde angaipa viyar ereico’ ndehi irise Tūpa chupe!” ehi.

9 Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tūpa, “Co seco catupri vahe secoi” ehi Abraham upe oyese iyeroyasa rese.

10 ¿Marase pīha oipisi oyeupe nara sereco? ¿Oyembocircuncida renondeve pīha, anise ipare tie? Yipive ité.

11 “Toicua ava co seco catupri vahe che rese iyeroyase yuvireco” ehi Tūpa chupe. Sese imbocircuncidapri secoi. Ēgüe ehi Abraham opacatu ava oyeroya vahe Tūpa rese, ndoyembocircuncidai vahe yesupa nungar secoi. Ēgüe ehi Tūpa, “Co seco catupri vahe yuvirecoi” ehi avei ahe ava upe.

¹² Supi eté yande ramoi Abraham opacatu ava oyembocircuncida vahe, Tüpa rese oyeroya vahe yesupa avei secói. Abraham rumo oyeroya vahe Tüpa rese ndoyembocircuncida viteiseve.

Tüpa remimombehu imboaviyesara sese yeroyasa pipe

¹³ Esepia, aracahe Tüpa aipo ehi Abraham upe, ichuindar upe avei: “Peipisira opacatu co ivi pe mahera” ehi. Ndahei Moisés porocuita mboyeroya pipe êgüe ehi chupe, oyese yeroyasa pipe sui eté rumo ahe oipisi ‘co seco catupri vahe’ ohesave.

¹⁴ Supi etese co mborocuita mboyeroyasar güeraño oipisise co mbahe oime väherã chupe viña, evocoyase yande yeroyasa Tüpa rese êgüe ehi tãi etera, Tüpa remimombegüer evocoyase êgüe ehi tãi vahe aveira viña no.

¹⁵ Esepia, co mborocuita mboaviyeêhisa pipe ñemoirosa oime ava upe. Ndipoise rumo mborocuita, ndipoi chietera ahe porocuita mboyeroaêhisa.

¹⁶ Sese mbahe Tüpa remimombegüer porerecosa yaipisira sese yande yeroyasa pipe, ahe semimombegüer supi tupri vahe opacatu yande Abraham suindar upe nara. Esepia, ndahei mborocuita mboyeroyasar upe güeraño, ahe rumo opacatu yande Abraham nungar Tüpa rese oyeroya vahe upe nara. Evocoyase ahe opacatu yande ramoi secói.

¹⁷ Icuachiapri aracahendar pipe aipo ehi: “Orombou ava eta ivi rupindar ramoirã” ehi. Co Tüpa niha Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yipindar.

¹⁸ Yepe yavai eté seroya âgua viña, Abraham rumo oyeroya ité Tüpa oyeupe ñehesa rese; sese ava eta ivi rupindar ramoi eté secói Tüpa ñehe: “Setã oimera ava nde suindar” ehi vahe rupi tupri ité.

¹⁹ Abraham evocoyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco reseve nañaroi eté guahi âgua yuvireco viña.

²⁰ Ndopoi eté Tüpa oyeupe ñehesa reroyasa sui. Ahe rumo oyeroya catu ité sese iyavei omboetei eté.

²¹ “Supi eté Tüpa vireco opĩratasa opacatu oñhengagüer mboaviye âgua” ehiño ité opiha pipe.

²² Sese Tüpa, “Co seco catupri vahe secói” ehi iyeroyasa rese chupe.

²³ Co ñehesa ndahei Abraham upe güeraño.

²⁴ Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús.

²⁵ Esepia, ahe imondopri secói yande angaipa repirã. Ipare Tüpa ombogüerayevi yande pisi âgua seco catupri vahe nungar oyeupe.

5

Tüpa, “Peyavi mbahe” ndehi iri

¹ Sese yaico mbahe tupri pipe Tüpa, “Peyavi mbahe” ndehi irise yandeu yande Yar Jesucristo rembiapo sui sese yande yeroyasa pipe.

² Esepia, Jesucristo sui niha yareco co Tüpa suindar porovasasa yayeroyase sese. Ipipe avei yayemoviracuaño ité yaico, yayemboviha avei. Esepia, yaicua Tüpa piri yande reco âgua imborerecuasave.

³ Ndahei rumo sese güeraño yayemboviha, yande yemombaraisusa rese avei niha yayemboviha yaico. Esepia, yaicua ahe yande mbohe yande ñemosa âgua,

4 iyavei yañemosañose, yasē tuprira yande recoñhasa sui, ahese yaicua yaipisi vaherā mbahe aviye vahe Tūpa suindar yepi.

5 Iyavei ahe yande remiaro nayamoha tēi chira sereco. Esepia, Tūpa ombou ité oporoaisusa yandeu oEspíritu Santo yandeu ombou vahe pipe.

6 Yande ae ndayaicatui yande ñepisiro āgua yande recocuera sui, Cristo rumo osupitise ari chupe, omano opacatu yande angaipa rese.

7 Aviyeteramo oimera que ñepei ava omano vaherā ambuae ava aviye vahe upe nara; yepe que ava recocuer supi eté aviye aira viña, seni rumo ndipoi eté que ava, “Che tamano sepirá” ehi vaherā chupe.

8 Yepe yande angaipa viyar yaico yipindar, Tūpa rumo omboyecua yande raisusa; ombou Cristo imano āgua yande angaipa repirā.

9 Ipipe sui cūrteit, “Peyavi mbahe” ndehi iri chira. Sese nomboui chietera oñemoirosa yandeu.

10 Esepia, yamotarēhimbar yaico vitesa, ahe Guahir manosa pipe sui yande reroyevi iri oyeupe mbahe tupri pipe; ocuerayevisa pipe evocoyase oicatu ité yande pisiro.

11 Ndahei co reseño ēgüe yahera, yaviha catu aveira Tūpa rese, yande Yar Jesucristo rese avei. Ichui niha ndipo iri mbahe Tūpa rovaque yande rese.

Adán iyavei Cristo resendar ñehesa

12 Supi eté Adán sui oime angaipa ivi pipe, ichui avei oime manosa opacatu ava upe. Esepia, opacatu ité oyapo angaipa yuvireco.

13 Ndipo viteise Moisés porocuita, oime voi eté angaipa co ivi pipe. Yepe tie ndicuaasa vitei angaipa porocuita ndipoise viña,

14 Adán reco sui tupri ité rumo ava omanoño ité oangaipa pipe yuvireco. Ēgüe ehiño ité yuvireco Moisés recose, yepe ahe ava yuvirecoi vahe angaipa ndahoyoyai Adán angaipa mborocuita mboaviyēhisa resendar rese viña. Ahe Adán rese omboyecua mbia ou vaherā.

15 Tūpa pororecosa ombou vahe rumo yandeu ndahoyoyai eté Adán angaipa rese. Esepia, Adán rembiavi sui setá ava omano; Jesucristo rembiapo sui rumo Tūpa ombou oporecosa poropisirosa yandeu. Ahe rumo aviye catu vahe ava eta upe nara.

16 Ahe ñepei ava angaipa rumo ndoyoyai eté Tūpa poropisirosa ombou vahe rese yandeu. Esepia, ñepei ava angaipa sui ou Tūpa ñemoirosa; oporecosa rumo Tūpa ombouño ité ava eta mbahe oyavi ati vahe upe nara yangaipa mocañi āgua.

17 Supi eté ñepei ava angaipa sui oimeño ité manosa opacatu yandeu. Yande rumo yaipisi mbahe ipirata catu vahe ichui, ahe Tūpa porovasasa tuvichá vahe ité iyavei iporecosa, “Peyavi mbahe” ihehisa resendar. Sese yareco ité tecovesa apirēhi vahe yandeyeupe nara ñepei ava sui, ahe Jesucristo.

18 Evocoyase inungar Adán rembiapo ai güeru Tūpa ñemoirosa opacatu ava upe. Jesucristo rembiapo aviye vahe avei güeru opacatu ava upe Tūpa ñemoirosa pisiēhi āgua ‘tovireco tecovesa apirēhi yuvireco’ oya.

19 Esepia, ñepei ava Tūpa reroayehisa sui setá oime ava angaipa viyar; ēgüe ehi aveira ñepei ava mboyeroyasa sui setá aveira ava vireco güeco catuprisa Tūpa rese yuvireco.

20 Supi eté porocuita ouse aracahe, ahese angaipa yaposa catu ité. Yepe ēgüe ehi viña, Tūpa porovasasa rumo ivate catu ité ichui.

²¹ Evocoyase inungar angaipa ipĩrata yandeu yande mano āgua viña, ēgüe ehi avei rumo Tūpa oporovasasa ipĩrata vahe pipe yande pisi seco catupri vahe nungar yande rereco ‘toipisi tecovesa apirēhi vahe che Rahir Jesucristo rembiapo sui’ oya.

6

Angaipa upe omano vahe nungar yaico; Cristo rese yaicose rumo oicove vahe ité yaico

¹ Evocoyase, ¿iya iri pĩha yayapo vite angaipa yaico Tūpa yandeu oporovasasa mboyecua catu āgua?

² ¡Aní chietera! Esepia, yande niha senosepri angaipa sui. Evocoyase ndiya iri eté yayapo viteño angaipa yaico.

³ ¿Ndapeicuai vo pe yañeapiramose Jesucristo rer pipe, ndoyavi yamano vahe ité sese?

⁴ Yande ñeapiramose, aviye acoi ñotimbrí yaico Cristo rupive yande mbogüerayevi iri āgua iyavei yande recocuer mopiasu āgua avei, inungar acoi Cristo ocuerayevi Vu reco pĩratasa pipe.

⁵ Yande omano vahe nungar yaicose supive, ēgüe yahe aveira yande yacuerayevi supí.

⁶ Yaicua avei niha yipindar yande recocuerai yaticapri nungar curusu rese Cristo rupive, “Che recocuerai tocañipa che sui” yande hesa pipe, iyavei yande angaipa pipe mbiguai tēi nungar yande recoēhi āgua.

⁷ Esepia, acoi omano vahe ndoyapo iri angaipa yuvireco.

⁸ Yande avei niha omano vahe nungar Cristo rese yaico. Evocoyase yayeroya avei yaicove vaherā sese.

⁹ Yande niha yaicua, Cristo ñepeí reseve ocuerayevi, nomano iri chietera. Esepia, manosa ndoicatu iri eté chupe.

¹⁰ Supí eté omanose Cristo, omano ñepeí reseve opacatu angaipa mocañi āgua; cūrítei rumo oicove Tūpa upe nara.

¹¹ Ēgüe peye avei pe, “Che omano vahe nungar aico angaipa upe” peyera; “Che rumo Tūpa upeño ité aicovera yande Yar Jesucristo rese che recosa pipe” peye aveira.

¹² Sese aní peico vite angaipa pĩratasavrive pe cui āgua pe remimbotarai mboyeroyasa pipe.

¹³ Aní peyemondo angaipa upe mbahe tēi apo āgua. Peyemondo catu Tūpa upe. Esepia, pe inungar ava ocuerayevi iri vahe peico. Sese peyemondo tupri ité Tūpa upe mbahe tupri apo āgua.

¹⁴ Evocoyase, pe angaipa ndape cui iri chira pe rereco. Esepia, ndapeicoi Moisés porocuita pipe; pe rumo Tūpa porovasasa pipe peico.

Yembohesa mbiguai tēi recocuer sui

¹⁵ Ndayaico iri mborocuita pipe tēi, yaico rumo Tūpa porovasasa pipe. Evocoyase, ¿“Tayapo vite angaipa” yahera pĩha? ¡Aní chietera!

¹⁶ Pe niha peicua que ava pemboyeroyase, ipovri pendar evocoyase peico. Pemboyeroyase Carugar angaipa apo āgua, ahe evocoyase pe reco mocañi tēira. Tūpa pemboyeroyase rumo, ahe evocoyase pe reco mohivira.

¹⁷ Aviye Tūpa upe. Esepia, pe yipindar mbiguai tēi nungar peico angaipa pipe viña, cūrítei rumo pemboyeroa pe pihave ité porombohesa peipisi vahe.

18 Ñepeí reseve pe angaípa sui Tũpa pe renosese, pe evocoyase mbugai nungar mbahe supí tuprí vahe apo ģgua peico.

19 (Che amboyoya tecocuer mbahe co ivi pipendar rese imombehu pũu. Esepia, yavai vite ite pũu co ñehesa renducua tuprí ģgua.) Yipindar pe retecuer pereco mbahe tẽi pipe mbahe naporai vahe apo ģgua. Ęgũe peye rumo pe cũritei pe reco mohivi ģgua peico mbahe tuprí pipe ñepeí reseve Tũpa upe pe reco ģgua.

20 Pe peico vitesse mbugai tẽi nungar pe angaípa pipe, ahese ndapeyapo vitei mbahe supí tuprí vahe;

21 cũritei rumo pechĩ tẽi ichui, ahe niha ndape pĩtivĩ ete pe recocuer rese, iyavei pe reraso pota manosa apirẽhi vahesave yepi.

22 Cũritei rumo angaípa sui senoseprĩ peico Tũpa povrive pe reco ģgua. Ichui mbahe tuprí oime pũu. Ahe niha ombou oyeupe nara ite pe reco tuprí ģgua. Ipipe sui peicora apirẽhi vaheerã.

23 Angaípa niha ombou manosa tẽi yandeu, Tũpa rumo oporerecosa ombou tecovesa apirẽhi vahe yandeu yande Yar Jesucristo rese yande recose.

7

Mendasa sui yembohesa

1 Che rivireta, pe niha peicua tuprí mborocuita, peicua avei ahe porocuita povriveño ite opacatu yaico yaicove vitesse co ivi pipe.

2 Esepia, inungar cuña omenda vahe, imer oicove vitesse, iporocuitavrive viteño ite secoi yepi. Omanose rumo imer ichui, ahe cuña ndahe iri omer porocuitavrive secoi.

3 Acoi cuña omer recove vitesseve, virecose ambuae cuimbahe, oyemboaguasa tẽi evocoyase; acoi omanose rumo imer ichui, ndaseco iri ipovrive. Ahe iyacatu ite omenda yupagũe iri; ahese ndaheí yaguasa tẽi cute.

4 Che rivireta, pe niha ģgũe peye avei Cristo rese peico vahe; Cristo manosa sui ndahe iri Moisés porocuitavrive peico Cristo rese peico ģgua. Ahe niha acoi ocuerayevi vahe. Sese yande recocuer ģgũe ndehi tẽi vahe Tũpa upe.

5 Esepia, yande yaicove vitesse yande reco ai pipe, ahe porocuita renduse, yaipota catu mbahe tẽi pipe yande reco ģgua. Ipare rumo ahe manosave tẽi yande reraso ucara viña.

6 Cũritei rumo yande omano vahe nungar yaico acoi porocuita pipe yaico vahecuer sui. Ęgũe yahe, yasẽ ichui Tũpa upe mbahe apo ģgua Espĩritu sui yande reco piasu pipe. Ndahe iri mborocuita icuachiapri yipindar vahe pipe yaico.

Angaípa oime vahe yande rese

7 ¿“Tũpa porocuita angaípa” yahera pĩha? ¡Aní ete; ndaheí ete ahe angaípa! Co rumo ndaicuai chietera che angaípa Tũpa porocuita ndipoise viña. Supi ete che ndaicuaise, “Ndapeipota rai chira ambuae ava mbahe” ehi vahe mborocuita pipe, ahese ndaicuai chiaveira che mbahe pota raisa viña.

8 Aicuase mborocuita, ahese angaípa ipĩrata catu cheu. Ahe mborocuita apo potaẽhisa pipe che querẽhi catu opacatu che remimbotarai tẽi apo ģgua. Esepia, mborocuita porẽhi angaípa aviye ndipoi vahe viña.

9 Yipindar Tũpa porocuita ndaicua viteise, ndoyavii aviye vahe ite che reco areco viña. Porocuita aicuase rumo, aipota rai angaípa apo ģgua.

10 Che evocoyase acañi tēi vaherā aico ipipe viña. Ahe porocuita che recove apirēhi āgua mbou rāgüer sui, che mondo ucaño itera manosa apirēhi vahe pipe tēi viña.

11 Esepia, angaipa ahe porocuita pipe che mbopa ité. Ahe ipipe avei che mocañi tēira viña.

12 Evocoyase co porocuita ndaseco marai vahe ité, supi tupri vahe ité, aviye vahe avei.

13 ¿Co porocuita aviye vahe pīha che rereco che mano āgua tēi? ¡Aní eté! Angaipa tēi rumo ēgüe ehi che rereco. Evocoyase co porocuita cuasa sui oipota catu uca mbahe tēi apo āgua cheu. Ipipe aicua angaipa oime vahe che rese. Ēgüe ehi avei ahe porocuita omboyecua tupri ité angaipa mbahe tēi vahe yandeu.

14 Yaicua niha porocuita Tūpa suindar, che tēi rumo imondopri aico angaipa mboyeroa āgua.

15 Che rumo ahese ndaicuai mbahe oime vahe cheu. Esepia, che remimbotar ayapo pota vahe ndayapoi; mbahe che remimbotarēhi rumo ayapo.

16 Che rumo ayapose mbahe ndayapo potai vahe, ahese aicua co porocuita aviye vahe.

17 Evocoyase ndahei cheyesui eté ēgüe ahe, angaipa tēi rumo ēgüe ehi che mbohe uca.

18-19 Esepia, che aicua ndipoi eté mbahe aviye vahe che reco ai rese; sese yepe che ayapo pota ité mbahe aviye vahe viña, ndaicutui eté rumo yapo. Iyavei yepe ndayapo potai mbahe tēi viña, che rumo ayapoño ité.

20 Sese ayapo vīteño itese mbahe ndayapo potai vahe, ndahei rumo che ité ayapo, che pīha pipe angaipa oime vahe, ahe tēi rumo oyapo uca cheu.

21 Sese che aicua oime che cuaisar che rese. Esepia, ayapo potase mbahe aviye vahe yepi viña, ahe rumo oyapo uca pota voiño ité mbahe naporai vahe cheu yepi.

22 Che pīha pipe rumo Tūpa porocuita aipotá iteanga tēi,

23 che rumo aicua che pīha pipe oime ambuae mbahe, mbahe tupri apo potaēhisar cheu, ahe angaipa tēi oime vahe che rese. Ahe mbiguai nungar tēi che rereco.

24 “¡Che paraisu ité!, ndaicutu iri eté, ¿uma pīha co mbahe tēi sui che renosera viña?” ahe cheyeupe vichico.

25 Tūpaño ité oicatu Guahir Jesucristo rese. “Aviye” yande Ru Tūpa upe. Ēgüe ehi ahese mbahe cheu; Tūpa porocuita amboaviye pota viña, che remimbotarai tēi rumo che rereco uca angaipa povriye.

8

Yaico vaherā Tūpa Espíritu rese

1 Cūrítei rumo ndipo iri Tūpa ñemoirosa yandeu Jesucristo rese yaicose.

2 Esepia niha, Jesucristo rese yaicose, yande cuaisar Espíritu tecovesa mondosar yande renose angaipa povri sui, manosa sui avei.

3 Esepia, yande remimbotarai rese ndayaicutui Moisés porocuita mboyeroa āgua, ahe avei evocoyase ndoicutui eté yande reco moingatu. Tūpa rumo oicatuño ité. Esepia, Guahir ombou yande nungar tupri ité ‘toyemondo ava angaipa repirā’ oya. Ēgüe ehi imocañi opacatu yande angaipa yande sui, yande remimbotarai avei.

4 Ahe ēgüe ehi yande yamboaviye vaherā mborocuita. Esepia, ndayaico iri yande remimbotar tēi pipe. Yaico rumo Espíritu aviye vahe rese.

⁵ Esepia, acoi yuvirecoi vahe rumo güemimbotar tēi pipe, güecocueraí reseño tēi ipihañemoñeta yuvireco; Espiritu rese yuvirecoi vahe rumo semimbotar rese ipihañemoñeta catu yuvireco.

⁶ Iyavei acoi güemimbotarai rese tēi ipihañemoñeta vahe, ahe omano itera apirēhi yuvireco. Ipihañemoñeta vahe rumo Espiritu suindar mbahe rese, virecora tecovesa apirēhi vahe mbahe tupri pipe yuvireco.

⁷ Esepia, acoi güecocueraí reseño tēi ipihañemoñeta vahe, ahe Tūpa amotarēhimbar yuvirecoi. Ndoipotai eté iyavei ndoicatui Tūpa porocuita mboyeroya āgua yuvireco.

⁸ Ēgüe ehi eté, acoi yuvirecoi vahe güemimbotarai pipe, ndoicatui eté Tūpa remimbotar apo āgua yuvireco.

⁹ Pe rumo ndapeico iri pe remimbotarai pipe. Peico rumo Tūpa Espiritu rese, ahe perecose peyese. Acoi ndovirecoi vahe rumo Espiritu Cristo suindar, ndahei eté chupendar.

¹⁰ Cristo secoise rumo pe rese, yepe pe rete ocañi tēi vaherā angaipa sui viña, pe espíritu rumo oicoveño ité. Esepia, Tūpa, “Peyavi mbahe” ndehi iri pēu.

¹¹ Acoi Tūpa Espiritu secoise pe rese, Tūpa evocoyase omondora tecovesa piasu pe retecuer upe oEspiritu pe rese secoi vahe pīratasa pipe. Esepia niha, ipipe ité ombogüerayevi Guahir Jesucristo.

¹² Ēgüe ehi che rivireta, yareco yande cuaita, ndahei rumo yande remimbotarai pipe yande reco āgua.

¹³ Esepia, pe peicoño itese pe remimbotarai pipe, ahese pecañi tēira; pemombopase rumo Espiritu pipe peyesui, ahese peicovera apirēhi vaherā.

¹⁴ Esepia, opacatu Tūpa Espiritu ombohe vahe, Tūpa rahir ité yuvirecoi.

¹⁵ Supi eté pe Espiritu peipisi vahe ndapembosiquiye uca iri pe rereco, ahe rumo pemoiñgo Tūpa rahir ité pe reco āgua. Ahe avei, “¡Che Ru!” pe mbohe uca chupe.

¹⁶ Co Espiritu avei oicua uca yande espíritu upe Tūpa rahir yande recose.

¹⁷ Evocoyase yaipisi aveira mbahe yande Ru Tūpa ombou vaherā yandeu; ahe oyoya Cristo reseve yaipisira, Cristo paraisu agüer pipe ité yaicose yareco vaherā teco porañetesa ipiri curi.

Teco porañetesa ou vaherā curi

¹⁸ Cūrítei rumo yande paraisusa ndoyoyai eté teco porañetesa yande rese ou vaherā rese.

¹⁹ Opacatu Tūpa rembiapocuer osāro vite ité opacatu oquerēhisa pipe, osepia pota ité teco porañete vahe tahir yuvirecoi vahe rese.

²⁰ Esepia, Tūpa rembiapo ndahe iri eté yipindar nimarai vahe nungar. Ndahei rumo oyesui tēi ēgüe ehi, Tūpa ité, “Ēgüe tehi” ehi chupe, ombouse angaipa reprí ava upe. Mbahe sembiapocuer rumo osāroño ité

²¹ güeco opa tēi vaherā sui ñepisiro āgua teco porañete vahe Tūpa rahir vireco vahe rupiti āgua curi.

²² Yande niha yaicua aracahe suive opacatu mbahe Tūpa rembiapo oiporara mbaherasicuer yuvireco cuña imembi rasi vahe nungar.

²³ Ndahei rumo ahe güeraño ēgüe ehi yuvireco, yande avei ēgüe yahe. Yande yareco ité Espiritu, ahe yipindar vahe yaipisi vaherā ichui curi. Yayemombaraisu, yasāro vite yande querēhisa pipe Tūpa guahir ité yande rereco āgua, yande retecuer recuñaro āgua avei.

²⁴ Esepia, yande niha yañepisiro ité yande remiario reroya pipe; sese acoi yasepia vahe mbahe yande remiario, nayasáro iri. Ndipoi ava osáro vite tēi vahe mbahe güembiepia.

²⁵ Acoi mbahe yande remiario ndayasepia viteise rumo, yasáro vite yande ñemosasa pipe sereco.

²⁶ Ëgüe ehi avei Espiritu yande p̄tivii ndayaicatu irise. Esepia, ndayaicuai eté mara yahera yayeroqui, co Espiritu Santo rumo oporandu ité Tūpa upe yande rese oyemopoasesa pipe.

²⁷ Iyavei Tūpa, ahe oicua vahe opacatu yande p̄ihañemoñetasa, oicuaño ité Espiritu mbahe omombehu pota vahe oyeupe. Esepia, Espiritu oporandu chupe semimbotar rupi yande seroyasar yaico vahe rese.

Yasecopipa itera mbahe tēi

²⁸ Tūpa niha yande poravo güemimbotar rupi. Yepe yaicua mbahe tēi oime yandeu viña, Tūpa rumo opacatu mbahe oyapo yandeu mbahe tupri reime água yande raisusave.

²⁹ Esepia, yipive Tūpa yande cua, yande poravo Guahir Jesucristo nungar ité yande reco água ‘ahe che Rahir tenonde catu vahe tasecoi opacatu ambuae che rahir sui’ oya.

³⁰ Iyavei Tūpa yipisuive ahe yuvirecoi vahe oiporavo. Chupe oñehe oyeupe nara seco água. Ipape, “Co seco catupri vahe” ehi chupe; ahe chupe avei omondo teco porañetesa.

³¹ ¿Mara yahe irira vo chupe? ¡Tūpa niha yande repisar secoi, sese ndoicatu iri eté yande amotarēhimbar yuvireco!

³² Tūpa niha ombou ité Guahir imano água opacatu yande rese. Sese yaicua ombou aveira opacatu mbahe yandeu yande p̄tivii água Tahir rese yande recose.

³³⁻³⁴ Sese ndiyai eté ava upe, “Pecañi tēira, peyavi pe recocuer” ihe água yande iporavopri yaico vahe upe yuvireco. Esepia, Tūpa opa omocañi yande angaiya yandeu sui Cristo omanose sep̄rã, iyavei ocuerayevise. Cūrtei Cristo Vu acato coti, “Co cheundar ité yuvirecoi” ehi yande rese oyerure yepi.

³⁵ ¿Mbahe p̄iha yandé mboyepep̄ira Cristo yande raisusa sui viña? ¿Que yandé paraisusa, mbahe yavai vahe yandeu, yande momara-mara tēisa, que tieporēhi, anise que yande turucuarã ndipoise, que mbahe tēise yandeu, yande yuca potase tie yuvireco?

³⁶ Inungar icuachiapri aracahendar pipe aipo ehi:

“Oyemoingatu voi ar̄i rupi yande yuca água yuvireco ndeundar yaicose, ovesa yucapirã nungar tēi yande rereco yuvireco” ehi aracahe.

³⁷ Opacatu rumo co mbahe oimese yandeu, yasecopipa ité ahe yande raisusar recocuer pipe sui.

³⁸ Sese che aroya ité Tūpa yande raisu viteño itera yepi yepe que yamora, anise que mbahe oime vahe yandeu yande recove vitesse. Ndayande mboyepepii ch̄iaveira ichui que Tūpa rembiguai, que seco ivate vahe, seco p̄rata vahe ndayasep̄iai vahe, que cūrtei mbahe oime vahe yandeu, anise que mbahe oime vaherã curi.

³⁹ ¡Ndayande mboyepepii ch̄iaveira que iva p̄ndar mbahe, anise que mbahe ivi p̄pendar, que ambuae mbahe Tūpa rembiapo iporoaisusa sui omboyecua vahe opacatu yande Yar Jesucristo recocuer pipe yandeu!

9

Tūpa oiporavo Israel oyeupe nara arácahe

1 Che Cristo reroyasar che reco pīpe supi eté añehe, ndopombopai. Tūpa Espīritu oicua ité che pīhañemofñetasa supi vahe.

2 Ndavihai eté che pīha pīpe; oime mbahe tasi vahe cheu yepi.

3 Che aipota tēi opacatu che mu judío ñepisiro āgua yuvireco viña. “Tacañi tēi Cristo porēhi icañi tēiēhi āgua yuvireco” ahera viña.

4 Ahe niha Israel suindar yuvirecoi, aracahe Tūpa oiporavo vahe guahirguā. Ahe ipāhuve avei secoi güendigüer porañetesa pīpe, iyavei omondo ité oñehe güemimbotar, oporocuaita avei chupe nara viña ‘tache mboetei oyeruresa pīpe che rētave yuvireco’ oya, iyavei, “Amboaviye itera che ñehe pe rese” ehi yuvireco chupe.

5 Ahe avei niha yande ramoi yīpīndar vahe suindar yuvirecoi, Tūpa Rembiporavo Poropīsīrosar avei ahe ichuindar oyesu vahe. Ahe Poropīsīrosar niha Tūpa ité, ivate catu vahe secoi opacatu sui. Sese, ¡timboeteisa catu yepi! ¡Ēgüe tehi apirēhi!

6 “Tūpa nomboaviyei Israel upe oñehe imombehupri” ndapeyei chira. Esepia, ndahei opacatu Israel suindar supi tupri vahe.

7 Iyavei ndahei opacatu Abraham suindar tahir supi tupri vahe yuvireco. Esepia, Tūpa aipo ehi: “Nde rahir Isaac sui rumo oimera nde suindar sovasapri” ehi chupe.

8 Co rumo osenducua uca yandeu ndahei Abraham suindar yuvīnose vaheño ité Tūpa rahir yuvirecoi, Tūpa remimombehu rupi yuviroha vahe güeraño rumo ichuindar ité yuvirecoi.

9 Esepia, Tūpa Abraham upe aipo ehi aracahe: “Co ari rupi avei ayevíra curi, ahese oimera Sara membri ndeu” ehi.

10 Ndahei rumo co reseño, tahir Isaac rese avei. Esepia, ocuacuase sembireco Rebeca imembi cōi, ahe icōi vahe yesupa rumo ñepeñito ité.

11-13 Ahe ndoyuviroha viteise, ndoyapo viteise mbahe que aviye vahe, que naporai vahe yuvireco, Tūpa aipo ehi ichi Rebeca upe: “Yīpīndar oha vahe nde membri ahe omboyeroyara ipandar” ehi. Co oyoya ité icuachiapri rese acoi aipo ehi vahe: “Che asaisu ité Jacob, Esaú rumo ayamotarēhi” ehi. Sese yaicua iya ité Tūpa upe ava poravo güemimbotar rupi, ndahei seco aviye vahe rese.

14 ¿Sese pīha Tūpa upe, “Ndaseco tupri vahe” yahera? ¡Aní eté!

15 Esepia, acoi Moisés upe aipo ehi: “Aiparaisuerecora ava, asaísu aveira che remimbotar rupi” ehi.

16 Supi eté ndahei yande remimbotar rupi tēi, ndahei avei yande pīratasa rupi Tūpa oyapo mbahe; ahe rumo oporoparaisuerecosa pīpe mbahe oyapo yandeu.

17 Supi eté Tūpa aipo ehi mborerecuar guasu Egipto pendar upe aracahe: “Che oromoingue uca mborerecuar nde reco āgua che pīratasa mboyecua āgua nde sui, che rer mboetei āgua avei opacatu ava upe co ivi pīpe” ehi.

18 Ēgüe ehi oporoparaisuereco güemimbotar rupi. Güemimbotar rupi avei omboavai víroya āgua ava upe.

19 Aviyeteramo oimera que amove pe pāhu pendar aipo ehi vahe, “Ndiyai evocoyase Tūpa upe, ‘Pe peyavi mbahe’ he āgua yandeu. Esepia, ndipoi eté niha ava, ¡Aní!’ ehi vaherā Tūpa remimbotar upe” ehira.

20 “Ndiyai eté rumo Tūpa poepi āgua ndeu” ahera aipo ehi vahe upe. Inungar ñaihu mbahemoinda ndiyai, “¿Mahera che apo rai tēi eve?” ihe āgua oaposar upe.

21 Ñaihu rese oporaviqui vahe rumo güemimbotar rupi oyapora mbahe yuvireco sese. Oicatu ichui aviye catu vahe apo, oicatu avei ambuae iporupirã tēi apo āgua.

22 Tūpa rumo oñemoso pare iya ité oñemoirora, opiratasa mboyecua āgua ocañi tēi vaherã upe.

23 Ēgüe ehi avei yapo güemimbotar rupi güeco porañetesa ivate vahe mboyecua āgua yandeu. Esepia, yande paraisuereco iyavei yipisuive teco ori porañetesa omoingatu yandeu aheve yande reique āgua.

24 Yande avei yande renoi oyeupe, que judío, anise que ndahei vahe judío yande recose.

25 Esepia, Oseas rembicuachiagüer pipe aipo ehi: “Acoi ava ndahei vahe cheundar, chupe, ‘Cheundar ité’ ahera, iyavei acoi ava ndahei vahe saisupri yuvirecoi, chupe, ‘Che rembiaisu ité’ ahera” ehi.

26 “‘Pe ndahei vahe cheundar peico’ ehi vahesave, ahe chupe, ‘Tūpa oicove vahe rahir ité’ hesara” ehi.

27 Isaías rumo aipo ehi israelita upe: “Yepe Israel suindar setá iteangara viña inungar ivi cuhi, moviro tēi rumo oñepisiroa yuvireco.

28 Esepia, yande Yar omboaviye voira oñehe ava viroyasarēhi mocañi āgua co ivi pipe” ehi.

29 Oyoya avei ambuae Isaías remimombehugüer yipindar vahe rese: “Yande Yar seco pīrata catu vahe noipisiroise que moviro yande ramoi yandeu, yacañipa tēira viña inungar tecua guasu Sodoma, Gomorra reseve yuvireco” ehi.

Judío yuvirecoi vahe iyavei ñehesa pīsiroso resendar

30 ¿Mara yahera vo evocoyase? Yaicua ava ndahei vahe judío, yepe ndahei osecá vahe güeco catupri āgua yuvireco viña, Cristo rese oyeroyasa pipe rumo vireco ité güeco catuprisa Tūpa rovaque.

31 Judío yuvirecoi vahe rumo oipota tēi güeco tupri āgua ité Tūpa porocuita mboyeroa pipe viña, ndoicatui eté rumo supiti yuvireco.

32 Esepia niha, ndahei oyeroyasa pipe ité oseca oñepisiro āgua, ahe rumo co mborocuita mboyeroa sui tēi Tūpa rese yuvirecoi pota viña. Ahe evocoyase ndoyavi oyepiapi vahe “ita yepiapisa” rese yuvireco.

33 Aipo ehi tupri icuachiapri arachendar pipe: “Che amondo Sión ve ñepe ita yepiapisa, ahe oporoeti vahe. Acoi sese oyeroyá vahe rumo, nomochi ucai chietera oyesui” ehi Jesús recocuer upe.

10

1 Che rivireta, che aipota che piha pipe ité iyavei ayerure Tūpa upe che mu judío recocuer rese ‘toñepisiro yuvireco’ che yapave.

2 Supi eté iquerēhi ité Tūpa upe mboraviqui apo āgua yuvireco viña. Oquerēhisa sui rumo oyavi senducuaēhisa pipe yuvireco.

3 Esepia, ndoicua potai mara ehi Tūpa ava pisi oyeupe. Sese oyesui tēi oseca güecocuer tupri pipe ‘tomoingatu Tūpa opiha yande pisi āgua’ ohesave yuvireco viña. Ipipe sui nomboyeroai eté Tūpa remimbotar güeco mbocatupri āgua ité yuvireco.

⁴ Esepia, Cristo recouer pīpe imboaviyesa tupri Moisés porocuita, “Peyavi mbahe che ñemoirosa pīsi āgua” ehiēhi āgua Tūpa oyese oyeroya vahe upe.

⁵ Co yande reco catupri āgua porocuita pīpe sui, Moisés aipo ehi icuachía: “Acoi ava omboaviye tupri vahe opacatu co mborocuita, ipipe sui yuvirecovera” ehi.

⁶ Tūpa, “Peyavi mbahe che ñemoirosa pīsi āgua” heēhi āgua rumo yande yeroyasa pīpe, “Ava vo oyeupira ivave Tūpa Rembiporavo roroyi āgua” ndapeyei chira.

⁷ Iyavei, “Ava vo ogüeyira omano vahe pāhuve Tūpa Rembiporavo mboyeupi uca āgua” ndapeyei chiveira.

⁸ ¿Mara peyera evocoyase pe piha pīpe? “Co ñehesa namombriveimi pe sui, pe yuru pīpe ité, pe piha pīpe avei secoi” peyera.

⁹ “Jesús, che Yar” peyese, pe piha pīpe peyeroyase avei Tu imbogüerayevisa rese, ahese ipīsiropri peicora.

¹⁰ Esepia, yande piha pīpe yayeroya Jesús rese. Ahese Tūpa, “Co seco catupri vahe” ehira yandeu. Iyavei yamombehuse sese yande yeroyasa, ahese ipīsiropri yaicora.

¹¹ Esepia, icuachiapri arachendar pīpe Tūpa aipo ehi: “Acoi sese oyeroyá vahe rumo, nomochi ucai chietera oyesui” ehi.

¹² Sese oyoya tupri judío ndahei vahe judío recouer rese. Esepia, ñepeñño ité niha Yar opacatu ava upe nomopanei vahe oporovasasa tuvichá vahe oyeupe oporandusar upe.

¹³ Esepia, icuachiapri arachendar pīpe aipo ehi: “Acoi opacatu osenoi vahe yande Yar rer, ipīsiropri yuvirecoira” ehi.

¹⁴ Ava rumo ndoporandui chira pīsirosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduisse yuvireco. Iyavei ndosendui chira ndipoise ñehesa mombehusar yuvireco chupe.

¹⁵ Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri arachendar pīpe: “¡Aviye ai eté acoi ava güeru vahe ñehesa aviye vahe pīsirosa resendar!” ehi.

¹⁶ Ndahei rumo opacatu che mu judío viroya co ñehesa pīsirosa resendar yuvireco. Isaías niha aipo ehi avei aracahe: “Che Yar, ¿uma pīha viroya ore ñehe yuvireco?” ehi.

¹⁷ Sese yayeroya Jesucristo rese co ñehesa pīsirosa rendusa pīpe.

¹⁸ ¿Osendu pīha judío co ñehesa yuvireco? ¿Osendu ité! Esepia, aipo ehi avei acoi icuachiapri arachendar pīpe:

“Sendusa niha opacatú ivi rupi ñehe” ehi.

¹⁹ Iyavei, ¿osenducua pīha yuvireco? ¿osenducuaño ité! Esepia, yipindar Moisés omombehu icuachiapri pīpe aipo ehi:

“Perecatēhira che porovasasa rese oipisise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe” ehi.

²⁰ Ipare omombehu tupri ité Isaías osiquiyeēhisave Tūpa ñehe aipo ehi vahe: “Acoi ava ndache recai vahe, ahe che pīsi ité yuvireco.

Iyavei ayembocuea acoi ava che rese ndoporandui vahe upe” ehi.

²¹ Judío recouer rese avei rumo aipo ehi: “Ari rupi añehe tēi ava che roroyasarēhi ndiporeroyai vahe upe vichico” ehi aracahe.

11

Moviro tēi ava Israel pendar Tūpa oiporavo oyeupe nara

¹ Evocoyase, ¿omombo pīha Tūpa ava Israel güembiporavo eta oyesui? ¡Aní eté! Esepia, che avei niha ichuindar aico. Abraham niha che ramoí eté, Benjamín suindar avei aico.

² Yipisuive ité niha Tūpa, “Co ava cheundar ité” ehi ore ramoí israelita upe. Sese cūrítei ndore momboi eté oyesui. Peicua niha acoi Elías resendar icuachiapri aracahendar oyeróqui tēise omu israelita rese aipo ehise Tūpa upe:

³ “Che Yar, nde ñehe mombehusareta opa oyuca yuvireco. Ndeu porerecosa reropovēhesa renda avei opa omombo yuvireco. Che güeraño aicove vitemi nde reroyasar. Che yuca potaño avei eté rumo yuvireco” ehi.

⁴ Tūpa rumo omboyeví chupe: “Aipeha rumo siete mil tupri ava che mboyeroyasar cheyeupe nara noñenopihai vahe Baal rahanga rovai yuvireco” ehi.

⁵ Ēgüe ehi avei cūrítei opita viteño moviro judío, ahe niha Tūpa oiporavo oporoaisusa pipe.

⁶ Ipipe ité niha ěgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pipe viña.

⁷ Evocoyase judío eta ndosecai eté mbahe oipotá catu vahe Tūpa suindar yuvireco. Sembiporavo ete ité rumo oipisi yuvireco. Ambuae upe rumo Tūpa omboavai catu viroya āgua.

⁸ Icuachiapri pipe aipo ehi aracahe: “Tūpa nomboyecua uca iri mbahe secocuer pipe. Cūrítei ěgüe ehiño vite ité yuvireco. Omondo tēi sesarā; ipipe rumo ndosepia ucai mbahe chupe. Omondo tēi avei yapisaguā; ipipe ndosenducua ucai mbahe chupe” ehi.

⁹ Iyavei David aipo ehi aracahe: “Ipietasa ivonde nungar iyavei pira mbohasa nungar tasecoi chupe. Ipipe sui toyuviroha mbahe tēi pipe yuvireco, toyemombaraisu uca avei ipipe yuvireco.

¹⁰ Toicua eme mbahe inungar ndasesapisoí vahe yuvireco. Icuhapapri nungar ayase toyuvirecoí apirēhi vaheerā” ehi.

Ndahei vahe judío ñepisiro agüer

¹¹ Evocoyase areco iri che porandusa pēu: ¿Apirēhi vaheerā ité pīha judío eta ndoyeroyai Jesucristo rese oñepisiro āgua yuvireco? ¡Aní eté! Ahe rumo ěgüe ehi ava ndahei vahe judío pīsirosa pisi āgua yuvireco. Ipipe sui oyemonguerēhi catura judío ipisi āgua yuvireco curi.

¹² Evocoyase judío eta rembiavi sui tuvichá Tūpa poroparaisuerecosa oime opacatu ava ndahei vahe judío upe. Coiye rumo tuvicha catu itera Tūpa poroparaisuerecosa opacatu ava upe oyevise yuvireco chupe.

¹³ Che rumo areco che ñehesa pēu pe ndahei vahe judío. Tūpa niha che cuai oñehe mombehu āgua ndahei vahe judío upe. Sese, “Aviye ai eté che poraviquisa” ahe che mu judío rovaque yepi.

¹⁴ Sendusa sui aviyeteramo oimera ipāhuve oyemonguerēhi vahe pīsirosa Tūpa suindar pisi āgua oyeupe nara yuvireco.

¹⁵ Esepia, judío mombosa pipe sui Tūpa omoime ñerosa opacatu ava co ivi pipendar upe. ¿Mara ehira pīha evocoyase Tūpa ipisise? Ahese oipisira tecovesa apirēhi vahe yuvireco, evocoyase ndoyuvireco iri chira omano vahe nungar Tūpa upe.

¹⁶ Esepia, yipindar panguã sui yapopri seropovêhese Tûpa upe, opacatu panvi evocoiyase sovasapri avei ichui. Iyavei inungar ivira rapo seropovêhese Tûpa upe viña, sãca avei evocoiyase opacatu êgüe ehi aveira viña.

¹⁷ Amove che mu judío inungar Olivo rãca yasiapri. Pe evocoiyase ndahei vahe judío ivira caha pipendar rãca nungar peico vahe, peso yasiapri rendagüerve, ipipe sui peipisi vîracuasa pe recove ãgua.

¹⁸ Aní chira rumo, “Yande aviye catu vahe yaico ivira rãca nungar yipindar yuvirecoi vahe sui” peye pe yeecomboivate aisa pipe. Esepia, ndahei pe sui judío oipisi oyemoviracua ãgua yuvireco, pe rumo yipindar ichui eté peipisi pe yemoviracua ãgua.

¹⁹ Iyavei, “Co judío rumo imombosa ité ivira rãca asiapri nungar yande sendagüerve yapita vaheerã” peye revo.

²⁰ Supi eté, co rumo Tûpa reroyaêhi pipe ahe imombosa ichui yuvireco, pe rumo seroya pipe suiño ité pepita sendagüerve. Sese peicua catu, aní chira yemboivate ai pipe.

²¹ Esepia, Tûpa oiporavo co judío oyeupe nara ité viña, ndoviroyaise rumo, ndoipisii eté. Pêu avei êgüe ehira ndapemboyeroyaise.

²² Peyapisaca tupri, Tûpa niha aviye vahe ité. Seco pîrata vahe avei rumo ava viroyaêhisar upe. Pêu rumo aviye ité. Peicoño catu iporoaisusa pipe; aviyeteramo ndapeicoise supi, pe avei yasiapri nungar têi peicora.

²³ Opoipase rumo judío eta Cristo reroyaêhisa sui, Tûpa evocoiyase viroyevi irira oyeupe nara. Esepia, chupe iya ité ipisi iri ãgua.

²⁴ Pe ndahei vahe judío ivira caha pipendar rãca yasiapri nungar peico, Tûpa rumo pe mondo ivira aviye vahe nungar rese. ¡Evocoiyase judío ete ité inungar ahe ivira aviye vahe rãca yasiapri, ahe ivate catu oipisi irira oyeupe nara!

Ipa vahe judío ñepisiro agüer

²⁵ Che rivireta, che aipota, “Toicua Tûpa remimbotar icuapirêhi oyemboivate aiêhi ãgua yuvireco” ahe pêu. Esepia, amove Tûpa judío upe omboavai viroya ãgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pêu,

²⁶ ahese ramo opacatu ava judío yuvirecoi vahe Tûpa oipisiora. Esepia, icuachiapri aracahendar pipe aipo ehi:

“Oura ava Písirosar judío recua Sión pãhu sui, ahe oipehara mbahe naporai vahe opacatu judío sui.

²⁷ Evocoi niha che remimbotar chupe nara, amocañise yangaipagüer yuvireco ichui” ehi.

²⁸ Êgüe ehi cûritei judío eta ndosendu potai ñehesa písirosa resendar yuvireco. Sese Tûpa amotarêhisar yuvirecoi. Pêu mbahe tupri ãgua rumo êgüe ehi. Tûpa rumo osaisu vite. Esepia, yipive ité oiporavo tamoi eta oyeupe.

²⁹ Supi eté, Tûpa ndoviroyevi iri eté mbahe güemimondo iyavei ndovirovirova têi vahe opihañemoñetasa güembiporavo sui.

³⁰ Yipindar niha pe ndapemboyeroyai eté Tûpa. Cûritei rumo judío eta ndoviroyaise yuvireco, pe paraisuereco Tûpa.

³¹ Êgüe ehi avei judío eta cûritei ndoviroyai yuvireco. Tûpa pe paraisuereco uca ãgua rumo êgüe ehi yuvireco. Coiye inungar pe, judío avei osupitira Tûpa poroparaisuerecosa yuvireco.

³² Esepia, Tūpa ité, “Opacatú oyavi mbahe che reroyaēhisa pipe” ehi ‘oicuaase mbahe güembiavi, tiquerēhi opacatú che poroparaisuerecosa pisi āgua yuvireco’ oya.

³³ ¿Mara ehi rutei Tūpa aracuasa, imbahecuasa avei? Ndipoi chietera que ava yaracuasa mombehu tupri āgua. Ndayaicatui avei secocuer cuapa tupri āgua.

³⁴ Ndipoi eté que ava oicua vahe yande Yar pihañemoñetasa iyavei ndipoi eté que ambuae ava tēi ombohe vahe no.

³⁵ Ndipoi que ava mbahe omondo vahe yande Yar upe ‘tomboyevi cheu’ ohesave.

³⁶ Esepia, Tūpa suiño ité niha opacatu mbahe oime, oyeupe nara avei mbahe oyapo opīratasa pipe. ¡Sese imboeteipri ité Tūpa tasecoi yepi! Ēgüe tehi apirēhi.

12

Yande recocuer imondopri Tūpa upe nara

¹ Sese che rivireta, che Tūpa poroparaisuerecosa pipe aipota pe yemondo ité pe recoveseve chupe nara, inungar mbahe Tūpa upe seropovēhepri ité, ahe aviye itera chupe. Ahe niha pe cuaita pe piha pipe sui eté peyapo vaherā chupe.

² Peico iri eme co ivi pipendar pihañemoñetasa tēi rupi. Iyacatu rumo pesecuñaro pe pihañemoñetasa. Ipípe sui opacatu pe recocuer oñecuñarora. Ēgüe peyese, peicuaara Tūpa remimbotar ahe mbahe aviye vahe, semimbotar supi tupri vahe ité.

³ Tūpa niha oporovasasa pipe che cuai, sese aipo ahe pēu: pepihañemoñeta eme pe yemboivate ai āgua rese. Iyacatu rumo peicua tupri pe pihañemoñetasa peyesendar Tūpa pēu mbahe imbougüer rupi sese pe yeroyasa pipe.

⁴ Inungar yande rete ñepeño ité, sesendar rumo setá, iyavei ndahoyoyai mbahe sembiapo.

⁵ Ēgüe yahe avei yande, yepe que yande retara viña, Cristo rese yayemboyase rumo, ñepe vahe nungar yaico. Evocoiyase yande ñepepei opacatu upendar yaico.

⁶ Tūpa niha omboyeavirati mbahecuasa imbou oporoaisusa pipe ñepepei upe. Evocoiyase Tūpa ombouse oñehe mombehu āgua yandeu, yamombehura ñepepei iñehe sese yande yeroyagüer rupi.

⁷ Que ombouse mbahecuasa ambuae ava pītiviī āgua yandeu, yaipītiviī tupri aveira. Ombouse yande porombohe āgua, yaporombohe tupriño itera.

⁸ Iyavei ombouse yandeu ambuae ava monguerēhi āgua, yaporomonguerēhiño itera. Ombouse yande poropītiviī āgua ava mbahe ndovirecoi vahe upe, yamondoño itera mbahe chupe yande recatēhiēhisave. Acoi oporocuai vahe, toyapoño oquerēhisa pipe; iparaisu vahe pītiviisar, toipītiviīño avei vorivetesa pipe.

Cristo reroyasar cuaita

⁹ Iyavei peyeaisu tupri ité; aní pesepia potara mbahe tēi, iyacatu rumo peicoño itera mbahe aviye vahe pipe.

¹⁰ Peyeaisu catu ñepepei oyeivri nungar tupri pe recosa pipe. Pe ae peyemboetei rāgüer sui pemboetei catura ambuae ava Jesús reroyasar.

¹¹ Peyemonguerēhi, aní ndapequerēhi chira iyavei peyapo yande Yar upe mbahe opacatu pe recoete pipe.

¹² Peicoño pe viharetasave mbahe iva péndar rārosa pipe; peñemosaño mbahe rasicuer peiporarase iyavei aní chira peseya pe yeruresa yepi.

¹³ Peipitivi ambuae ava Cristo reroyasar mbahe ipanese chupe, pemohapisira ava oyepota vahe pe piri.

¹⁴ Peyerure pe amotarēhimbar rese; peporandu Tūpa porovasasa rese ahe ava upe nara; aní pe avei peñehe mara chupe.

¹⁵ Peyemboviha acoi ava oyemboviha vahe rupive; peyaseho avei ava oyaseho vahe rupive.

¹⁶ Peico tupri oyoya guasu ñepi-peí oyese pe yeaisusa pipe. Aní chira peyecomboivate ai. Iyacatu rumo peyemoingatu ava seco mbegüemi vahe mbori āgua. Aní peñemoha imbahecia vai vahe nungar.

¹⁷ Aní pēu mbahe tēi aposar upe pemboyevira mbahe tēi avei. Peyapo catu mbahe tupri opacatu ava rembiepiave.

¹⁸ Peicatu vahe rupi peseca pe reco tupri āgua opacatu ava upe.

¹⁹ Che rivireta, aní pe ae pemboyevi mbahe tēi pipe pe rereco momarasar upe. Peseyaño Tūpa upe. Ahe oicuara chupe. Esepia, icuachiapri pipe aipo ehi: “Che ité aicuara ava mbahe tēi aposar upe. Che amboepira” ehi yande Yar.

²⁰ Iyavei aipo ehi: “Acoi nde amotarēhimbar ndasiepoise, emondo mbahe itohu, iyavei acoi ihuseise, eremondora itoihu. Esepia, ēgüe peyese pe amotarēhimbar upe, ochira pe sui” ehi.

²¹ Aní mbahe tēi upe peyecopi uca. Iyacatu rumo pesecopira mbahe-mbahe tēi mbahe tupri aposa pipe.

13

¹ Opacatu mborereciar yuvirecoi vahe pemboyeroyara. Esepia, ndipoi mborereciar ndovirecoi vahe ocuaita Tūpa suindar. Co oime vahe rumo semimbou ité.

² Sese acoi mborereciar upe que mara ehi vahe, Tūpa porocuita reroyaēhisar yuvirecoi. Ēgüe ehi vahe inupambri yuvirecoira.

³ Esepia, mborereciar yuvirecoi vahe ndahei ava seco tupri vahe mbosiquiye āgua yuvirecoi, ahe rumo yuvirecoi ava mbahe tēi aposar mbosiquiye āgua. Ndayasiquiye potaise mborereciar sui, iya yaicora mbahe tupri pipe. Mborereciar evocoyase, “Aviye” ehira yande reco catuprisa rese yandeu.

⁴ Esepia, ahe Tūpa rembiguai mbahe tupri apo āgua yandeu. Acoi mbahe tēi yayapose rumo, yasiquiyera ichui. Esepia, ahese mborereciar yande nupaño itera yuvireco. Ahe niha Tūpa remimbotar rupi eté icuaita ava mbahe tēi aposar nupa āgua yuvireco.

⁵ Sese iya yamboyeroya ité mborereciar; ndahei rumo ahe yande nupaēhi āgua reseño, yande pihañemoñetasa momaraēhi āgua rese avei.

⁶ Sese avei yamondora guarepochi mborereciar upe yuvireco yandeu oporanduse. Esepia, ahe mborereciar Tūpa rembiguai yuvirecoi. Evocoyase aheño ité iporaviquisa yuvireco.

⁷ Yamondo ñepi-peí ava upe mbahe chupendar. Iya ité yamondo mborereciar upe guarepochi oporanduse sese, yamboetei avei ava imboyeroyapri.

⁸ Aní yandereve. Ahe yande cuaita. Yande cuaita avei yande yeaisu āgua, supi eté acoi ava osaisu vahe ambuae ava, omboaviye ité Tūpa porocuita.

⁹ Aipo ehi acoi Tūpa porocuaita: “Ndapeyemboaguasai chira, ndapeporoyucaí chira, ndapemondai chira, ndaperemirai chira, ndapeipota rai chiaveira ambuae ava mbahe” ehi. Co iyavei opacatu ambuae Tūpa porocuaita sendusa tupri ité co ambuae ñehesa rese: “Pesaisu ava pe yeaisu nungar” ehi.

¹⁰ Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboaviesya tupri ité porocuaita.

¹¹ Iyavei peicua tupri co mbahe oime vahe yandeu. Cūritei ari osupiti ité yandeu yande yemopoase āgua. Esepia, yande Yar yevi āgua cōimi catu yandeu iñehengagüer yipindar seroyasa sui.

¹² Supi eté osupiti senimi ari yandeu; sese iyacatu yapoi pītumimbi vahe nungar mbahe-mbahe tēi aposa sui mbahe icatupri vahe pipe yande reco āgua. Evocoiyase tayaico sundao oyoepisa omonde vahe nungar.

¹³ Yande catu yaguata yande reco ñvi tuprisa pipe, inungar yaguatase ari pipe. Aní catu yaico caguar pipe tēi iyavei pieta siapu tēi vahe rupi, ndayande poropota rai chiaveira, iyavei ndayayapoi chira mbahe tēi, ndayaicoi chiaveira yande piñañemoñeta ndahoyoyai vahe pipe, ambuae ava mbahe pota raisa pipe avei no.

¹⁴ Iya rumo yarecora yande Yar Jesucristo recocuer yande yese, aní yande piñañemoñeta mbahe-mbahe tēi apo āgua yande remimbotarai pipe.

14

Aní peroïro ambuae Jesús reroyasar

¹ Acoi ava ndoyeroya tupri vitei vahe yande Yar rese que oiquese pe piri, peipisi tuprira; aní peiñehepoepira ipiñañemoñetasa ndahoyoyaise pe piñañemoñeta rese.

² Esepia, amove evocoi nungar ava ihupri pāve tēi yuvirohu, oime rumo amove ava ipiñañemoñeta opacatu mbahe hu āgua rese.

³ Acoi ava opacatu mbahe ohu vahe, toviroïro eme amove ndohui vahe mbahe iyavei acoi amove ndohui vahe mbahe, toviroïro eme acoi ohu vahe opacatu mbahe. Esepia, evocoi nungar ava Tūpa oipisi ité.

⁴ Supi eté pe ndiyai eté peroïro vaheerā ambuae ava rembiguai. Esepia, ahe yande Yar povri pendar secoi. Yepe ndoyaviise mbahe ipipe, anise ichui oviapise mbahe tēi pipe, serecuar ité oicuara chupe. Esepia, yande Yar opirataso pipe osecomoingatuño itera.

⁵ Oime avei amove ava ñepeí ari omboetei catu yuvireco ambuae ari sui, iyavei ambuae oime aipo ehi: “Oyoya guasuño ité niha ari” ehi vahe. Ñepeípei opiñañemoñeta rupi, “Co supi tupri vahe” ehira opiha pipe yuvireco.

⁶ Acoi que ñepeí ari ava omboetei vahe, yande Yar mboeteisa pipe rumo ēgüe ehi. Iyavei ohu vahe opacatu mbahe, Yar mboeteisave avei ēgüe ehi. Esepia, ahe güemiapo rese, “Aviye ndeu” ehi Tūpa upe; iyavei acoi amove ndohui vahe mbahe, Yar mboeteisave ēgüe ehi, iyavei, “Aviye ndeu” ehi avei Tūpa upe.

⁷ Esepia, yande ñepeí-pei ndayaicoi yandeyeupe nara tēi, ndayamanoi avei yandeyeupe nara.

⁸ Esepia, yaicove viteso, yaico yande Yar upe nara; yamanoso, yamano yande Yar upe nara avei. ēgüe yahe yande yaicove viteso, anise yamanoso, opacatu chupe nara ité yaico.

⁹ Sese niha Cristo omano, ipare ocuerayevi opacatu ava Yar güeco āgua que omano vahe, anise que oicove vite vahe upe avei.

¹⁰ ¿Mahera evocoiyase peroñro pe mboetasa Cristo reroyasar iyavei mahera ndapesepia potai? Esepia, supi eté niha yande opacatú yasora Tūpa rovai. Ahe evocoiyase opara oporandu yande recocuer rese yandeu.

¹¹ Esepia, icuachiapri aracahendar pīpe omombehu: “Supi eté che reco pīpe aipo ahe, ehi yande Yar, opacatu ava oñenopihara che rovai yuvireco, iyavei che mboeteira yuvireco, ehi” ehi.

¹² Evocoiyase yande ñepei-peí yamombehura yande recocuer Tūpa upe.

Aní pe rivireta mbahe tēi pīpe pereco uca

¹³ Sese yande ndiyai yañeroiro. Iyacatu rumo ñepei reseve pereco tupri ambuae pe rivri, angaipa pīpe sereco ucaēhi āgua, iyeroyasa momaraēhi āgua avei.

¹⁴ Che yande Yar reroyasar che reco pīpe aicua ndipoi eté que tembihu yande reco momara vahe. Amove rumo ava, “Mbahe tēi co tembihu, ndiyai yahu” ehise, ahe chupe evocoiyase mbahe tēi, ndiyai eté ihu āgua.

¹⁵ Iyavei yande que mbahe yahuse, ipīpe yamomara tēise yande rivri pīhañemoñetasa Tūpa rese, ndahei evocoiyase yande poroaisusa pīpe ité ēgüe yahe. ¡Aní ahe yamocañi tēi uca Cristo sui evocoi nungar mbahe yahu vahesa pīpe! Esepia, secocuer rese Cristo omano.

¹⁶ Yepe que mbahe aviyera yandeu viña, ndayayapoi chira rumo evocoi nungar yande rembiapo rese ava ñehe-ñehe tēiēhi āgua.

¹⁷ Esepia, ndahei ivate catu vahe Tūpa upe yande carusa, yande igua avei ipovrive yande recose. Ēgüe ehi rumo co ivate catu vahe chupe yande recocuer mohivisa, yande reco tuprisa ambuae Tūpa reroyasar pāhuve iyavei yande rorivetesa yareco vahe Espiritu Santo sui.

¹⁸ Ēgüe yahese Cristo mboeteisave, aviye aira Tūpa upe iyavei opacatu ava rembiepiave avei no.

¹⁹ Sese opacatu yande recoeté pīpe yasecara yaico tupri vaherā yandeyeupe. Ipīpe sui yande yaicatura yañepitivi yande yemoviracua tupri āgua yande Yar rese.

²⁰ Aní pemocañi uca tēi ava recocuer Tūpa remipisiro tembihu sui tēi. Opacatu niha co tembihu aviye aiño ité; ndiyai eté rumo yahu que tembihu ambuae ava Cristo reroyasar pīhañemoñetasa momara āgua.

²¹ Aviye catu ndayahuisse mbahe roho, que ndayahuisse uva ricuer iyavei que ambuae mbahe ndayahypoise, ambuae ava Cristo reroyasar angaipa pīpe seiti uca iriēhi āgua.

²² Yande pīhañemoñetasa yareco vahe rumo yarecoño itera yandeyeupe ité Tūpa rovaque. ¡Aviye ai catuño ité ava acoi, “Aviye yayapose evocoi nungar mbahe” he pare, “¿Mara ehi pīha?” ndehi irise opīhañemoñetasa pīpe!

²³ Acoi que ava, “¿Mara ehi pīha?” ehise tembihu upe. Ipare rumo ohuse, ahe evocoiyase oyemboangaipa ipīpe. Esepia, ndohui Tūpa rese oyeroyasa pīpe. Iyavei ava, “¿Mara ehi pīha?” ehi vitese que mbahe upe, ipare oyapose ité, ahe angaipa.

15

Yambovihara ava yande cotindar; ndahei chira yande ae tēi yayembovihara

¹ Yande yayemoviracua catu vahe Cristo rese yande yeroyasa pīpe, iyacatu yande teieté yañemosañora ava Tūpa rese ndipīhañemoñeta tupri vitei vahe rese. Ndahei chira rumo yande ae tēi yayemboviha.

² Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye água yuvireco chupe 'toyeroya catu opihañemoñeta pipe Tüpa rese yuvireco' yande yapave.

³ Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri ité acoi omombehu vahe: "Nde rese ñehe ñehe tēi opa aipisi" ehi.

⁴ Supi eté co opacatu omombehu vahe aracahe opa icuachiasa yande mbohe água, yande yasáro vaherä Tüpa reco porañetesa yande ñemosasa pipe iyavei yande pihamonguerêhisa pipe avei ahe yareco vahe ichuindar.

⁵ Tüpa, acoi ombou vahe yande ñemosasa, yande pihamonguerêhisa avei yandeu, tape pítivii oyoya guasu pe reco tupri água ñepepe-pe peyese Jesucristo recocuer rupi.

⁶ Ipipe sui pe opacatu oyoya guasu ñepepe pe pihanemoñetasa pipe, pe ñehe pipe avei tapemboetei Tüpa, yande Yar Jesucristo Ru.

Ñehesa pĩsirosa resendar imombehusa ava eta ndahei vahe judío upe

⁷ Peyepisi tupri ñepepe-pe, inungar Cristo pe pisi tupri oyeupe nara Vu mboetei água.

⁸ Che rumo aipo ahe pēu: Jesucristo ou judío pítivii Tüpa remimombe-hugüer mboaviye água judío ramoi aracahendar upe. Êgüe ehi Tüpa oñehe mboaviyesa mboyecua

⁹ 'tomboetei ava ndahei vahe judío yuvirecoi vahe che Ru Tüpa iporoparisuerecosa rese yuvireco' oyapave. Ahe êgüe ehi icuachiapri rupi tupri ité aipo ehi vahe:

"Sese che oromboeteira opacatu ava ndahei vahe judío pāhu rupi, iyavei asapuacira ndeu nde rer mboeteisa pipe" ehi.

¹⁰ Iyavei acoi ambuae icuachiapri pipe omombehu avei no:

"¡Peyemboviha catu pe opacatu ndahei vahe judío peico vahe judío Tüpa rembiporavo reseve!" ehi.

¹¹ Ambuae pipe avei aipo ehi no:

"Pe opacatu ivi pipendar ava, ¡pemboetei yande Yar!" ehi.

¹² Isaías avei aipo ehi icuachía:

"Oimera niha ava Isaí suindar, opacatu ava rerecurã secoira.

Ava ndahei vahe judío seseño ité oyeroyara yuvireco" ehi.

¹³ Tüpa acoi ombou vahe mbahe oyesuindar rãro água, tayande mboviharete catu iyavei mbahe tupri tayareco sese yeroyasa pipe. Ipipe sui tombou yasáro vaherä ahe mbahe aviye vahe Espiritu Santo pĩratasa pipe.

¹⁴ Che rivireta, ayeroya ité pe reco aviyesa rese, opacatu mbahe peicuapa tupri, peicatu avei pe ñepepe-pe peyeupe pe yemboaracua água.

¹⁵ Co tecocuer rese rumo aicuachía opacatu che siquiyeêhisa pipe pēu pe resaraiêhi água ichui. Esepia, ayapo Tüpa che cuaita ombou vahe che raisusa pipe cheu

¹⁶ Jesucristo rese che poraviqui água ava ndahei vahe judío recocuer aviye água. Evocoiyase judío pahi nungar che cuaisa pipe amombehu co ñehesa Tüpa ombou vahe pĩsirosa resendar yuvireco chupe imoporêhi água Tüpa rovai inungar mbahe seropovêhepri aviye vahe Tüpa upe Espiritu Santo pipe yepi.

¹⁷ Supi eté che Jesucristo reroyasar che recosa pipe aviharete Tüpa che cuaita rese.

¹⁸ Esepia, cheu ndiyai aňehe vaheerã que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu aňehe vaheerã. Esepia, amonguerêhi Tûpa reroya âgua yuvireco che ñehe rese, che rembiapo sui avei.

¹⁹ Êgüe ahe poromondiisa mbahe yavai vahe apo Tûpa pîratasa pipe. Ahe ayapo Espîritu Tûpa suindar pîratasa pipe. Ipipe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no.

²⁰ Chequerêhi avei co ñehesa pîsirosa resendar mombehu âgua ava Cristo recocuer ndosendui vahe upe yepi. Ndahei rumo ambuae ava imboaracua pare têi,

²¹ che rumo ayapo inungar icuachiapri pipe omombehu vahe:

“Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

Pablo ipiñañemoñeta Roma ve oso âgua

²² Co rese têi che ndaicatu aso pe pîri, yepe setã rupi aso pota têi viña.

²³ Cûritei rumo opa amboaviye che poraviqui co ivi rupi, iyavei opa têi setã araviter pe pîri che sosa rãgüer.

²⁴ España ve che soseve, apita pucumira vicho pe pîri yande yemboviha âgua. Iyavei pe sui che sê potase, che pîtivimira peye aheve che so âgua.

²⁵ Cûritei rumo che asora Jerusalén ve. Arasora porerecosa ahe pendar yande mboetasa Jesús reroyasar pîtivii âgua.

²⁶ Esepia, ivi Macedonia pendar iyavei Acaya pendar Jesús reroyasar, ahe omonuha guarepochi yuvireco Jerusalén ve yande rivri iparaisu vahe pîtivii âgua yuvireco.

²⁷ Ahe êgüe ehi güemimbotar rupi yuvireco iyavei iya ité imboyevi âgua yuvireco chupe ahe mbahe tupri oyeupe apo agüer rese. Esepia, yipindar Jesús reroyasar judío yuvirecoi vahe oicua uca co tecocuer Tûpa suindar ahe ava ndahei vahe judío yuvirecoi vahe upe. Sese iya ité imboyevi âgua co ivi pipendar porerecosa chupe.

²⁸ Opase che co porerecosa amondo yuvireco chupe, España ve che sose, ahese apitara vicho pe pîri.

²⁹ Che amoha voi eté asose eipeve, tuvichá omboura Cristo oporovasasa yandeu.

³⁰ Che rivireta, yande Yar Jesucristo rer pipe iyavei yeaisusa Espîritu ombou vahe pipe avei aporandu pëu opacatu che rese peyeroqui pîrata vaheerã Tûpa upe che pîtivii âgua co mboraviqui rese.

³¹ Peporandu Tûpa upe, tache repi ava Jesús reroyasarêhi sui ivi Judea ve, iyavei Jerusalén pendar yande rivireta co porerecosa pisi tupri âgua avei.

³² Ahese Tûpa oipotase, che aviharetera ayepotase pe repia, iyavei toime pîtuhusa yandeu che pe pîri che sose.

³³ Êgüe tehi Tûpa güeco tuprisa pipe tasecoi opacatu pe rese.

16

Pablo mahenduhasa ñepei-pei ava upe

¹ Co yande reindri Febe serer vahe, ahe oipîtivii tecua Cencrea pendar Cristo reroyasar oico.

² Peipisi tupri catu yande Yar rer pipe; ahe niha yande cuaita Cristo reroyasar yande recose, iyavei peipitiviño que mbahe chupe ipane vahe rese. Esepia, ahe setá ité oporopitivi iyavei che avei eté che pitivi no.

³ Pemombehu che mahenduha Prisca upe, Aquila upe avei, ahe niha che pitivi mboraviqui Jesucristo recocuer resendar rese yuvireco.

⁴ Ahe avei niha mbahe tēi pipe omondo güecocuer che repicave yuvireco, sese, “Aviye” ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvireco chupe.

⁵ Pemombehu avei che mahenduha sētave oñemonuha vahe upe yuvireco. Pemombehu avei che mahenduha che rembiaisu Epeneto upe. Ahe rane niha yipindar ivi Asia pendar Cristo reroyasar.

⁶ Pemombehu avei che mahenduha María upe. Ahe niha oporaviqui iteanga vahe pe recocuer rese.

⁷ Pemombehu avei che mahenduha che mu Andrónico iyavei Junias upe. Ahe niha che mboetasa yuvirecoi che roquendasave; ahe avei apóstol remimboyeroa yuvirecoi, ahe rane avei yipindar Cristo reroyasar yuvirecoi che sui.

⁸ Pemombehu avei che mahenduha che rembiaisu Ampliato upe yande Yar rese secosa pipe.

⁹ Pemombehu avei che mahenduha Urbano upe. Ahe niha yande ndugüer oporaviqui vahe Cristo recocuer rese, che mboripar Estaquis upe avei.

¹⁰ Pemombehu avei che mahenduha Apeles upe. Ahe niha güecoñhasa sui osē tupri vahe Cristo rese oyeroyasa pipe. Iyavei pemombehu che mahenduhasa ava Aristóbulo rēta pipendar yuvirecoi vahe upe avei.

¹¹ Pemombehu avei che mahenduha che mu Herodión upe, ava Narciso rēta pipendar yande Yar reroyasar upe avei.

¹² Pemombehu avei che mahenduha Trifena upe iyavei Trifosa upe. Ahe niha oporaviqui vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporaviqui ité yande Yar upe nara.

¹³ Pemombehu avei che mahenduha Rufu upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi.

¹⁴ Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei.

¹⁵ Pemombehu avei che mahenduha Filólogo upe iyavei Julia upe, Nereo upe iyavei seindri upe, Olimpas upe, opacatu yande rivri yande Yar rese yuvirecoi vahe ipirindar upe avei.

¹⁶ Peyeovaupite catu pe reco maranehisa pipe che mahenduha mombhuse peyeupe. Opacatu Cristo reroyasar cohava omondo avei omahenduhasa yuvireco pēu.

¹⁷ Che rivireta, peicua catu pe pāhu pendar omboyaho pota serai vahe sui. Oime ava ěgüe ehi vahe, oiti uca vahe ava mbahe tēi pipe. Esepia, ahe ndahei eté co ñehesa pe yembohesa rupi yuvirecoi. Sese evocoi nungar ava sui peyepiño itera.

¹⁸ Esepia, ahe ava ndahei yande Yar Jesucristo upe nara oyapo mbahe yuvireco. ěgüe ehi rumo ahe oyeupe nara tēi oipota rai mbahe yuvireco. Iyavei ombopa ava ndayaracua tupri vahe; oñhehe tupri ai angahu oporomohapisi aisa pipe tēi yuvireco.

¹⁹ Opacatu ité icuasa pe poreroyasa. Sese che aviharete vichico. Che rumo aipota pemboyecua vaheṛā pe mbahecuasa mbahe aviye vahe apo āgua, ndahei mbahe tēi apo āgua.

²⁰ Evocoyase Tūpa güeco tuprisa pipe pihaivi Carugar osecopipa tupri itera. Pe avei evocoyase pesecoreroyira. Yande Yar Jesucristo tape rovasa.

²¹ Omondo avei omahenduhasa Timoteo pēu. Ahe che pīivii che poraviquisa rese yepi. Iyavei che mu Lucio, Jasón, Sosípater, ahe avei imahenduhā yuvireco pe rese.

²² Che, Tercio, aicuachía vahe co ñehesa pēu, che avei che mahenduhasa amondo yande Yar reroyasa pipe pēu.

²³ Omondo avei omahenduhasa Gayo pēu. Ahe sētave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu pēu, ahe tecua mbahe guarepochi apocatusar. Yande rivri Cuarto avei omondo omahenduhasa pēu.

²⁴ Aviye, yande Yar Jesucristo tape rovasa opacatu.

Pablo omboetei Tūpa

²⁵ ¡Yamboetei Tūpa! Ahe niha oicatu pe moviracua co ñehesa ñepisirosa resendar amombēhu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tūpa omboyecua ramo vahe cheu co ivi apoēhi suive mbahe ndicuasai vahe rese.

²⁶ Cūrítei rumo oyecua uca oñehe mombehusar rembicuachía pipe Tūpa apirēhi vahe porocuaíta rupi cute. Ahe ñehesa ndicuasai vahe omboyecua uca opacatú ava upe 'toviroya sese oyeroyasa pipe yuvireco' oya.

²⁷ ¡Tūpa güeraño imbahecuá vahe yepi, ēgüe tehi ahe yande Yar Jesucristo rer pipe imboeteipri tasecoi!

YIPINDAR PABLO REMBICUACHIA CORINTO PNDAR UPE CORINTIOS

Pablo mahenduhasa Jesús reroyasar Corinto pndar upe

¹ Che Pablo, yande rivri Sóstenes reseve, oromondo co ore mahenduhasa opacatu pëu. Tüpa niha, güemimbotar rupi, che poravo apóstol che reco ägua.

² Aicuachía co che ñehe pëu, pe Jesús reroyasar peñemonuha vahe Tüpa upe tecua Corinto ve. Peicua niha pe ipehapri peico Tüpa upe nara ité Jesucristo rese peicose. Peicua avei niha Tüpa pe poravose oyeupe nara pe reco catupri ägua, inungar opacatu ambuae seroyasar co ivi pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei.

³ Yande Ru Tüpa, yande Yar Jesucristo tape rovasa pe reco tupri ägua.

Jesucristo suindar porovasasa seroyasar upe

⁴ Che, “Aviye ndeu” aheño ité Tüpa upe pe recocuer rese yepi. Esepia, Tüpa pe rovasa ité Jesucristo rese peicose.

⁵ Ëgüe ehi secocuer pipe sui Tüpa ombou opacatu pe reco tupri catu ägua, pemombehu tupri vaheñä imbahecuasa, opacatu mbahe supi eté vahe cua tupri ägua avei.

⁶ Esepia niha, ore co ñehesa Jesucristo resendar pëu imombehusa pipe sui pe recuñaro uca ité.

⁷ Sese ndipoi eté que porovasasa Tüpa Espíritu suindar ipane vahe pëu yande Yar Jesucristo yevi ägua pesärose.

⁸ Tüpa niha pe moviracuaño itera pe rereco ari cañisa pipe Jesucristo yevise voi curi ‘tipo eme que mbahe tēi secocuer rese yuvireco’ ohesave.

⁹ Ahe acoi omboaviye vahe ité oñehengagüer yande poravo Guahir yande Yar Jesucristo rese yande reco ägua.

Jesús reroyasar pihañemoñetasa ndahoyoyai vahe resendar

¹⁰⁻¹¹ Che rivireta, che amombehu potami mbahe pëu yande Yar Jesucristo rer pipe. Esepia, Cloé mu pe mombehu yuvireco cheu: “Oñemoiroiro yuvireco oyeupe ae” ehi. Sese aipo ahe pëu: pemboyoya catu pe pihañemoñetasa, ndapeyemboyahoi chira peyesui. Peico catu pe yeaisusa pipe. Ichui tahoyoya pe pihañemoñetasa, tahoyoya avei mbahe pe remimbotar.

¹² Supi eté amove aipo, “Ore Pablo rupindar oroico” peye tēi; ambuae evocoiyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peyepye tēi aipo peico.

¹³ ¡Cristo rumo vireco porombohesa ndoyaho-yaho tēi vahe! ¿Che tie amano curusu rese pe angaipa repirã? anise, ¿che rer pipe tie peñeapiramo uca peico?

¹⁴ ¡Aviye Tüpa upe che ndopoãpiramoise! Crispo iyavei Gayo, ahe güeraño rumo añapiramo yuvireco cuese.

¹⁵ Sese ndipoi chira “serer pipe ñapiramosa” ehi vahe yuvireco cheu.

¹⁶ Estéfanas rēta pndar avei añapiramo yuvireco, ipare ndipo iri revo ambuae ava añapiramo vahecuer.

¹⁷ Cristo niha nomombehui che poroãpiramo ägua. Ëgüe ehi rumo che cuaita ñehesa ñepisirosa resendar mombehu ägua tēi. Iyavei ndahei ñehesa

yavai catu vahe aiporu. Esepia, nañomi potai eté que chñhi co ñehesa pñratagñer Jesucristo curusu rese imano agñer resendar ava sui.

Cristo Tñpa pñratasa, imbahecuasa avei

¹⁸ Esepia, acoi ava ocañi tñi vaheñá upe co ñehesa curusu rese Cristo manosa resendar aviye ãgñe ehi tñi vahe viña. Yande ipñsiropñi yaico vaheñá upe rumo co ñehesa viñeco ité Tñpa pñratasa,

¹⁹ inungar Isaías rembicuachiagñer pñpe aipo ehi:
“Amocañira co ivi pñpendar ava tñi mbahecuasa iyavei arocuara ava yaracua vai tñi vahe sui yaracuasa” ehi.

²⁰ ¿Mara ehi evocoyase co ivi pñpendar ava imbahecuasa vai vahe, ava-ava tñi aracuasa cuapar avei, iyavei ñehesa cua tupñi ai vahe co ivi pñpendar mbahe rese yuviñeco? ¿Tñpa niha oseñuñaro evocoi nungar mbahecuasa ãgñe ehi tñi vahe pñpe!

²¹ ãgñe ehi eté oaracuasa pñpe ‘toicua eme che recocuere ava oaracuasa pñpe tñi’ oya. Yepe, “Co ñehesa Cristo resendar ãgñe ehi tñi vahe” ehi tñi ava yuviñeco chupe viña, Tñpa rumo co ñehesa mombehusa sui ‘toñepñsiro che Rahñr rese yeroyasa pñpe yuviñeco’ oyapave yandeu.

²² Che mu judío osepiña pota tñi mbahe poromondiña ipñratá vahe ñva pendar yuviñeco. Griego evocoyase osendu pota tñi ñehesa aracuasa resendar yuviñeco no.

²³ Yande rumo, “Cristo omano curusu rese” yahe ava upe yaico. Amove judío upe mbahe tñi co ñehesa. Iyavei amove ndaheñi vahe judío, co ñehesa osenduse, aviye acoi ãgñe ehi tñi vahe yuviñeco chupe.

²⁴ Yande rumo, Tñpa rembiporavo yaico vahe, que judío, anise que griego avei, yandeu co ñehesa Tñpa Rembiporavo Cristo resendar Tñpa pñratasa ité, imbahecuasa avei.

²⁵ Esepia niha, ava upe, Tñpa suindar mbahe aviye acoi ãgñe ehi tñi vahe viña. Co Tñpa suindar rumo mbahecuasa aviye catu vahe ité ava tñi mbahecuasa sui iyavei acoi mbahe Tñpa suindar aviye nipñratata vahe ava upe viña, ahe rumo ipñratata catu ité opacatu ava tñi pñratasa sui.

²⁶ Che ñivñreta, peyemomahenduha catu co rese: Tñpa pe poravo, yepe pe pñhu pendar ndasetaimi imbahecuasa vai vahe ava rovaque yuviñeco viña. Ndasetaimi avei pereco pe mu seco ñvate vahe viña no.

²⁷ Evocoi ava, “Ndoicuai vahe mbahe yuviñeco” ehi yuviñeco pñu viña. Tñpa rumo pe poravo evocoi ava imbahecuasa vai vahe mochi ãgua. Iyavei oiporavo ava pe pñhu pendar ndoicatu tupñi vahe yuviñeco ava ipñratata vahe Tñpa cuaparñhi mochi ãgua.

²⁸ Oiporavo avei co ivi pñpe ava remieroñro seco mbegñemi vahe, ava seco ivi coti catu vahe pe pñhu pendar co ava seco ñvaté vahe reroyi ãgua

²⁹ ‘toyemboivate ai eme que ava che rovaque yuviñeco’ oya.

³⁰ Tñpa ité rumo yande mboyemboya Guahñr Jesucristo rese, ahe avei ombou Guahñr yande mboaracua ãgua, yande reco mohivi ãgua avei ‘toyuviñeco’ cheu nara’ ohesave iyavei ‘ipñsiropñi toyuviñeco’ oya yandeu.

³¹ Sese inungar aipo ehi ñehesa icuachiapñi arachendar pñpe: “Acoi ava oyecomboivate ai pota vahe, toyecomboivate catu yande Yar rembiapo rese” ehi.

2

1 Iyavei, che rīvireta, che alose cuese, añehese pēu Tūpa suindar ñehesa supi eté vahe yipindar ndicuasai vahe pipe, nañehi co ivi pipendar tēi ava mbahecuasa pipe, ñehesa ivate ai vahe pipe avei.

2 Esepia, acoi aicose pe pāhuve cuese, ndachepihañemoñetai eté que ambuae mbahe rese; Jesucristo recouer rese, yatica agüer rese catu ité che pihañemoñeta vichico.

3 Iyavei ndachepīratatai, aririi avei che siquiyepave pēu che sose.

4 Iyavei acoi añehese ñehesa písirosa resendar rese pēu, ndaiporui eté rumo ñehesa ivate ai vahe pe pihañemoñetasa rerova āgua. Che rumo Tūpa Espiritu pīratasa pipe añehi pēu

5 ‘toyeroya catu Tūpa pīratasa rese yuvireco’ che yapave pe yeroyaēhi āgua ava tēi mbahecuasa rese.

Tūpa oEspiritu pipe oicua uca mbahe yandeu

6 Ore rumo oromombehuño ité aracuasa pēu, pe peyemoviracua vahe Jesús rese pe yeroyasa pipe. Co aracuasa rumo aviye vahe ndahei ava suindar tēi, ndahei avei ava mborerecuar co ivi pipendar tēi aracuasa nungar. Esepia, ahe imborerecuasa ocañi tēi vaheerā.

7 Oroñehi catu aracuasa Tūpa suindar ndicuasai vahe rese, ahe yipive vireco vahe ivi apoēhi vitesese, ahe co omboyecua ramo vahe yandeu yaico vaheerā teco ori apirēhi vahesave.

8 Co ivi pipendar ava mborerecuareta rumo ndosenducuai eté co ñehesa. Osenducuae rumo mborerecuar Jerusalén pendar yuvireco viña, ndoyatica ucai chira yande Yar seco ivate, porañete vahe curusu rese yuvireco viña.

9 Icuachiapri arachendar pipe aipo ehi:

“Tūpa omoingatu mbahe ava guaisupar upe. Ahe rumo mbahe ndosepiai vahe ité ava yuvireco yepi, ndosendui vahe ité, iyavei ndoyembopihañemoñetaimi eté sese yuvireco no” ehi aracahe.

10 Tūpa rumo oicua uca Espiritu pipe yandeu cute. Esepia, Espiritu oicua tupri catu ité opacatú secocuer oico.

11 Ēgüe ehi eté, inungar opacatu ava pāhuve ndipoi eté que ñepe i ava pihañemoñetasa oicua vahe, iEspiritu güeraño ité oicua mbahe oime vahe ipiha pipe. Ēgüe ehi avei Tūpa Espiritu güeraño ité oicua Tūpa pihañemoñetasa.

12 Yande evocoyase ndahei co ivi pipendar tēi Espiritu yaipisi, ēgüe ehi rumo Espiritu Tūpa suindar yaipisi yaicua vaheerā iporerecosa oporoaisusa pipe ombou vahe yandeu.

13 Ahe niha oromombehu Tūpa Espiritu ore mbohe vahe, ndahei ñehesa ava tēi aracuasa sui. Ēgüe orohe co supi eté vahe ñehesa Espiritu suindar oromombehu Espiritu rese yuvirecoi vahe upe yepi.

14 Acoi ava ndovirecoi vahe rumo Tūpa Espiritu opiha pipe, ndoipisi eté mbahe Tūpa Espiritu suindar yuvireco. Esepia, chupe evocoi mbahe aviye ēgüe ehi tēi vahe, iyavei ndosenducua catui eté yuvireco. Esepia, evocoi nungar mbahe senducua Espiritu pipeño ité.

15 Acoi ava vireco vahe rumo Tūpa Espiritu opiha pipe oicatu opacatu mbahe cua āgua. Ndipoi chira rumo ambuae ava ndovirecoi vahe Espiritu opiha pipe ahe ava recocuer cua tupri āgua.

16 Esepia, icuachiapri arachendar pipe aipo ehi: “¿Ava vo oicua tēira yande Yar pihañemoñetasa viña? ¿Ava vo ombohē tēira viña?” ehi. Yande rumo yareco yande Yar Cristo pihañemoñetasa.

3

Pablo iyavei Apolos Tūpa upe oporaviqui vahe yuvirecoi

¹ Che rivireta, ndapeguata tuprii Espiritu reroyasa pipe; pe rumo peguataño vite ava tēi pihañemoñetasa rupi peico. Sese namombehu catui ñehesa yavai vahe Espiritu suindar pēu. Esepia, pe pītanimi nungar vite tēi pe pihañemoñetasa Cristo rese.

² Sese che opombohe mbahe ndayavaimi vahe rese. Esepia, pītanimi ndoicatu vite ocaru. Sese ocambu viteño tēi. Cūritei rumo ēgüe peye vite itē. Esepia, pe ndapesenducua catu vitei etē Tūpa Ñehengagüer yavai vahe.

³ Peguata viteño co ivi pipendar pihañemoñetasa tēi rupi. Esepia, peyemoe-catēhi-tēhi oyeupe, iyavei peñemoiro peyeupe pe pihañemoñeta ndahoyoyai vahesa pipe. Pe evocoyase peyapo ava ndoicuai vahe Tūpa rembiapo nungar.

⁴ Esepia, aipo peyeño tēi, “Ore Pablo rupindar oroico”; ambuae evocoyase, “Ore Apolos rupindar oroico” peye-peye tēi pe yembohesa rese pe yeecopisa pipe. Aipo ehi vahe pe pāhube inungar ava Tūpa ndoicuai vahe pihañemoñetasa.

⁵ Pesendu che ñehē: ¡Che Pablo iyavei Apolos Tūpa rembiguai tēi oroico! Esepia, yande Yar niha ombou ñepe-pe mboraviqui yandeu chupe yayapo vaheṛā. Tūpa upe ore poraviquisa pipe sui niha peroya yande Yar peico:

⁶ che rane inungar añoti vahe mbahe rāñi pe piha pipe; Apolos evocoyase inungar imboihusar; Tūpa rumo inungar omboori vahe pēu.

⁷ Evocoyase ndiyai peyeroya mbahe tīsar rese tēi, imboihusar rese tēi avei. Peyeroya catura rumo Tūpa rese. Ahe niha pe reco momirata catu pe rereco.

⁸ Ore rumo oyoya tupri oroyapo mbahe pēu nara. Sese ñepe-pe Tūpa omboura porrecosa pe rese ore poraviquigüer rupi oreu.

⁹ Ore oroporaviqui vahe Tūpa upe. Pe evocoyase ivi nungar peico Tūpa poraviqui āgua iyavei pe inungar Tūpa omopuha ramomi vahe oi peico.

¹⁰⁻¹² Che inungar oi apo cuapar oyapo rane vahe oi vīracua āgua, ēgüe ahe imombehu Cristo resendar ñehesa pēu seroya tupri āgua. Ndiyai etē yaroya que ambuae ava tēi, Jesucristo güeraño itē yaroyara. Ambuae evocoyase inungar oi aposar omopuha vahe ivīracuasa harive, ēgüe ehi ahe pe monguerēhi catu pe mbohe co ñehesa rese. Evocoyase inungar oi aposar amove oīporu mbahe ipocopi vahe oi apo āgua yuvireco oro, guarepochi, anise ita aviye vahe. Amove rumo oīporu avei ndipocopi vahe mbahe que ivirape tēi, capihī, anise tacuar tēi oīguā yuvireco. ēgüe ehi aveira pe mbohesar yuvireco. Ahe ñepe-pe rumo iya oicua tuprira pe mbohe āgua yuvireco.

¹³ Ahe iporaviqui agüer rumo ari cañise icuasa tuprira ñepe-pe yuvireco. Esepia, ahe ari pipe yande Yar oura tata reseve ñepe-pe pe mbohesar poraviqui agüer cuā āgua.

¹⁴ Acoi ava oporombohe tupri vahe inungar ava oyapo oi ndocai vahe, ahe oīpisira oporaviqui repri;

¹⁵ ambuae oporombohe rai vahe rumo inungar oi oyapo ocai vahe tēi, iporombohe agüer opa tēi etera ocañi. Ahe güeraño evocoyase oñepisiro sāira tata guasu sui.

¹⁶ ¿Ndapeicuai vo pe yande Jesús reroyasar Tūpa rēta nungar yaico? ¡Espiritu niha seci etē yande piha pipe.

¹⁷ Oimese que ava yande pãhuve omomara vahe Tũpa rēta, Tũpa evocoiyase omboura oñemoirosa ahe ava upe. Esepia, Tũpa rēta nimarai vahe ité; yande teieté niha Tũpa rēta yaico.

¹⁸ Peyembopa eme catu pe ae. Oimese que pe pãhu pendar oyeupe aipo “che yaracua tupri vahe aico” ehi vahe co ivi pĩpendar pĩhañemoñetasa rupi tēi, toyecomombegũemi rane oaracua āgua.

¹⁹ Esepia, ava tēi aracuasa Tũpa upe ěgũe ehi tēi vahe. Inungar icuachiapri aracahendar pĩpe aipo ehi: “Ava oaracua raisa pĩpe oyeiti uca mbahe tēi pĩpe Tũpa upe yuvireco” ehi.

²⁰ Iyavei aipo ehi no: “Yar rumo oicua ava tēi yaracua rai vahe pĩhañemoñetasa, ahe ěgũe ehi tēi vahe” ehi.

²¹ Sese ndapeyecomboivate ai chira que ava tēi porombohesa rupi peico. Esepia, opacatu mbahe pẽundar ité:

²² ěgũe ehi eté che Pablo, iyavei Apolos, Pedro avei, opacatu ivi pĩpendar mbahe Tũpa omoime vahe yandeu, tecovesa, manosa avei, yasepia vahe, iyavei mbahe oime vaheerã, ahe niha opacatu pẽu nara,

²³ pe niha Cristo upendar, Cristo evocoiyase Tũpa upendar secoi.

4

Apóstol yuvirecoi vahe poraviqui agüer

¹ Iya aipo peye: “Co mbia Cristo povri pendar yuvirecoi, icuaita ité niha Tũpa suindar ñehesa oyecua ramo vahe rese iporombohe āgua” peyera oreu viña.

² Acoi vireco vahe ocuaitarã, iya ité omboyecua ocuaita mboaviye tuprisa.

³ Mara etemo che areco pe che recocuer rese peporanduse viña. Iyavei cheu mbahemi tēi che reraso potase que ava tēi porandusave che recocuer rese porandu āgua yuvireco. Che avei ndaicuai eté che recocuer cuapa tupri.

⁴ Yepe ndaicuai que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe vaheerã pẽu. Yande Yar rumo oicua.

⁵ Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesãro ranera rumo yande Yar yevi āgua. Ahe niha omboyecuara opacatu mbahe ndoyecuai vahe, iyavei omboyecuapara ñepei-peí yande pĩhañemoñetasa. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepei-peí yandeu.

⁶ Che rivireta, che añehe cheyese ae, Apolos rese avei pẽu mbahe tupri āgua rese ‘ore recocuer sui toyembohe yuvireco Tũpa remimbotar icuachiapri rupi tupri yuvirecoi āgua’ ore yapave pẽu. Pe evocoiyase, “Co mbia seco ivate catu vahe co ambuae mbia sui” ndapeyei chira pe yemboivate aisa pĩpe oreu.

⁷ ¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tũpa suindar. ¡Sese ndiyai peyecomboivate etepri co mbahe pereco vahe rese! ¡Aviye opacatu mbahe peyesui tēi pe reco vahe viña!

⁸ Ndojavii pereco ité vahe opacatu mbahe pe remimbotar viña, ndoyavii avei nipanei vahe ité Tũpa suindar mbahe pẽu. Peyeupe revo ndoyavii mborecuar guasu peico ore sui viña. ¡ěgũe peye itera tarahu viña! Ahese, ore avei mborecuar oroicora pe pãhuve viña.

⁹ Ore rumo apóstol oroico vahe ndoyavii cheu Tũpa ore renoi ipa tēi vahe ore mano tēi āgua. Sese seroĩrombri oroico inungar ava imboguaipri

yucapirã. Ēgüe orohe oroico opacatu ava rovaque, Tüpa rembiguai eta iva pendar rovaque avei.

¹⁰ Iyavei, “Co ndayaracuai vahe” ehi rutei ava yuvireco oreu Cristo rese ité ore recose; ahese avei rumo pe peyeapo imbahecua etepri vahe peico Cristo rese pe recosa pipe. Iyavei ore ndoyavii ndaseco pîratã vahe oroico ava rembiepiave; aheseve avei rumo peyecomomirata tēi peico. Ore seroïrombri tēi oroico, pe evocoyase ava pe mboetei guasu pe rereco yuvireco.

¹¹ Cûritei ore oroicove vite ité ore rieporēhi pipe, ore husei tēi iyavei ndore turucuai eté. Ava rumo evocoyase mara-mara tēi ore rereco yuvireco. Iyavei ndorovirecoi ore rēta ité.

¹² Ore oroporaviquiño ité, oroyembogüera tēi ipipe. Ava rumo iñhe mara-mara tēi eté yuvireco oreu; ore evocoyase oromboyeviño iñhe mbahe tupri pipe chupe. Ore reca-reca catuño ité ore momara ãgua yuvireco; ore rumo oroñemosañiño ité yuvireco chupe.

¹³ Iñhe-ñhe tēi ore rese yuvireco; ore rumo saisusa pipe oromboyevi iñhe yuvireco chupe. Ore rereco iti nungar tēi iyavei ore rereco inungar ava ěgüe ehi tēi vahe yuvireco. Cûritei ěgüe ehi viteño ité yuvireco oreu.

¹⁴ Ndahei pe mochi ãgua aipo ahe icuachía pēu, ěgüe ehi rumo pe mboaracua ãgua tēi. Inungar che rahir ité, che rembiaisu opovireco.

¹⁵ Esepia, yepe pereco ati pe pîtivisar Cristo rese pe reco ãgua viña, ndaperecoi rumo setá pe yesupa. Esepia, che amombehuse niha ñhesa pîsirosa resendar pēu, ahese ramo peroya Jesucristo. Seroyasa pipe evocoyase che inungar pe yesupa ité aico pēu.

¹⁶ Sese che aipota ité che recocuer moña peye.

¹⁷ Sese che amondo che rembiaisu Timoteo pēu, che rahir nungar omboaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agüer rese che sose opacatu Jesús reroyasar ñemonuhasa rupi yepi.

¹⁸ Amove oime pe pãhuve oyecomboivate ai vahe. “Ndou iri chietera revo cohave yande repia” ehi yuvireco cheu viña;

¹⁹ aso pãhaiviño itera rumo pe repia yande Yar oipotase cheu. Ahese aicua tuprira oyemboivate ai vahe reco pîratasa yuvireco. Ndahei chira iñhe güeraño tēi aicuara.

²⁰ Esepia, Tüpa omborerecuasave, ndahei oñhe pipe tēi oporocuai, opîratasa pipe rumo ěgüe ehi.

²¹ ¿Mbahe pãha peipota peico? ¿Peipota pãha che aso vaherã pēu che ñhe pîrata pe mboaracua ãgua mbahe pe rembiavi rese? Anise, pemoiñgatu rane pe recocuer, ahese asora mbahe tupri pipe pe pîri.

5

Pablo oñhe ñepeí Jesús reroyasar pãhu pendar oyemboaguasa vahe rese

¹ Ambuae mbahe, oroyandu ñepeí mbahe tēi pe pãhu pendar rembiapo oroico: oime aipo osi recoyar rese secoi vahe. Ahe angaipa guasu oyapo oico. Tüpa reroyasarēhi ité ndoyapoi evocoi nungar mbahe tēi yuvireco.

² ¡Pe rumo peyecomboivate ai peico! ¡Iyacatu rumo ndapeyembovihai chira evocoi nungar mbahe tēi repiase viña! Evocoi nungar ava iyacatu ité pemboyepipira pe pãhu sui.

³ Yepe niha che teieté ndaicoi pe pãhuve viña, pe rese che mahenduhasa pipe rumo aicove ité pe pãhuve iyavei aicua voi eté aipo oyapo vahe mbahe tēi recocuer inungar-ra aico vahe ité pe pãhuve viña.

⁴ Acoi peñemonuhase, che avei niha aicora pe pãhuve che mahenduhasa pipe, yande Yar Jesucristo pĩratasa avei secoira pe rese.

⁵ Evocoiyase ahe ava timondosa Carugar povrive secocuerai mocañi ãgua. Ipĩpe sui iespĩritu oñepisĩrora yande Yar Jesucristo yevise curi.

⁶ Ndapeyecomboivate ai chira peico co mbahe tẽi oimese pe pãhuve. Esepia, peicua niha co ñehesa aipo ehi vahe: “Yepe chĩhimi imondosa pan mboapeposa panguã rese viña, ahe rumo oiquepa tupri panguã rese” ehi.

⁷ Evocoi ava rembiapo ai inungar pan mboapeposa pe pãhuve. Sese pemombopa pe pãhu sui peicoẽhi ãgua angaipa pipe peico vaheerã inungar panguã ipiasu vahe ndovirecoi vahe omboapeposa oyese. Ëgũe peye itẽ niha. Esepia, yande Yar Jesucristo iparaisu omano yande repirã. Ëgũe ehi ahe inungar ovesa yucapri angaipa mocañi ãgua judio pieta Pascua pipe yepi.

⁸ Sese inungar judio omboetei vahe Pascua pieta yuvireco yepi omombopaño pan mboapeposa cuacua vahe oyesui pan ipiasu, ndayapepoi vahe rereco ãgua, Ëgũe yahe aveira yaico yande reco piasu supi etẽ vahe pipe; yamombopara yande recocuerai yandeyesui, ahe ava reco momara-mara tẽisa, mbahe naporai vahe avei.

⁹⁻¹⁰ Ambuae aicuachia vahe pipe aipo ahe pẽu: “Ndapemborĩ chira ava oyemboaguasa-guasa tẽi vahe, acoi ava oipota rai vahe ambuae ava mbahe, imonda rai vahe, iyavei ava mbahe rahanga upe tẽi oyerure vahe” ahe. Co che ñehesa rumo ndahei Tũpa ndoicua vitei vahe upendar. Esepia niha, pe yepepi ãgua ñepeĩ reseve evocoi nungar ava sui, pesẽ itera co ivi pipe sui viña.

¹¹ Che niha aipo ahe icuachia pẽu: ndapemborĩ chira que ava acoi “che Jesucristo reroyasar aico” ehi angahu tẽi vahe, que oyemboaguasase, anise oipota raise que ambuae ava mbahe, oyeruqui tẽi vahe que mbahe rahanga upe, iyavei imahechiroi ai vahe, caguar tẽi vahe, anise imonda rai vahe. Evocoi nungar ava piri ñepeĩ yepe ndapecarui chietera.

¹²⁻¹³ Cheu ndiyai etẽ vahe ndoyuvirecoi vahe Tũpa rese recocuer rese porandu ãgua. Tũpa ahe ava yuvirecoi vahe recocuer opara oicua coiye. Pe rumo pe cuaita itẽ Tũpa rese yuvirecoi vahe upe pe porandu ãgua secocuer rese. ¡Sese pemboyepepiño itẽ osi recoyar rese secoi vahe pe pãhu sui!

6

Ndiyai Jesús reroyasar serasosa ndahei vahe Jesús reroyasar mborecuar rovai

¹ Ambuae mbahe no: Oime pe pãhu pendar “co mbia oyapo mbahe tẽi cheu” ehi vahe ambuae Jesús reroyasar upe. ¡Mahera peraso mborecuar Tũpa reroyasarẽhi upe tẽi evocoi mbia rembiapo ai rese porandu ãgua! Iyacatu rumo Tũpa reroyasareta upe perasora secocuer moingatu ãgua yuvireco viña.

² Peicua niha pe Tũpa reroyasar peporandura ava ndoicuai vahe Tũpa upe secocuer rese yuvireco curi. Evocoiyase, ¿ndapeicatuĩ pĩha co tecocuer mbahemi tẽi moingatu peico?

³ ¿Ndapeicuai vo yande avei yaporandura Tũpa rembiguai recocuer rese curi? Evocoiyase, ¡peporandu catu itera co ivi pipendar tecocuer rese peyeupe yepi!

⁴ Perocese evocoi nungar mbahe tẽi peyeupe, ¡mahera peiporu ava Ëgũe ehi tẽi vahe tũparo pendar upe mbahe moingatu ãgua!

⁵ Che aipo ahe itẽ pẽu pe chĩ ãgua: ¿Ndipoimi etẽ vo pe pãhuve que ñepeĩ yaracua vahe oicatu vahe que mbahe tẽi peyependar moingatu ãgua?

⁶ ¡Amove pevava peyeupe! ¡Ndahei co güeraño, oime avei pe pāhu pendar Tūpa reroyasar viraso ambuae omboetasa mborerecuar Tūpa reroyasarēhi upe tēi mbahe moingatu āgua!

⁷ Supi eté evocoiya pe reco pipe peyavi guasu ité. Iya peñemosañora co mbahe tēi pe mboetasa suindar upe viña. Ēgüe ehi eté, iya mbahe pe reco vahe, “Toñomiño yuvireco” peyera chupe pe raso rāgüer sui Tūpa reroyasarēhi mborerecuar upe viña.

⁸ Amove rumo pe avei peyapo mbahe-mbahe tēi eté; peñomi avei pe mboetasa Tūpa reroyasar mbahe.

⁹⁻¹⁰ ¡Pe niha peicua acoi ava mbahe-mbahe tēi aposar ndoyuviroiquei chietera Tūpa mborerecuasa pipe curi! Peyembopa ucai rene chupe. Esepia, acoi ava oyemboaguasa-guasa tēi vahe, mbahe rahanga upe tēi oyeruqui vahe, omendasa sui oyemboaguasa vahe, cuimbahe pāve oyapo vahe mbahe oyese ae yuvireco, imonda rai vahe, oipota rai vahe ambuae ava mbahe, osavaipo serai vahe, imahechiroi ai vahe, iyavei ava virocua yesapihaño tēi vahe mbahe tēi pipe ambuae ava mbahe, ahe opacatu ndoyuvirasoi chira ivave Tūpa mborerecuasave curi.

¹¹ Oime avei niha acoi pe pāhu pendar yipindar ēgüe ehi vahe yuvireco viña, cūrítei rumo opa pe angaipa imocañisa pe sui iyavei pe ipehapri peico Tūpa upe nara ité. Ahe, “Peyavi mbahe” ndehi iri pēu yande Yar Jesucristo rer pipe iyavei yande Ru Tūpa Espiritu pīratasa pipe avei no.

Yande rete ipehapri Tūpa upe nara yaguasaēhi āgua

¹² Iyavei ambuae mbahe: Supi eté niha “avīye que mbahe che remimbotar ayapo vaheṛā” ehi vahe. Amove rumo co mbahe ndahei avīye vahe yandeu iyavei yandeu ndiyai evocoi nungar mbahe povrive nara tēi yande reco āgua.

¹³ Supi eté niha aipo ehi vahe: “Yande rembiyu yande aviter upe nara, yande aviter evocoiyase yande rembiyu upe nara” ehi. Coiye rumo Tūpa opara omocañi evocoi nungar mbahe. Yande retecuer rumo ndicuaiṭai yaguasa tēi vaheṛā, ahe rumo yande Yar upe nara. Yande Yar evocoiyase yande retecuer upe nara secoi.

¹⁴ Inungar Tūpa ombogüerayevi yande Yar, ēgüe ehi aveira yande mbogüerayevi opīratasa pipe coiye.

¹⁵ Peicua niha yande rete Jesucristo upendar ité. Ndiyai eté evocoiyase Jesucristo upendar yande rete mondo āgua cuña güetecuer omondo-mondo tēi vahe upe.

¹⁶ Peicua niha pe aipo nungar cuña ndipihai vahe rese peicose, pe retecuer evocoiyase ñepe vahe nungar ité pereco. Esepia, icuachiapri aracahendar pipe aipo ehi yandeu: “Yepe ñuvirío ava yuvirecoi vahe viña, ñepe vahe nungar ité rumo secocuer yuvireco” ehi.

¹⁷ Acoi ava secoi vahe rumo yande Yar rese, ahe secocuer evocoiyase ñepeñiño ité.

¹⁸ Peyepipi voñiño catu ava yemboaguasa-guasa tēisa sui. Opacatu ambuae angaipa ndahei yande retecuer rese nara ité. Acoi ava rumo oyapo tēi vahe mbahe cuña rese, güetecuer ae evocoiyase omomara catu güembiapo pipe sui tēi.

¹⁹ ¿Ndapeicuai vo pe retecuer Espiritu Santo upendar ité secoi, iyavei ahe Espiritu Tūpa remimbou pe rese ité secoi? Sese pe retecuer ndahei pēundar ité.

²⁰ Esepia, Tūpa yande rerocua oyeupe nara. Yande rumo yande repi chupe. Sese peyapo mbahe avīye vahe pe retecuer pipe Tūpa mboetei āgua.

7

Poromboaracuasa mendasa resendar

1 Cūrítei amboyevíra pēu acoi cuese pe porandusa mendasa resendar peicuachía vahe ímbou cheu. Avíyeño ité niha que ava ndomendaise víña.

2 Pe aguasa-guasa tēiēhi āgua rumo peyacatu perecora pe rembireco, cuña avei evocoiyase tovireco oyacatu omer yuvireco.

3 Cuimbahe toamboavíye omendasa güembireco rese iyavei cuña omenda vahe, toamboavíye avei mendasa omer rese. Ahe niha yande cuaita yamendase.

4 Esepia, cuña omenda vahe güetecuer ndahe iri oyeupe nara víreco, omer upe nara ité rumo. Iyavei cuimbahe omenda vahe, ndahei avei güetecuer oyeupe nara víreco, ahe rumo güembireco upe nara ité víreco.

5 Ndiyai peatēhi oyeupe. Oyoya rumo, “Yayapo eme mbahe” peyese peyeupe pe yeroqui āgua Tūpa upe, ahe avíyeño. Ndiyai rumo peyoeya pucura, avíyeteramo ndapeñemosai chira, ipípe sui avíyeretamo Carugar pe ātoi tiētera.

6 Ndahei che opocuai ‘tomenda yuvireco’ víya pēu.

7 Che rumo aipota che nungar pe mendaēhi āgua víña. Tūpa rumo ombou yande yacatu yande recorā.

8 Iyavei ndomenda vítei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar.

9 Ndapeicatuise rumo pe ñemosā āgua, pemendaño. Esepia, avíye catu itera pemenda poropota rai rāgüer sui.

10 Che rumo amombehu omenda vahe upe ‘topoi eme cuña omer sui’ víya. Ndahei cheyesui tēi aipo ahe. Ahe rumo yande Yar porocuita ité.

11 Acoi opoise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei güembireco sui.

12 Ambuae ava opacatu upe rumo cheyesui eté aipo ahe. Esepia, ndipoi eté yande Yar ñehe sesendar: acoi Jesús reroyasar víreco güembireco ndahei vahe Jesús reroyasar, ahe cuña secoi potaño itese sese, evocoiyase ahe topoi eme ité güembireco sui.

13 Iyavei acoi cuña Jesús reroyasar, víreco omer ndahei vahe Jesús reroyasar, ahe cuimbahe secoi potaño itese sese, evocoiyase ahe cuña topoi eme ité ichui.

14 Esepia, co cuña Jesús reroyasar víreco omer ndahei vahe Jesús reroyasar, ndahei eté angaipa yuvireco Tūpa rovaque. Ēgüe ehi aveira cuimbahe Jesús reroyasar víreco güembireco Jesús reroyasarēhi. Ēgüe ndehise rumo, tahír avei ndoyaví chira ndahei vahe Jesús reroyasar rahír yuvireco víña. Ahe tahír rumo Tūpa upendar yuvirecoira.

15-16 Sese pe, pemenda vahe ndahei vahe Jesús reroyasar rese, pepoi eme catu ichui; avíyeteramo pe recocuer sui pe mer oñepísirora. Iyavei pe cuimbahe, avíyeteramo pe recocuer sui avei pe rembireco oñepísirora. Acoi cuña ndahei vahe Jesús reroyasar opoi potase omer Jesús reroyasar sui, topoiño ichui. Iyavei cuimbahe ndahei vahe Jesús reroyasar opoi potase güembireco Jesús reroyasar sui, topoiño avei ichui. Esepia, Tūpa oipota mbahe tuprí pipe yande reco āgua.

17 Co rumo mbahe: peicoveño yípíndar pēu Tūpa ombou vahe rese seroyaēhi vitesendar pípe. Ahe aporocuai opacatu Cristo upendar ñemonuhasa rupi yepi.

18 Acoi Tūpa osenoise ava judío oyeupe nara, ahe judíoño ité secoira. Acoi osenoise rumo, ndahei vahe judío, ahe ndoyembocircuncida ucai chira judío güeco āgua.

19 Esepia, ndahei chira que judío, anise que ndahei vahe judío yaicose aviye catura yaico. Co rumo Tūpa oipota catu, “Tomboaviye opacatu che porocauita amondo vahe chupe yuvireco” ehi yandeu.

20 Sese peicoveño peyacatu pe recocuer pēu Tūpa ombou vahe rese pe renoiēhi viteseve.

21 Pe mbiguaí tēi peico vahe pe renoise Tūpa, pepihañemoñeta etepri eme evocoiya pe recosa sui pesē vaheṛā rese. Peicatusē rumo, peyepēñi itera ichui.

22 Esepia, yepe pe mbiguaí tēi peico viña, peroyase rumo yande Yar, ahese inungar ndahe iri vahe mbiguaí peico chupe. Iyavei pe no, ndahei vahe mbiguaí tēi peico vahe, yepe ēgüe peye viña, peroyase rumo Cristo, ahese mbiguaí peico.

23 Tūpa upe rumo pēpē iteanga, sese ndiyai eté ambuae ava povriṛe tēi peico.

24 Sese, che rivireta, peicoveño itera pe recocuer pīpe inungar yipīndar Tūpa pe renoise.

25 Cuñatai ndomenda vīte vahe resendar rese rumo ndarecoi Yar suindar che ñehe āgua. Che rumo amondora che pīhañemoñetasa yuvireco chupe. Esepia, yande Yar che paraisuerecosa pīpe imboyeroyapri aico.

26 Cheu aviye catuño ité ndomendai vahe ēgüe ehiño tēise yuvireco viña. Esepia niha, tecocuer yavaí eteanga cūrīte.

27 Acoi pemendase, pepoi eme ité oyesui. Acoi ndapemendaise, ndapeseca iri chītera peyeupe.

28 Pemendase rumo, ndahei angaipa iyavei cuñatai omendase, ndoyapoi avei angaipa. Acoi omenda vahe upe rumo yavaí catura co ivi pīpe yuvireco chupe. Sese che ndaipotai evocoi nungar mbahe pīpe yuvireco vaheṛā.

29 Che rivireta, aipo mbahe amombehu pota pēu: ndipucuvei co ari naporai vahe yepota āgua yandeu. Sese co pīpe suive tupri omenda vahe toyuvirecoi ndomendai vahe nungar yande Yar rese opihañemoñetasa pīpe.

30 Acoi ndovihai vahe, toyuvirecoi eme oviharēhisa pīpe iyavei acoi oviharete vahe, ahe toyuvirecoi eme avei oviharetesa pīpe, iyavei virocua vahe mbahe omahera, toyuvirecoi inungar mbahe ndovirocuai vahe omahera viña yande Yar rese opihañemoñetasa pīpe.

31 Acoi ava ipihañemoñeta catu vahe co ivi pīpendar mbahe poru āgua, tipihañemoñeta eme evocoi nungar mbahe tēi rese yuvireco. Esepia, co ivi pīpendar mbahe yasepia vahe, ocañi tēira.

32 Che ndaipotai co ivi pīpendar recocuer rese tēi pe pīhañemoñeta etepri peico. Acoi mbīa ndomendai vahe rumo, ipihañemoñeta catuño ité yande Yar rese imboviha āgua;

33 omenda vahe rumo ipihañemoñeta avei co ivi pīpendar recocuer rese tēi, güembireco mboviha āgua rese avei.

34 Evocoiyase ndahei ñepei opihañemoñetasa vireco. Ēgüe ehi avei cuña opihañemoñeta rereco; cuña ndomendai vahe, ipihañemoñeta yande Yar upendar mbahe rese, güetecuer iyavei oespiritu rereco tupri āgua Tūpa upe. Cuña omenda vahe rumo ipihañemoñeta co ivi pīpendar recocuer rese tēi omer mboviha āgua oico.

³⁵ Che aipo ahe pëu ‘mbahe tupri pipe toyuvirecoi’ viya, ndahei mbahe yavai vahe pipe pe reco ãgua. Che aipota ité pe reco catuprisa pipe yande Yar upeño ité mbahe peyapo vaherã pe recoeté pipe peico.

³⁶ Acoi ava ipihañemoñeta vahe güembirecovi rese omenda ãgua, “Aviyeteramo ayavira mbahe ichui iyavei niha osupiti ité imenda ãgua, sese aviye catu yamenda” ehise, toyapoño güemimbotar. Tomendaño ité güembirecovi rese. Esepia, mendasa niha ndahei angaipã.

³⁷ Acoi mbia rumo ndovirecoise que ocuaita omenda ãgua iyavei oicatu ité güemimbotar apo, ipihañemoñetase ñepeí reseve güembirecovi rese omendaêhi ãgua, ahe aviyeño ité.

³⁸ Evocoiyase acoi omenda vahe aviyeño; acoi ndomendai vahe rumo, aviye catuño ité.

³⁹ Iyavei acoi cuña omenda vahe, ahe ndiyai eté iyepépi ãgua omer sui imanoêhi viteseve. Omanose rumo ichui, ahese ramo ahe cuña upe aviyeño imenda iri ãgua güemimbotar rupi. Yande Yar reroyasar rese avei rumo omendara.

⁴⁰ Ndomenda irise rumo, aviye catuño itera. Ahe che pihañemoñetasa, iyavei revo ahe che pihañemoñetasa Tüpa Espiritu suindar.

8

Pablo oñehe tembihu mbahe rahanga upe tõi seropovêhepri rese

¹ Cüritei ambuae mbahe amombehura pëu mbahe rahanga upe mbahe mimba yucapri seropovêhepri rese. Supi eté aipo ehi vahe: “Yande opacatu yareco yande mbahecuasa” ehi. ¡Yande rumo, “Aicua tupri opacatu mbahe” yande hesa pipe yayecomboivate ai tõi! Yayeaísuse rumo, ahese yañepitivii catu Cristo reroya tupri ãgua.

² Supi eté yande, “Che aicua ité co mbahe” yahe tõeise que mbahe upe, ipane vite ité rumo icua tupri ãgua yandeu.

³ Yande rumo yasaisuse Tüpa, ahese Tüpa, “Co ava cheundar ité secoi” ehira yandeu.

⁴ Evocoiyase co mbahe rahanga upe tõi seropovêhepri mbahe mimba yucapri hu ãgua rese añehe. Yande niha yaicua co mbahe rahanga êgüe ehi tõi vahe co ivi pipe, iyavei oime ñepeí güeraño ité Tüpa.

⁵ Esepia, yepe ava upe setã tüpa ivave, ivive avei viña (setã iteanga niha oime tüpa angahu tõi, yar angahu tõi avei).

⁶ Yande rumo yaicua ñepeíño ité Tüpa oime, ahe niha yande Ru opacatu mbahe aposar. ¡Evocoiyase yande chupe nara ité yaico! Oime avei yande Yar ñepeí vahe, ahe Jesucristo. Ahe ichui oime opacatu mbahe, ichui avei yaicove.

⁷ Ndahei rumo opacatu oicua aipo mbahe yuvireco. Amove Jesús reroyasar yipindar güecocuer vireco vahe sui ndasesarai viteño yuvireco; imahenduhãño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovêhepri, ipihañemoñeta, “Co mbahe roho tüpa rahanga upe seropovêhepri” ehi viteño yuvireco oyeupe. Ipipe sui omomara uca Tüpa rese opihañemoñetasa yuvireco.

⁸ Supi eté tembihu ndayande pítivii Tüpa rese yaico vaherã. Ndahei mbahe roho husa pipe sui tõi aviye catura yaico iyavei ndayahuisse, ndahei chira mbahe tõi catu yaico.

⁹ Pëu niha aviyeño pehu viña; peicua catura rumo, aviyeteramo que Jesús reroyasar ndoicatu tupri viteí vahe pemboangaipa ucara.

¹⁰ Esepia, pe co mbahe peicua vahe, pehuse co tembihu mbahe ranga upendar carusave ahe Jesús reroyasar rembiepiave, avieteramo pemonguerêhi aveira ihu uca âgua chupe.

¹¹ Evocoyase co pe mbahecuasa pipe pemocañi uca yande rivri Tûpa rese novirauca tupri vitei vahe peico. ¡Cristo rumo omano ipisiro âgua!

¹² Esepia, pemomarse Tûpa rese ipihañemoñetasa, ahese pe ae peyemboangaipa uca Cristo amotarêhisa pipe peico.

¹³ Sese yande mbahe roho husa pipe sui yamboangaipa ucuse yande rivri viña, ndayahu iri chietera evocoi mbahe roho yande rivri mboangaipa ucaêhi âgua.

9

Apóstol Pablo ndoporandu potai oyeupe nara apóstol upendar mbahe rese ava upe

¹ Supi eté che aicatu avei apóstol upendar mbahe pisi âgua viña. Esepia, che apóstol aico. Supi eté che asepia yande Yar Jesús iyavei che poraviquisa pipe sui niha peroya yande Yar peico.

² Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co secoi” peye voiño itera cheu. Esepia, che remimombehu pipe sui niha yande Yar peroya peico. Ipipe sui avei icuasa tupri apóstol che recosa pëu.

³ Ahe ñehesa amboeyevi tupri ava che recoãha potasar upe yuvireco yepi.

⁴ Iya ité che remihura pisi, che iguarã avei pe sui viña.

⁵ Iyavei inungar ambuae apóstol viraso ité güembireco oyeupi yuvireco yepi, Jesús rivireta avei êgüe ehi yuvireco, êgüe ehi avei Pedro, êgüe ahe aveira niha che viña.

⁶ ¿Ore güeraño tie Bernabé rese oroporaviquira ambuae mbahe rese ore recove âgua?

⁷ Esepia, sundao nomboepii sundao güeco âgua, ahe rumo oporaviquisa repri oipisiño. Iyavei ava uva tîsar, ahe avei yaviyese, ohu güemitigüer. Iyavei ovesa rârosar, ahe avei omohe ovesa cambi igua.

⁸ Che ndahei cheyesui tēi aipo ahe pëu. Esepia niha, Moisés porocuita pipe avei aipo ehi yandeu:

⁹ “Pomondo eme tivi yuru rese mbahe icaruêhisa mbahe rãhii oicambese yuvireco pëu” ehi. Supi eté co Tûpa aipo ehi vahe ndahei tivi upeño.

¹⁰ Yande reco tupri âgua rese niha aipo ehi yandeu. Esepia, acoi ava omonguhi vahe ivi iyavei acoi oicambe vahe mbahe rãhii, oyoya osãro mbahe oipisi vahe rã oporaviquisa sui oyeupe nara yuvireco yepi.

¹¹ Evocoyase ore avei oroñoti Tûpa Ñhengagüer pe piha pipe ore pe mbohese. Sese aviyeño aveira oroipisise mbahe pe sui oreyeupe nara viña.

¹² Esepia, ambuae oicatu mbahe pisi âgua oyeupe nara yuvireco pe sui. Evocoyase ore avei niha oroicatu mbahe pisi âgua pe sui ore poraviquisa pipe viña.

Ore rumo êgüe ndorohei eté. Esepia, ore oroñemosañi ité ‘tiñehe mara eme co ñehesa Cristo resendar rese yuvireco’ ore yapave.

¹³ Pe niha peicua ité acoi oporaviqui vahe judío tûparove, ichui ocaru yuvireco. Esepia, yuvirohu mbahe roho Tûpa upe seropovêhepri tûparo rocarve yuvireco yepi.

¹⁴ Êgüe ehi avei yande Yar ore cuai ‘toipisi mbahe ipane vahe co ñehesa mombehusa pipe sui yuvireco oyeupe’ oyapave oreu.

15 Che rumo ndaporandui eté mbahe pe rembiereco rese vichico pëu yepi. Ndahei 'tombou mbahe yuvireco cheu' che yapave aipo aicuachía imondo pëu. Che rumo evocoi nungar mbahe rese ayembovishaño ité. ¡Yepe che yucapri tëira tieporëhi viña, ndaporandui chietera rumo mbahe rese pëu! Esepia, namocañi potai eté co che yembovisha cheyesui.

16 Che rumo amombehuse co ñehesa pïsirosa resendar ava upe, ndiyai ayeecomboivate ai ipipe. Esepia niha, che cuaita ité yapo ãgua iyavei, ¡cheparaisu itera ndamombehuse ava upe co ñehesa viña!

17 Tüpa ndache cuaise oñehe mombehu ãgua viña, che rumo che querëhisa pipe amombehuse, ahese aipisira Tüpa suindar porerecosa. Ëgüe ndahei rumo. Esepia, Tüpa che cuaisa pipe niha amombehu.

18 Ndaporanduisse mbahe rese pëu amombehuse co ñehesa pïsirosa resendar, ipipe ayembovisha ahe che vihasa porerecosa nungar cheu. Yepe aicatu mbahe rese che porandu ãgua viña, che rumo ëgüe ndahei eté.

19 Yepe che ndahei ava povrive tëi aico viña, che rumo che remimbotar rupi opacatu ava rembiguai nungar ayeereco 'tasetá catu ava iquerëhi vahe Cristo reroya ãgua' che yapave.

20 Esepia, aicose judío pãhuve, secocuer rupi aicoveño Yar upe imonguerëhi catu ãgua yuvireco. Ëgüe ahe ité, aicose ava Moisés porocuita povrive yuvirecoi vahe pãhuve, che avei eté mborocuitavrive nungar aico. Ndahei rumo Moisés porocuita povrive ité aico imboaviye ãgua.

21 Iyavei ava ndoyuvirecoi vahe Moisés porocuita povrive, ipãhuve aicose, inungar ahe yuvirecoi, ëgüe ahe tupri avei imonguerëhi ãgua yande Yar upe vichico. Ndahei rumo Tüpa porocuita mboyeroyaëhisa pipe aico. Esepia, Cristo porocuitavrive che recocuer.

22 Iyavei no, aicose ava yande Yar ndoviroya tupri vitei vahe pãhuve, secocuer nungar tupri avei aico Yar upe imonguerëhi catu ãgua. Ëgüe ahe opacatu ava upe 'toñepisiro catu ahe avei yuvireco' viya.

23 Che ayapo co opacatu mbahe 'tasetá catu co ñehesa pïsirosa reroyasar yuvireco' che hesa pipe, 'taipisi avei co porovasasa oime vahe co ñehesa reroyasa pipe' che yapave avei.

24 Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oipisi porerecosa yepi. Evocoiyase inungar co ivava catu vahe, ëgüe peye avei pe recocuer pipe Tüpa porerecosa pisi ãgua peico.

25 Iyavei opacatu oyemoingatu vahe oguayi ãgua oñearo tupri opacatu mbahe tëi sui oyemomaraëhi ãgua yuvireco. Ahe ëgüe ehi porerecosa ndipocopi vahe pisi ãgua tëi yuvireco. Yande rumo yayemomborarara porerecosa apirëhi vahe pisi ãgua yaico.

26 Evocoiyase che avei, ndahei ava oyahuva-huva tëi vahe nungar aico Tüpa remimbotar apo ãgua iyavei che ndaicoi ava iguayi tëi vahe nungar.

27 Che rumo mbiguai nungar che retecuer aruco, amboyeroya uca pihanemoñeta tuprisa upe. Esepia, ndaipotai ambuae ava mbohe pare imombopri tëi nungar guayisa sui che yereco ãgua.

10

Ndiyai aracahendar ava recocuerai rupi yaguata

¹ Che rivireta, che aipota pe judío peico vahe peyemomahenduha vitera aracahe yande ramoi guatasa rupi mbahe p̄itu Tūpa imboguata agüer rese. Iyavei para guasu P̄ira vahe avei osasa opacatu yuvireco aracahe.

² Ēgüe ehi eté opacatu oguatase mbahe p̄ituvri rupi iyavei para guasu osasase yuvireco, ndoyaviñ ñapiramombri yuvirecoi Moisés recocuer rupi oguata āgua aracahe.

³ Iyavei oyoya guasu yuvirohu tembihu Tūpa ombou vahe chupe nara yuvireco,

⁴ opacatu guasu avei oiñu ita sui Tūpa ombou vahe ihiguarā yuvireco. Ahe ita rumo inungar Cristo secoi opacatu iguatasa rupi yuvireco.

⁵ Yepe ēgüe ehi Tūpa opacatu yande ramoi judío upe viña, setā iteanga rumo ava ipāhu pendar ndahei aviye vahe ip̄iha rupi yuvireco. Ip̄ipe sui opa omano ivi iporupir̄ehisa rupi aracahe.

⁶ Co opacatu mbahe sembiapogüer yuvireco ahe yande mbohe āgua ‘toipota rai eme mbahe-mbahe tēi inungar ahe ava yuvirecoi’ oyapave yandeu.

⁷ Sese yande ndayamboetei chira mbahe rahanga tēi, inungar ahe ipāhu pendar yuvirecoi aracahe. Aipo ehi eté niha icuachiapri aracahendar pipe: “Co ava ocaru vahe, yuviroñu avei yuvinoi. Ichui yuviropūha, oyemboviñaño pieta apo yuvireco” ehi.

⁸ Ndayayemboaguasa-guasa tēi chiaveira inungar ahe amove ēgüe ehi yuvireco. Ip̄ipe sui tēi ñepeñi ari pipe ahe opa omano veintitrés mil tupri yuvireco aracahe.

⁹ Ndayasecoāha-āha tēi chiaveira yande Yar, inungar ahe yuvireco. Ip̄ipe sui oyeyucapa uca mboi osuhusa pipe yuvireco.

¹⁰ Iyavei ndayande ñeñe mara-mara tēi chira yande Aposar rese, inungar ahe ēgüe ehi yuvireco. Ip̄ipe sui Tūpa ombou güembiguai ava yucasar iya sui ahe ava yucapa āgua aracahe.

¹¹ Co opacatu yande ramoi upe mbahe oime vahe aracahe icuachiapri yande ip̄a yaico vahe upe nara: “¡Peicua catu aipo nungar mbahe sui!” he āgua yandeu.

¹² Sese yande “che aico tupri ité Tūpa rese” yahe vahe, yaicua catura rumo. Aviyeteramo yaviapira mbahe tēi pipe.

¹³ Pe recoāhasa rumo oyoya tupri ité ambuae ava recoāhasa rese. Pe rumo peyeroyañu itera Tūpa rese, ahe niha oicua pe yemoviracuasa, noñocuai chira recoāhasa imbou p̄eñu. Acoi mbahe tēi oimese pe recoāhase, Tūpa ombou voñora p̄iratasa evocoi mbahe tēi sui pe sē āgua, chupe pe ñemosa āgua.

¹⁴ Sese che rivireta, che rembiaisu, peyepēpi mbahe rahanga mboeteisa sui.

¹⁵ Ava niha peico pesenducua vāherā mbahe, evocoyase peporandu co che remimombegüer rese peyeupe icua tupri āgua.

¹⁶ Yaiñuse uva ricuer sovasapri, “Aviye ndeu, che Yar” yande hesa pipe, ahese oyoya guasu Cristo rese yaico suvi pipe sui. Yahuse co pan imboyahoyahopri, ahese oyoya guasu yaipisi Cristo retecuer yandeyeupe nara.

¹⁷ Yepe yande reta yaico viña, opacatu rumo yahu ñepeñi pan sui. Sese yande ñepeñi vahe ité yaico.

¹⁸ Peyapisaca acoi ava aracahendar Israel recocuer rese. Esepia, acoi yuvirohu vahe Tūpa upendar mbahe seropovēhepi, ahe evocoyase chupendar ité yuvirecoi.

¹⁹ Che rumo, “Mbahe rahanga aviye vahe ité” ndahei, iyavei, “Mbahe roho icuavēhepi mbahe rahanga upe, aviye catu ité” ndahei avei.

²⁰ Co rumo, acoi ava ndoicuai vahe Tūpa oicuavēhe mbahe carugar upe tēi yuvireco yepi. Ndahei rumo Tūpa upe nara ité ěgüe ehi yuvireco. Che evocoyase ndaipotai eté carugar upe nara tēi ěgüe peye vaherã peico.

²¹ Peihuse rumo yande Yar upendar igua, ndiyai peihu avei carugar upendar igua; iyavei pehuse yande Yar upendar mbahe, ndiyai avei pehu carugar upendar mbahe.

²² ¿Yasecara pīha yande ae yande Yar ñemoiro āgua yandeyeupe? ¡Yande rumo ndahei chira ipīrata catu vahe yaico ichui!

Yande renosesa mbiguai tēi nungar yande recosa sui mbahe tupri apo āgua

²³ Amove ava, “Aviyeño opacatu mbahe yayapo yande remimbotar rupi” ehi yuvireco viña. ěgüe ehi eté niha, ndahei rumo opacatu aviye, ndahei avei co opacatu mbahe yande pītivii catu Cristo rese yande reco āgua.

²⁴ Ndapesecai chira que mbahe aviye vahe peyeupe nara tēi, pesecara rumo ambuae ava upe nara.

²⁵ Pehuño mbahe tembihu opacatu mbahe mboepisa rupi sui perocua vahe. Ndapeporandui chira rumo sese Tūpa rese pe pīhañemoñetasa momaraēhi āgua.

²⁶ Esepia, ivi opacatu ipor reseve, ahe yande Yar upendar.

²⁷ Acoi Tūpa reroyasarēhi pe soho ucase oyepiri pe mbocarua āgua, peso potase ipiri, pehuñora mbahe imboupri pēu. Ndapeporandui chira rumo sese chupe Tūpa rese pe pīhañemoñetasa momaraēhi āgua.

²⁸ Acoi ava, “Co mbahe roho icuavēhepri mbahe rahanga upe” ehise pēu, ndapehui chira ahe mbahe roho. ěgüe peyera pēu imombehusar rereco meguaēhi āgua, ava pīhañemoñetasa momaraēhi āgua avei.

²⁹ Supi eté che añehe co ambuae ava pīhañemoñetasa rese, ndahei pe pīhañemoñetasa rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava pīha rupi?” ehi vahe.

³⁰ Iyavei aipo ehira no: “‘Aviye ndeu’ ahese Tūpa upe mbahe ahu vahe rese, ¿mahera pīha che reroīra yuvireco ahuse viña?” ehira.

³¹ Iyacatu rumo pehuse que mbahe, peihuse avei, anise que mbahe peyapose, peyapo ru opacatu Tūpa mboeteisa pipe.

³² Supi eté ndapemboyecuai chira pe recocuerai, que judío upe, que ndahei vahe judío yuvirecoi vahe upe, anise que Jesús reroyasar yuvirecoi vahe upe avei.

³³ Che opacatu che rembiapo pipe aipota ité mbahe tupri apo āgua opacatu ava upe nara. Ndahei cheyeupeño mbahe tupri aseca, ambuae ava upe avei mbahe tupri aipota iñepisiro āgua yuvireco.

11

¹ Che raquicue moñá catu peye inungar che asaquicue moña Cristo vichico.

Mara ehira cuña Jesús reroyasar ñemonuhasave yuvireco yepi

² Che rivireta, che, “Aviye ité yuvirecoi” ahe pēu yepi che rese pemahenduha vitese iyavei peguataño vitese che opombohe vahe agüer rupi.

³ Che rumo aicua uca tupri pota pēu, Cristo niha secoi ñepepei-peu cuimbahe cuaisar, cuimbahe evocoyase güembireco cuaisar secoi. ěgüe ehi avei Tūpa Guahir Cristo upe.

⁴ Acoi cuimbahe Cristo upe ñemonuhasave oãca ndïru ndosequiise oyerure ãgua, anise TÛpa Ñehengagüer mombehu ãgua, ahe êgüe ehi güerecuar Cristo mboeteiêhisa pipe.

⁵ Iyavei acoi cuña ndoyopiise oãca oyeroquí ãgua, anise TÛpa Ñehengagüer mombehu ãgua, ahe êgüe ehi omer mboyeroyaêhisa pipe. Ahe cuña evocoyase ndoyaviï oñeapipa tupri vahe.

⁶ Acoi cuña ndoyopi potaise oãca, tayapecãraisa tupri. Ochïse rumo oapecãrai ãgua, evocoyase toyopiño oãca sereco.

⁷ Cuimbahe rumo ndoyopii chira oãca sereco. Esepia, ahe TÛpa rahanga ité secói iyavei iporañetesa omboyecua ité oyese. Cuña rumo omboyecua omer recocuer oyese yuvireco.

⁸ Esepia, TÛpa oyapose cuimbahe, ndahei cuña sui vinose, cuimbahe sui niha cuña oyapo.

⁹ Iyavei ndahei cuña upe nara TÛpa oyapo cuimbahe, ahe rumo oyapo cuña cuimbahe upe nara.

¹⁰ Co rese cuña virecora oãcapisa omer mboyeroyasa mboyecua ãgua omahese TÛpa rembiguai eta yuvireco sese.

¹¹ Yande, yande Yar reroyasar yaico vahe co tecocuer rese, yañepitiviï oyoya yaico. Evocoyase cuimbahe ndoicatui cuña porêhi; cuña avei ndoicatui cuimbahe porêhi yuvireco.

¹² Esepia, yepe supi eté cuimbahe sui yapopri cuña. Ipare rumo cuña sui oha cuimbahe; opacatu rumo oyoya TÛpa suindar yuvirecoi.

¹³ Evocoyase peyapisaca tupri co rese: ¿Iya pïha cuña noñeacapiï vahe oyerure TÛpa upe?

¹⁴ Yande ité yaicua yemochisa cuimbahe oyemboha vucuse.

¹⁵ Cuña rumo oviharete oha vucu porañetesa rese. Esepia, chupe imondopri ité ñacapi ãgua.

¹⁶ Acoi ava iñehe-ñehe tēi pota vahe co tecocuer rese, toicua ore ndoroicoi ambuae reco pipe. Iyavei opacatu ambuae Jesús reroyasar êgüe ehi avei yuvireco.

Yande Yar rese yemomahenduha raisa

¹⁷ Co ambuae mbahe rese rumo ndaicaatui eté, “Aviye tupri yuvirecoi” che he ãgua pēu. Esepia, aipo pe ñemonuhasave, mbahe tēi eté aipo peyapo.

¹⁸ Esepia, yipindar che ayandu peñemonuhapase aipo oyese yande Yar mboetei ãgua pe pihañemoñetasa ndahoyoyai pipe peico. Amove ayanduse pe rerãcua, aroya ité.

¹⁹ ¡Iya ité revo pihañemoñetasa ndahoyoyai vahe reime ãgua pe pãhuve Jesús reroyasar supi tupri vahe cua tupri ãgua!

²⁰ Peñemonuhase pe pihañemoñetasa ndahoyoyai vahe pipe pe caru ãgua, ndahei yande Yar rese pe yemomahenduhasave êgüe peye.

²¹ Espia, aipo pecaruse, pe rane aipo pepoyava pecaru. Ambuae aipo evocoyase ndasiepoi tēi yuvireco; ambuae rumo pe pãhu pendar aipo oyembosavaipoño yuvireco.

²² Pereco niha pe rēta aheve pe caru ãgua iyavei pe ihu ãgua. Pe rumo pe reco pipe opa peroïro ambuae Jesús reroyasareta peico. Ipipe avei pemochi ava ndovirecoi vahe mbahe. ¡Che evocoyase, “Aviye yuvireco” ndahei chietera co mbahe pe rembiapo ai rese pēu!

Yande Yar rese yemomahenduhasa supi ité vahe resendar

²³ Co ñehesa aipisi vahe yande Yar suindar amombehu vahe pëu: ahe pïtu pipe acoi Jesús mboguisar opisi água renonde, ahe oipisi pan.

²⁴ “Aviye ndeu” ohe pare Vu upe, ombohi-mbohi, ahese aipo ehi güemimbohe eta upe: “Co che rete amondo vahe manosave mbahe tupri pe reco água. Ēgüe peyera che rese pe mahenduhasa pipe peico” ehi.

²⁵ Ēgüe ehi avei ocarure yuvireco, ahe oipisi igua riru aipo ehi: “Co uva ricuer omboyecua pëu Tüpa oyapora mbahe ipiasu vahe pe recorã. Che ruvi pipe rumo yaposara. Evocoiyase co ari pipe suive peihuse co, peyemomahenduhara che rese yepi” ehi.

²⁶ Esepia, acoi pehuse co, peihuse avei, peyemomahenduhara, pemombehu aveira yande Yar mano agüer opacatu ava upe peico. Ēgüe peyera iyevi rãro peico.

Mara yahera yande Yar rese yayemomahenduhase

²⁷ Evocoiyase acoi ava ocaruño tēi vahe, yuviroihuño tēi vahe avei Yar mboeteiēhisave, ahe evocoiyase nombotei yuvireco yande Yar rembiapocuer omondose güetecuer, iyavei oipiyerese vuvi.

²⁸ Sese tipihañemoñeta rane oyacatu güecocuer rese ava co pan hu água renonde, oihu água renonde avei co uva ricuer yuvireco.

²⁹ Esepia, acoi pe yemomahenduhaēhisave co setecuer rese pehuse iyavei peihuse, ahese mbahe naporai vahe peseca peyeupe nara peico.

³⁰ Ichui niha setã pemaheasi, oime setã nipirata iri vahe avei pe pãhuve, oime avei omano vahe pe pãhu pendar.

³¹ Yande pihañemoñeta tuprise rumo yande reco água rese, yande Yar evocoiyase nomoime chira mbahe tēi yandeu evocoiya yande recosa pipe.

³² Yande Yar rumo oicua yande rembiapo ai. Sese omoime mbahe tēi yandeu. Yande reco mohivi tupri água rumo Ēgüe ehi yandeu, ndahei yande cañi água opacatu ava viroyasarēhi reseve.

³³ Sese, che rivireta, acoi peñemonuhase pe yemomahenduha água yande Yar rese, peñearo ranera oyoya guasu pe caru água.

³⁴ Acoi ava ndasiepoise yuvireco, tocaru rane güetave. Ahese yuvirasose ñemonuhase, ndipo chira mbahe chupe. Iyavei che asose eipeve pe repia, opara ambuae mbahe amoingatu vicho pëu.

12

Mbahecuasa Tüpa Espiritu suindar

¹ Che rivireta, che aicua uca pota pëu co mbahecuasa resendar ñepeipei pëu Espiritu omondo vahe.

² Pe niha cūrítei peicua tupri ité yipindar Tüpa rese peicoēhi vitese, peyembopa uca mbahe rahanga Ēgüe ehi tēi, noñehi vahe upe peico.

³ Sese, che aipota peicua acoi ava iñehi mara Jesús upe ndahei Tüpa Espiritu pīratasa pipe Ēgüe ehi. Iyavei ava ndoicatui chira, “Jesús che Yar secoi!” ohe água opiha pipe Espiritu Santo ndovirecoise.

⁴ Oime setã ambuae-ae tēi mbahecuasa Espiritu suindar yande Jesús reroysar yaico vahe upe nara, ahe Espiritu rumo ñepeifño ité imondosar secoi.

⁵ Setã mbahe avei oime mbahe yayapo vaherã yande Yar upe. Ahe yande Yar rumo ñepeifño ité secoi.

⁶ Iyavei setã oime ambuae mbahe Tüpa oyapo vahe yande rese opīratasa pipe, Tüpa rumo ñepeifño ité secoi. Ahe oyapo opacatu co mbahe ñepeipei yande rese.

7 Ahe omboyecua yande Espiritu rerecosa ñepei-pei yandeu opacatu yande reco tupri āgua.

8 Espiritu pīratasa pipe Tūpa omondo ñepei viroyasar upe iñehe āgua aracuasa rese iyavei ambuae upe omondo iporombohe tupri catu āgua ombahecuaa pipe.

9 Ambuae upe evocoyase omondo oyese yeroya tupri catu āgua oEspiritu pipe sui avei. Iyavei ambuae upe omondo opīratasa imbaheasi vahe mbogūera āgua.

10 Ambuae oipisi pīratasa mbahe poromondiisa oyapo vaheerā yuvireco. Ahe ichui avei vireco ambuae ava omombehu vaheerā ñehesa Tūpa suindar yuvireco. Ambuae upe Tūpa omondo mbahecuaa espiritu naporai vahe iyavei Espiritu supi tupri vahe cua tupri āgua. Ambuae evocoyase ichui avei oicatu ñehesa ndicuasai vahe Tūpa suindar pipe oñehe āgua. Ahe ichui avei ambuae oicatu ahe ñehesa ndicuasai vahe mombehu tupri āgua ava upe.

11 Ēgüe ehi Espiritu ñepeiño ité güemimbotar rupi omondo ñepei-pei yande Jesús reroyasar yaico vahe upe co mbahecuaa.

Opacatu Cristo rese yaico vahe ñepeiño ité yande recocuer

12 Inungar yande retecuer resendar setá mbahe oime viña, ahe rumo ñepeiño ité; Ēgüe ehi avei Cristo.

13 Ēgüe yahe avei opacatu, yepe yande pāhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico ñepei vahe nungar yande reco āgua Espiritu ñepei vahe pipe. Ahe ñepei Espiritu avei opa yaipisi.

14 Supi eté yande rete resendar ndahei ñepei mbahe, setá rumo mbahe.

15 Iyavei yepe que yande pi revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tēi ndaseco iri chira yande rete rese.

16 Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiveira ichui tēi ndaseco iri chira yande rete rese!

17 Esepia, opacatu tupri yande rete sesa pāve tēise, ndayasendui chietera evocoyase mbahe viña. Anise, yande rete yapisacuar pāve tēise, ndayasētui chietera evocoyase mbahe viña.

18 Tūpa rumo ñepei-pei yande rese mbahe omondo senara rupi tupri güemimbotar rupi.

19 Yande opacatu ñepei ava rete resendar nungar pāve tēise, ndahei evocoyase opacatu tupri ava rete nungar yaico.

20 Supi eté yepe setá mbahe yande rete rese, ñepeiño ité rumo yande rete.

21 Iyavei que yande resa ndiyai aipo ehira yande po upe: “¡Nde Ēgüe ere tēi vahe eico!”; anise que yande āca avei, “¡Nde Ēgüe ere tēi vahe eico!” ndehi chira yande pi upe.

22 Esepia, yande rete resendar mbahe avīye nipiratai vahe yandeu, ahe sese rumo yayeroya catu.

23 Iyavei yande rete rese mbahe ndayasaisu tuprii vahe, ahe rumo yamboyemondé tupri ai sereco. Iyavei no yande rete resendar mbahe ndayamboyecuai vahe ava rembiepiave, ahe yayopi tupri sereco.

24 Oime rumo ambuae yande rete resendar ndayayopii vaheerā. Ēgüe ehi Tūpa yande rete resendar mbahe imoingatu tupri. Evocoyase yande rete resendar mbahe ndayasaisu tuprii vahe imboeteipri catu seci.

²⁵ Tipo eme pihañemoñetasa ndoyoyai vahe pe pãhuve. Oyoya pehañeco tupri ñepei-peí peyese peico.

²⁶ Evocoiyase que ñepei yande pãhu pendar upe mbahe tasise, opacatu ambuae upe avei tasi; anise que ñepei imboyeroyapri secoise, ambuae avei opacatu oyemboviha yuvireco sese.

²⁷ Supi eté pe inungar Cristo rete peico. Êgüe peye ité ñepei-peí chupendar ité peico.

²⁸ Êgüe ehi Tũpa iporavo viroyasar pãhuve, “Toime rane yipindar apóstol; ipare toime ava che ñehengagüer mombehu ãgua, ichui ambuae upe iporombohe ãgua, ipare ambuae mbahe ndayasepiai vahe apo ãgua, iyavei ambuae ava imbaheasi vahe mbogüera ãgua, ambuae ava pĩtiviisar tasecoi, ambuae ava recocuer roerogata tupri ãgua tasecoi, ambuae ava evocoiyase toñehe ñehesa ndicuasai vahe pipe” ehi.

²⁹ Ndahei rumo opacatu ava apóstol yuvirecoi, iyavei ndahei opacatu Tũpa ñehe mombehúsar yuvirecoi, ndahei opacatu oporombohe yuvireco, ndaopacatuí avei oyapo mbahe ndayasepiai vahe yuvireco,

³⁰ ndahei opacatu vireco pĩratasa oporombogüera ãgua yuvireco, iyavei ndahei opacatu ndicuasai vahe ñehesa Espĩritu suindar pipe oñehe yuvireco, ndaopacatuí avei oicua evocoi ñehesa renducia uca ãgua ambuae ava upe yuvireco.

³¹ Peseca ru Espĩritu suindar mbahecuasa aviye catu vahe peyeupe nara.

Yembohesa yande poroaisu ãgua resendar

Che rumo amombehura tecocuer aviye catu vahe pẽu.

13

¹ Yepe yande yañeheño tẽise ambuae ava ñehe ndayaicuai vahe pipe, iyavei Tũpa rembiguai ñehe pipe avei viña, ndayasaisuise rumo ava ipipe, yande evocoiyase egüe yahe tupri tẽi inungar mbahe guarepochi apopri siapu iteanga vahe, iyavei inungar acoi platillo siapú rai tẽi vahe, egüe yahe tẽi yaico.

² Iyavei yepe yamombehuño tẽise Tũpa suindar ñehesa ou vahe yandeu viña, iyavei yepe yaicuase mbahe opacatu icuapirẽhi Tũpa suindar yaico, yarecose avei yande aracuasa opacatu yandeyese, iyavei yepe yande Tũpa rese yeroya pipe yarosirira ivitri guasu senda sui viña, ndayasaisuise rumo ava ipipe, yande evocoiyase egüe yahe tupri tẽira yaico.

³ Iyavei yande mbahe opacatu yareco vahe yamboyaho-yaho tupri tẽise ava iparaisu vahe upe viña, iyavei yayoapi ucapa tupri tẽise viña, ndayasaisuise rumo ava ipipe yaico, ndayande pĩtivii eté evocoiya yande reco agüer.

⁴ Acoi ava iporoaisu vahe, ahe seco mbegüe tupri, secocuer aviye ai eté iyavei ndoporoamotarẽhi ambuae ava mbahe potasave; “Che aviye catu vahe aico” ndehi avei, ndoyecomboivate ai eté,

⁵ ahe ndovirecoi eté oyeromboeteiẽhisa, ndahei oyeupe güeraño mbahe oipota, niñemoiro serai vahe, ahe rumo iñero voiño ambuae ava upe.

⁶ Ndahei mbahe tẽi rese oyemboviha; ahe rumo oyemboviha mbahe supi tupri vahe rese.

⁷ Oporoaisusa virecose oñemosañõ opacatu uve, oyeroya vite sese, osãro vite mbahe tupri ichui, iyavei seco mbegüe viteño chupe.

⁸ Poroaisusa niha ndopai vahe ité. Oyepotara ari ipapapri coiye, ahese ndayamombehu iri chira Tũpa suindar ñehesa ou vahe, ndayañehe iri chira

ambuae ñehesa ndayaicuai vahe pīpe, ndayaiporu iri chiaveira yande mbahecuasa.

⁹ Esepia niha, yaicua raimi tēi mbahe iyavei chīhi raimi tēi yamombehu Tūpa Ñehengagüer.

¹⁰ Acoi ouse rumo oicuapa tupri vahe mbahe, ahese ndahe iri chira yaicua raimi tēi vahe yaiporura.

¹¹ Esepia niha, chīhivahe vite yande recose, yañehe, yandepihañemoñeta, yasenducua mbahe chīhivahe nungar; yacuacuase ité rumo cute, yaseyapa chīhivahe yande reco güer.

¹² Cūrītei yande ndayasenducua tuprii Tūpa resendar mbahe, inungar acoi yepiasa pīpe yasepia hāvomi tēi que mbahe; oyeovai eté yaicose rumo, yasenducua tupri catu itera mbahe evocoyase. Cūrītei rumo yaicua raimi tēi mbahe Tūpa suindar yaico; coiye rumo yaicua tupri catu itera, inungar ahe oicua tupri ité yande recocuer.

¹³ Co oime mbosapi mbahe ndopai vaheṛā, ahe: Tūpa rese yande yeroyasa, mbahe yande remiāro ivave oime vahe iyavei yande yeaisusa; co imombosapīsa rumo aviye catú vahe ité ambuae sui yandeu, ahe yeaisusa.

14

Yaseca catura Tūpa suindar ñehesa mombehu āgua

¹ Peseca catu pe yeaisu tupri āgua peico; aheseve avei peipotara mbahecuasa Tūpa Espīritu remimbou. Ichuindar ñehesa mombehu āgua rese catu ité rumo peicora.

² Esepia, acoi ava oñehe vahe ñehesa ndayaicuai vahe pīpe, Tūpa upe ité evocoyase oñehe; ndahei ava upe tēi oñehe. Esepia, ndipoi eté ava iñehe renducupar. Ahe rumo oñehe mbahe ndicuasai vahe rese oespīritu pīpe.

³ Acoi ava omombehu vahe rumo Tūpa suindar ñehesa yasenducua vahe pīpe, ahe oipīvivi ambuae ava Tūpa rese iyeroya āgua, oporomonguerēhi catu, oporomboviha catu avei.

⁴ Acoi ava oñehe vahe rumo ñehesa ndayaicuai vahe pīpe, ahe ae tēi vireco catu Tūpa rese opīhañemoñetasa. Acoi ava omombehu vahe rumo Tūpa suindar ñehesa icuapri ité, ahe ombopīhañemoñetá catu Tūpa rese Cristo reyoyasar yuvirecoi vahe.

⁵ Yepe aipotara opacatu pe ñehe āgua ñehesa ndayaicuai vahe pīpe pēu viña, aviye catu rumo pemombehura Tūpa suindar ñehesa icuapri vahe peico. Esepia, ahe aviye catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tupri āgua, ahese aviyeño oñehe Jesús reyoyasar rovaque. Ipīpe sui ipīhañemoñeta catura Tūpa rese yuvireco.

⁶ Sese, che rivireta, asose pe repia, añehese co ñehesa ndayaicuai vahe pīpe pēu, ndapesenducuai chira che ñehe viña. Amombehuse rumo Tūpa oicua uca vahe cheu que mbahecuasa supi tupri vahe resendar, anise que ñehesa Tūpa suindar, anise que ambuae porombohesa, ahese pesenducua viña.

⁷ Mbahe yande remimombehu rumo inungar acoi mbahe porasei recasar imoñehepri viña, inungar mimbī, arpa avei. Esepia, ndoyoya tupriise iñehegüer yuvireco, ndayasenducuai eté evocoyase mbahe-mbahe sapucaisa osāha yuvireco.

⁸ Anise co inungar mimbī nomoñehe tupriise vavasave nara yuvireco viña, ndipoi chietera que ava oyemoingatu voi vaheṛā ovava āgua viña.

⁹ Ēgüe peye avei niha peico peñehese ava upe ñehesa ndayasenducuai vahe pipe, ahe evocoyase osenduño tēi, ndosenducuai eté rumo pe ñehe yuvireco. ¡Evocoyase peñeheño tēi eté!

¹⁰ Supi eté, setá iteanga co ivi pipe oime ambuae-ae tēi ava ñehesa. Oime avei rumo ava osenducua vahe aipo nungar ñehesa.

¹¹ Acoi ndayasenducuaise rumo ambuae ava ñehe, yande evocoyase inungar ambuae tecua pendar tēi yaico vahe chupe; yandeu avei evocoyase ahe ava inungar ambuae tecua pendar tēi yuvirecoi vahe.

¹² Pe niha peipota ité pereco vaherā mbahecuasa Tūpa Espiritu suindar yepi. Sese peporandu catu mbahecuasa Espiritu suindar rese opacatu Jesús reroyasar pítivii āgua Tūpa rese yuvirecoi tupri catu vaherā.

¹³ Sese acoi ava oñehe vahe ñehesa ndayaicuai vahe pipe, toporandu rane Tūpa upe ambuae ava upe senducua uca tupri āgua rese.

¹⁴ Esepia, acoi yayeroquiño tēise Tūpa upe ñehesa ndayasenducuai vahe pipe, yayeroqui yande espíritu pipe, ndayasenducuai rumo yande yeroqui.

¹⁵ ¿Mara yahera vo evocoyase? Yayeroquirā yande espíritu pipe, yande aracuasa pipe avei. Yasapucaira yande espíritu pipe, yande aracuasa pipe avei no.

¹⁶ Esepia, acoi Tūpa upe, “Aviye ndeu” yahese yande espíritu pipe güeraño, evocoyase ava ndosenducuai vahe, oyemboyase yande rese iyavei osenduse yande yeroquisā, “Aviye ité” ndehi chietera yuvireco. Esepia niha, ahe ndosenducuai eté yande yeroqui yuvireco.

¹⁷ “Aviye ndeu” yande hesa, aviyeteramo aviyera Tūpa upe viña, ambuae ava rumo osenduse, noipítivii chietera Tūpa rese imbopihañemoñeta catu āgua senducuaēhi pipe.

¹⁸ “Aviye ndeu” ahe Tūpa upe. Esepia, añehe catu ñehesa ndayaicuai vahe pipe opacatu pe sui.

¹⁹ Jesús reroyasar ñemonuhasave rumo aipota catu amombehu vaherā moviromi tēi ñehesa yasenducua vahe ava mbohe āgua setá ñehesa ndicuasai vahe pipe che ñehe rāgüer sui.

²⁰ Che rivireta, pepihañemoñeta eme chihivahemi pihañemoñeta nungar pipe. Iyacatu rumo peicora cuacua vahe pihañemoñeta nungar pipe. Peyemochihivahe catuñora rumo peico mbahe naporai vahe apoēhi āgua.

²¹ Porocuita resendar icuachiapri aracahendar pipe aipo ehi: “Añehera co ava yuvirecoi vahe upe ambuae ava ñehe pipe. Iyavei ava ambuae ivi pendar amoñehe ucara ñehe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe.

²² Evocoyase co ñehesa ndayaicuai vahe pipe oñehese ava Tūpa pīratasa pipe, ahe Jesús reroyasarēhi yuvirecoi vahe upe nara: “¡Peicua catu, co supi tupri vahe!” he āgua. Ndahei rumo ava Jesús reroyasar yuvirecoi vahe upendar. Ñehesa Tūpa suindar senducupri yamombehuse rumo, ahe, “Co supi tupri vahe” he āgua Jesús reroyasar yuvirecoi vahe upe; ndahei ava seroyasarēhi yuvirecoi vahe upendar.

²³ Evocoyase, acoi opacatu pe Jesús reroyasar pe ñemonuhasave oyoya guasu peñehese ñehesa ndayaicuai vahe pipe tēi, ipare yuviroiques pe pāhuve Jesús reroyasarēhi ndosenducuai vahe Tūpa suindar mbahe yuvireco, “¡Opacatu co ndayaracuai vahe tēi yuvireco!” ehira yuvireco pēu.

²⁴ Opacatu rumo peñehese Tūpa suindar ñehesa yasenducua vahe pipe, yuviroiques evocoi nungar ava yuviraso pe pāhuve, ahe ae evocoyase, “Supi eté ayavi che recocuer Tūpa rovaque” ehira pe ñehe renduse yuvireco.

²⁵ Ēgüe ehira opihañemoñeta rai ndoyecuai vahe imboporēhipa uca oyeupe pe ñehe rendu ramose yuvireco. Ipipe sui omboeteira Tūpa yuvireco. Ahese, “Supi eté catu Tūpa ité pereco peyese” ehira yuvireco pēu.

Yayapora mbahe opacatu yande cuaita rupi ñemonuhasave

²⁶ Sese che rivireta, peñemonuhase, oime pe pāhu pendar osapucaí pota vahe sapucaisa Tūpa upendar, ambuae evocoiyase oipota ité ava mbohe yuvireco, anise ambuae omombehu pota ava upe mbahe oyeupe omboyecua uca vahe Tūpa, ambuae oipota ité oñehe ñehesa ndicuasai vahe pipe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesús reroyasareta seroya catu āgua yuvireco.

²⁷ Acoi ava oñehese ñehesa ndayaicuai vahe pipe, toñehe ñuvirío güeraño yuvireco, anise que mbosapi ñepeipei rupi; ñepeipei evocoiyase osenducua ucara iñehe ava upe oico.

²⁸ Acoi ndipose ité rumo ambuae ava ahe ñehesa ndayaicuai vahe renducua uca āgua, ndiyai ahe oñehera yuvireco pe ñemonuhasave; oyeupeñomi evocoiyase ahe oñehera ipipe yuvireco Tūpa upe.

²⁹ Ēgüe peye tupri aveira pemombehuse Tūpa suindar ñehesa ambuae ava upe, peñehera ñuviriomi, anise mbosapi. Ambuae evocoiyase pe pāhu pendar oyapisaca tuprira sese yuvireco ‘¿supi eté pīha?’ ohesave.

³⁰ Que ñepeipei oñehe vitese Tūpa oicua ucasa mbahe ambuae ava upe, topituhuño yipindar oñehe vahe, ambuae evocoiyase toñehe pēu.

³¹ Evocoiyase ēgüe peyera peñehe ñepeipei opacatu ambuae osendu vahe mbohe āgua iyavei imonguerēhi catu āgua.

³² Acoi omombehu vahe ñehesa Tūpa suindar, ahe oicatu oñehe mombituhu āgua.

³³⁻³⁴ Esepia, Tūpa seci mbahe aviye vahe aposar, ndahei ndoyembohe catui vahe.

Ndiyai cuña upe iñehe āgua pe ñemonuhasave. Esepia, ēgüe ehi avei opacatu ambuae Jesús reroyasar ñemonuhasa rupi yuvireco. Evocoiyase ndiyai eté aheve iñehe āgua yuvireco chupe. Iyacatu rumo ahe imboyeroyapri yuvirecoira omer upe Tūpa porocuita rupi.

³⁵ Oicua potase que mbahe, iya omer upe oporandura güētave yuvireco. Esepia, cuña upe ndiyai eté iporandu āgua mbahe rese pe ñemonuhasave.

³⁶ Peyapisaca catu co ñehesa rese. Ndahei niha pe rane pemombehu Tūpa Ñehengagüer ava upe peico, ndahei avei pēuñomi ou Tūpa suindar ñehesa.

³⁷ Acoi que pe pāhuve oimese “che Tūpa Ñehengagüer mombehusar aico” ehiño tēi vahe, anise que “aicua Espiritu suindar mbahe” ehi vahe, iya rumo oicua tupri co aicuachía vahe imondo pēu, ahe yande Yar porocuita resendar.

³⁸ Ahe ndoyapisaca potaise rumo che ñehe rese, iñehe rese evocoiyase ndapeyapisacai chira.

³⁹ Sese, che rivireta, peyemonguerēhi catu Tūpa suindar ñehesa icuapri vahe mombehu āgua peico. Ndiyai rumo ndapeipotai ambuae ava upe ñehesa ndayaicuai vahe pipe iñehe āgua.

⁴⁰ Peyapora rumo opacatu mbahe ñepeipei pe cuaita rupi mbahe tupri pipe.

15

Cristo cuerayevi agüer

1 Che rivireta, che aipota peyemomahenduha acoi ñehesa pĩsirosa resendar pëu mombehu vahecuer rese. Co ñehesa niha peipisi. Ipipe sui avei niha peyemoviracua peyese.

2 Seroya pipe niha peñepisiro peico peyemoviracuase sese. Ëgüe ndapeyeise rumo, peroya tupri tõi.

3 Acoi ñehesa aipisi vahe, opa uca aicua pëu. Esepia, ahe aviye catu vahe: Cristo omano yande angaipa repirã Tüpa Ñehengagüer icuachiapri rupi eté

4 iyavei oñoti sehögüer yuvireco. Ipare rumo, imombosapisa ari pipe, ocuerayevi iri icuachiapri rupi eté avei.

5 Ichui oyemboyecua Pedro upe. Ipare voi oyemboyecua apóstol yuvirecoi vahe upe.

6 Ichui oyemboyecua quiniento sui setá catu vahe viroyasar upe. Evo-coiyase oyoya guasu osepia yuvireco. Setá vite rumo sepiasarer yuvirecove vite cüritei; amove rumo ambuae opa omano yuvireco.

7 Coiye oyemoporëhi Santiago upe. Ipare opacatu apóstol once yuvirecoi vahe upe.

8 Cheu avei ipa ité oyemboyecua cute, aviye evocoyase che ipá oha vahe aico seroya ägua.

9 Esepia, che seco ivi coti catu vahe opacatu ambuae apóstol sui aico. Iyavei ndacheäroi eté apóstol che reco ägua viña. Esepia, che yipindar seroyasar aseca-seca catu vahe mara-mara tõi sereco ägua.

10 Che rumo apóstol ité aico. Esepia, Tüpa oyapo mbahe aviye vahe ité cheu; che rovasa oico. Evocoyase che recocuer osecuñaro ité sereco. Ichui che aporaviqui catu ité opacatu ambuae apóstol sui. Ndahei rumo cheyesui tõi ëgüe ahe vichico, Tüpa rumo oporovasasa pipe secoi che rupi.

11 Ndapepihañemoñetai chira rumo acoi oporaviqui catu vahe rese tõi. Co ñehesa Cristo recocuer resendar ore oromombehu vahe rese rumo pepihañemoñeta catura. Esepia niha, ahe peroya vahe ité peico.

Ava omano vahe cuerayevisa

12 Oromombehu ité niha Cristo cuerayevi agüer resendar pëu. Oime rumo amove pe pãhu pendar, “¿Mahera aipo ocuerayevira omano vahe yuvireco viña?” ehiño yuvireco.

13 Ndocuerayevise ité rumo ava omano vahe viña, Cristo avei evocoyase ndocuerayevii chietera viña;

14 iyavei Cristo ndocuerayevise viña, ore secocuer oromombehu vahe evocoyase ëgüe ehi tõi etera viña. Iyavei pe yeroyasa Cristo rese ëgüe ehi tõi aveira viña.

15 Acoi ëgüe ehise ité rumo viña, ore avei evocoyase oroñehëño tõi etera Tüpa resendar ñehesa rese oroico viña. Esepia, “Tüpa Cristo ombogüerayevi” orohe ité imombehu ava upe oroico. Ndocuerayevise ité rumo omano vahe yuvireco viña, ahese Tüpa nombogüerayevii chiaveira Cristo viña.

16 Ëgüe ehi eté, acoi omano vahe ndocuerayevise yuvireco viña, Cristo avei evocoyase ndocuerayevii chietera viña;

17 Tüpa rese pe yeroyasa evocoyase ëgüe ehi tõi vahe itera viña; angaipa pipe viteño tõi evocoyase pe recocuer viña.

18 Iyavei acoi ëgüe ehise ité viña, evocoyase omano vahe Cristo reroyasar, ahe avei ocañi tẽira viña.

¹⁹ Ndipoise yasāro vaherā Cristo suindar mbahe yamanose, yande evocoyase imbopapri tēi catu itera yaico opacatu ambuae ava sui yuvireco viña.

²⁰ Cristo rumo supi eté ocuerayevi omano vahe pāhu sui; ahe rane yipindar ocuerayevi vahe.

²¹ Esepia, ñepeí ava rembiapo sui oime manosa yandeu. Evocoyase ñepeí ava rembiapo sui avei yacuerayevira.

²² Esepia, inungar acoi Adán rembiapo ai sui ava opacatu omano yuvireco, ěgüe ehi aveira Cristo rembiapo sui opacatu ava sese yuvirecoi vahe virecora tecovesa yuvireco.

²³ Ñepeí-péi yandeu imombehusa rupi; yipindar Cristo ocuerayevi, ichui yande seroyasar yaico vahe yacuerayevi aveira sese acoi ahe oyevise curi.

²⁴ Ahese oura ari ipa vahe cute. Yipindar rumo Cristo omocañipara opacatu seco pīrata ěgüe ehi tēi vahe. Ipare omondora opovri; pendar Vu Tūpa upe.

²⁵ Ahe rane ité rumo opacatu oporocuirā oico acoi Tu opase voi eté omondo opacatu yamotarēhimbar ipovrive.

²⁶ Ahese ipa manosa opa itera.

²⁷ Esepia, Tūpa osecopi opacatu mbahe imondo ipovrive, “Opacatu ité mbahe secopipri” ehise. Ndahei rumo Tu Tūpa avei secoi ipovrive. Esepia, Tu ité opacatu mbahe osecopi imondo ipovrive.

²⁸ Evocoyase, opase mbahe imondosa ipovrive, ahe ae evocoyase oye-mondora Vu Tūpa povrive. Tu evocoyase secoira ivate catu vahe opacatu mbahe sui.

²⁹ Ndipoise omano vahe cuerayevi āgua yuvireco viña, ¿mbahe rese pīha evocoyase omanose ava, amove chupe nara tēi ambuae oñeapiramo uca yuvireco? Esepia, omano vahe ndocuerayevise yuvireco viña, ¿mahera ru evocoyase ahe ava oñeapiramo uca chupe yuvireco?

³⁰ Iyavei ore no, ¿mahera ru evocoyase oroyemondora mbahe tēi upe ari rupi viña?

³¹ Supi eté, che rivireta, ari yacatu avīye che amano vaherā opacatu co mbahe tēi sui. Ahe pipeve avei rumo che areco ité che viharetesa pe rese yande Yar Jesucristo rese che recose.

³² Oime mbia Efeso pendar mbahe tēi eté oyapo yuvireco cheu. Avīye acoi mahembiar oñaro ai vahe rese avava vahe vichico. Acoi omano vahe ndocuerayevise rumo yuvireco viña, evocoyase ichui ndipoi chietera mbahe avīye vahe cheu viña. Sese che ayapoñi itera inungar ava aipo ehi vahe yuvireco viña “yacaruño, yaihuño avei. Esepia, ayihive yamanora” ehi vahe.

³³ Peyembopa uca eme evocoi nungar ava upe peico. Supi eté ñehesa aipo ehi vahe: “Ava naporai vahe piri peicose, ahe evocoyase vrovra pe reco tuprisa” ehi vahe.

³⁴ Pepihañemoñeta tupri iri, peyemboangaipa uca iri eme. Esepia, amove pe pāhu pendar oime ndoicuai vahe ité Tūpa yuvireco. Che aipo ahe ité pēu ‘toyuvinochi che ñehe osenduse yuvireco’ viya.

Yande retecuer cuerayevisa resendar

³⁵ Aviyeteramo pe pāhu pendar oimera oporandu vahe: “¿Mara ehira pīha omano vahe ocuerayevi irise yuvireco coiye? ¿Mara ehi angahura pīha setecuer ahese yuvireco?” ehira yuvireco oyeupe.

³⁶ ¡Pe aipo peye-peye tēi peico! Esepia, mbahe rāhiñi yañotise, ituyu rane ité sori āgua.

³⁷ Yañotise mbahe, sāhiñi rane ité yañoti; ndahei ihi opacatu reseve yañoti.

³⁸ Ipare rumo Tūpa omondo ahe mbahe rāhii upe ihiguā güemimbotar rupi, iyavei ambuae mbahe rāhii yacatu omondo ihiguā.

³⁹ Ndahoyoyai rumo que ñepe mbahe miti hi ambuae mbahe miti hi rese. Ēgüe yahe avei yande yaico vahe ambuae ité yande rete mbahe mimba sui; virai rete ambuae ité iyavei pira rete ambuae tēi no.

⁴⁰ Ēgüe ehi avei niha, oime iva pendar rete, ivive ava yuvirecoi vahe rete avei no. Iva pendar rete catuprigüer rumo ndahoyoyai eté ivi pipendar rete rese.

⁴¹ Ari rendigüer avei ndahoyoyai yasi rendigüer rese, yasitata rendigüer rese avei. Ñepe yasitata ambuae yasitata rese ndahoyoyai avei sendigüer yuvireco.

⁴² Ēgüe ehi aveira niha omano vahe cuerayevisa; yañotise sehögüer, ahe ituyu vahe rā. Ocuerayevisa rumo ndituyu iri chietera; apirēhi vahe rā ité secoira.

⁴³ Tehögüer ñotimbrī nimomburusai vahe; coiye ocuerayevisa rumo, imboeteipri ité secoi. Acoi ava rehögüer oñoti vahe yuvireco, nipirata iri eté oico, coiye ocuerayevisa rumo, ipirata itera.

⁴⁴ Supi eté, acoi ava rehögüer ñotisa vahe, ahe co ivi pipendar tēi setecuer. Ocuerayevisa rumo, setecuer iva pendar secoira. Esepia, oime ité ivi pendar setecuer, oime avei iva pendar setecuer.

⁴⁵ Supi eté aipo ehi icuachiapri aracahendar pipe: “Yipindar ava Adán serer vahe. Ahe sete upe ombou Tūpa secove āgua co ivi pipe” ehi. Ichui rumo ambuae ité ipa Adán nungar ou vahe, ahe rumo vireco ité tecovesa iva pendar ava upe imbou āgua.

⁴⁶ Yipindar oime co ivi pipendar tecovesa. Ipare rumo oime co tecovesa iva pendar yandeu.

⁴⁷ Ēgüe ehi yipindar ava ivi sui yapopri, ivi rese nara ité icuaita oico; coiye catu ava ou vahe evocoyase iva pendar.

⁴⁸ Inungar yipindar ava ivi suindar, ēgüe ehi avei opacatu ava ivi suindar tecovesa rereco yuvireco. Iyavei inungar Jesús iva suindar, ēgüe ehi aveira opacatu iva suindar tecovesa vireco vahe yuvireco.

⁴⁹ Iyavei inungar cūritei Adán nungar tupri yaico; ēgüe yahe aveira yande Jesucristo iva pendar nungar tupri yaico curi.

⁵⁰ Che rivireta, co mbahe amombehu potami pēu: acoi ava upe güetecuer reseve, ndiyai eté seique āgua ivave Tūpa mborerecuasave. Esepia, co yande rete ocañi tēi vahe rā, ndoipisii chira tecocuer apirēhi vahe.

⁵¹ Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi eté secuñarosapa.

⁵² Mimbī moñehese voi yande resapihara inungar yande resapiqui vahe, ēgüe chira secuñarosapa yande rete. Aheseve avei omano vahe ocuerayevipara apirēhi vahe rā ité yuvireco; yande evocoyase nayamano vīte vahe, opaño tēira yande rete secuñarosa.

⁵³ Esepia, co yande rete ocañi tēi vahe rā, ahe yande rete niha opara oñecuñaro apirēhi vahe rā yuvireco.

⁵⁴ Ēgüe ehise yandeu, ahese ramo osupitira Tūpa ñehe icuachiapri pipe imombehupri yandeu curi: “Manosa opara imocañisa” ehi vahe.

⁵⁵ Iyavei aipo ehi: “Ndayasiquie iri chira yande mano āgua. Esepia, manosa ndovireco iri chira oyeroyasa oyese inungar acoi cau popiar opa vahe serocuasa ichui” ehi.

⁵⁶ Angaipa niha inungar mbahe popiar omoime vahe manosa yandeu. Moisés porocuaita aracahendar evocoyase ombou pīratasa angaipa upe angaipa aposar mocañi uca āgua.

⁵⁷ Che rumo, “¡Aviye ndeu!” ahe Tūpa upe. Esepia, ahe ombou angaipa recopi āgua yandeu yande Yar Jesucristo rembiapo sui.

⁵⁸ Sese, che rivireta, peico tupriño ité Cristo rese iyavei peyemoviracua opacatu mbahe tēi upe; peporaviqui catuño yande Yar upendar mbahe rese peico. Esepia, peicua niha yande Yar rese peicose, pe poraviquisa ndahei ēgüe ehi tēi vahe.

16

Porrecosa Jesús reroyasar pītivii āgua resendar

¹ Iyavei co guarepochi monuha āgua iparaisu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe.

² Domingu yacatu iya pe avei peipeha voimi guarepochi peico pe poraviqui repri sui yapocatu āgua. Eipeve che yepotase, ndapeyemañeco iri chira guarepochi monuha āgua rese peico.

³ Evocoyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso āgua yuvirecō ahe pendar yuvirecoi vahe upe.

⁴ Aviyeteramo, iyase cheu, che avei asora aheve. Evocoyase ahe yuvirasora che rupi.

Pablo ipihañemoñeta oguata āgua rese

⁵ Che sose, asora ivi Macedonia rupi, ipare asora pe repia Corinto ve.

⁶ Aviyeteramo apita pucumira pe piri, anise aviyeteramo pe pirive ité mbahe porañehi che mombitañora. Ipare pe che pītiviñomira peye eipeve sui ambuae tecuave che so āgua rese.

⁷ Ndaipotai che opoepia raimi tēi eipeve vicho. Yande Yar rumo oipotase, aico pucu itera pe piri.

⁸ Che rumo cūrítei apitaño vitera cohava Efeso ve, asepia ranera Pentecostés pieta.

⁹ Esepia, oime ité yande Yar upe che poraviquisa aviye vahe ité cohava, yepetá iteanga ava che amotarēhimbar yuvirecoi viña.

¹⁰ Acoi Timoteo oyepotase oso pe piri, taseco tupriño ité pe pāhuve. Esepia, ahe avei oporaviqui yande Yar upe nara oico che nungar.

¹¹ Tipo eme ñepe iyepe sepia potaēhisar yuvireco, iya rumo peipītivii catura che piri iyepota tupri āgua rese. Esepia, che iyavei ambuae Jesús reroyasar rese orosāro ité iyepota āgua orico.

¹² Yande rivri Apolos upe, “Eso ambuae Jesús reroyasar piri Corinto ve” ahe tēi. Cūrítei rumo niqerēhi oso pe repia; iyase chupe, ahese osora pe piri.

Pablo mahenduhasa ipa vahe

¹³ Pemahemoha peyese; peyemoviracua avei Jesús rese pe yeroyasa pipe. Peñemosaño catu pe cuaita upe. Peicoveño itera Tūpa pīratasa pipe.

¹⁴ Opacatu mbahe peyapo pota vahe, peyapora pe poroaisusa pipe ité.

¹⁵ Che rivireta, pe peicua Estéfanos opacatu güeta pendar reseve, ahe ranei yipindar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri āgua yuvireco no.

¹⁶ Evocoiyase che aipota peyemboyeroyara evocoi nungar ava rese iyavei opacatu ambuae yande Yar upe oporaviqui vahe rese avei.

¹⁷ Pe pãhu pendar Estéfanus, Fortunato iyavei Acaico cohawe oyepotase che mbovîha yuvireco. Esepia, ahe oyapo ité pe ndapeicatu tuprii vahe apo yuvireco.

¹⁸ Ahe che monguerêhi catu yuvireco, êgüe ehi avei revo pëu no. Pemboeteira evocoi nungar ava peico.

¹⁹ Jesús reroyasar Asia pendar opacatu ombou omahenduhasa yuvireco pëu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe sêtave yuvireco, ahe avei ombou omahenduhasa yande Yar rer pipe yuvireco pëu.

²⁰ Opacatu Jesús reroyasar coha pendar avei omondo omahenduhasa yuvireco pëu. Peyeovaupite catu pe reco maranehisa pipe ahe mahenduhasa mombehu peyeupe pe viharetasave.

²¹ Che Pablo, che po pipe ité aicuachía co che mahenduhasa imondo pëu.

²² Acoi ava ndosaísui vahe yande Yar Jesucristo, ahe tocañi mbahe tēi pipe. ¡Tovevi pihaivi voi yande Yar ou!

²³ Yande Yar Jesucristo tape rovasa ité yepi.

²⁴ Pëu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pëu.

IMON̄UVIRIOSA PABLO REMBICUACHIA CORINTO PENDAR UPE CORINTIOS

Pablo mahenduhasa Jesús reroyasar Corinto pendar upe

¹ Avirave, opacatu Jesús reroyasareta Corinto pendar peico vahe, pe Tūpa reroyasar ivi Acaya rupindar avei. Che Pablo, Tūpa remimbotar rupi Jesucristo apóstol aico. Aicuachía che ñehe pëu. Co yande rivri Timoteo avei omondo omahenduhasa pëu.

² Tapeipisi catu yande Ru Tūpa, yande Yar Jesucristo porovasasa avei pe reco tupri água.

Pablo paraisu agüer resendar

³ Yamboeteño itera yande Ru Tūpa. Ahe niha yande Yar Jesucristo Ru secoi, ahe yande paraisuereco vahe iyavei ombou vahe yande mboviha água yepi.

⁴ Ahe niha yande mbovihaño opacatu yande paraिसusa pipe, yande avei evocoyase yaicatura ava iparaisu vahe mboviha água yuvireco. Êgüe ehi eté Tūpa imbou vihasa yandeu, ahe avei yande yamondora yuvireco chupe.

⁵ Esepia, inungar Cristo imombaraisupri secoi, êgüe yahe aveira imombaraisupri yaico yaicose sese. Cristo sui avei rumo oime itera vihasa yandeu.

⁶ Ore paraisu pe mboviha água 'toñepisiro yuvireco' ore yapave. Iyavei Tūpa ore mboviha pe mboviha água avei. Supi evocoyase pe peñemosañora mbegüe rupi ore paraisu agüer nungar tupri pe recose.

⁷ Ore oroyeroya ité Tūpa pe pitivií água rese. Esepia, oroicua ore paraisu agüer nungar tupri peico, êgüe peye avei peipisi ore vihasa Tūpa suindar.

⁸ Che rivireta, opomomahenduha pota mara orohe oroico ivi Asia rupi. Ore recoãhasa yavai vahe ité oime aheve oreu. Ndorocatu iri eté oroñemoso ore pīratañhise chupe, seni orepihañemoñeta: "Yamanoño itera co mbahe-mbahe tēi pipe" orohe viña.

⁹ Supi eté oromoha ore cañi tēi água viña, êgüe ehi rumo oreu oroyeroya catu água Tūpa rese, ndahei oreyese tēi. Esepia, ahe oporombogüerayevi vahe secoi.

¹⁰ Ahe niha ore repi ore mano rãgüer sui, ore repi aveira curi evocoi nungar mbahe tēi sui. Supi eté oroyeroya viteño ité sese. Ahe ité niha ore repi viteño itera mbahe-mbahe tēi sui,

¹¹ pe ore pitiviise peye pe yeroqui pipe. Ahese setá, "Aviye ndeu" ehira yuvireco Tūpa oporopitiviisa ombou vahe rese oreu setá yeroquisa sui.

Mbahe sui Pablo ndosoi Corinto ve

¹² Oime mbahe ore mboviharete vahe: ore piha pipe ité oroicua oroico tupri Tūpa suindar ore reco catuprisa pipe, ore pihañemoñeta tuprisa pipe avei co ivi pipendar ava rembiepiave, pe rembiepiave avei eté. Tūpa porovasasa pipe niha êgüe orohe, ndahei ava co ivi pipendar mbahecuasa pipe tēi.

¹³⁻¹⁴ Esepia, che ñehe aicuachía vahe imondo pëu, aicuachía ñepei reseve pe yeroqui tupri água, pe senducua tupri água avei no. Iyavei ore cua revo chíhi peye cute. Acoi yande Yar Jesús yevise curi, ahese peyembovihara ore rese, inungar ore oroyembovihara pe rese.

15-16 Sese yipindar supi eté che pihañemoñeta aso vaheṛā ñuvirío yupagüer pe repia, pe mbovîha catu āgua viña. Ēgüe ahe ité, che pihañemoñeta pe pîri rane che so āgua che guatasa rupi Macedonia ve. Ichui ayevi pota iri pe pîri viña, ipare pe che pîtivimira peye ivi Judea rupi che so āgua rese viña.

17 Ndachepihañemoñeta voiño tēi che so āgua, ndahei iporombopa serai vahe aico “che co mbahe ayapora” ehi tēi vahe, ipare rumo nomboavîyei eté.

18 Tūpa rumo oicua ore ndahei, “Avîye” ore he voisa pēu, ahe pîpeve avei, “Anî” ore hesa.

19 Esepia, Tūpa Rahîr Jesucristo avei ñepeï reseve vahe ité yayeroyá vahe sese. Ahe secocuer niha oromombehu oroico pēu, che, Silvano, Timoteo avei.

20 Esepia, opacatu Tūpa remimombehugüer imboavîyesa sese. Sese niha serer pîpe, “Ēgüe tehi” yahe Tūpa upe imboeteisave.

21 Tūpa niha opacatu yande momirata seseño ité yande reco āgua, yande poravo avei.

22 Güerer omondo yande rese ‘cheu nara’ oyapave. Ombou avei oEspîritu yande pîha pîpe ‘ipîpe toicua che remimombehugüer rupi tupri ité mbahe amondora chupe yuvîreco curi’ oyapave.

23 Tūpa niha oicua acoi ndayevisse Corinto ve pe pîri, ēgüe ahe pēu mbahe avîye āgua rese.

24 Ndahei opocuai pota mbahe pe rembieroyarā rese. Esepia, pe Tūpa rese pe yeroyasa pîpe peyemovîracuaño ité Cristo rese. Ore rumo oroipota pe pîtivîisa pe yembovîha āgua.

2

1-2 Co rese ndaso catu iri pe pîri. Esepia, che aso irise pe pîri ndopombovîha catui chira viña, ¿ava vo evocoyase che mbovihara viña? Pe ité niha che mbovîhasar peico.

3 Sese che aicuachía ñehesa ipîrata vahe pēu cuese. Esepia, ndaipotai eipeve che sose, che mbovîhaēhi āgua peye. Pe rumo iya ité che mbovîha catura peye viña. Che ayeroya ité opacatu pe rese avîharetese, pe avei evocoyase opacatu pevîharetera che rese.

4 Supi eté che aicuachiasse che ñehhe pēu, che ae ayepihamboasi ité, ayaseho avei. Esepia, aicuachía vahe pēu ndahei pe mbovîhaēhi āgua, che rumo aicuachía ‘toicua che guaisu eteprisa yuvîreco’ che yapave pēu.

Oime ñerosa ava upe mbahe sembiavi rese

5 Acoi yande rivri omoime uca vahe vîharēhisa co mbahe tēi apo pîpe, ndahei che güeraño ndache mbovîhai, pe avei rumo seni opacatu ēgüe peye. Che, “Seni” aipo ahe ité pēu. Esepia, ndaipotai che ñehhe rasi āgua.

6 Co mbîa upe setá mbahe peiporara uca ité, evocoi rupive iya ēgüe peye chupe.

7 Co suive ité rumo peñerora chupe, peipîtivîi aveira. Esepia, aviyeteramo ovîharēhisa pîpe oyemocañi tēira.

8 Sese cûritei opomonguerēhi ité pe mboyecua iri āgua pe poroaisusa chupe.

9 Cuese ambuae che ñehhe aicuachía co che pe mbohesa resendar pēu pe recoāha āgua, “¿Oyapo itera pîha che remimombehu yuvîreco?” ahe pēu.

10 Cûritei cheñero avei che ava upe peñero vahecuer upe. Esepia, oimese que mbahe rese che ñero āgua, Cristo rovaque ēgüe ahe pe raisusave

11 Carugar yande mbopaēhi āgua. Esepia, yande yaicua tupri ité iporombopasa.

Tecua Troas ve Pablo nombohe catui opihañemoñetasa

¹² Ayepotase tecua Troas ve Cristo recocuer mombehu ãgua, oime ité yande Yar upe nara aheve che poraviqui ãgua viña.

¹³ Nambohe catui rumo che pihañemoñetasa. Esepia, ndasepiai eté yande rivri Tito. Sese, che, “Aviye” ahe pare ava Troas pendar upe, asoño ivi Macedonia rupi.

Cristo rese yaicose, yaicatu mbahe tēi recopi

¹⁴ Aviye yande Ru Tūpa upe. Esepia, yande Cristo rese yaico vahe yande renose oamotarēhimbar povri sui opacatu ava rembiepiave iyavei yande recocuer sui opacatu ava upe oicua uca güecocuer inungar mbahe siacua vahe yasētu vahe opacatu rupi.

¹⁵ Esepia, inungar itaisi siacua vahe opacatu rupi, ěgüe yahe avei yande Tūpa upe Cristo yande reropovēhese yaico ava ipisiropirā upe, ava ocañi tēi vaherā upe avei.

¹⁶ Ahe ava ocañi tēi vaherā upe evocoi ñehesa yaru vahe inungar cañi tēisa resendar; ava ipisiropirā yuvirecoi vahe upe rumo evocoi ñehesa ombou tecovesa. Yande ae tēi rumo ndayaicatu evocoi nungar mbahe apo.

¹⁷ Ore rumo ndahei setá ambuae ava nungar tēi oroico. Esepia, oromombehuse Tūpa Ñhengagüer, ndahei mbahe pisi ãgua tēi rese ěgüe orohe, ore rumo ore pihañemoñeta tuprisa pipe oromombehu co ñehesa Tūpa rovaque Cristo rese ore recosa pipe. Esepia niha, ore semimondo oroico.

3

Ñehesa Tūpa remimbotar ipiasu vahe resendar

¹ Ore aipo orohese, aviyeteramo pēu ndoyavi oroyecomboivate ai pota iri viña, ěgüe ndorohei rumo iyavei ndorosecai icuachía ãgua ava ñehesa aviye vahe ore recocuer resendar oromondo vaherā pēu. Ndorosecai avei aipo nungar cuachiar pe suindar, inungar co ambuae oyapo vahe yuvireco yepi.

² Esepia, pe ité inungar ore rembicuachía ore recocuer resendar ore oroipota vahe, ěgüe peye peico ore piha pipe. Esepia, opacatu ava pe reco tupri repiase, oicua ore poraviqui tuprisa pe pãhuve yuvireco.

³ Pe niha pemboyecua pe reco tupri pipe ore rembiapo Cristo porocuita pipe pe pãhuve. Sese pe inungar Cristo rembicuachía aviye vahe oromondo vahe ava upe, ahe rumo ndahei tinta pipe ité icuachiapri itape rese, Espíritu Tūpa oicové vahe suindar pipe rumo yapopri ava piha pipe.

⁴ Oroyeroya ité co rese Tūpa rese ore yeroyasa pipe. Cristo niha ěgüe ehi oreu.

⁵ Ndahei oreyesui tēi oroicatu co mbahe apo. Tūpa rumo ombou oreu opacatu co mbahe apo ãgua.

⁶ Ahe niha ombou opiratasa oreu güemimbotar ipiasu vahe rese poraviqui ãgua, ndahei Moisés rembicuachiagüer rupi oroporaviqui. Esepia, ahe imboaviyeñehisa pipe yamano tēira viña. Ahe rumo Espíritu Tūpa suindar pipe oroporaviqui. Esepia, ahe ombou tecovesa yandeu.

⁷ Co Moisés recosendar porocuita icuachiasa ité itape rese, iyavei Tūpa reco porañetesa pipe ou. Israelita evocoiyase Moisés rova rese nomahe catui eté yuvireco. Esepia, sendí iteanga, yepi sendigüer ogüe mbegüeño oso viña. Ahe Moisés recosendar porocuita ava upe manosa tēi güeru vahe iporañete ai eté yipindar oico viña.

⁸ ¡Cūrítei rumo iporañeté catu ité ñehesa Tūpa remimbotar ipiasu vahe resendar Espíritu Santo ombou vahe yandeu!

⁹ Supi eté yepe iporañete ai eté Moisés porocuaita acoi güeru vahe manosa yandeu viña, ¡co ñehesa ipiasu vahe rumo yande reco moingatu vahe iporañete catu ité ichui!

¹⁰ Esepia, co yipíndar porañete vahe ndahoyoyai ñehesa cūríteindar porañete catu vahe rese.

¹¹ Acoi mborocuaita yipíndar ndipocopiimi vahe virecose Tūpa reco porañetesa, co ñehesa piasu ipocopi vahe rumo iporañete catu itera ichui.

¹² Ore oroyeroya ité co ñehesa ipocopi vahe rese. Sese oroñehe ava upe ore siquiyeēhisa pipe ité.

¹³ Ore rumo ndahei Moisés nungar oroico. Esepia, ahe oyovapi turucuar pipe omu israelita sui güepiaēhi āgua ndogüe viteise sendigüer ichui aracahe.

¹⁴ Ēgüe ehi ahe ndosenducua ucai eté ndoyavii sovapisa vite vahe cūrítei, ēgüe ehi vite oyeroquise Moisés porocuaita icuachiapri yipíndar vahe pipe yuvireco. Ñomipri vahe nungar tēi chupe ahe senducuaēhi pipe. Esepia, Cristo güeraño ité oicatu sovapisa nungar rerocua ichui senducua uca āgua chupe.

¹⁵ Ēgüe ehi vite cūrítei, senducuaēhi pipe Moisés porocuaita pipe oyeroqui viteño tēi eté yuvireco inungar sovapisa vite vahe.

¹⁶ Supi eté que ava oyevise yande Yar upe, ahese ramo serocuasa sovapisa nungar ichui senducua tupri āgua.

¹⁷ Esepia niha, yande Yar Espíritu secoi. Ahe Espíritu ava rese secoise, ndahe iri mbiguai nungar yuvirecoi.

¹⁸ Sese opacatu yande ndahei Moisés oyeovapi vahe nungar yaico Tūpa porañetesa sendiyai vahe repiaēhi āgua. Yande rumo inungar yepiasa yamboyecua ité yande Yar porañetesa sendiyai vahe ava upe yaico. Yaico catuño ité yande Yar Cristo nungar ari yacatu rupi yepi. Esepia, ēgüe yahese, yareco catu-catu iri seco porañetesa yandeyese. Yande Yar rumo acoi Espíritu secoi vahe ēgüe ehi yandeu.

4

¹ Sese, “Ndorequerēhi iri” ndorohei eté. Esepia, Tūpa ore poravo ore paraisuerecosa pipe ore poraviqui āgua co ñehesa rese.

² Ore rumo oroseyapa opacatu mbahe tēi ore chī aisa, ndoromboyecuai vahe avei ore piha pipe sui; ndoroporombopa-mbopa tēi iyavei Tūpa Ñehengagüer ndorosecuñaro-ñaro tēi. Ore rumo oroñehe tupri mbahe supi tupri vahe rese güeraño. Ēgüe orohe opacatu ava upe Tūpa rovai ‘Supi eté, tēhi yuvireco opiha pipe’ ore yapave.

³ Yavaise co ñehesa písirosa resendar ore remimombehu renducua āgua, ahe ēgüe ehi ava ocañi tēi vaherā upe. Ahe aviye oyeovapi vite vahe.

⁴ Esepia, supi eté caruguar rerecuar inungar nomboesapisoi vahe ahe ava yuvireco, sese ndosenducua ucai chupe ‘toviroya eme ñehesa Poropísirosar Cristo resendar porañete vahe’ oyapave. Ahe niha Tūpa recocuer mboyecuar secoi.

⁵ Esepia, oromombehuse ñehesa pēu, ndahei oreyses tēi. Ore rumo, “Jesucristo yande Yar secoi” orohe oroico. Ore evocoyase mbiguai nungar tēi oroico pēu Jesús raisupave.

⁶ Esepia, Tūpa aipo ehi aracahe: “Toime tesapesa pītumimbi vahe resape āgua” ehi. Ahe avei osesape uca yande piha pipe ‘ipipe toicua che porañetesa che Rahir Cristo recocuer rese oime vahe yuvireco’ oya.

Yaicora Cristo rese yande yeroyasa pipe ité

⁷ Co tesapesa nungar porañete vahe Tūpa suindar rumo yareco yande retecuer pipe, inungar-ra que mbahe sepirusu vahe yapocatupri ivi mbahe-moinda ndipocopi vahe pipe tēi viña. Ipipe toicua opacatu ava yuvireco co pīratasa Tūpa suindar, ndahei oreyesuindar tēi.

⁸ Yepe mbahe-mbahe tēi oime opacatu rupi oreu viña, oimeño ité rumo ore sē āgua ichui. Yepe orepihañemoñeta-ñeta tēi mbahe rese, yande Yar rese ore pihañemoñetasa rumo ndoromocañi eté oreyesui.

⁹ Yepe ore reca-reca catu tēi ore amotarēhimbar yuvireco viña, Tūpa rumo ndore reyai eté; iyavei yepe ore reiti ore recopi āgua yuvireco viña, aní eté rumo.

¹⁰ Opacatu ore guatasa rupi rumo orovirecoño ité Jesús mara-mara tēi sereco agüer ore mano āgua oreyese, “Toyecua avei secocuer ore rese” ore hesave.

¹¹ Esepia, ore recove vitesese imboguaipri oroico ore mano āgua Jesús rese. Ēgüe orohe secocuer mboyecua āgua ore retecuer ndipocopi vahe rese.

¹² Evocoyase co ñehesa mombehu pipe ore manosa ore ropeña, ipipe sui rumo pesopeña tecovesa apirēhi vahe peico seroyasa pipe.

¹³ Icuachiapri aracahendar pipe niha aipo ehi: “Ayeroya ité Tūpa rese, ipipe sui añehe” ehi; ēgüe orohe avei ore, sese oroyeroya ité, ichui oroñehe.

¹⁴ Esepia, yaicua niha acoi Tūpa yande Yar Jesús ombogüerayevi vahe, yande mbogüerayevi aveira supive. Ipare oyoya guasu pe reseve oyeipive yande rerecora.

¹⁵ Co opacatu mbahe tēi oime vahe oreu, pēu mbahe aviye āgua rese niha ‘tovireco catu Tūpa porovasasa yuvireco; ipipe sui, Aviye ndeu, tehi setá catu ava imboeteisave yuvireco chupe’ ore yapave.

¹⁶ Sese orequerēhiño ité mbahe apo oroico pēu. Yepe ore rete ocañi pota tēi viña, ore recocuer rumo Tūpa ombopiasu-asuño ité ari yacatu rupi.

¹⁷ Esepia, co mbahe oroiporara vahe co ivi pipe, ahe ēgüe ehi raimi tēi vahe, ipare rumo opañora; ahe ichui rumo oimera mbahe tupri ivate catu vahe oreu ivave apirēhi orovireco vaheerā.

¹⁸ Sese ore ndorepihañemoñeta atii chira co ivi pipendar mbahe rese; ore rumo orepihañemoñeta mbahe iva pendar ndayasepiai vahe rese. Esepia, co mbahe yasepia vahe, ahe ēgüe ehi raimi tēi vahe; co mbahe rumo ndayasepiai vahe, apirēhi vaheerā ité.

5

¹ Yaicua niha yande retecuer ndipocopi vahe, inungar oi ndipocopi vahe avei. Sese imocañisase, aviyeño. Esepia, Tūpa opa omoingatu ambuae yande rete ndopai vahe ivave yandeu. Ndahei ahe ava rembiapo tēi.

² Supi eté yaicove vitesese co yande rete ndipocopi vahe rese, yande poāsese pipe yaipota ité yande rete iva pendar.

³ Aheve yande rete ipiasu vahe yarecose, ahesese ndahei chira yande hã nani tupri vahe nungar yuvirecoira.

⁴ Ēgüe ehi eté yande retecuer pipe vite yaicose, yande poāse yande viharēhisa pipe. Esepia, ndayaipotai yande hã nani tupri vahe nungar seco āgua, yande rumo yaipota yande retecuer ipiasu vahe, ndopai vahe.

Evocoiyase, “Tocañipa co mbahe ocañi tēi vaherā yande resendar tecovesa piasu, ndopai vahe rereco āgua” yahe.

⁵ Tūpa niha yande apo ‘na tehi yuvireco’ oyapave, ombou avei oEspíritu Santo yandeu ‘ipipe toicua opacatu yuvireco che amondo aveira co opacatu tecocuer ipiasu vahe chupe’ oya.

⁶ Sese niha yayeroyaño ité yepi; iyavei yaicuaño yande yaicove vitesse yande rete rese, ndayaico vītei eté ivave yande Yar piri.

⁷ Esepia, cūrītei yande Yar rese yeroyasa pīpe ité yaguata, ndahei mbahe yande rembiepia pīpe.

⁸ Yande rumo yayeroyaño ité sese, iyavei yaipota ité yande retecuer reya āgua yande Yar piri yande so āgua ivavē.

⁹ Sese yaseca yande Yar mboviha āgua yepi, que yaicove vitesse yande rete rese, anise que yasēse ichui.

¹⁰ Esepia, yande opacatu yañecuavēhera Cristo rovai iporandusave yaipisi vaheṛā ñepeī-peī mbahe yande rembiapocuer rupi mbahe aviye vahe, anise que mbahe naporai vahe yande rete rese yaico vitesse.

Ñehesa yande reco moingatusa resendar

¹¹ Ore niha oroicua yande Yar sui ore siquīye āgua imboyeroyasave. Sese orosāha ava pīhañemoñeta rerova Tūpa rese ipīhañemoñeta āgua yuvireco. Tūpa niha ore cua tupri, tapeicua avei ru ore recocuer.

¹² Ndorōñehēi pēu ore yemboivate ai āgua tēi. Ore rumo oroñehē pēu ‘toviharete catu ore rese yuvireco’ ore yapave. Ipipe sui peicatura ava gūmbiepia rese tēi oyemboivate ai vahe upe iñehē mboyevi āgua. Esepia, ahe ndahei ava pīha pīendar rese oyemboviha yuvireco.

¹³ Ndayaracuai vahe nungar ore rerecose amove pe pāhu pendar yuvireco. Tūpa upe rumo ēgūe orohe oroico. Yaracua vahe nungar rumo, ore rerecose peye, pēu mbahe aviye āgua rese ēgūe orohe.

¹⁴ Cristo poroaisusa, ahe ité ore reroquata catu. Esepia, supi eté ahe omano opacatu ava repirā, ipipe sui yaicua opacatu ava ocañi tēi vaheṛā yuvireco viña.

¹⁵ Cristo niha omano opacatu yande repirā. Yande yaicove vite vahe evocoiyase ndahe iri yandeyeupe nara tēi yaico; yande rumo yaico chupe nara ité. Esepia, ahe omano, ocuerayevi yande rese.

¹⁶ Sese, iya ité oreu ore pīhañemoñetaēhi iri āgua que ava rese, ava tēi pīhañemoñetasa rupi. Yepe yipīndar inungar ava ivi pīendar tēi ēgūe orohe ore Cristo rese ore pīhañemoñeta oroico viña, cūrītei rumo ēgūe ndorohe iri orepīhañemoñeta sese.

¹⁷ Evocoiyase acoi ava Cristo rese ité secoi vahe, ahe secocuer ipiasu vahe ité; ndipo iri eté secocuerai yipīndar vahe sese. Opacatu ité oyembopiasu iri.

¹⁸ Co mbahe opacatu Tūpa oyapo yandeu, ahe niha Cristo rembiapo sui yande recocuer moingatu oyeupe nara. Ipape oreu avei ombou co ñehesa mombehu āgua ambuae ava upe secocuer moingatu āgua avei.

¹⁹ Aipo oyapave aipo ehi: Tūpa ombou Guahir Cristo co ivi pīpe ava recocuer moingatu āgua ‘toyevi cheu’ oya; ipipe sui avei ahe ava angaipagüer omocañi yuvireco ichui. Ore evocoiyase ore cuai ahe ñehesa ava recocuer moingatusa resendar mombehu āgua ava upe.

²⁰ Ore evocoiyase Cristo porocuita rupi oroñehē vahe oroico, inungar Tūpa ité oñehera pēu viña. Sese, “Peyevi Tūpa upe, ahe pe recocuer moingatura oyeupe nara” orohe Cristo rer pīpe pēu.

21 Yepe Cristo ndoyapoi eté angaipa, Tūpa rumo vireco uca angaipa viyar nungar yande repirā yande reco īvi āgua Cristo rupi yande guatase.

6

1 Ore pe mboetasa co Tūpa upendar mboraviqui resendar ore recosa pipe: “Peicua catu, pemocañi tēi rene Tūpa porovasasa peipisi vahe” orohē pēu.

2 Esepia, Tūpa aipo ehi icuachiapri aracahendar pipe: “Acoi ari aviye vahe pipe niha che asendu pe yeruresa; iyavei ahe ari poropisirosa pipe opopitivi” ehi.

3 Ore niha ndoromboyecuai ore reco ai ava pāhuve. Esepia, ndoroipotai que ava Tūpa upe ore poraviquisa rese iñehe rai āgua yuvireco.

4 Ore rumo oromboyecua ité Tūpa rembiguai ore recosa. Esepia, ore reco mbegüesa pipe oroñemosañi mbahe-mbahe tēi upe yepe ipane mbahe oreu viña, iyavei mbahe yavaise;

5 Ēgüe orohē avei ore nupa-nupase, ore roquendase avei iyavei omonguerēhise ava rehii ore amotarēhi āgua yuvireco. Oroyapo avei mboraviqui ipirata vahe; amove ndoroquei eté, setá rupi ndoreriepoi tēi avei.

6 Oromboyecua avei ore reco maranehisa, ore mbahecuasa supi eté vahe, ore reco mbegüe tuprisa, yeaisusa orovireco avei no. Ēgüe orohē ité niha Espiritu Santo pīratasa pipe, ore poroaisusa supi eté vahe pipe avei.

7 Ore remimombehu supi eté vahe pipe iyavei Tūpa pīratasa pipe avei oroico. Ore niha ore reco tupri pipe oroiscopī mbahe-mbahe tēi. Ipīpe avei oroyoepi.

8 Amove ava ore mboetei ai, amove rumo oñemoiro yuvireco oreu; amove avei oñehe tupri ai ore rese yuvireco, ipare rumo iñehe-ñehe tēi ore rese yuvireco yepi no. Iyavei amove oporombopa tēi vahe nungar ore rereco yuvireco, yepe oromombehu tēi mbahe supi eté vahe viña.

9 Amove ndicuasai vahe nungar tēi ore rereco yuvireco, icuapri ité tie oroico viña; amove ore yuca seni yuvireco, oroicoveño ité rumo; iyavei amove ore mombaraisusa catu tēi, ndore yucai eté rumo ipipe yuvireco.

10 Amove ndoyavii ndoroviñai vahe yuvireco chupe, ore rumo oroviñaiño ité yepi; iyavei yepe ndoyavii iparaisu vahe oroico viña, ore rumo oromondo catuño ité mbahe aviye vahe ava eta upe. Yepe ndoyavii ndorovirecoi eté mbahe viña, opacatuño ité rumo mbahe aviye vahe Tūpa suindar oime oreu.

11 Che rivireta Corinto pendar, ore ñehesa pipe opacatu mbahe oromboyecua pēu iyavei pe raisu āgua orovireco ore piha pipe tuvichá pe rese.

12 Ndorehāpisi pe rese pe raisu āgua; pe rumo Ēgüe ndapeyei ore rese.

13 Che niha opovireco che rahir nungar; pemboyevi avei catu ore pe raisusa oreu.

Tūpa oicove vahe rēta nungar ité yaico

14 Ndapeyovaichoi chira ava Tūpa ndoviroyai vahe rese. Esepia, ndoyoyai eté pe pihañemoñetasa. Ēgüe ehi eté teco īvisa ndoyoyai teco rai rese inungar tesapesa ndoyoyai pītumimbi vahe rese.

15 Ndahoyoyai eté niha Cristo pihañemoñetasa Carugar pihañemoñetasa rese yuvireco. ¿Oyoya tie Tūpa reroysar Tūpa reroysarēhi rese yuvireco? ¡Aní eté!

16 ¿Oyoya tie mbahe rahanga tēi Tūpa rēta rese? Yande niha Tūpa oicove vahe rēta nungar ité yaico. Ahe ité niha aipo ehi icuachiapri pipe aracahe:

“Che aicovera seseve iyavei aguatará ipãhu rupi yuvireco; che avei aicora iTüpa ité; ahe evocoiyase cheundar yuvirecoira” ehi.

¹⁷ Iyavei aipo ehi:

“Sese peyepipi evocoi nungar ava naporai vahe sui; peyemboyai rene que mbahe naporai vahe rese.

Ahese che opopisira.

¹⁸ Che aicora pe yesupa; pe evocoiyase peicora che rahir, che rayri avei' aipo ehi yande Yar güeco pīratasa pipe” ehi.

7

¹ Che rivireta, che rembiaisu, co Tüpa remimombehu imboaviyepirã yandeu. Sese yande yamoiñgatu tuprira yande recocuer chupe yarecoëhi ägua yande retocuer iyavei yande espíritu mbahe tēi pipe. Iyavei Tüpa mboeteisa pipe yasecara yande reco catupri ägua chupe nara güeraño ité.

Corinto pendar ava recocuer recuñarosa resendar

² ¡Che pisi peye pe piha pipe! Ndoroyapoi niha mbahe tēi que ava upe, ndoromomaraí eté que ava recocuer, ndoroporombopai avei.

³ Ndahei pe recocuer rese che ñehe raisave aipo ahe pēu. Supi eté yipindar, “Che pihaive ité opoaisu, pēu nara avei aicove, amano aveira pēu” ahe acoi pēu cuese.

⁴ Ayeroya ité pe rese, pe rese avei aviharete. Che paraisu pãhuve ayemonguerēhi iyavei ayembovihareteño.

⁵ Ore yepotasa suive rumo Macedonia ve, ndopituhui eté mbahe tēi ore sui; oime viteño ité rumo mbahe-mbahe tēi oreu opacatu rupi: oime ore amotarēhimbar iyavei oime ore yepihamondiisa.

⁶ Tüpa rumo, ava ndoyemonguerēhi vahe, omonguerēhi iri yepi. Ahe ore monguerēhi catu iri Tito yepotase.

⁷ Ndahei rumo Tito yepotaseño oroviharete, ahe avei oyemboviha guasu pe rese. Ahe aipo ehi oreu pe aipo che repia pota ité peye yepi; omombehu avei che rese pe viharēhi agüer cheu, pemahenduhaño ité aipo che rese pe che raisusave yepi. Aipo nungar renduse ayembovihá catu.

⁸ Yepe che ñehe aicuachía vahecuer imondo pēu ndape mbovihai viña, cheu rumo aviyeño cūrítei. Yipindar rumo ayepihamboasi aicuase che ñehe tasí iteanga vahe pēu; chíhi rupi tēi rumo ndapevihal peyeroqui pare sese.

⁹ Cūrítei che avihareté. Ndahei rumo pe viharēhisa rese ägüe ahe. Esepia, co pe viharēhisa sui pemboasi pe angaipa Tüpa upe pe yevi ägua, evocoi nungar Tüpa oipota. Evocoiyase ore ñehe ndoyapoi mbahe naporai vahe pēu.

¹⁰ Esepia, co nungar viharēhisa Tüpa oipota vahe yande angaipa mboasi uca, chupe yande yevi ägua. Ipipe sui niha yañepisiro yande pihañemoñeta rovaehisa pipe. Co ivi pipendar tēi viharēhisa rumo manosa tēi vireco yandeu.

¹¹ Pe rumo peñemosañe pe viharēhisa upe; ahe aviye Tüpa upe. ¡Pesepia ru co mbahe aviye vahe pe recocuer pipe oime vahe evocoi Tüpa remimbou pe viharēhisa sui cute! Supi eté rumo, peyapisaca iyavei pe querēhisa pipe peyoepi, pemboasi pe piha pipe ité co mbahe tēi oimese pe pãhuve, iyavei peyembosiquiye peico. Ichui che repia pota ité peye, iyavei pequerēhi ité mbahe moingatu ägua. Sese pemboyepipi ité evocoi mbahe tēi aposar peyesui. Che aicua cute pēu ndahei pe piha rupi co nungar mbahe tēi oimese.

¹² Cuese aicuachiasse evocoi che ñehe imondo pëu, ndahei ava mbahe tēi aposar reseño, ndahei avei mbahe tēi oiporara vahe reseño, che rumo aipota catu peicua pe ore raisusa pereco vahe oreu nara Tūpa rovaque.

¹³ Co rese ore oroyemboviharate.

Iyavei oroviha catu Tito yembovihasa repiase. Esepia, pe avei niha opacatu pemboviha catu ité pe recocuer pipe.

¹⁴ “Co Corinto pendar ava aviye ité” ahe Tito upe pe mombehu cuese. Che ñehe pe resendar aviye ité, ipipe nachi eté. Inungar oromombehu mbahe supi tupri vahe pëu yepi; inungar tupri avei supi eté mbahe oromombehu vahe pe rese yeroyasave Tito upe.

¹⁵ Iyavei cūritei ahe pe raisu catu ité pe rese omahenduhase opacatu pe poreroyasa rese. Iyavei peipisi tupri ité imboetisave sereco.

¹⁶ ¡Ayeroya ité pe rese, sese aviha ité!

8

Ava querēhisa porerecosa mondo āgua Jerusalén pendar upe

¹ Che rivireta, cūritei che amombehu potami pëu mara ehi mbahe tupri apo Tūpa ava viroyasave upe ivi Macedonia rupi.

² Yepe ahe ava recocuer yavai eté yuvireco chupe secoāhasa pipe viña, ovihareteño rumo ipipe yuvireco; yepe iparaisu vahe pāve tēi, iporereteño ité rumo yuvireco.

³ Supi eté oquerēhisa pipe omondo ité ocatugüer rupi; amove oseca iri mbahe güemimbotar rupi yuvireco.

⁴ Ahe, “Ore avei catu toroipitivi ambuae Tūpa reroyasar” ehi yuvireco.

⁵ Ahe rumo oñocua iri ore pihañemoñetasa yuvireco. Yande Yar upe rane oyemondo. Ipare Tūpa remimbotar rupi ēgüe ehi avei oreu yuvireco.

⁶ Evocoiyase ore aipo orohe Tito upe pëu: “Tomboyeapi iri co porerecosu monuha āgua ava upé” orohe. Esepia, yipindar ahe osepe pe pāhuve, ahe pe pitivi imboipi āgua.

⁷ Aicua peyapo tupri ité opacatu co ambuae mbahe: peyeroya tupri ité yande Yar rese, pemombehu tupri ai Tūpa ñehesa, pereco ité Tūpa suindar mbahecuasa, pequerēhi ité Tūpa upe mbahe apo āgua iyavei ore raisu ité peye. Evocoiyase ēgüe peye aveira co nungar poroaisusa apo.

⁸ Ndahei pe cuaisa pipe aipo ahe pëu, che rumo ‘toicua ambuae ava rembiapo oquerēhisa pipe oyapo vahe yuvireco’ che yapave. Sese niha peicuara, supi eté vahe pīha pe poroaisusa.

⁹ Peicua niha pe yande Yar Jesucristo poroaisusa. Yepe ahe mbahe yar secoi viña, opa rumo oseya omabahe pe recocuer rese; iparaisu pipe sui niha pe iba pendar mbahe pereco.

¹⁰ Pëu mbahe aviye āgua che añehe co nungar mbahe rese. Cuese ambuae araviter pe niha yipindar pemboipi co mbahe apo. Ahe niha pe querēhisa pipe peyapo.

¹¹ Cūritei pemboaviye catu pe porerecosu pe querēhisa yipindar pe reco vahe pipe; pemondoñora mbahe peicatugüer rupi.

¹² Esepia, acoi que ava omondo pota vahe mbahe, Tūpa oipisi ahe iporerecosu que mbahe virecomi vahe; ahe rumo ndoporandui mbahe ndayarecoi vahe rese yandeu.

¹³ “Toyemombaraisu ava pitivisa pipe yuvireco” ndahei rumo pëu.

¹⁴ Cūrítei mbahe pe rembiereco eta pipe peipĩtívii catu ambuae ava ipane vahe mbahe yuvireco chupe. Virecomise mbahe, ahe avei pe pĩtíviiira yuvireco pẽu mbahe ipanese. Evocoyase pe recocuer oyoya tupri itera.

¹⁵ Inungar Tũpa ñehe mombehusar aipo ehi icuachiapri pipe aracahe: “Acoi omonuha ati vahe mbahe, ndasumbãrei eté mbahe chupe; iyavei acoi moviromi tẽi mbahe omonuha vahe, nipãnei mbahe chupe” ehi.

Pablo omondo Tito indug̃er reseve Corinto ve

¹⁶ Aviye Tũpa upe ombopihañemoñeta Tito pe rese inungar che pihañemoñetasa pe rese yepi.

¹⁷ Ahe viroya ité che ñehe. Gũemimbotar rupi eté rumo iquerẽhi oso ãgua pe repia.

¹⁸ Supi oromondo yande rĩvri, ahe opacatu ambuae Jesús reroyasar oicua iporavĩqui tupri aise ñehesa pĩsirosa rese yuvireco.

¹⁹ Sese opacatu oiporavo yuvireco ore rupi iguata ãgua ore pĩtívii vaherã avei co porerecosã reraso ãgua. Ore ěgũe orohe oroico yande Yar mboetei ãgua rese ‘toicua ore querẽhisa pipe ité oroporopĩtívii yuvireco’ ore yapave.

²⁰ Ore ndoroipotai que ava oñehe tẽira ore rese yuvireco co porerecosã monuhasa pipe sui.

²¹ Esepia, ore oroyapo pota mbahe aviye vahe, ndahei Tũpa rovaque gũeraño, opacatu ava rembiepiave avei.

²² Supi avei oromondo ambuae yande rĩvri. Ahe omboyecua ité oreu oquerẽhisa opacatu mbahe gũembiapo pipe. Ahe cūrítei iquerẽhi catu ité. Esepia, oyeroya ité pe rese.

²³ Acoi oporanduse que ava Tito rese yuvireco pẽu, “Ahe oyoya Pablo rese oporavĩqui vahe pe pĩtívii ãgua” peyeñora. Acoi oporanduse avei ambuae yande rĩvri rese yuvireco pẽu, “Ahe ambuae Jesús reroyasareta remimbou Cristo mboeteisar yuvirecoi” peyeño aveira chupe.

²⁴ Sese, pe recocuer cua ãgua, pemboyecua catu pe poroaisusa supi eté vahe chupe yuvireco. Evocoyase toviroya ité che ayeroyase iyavei ayembovihase pe recocuer rese yuvireco.

9

Porerecosã imonuhapri Jesús reroyasar upe

¹ Porerecosã imonuhapri Jesús reroyasar upe nara rese rumo nañehe iri pẽu.

² Esepia, che aicua pequerẽhi ité ipĩtívii ãgua. Evocoyase che viharetesa pipe Macedonia iguar Jesús reroyasar upe aipo ahe yepi: “Acaya iguar, ahe oyemoingatu voi eté ambuae Jesús reroyasareta pĩtívii ãgua cuese ambuae araviter suive yuvireco” ahe yuvireco chupe. Evocoyase pequerẽhise ité ipĩtívii ãgua, ahese setaño ité oyemonguerẽhi yuvireco.

³ Che rumo amondo co yande rĩvri yuvireco pẽu cūrítei ‘ěgũe tehi tẽi eme che ñehesa aviye vahe sesendar yuvireco’ viya pẽu. Pe yemoingatu tupri ãgua ité aipo ahe pẽu;

⁴ aní acoi arasose Macedonia pendar cheyeupi, sembiepiave ndapeyemoingatu vitei chira peico. ěgũe peyese ore mochi guasu uca tiẽtera peye. Esepia, che ayeroya ité pe rese. Pe avei evocoyase pechĩra.

⁵ Sese che pihañemoñeta yipĩndar añehe co mbosapi yande rĩvri upe yuvireco, ahe ranei ore renonde yuviraso ãgua pe piri pe pĩtívii ãgua co

porerrecosa aviye vahe monuha āgua rese, acoi cuese pe remimombehugüer rupi. Evocoiyase ahe pe porerrecosa pe remimonuha opara pemoingatu tupri ité pe avagüer mboyecua āgua, ndahei chira rumo pe recatēhisa pipe.

⁶ Peyemomahenduha co rese: acoi noñoti atiimi vahe mbahe, chupe moviromi tēi avei iha; acoi oñoti ati vahe rumo mbahe, ahe setá catu avei iha chupe.

⁷ Ñepei-pe iya opihañemoñetasa rupi omondora oporerrecosa Tūpa upe yuvireco, ndahei chira opiha vīracuasa pipe tēi iyavei ndahei chiaveira ambuae ava ocuai pīratasa pipe tēi. Esepia, Tūpa osaisu ava oviharetasa pipe omondo vahe oporerrecosa chupe.

⁸ Tūpa niha oicatu opacatu mbahe aviye vahe mondo āgua pēu ari yacatu rupi pereco vaheerā opacatu mbahe ipane vahe pēu iyavei sumbirer pipe opacatu ambuae mbahe aviye vahe rese pe poropitīvii āgua.

⁹ Inungar icuachiapri pipe aipo ehi: “Ahe iporereco ai iparaisu vahe rese yepi. Ahe mbahe aviye vahe sembiapo nocañii chietera” ehi.

¹⁰ Tūpa niha ombou mbahe rāhii ava remitira, mbahe semihura avei. Sese ombou catura mbahe pēu iyavei ombouvicha catura pe rembiapo aviye vahe ava pītīvii āgua.

¹¹ Tūpa ombou catura opacatu mbahe pe rembierecorā ava upe imondo catu āgua pe avasa pipe. Ore orovirasose porerrecosa pe remimbou yande rivireta upe, ahe evocoiyase, “Aviye ndeu” ehira Tūpa upe yuvireco.

¹² Esepia, co pemondo vahe yande rivireta pītīvii āgua, ndahei peipītīvii mbahe ipane vahe rese güeraño, ichui avei niha, “Aviye Tūpa upe” ehira yuvireco.

¹³ Ahe evocoiyase omboeteira Tūpa yuvireco. Esepia, co pe poropitīviiisa pipe pemboyecua itera pe Cristo ñehe reroyasa peico. Ahe avei omboeteira Tūpa yuvireco. Esepia, pe pemondoño itera mbahe pe porerrecosa chupe iyavei opacatu ambuae ava upe.

¹⁴ Evocoiyase ahe ojeroquirá pe rese iyavei pe raisu etepirira yuvireco. Esepia, Tūpa pe pītīvii eté oporovasasa pipe.

¹⁵ ¡Aviye Tūpa upe! ¡Esepia, ahe ombou mbahe tuvichá vahe aviye catu vahe yandeu, ndayaicatui vahe mombehu tupri āgua!

10

Pablo cuaita apóstol seco āgua

¹ Che Pablo añehe Cristo poroaisusa, seco asiēhisa pipe avei pēu. Amove ava pe pāhu pendar, “Seco mbegüemi tēi yande pāhuve oicose, amombri güecose rumo oñehe pīratá iteanga” aipo ehi tēi yuvireco cheu viña.

² Che rumo asose pe repia, ndaipotai che pīratasa mboyecua āgua pe pāhu pendar upe. Amove rumo ava pe pāhu pendar ipihañemoñeta: “Oyapo mbahe co ivi pipendar pihañemoñetasa rupi tēi” ehi yuvireco cheu. Sese che ayemoingatuño ité evocoi nungar ava upe añehe pīrata vaheerā.

³ Supi eté, yepe co ivi pipe oroicove viña, ore rumo ndoroyapoi mbahe ava co ivi pipendar rembiapo nungar.

⁴ Esepia, ore yoepisa ndahei ava co ivi pipendar yoepisa nungar; orovireco rumo Tūpa pīratasa mbahe tēi seco pīrata vahe recopi āgua ava aracuasa tēi recopi āgua avei.

⁵ Ahe ipipe ore opa orosecopi yepoepi-episa iyavei opacatu semira-mira tēi vahe güeco ivate aisa pipe ndoicua uca potai vahe Tūpa recocuer ava upe.

Iyavei opacatu ava pihañemoñeta raisa orosecopi Cristo reroya tupri ãgua yuvireco.

⁶ Iyavei ore oroyemoingatu ité opacatu ndiporeroyai vahe recocuer reroyi ãgua. Pe rane rumo peroya tupri.

⁷ Pe rumo pemaheño tēi ahe ava recocuer rese. Acoi ava pe pãhu pendar oicua vahe Cristo rese güecosa, toicua tupri avei ore Cristo rese ore recosa yuvireco.

⁸ Yepe ayecomboivate che mborerecuasa rese pēu viña, ipipe rumo nachí eté. Esepia, yande Yar ombou mborerecuasa cheu pe recocuer moviracua tupri ãgua, ndahei rumo pe recocuer momara ãgua.

⁹ Aní chira, “Pablo yande mbosiquiye pota güembicuachía pipe” peye cheu.

¹⁰ Esepia, amove ava pe pãhu pendar, “Oñehe oicuachía vahe ombou yandeu, ahe ipirátá, yavai avei yandeu; ahe ité rumo aní angai vahe secoi yande pãhuve iyavei ñehe ãgüe ehi tēi vahe” ehi yuvireco cheu.

¹¹ Toicua catu ru yuvireco: eipeve oroso irise, inungar amombehu che rembicuachía pipe amombri che recose, ãgüe ahe tupri aveira yapo pe pãhuve.

¹² Ndoromboyoyai eté ore recocuer ava oyese tēi oñehe vahe recocuer rese. Esepia, omboyoyase oyese, ndoyapisacai eté yuvireco.

¹³ Ore rumo ore remimombehu pipe ndoroyapisasai chietera ore cuaita ore yeecomboivatesa pipe. Tūpa rumo güemimbotar rupi ombou ore poraviqui ãgua oreu, eipeve pe rese ore poraviqui ãgua avei.

¹⁴ Ore rumo ndoroyapisasai ore cuaita mombehusa icuachía pēu. Esepia, supi eté ore ranei eté oroico pe pãhuve, ore ranei avei oroviraso Cristo resendar ñehesa imombehu pēu.

¹⁵ Ndoroyapisasai avei ore ñehe pipe ambuae ava poraviquisa sui tēi. Ore rumo, orosãro ore oroporaviqui catu vahe rã pe pãhuve Tūpa rese pe yeroyasa rupi. Ndoroyapisasai avei rumo ore cuaita.

¹⁶ Iyavei orosãro ñehesa pĩsirosa resendar mombehu ava amombri catu yuvirecoi vahe upe. Ndahei chira rumo ambuae ava poraviqui agüer rese tēi oroyecomboivate oroico.

¹⁷ Acoi ava oyecomboivate pota vahe, toyecomboivate catu yande Yar rese.

¹⁸ Esepia, acoi ava “che aico tupri” ehi vahe ndahei ahe osē tupri güecoãhasa sui yande Yar rovaque; “Aviye ité co mbia” ehise rumo yande Yar chupe, ahe osē tupri güecoãhasa sui.

11

Pablo iyavei apóstol angahu tēi yuvirecoi vahe

¹ Peñemoso iriñomi tēira cheu co che ñehe ndayaracuai vahe nungar pipe che ñehese!

² Esepia, che cherecatēhi ité pe rese, ahe tecatēhisa ou cheu Tūpa sui. Che aipota Cristo upe opomondo vahe rã pe reco maranehisa pipe, inungar cuñatai ndaseco marai vahe imondopri cuimbahe upe imenda ãgua.

³ Che rumo asiquiye co mbahe sui, inungar mboi ombopa Eva oporombopasa pipe, aviyeteramo Carugar pe mbopa aveira pe pihañemoñetasarova ãgua Cristo mboeteisa supi eté vahe sui.

⁴ Esepia, peñemosañe ava oñehe vahe pēu ambuae Jesús rese ndoyoyai vahe ore remimombehu rese. Ichui peipisi pe querēhisa pipe ambuae espíritu peipisi vahecuer sui. Iyavei ambuae ñehesa pĩsirosa resendar peipisi avei ndoyoyai vahe ore pēu oromombehu vahe rese.

5 Che rumo namohai eté ivi coti catu tēi aicora evocoi supi peguata vahe apóstol yemboivate ai tēi vahe sui.

6 Yepe ndayembohei che ñehe tupri āgua ité, che rumo areco che mbahecuasa, ahe oromboyecuaño ité opacatu ore rembiapo pipe pe rembiepiave.

7 Ndamombehui eté niha ñehesa pīsirosa resendar pe cheu imboepi āgua; pe recocer mboivate catu āgua rumo Tūpa rovaque ēgüe ahe che reco yemomnisa pipe. ¿Mbahe tēi pīha ayapo ēgüe ahese pēu?

8 Aipisi ambuae ava Jesús reroyasar sui guarepochi, pe recocer rese che poraviqui āgua.

9 Iyavei acoi aicose pe pāhuve, ipane avei mbahe cheu. Ndopomañecoi eté rumo; yande rivri ivi Macedonia pendar yugüeru vahe ombou mbahe ipane vahe yuvireco cheu. Ēgüe ahe che pepoísupave pe mañecoēhi vichico. Ndopomañecoi chietera niha mbahe ipanese cheu.

10 Supi eté aicua supi tupri vahe mbahe Cristo suindar. Evocoiyase supi eté avei che aicua ndipoi chietera que ava ivi Acaya rupi virocua vaherā co che viharetasa che sui yuvireco.

11 ¿Mbahe rese pīha aipo ahe pēu? ¿Pe raisuēhisave pīha? ¡Tūpa rumo oicua che pe raisusa!

12 Ayapoño itera rumo co mboraviqui cheu imboepiēhisa pipe vichico co ambuae pe pāhu pendar ava pe mbopaēhi āgua yuvireco. Esepia, che nungar yuvirecoi pota tēi viña.

13 Ahe rumo ndahei apóstol supi tupri vahe yuvirecoi, ahe oporombopa tēi, “Ore apóstol oroico” ehi tupri tēi yuvireco.

14 Yaicua niha Carugar rerecuar oporombopa. Esepia, oyeapo inungar Tūpa rembiguai amove.

15 Sese yaicua avei Carugar povri pendar oporombopasa pipe oyeapo inungar Tūpa ñehe mombehusar yuvireco. ¡Ahe chupe rumo oimera Tūpa ñemoirosa mbahe sembiapocuer rupi curi!

Pablo oiporara mbahe-mbahe tēi apóstol güecosa pipe

16 Aipo ahe iri pēu: tipo eme ava “ndayaracuai” ehi vahe cheu. Acoi, “Ēgüe ehi oico” peyese cheu, tañehēño ayase ndayaracuai vahe nungar, che avei evocoiyase tayeecomboivateño vichico.

17 Ndahei rumo yande Yar che cuaisa pipe aipo ahe, che aracuaēhisa nungar pipe rumo aipo ahe che yemboivate aisa pipe.

18 Esepia niha, setá iteanga ava ahe ae tēi oyemboivate ai güecocuer aviye angahu vahe tēi pipe. Sese che avei ayemboivatara.

19 Esepia, yepe pe imbahecua vai vahe nungar peico, pemboyoyá catu pe querēhisa pipe ava ndayaracuai vahe.

20 Pe niha pemboyoyaño acoi que mbiguai tēi nungar pe rereco vahe, que mbahe pe rembiereco sui tēi oicove vahe, que pe mbopa tēisar, pe reroirosar, que pe rova pete-petesar avei.

21 Che chīsa pipe aipo ahe co imombehu, ¡ore reco mbegüe etepri evocoi nungar apo āgua pēu!

Acoi oñehese ambuae ava oyeupendar mbahe rese oyemboivate aisa pipe, che avei evocoiyase ēgüe ahera. Aipo ahese rumo aviye ndayaracuai vahe nungar aico.

22 Ahe, “Che hebreo aico” ehise yuvireco, che avei ahe aico; “Che israelita aico” ehise, che avei ahe aico; “Che Abraham suindar aico” ehise yuvireco, che avei ahe ichuindar aico.

23 “Che Cristo rembiguai aico” ehi yuvireco, che rumo sembiguai catu aico ichui yuvireco, aipo añehese aviye che ndayaracuai vahe aico. Aporaviqui catu rumo ichui yuvireco, setá catu soquendapri tēi aico yuvireco ichui, inupambrí catu aico ichui yuvireco, setá rupi avei seni-seni che yuca uca che mombarrisusa pipe yuvireco.

24 Cinco yupagüer judío che nupá iteanga treinta y nueve tupri tucumbo pipe yuvireco.

25 Mbosapi yupagüer che nupasa ivira pipe, ñepeí rupi evocoiyase che apipisa ita pipe. Mbosapi yupagüer avei oñeapivíi iar ipive che guatasa rupi cheu, ñepeí pítu, ñepeí ari avei avevui tēi para guasu aviter rupi vichico.

26 Setá aguata opacatu rupi, iyavei iai rupi mbahe-mbahe tēi oime cheu, aico avei imonda rai vahe pāhuve; che mu judío mbahe tēi vahe pāhuve avei aico iyavei ndahei vahe che mu pāhuve no. Aico avei tecua guasu pipe mbahe tēisave, amombri vahesa rupi iyavei para guasu pipe, iyavei mbahe-mbahe tēisave Jesús reroyasar angahu tēi pāhuve aico.

27 Aporaviqui ité iyavei ayapo mbahe cheu yavai vahe; iyavei setá yupagüer ndaquei eté; aiporara avei tieporēhi iyavei husei; setá rupi ndacarui; sōhisagüer avei aiporara, ndacheturucuai avei vichico.

28 Ndahei co opacatu mbahe güeraño aiporara, ari yacatu rupi che mahenduhaño ité avei opacatu tecua rupindar Jesús reroyasar rese.

29 Oimese que oiporara vahe mbaherasicuer, che avei ayandu co mbaherasisa. Acoi que oimese oyavi uca vahe mbahe, che moñemoiro uca.

30 Iyase che yeecomboivate ai água cheu, co mbahe omboyecua vahe che pīrataēhisa rese ayeecomboivate año itera.

31 Yande Yar Jesucristo Ru Tūpa, ahe imboeteipri apirēhi secoi vahe, ahe oicua aipo che hesa supi tupri vahe.

32 Tecua Damasco ve aicose, mborerecuar guasu Aretas povri pendar mborerecuar oyocuai osundao co tecua roquendipive che rese osareco vaherá che roquenda água yuvireco viña;

33 oime rumo ava iruova guasu pipe che mogüeyi vahe tecua āchisa metana rupi yuvireco. Ēgüe ahe añemi ichui yuvireco.

12

Tūpa omboyecua Pablo upe mbahe queraisa nungar pipe

1 Ndipoi eté que ava mbahe oipisi vahe ahe ae tēi oyemboeteisa pipe. Che rumo amombehuño itera mbahe asepiya vahe che quer nungar pipe iyavei yande Yar remimboyecua che aipisi vahe ichui.

2 Che aicua mbia Cristo reroyasar, omomba cūrítei catorce araviter ahe imbosapisa ivave seraso agüer. Ndicuasai güetecuer rese tie revo oso, anise ihā güeraño tie revo. Tūpa rumo oicua.

3-4 Che rumo, “Ēgüe ehi tie revo oico” ahe aipo mbia upe, Tūpa güeraño oicua. Serasopri ivave teco orisave. Aheve osendu ñehesa ndicuasai vahe. Ahe niha que ava tēi upe ndipotasai imombehu água yuvireco.

5 Evocoi nungar mbia rese ayeecomboivatera; cheyese ité rumo ndayecomboivate ai chira. Che recocuer nipiratai vahe reseño ēgüe ahera vichico.

6 Yepe che añehe tupri aira cheyese viña, che revo ndahei chira ndayaracuai vahe nungar aico. Esepia, mbahe supi eté vahe amombehura viña. Ahe rumo ndayapoi. Esepia, tipihañemoñeta catu che rembiapo rese, che

remimombehugüer rese avei yuvireco che querve nungar mbahe mombehu rãgüer sui' viya.

⁷ Sese che yemboivate aiëhi ãgua che quer nungar mbahe che pihamondii vahe rembiepiagüer rese Tũpa ombou teco asisa cheu. Ahe aviye yu che cutu guasu vahe, ndoyavii avei Caruguar mara-mara tẽi che rereco vahe.

⁸ Mbosapĩ yupagüer yande Yar upe aporandu ité teco asisa che sui serocua ãgua rese viña.

⁹ Ahe rumo aipo ehi cheu: “Che porovasasa ndeu ambou vahe iyara nde ñemosa ãgua. Esepia, che pĩratasa oyecua catu ité ava nipiratai vahe recocuer rese” ehi. Evocoyase che ayemboiħa catuño itera che reco nipiratai vahe rese. Ègüe ehira Jesucristo pĩratasa oyecua che rese.

¹⁰ Sese Cristo rese che recosa pipe aviyeño ité ndache pĩrataise, que ambuae ava oñehe raise che rese, que mbahe ipanese cheu, ambuae che reca-reca tẽise che reco momara ãgua yuvireco iyavei que mbahe yavai vahe aiporarase Cristo sui. Esepia, ayanduse che pĩratãħisa, ahese che pĩrata catu.

Pablo ipiħañemoñeta ité Jesús reroyasareta Corinto pendar rese

¹¹ Che ndayaracuai vahe nungar aico pẽu, pe rese tẽi rumo ègüe ahe. Iya rumo peñehe tuprira che rese viña. Esepia, yepẽ ndahei seco ivate vahe aico viña, co apóstol angahu tẽi rumo pe supĩ peguata vahe ndahei ivate catu vahe che sui yuvireco.

¹² Che ñemosa tuprĩ pipe mboraviqui ayapo pe pãhuve. Ayapo mbahe poromondiisa mbahe pesepia yesapĩħa rai vahe imboyecua ãgua che supĩ eté vahe apóstol che recosa.

¹³ Co mbahe reseño pe ivi coti catu peico ambuae Jesús reroyasareta sui, che ndopomañecoise mbahe cheu pembou vahe rã rese. ¿Ayavi tie che cuaita, ègüe ahese pẽu? ¡Peñero sese cheu!

¹⁴ Cũritei che ayemoingatu imombosapĩsa rupi che so ãgua pe pĩri. Iyavei ndopomañecoĩ chira mbahe rese. Esepia, ndasecai mbahe pe rembiereco; pe recocuer ité rumo aipota. Esepia, iyepi omonuħa guarepochi guahĩr upe, ndahei tahir tẽi ègüe ehi oyepi upe yepi.

¹⁵ Evocoyase che querẽħisa pipe amondora opacatu che mbahe arco vahe pe pĩtivii ãgua iyavei opacatu che recocuer rese ayemondo pẽu pe reco tuprĩ ãgua. Che rumo opoaisu ité, pe tie revo ndache raisu tuprĩ eté peye.

¹⁶ Cheu mbahe ipanese, ndaporandui eté mbahe pereco vahe rese pẽu. Amove rumo ava, “Yande mbopa ãgua tẽi ègüe ehi Pablo yandeu” ehi tẽi yuvireco.

¹⁷ ¿Opombopa uca tie ava pẽu che remimondo pipe?

¹⁸ Che Tito upe, “Eresora ipĩri yuvireco” ahe. Supi avei ambuae yande rivri Tũpa reroyasar amondo. ¿Pembopa tie Tito? Oyoya tuprĩ mbahe oroyapo Tũpa upe ñepei ore pĩħañemoñetasa pipe.

¹⁹ Che rivireta, che rembiãisu, pe revo pepiħañemoñeta ore oroicuachía co pẽu, ore yoepi ãgua tẽi. Ègüe ndorohei eté rumo. Ore rumo Cristo rese ore reco pipe oroñehe Tũpa rovaque. Opacatu ité niħa mbahe oroyapo pe recocuer moviracua catu ãgua.

²⁰ Che asiquiye asose eipeve pe repia, avieteramo ndahei chira che piħa rupi pe recocuer. Iyavei pe avieteramo ègüe peye aveira che repiase. Che asiquiye ité, oime revo pe pãhuve yepoepi-episa, pe pĩħañemoñeta raisa ava mbahe pota raisa pipe, pe ñemoĩrosa peyeupe. Iyavei avieteramo oimera pe pãhuve ava oyeupeño tẽi mbahe oipota vahe, imahechiroi ai

vahe iyavei oñehe-ñehe tēi vahe ambuae ava rese, seco ivate ai vahe iyavei ndiporoviroyai vahe.

²¹ Asiquiye avei aso irise pe repia, omboura Tūpa pe sui che chī āgua, che mboyaseho uca tiētera peye setá pe cueseve peyemboangaipa vahe rese iyavei ndapemboasii etese mbahe tēi, yemboaguasa-guasa tēisa iyavei que mbahe pe remimbotarai peyapo vahecuer.

13

Poromboaracusa iyavei mahenduhasa

¹ Co niha inombosapisa yupagüer asora pe repia. Pemombehu potase que ava rembiapo ai cheu, toime que ñuvirío, anise mbosapi oicua vahe sembiapo ai.

² Co yipindar oyemboangaipa vahe upe opa aipo ahe: “Peicua catu” ahe che imoñuvirío yupagüesa pipe aicose pe piri. Cūrítei amombri aico pe sui, amombehu irira rumo co pēu. Co yipindar vahe upe iyavei opacatu ambuae angaipa pipe yuvirecoi vahe upe aipo ahe: aso irise pe pāhuve, ndopoparaisuereco iri chira.

³ Esepia, pe peipota ité che recoāha āgua ‘¿Cristo ité pīha omoñehe uca?’ pe yapave cheu. Cristo ndaseco mbegüemi pēu mbahe apo oico. Ahe rumo omboyecua opīratasa pēu.

⁴ Supi eté niha ahe yaticasa, inungar ava nipiratai vahe. Cūrítei rumo ahe oicove Tūpa pīratasa pipe. Ēgüe orohe avei ore seco pīrataēhisa sereco. Oroicose rumo sese oroico Tūpa pīratasa pipe pe rese hañeco āgua.

⁵ Pemahecua tupri catu pe recocuer rese: ¿peico ité pīha pe Cristo rese yeroyasa pipe? ¿Ndapeicuai vo Jesucristo secoise pe rese, pesése pe recoāhasa sui?

⁶ Pe revo peicuara ore ndorocañi tēi vahe oroico ore recoāhasa pipe.

⁷ Iyavei oroyerure pe rese Tūpa upe ‘toyapo eme mbahe tēi yuvireco’ ore hesave. Ndahei rumo ore ivate catu vahe mbahe tēi rasa pare mboyecuasave ēgüe orohe; co catu ‘toyapo mbahe aviye vahe yuvireco’ ore yapave, yepe pēu ndoyavii orocañi tēi vahe oroico viña.

⁸ Esepia, ndiyai mbahe supi tupri vahe amotarēhi āgua oreu; ēgüe ehi rumo sese catu ité oroñehe.

⁹ Sese orovihaño ité norepīratase, ore rumo oroipota ité pe momirata; iyavei ore oroyerure catuño itera pe recocuer catupri catu āgua rese.

¹⁰ Aicuachía co che ñehe imondo pēu pe piri che so āgua renonde. Acoi asose, namboyecua pīratatai chira che mborerecuasa eipeve. Ahe niha yande Yar ombou vahe cheu pe reco momirata catu āgua, ndahei pe reco momara āgua.

¹¹ Imomba āgua, che rivireta, aipota peviharetera peico. Peseca avei pe reco tupri catu āgua peyeupe, peyemonguerēhi catu, oyoya guasu peico tupri avei peyese mbahe tupri pipe. Evocoiyase Tūpa oporoaisusa pipe, güeco tuprisa pipe avei secoira pe rese.

¹² Pemombehu che mahenduhasa ñepeipei peyeupe pe yeovaupitesa pipe.

¹³ Opacatu ambuae yande rivri, Tūpa reroyasar avei omondo omahenduhasa yuvireco pēu.

¹⁴ Peipisi yande Yar Jesucristo porovasasa, Tūpa poroaisusa iyavei Espiritu Santo tasecoi opacatu pe rese. Aipo rupive che ñehe pēu.

PABLO REMBICUACHIA GALACIA PENDAR UPE GALATAS

Pablo mahenduhasa Jesús reroyasar Galacia pendar upe

¹ Che, Pablo, imondopri aico apóstol che reco āgua. Ndahei ava tēi sui ayu pēu iyavei ndahei ava tēi che cuai; Jesucristo ité niha che cuai iyavei yande Ru Tūpa che mbou acoi ombogüerayevi vahecuer Guahir.

² Che, Pablo, iyavei opacatu Jesús reroyasar yuvirecoi vahe cohave oroiacuachia co ore ñehe pēu, pe opacatu Jesús reroyasar Galacia pipe peico vahe.

³ Tapeipisi yande Ru Tūpa, yande Yar Jesucristo porovasasa pe reco tupri āgua.

⁴ Ahe acoi oyemondo vahe omano āgua yande angaipá repirā. Ēgüe ehi cūrtei yande renose co ivi pipe mbahe-mbahe tēi sui yande Ru Tūpa remimbotar rupi.

⁵ ¡Imboeteipri apirēhi Tu tasecoi!

Ndipoi ambuae ñehesa poropisirosa resendar

⁶ Che pihamondii etepri peye. Esepia, peyepipi poyava peico Tūpa sui. Ahe niha pe renoi Guahir Jesucristo pe raisusa pipe sui. Pe rumo, péroya pota ambuae tēi yembohesa pe ñepisiro āgua peico viña.

⁷ Supi eté ndipoi ambuae ñehesa pisirosa resendar. Ēgüe ehi rumo, oime ava pe mañeco tēi vahe pe mbopa āgua ñehesa supi tupri vahe sui yuvireco. Iyavei virova pota co ñehesa Jesucristo resendar yuvireco.

⁸ Oimese rumo que ambuae ava oñehe vahe poropisirosa angahu tēi rese ndoyoyai vahe che ñehesa rese pesendu vahe yipisuive, evocoi nungar ava upe “Toime Tūpa ñemoirosa” ahe yepe chera viña, anise que Tūpa rembiguai i va pendar avei no.

⁹ Amboyupagüe iri, “Evocoi nungar ava upe toime ité Tūpa ñemoirosa” ahe.

¹⁰ Aipo che he pipe, ndasecai ava tēi, “Co mbia avíye vahe” he āgua cheu, Tūpa rumo aseca cheu aipo he āgua. Esepia, java remimbotar rupi tēi mbahe ayapo vitesse, evocoyase ndahei chietera Cristo rembiguai aico viña!

Mara ehi Pablo apóstol güeco āgua

¹¹ Che rivireta, tapeicua co ñehesa poropisirosa resendar amombehu vahe ava upe ndahei ava tēi pihañemoñetasa.

¹² Ndahei avei ava tēi che mbohe; Jesucristo ité niha oicua uca cheu.

¹³ Pe niha pesendu yipindar che recocuer resendar, che mu judío yembohesa rupi aguata vitesse aracaco. Che piratasa pipe tēi aseca opacatu Tūpa rembiporavo Jesús reroyasar momara āgua.

¹⁴ Ēgüe ahe che ayemboivate ai catu che mboetasa eta sui judío yembohesa pipe. Ayapó catu opacatu che recocuer pipe yipindar che ramo eta yembohe agüer rupi eté vichico.

¹⁵ Tūpa rumo yipive che ha viteñhiseve che poravo oyeupe nara. Iyavei oporoaisusa pipe che renoi güemimbotar rupi.

¹⁶ Ēgüe ehi ahe oicua uca Guahir cheu, che imombehu āgua co ñehesa Tahir recocuer resendar ava ndahei vahe judío upe. Ndasoi rumo ava tēi upe icua āgua;

17 ndasoi avei Jerusalén ve yipive apóstol yuvirecoi vahe repia água. Che rumo aso voi eté ivi Arabia ve. Coiyé ayeve tecua Damasco ve vitu.

18 Ichui mbosapi araviter che seroya pare, aso tecua guasu Jerusalén ve cute. Ahese ramo Pedro ambori quince ari rupi güerañomi tēi.

19 Ndasepiai eté rumo ambuae apóstol. Yande Yar rivri Santiago güeraño asepia.

20 Tūpa oicua co mbahe aicuachía vahe pēu, supi tupri vahe ité.

21 Ipare aso ivi Siria ve, Cilicia ve avei no.

22 Yande Yar reroyasar rumo oñemonuha vahe ivi Judea ve ndache cuai eté yuvireco.

23 Co oyanduño tēi yuvireco ambuae ava aipo ehi vahe: “Acoi aracaco yande reca-reca catu vahe yandeu mbahe tēi apo água, cūrítei omombehu Jesucristo reroya água oico” ehi, “Ahe acoi yipindar yande mocañi pota rai vahe oico” ehi yuvireco cheu.

24 Ahese, “Imboeteipri Tūpa tasecoi” ehi yuvireco che recocuer rese.

2

Ambuae apóstol, “Aviye ité Pablo porombohesa” ehi yuvireco

1-2 Coiye catorce araviter pare, Tūpa omboyecua cheu Jerusalén ve che yevi água. Evocoiyase aso iri aheve. Ahese oroso Bernabé rese, Tito avei oroviraso oreyeupi. Aheve yipindar opacatu Jesús reroyasar rerecuar reseño rane oroñemonuha. Esepia, ndaipotai che rembiapo opitara água ehi tēi vahe. Evocoiyase amombehu co ñehesa poropisirosa resendar chupe yuvireco acoi amombehu vahe ava eta ndahei vahe judío pāhuve.

3-4 Oime rumo amove yande rivri angahu tēi, ahe yuviroique mbe güe vahe ore pāhuve ‘yasecoepia rane, ¿supi eté ndoviroyai Moisés porocuita Jesucristo reroyasa pipe yuvireco?’ oyapave. Oipota ahe ore reroyeve iri Moisés porocuitavri tēi yuvireco viña. Ahese che ndugüer Tito upe, “¡Eyembocircuncida Moisés porocuita rupi!” ehi yuvireco. Esepia, ahe ndahei vahe judío secoi.

5 Ore rumo ndoroipotai eté semimbotar apo água yuvireco chupe. Esepia, ‘tovireco viteño oyese co ñehesa pisirosa resendar supi tupri vahe yuvireco’ ore yapave pēu.

6 Co rumo acoi icuapri ité Jesús reroyasar rerecuar, nomombehui eté yembohesa ambuae vahe yuvireco cheu, oyoyaño ité che porombohesa rese. (Yepe ocuaita viareca ivate yuvireco viña. Che rumo ñañecuaroi chietera che recocuer sui. Esepia niha, Tūpa ndahei ava rete tēi osepia.)

7 Ahe rumo oicua yuvireco Tūpa che cuai oñhengagüer poropisirosa resendar mombehu água ndahei vahe judío yuvirecoi vahe upe, inungar omondo Pedro oñhengagüer poropisirosa resendar mombehu água judío upe.

8 Esepia, inungar Tūpa omondo Pedro upe apóstol seco água ava judío upe nara, água ehi avei imbou apóstol che reco água ava ndahei vahe judío upe nara.

9 Sese Santiago, Pedro iyavei Juan, ahe chupe, “Oyemoviracua vahe Jesús reroyasar pāhuve” ehi yuvireco, ahe oicua yuvireco Tūpa ombou vahe oporovasasa cheu. Ahese imboetasa ore recosa pipe che po pi si yuvireco, Bernabé upe avei água ehi yuvireco. Iyavei ipiha rupi eté ore oroparaviqui vahe ava ndahei vahe judío pāhuve oroico, inungar ahe oporaviqui judío pāhuve yuvireco.

10 Co reseño oporandu yuvireco oreu: “Peyemomahenduhami ava iparaisu vahe pítivii ãgua rese” ehi. Yipive ité rumo che ãgüe ahe pota vichico yepi.

Pablo ñehe pĩrata Pedro upe sembiavi rese Antioquía ve

11 Iyavei olose Pedro tecua Antioquía ve. Aheve oyavi güecocuer. Evoicoiyase ãnehe pĩrata sovai eté chupe mbahe sembiavi rese.

12 Esepia, yipĩndar ahe ocaru ndahei vahe judío piri viña. Ipare rumo, oyepotase ambuae judío Jesús reroyasar Santiago mboetasu yuvireco, ahese Pedro osirĩño ichui osiquiyepave. Iyavei ndocarú iri ipiri. Esepia, ahe Jesús reroyasar judío yugüeru vahe “judío recocuer rupi yaguatara yande ñepisiro ãgua” ehi vahe ité yuvireco viña.

13 Evocoiyase ambuae Jesús reroyasar judío avei osirĩpaño tēi supive yuvireco. Bernabé avei eté supive ãgüe ehiño tēi.

14 Che asepiase rumo, ndahoyoyai secocuer yuvireco co ñehesa poropisirosa resendar supi tupri vahe rese. Ichui Pedro upe ãnehe opacatu Jesús reroyasar rovaque: “Nde niha judío, ereico rumo inungar ndahei vahe judío. Cũritei rumo erembohe tēi nde rembiapo pipe evocoi ava ndahei vahe judío Jesús reroyasar judío rereco uca ãgua” ahe chupe.

Judío, ndahei vahe judío oyoya ñepisiro yuvireco Cristo rese oyeroyasa pipe

15 Yande niha judío yande hasa suive yaico, ndahei ava ndahei vahe judío nungar yangaipa vahe yaico.

16 Cũritei rumo yaicua, ndipoi eté que ava seco catupri vahe Tũpa rovaque Moisés porocuita mboaviyesa pipe. Jesucristo rese yeroyasa pipeño ité rumo yande reco catupri. Sese yande yayeroya ité Jesucristo rese, “Co seco catupri vahe” Tũpa he ãgua yandeu. ãgüe ehi eté seroya pipe, ndahei acoi porocuita tēi reroyasa pipe. Esepia, ndipoi chietera que ñepeí ava seco catupri vahe Tũpa rovaque evocoi porocuita tēi aposa pipe.

17 Yasecase yande reco catupri ãgua Cristo rese yande yeroyasa pipe, ipipe yaicuae angaipa viyar yande reco, ¿Cristo pĩha evocoiyase yande mboangaipa? ¡Aní eté!

18 Che amocañise mbahe, ipare rumo amopuha irise, che evocoiyase ayemboangaipa ipipe.

19 Esepia, ndaicatuisse Moisés porocuita reroya tupri che ñepisiro ãgua, ahese ocañi tēi vahe aico ipipe. Ichui rumo Jesucristo reroyasa pipe asupiti Tũpa upe nara che recove ãgua. Esepia, che aviye yaticapri aico Cristo rese.

20 Sese ndahe iri che ité aicove; Tũpa Rahir Cristo rumo che rese secói. Sese ité ayeroya che retecuer pipe che recove ãgua. Ahe niha oyemondo omano ãgua che raisupave.

21 Naroĩroi eté co Tũpa porovasasa. Esepia, ava seco catuprira Tũpa rovaque porocuita tēi reroya pipe viña, evocoiyase Cristo mano agüer ãgüe ehi tēi etera viña.

3

Porocuita iyavei yeroyasa

1 ¡Ndapembahecuai eté pe Galacia pendar! Pe ndoyavii ipaye vahe remimbopa peico. Oromombehu tupri niha pe rovai eté acoi Jesucristo curusu rese yatica agüer pēu.

² ¡Pemboyecua co che porandusa cheu! ¿Moisés porocuita mboyeroya pipe pîha peipîsi Espîritu Tûpa suindar, co ñehesa pesendu vahecuer reroya pipe tie?

³ ¡Ndapembahecuai eté! Yîpîndar Espîritu pipe pemboipî Cristo rupi pe guata âgua. ¿Ëgüe peye aveira pîha pe pîratasa pipe tîi pe guata tuprî âgua Cristo rupi cûritei?

⁴ ¿Ndape pîtivîimi eté vo acoi opacatu pe paraisusa Cristo recocuer rese? ¡Pe pîtivîimira tarahu viña!

⁵ Tûpa niha omondo oEspîritu pe rese iyavei oyapo poromondiisa pe pâhuve. ¿Mahera pîha oyapo? Esepia, co ñehesa pesendu vahe peroya ité, sese Ëgüe ehi pîu ndahei Moisés porocuita tîi reroya pipe.

⁶ Esepia, aracahe Abraham oyeroya ité Tûpa rese, ipipe sui Tûpa oipîsi seco catuprî vahe nungar oyeupe nara.

⁷ Sese iya ité peicuara opacatu acoi oyeroya vahe Tûpa rese yuvireco, ahe Abraham suindar supî tuprî vahe.

⁸ Iyavei Tûpa Ñehengagüer icuachiapri pipe omombehu ité senondeve Tûpa oipîsi aveira opacatu oyese oyeroya vahe ndahei vahe judío co ivî pîpendar oyeupe nara. Iyavei omombehu co ñehesa icatuprî vahe Abraham upe: “Opacatu ava ivî pîpendar sovasapriira yuvireco nde sui” ehi.

⁹ Evocoiyase Tûpa osovasara cûriteindar oyese yeroyasareta inungar Abraham aracahe.

¹⁰ Acoi seco catuprî pota vahe Moisés porocuita pipe tîi yuvirecoi vahe, ahe Tûpa ñemoirosavrîve tîi yuvirecoira. Esepia, icuachiapri arachendar pipe aipo ehi: “Opacatu ava nomboavîyei vahe ité opacatu Tûpa porocuita icuachiapri pipe yepi, ahe iñemoirosavrîve tîi yuvirecoira” ehi.

¹¹ Sese, co omboyecua tuprî yandeu ndahei Moisés porocuita reroyasa pipe tîi Tûpa, “Co seco catuprî vahe” ehi ava upe. Esepia, icuachiapri arachendar pipe aipo ehi: “Acoi ava seco catuprî vahe oicovera Tûpa rese oyeroyasa pipe sui” ehi.

¹² Moisés porocuita ndahoyoyai Cristo rese yeroyasa rese. Esepia, ahe porocuita aipo ehi: “Acoi ava oico pota vahe co porocuita pipe, toamboavîye tuprî ité opacatu porocuita güecove âgua” ehi.

¹³ Moisés porocuita mboavîyeêhîsa pipe yacañî tîira viña. Cristo rumo yande renose yande cañî tîi rägüer sui. Ahe ae opa oipîsi ñemoirosa yande repirâ. Esepia, icuachiapri arachendar pipe aipo ehi: “Opacatu ava imboyasecopri ivîra rese, oipîsi Tûpa ñemoirosa yuvireco” ehi.

¹⁴ Ëgüe ehi Cristo yandeu ‘toipîsi ava ndahei vahe judío che Ru porovasasa che rembiapo sui’ oyapave. Ahe porovasasa Tûpa omombehu vahecuer Abraham upe aracahe. Ipipe sui yande opacatu yaipîsi Espîritu imombepri yayeroyase Cristo rese cûritei.

Porocuita iyavei Tûpa güemimombehugüer omboavîye vaheerâ

¹⁵ Iyavei, che rivîreta, amboyoya pota mbahe co ivî pîpendar mbahe rese. Inungar acoi que ava ñepeî reseve oicuachîase güemimbotar omombehu vahe, ahesa ndipoi que ambuae ava omboyeho vaheerâ iyavei ndipoi que ambuae ava omboyepî irî vaheerâ.

¹⁶ Ëgüe ehi avei Tûpa remimombehugüer Abraham upe aracahe. Esepia, oñeha ñepeî reseve chupe iyavei ichuindar upe avei. Tûpa Ñehengagüer icuachiapri pipe: “Nde suindareta upe” ndehi, inungar-ra que ava rehîi upe viña. Ëgüe ehi rumo, “Nde suindar upe ité” ehi ‘ñepeî ava’ ohesa pipe, ahe Tûpa Rembiporavo Jesucristo.

¹⁷ Co mbahe amombehu pota pëu: evocoi porocuita Tüpa ombou vahecuer cuatrocientos treinta araviter pare, ndoicatu chietera Tüpa ñepeí reseve Abraham upe omombehu vahecuer iyavei oñehe omboaviye vaheerã mboyeho água.

¹⁸ Supi eté acoi Tüpa suindar ou vaheerã porerecosa Moisés porocuita mboaviyesa pipe suise viña, ahese ndahei chiaveira Tüpa remimombegüer sui. Ahe rumo ñepeí reseve Tüpa remimombegüer rupi Abraham upendar porerecosa.

¹⁹ ¿Mahera pñha evocoiyase aviye Moisés porocuita? Esepia, ava poreroyaehisa cua água Tüpa ombou oporocuita Moisés upe aracahe. Co porocuitavriye rumo ava yuvirecoi acoi oyepotase voi Abraham suindar Jesús Tüpa remimombegüer rupi. Yipindar rumo Tüpa oyocuai güembiguaí iva pendar oporocuita mombehu água Moisés upe aracahe ‘tomombehu evocoiyase Moisés che porocuita opacatu ava upe’ oyapave.

²⁰ Ñepeí ava rese oñemoñetase, ndipotasai ambuae imoingatu água. Tüpa niha ñepeí vahe secoi.

Mbahe sui Tüpa ombou oporocuita

²¹ “Moisés porocuita co coti tñi Tüpa remimombegüer imboaviyepirã sui” aipo ndahei eté pëu. Esepia, acoi Tüpa omondose que porocuita ombou vaheerã tecovesa apirñhi ava upe imboaviyesa pipe, evocoiyase porocuita yeroya pipe yande reco catuprira Tüpa rovaque viña.

²² Icuachiapri aracahendar pipe rumo omombehu ité co: opacatu ava inungar mbiguai tñi oangaipa pipe yuvirecoi. Evocoi égüe ehi, Jesucristo rese yande yeroyasa pipe yasë vaheerã ichui mbahe imombehupri písí água.

²³ Yipindar rumo mbiguai nungar yaico Tüpa nomboyecua viteise Guahir rese yande yeroya água.

²⁴ Inungar chñihavemi tñi, égüe vahe porocuitavriye yaico yipindar. Ahe porocuita rumo yande mbohe Cristo yu água ‘toyeroya Cristo rese güeco catupri água curi’ oya yandeu.

²⁵ Cüritei rumo oime Jesucristo rese yeroya água cute. Evocoiyase ndahe iri ahe porocuitavriye yaico.

²⁶ Pe niha opacatu Tüpa rahir peico Jesucristo rese yeroya pipe.

²⁷ Opacatu pe ñapiramombri peico vahe Jesucristo rupi pe guata água, secocuer avei pereco.

²⁸ Iyavei ndipoi eté yemboyahosa Jesucristo rese yaicose, yepera que judío viña, ndahei vahe judío; anise mbiguai, ndahei vahe mbiguai; que cuimbahe, cuña avei. Esepia, opacatu ñepeí vahe nungar ité yaico Cristo rese.

²⁹ Jesucristo rese peicose, pe evocoiyase Abraham suindar nungar tupri ité peico. Evocoiyase pe avei peipísira Tüpa remimombehu porerecosa yandeundar.

4

¹ Amboyoapi vítera co che ñehesa pëu: inungar que ava omanose, oseya ombahe eta guahir upe chñihavhemise. Yepe ahe tahir opacatu mbahe yar secoira viña, ahe rumo inungar tupri mbiguai tñi secoi vahe yepi.

² Esepia, ahe guãrosar povriye secoi imboyeroya água. Ocuacuase voi eté, opoira tu remimombegüer rupi ichui.

³ Égüe ehi avei yandeu. Yande chñihavhemise, evocoiyase mbiguai nungar yipindar vahe co ivi pipendar porocuitavriye yaico.

⁴ Oyepotase rumo ari imombehupri, Tūpa ombou Guahir; ahe oha cuña sui; evocoyase ahe Moisés porocuaítavri ve seci.

⁵ Ēgüe ehi ou opacatu yande renose āgua evocoi mborocuaítavri sui Tūpa rahir ité yande reco āgua.

⁶ Evocoyase Tūpa omboyecua Guahir yande recose ombouse Guahir Espiritu yande piha pipe, “¡Che Ru!” yande he āgua chupe.

⁷ Sese yande Tūpa rahir ité yaico, ndahe iri cūritei mbiguai tēi nungar. Tūpa rahir yande reco pipe ahe ombou aveira oporerecosa yande mahera.

Pablo ipihañemoñetaño ité Jesús reroiyasar rese oico

⁸ Yipindar tūpa angahu rembiguai tēi peico Tūpa ité cuaēhi pipe.

⁹ Cūritei rumo peicua Tūpa, ēgüe ehi rumo Tūpa ité oicua pe recocuer. Sese niha aipo ahe cheyeupe: “¿Mara ehi piha oyevi iri mborocuaíta tēi pipe mbiguai tēi güeco iri āgua yuvireco?” ahe pēu.

¹⁰ Esepia, pemboetei vite ari, yasi, araviter pieta eta tēi peico.

¹¹ ¡Che ayembosiquiye pe rese, “Che porombohesa revo ēgüe ehi tēi vahe ipāhuve yuvireco chupe” ahe pēu!

¹² Iyavei che rivireta, aipota che recocuer moña peye. Esepia, cuese che asē Moisés porocuaíta povri sui inungar pe yipindar ēgüe ahe vichico pe pāhuve. Ahe ndapeyapoi eté mbahe cheu.

¹³ Peicua niha che yipindar chembaheasise vichico, ahese amombehu co ñehesa pīsirosa resendar pēu.

¹⁴ Yepe co che mbaheasisa yavai etepri pēu viña, pe rumo ndache reroiroi eté peye iyavei ndache momboi peye. Ēgüe ehi rumo aviye acoi Tūpa rembiguai eté che rereco peye viña iyavei aviye Jesucristo itera aico pēu viña no.

¹⁵ ¡Mahera ru cūritei ndapeyemboviharete vitei che rese peico eipeve! Esepia, supi eté, cuese acoi que pe resa teieté revo pemboura cheu viña.

¹⁶ ¡Evocoyase cūritei che amotarēhi tie peye acoi pēu mbahe supi tupri vahe mombhusa sui tēi!

¹⁷ Evocoi ava iquerēhi ité pe rese, ndahei rumo mbahe aviye vahe apo āgua yuvireco. Ahe rumo oipota pe mboyepēi āgua tēi ore sui yuvireco pe querēhi āgua supi.

¹⁸ Aviye ité niha yande querēhise mbahe apo ambuae ava upe, mbahe aviye vahe apo āgua rumo. Ndahei chira pe pāhuve che recoseño pereco pe querēhisa. Iyacatu rumo pequerēhiño itera yepi.

¹⁹ Che rahireta, che ayembopiharasi ité vichico pe rese. Inungar cuña imembirasi vahe; ēgüe aheño itera ayemombaraitsu vichico ‘toico rane ité Cristo sese yuvireco’ che yapave pēu.

²⁰ Cūritei rāgüer opoepiara viña añehe tupri catu āgua pe rese. Esepia, “¿Mara ahera revo sereco yuvireco?” ahe pēu.

Agar, Sara recocuer resendar yembohesa

²¹ Pe peroya pota vahe Moisés porocuaíta pe reco catupri āgua, pemombehu mbahe cheu: ¿Ndapesenducuai tie co mborocuaíta aipo ehi vahe?

²² Esepia, aipo ehi: Abraham aipo vireco ñuvirío guahir, ñepei tahir aipo sembiguai Agar membri, ambuae tahir evocoyase sembireco Sara membri.

²³ Evocoi sembiguai membri oha que ava tēi yesu nungar; sembireco membri rumo oha Tūpa remimombegüer rupi eté.

24-25 Co tecocuer mboyoyasa yaracua vahe ité. Co ñuvirío cuña sui yayembohe ñuvirío Tūpa remimbotar rese. Yipindar sembiguai Agar omboyecua evocoi porocuita imondopri Arabia pipendar ivitri Sinai ve aracahe. Ahe cuña mbiguai tēi inungar Jerusalén upendar ava. Esepia, ahe Moisés porocuitavrive yuvirecoi. Ēgüe ehi avei opacatu Moisés porocuita pipendar, yuviroha mbiguai nungar güeco āgua, opacatu ichuindar ēgüe ehi vite yuvireco.

26 Yande rumo inungar-ra que Jerusalén iva pendar suindar yaico viña ēgüe yahe yaico mbiguaiēhi.

27 Esepia, icuachiapri aracahendar pipe aipo ehi:

“Eyembovihareté, cuña nimembii vahe; esapucai nde rorivetesa pipe, nde ndereiporarai vahe nde membri rasicuer. Esepia, acoi cuña seyapri imembi ati catura cuña omer vireco vahe sui” ehi.

28 Che rivireta, inungar Sara membri Isaac, ēgüe yahe avei tahir ité yaico Tūpa remimombehugüer rupi.

29 Co rumo aracahe sembiguai membri oha vahe ava tēi yesu nungar, ahe ndoyambotai sembireco membri acoi Espiritu pīratasa pipe sui oha vahe; cūrítei ēgüe ehi tupri avei.

30 ¿Mara ehi icuachiapri aracahendar pipe? “Pemboyepipi pe rēta sui cuña mbiguai tēi imembi rēseve. Esepia, cuña mbiguai tēi membri ndiyai oyoya cuña ndahei vahe mbiguai membri rese vu mbahe pisi āgua yuvireco” ehi.

31 Sese, che rivireta, yande ndahei sembiguai tēi membri nungar yaico, yande rumo sembireco membri nungar yaico. Esepia, ahe ndahei mbiguai.

5

Peyemoviracuaño ité Moisés porocuita pipe pe recoēhi āgua

1 Jesucristo niha ombou yandeu mbiguai tēi nungar sui yande sē āgua. Sese peyemoviracua mbiguai tēi pe reco iriēhi āgua.

2 Pesendu che ñehe. Che, Pablo, aipo ahe pēu: acoi peyembocircuncida ucasa, ahese ēgüe ehi tēi vahe Cristo pereco.

3 Che amombehu pota irimi pēu, que ava oyembocircuncida uca vahe, vireco niha ocuaita opacatu Moisés porocuita mboyeroa āgua.

4 Pe pereco catupri pota tēi vahe Tūpa rovaque evocoi porocuita tēi reroya pipe, peyepipi ité Cristo sui. Evocoiyase Tūpa porovasasa avei pemocañi tēi peyesui.

5 Yande rumo yande querēhisa pipe yayeroya yande reco catupri āgua rese. Ēgüe yahe Espiritu yande pītiviisa pipe iyavei Jesús rese yeroyasa pipe avei.

6 Esepia, acoi yaicose Jesucristo rese, yepe yayembocircuncidase, anise ndayayembocircuncidaise, ahe ndayande pītivii eté yande reco catupri āgua Tūpa rovaque. Co güeraño rumo yande pītivii Jesús rese yande yeroyasa. Ahe niha yande mboyeaisu uca.

7 Peico tupri niha yipindar viña. ¡Ava ru ndoviroya uca iri mbahe supi tupri vahe pēu!

8 Ndahei eté rumo pe poravosar Tūpa ēgüe ehi pēu.

9 ¿Ndapeicuai vo acoi aipo ehi vahe: “Chihimi pan mboapeposa oso panguã rese opacatu rupi oicahopa tupri yepi” ehi?

10 Che rumo ayeroya yande Yar rese pe pīhañemoñeta āgua che pīhañemoñetasa rupi. Tūpa rumo omboura oñemoirosa que ava pe mbopīhañemoñeta yoavirati uca vahe upe.

11 Che rumo, che rivireta, “Iya yayembocircuncida yande reco catupri āgua” ahe vitesse Jesús reroyasar upe viña, ahese revo ndipoi chira che amotarēhisar judío pāhuve, ahese avei ndipoi chira ñehesa curusu rese Jesús manosa resendar amotarēhimbar ipāhuve viña.

12 Evocoi ava pe mbopihañemoñeta yoavirati uca vahe circuncisión rese yuvireco, imahera ahe ae ndoyeasiapa voi ñepeí reseve yuvireco!

13 Esepia, pe ore rivireta, Tūpa niha pe renoi mbiguai tēi nungar pe recosa sui pe renose āgua. Ndahei chira rumo pe remimbotarai tēi apo āgua, iyacatu rumo peñepitiviira pe yeaisusa pipe.

14 Esepia, opacatu evocoi mborocuita imboaviyesa yamboaviyese co ñehesa aipo ehi vahe: “Esaisu ambuae ava nde yeaisu nungar” ehi vahe.

15 Peyeseño tetei rene catu; peicua catu, avieteramo ēgüe peyese, pe recocuer pemomarapa tiētera.

Yaguatara Espiritu remimbotar rupi, ndahei yande remimbotar tēi rupi

16 Pesendu che ñehe: Espiritu pīratasa pipe catu peico yepi. Iyavei peyapoi rene mbahe pe remimbotarai.

17 Esepia, co pe remimbotarai ndahoyoyai eté Tūpa Espiritu remimbotar rese. Ndoymbohe catui eté. Sese ndapeyapo ucai mbahe pe remimbotar aviye vahe peyeupe.

18 Acoi Espiritu ité pe reroquatase, ahese ndahe iri chiaveira Moisés porocuitavriye peico.

19 Yande remimbotarai suindar yande rembiapo ai icuasa tupri ité. Ahe: yemboaguasa tēisa, teco quihasa, mbahe tēi aposá;

20 mbahe rahanga upe yerure tēisa, yembopayesa, ñeroirosa, ñehepoepi-episa iyavei ambuae ava mbahe pota raisa; ñemoiro seraisa, yemboyahoyahosa, pihañemoñeta yoyaēhisa,

21 iyavei ambuae ava mbahe pota raisa rese ñemoirosa, savaiposa, yembopieta tēisa iyavei ambuae mbahe co nungar tupri aposa. ¡Peicua catu! Esepia, evocoi nungar mbahe aposar ndoyuviroiquei chietera Tūpa mborerecuasave yuvireco curi.

22 Yayapose rumo Espiritu remimbotar, yande evocoiyase yayeaisura, yande rorivetera, yaicora mbahe tupri pipe, yande reco mbegüera, yaporoaisura yande reco aviyesa pipe, yamboyecuara yande cuaita mboaviyesa,

23 yayemominiñora iyavei yande recorā rese yañearo tupriira. Evocoi nungar yayapose, ndipoi eté que mborocuita pipe yande yeamotarēhi āgua.

24 Jesucristo rese ité yuvirecoi vahe rumo, opa ité omombo güecocuerai co ivi pipendar tēi oyesui yuvireco, güemimbotarai, opihañemoñeta raisa avei no.

25 Yande yaicose Espiritu pīratasa rese, ahese Espiritu rupi eté yaguatara.

26 Ndayayemboivate ai chira. Esepia, ipipe sui yayeamotarēhi, yaipota rai avei yande mboetasa recocuer nungar yande reco āgua.

6

Peñepitiviñ ñepeí-peí

1 Che rivireta, acoi que Jesús reroyasar pe pāhu pendar oyavise güecocuer, pe peico vahe Espiritu rese, peipitiviñ secocuer moingatu āgua pe recocuer mbegüemisa pipe. Peicua catura rumo, avieteramo oyoya voi peyemboan-gaipa uca tiētera.

2 Peñepitiviñ catu que mbahe yavai rai vahe rese. Ēgüe peyese, Jesucristo porocuita pemboaviyera.

³ Amove ava, “Che ivate catu vahe aico” ehi tēi. Ēgüe ehi rumo ahe ae oyembopa aipo ohesa pipe oico.

⁴ Sese niha ñepeí-peí eté yaicua tuprira yande recocuer. Aviyese, evocoiyase sese yaviharetera. Ndahei acoi ambuae ava recocuer rese tēi yambooyara yande recocuer.

⁵ Esepia, ñepeí-peí eté yande yacatu yareco yande cuaita imboavíye āgua.

⁶ Acoi oyembohe vahe Tūpa ñehe písírosa resendar rese, tomondo ombosesar upe mbahe güembiereco ipítivíi āgua.

⁷ Peyembopa eme catu pe ae. Ndipoi chietera que ava viroíro vahe Tūpa ñemoírosa písíehisa pípe. Ēgüe ehi eté: yañotise mbahe, ichui avei mbahe yaipísira.

⁸ Acoi ava rumo oyapo vahe mbahe güemimbotarai pípe, ahe oipísira cañisa apírēhi vahe. Acoi oyapo vahe mbahe Espírítu remimbotar rupi, ahe oipísira tecovesa apírēhi vahe yuvireco.

⁹ Evocoiyase tayandecuerai eme mbahe tuprí aposa pípe. Esepia, acoi ndayandecueraise, yaipísira mbahe tuprí apo repri.

¹⁰ Sese yande catugüer rupi yayapo mbahe ícatuprí vahe opacatu upe; yande mboetasa Jesús reroyasar upe ité rumo yayapora.

Pablo, “Peicua catu pe mbocircuncida pota vahe sui” ehi iyavei ñehesa ípa vahe

¹¹ ¡Peseipia co ñehesa ípa vahe che pove ité aicuachía tuvicha vahe pēu!

¹² Acoi judío Jesús reroyasar pe mbocircuncida uca potaño tēi vahe ‘Co mbia avíye ité, tehi ndahei vahe Jesús reroyasar judío yuvireco yandeu’ ohesa pípe tēi ēgüe ehi yuvireco viña. Esepia, ndoipotai evocoi judío oamotarēhi co ñehesa Cristo atica agüer mombehu pípe yuvireco.

¹³ Acoi oyembocircuncida uca tēi vahe avei rumo nomboavíyei eté opacatu mborocuaíta yuvireco. Oipota rumo pe mbocircuncida ucara oyemboivate ai āgua pe cuaise evocoi nungar apo yuvireco.

¹⁴ Che rumo ndayemboivate potai eté. Curusu rese yande Yar Jesucristo mano agüer rese güeraño ité ayembovíha. Imano agüer sui co iví pípendar mbahe pota raisa opa ité che sui. Che evocoiyase inungar omano vahe aico chupe.

¹⁵ Yepe que yayembocircuncidase revo, anise que ndayayembocircuncidaise viña, ndayande pítivíi eté Cristo rese yaico tuprí āgua. Co rumo avíye vahe ité yandeu: Tūpa yande recocuer mbopiasuse.

¹⁶ Opacatu yuvirecoi vahe co ñehesa che remimombehugüer rupi iyavei opacatu Tūpa upendar supi eté vahe toipísi Tūpa suindar teco tuprísira iyavei iporoparaisuerecosa yuvireco.

¹⁷ Avíye, co pípe suíve ndaipota iri que ava che mañeco tēi vaherā. Esepia, che areco che retocuer rese che apícha-pícha agüer. Ahe omboyecua Jesús rembiguai che recosa.

¹⁸ Che rívíreta, yande Yar Jesucristo tape rovasa opacatu. Aipo rupive.

PABLO REMBICUACHIA EFESO PENDAR UPE EFESIOS

Pablo mahenduhasa Jesús reroyasar Efeso pendar upe

¹ Che, Pablo, Jesucristo apóstol aico Tūpa remimbotar rupi. Che aicuachía co che ñehe pēu pe Efeso pendar, Tūpa upendar Jesucristo reroyasar peico vahe.

² Yande Ru Tūpa iyavei yande Yar Jesucristo tombou oporovasasa pe reco tupri āgua pēu.

Cristo suindar porovasasa

³ Yande Yar Jesucristo Ru Tūpa imboeteipri tasecoi. Ahe ombou opacatu porovasasa iva sui yande Cristo rese yaico vahe upe.

⁴ Sese niha Tūpa yande poravo yipivé ité ivi apoēhi viteseve ‘toyuvirecoi cheu nara ité iyavei tasecomara eme yuvireco che rovaque’ oyapave oporoaisusa pipe.

⁵ Ipipe avei yipisuive yande pisi guahirguā Jesucristo yande pīsirosa pipe güemimbotar rupi.

⁶ Sese yande yasapucaí chupe iporoaisusa porañete vahe rese yepi. Ahe ipipe niha yande rovasa Guahir güembiaisu sui.

⁷ Tūpa yande raisu eteprisa pipe yande pīsiro Guahir ruvi piyeresas pipe yande angaipa rese ñero āgua.

⁸ Yande raisu pipe avei ombou opacatu yande aracua āgua iyavei yande yapisaca āgua avei yandeu,

⁹ iyavei oicua uca güemimbotar yipisuive ndicuasai vahe yandeu co güembiaporā mboaviye āgua.

¹⁰ Oyepotase ahe ari imboaviye āgua, Tūpa opacatu mbahe iva pendar, co ivi pipendar avei opara omoingue ñepei reseve Guahir Cristo povrive.

¹¹ Cristo rese yaicose, Tūpa yande poravo yipisuive ichuindar mbahe yandeundar pisi āgua. Opacatu rumo mbahe Tūpa remimbotar rupi. Ahe niha oicua ité güemimbotar apo āgua

¹² ‘tomboetei che mborerecuasa ava yuvireco che Rahir rese yeroyasar yipindar yuvirecoi vahe recocuer repiase’ oya oreu.

¹³ Pe avei niha, pesenduse co ñehesa supi eté vahe pīsirosa resendar, Cristo peroya pe piha pipe sese peico vaherā. Tūpa ombou güemimombehugüer Espiritu Santo pe piha pipe ‘cheundar ité yuvirecoi’ oya.

¹⁴ Ipisisa pipe niha yaicua yande yaipisi vaherā yandeundar mbahe imoin-gatupri, acoi Tūpa opase oipīsiro ava oyeupendar ‘ipipe sui tomboetei che reco ivatesa ava yuvireco’ oya.

Pablo oporandu Tūpa upe mbahecuasa Jesús reroyasareta upe mondo āgua

¹⁵ Ayandu peyeroya tupri yande Yar Jesús rese iyavei pesaisu ité ava opacatu Tūpa upendar.

¹⁶ Sese ndapoi eté Tūpa upe, “Aviye ndeu” che hesa sui chemahenduhase pe rese che yerurenda pipe.

¹⁷ Che aporandu yande Yar Jesucristo Ru Tūpa seco porañete vahe upe, pe recocuer resape āgua rese. Ipipe peicua tupri catura semimboyecua iyavei peicua tupri catura yande Yar.

¹⁸ Ëgüe ahe ité aporandu Tüpa upe pe piha resape ägua rese. Ipipe peicua catura co pesáro vahe ivave pe reique ägua; chupe nara ité Tüpa pe peha. Iyavei peicuara co mbahe imondopirä iva pendar iporañete vahe Tüpa upendar yuvirecoi vahe upe.

¹⁹⁻²⁰ Ipipe sui peicua tupri aveira Tüpa pīratasa ndopai vahe yande seroyasar yaico vahe rese. Co pīratasa ivaté vahe ité. Ahe pīratasa Tüpa omboyecua, ombogüerayevise Guahir Cristo omano vahe pāhu sui, iyavei omboguapise oacato coti ivave.

²¹ Osecomboivate catu opacatu iva pendar, ivi pendar seco ivate vahe mborerecua-recuar tēi pīratasa sui iyavei opacatu cūriteindar sui, que oime vaheṛä sui avei.

²² Opacatu mbahe omondo Guahir Cristo povrive, Tahir upe avei ombou mborerecuar ivate catu vahe seco ägua opacatu viroyasar upe.

²³ Opacatu yande seroyasar yaico vahe recocuer rese Cristo seci. Evoicoiyase yande setecuer nungar yaico. Ahe opacatu rupi seci.

2

Tüpa oporovasasa pipe yande pīsiro

¹ Pe rumo, yipindar angaipa pipe peicose, inungar omano vahe peico Tüpa upe.

² Co ivi pipendar pihañemoñetasa rupi tēi peico iyavei ivate rupindar carugar rerecuar porocuaíta tēi avei peroya, ahe Jesús reroyasarēhi ombohe vahe.

³ Yipindar opacatu yande avei yaguata yande remimbotar rupi tēi yande recocuerai pipe. Yande pihañemoñeta raisa rupi tēi avei yayapo mbahe. Sese Tüpa ñemoirosa yaipisira opacatu ambuae ava rupive viña.

⁴ Tüpa rumo yande paraisuereco ité, yande raisu etepri avei.

⁵ Yepe angaipa pipe yaico omano vahe nungar viña, ahe rumo ombou Guahir yande recove ägua. Ahe oporovasasa pipe yande pīsiro.

⁶ Yande mbogüerayevi iri avei niha sese. Ipare seseve yande moingue oyepiri ivave

⁷ ‘tamboyecua opacatu iva pendar upe che porovasasa iyavei che poroaisusa tuvicha vahe che Rahir rembiapo pipe sui curi’ oya.

⁸ Esepia, oporovasasa pipe pe pīsiro Jesús rese peyeroyase. Ndahei rumo pe recocuer sui tēi peñepisiro, ahe rumo ombou porerecosa pēu.

⁹ Ndahei avei ava rembiapo sui tēi ou vahe. Evocoiyase ndiyai chira yayemboivate ai ipipe.

¹⁰ Tüpa niha yande recocuer mohivi Jesucristo rese yande reco ägua mbahe icatupri vahe apo ägua. Ahe mbahe icatupri vahe yipisuive Tüpa omoime yande rembiaporä.

Cristo ombou yande reco tupri ägua

¹¹ Evocoiyase peyemomahenduha yipindar pe recocuer rese. Ndahei rumo judío suindar peico: “Co ndoicuai vahe Tüpa, ndoyembocircuncidai vahe tēi yuvirecoi” ehi judío yuvireco pēu, (ahe judío oyembocircuncida vahe güete rese oyeupe, “Yande Tüpa rembiporavo imbocircuncidapri yaico” ehi yuvireco).

¹² Peyemomahenduha yipindar Cristo ndaperecoi vahe rese. Ahese ndapeicoi Tüpa rembiporavo Israel recua pendar iyavei ndapecuai Tüpa remimbotar semimombehu avei ombou vahe judío upe ipitivi ägua; ndaperecoi Tüpa iyavei ndaperecoi särosa pe ñepisiro ägua co ivi pipe viña.

¹³ Esepia, ahese amombri Tūpa sui peico. Cūritei rumo Jesucristo rese peico. Esepia, ahe vuvi pipe pe reru Vu Tūpa upe.

¹⁴ Ahe avei niha teco tupriisa yandeu. Esepia, ahe yande mboyeseha judío, ndahei vahe judío ñepei vahe nungar yande yeamotarēhiēhi iri āgua oyeupe. Yande ñemoirosa niha opa omocañi yande sui güetecuer mondosa pipe.

¹⁵ Cristo omomba opacatu Moisés porocuita. Ahe oipota ñepei ava nungar teco piasu pipe yande reco āgua, judío iyavei ndahei vahe judío. Ēgüe ehi imocañipa yande yeamotarēhisa yande sui yande reco tupri āgua.

¹⁶ Evocoyase ahe ae omanose curusu rese, ombou yandeu yandeyeupe ñero āgua judío, ndahei vahe judío ñepei ava nungar Tūpa rupi yande reco āgua.

¹⁷ Ahe ou omombehu co tecocuer piasu pēu pe amombri Tūpa sui peico vahe, omombehu avei ore namombrii vahe judío oroico vahe upe 'tiñero yuvireco oyeupe' oya.

¹⁸ Esepia, Cristo rembiapo pipe sui niha oyoya yande judío iyavei ndahei vahe judío yaico vahe yayemboya vaheerā Tūpa rese Espiritu ñepei vahe pipe.

¹⁹ Sese pe ambuae ivi pendar peico vahe, ndahe iri amombri Tūpa sui peico cute. Cūritei rumo Tūpa upendar ité peico opacatu ambuae seroyasar reseve. Yande evocoyase ñepei reseve oñemu guasu vahe nungar yaico.

²⁰ Pe inungar tūparo maranehi imopuhambri ihivipirā hari pendar peico; apóstol iyavei Tūpa ñehe mombehugar evocoyase inungar ihivipi yuvirecoi tūparo moviracua āgua. Jesucristo rumo inungar ita yipindar vahe imohivisa yandeu.

²¹ Ichui Cristo opa yande mboyeseha oyese, inungar oi imopuhambri oyeupi catu-catu iri vahe tūparoguá, ēgüe yahe ipehapri yaico yande Yar upe nara sese ité yande reco āgua.

²² Sese niha, Cristo rese peicose, pe ambuae viroyasar rese avei sētarā nungar peico. Ipípe Tūpa, oEspiritu pipe, secoira.

3

Pablo cuaita ñehesa pīsīrosa resendar mombehu āgua ava ndahei vahe judío upe

¹ Sese, che Pablo, soquendapri aico cohawe Jesucristo recocuer mombehusa sui tēi. Ndahei vahe judío peico vahe pe recocuer aviye āgua rese ēgüe ahe.

² Peicua tupri revo co che poraviquisa Tūpa ombou vahe cheu oporovasasa mombehu āgua pēu nara.

³ Co ñehesa yipindar ndicuasai vahe güemimbotar resendar Tūpa omboyeuca uca vahe cheu, ahe niha aicuachía chíhi pēu.

⁴ Co rese peyeroyase peicua tupri catura co che aracuasa Cristo recocuer resendar oyecua ramo vahe.

⁵ Co ñehesa icatupri vahe ndoicuai eté ava yuvireco aracahe. Cūritei rumo Tūpa oEspiritu pipe omboyeuca güembipeha yuvirecoi vahe upe. Ahe sembipeha apóstol, iñehe mombehugar avei yuvirecoi.

⁶ Evocoi oyecua ramo vahe, ahe co: pe ndahei vahe judío upe avei Tūpa omboura judío upendar nungar tupri porovasasa co ñehesa poropīsīrosa resendar reroyasa pipe. Pe avei oñemu nungar tupri peico, oyoya ore judío oroico vahe rese. Pēu nara avei Tūpa remimombēhugüer aracahendar peyeroyase Jesucristo rese.

7 Yepe ndiyai cheu viña, Tūpa rumo che moingo opīratasa pipe ñehesa pīsirosa resendar mombehu āgua.

8 Che recocuer niha ivi coti catu opacatu ambuae Tūpa reroyasar sui viña, ahe rumo ombou oporovasasa co mboraviquisa ñehesa aviyé vahe Cristo recocuer resendar mombehu āgua ava ndahe vahe judío upe nara cheu.

9 Iyavei ombou che cuaitarā amombehu tupri vaheerā opacatu ava upe opacatu mbahe Aposar pīhañemoñetasa yipīndar ndicuasai vahe.

10 Ēgüe ehi cūrītei oyesuindar aracuasa cua uca āgua viroyasareta recocuer rese opacatu mborerecuar guasu, seco pīrata vahe iva pendar upe.

11 Ēgüe ehi, Tūpa opīhañemoñeta ndopai vahe mboaviye Guahir, yande Yar Jesucristo rese.

12 Sese yande yeroyasa suiño ité yaicatu yande yemboya āgua Tūpa rese yande siquiyeēhisa pipe.

13 Sese aní chira, ndapequerēhi iri Cristo rupi pe guata āgua, pe recocuer rese che yemobaraisusa sui. Iyacatu rumo che paraisusa pereco pe yemboviha āgua.

Cristo poroaisusa

14 Sese añenopiha yande Ru Tūpa rovaque.

15 Ichui serer pāve vireco yuvireco, opacatu seroyasareta iva pendar, ivi pendar avei ñepeí oñemu yuvirecoi vahe nungar.

16 Che aporandu chupe 'tombou güeco porañetesa sui opīratasa yuvireco chupe oEspíritu pipe imoviracua āgua' viya pēu.

17 Ēgüe ahe ayeroqui pe rese pe piha pipe Cristo rereco āgua sese pe yeroyasa pipe. Iyavei pe poroaisusa pipe pe yemoviracua catu āgua peyese

18 'toicatu opacatu ambuae Jesús reroyasareta reseve Cristo poroaisusa tuvichá vahe ité renducua tupri catu āgua yuvireco' viya pēu.

19 Che ayeroqui ahe poroaisusa peicua tupri catu āgua rese (yepē ndayaicatu icuapa tupri āgua yaico viña). Ipīpe sui Tūpa tasecoi pe rese.

20 Cūrītei yamboetei yande Ru Tūpa. Esepia niha, ahe opīratasa pipe ombovichi catu itera mbahe yande porandusa sui, yande pīhañemoñetasa sui avei yandeu. Esepia, opīratasa pipe oporaviqui yande rese.

21 ¡Sese ēgüe tehi imboeteipri Tūpa tasecoi seroyasareta recocuer sui, Jesucristo sui avei apirēhi vaheerā!

4

Ava Espiritu rese oyoya yuvirecoi vahe

1 Sese Cristo recocuer mombehusa sui che roquendasa pipe, "Peico tupri ra pe cuaita rupi Tūpa pe renoisa pipe" ahe pēu.

2 Peyemominira peico pe reco aviyesa pipe, pe reco mbegüesa pipe aveira iyavei peñemosañe pe yeaisusa pipe peyeupe.

3 Peyapo opacatu pe recocuer pipe peico tupri vite āgua peyepāhuve Espiritu Santo pe pītiviisa pipe, pe reco tupri sa pipe avei.

4 Yaico ñepeí nungar Cristo rese iyavei yareco ñepeí Espiritu. Ēgüe ehi avei Tūpa yande poravo ñepeí guārosa rereco āgua.

5 Oime ñepeí yande Yar, ñepeí yande yeroyasa, oime avei ñepeí poroāpiramosa.

6 Oime ñepeí Tūpa, ahe opacatu yande Ru, opacatu yande cuaisar, ahe oporaviqui opacatu yande rese, secoi avei yande rese no.

⁷ Iyavei Cristo niha yande yacatu ñepeí-peí mbahecuasa ombou.

⁸ Sese aipo ehi icuachiapri aracahendar pipe:

“Oso ivave, viraso secopipireta oyeupi; omondo avei porerecosa ava upe” ehi.

⁹ ¿Mara oya aipo ehi: “Oso ivave”? Yipindar ogüeyi co ivi pipe.

¹⁰ Acoi ogüeyi vahe co ivi pipe oso ivate catusave ‘taico opacatu rupi’ oya.

¹¹ Ahe niha ombou amove apóstol seco água, ambuae upe ombou Vu ñehe mombehu água, ambuae upe ombou ñehesa písiroso mombehu água, ombou avei ambuae upe viroyasar rãro água iyavei iporombohe água.

¹² Ëgüe ehi ava viroyasar mbohe oyeupe mboraviqui apo ambuae viroyasar moviracua tupri catu água.

¹³ Opacatu yaico tupri rane itera oyese Jesús rese yeroyasa pipe iyavei yaicua tuprira Tüpa Rahir recocuer. Ahese yaico tuprira yande Cristo rese inungar ava ipihañemoñeta tupri catu vahe, ahese yasupitira Cristo recocuer yaico.

¹⁴ Evocoiyase ndahe iri chira chñivahe tēi nungar ova-ova tēi vahe yaico inungar-ra que ivitu yande reraso vahe oyeupi. Ndayayembopa uca iri chira ava co coti tēi oporombohe vahe upe, que yande rerova pota vahe upe mbahe tēi pipe.

¹⁵ Yande rumo evocoiyase yañehera mbahe supi eté vahe rese poroaisusa pipe iyavei yaroya catu-catu irira Cristo opacatu yande recocuer pipe. Ahe niha yande rerecuar secoi.

¹⁶ Esepia, ahe yande mboya tupri oyese, yande moenda tupri avei yande rereco, Ëgüe ehi ahe yande mboyemboya oyese ñepeí vahe nungar. Ñepeí-peí yaporaviqui tuprise, ahese opacatu yayeroya catu itera, yayemoviracua catu aveira yande yeaisusa pipe.

Cristo yande recocuer mbopiasu

¹⁷ Che aipo ahe Tüpa rer pipe pēu che pe cuaisa pipe: peico iri eme ava Tüpa cuaparēhi nungar. Ahe yuvirecoi vahe ité opihañemoñeta raisa pipe,

¹⁸ ndoicatu mbahe renducua tupri água iyavei ndovirecoi tecovesa Tüpa suindar oyese yuvireco. Esepia, ndoicuai Tüpa ñehe opihañemoñetañehisa pipe yuvireco.

¹⁹ Ndoyvinochi iri mbahe tēi apo água iyavei oyemondo ité mbahe tēi pipe. Ndosiquiyei eté opacatu güemimbotarai apo água yuvireco.

²⁰ Pe rumo ndapeyembohei eté evocoi nungar mbahe rese Cristo rese peicose,

²¹ supi eté pesenduse porombohesa supi tupri vahe Jesucristo resendar iyavei peyembohese secocuer rese.

²² Ahe yande mbohe yande recocuerai yipindar vahe reya água. Esepia, ahe naporai vahe yande mbopa tēi yande pñahañemoñeta rai apo água.

²³ Pesecuñaro catu pe yapisacasa.

²⁴ Peecuño ité avei pe recocuer piasu pipe. Sese niha Tüpa yande apo yande reco ivi tupri água yande reco maranehi vahe rã supi tupri vahe pipe, inungar ahe.

²⁵ Sese ndaperemira iri chira, iya rumo peñehe ñepeí-peí mbahe supi tupri vahe rese peyeupe. Esepia niha, yande opacatu ñepeí ava rete resendar nungar yaico.

²⁶ Peyemboangaipai rene peñemoirose, iyavei ndiyai peñemoiro ari momba peico.

²⁷ Peipota ucai rene Carugar upe peyeupe mbahe apo água.

28 Acoi imonda rai vahe, timonda iri eme; toporaviⁱquiño ava iparaisu vahe pītivii āgua.

29 Ndapeñehe rai chira, iyacatu rumo peñehe tuprira ñehesa aviye vahe pipe ambuae pe ñehe rendusar monguerēhi catu āgua yuvireco yande Yar rese.

30 Peyapoī rene mbahe Espírito Santo mbovīhaēhi āgua. Ahe niha Tūpa ombou yandeu ‘toicua ava co cheundar oipisira ari ipa vahe pipe poropīsīrosa ñepeī reseve vahe yuvireco’ oya.

31 Peyepēpi co nungar mbahe sui: piha vīracuasa, mbahe mboasi pīratasa, ñemoīrosa, pe rāse aisa, opacatu pe ñehe rai, opacatu ambuae mbahe-mbahe tēi sui avei.

32 Iya rumo peico tupri ambuae upe pe yeaisusa pipe. Peñeroño itera peyeupe yepi inungar Tūpa iñero Guahir Cristo rese pēu.

5

Mara ehira ava Tūpa rahir yuvireco

1 Pe niha Tūpa rahir sembiaisu peico. Sese peyemonguerēhi catu secocuer moña āgua.

2 Peico pe poroaisusa pipe, inungar Cristo yande raisu iyavei oyemondo yande recocuer rese, ovesa nungar seropovēhepri Tūpa uve. Ahe aviye ité inungar mbahe sīacua vahe chupe.

3 Pe niha Tūpa upendar ité peico. Sese ndapeyemboaguasai chietera iyavei ndapeicoī chira ambuae mbahe naporai vahe pipe, que yemombotasa opacatu mbahe rese.

4 Ndapeñehe rai chira que poromochisa rese, que ēgüe ehi tēi vahe rese, anise que co coti-coti tēi vahe rese. Esepia, evocoi nungar ndaheī mbahe aviye vahe. “Aviye ndeu” peye catuñora rumo Tūpa upe peico.

5 Peicua niha acoi oyemboaguasa vahe, oyapo vahe mbahe naporai vahe, que yemombotasa (esepia, ahe inungar mbahe rahanga mboeteisa), evocoi nungar ndoyuvirecoī chira Tūpa povrive iyavei Tahir Cristo povrive.

6 Ndapeyembopa ucai chira evocoi nungar ñehesa tecocuer ēgüe ehi tēi vahe upe. Esepia, evocoi nungar mbahe apo pipe sui ou Tūpa ñemoīrosa ava seroyasarēhi upe.

7 Sese ndapeyemboyai chira evocoi nungar ava rese.

8 Peicua niha yipīndar peico pītumimbisa nungar mbahe-mbahe tēi pipe. Cūrtei rumo peico tesapesa nungar pipe yande Yar rese. Sese peico tupriño ité Tūpa suindar poroesapesa pipe.

9 Esepia, poroesapesa pipe yande recose, yayapo opacatu mbahe tupri ava upe yande reco īvi tuprisave, mbahe supi tupri vahe pipe.

10 Sese peyembohe catu mbahe Tūpa piha rupindar apo āgua rese.

11 Peyepēpi ité opacatu pītumimbisa nungar ava rembiapo ai, ēgüe ehi tēi vahe sui. Iya peicua uca vaira co nungar mbahe.

12 Esepia, ahe sembiapo yemochīsa ñomipri tēi vireco yuvireco.

13 Acoi yamboyecua ucasa rumo evocoi nungar mbahe tesapesa nungar pipe, ahese oyecua tupri secocuer naporai vahe.

14 Esepia, co tesapesa omboyecua tupri opacatu mbahe recocuer yandeu. Sese aipo ehi:

“Peyemopoāse pe oque vahe nungar, peyepēpi omano vahe nungar pāhu sui. Ahese niha Cristo pe recocuer resapera” ehi.

15 Sese pemahecua tupri pe recocuer rese. Peicoī rene ndayaracuai vahe nungar; peicora rumo pe yapisaca tupri vahe pipe.

16 Peiporu catu ñepei-peí ari yande Yar upe nara pe recoveseve. Esepia, cūrítei tecocuer co iví pipe mbahe tēi.

17 Sese peico eme ndoyemboaracuai vahe; iya rumo peyembohe catu yande Yar remimbotar apo āgua.

18 Ndahei chira caguar tēi peico, evocoi mbahe ndoporopoisui mbahe tēi apo uca āgua. Peico catura rumo Espiritu Santo pe mbohesa pipe.

19 Peñehe catu Salmo pipe, opacatu Tūpa upendar sapucaisa pipe avei peyeupe; pesapucaí, pemboetei avei opacatu pe piha pipe yande Yar.

20 “Aviye” peyera opacatu mbahe rese yande Ru Tūpa upe yande Yar Jesucristo rer pipe yepi.

Omenda vahe cuaitarā mbiguai reseve

21 Peyemboyeroa catu ambuae rese Cristo mboeteisa pipe peico.

22 Cuña tomboyeroa omer, inungar yande Yar omboyeroa yuvireco.

23 Esepia, imer güembireco cuai āgua secoi, ěgüe ehi avei niha Cristo viroyasar cuai āgua oico. Viroyasar Pisirosar avei secoi, inungar güetecuer ité sereco.

24 Evocoiyase inungar seroyasar omboyeroa Cristo yuvireco, cuña avei niha ěgüe ehira opacatu omer mboyeroa yuvireco.

25 Iyavei cuimbahe osaisura güembireco, inungar Cristo osaisu opacatu viroyasar, omondo güecocuer chupe nara.

26 ěgüe ehi yande recocuer moatiro yande angaipa sui i pipe Tūpa Ñehengagüer reroyasave.

27 Iyavei oyeupe yande rerecora yande reco catuprisa pipe iyavei yande reco quihañesa pipe ‘tipo eme que mbahe tēi secocuer rese’ oya, ‘toyuvirecoi cheu nara güeraño ité güeco tuprisave’ ohesa pipe.

28 ěgüe ehi aveira ava güembireco raisu inungar ahe oyeaisu. Acoi ava osaisu vahe güembireco, oyeaisu ité ahe ae.

29 Supi eté, ndipoi eté que ava ndosaisui vahe güetecuer. Ahe rumo ocaruño ité oyemoviracua āgua, oñearo tupri avei. ěgüe ehi avei Cristo opacatu viroyasar upe.

30 Esepia, chupendar ité yaico setecuer nungar.

31 “Sese ava osevara vu, osi güembireco rese güeco āgua; ñuvirío yuvirecoira ñepei ava nungar.”

32 Ahe ñehesa pipe oime mbahe oyecua ramo vahe aviye vahe ité. Ahe Cristo opacatu seroyasareta resevendar ñehesa.

33 ěgüe ehi eté ñepei-peí pesaisu pe rembireco pe yeaisu nungar. Iyavei cuña tombotei tupri omer yuvireco.

6

1 Chihivahe, pemboyeroa pe yesupa, pe si avei yande Yar raisu pipe. Esepia, ahe niha pe cuaita.

2 Co porocuaíta yipindar omombehu vahe porovasasa pisi āgua imboaviyesa pipe aipo ehi: “Pemboeteira pe ru, pe si avei.

3 ěgüe peyese, pe rorivetera iyavei pe reco pāhumbucu catura co iví pipe” ehi.

4 Iyavei pe iyésupa, pemoñemoiro ucai rene pe rahir. Iyacatu rumo pemboacua imboaracuasa tupri pipe, imbohesave avei yande Yar upe saísusa pipe.

⁵ Pe avei no mbiguai, pemboyeroya catura pe rerecuar co ivi pipe imboetisave. Ichui pe siquiyepave avei mbahe tupri pipe mbahe peyapora inungar-ra Jesucristo upe ité mbahe peyapo vaherã viña.

⁶⁻⁷ Pe poraviqui tupri catu chupe nara, ndahei chira rumo pe repiaseño imboviña água tēi; pe poraviquira rumo pe querēhisa pipe Cristo rembiguai pe recosa pipe opacatu pe rorivetesave yande Yar upe pe cuaita mboaviye tupri água.

⁸ Esepia, peicua Tūpa omboepira opacatu yandeu yayapose mbahe aviye vahe mbiguai yaicose, anise que ndahei vahe mbiguai avei.

⁹ Iyavei pe serecuar, peico tupri aveira pe rembiguai upe pe recoasiēhisa pipe. Peicua niha pe opacatu Tūpa pe rerecuar ivave chini vahe povrive peicose. Ahe niha ndayande raisu yoavirati yande rereco.

Ava Cristo rese yuvirecoi vahe yoepisa resendar

¹⁰ Sese peyemoviracua catu yande Yar rese, ipiratasa rese avei.

¹¹ Peñearo tupri catu Tūpa pīratasa pipe pe yemoviracua água Carugar pe mbopa tēiēhi água.

¹² Esepia, yande ndahei ava ité amotarēhise yayepihamoviracua. Yande rumo yayepihamoviracua espíritu naporai vahe ndoyecuai vahe upe iyavei co ivi pipendar Carugar ipīrata vahe pītumimbisa pendar reroyaēhi água.

¹³ Sese peipisi catu opacatu mbahe Tūpa ombou vahe pēu pe yoepi água. Evocoiyase yepe oime tēira mbahe tēi pēu viña, peyemoviracuaño itera rumo chupe.

¹⁴ Ēgüe peye aveira peyemoviracua catu ñehesa supi tupri vahe pipe. Iyavei peyoepira pe reco ivi tuprisa pipe.

¹⁵ Peyemoingatu voi Tūpa Ñehengagüer ñeroisa resendar mombehu água yepi.

¹⁶ Iyavei pereco catu Tūpa rese pe yeroyasa peyese. Ahe inungar sundao yoepisa. Ipipe peyoepira carugar uhu tata resendar nungar pe atoisa sui.

¹⁷ Poropisirosa inungar sundao āca ndiru, ipipe tapeyoepi; peiporu avei Tūpa Ñehengagüer, ahe niha inungar quise pucu Espíritu vireco vahe.

¹⁸ Peyeroqui catu Espíritu pīratasa pipe ari yacatu rupi Tūpa upe opacatu yeruresa pipe. Pemahemoha catuño ité pe yeruresa pipe. Peyeroquiño ité avei opacatu ava Tūpa reroyasar rese yepi.

¹⁹ Peyeroqui avei che rese. Evocoiyase Tūpa tombou che ñehese água cheu che siquiyēhisa pipe ñehesa ñepisirosa icuapi ramo vahe cua uca água ava eta upe.

²⁰ Tūpa niha che cuai co ñehesa mombehu água. Ichui tēi cūrítei soquendapri aico. Peyeroqui catu che rese che siquiyēhisa pipe co ñehesa mombehu água.

Ñehesa ipa vahe

²¹ Yande rivri Tiquico, yande rembiaisu, che pītiviisar omboaviye vahe ocuaita yande Yar upe mboraviquisa rese, ahe omombehura opacatu che recouer, mbahe che rembiapo avei pēu.

²² Sese amondo eipeve pēu ore recouer mombehu água 'ipipe toyemonguerēhi catu yuvireco' viya.

²³ Yande Ru Tūpa iyavei yande Yar Jesucristo tomondo opacatu viroyasar upe teco catupri água, iporoaisu água, oyese yeroya água avei.

²⁴ Tūpa tosovasa opacatu yande Yar Jesucristo raisupar saisusa ñepeí reseve vahe pipe. Aipo rupive.

PABLO REMBICUACHIA FILIPO PNDAR UPE FILIPENSES

Pablo mahenduhasa Jesús reroyasar Filipo pndar upe

¹ Che, Pablo, iyavei Timoteo oroico Jesucristo rembiguai. Aicuachía co che ñehe pëu, pe Tüpa upendar Jesucristo rese peico vahe tecua Filipo ve, Jesús reroyasar rãrosar uve, seroyasar rese ihañeco vahe upe avei.

² Yande Ru Tüpa, yande Yar Jesucristo tape rovasa pe reco tupri ãgua.

Pablo yeruresa Jesús reroyasar rese

³ Pe rese che mahenduhasa pipe, “Aviye ndeu” ahe Tüpa upe yepi.

⁴ Iyavei che ayerurese, ari rupi ayeroqui opacatu pe rese Tüpa upe che viharetesa pipe yepi.

⁵ Esepia, oyoya yañepitivii Jesucristo resendar ñehesa icatupri vahe rese, acoi pe seroya ramo suive.

⁶ Che aicua co Tüpa omboipi mbahe aviye vahe güemimbotar apo pe rese, ahe omboaviye tupri itera acoi ari pipe oyevice yande Yar Jesucristo.

⁷ Aviye ité aipo rupi che pihañemoñeta areco opacatu pe rese. Esepia, che opoaisu ité. Opacatu niha oyoya yaipisi Tüpa porovasasa yepe co che roquendasave añ, anise que co coti rupi aico mborerecuar rovai co ñehesa pãsirosa resendar repi ãgua iyavei amboyecua vaherã ahe ñehesa supi tupri vahe yuvireco chupe.

⁸ Tüpa oicua ité che opoaisu etepri opacatu. Esepia, Jesucristo niha pe raisu uca cheu.

⁹ Che aporandu vite Tüpa upe che yeruresa pipe: “Toicua tupri oaracuasa pipe oyeaisu catu-catu iri ãgua yuvireco” ahe pëu.

¹⁰ Ipipe sui peicua mbahe aviye catu vahe poravo ãgua yepi; ëgüe peye aveira pe recocuer moatiro ãgua peico. Evocoyase ndipoi chira angaipa pe rese acoi Jesucristo ouse curi.

¹¹ Perecora pe recocuer aviye vahe ité Jesucristo ombou vahe pëu Tüpa mboetei ãgua.

Cristo Pablo recovesa ité secoi

¹² Che rivireta, aipota peicua co mbahe tõi co oyapo vahe yuvireco cheu, ahe ichui setá catu ava osendura Jesucristo resendar ñehesa yuvireco.

¹³ Evocoyase opacatu mborerecuar guasu poraviquisa pndar iyavei opacatu ambuae ava oicuapa che roquendasu Jesucristo rupi che guata sui tõi yuvireco.

¹⁴ Iyavei setá etepri yande rivri che repiase soquendapri che recose yuvireco, oyemonguerëhi catu Tüpa Ñhengagüer mombehu ãgua osiquiyeeñisa pipe. Yande Yar rese evocoyase oyeroyá catu yuvireco.

¹⁵ Supi eté oime ava oñehe angahu tõi vahe Jesucristo rese che reroñsirosa pipe tõi. Oime rumo amove ava oñehe tupri Jesucristo rese opihañemoñeta tuprisa pipe.

¹⁶ Evocoi ava oñehe tupri oporoaisusa pipe, ahe oicua cohava che roquendasave yuvireco, “Co ñehesa Tüpa ñehe pãsirosa resendar, ahe supi eté vahe, ndahei temira tõi” ahese.

¹⁷ Evocoi ambuae ava Cristo rese oñehe angahu tõi vahe oyeupe nara tõi oipota mbahe. Ahe che reco momara pota catu co che roquendasave che rõi viteve.

18 Mara etemo che areco aipo mbahe-mbahe tēi viña. Yepe amove ava ipihañemoñeta rai yuvireco viña, opacatu rumo ñehesa Cristo rese. Ahe niha che mboviha.

Che mboviha catu aveira.

19 Esepia, che aicua co opacatu mbahe-mbahe tēi sui añepisirora pe yeruresa pipe iyavei che pītiviira Jesucristo Espiritu.

20 Che aipota ité, asāro avei opacatu che recocuer sui che chīēhi āgua añehe vaheṛā opacatu che siquiyeēhisa pipe. Evocoyase yepe amanora, anise aicovera, tomboetei catu ava Cristo che recocuer repiase yuvireco.

21 Esepia, Cristo che recovesa ité secoi; amanse rumo, aviyeño itera cheu.

22 Aicove vitese co ivi pipe, aicatura aporaviqui tupri yande Yar recocuer rese. Evocoyase ndaicuai uma revo aviyeṛa cheu.

23 Ndaicatu co ñuvirio che pīhañemoñetasa rereco: amove amano pota che so āgua ivave Cristo piri. Ahe aviye catura cheu viña.

24 Pēu nara rumo aviye catu aicove vitese co ivi pipe.

25 Sese che aicua aicove vite vaheṛā pe pītivi vite āgua, pe guata tupri vite catu āgua iyavei pe viharete catu āgua pe Jesús reroyasa pipe.

26 Evocoyase che rereco vitera peye pe piri. Ahese pe viharetesa pipe, “Imboeteipri Jesucristo tasecoi” aipo peyera che repiase.

27 Co catu toyoya tupri pe recocuer co ñehesa aviye vahe Jesucristo resendar rese. Evocoyase asose pe repia, anise amombri aicose pe sui, asendu pota pe resendar ñehesa aviye vahe, pe yemoviracuasa resendar, pe pīhañemoñetasa yoyasa resendar iyavei pe poraviqui pīratasa resendar pe poreroyasave co ñehesa poropisirosa resendar rese.

28 Iyavei ndapeyembosiquiyei chira pe amotarēhimbar sui. Evocoyase ahe oicuaṛa yuvireco chupe ité Tūpa omondora imocañi āgua; pe rumo Tūpa pe pīsirora curi.

29 Supi eté ndahei Jesucristo recocuer reroya āgua güeraño Tūpa oipota pēu, sese pe yemombaraisu āgua avei oipota.

30 Esepia, pe, che avei oyoya tupri yaporaviqui pīrata yande amotarēhimbar pāhuve yaico. Iyavei acoi pesepia yipindar che aporaviqui pīrata che amotarēhimbar pāhuve vichico, iyavei cūrtei peyandu mara ahe aporaviqui pīrata vite ipāhuve yuvireco.

2

Cristo yemominisa, seco ivatesa resendar avei

1 Iyavei Cristo pe monguerēhi, pe mboviha oporoaisusa pipe oico, Espiritu avei secoi pe rese. Peyeaisu tupri iyavei pe yeaisusa pipe peñepitivi.

2 Sese che mboviha catu peye: perecoṛa pīhañemoñetasa ñepeṛi reseve, oyoya guasu avei peyeaisura, oyoya aveira pe pīhañemoñetasa, ñepeṛi reseve mbahe pe remimbotar rese avei.

3 Ndapeyapoi chira mbahe peyeupe güeraño tēi. Ndapeyapoi chiaveira mbahe pe yemovivate aisave. Iyacatu rumo pe reco yemominisa pipe ambuae aviye catu perecoṛa peyesui.

4 Pesecai rene mbahe aviye vahe peyeupe nara güeraño; iyacatu rumo peseca avei mbahe aviye vahe ambuae ava reco tupri āgua.

5 Inungar Cristo pīhañemoñeta, ēgüe peye tupri aveira.

6 Yepe ahe Tūpa recocuer vireco, “Taseya eme Tūpa recocuer areco vahe ivive che so āgua” ndehi.

7 Opa ité rumo oseya, oyemboava inungar mbiguai tēi ou.

⁸ Ēgüe ehi oyemomini.

Vu porocuita reroyasa pipe ou iyavei omano poromochisa pipe curusu rese.

⁹ Sese Tūpa omboivate catu, omondo avei sererguā ivate catu vahe opacatu ambuae rer sui.

¹⁰ Evocoiyase ahe terer ivate catu vahe renduse 'toñenopiha opacatu iva pendar, ivi pipendar, opacatu omano vahecuer avei yuvireco' oya.

¹¹ Ichui toicua opacatu, "Jesucristo ité yande Yar" tehi yande Ru Tūpa mboetei āgua yuvireco.

Jesús reroyasar tesapesa nungar yuvirecoi co ivi pipe

¹² Evocoiyase che rembiaisu, yepe che amombri aico pe sui viña, iya rumo pe che reroya vite ité peye inungar aicose pe pāhuve cuese. Che aipota peicora písirosa pipeño ité Tūpa mboeteisave ichui pe siquiyesa pipe.

¹³ Esepia, Tūpa ombou pe querēhisa semimbotar apo āgua. Güemimbotar rupi avei ombou pīratasa imboaviye āgua pēu.

¹⁴ Peyapo opacatu mbahe pe ñehe-ñehe tēiēhisa pipe, pe yepoepi-epiēhisa pipe avei.

¹⁵ Sese tipo eme mbahe pe rembiavi que pe reco raisa pe rese. Evocoiyase peicora Tūpa rahir ndayangaipai vahe ava mbahe-mbahe tēi oyapo vahe pāhuve. Ahe ipāhuve pe recōcuer osesapera, inungar tataendi osesape pītumimbisave.

¹⁶ Pemombehuse ñehesa tecovesa resendar yuvireco chupe, acoi ouse Cristo curi, aviharetera pe rese. Esepia, pe rese che poraviquisa ēgüe ndehi tēi vaherā.

¹⁷⁻¹⁸ Jesucristo recocuer rese pe yeroyasa, ahe inungar mbahe seropovēhepi Tūpa upe. Aviyeteramo ichui tēi che yucara yuvireco. Ahe omboaviye tupri itera pe porerecosa Tūpa upe. Yepe che yucara yuvireco viña, che rumo ayemboviñañora opacatu pe rese. Pe avei, pevihañora che rese.

Pablo oicuachía Timoteo, Epafrodito recocuer resendar

¹⁹ Che ayeroya yande Yar Jesús rese amondo pihaivi vaherā Timoteo pe repia. Ahe omboyevisse ñehesa pe recocuer resendar, ahese che aviharetera.

²⁰ Iyavei ndipoi eté ambuae ava Timoteo nungar che pihañemoñetasa rupi tupri imahenduha vahe pe rese pe reco tupri āgua.

²¹ Esepia, opacatu oseca güemimbotar tēi apo āgua, ndosecai eté Jesucristo remimbotar yuvireco.

²² Pe niha peicua Timoteo reco tuprisa opacatu upe. Iyavei che pītivi Tūpa Ñehengagüer mombehu āgua, inungar chīhivahe oipītivi oyesupa, ēgüe ehi che pītivi oico.

²³ Sese che aipota imondo āgua pe repia acoi aicuase mara ehira che rereco yuvireco.

²⁴ Che rumo ayeroya yande Yar rese aso pihaivi vaherā che teieté pe repia.

²⁵ Iyavei revo aviye catu co yande rivri Epafrodito amboyevira pe piri ahe pembou vahe che pītivi āgua mbahe cheu ipane vahe rese. Ahe che ndugüer oporaviqui pīrata vahe Tūpa upe.

²⁶ Esepia, ahe pe repia pota ité opacatu. Iyavei ahe ehiño oico pēu peicuase imbaheasi.

²⁷ Supi eté imbaheasi oico, seni eté omano viña. Ipare rumo Tūpa oiparaisuereco, ndahei ahe güeraño oipītivi, che avei che paraisuereco co viharēhisa yeapi-apiñoēhi āgua cheu.

²⁸ Sese che amondo pota poyava ité pe piri sese pe yemboviha iri āgua, che mboviha iri āgua avei.

²⁹ Peipisi tupri pēu iyepotase pe viharetasa pipe. Esepia, ahe yande rivri yande Yar rese secoi vahe ité. Pesaisu itera evocoi nungar ava yepi.

³⁰ Yande Yar rese oporaviquise che piri seni omano. Ahe niha oyemondo ité mbahe-mbahe tēi porara āgua che pítivii pipe. Esepia, pe ité ndapeicatu che pítivii peye.

3

Oicoete ai vahe ité

¹ Iyavei, che rivireta, peyembovihaño yande Yar rese peicose. Ndachecuerai eté ñehesa aicuachía vahecuer cuachía iri āgua pēu. Iyavei aviye catu ité pēu nara.

² Peñearo acoi ava cave nungar tēi sui, oyapo vahe mbahe tēi iyavei güetecuer omomara tēi vahe.

³ Yande rumo imbocircuncidapri nungar supi eté vahe Tūpa mboyeroyasar yaico. Esepia, yayerure Espiritu pipe Tūpa upe; yayemboviha avei Jesucristo reroyasar yande recosa rese. Ndahei yande retecuer rese tēi yayeroya,

⁴ yepe che supi eté ayeroya catura ambuae ava sui evocoi nungar mbahe rese viña.

⁵ Esepia, che imbocircuncidapri aico ocho arí pipe che hare, israelita, Benjamín suindar aico. Iyavei che hebreo, hebreo rahir avei aico no. Che yipindar fariseo recocuer areco. Evocoiyase ayembohe tupri fariseo aracuaa judío porocuaita resendar rese vichico.

⁶ Ipípe sui tēi eté aseca-seca catu ayapo vahe rā mbahe opacatu ava Jesucristo reroyasar upe vichico. Co porocuaita reroyasa rese rumo ndipoi eté ava “mara” ehi vahe yuvireco cheu.

⁷ Opacatu co mbahe aviye ité cheu aracaco viña. Cūritei rumo Jesucristo rese aicose, ēgüe ehi tēi vahe nungar areco.

⁸ Iyavei opacatu que ambuae mbahe aviye cheu viña, areco rumo inungar iti che Yar Jesucristo recocuer cuasa pipe. Opacatu ahe mbahe aseya Cristo rese che reco āgua. Supi eté Cristo rereco āgua areco opacatu ambuae mbahe iti nungar tēi

⁹ ‘taico sese’ che yapave. Ndahei porocuaita mboaviyasa rese tēi aseca che reco catupri āgua, che rumo aseca Jesucristo rese che yeroyasa pipe sui ēgüe ahe vahe rā. Ēgüe ehi eté Tūpa che pisi seco catupri vahe nungar Cristo rese che yeroyasa pipe.

¹⁰ Che aipota ité Cristo cua tupri catu āgua. Iyavei areco pota pīratasa icuerayevi agüer resendar cheyese. Iyavei aipisi pota iparaisu agüer. Iyavei inungar ahe omano, ēgüe ahe pota avei.

¹¹ Ēgüe tahe avei che cuerayevi āgua omano vahe pāhu sui, ahe co che asāro vichico.

Pablo osupiti pota ité güeco maranehi āgua

¹² “Asupiti ité opacatu co mbahe” ndahei eté. Iyavei, “Ndaseco marai vahe ité aico” ndahe vitei chietera. Che rumo aseca vite ahe tecocuer che recorā. Esepia, Jesucristo che pisi ité oyeupe nara.

¹³ Che rivireta, “Che ae tēi co tecocuer ihīvi vahe opa ité ayapo vichico” ndahei chira pēu. Co rumo mbahe che ayapo, ayemboesarai opacatu che reco agüer sui. Iyavei opacatu che recovesa rese aguata tenondeño ité.

¹⁴ Esepia, Tūpa che renoi ivave che so āgua aipisi vaherā iporerecosa iva pendar Jesucristo rese che recose. Ahe niha aipota catu ité cheyeupe nara.

¹⁵ Aipo rupi iya yande pihañemoñetara opacatu yande yaracua tupri vahe. Que revo yande pihañemoñetase que ambuae mbahe rese tēi, ahe Tūpa oicua ucara yandeu.

¹⁶ Co rese rumo yaicora yande yembohesa yareco vahe rupi tupriño ité.

¹⁷ Che rivireta, peico che nungar iyavei pemahecua tupri ava ore recocuer moñasar rese.

¹⁸ Iyavei amombehu setá yupagüer pēu, cūrítei amboyevi iri che yasehosa pipe imombehu pēu. Setá ité oime ava co ñehesa Cristo mano agüer curusu resendar amotarēhimbar.

¹⁹ Ahe rumo imocañipirā yuvirecoira curi. Oyemonguerēhi opacatu mbahe tēi apo āgua rese yuvireco yepi. Ahe niha otūpa nungar ité vireco. Iyavei güeco ivate aisa pipe oyapo mbahe tēi yande mochi ai vahe yuvireco. Co ivi pipendar mbahe-mbahe tēi reseño ité ipihañemoñeta yuvireco.

²⁰ Yande rumo ivave nara ité yaico. Iyavei yasāro ité yaico iva sui ou vaherā yande Pīsirosar, ahe yande Yar Jesucristo.

²¹ Ahe opīratasa pipe virecora opacatu mbahe opovrive. Ahe opīratasa pipe avei osecuñaropara yande retecuer ēgüe ehi tēi vahe, ahesi inungar ahe setecuer sendi yai, nimarai vahe, ēgüe yahe aveira yande yaico.

4

Yayemboviha yande Yar rese yepi

¹ Sese che rivireta, che rembiaisu, peyemoviracuara yande Yar rese yepi. Che niha opoepia pota ité. Pe inungar porerecosa imboupri peico cheu. Esepia, che vihasa ité peico.

² Ambuae mbahe, Evodia iyavei Síntique toyuvirecoi oyecupihir nungar ité yande Yar reroyasa pipe yuvireco.

³ Nde niha che pītivii tupri vahecuer che poraviquisa rese eve. Eipītivii evocoi cuña. Esepia, ahe niha oyembopihaviracua ité che pītiviise Tūpa Ñhengagüer pīsirosa resendar mombehu āgua yuvireco cuese. Oyoya Clemente rese iyavei ambuae oporaviqui vahe rese che rupi yuvireco. Ahe serer opa icuachiapri yuvireco Tūpa cuachiar tecovesa apirēhi vahe resendar pipe.

⁴ Peyemboviharete ari yacatu rupi yande Yar rese yepi, “¡Peyembovihaño ité!” ahe aipo pēu.

⁵ Pemboyecua catu opacatu ava upe pe reco mbegüesa. Esepia, cōimi yande Yar yevi iri āgua yandeu.

⁶ “¿Mara ahera pīha vichico?” ndapeyei chira que mbahe rese. Iyacatu rumo peyerurera opacatu evocoi nungar mbahe rese Tūpa uve, peporandura evocoi mbahe rese iyavei, “Aviye ndeu” peyera chupe.

⁷ Evocoiyase Tūpa omondora güeco tuprisa pēu, pe Jesucristo rese peico vahe. Co teco tuprisa niha aviye catu ité opacatu ava pihañemoñetasa sui. Ipīpe sui Tūpa osārora pe piha, pe pihañemoñetasa avei pēu.

Yandepihañemoñetara opacatu mbahe aviye vahe rese

⁸ Co ipa, che rivireta: yande pihañemoñetara opacatu mbahe supi tupri vahe rese, poromboetei água rese, mbahe ihívi vahe rese, mbahe maranehi rese, mbahe yande mboviha vahe rese, opacatu mbahe aviye vahe icuapri vahe rese. Iyavei yande pihañemoñetara que ambuae mbahe aviye vahe rese, imboeteipri vahe rese avei.

⁹ Iyavei peyapo ité acoi mbahe che opombohe vahecuer, pesendu vahe che aipo ahese, che repia vahecuer yapose peye. Evocoyase Tūpa güeco tuprisa reseve secoira pe rese.

Filipo pendar porerecosa Pablo upe

¹⁰ Aviharete yande Yar rese. Esepia, pemahenduha irimi che rese pe porerecosa mbou água cheu. “Sesarai yuvireco che sui” ndahei chira pēu. Pe rumo yipindar ndapeicatui eté che pítivii água peye.

¹¹ “Ipane mbahe cheu” ndahei chira pēu. Esepia, ayembohe che viharete água mbahe che rembiereco rese.

¹² Aicua mara vahe yande paradisusa pipe yaico, aicua avei mara vahe mbahe rereco ati água. Ayembohe avei che viha água opacatu mbahe oimese cheu, que chehitarose, ndache riepoise, que oimese sumbire vahe mbahe cheu, que mbahe ipanese cheu.

¹³ Aicatu opacatu mbahe uve che yemoviracua água. Esepia, Cristo ombou che pīrata água.

¹⁴ Pe rumo peyapo mbahe aviye vahe cheu che pítivii eteprisave peye mbahe-mbahe tēi oimese cheu.

¹⁵ Iyavei pe Filipo pendar peicua avei acoi yipindar peipisise písirosa resendar Tūpa Ñehengagüer acoi che sose Macedonia sui, ndipoi eté Jesús reroyasar ambuae tecua pendar iporereco vahe yuvireco che rese. Pe güeraño pembou pe porerecosa, “Aviye” pe hesa pipe che pítivii água.

¹⁶ Iyavei aicose Tesalónica ve, pembou pe porerecosa cheu ñuvirío yu-pagüer che pítivii água.

¹⁷ Ndachepihañemoñetai mbahe arocuano tēi vaherã pe sui. Che rumo aipota Tūpa omboevira pēu co pe porerecosa pembou vahe cheu.

¹⁸ Che opa aipisi pe porerecosa Epafrodito upe pembou vahe. Evocoyase oimeño ité iyavei sumbire vite cheu. Ahe pembou vahe cheu aviye ité, inungar itaisi siacua vahe, iyavei inungar mbahe seropovēhepi aviye vahe Tūpa upe.

¹⁹ Evocoyase yande Ru Tūpa, ombahe eta porañete vahe sui omondora opacatu mbahe ipane vahe pēu Jesucristo rese oime vahe.

²⁰ ¡Egüe tehi timboeteisa yande Ru Tūpa! ¡Ahe apirēhi vahe secoi yepi!

Ñehesa ipa vahe

²¹ Aviye, pemombehu che mahenduhasa opacatu Tūpa reroyasar Jesucristo rese yuvirecoi vahe upe eipeve. Iyavei opacatu Jesús reroyasar yuvirecoi vahe che rese, ahe avei omondo omahenduhasa yuvireco pēu.

²² Iyavei opacatu ambuae yuvirecoi vahe cohove Jesús reroyasar iyavei acoi mborerecuar guasu rétave yuvirecoi vahe, ahe ité avei omondo omahenduhasa yuvireco pēu.

²³ Yande Yar Jesucristo tape rovasa opacatu. Aipo rupive.

PABLO REMBICUACHIA COLOSA PENDAR UPE COLOSENSES

Pablo mahenduhasa Jesús reroyasar Colosa pendar upe

¹ Che, Pablo, Jesucristo apóstol aico Tūpa remimbotar rupi yande rīvri Timoteo reseve.

² Co aicuachía pēu, pe Cristo rese peico tupri vahe Colosa ve, Tūpa upendar peico vahe. Yande Ru Tūpa tape rovasa, tombou pe reco tupri āgua pēu.

Pablo yeruresa Jesús reroyasar rese

³ Ari yacatu ore yeroqui pipe, “Aviye ndeu” orohe yande Yar Jesucristo Ru Tūpa upe pe rese.

⁴⁻⁵ Esepia, oroyandu acoi oyepota ramosē Tūpa ñehe supi eté vahe, aviye vahe pīsirosa resendar pēu, peyapisaca tupri sese. Ipīpe sui peyeroya ivave pe rei que āgua Tūpa porerecosa pīsī āgua. Ahe ichui peyeroya tupri Jesucristo rese iyavei pesaisu opacatu ambuae Tūpa rembiporavo yepi.

⁶ Co ñehesa imombehusa avei opacatu ivi rupi, setá ava oipīsī tupri avei yuvireco. Inungar acoi pesenduse yipindar Tūpa porovasasa resendar ñehesa, ipīpe sui peicua tupri catu ahe porovasasa supi eté vahe.

⁷ Co ñehesa yande rembiaisu yande mboetasa Epafras pe mbohe. Ahe mbia yande Yar Jesucristo rese oporaviqui vahe ore rupi, ocuaita viroya tupri vahe pe pāhuve.

⁸ Ahe omombehu oreu Espiritu pipe pe ore raisusa resendar.

⁹ Sese avei ore aipo nungar rendu ramosēve ndoroyeroquipai pe rese. Orojeroqui, oroporandu pe rese ‘toicua tupri opacatu Tūpa remimbotar omabehucasa Espiritu suindar pipe, senducua tupri sa pipe avei yuvireco’ ore yapave pēu.

¹⁰ Ipīpe sui tapeguata tupri yande Yar rupi seroyasar tupri pe recosa pipe. Tapemboaviye tupri opacatu semimbotar; mbahe pe rembiapo tupri pereco catu sovaque. Ipīpe sui avei tapeicua tupri catu Tūpa recocuer peico.

¹¹ Iyavei tombou catu pe momirata āgua güecocuer pīratasa pipe sui. Evoioyase oimese que mbahe tēi pēu, peñemosañora pe reco mbegüesa pipe.

¹² “Aviye ndeu” peyera pe viharetesa pipe yande Ru Tūpa uve. Esepia, ahe omoingatū pe recocuer peipīsī āgua iporerecosa oime vahe rā opacatu sembiporavo upe acoi yuvirecoi vahe Tūpa poroesapesa pipe.

¹³ Ahe niha yande pīsīro Carugar povri sui. Ēgüe ehi yande reraso Guahir güembiaisu povrive.

¹⁴ Ahe Tahir yande pīsīro iyavei yande angaipā rese iñero yandeu.

Jesús omano curusu rese Tūpa upe opacatu mbahe moingatū āgua

¹⁵ Jesucristo niha omboyecua uca Vu recocuer ndoyecuai vahe güecocuer pipe. Ahe avei niha yipīsūive ivate catu vahe opacatu mbahe yapopri sui.

¹⁶ Esepia, Tūpa niha opacatu mbahe oyapo uca Guahir upe aracahe: ivive, ivave avei; oyecua vahe, ndoyecuai vahe avei no. Ipīpe sui avei yapopri opacatu iva pendar mborerecuar, mborerecuar guasu iyavei mborerecuar ivate catu vahe. Ēgüe ehi ipīpe sui opacatu mbahe yapopri, chupe nara avei.

¹⁷ Ahe oicove yipīsūive aracahe opacatu mbahe reimeēhi vitesēve. Ahe avei omoime vite opacatu mbahe yandeu.

¹⁸ Iyavei ahe niha yande rerecuar tenonde secoi yandeu opacatu seroy-
asar yaico vahe. Esepia, ahe rane yipindar vahe iyavei ahe rane avei
ocuerayevi. Evocoiyase ahe ivate catu vahe opacatu sui.

¹⁹ Esepia, Tu oipota opacatu güecocuer reseve secoi ägua sese yepi.

²⁰ Iyavei 'che Rahir recocuer pipe sui taroyevi iri opacatu mbahe cheyeupe
ivi pipendar, iva pendar avei' oya. Ēgüe ehi Jesús oipiyere vuvi curusu rese
Tüpa upe opacatu mbahe moingatu ägua.

²¹ Yipindar pe pihañemoñeta raisa pipe sui tēi amombri Tüpa sui peico
yamotarēhisa pipe mbahe pe rembiapo ai rese.

²² Cūrītei rumo Tüpa iñero pēu pe reroeyevi oyeupe Cristo mano pipe. Ahe
niha Ēgüe ehi Vu rovai ipēhapri pe rereco oyeupe nara, pe reco maranehi
ägua mbahe aviēhisa pipe ava rovaque.

²³ Ēgüe peye ägua rumo peyemoviracuaño itera Cristo rese pe yeroyasa
pipe yepi. Ndapeyepēpi chiaveira mbahe oime vaheṛā rese pe yeroyasa sui
pesendu vahe co ñehesa ñepisirosa resendar pipe. Ahe imombehusa opacatu
ivi rupi. Che niha Pablo, icuaiṛi, aico co ñehesa mombehu ägua.

Pablo icuaita Jesús reroyasar rese hañeco ägua

²⁴ Cūrītei aviha pe rese che yemomborarasa pipe. Ēgüe ahe iporara che rete
rese cohava vichico. Ēgüe ehi avei Cristo oyemomborara vite viroyasar rese.
Esepia, yande seroyasar setecuer nungar yaico.

²⁵ Jesús reroyasar pītivii ägua niha Tüpa che cuai. Sese amombehu opacatu
iñhengagüer pēu pe reco tupri ägua rese.

²⁶ Ahe ñehesa aracahe suive ndicuasai vahe ité. Cūrītei rumo Tüpa omboye-
cua viroyasar upe.

²⁷ Chupe ité omboyecua pota co ñehesa porañete vahe omboyecua ramo
vahe ava ndahei vahe judío upe. Co ndicuasai vahe, ahe Cristo pe rese secoi
vahe. Co yande remiaro yareco vaheṛā teco ori porañete vahe curi.

²⁸ Ore niha Cristo recocuer oromombehu opacatu ava upe. Orombohe
avei ava yaracua tupri ägua ore aracuasa pipe 'toyuvirecoi tupri ité Cristo
rese Tüpa rovai' ore hesa pipe.

²⁹ Co rese niha che aporaviqui etepri opacatu Cristo pīratasa pipe.

2

¹ Che aipota peicua che yemboaquisa pe recocuer rese, Laodicea pendar
recocuer rese, setá ambuae ava che cuaparēhi recocuer rese avei

² 'toyomonguerēhi catu, toyemboyoya guasu oyeaisusa pipe yuvireco' viya.
Iyavei 'senducua tupriṛa pipe toyuvirecoi mbahe tupri pipe' viya opacatu
pēu. Esepia, ichui avei peicua tupriṛa co mbahe imboyecuapri ramo, ahe niha
Cristo.

³ Ahe vireco opacatu mbahe yande mboaracua ägua, mbahe renducua
tupri ägua avei.

⁴ Aipo mbahe amombehu pēu ava oñehe tupri aisa pipe tēi pe mbopaēhi
ägua.

⁵ Iyavei yepe amombri aico pe sui viña, pe rese chemahenduha pipe
rumo aicoveño pe reseve yepi. Aicua peguata tupri aise pe reco ivisa pipe,
ndapeyepēpiṛe co coti rupi Jesucristo reroyasa sui. Sese che mbovihareteño
ité peye.

⁶ Evocoyase inungar acoi peipisi Jesucristo pe Yarã, êgüe peye aveira peico sese ari yacatu rupi

⁷ pe yemoviracuasa pipe. Pe yembohesa rese peyemomirata catura Cristo rese pe yeroyasa pipe. Iyavei, “Aviye ndeu” peye itera Tûpa upe ari yacatu yepi.

⁸ Peicua catu, peyembopa ucai rene aracahendar têi ava aracuasa pipe. Esepia, ahe êgüe ehi têi vahe, ava suindar têi yembohesa, ivi pipendar ava seco ivate catu vahe pihãñemoñetasa têi. Ndahei Cristo suindar porombohesa.

⁹ Esepia, Cristo vireco opacatu Vu Tûpa reco oyese.

¹⁰ Evocoyase pe pereco Tûpa reco Cristo rese peicose. Ahe opacatu mborecuar ivi pipendar iyavei iva pendar rerecuar secoi.

¹¹ Iyavei sese peicose, ahese inungar imbocircuncidapri peico. Ndahei rumo pe rete rese iyavei ndahei ava rembiapo têi. Co rumo Cristo oyapo vahe pe recocuer rese. Esepia, ahe virecoa pe recocuerai pe sui.

¹² Pe ãpiramosa pipe ndoyavi pe recocuerai ñotimbrì Cristo reseve. Êgüe ehi avei ndoyavi pe recocuer ocuerayevi vahe seseve avei, peyeroyase Tûpa pîratasa rese. Ahe niha ombogüerayevi vahe Guahir omano vahe pâhu sui.

¹³ Pe niha acoi cuese omano vahe nungar peico Tûpa upe pe angaipa pipe, pe ndahei vahe judío peico vahe. Ahe rumo pe recocuer mbogüerayevi Guahir reseve iyavei iñero pe angaipa rese pëu.

¹⁴ Ahe yande cañi rãgüer rumo opa omboepi. Esepia, yande iporocuita pipe yaico imboaviye âgua viña, evocoyase imocañipri têi yaico ipovrive viña; ombou rumo Guahir curusu rese yatica âgua yande cañi rãgüer sui yande renose âgua.

¹⁵ Êgüe ehi ahe omano pipe curusu rese caruguar, ipovri pendar mborerecuareta reseve secopi. Êgüe ehi seco reroyi, inungar vavasa pendar ipisipri serasosa opacatu ava rembiepiave.

Peseca iva pendar mbahe pe recocuer upe nara

¹⁶ Evocoyase toñehe-ñehe têi eme que ava pe rembiyu rese yuvireco, pe igua rese avei; anise que ndapemboeteise judío pieta, que ari, yasi osê ramomi vahe, anise que judío ari mbõtuhusa avei no.

¹⁷ Esepia, opacatu co mbahe, ahe yipindar vahe, “Êgüe ehira Cristo ou” hesa têi yandeu. Co rumo Cristo ité cute.

¹⁸ Peyapisacai rene acoi ava “ndapeipisi chira porerecosa iva pendar ndaperoyaise ore ñehe” ehi têi vahe rese pëu. Acoi ava “Tûpa rembiguai pemboeteira” ehi têi vahe yuvireco. Ahe avei, “Che seco mbegüe vahe aico” ehi angahu têi. Iyavei, “Che asepia che quer nungar pipe iva pendar mbahe” ehi têi. Esepia, ahe oyemboivate ai oaracua rai têisa pipe yuvireco.

¹⁹ Evocoi rumo ndoyuvirecoi yande cuaisar Cristo rese yuvireco. Ahe omoviracua vahe opacatu viroyasar yepi. Evocoyase ahe omboyemboya tupri oyese, ñepe vahe nungar vireco oyeupe Vu Tûpa remimbotar rupi.

²⁰ Pe omano vahe nungar peico Cristo rese. Evocoyase ndahe iri co ivi pipendar pihãñemoñetasavrive peico. ¿Mahera evocoyase peroya vite co ivi pipendar porocuita êgüe ehi têi vahe,

²¹ inungar “pepocoi rene co mbahe rese, pehui rene evocoi nungar mbahe” ehi têi vahe?

²² Opacatu co nungar porocuita ocañi têi vaherã. Esepia, ahe ava remimbotar têi yembohesa, iporocuita têi avei.

²³ Co mbahe aviye angahu aracuasa supi eté vahe. Esepia, seroyasar ahe ehiño oyeruresa uve, oyeecomomini têi iyavei omombaraisu güetecuer

yuvireco viņa. Ahe aracuasa rumo ěgũe ehi tẽi vahe. Esepia, ndayande pĩtivĩ eté yande yepipi āgua yande remimbotarai sui.

3

¹ Cũritei rumo ocuerayevĩ vahe peico Cristo rese. Sese peseca catu co mbahe avĩye vahe iva pendar. Aheve ivave Cristo oguapi oĩ güeco mborere-cuasa pĩpe Vu acato coti.

² Pepiñamoñeta mbahe iva pendar rese, ndahei chira ivi pĩpendar mbahe rese tẽi.

³ Esepia, cũritei omano vahe nungar peico pe recocuerai upe. Iyavei Cristo reseve peico Tũpa pĩri, inungar-ra ivave viņa.

⁴ Cristo niha yande recovesa ité secoi. Sese ahe oyeve irise curi, ěgũe peye aveira perecora ipĩri seco ori porañetes.

Yande recocuer yipĩndar iyavei yande recocuer piasu

⁵ Evocoiyase pepoi opacatu co mbahe naporai vahe co ivi pĩpendar tẽi pe rese oime vahe sui: ndapeyemboaguasai chira, ndapeyapoi chira mbahe tẽi pe recocuer pĩpe, ndapeipota rai chira piñamoñeta raisa, ndapeipota rai chivaveira ambuae ava mbahe (esepia, ahe niha oyoya mbahe rahanga tẽi mboeteisa rese).

⁶ Acoi oyapo vahe co nungar mbahe, ahe Tũpa ñemoirosa oipisira seroyaẽhisa pĩpe yuvireco.

⁷ ěgũe peye avei yipĩndar pe recocuerai pĩpe peico.

⁸ Cũritei rumo peseya opacatu co mbahe-mbahe tẽi: pe ñemoirosa, pe poroyucaĩ aisa, pe reco raisa, pe ñehe mara-mara tẽisa iyavei pe ñehesa ndayamombelui vahe.

⁹ Ndaperemirai chira peyese. Esepia, pepoi yipĩndar pe reco ai sui iyavei pe rembiapo ai sui.

¹⁰ Iyavei peipisi tecocuer piasu, avĩye vahe. Ipipe peyembohe ari yacatu yande Aposar Tũpa recocuer rese peico, icua tupri catu āgua.

¹¹ Ndahe iri ivate yandeu “che griego aico” ehi vahe; que “che judío aico” ehi vahe. Iyavei “imbocircuncidapri aico”, “nimbocircuncidapri aico” ehi vahe avei. Iyavei que “ahe ambuae tecua pendar secoi”, “ahe chori”, “ahe ava rembiguai tẽi secoi” ehi vahe. Anise que “che ndahei ava rembiguai aico” ehi vahe. Co rumo ivate vahe yandeu: Cristo ivate catu vahe opacatu sui. Iyavei oyoya guasu opacatu yande piha pĩpe yareco.

¹² Esepia, Tũpa pe raisu etepri iyavei pe poravo ‘toyuvirecoi cheu nara’ oya. Evocoiyase peyapora co nungar mbahe: peporoaisura, peavara peyeupe, peñemominira, pe reco mbegũera iyavei peñemosañora.

¹³ ěgũe peyera peñemosa oyeupe, peñero aveira opacatu oyeupe acoi pe pãhu pendar oñemoirose pẽu. Inungar Cristo ñerosa ombou yandeu, pe avei ěgũe peyera ambuae ava upe.

¹⁴ Iyavei peyeaisu catura. Esepia, ahe yande mboyemboya tupri oyese yepi.

¹⁵ Acoi teco tuprisa Cristo ombou vahe pẽu, tape mbohe pe piñamoñeta tupri āgua. Esepia, co rese Tũpa pe renoi ñepeĩ ava nungar pe reco āgua. Iyavei, “Avĩye ndeu” peyera chupe.

¹⁶ Topita tupri Cristo ñehengagũer pe piha pĩpe. Pe aracuasa tuprisave peyembohe tupri, peyemongerẽhi catu sapucaisa Tũpa resendar rese. Pesapucaĩ opacatu sapucaisa Tũpa upendar pe pihá pĩpe, “Avĩye ndeu” pe hesave yepi.

17 Iyavei opacatu que mbahe peyapo vahe, que peñehe vahe avei peyapo yande Yar Jesús rer pipe. Jesús rer pipe avei, “Aviye ndeu” peyera Tûpa upe yepi.

Jesús reroyasar cuaita resendar

18 Iyavei pe no cuña omenda vahe: pemboyeroyara pe mer. Ahe niha pe cuaita pe yande Yar rese peico vahe.

19 Pe avei no imer: pesaisu pe rembireco. Perecoi rene pihavíracuasa pipe.

20 Pe avei no chîhivahe: peroya aveira pe yesupa. Esepia, ahe yande Yar oipota.

21 Pe avei no tu: pemoñemoiro ucai rene pe rahir peyeupe. Esepia, aviyeteramo niquerêhi iri chira ocuaise pëu.

22 Pe avei no mbiguai: peroya tupri avei pe rerecuar co ivi pipe yepi. Aní chira ahe pe repiaseno pembovihara. Iyacatu rumo pemboyeroyara pe pihañemoñeta tuprisa pipe, Tûpa sui pe siquiyesa pipe avei.

23 Opacatu mbahe peyapo vahe, peyapo pe querêhisave yande Yar mbovîha âgua. Ndahei chira ava mbovîha âgua têi.

24 Esepia, peicua tupri co: yande Yar omboura oporerecosa yandeundar. Esepia niha, Cristo upe nara ité mbahe peyapo. Ahe niha pe Yar supi tupri vahe.

25 Ôsa ava oyapo vahe mbahe naporai vahe, oipisi aveira güembiapo ai reperi. Tûpa niha nomboyoaviratiî yande raisu.

4

1 Pe avei serecuar: peyapo mbahe ihîvi vahe pe pihañemoñeta tuprisa pipe pe rembiguai upe. Peyemomahenduha co rese: pe avei pereco pe rerecuar ivave.

2 Iyavei no opacatu peyeroqui catu ari rupi pe mahemohasa pipe. “Aviye ndeu” peye Tûpa upe.

3 Peyeroqui avei ore rese. Tore pîtivii Tûpa oñehengagüer mombehu vite âgua. Toroñehe vite avei co ñehesa Cristo resendar Tûpa omboyecua ramo vahe rese yandeu. Sese têi niha co che roquendasa.

4 Evocoyase peyeroqui che rese, tamombehu tupri catu co ñehesa opacatu upe senducua tupri catu âgua. Êgüe tahe che cuaita mboaviye.

5 Peico tupri pe aracuasa pipe ava ndahei vahe Cristo reroyasar rovaque. Peyapo tupri mbahe co tecocuer aviye viteseve.

6 Pe reco aviye tuprisa pipe peñehera yepi. Iyavei peicua tuprîra ñehesa mboyevi âgua ñepeipei ava uve.

Ñehesa ipa vahe

7 Co yande rivri, yande rembiaisu, Tíquico, che pîtivii tuprisar, ahe oporaviqui tupri yande Yar recocuer rese che rupi. Ahe omombehura che recocuer resendar pëu.

8 Sese co amondo pëu ore recocuer cua tupri âgua, pe monguerêhi catu âgua avei.

9 Co Onésimo avei osora supi. Ahe avei yande rembiaisu, yande rivri seco tupri vahe pe recua pendar. Ahe ñuvirío mbia omombehura pëu opacatu mbahe oime vahe cohave.

10 Aristarco, che ndugüer che roquendasave, omondo omahenduhasa pëu iyavei Marcos, Bernabé rihir. Pe revo peicuaño Marcos so âgua eipeve; osose pe piri, peipisi tupriñora.

¹¹ Iyavei omahenduhasa omondo Jesús, ahe serer acoi Justo, pëu. Co güerañomi Jesús reroyasar pãhuve judío oporaviqui vahe che rupi yuvireco Tüpa mborerecuasave nara. Ahe niha che mboviha yuvireco yepi.

¹² Epafras avei omondo omahenduhasa pëu. Ahe pe recua pendar ité, Jesucristo rembiguai. Ahe oyeruqui vahe pe rese yepi 'toyemoviracua tupri iyavei toyuvirecoi Tüpa remimbotar rupi yuvireco' oyapave.

¹³ Che aicua ité secocuer. Ahe oyemboaquí oyeruresa pipe pe recocuer rese, Laodicea pendar recocuer rese, Hierápolis pendar recocuer rese avei.

¹⁴ Iyavei yande rembiaisu Lucas, oporoposano vahe, Demas reseve omondo omahenduhasa yuvireco pëu.

¹⁵ Pemboaviravemi eipeve yande rivri Laodicea pendar oreu, cuña Ninfa serer vahe avei iyavei opacatu oñemonuha vahe Tüpa reroyasar yuvireco.

¹⁶ Peyeroquire, pemondo co cuachiar Laodicea pendar Jesús reroyasar upe iyeroqui água. Iyavei Laodicea pendar cuachiar rese peyeruqui avei.

¹⁷ Iyavei emombehu Arquipo upe aipo ere: "Emboaviye tupri Tüpa nde cuaisa" ere.

¹⁸ Che Pablo aico. Che ité aicuachía co che mahenduhasa pëu. Tapemahenduha vite che roquendasave che rese. Aviye pëu. Yande Aposar tape pitivii. Aipo rupive.

PABLO REMBICUACHIA YIPĪNDAR VAHE TESALÓNICA PĒNDAR UPE TESALONICENSES

Pablo mahenduhasa Jesús reroyasar Tesalónica pendar upe

¹ Che, Pablo, Silvano reseve iyavei Timoteo, aicuachía co che ñehe pëu, ore rivireta, peñemonuha vahe Tüpa upe tecua Tesalónica ve, yande Ru Tüpa, yande Yar Jesucristo rese peico vahe. Tape rovasa pe reco tupri água yande Ru Tüpa, yande Yar Jesucristo avei.

Tesalónica pendar yeroyasa resendar ñehesa

² Ore, “Aviye ndeu” orohe ari rupi Tüpa upe opacatu pe rese yepi. Iyavei oremahenduha pe rese ore yeruresa pipe.

³ Pe niha yande Yar rese pe yeroya tuprisa pipe peporaviquiño yepi, iyavei pe poroaisusa pipe peyapo mbahe Tüpa upe, iyavei peñemosañõ mbahe tēi upē Jesucristo rārosa pereco vahe rese. Sese oremahenduha pe rese ari yacatu rupi yande Ru Tüpa rovai.

⁴ Ore rivireta, Tüpa niha pe raisu, oroicua avei ahe ité pe poravo.

⁵ Esepia, acoi oromombehuse ñehesa písirosa resendar, ndahei ñehesa oreyesuindar tēi oromombehu pëu; Espiritu Santo reco pīratasa pipe rumo oroñehe. Iyavei oroicua ité co ñehesa supi eté vahe. Peicua avei niha acoi pe pāhuve oroicose, oroico tupriño ité, oroeseañõ avei pe reco tupri água.

⁶ Ipape pemboyeapi ore recocuer peico iyavei yande Yar recocuer avei no. Iyavei yepe peparaisu mbahe-mbahe tēi pāhuve peico viña, peipisiño ité rumo co ñehesa pe vihasa pipe Espiritu Santo ombou vahe pëu.

⁷ Evocoya pe reco pipe pemboyecua catu pe reco catuprisa Tüpa reroyasar Macedonia pendar upe, Acaya pendar upe avei.

⁸ Esepia, pe Tüpa ñehe peicua uca Macedonia rupi, Acaya rupi avei. Ndahei rumo co rupiño, opacatu rupi avei oicua yuvireco Tüpa reroyasa pereco vahe peyese. Sese ore ndoromombehu iri chira pe recocuer.

⁹ Esepia, ahe avei omombehu yuvireco oreu acoi ore so agüer pe piri, pe ore pisi tupri agüer avei. Iyavei omombehu mbahe rahanga sui pe poi agüer Tüpa oicove vahe rupi pe guatasa yuvireco, pe chupe nara mbahe apo água avei no.

¹⁰ Omombehu avei pesāro vahe Tüpa Rahir Jesús iyevi água iva sui yuvireco oreu, acoi Tüpa ombogüerayevi vahe omano vahe pāhu sui. Ahe niha yande písirora Tüpa ñemoirosa ipirata vahe ou vaherā sui.

2

Tesalónica pendar yeroyasa mboyecuaa

¹ Ore rivireta, pe niha peicua ore so agüer pe piri ndahei ñgüe ehi tēi vahe.

² Peicua tupri avei niha acoi cuese yipindar mara-mara tēi ava ore rereco yuvireco tecua Filipo ve. Tüpa rumo ore pītivii oñhengagüer písirosa resendar mombehu água opacatu ore siquiyeñhisa pipe ore amotarēhimbar pāhuve.

³ Esepia, ndoroyavi eté ore ñehe iyavei ndoroñehei ore pihañemoñeta raisa tēi pipe pëu, ndahei avei ore porombopa água oroñehe.

⁴ Tūpa rumo ore recoña, ichui ore cuai oñehengagüer pĩsirosa resendar mombehu água; êgüe ehi ore ñehe, ndahei ava tẽi mboviha água. Tūpa yande pihañemoñetasa oicua vahe rumo oromboviha.

⁵ Peicua niha ore ndoroñehei ñehesa icatupri catu vahe tẽi rese pe mbopa água, iyavei ndahei guarepochi potasave tẽi oroñehe tupri. Tūpa niha oicua.

⁶ Ore ndorosecai eté ava ore mboetei catu água pe, que ambuae ava eta avei no.

⁷ Ehi oroyandu ucara ore mborerecuasa Jesucristo ore cuaisa pẽu viña; oroyemominiño rumo oroico pe pãhuve inungar acoi cuña osãro tupri vahe omembri imboacua.

⁸ Êgüe orohe avei ore pe raisu. Sese ndahei Tūpa Ñehengagüer año oromondo pota pẽu, ore recocuer avei no. Esepia, oipoaisú ité.

⁹ Ore rivireta, peyemomahenduha acoi ore paraису agüer rese, ore poraviqui agüer rese avei ari, pĩtu reseve. Ndahei que ñepei mañeco tẽi água mbahe rese oromombehu Tūpa Ñehengagüer oroico pẽu.

¹⁰ Pe niha ore repia peye Tūpa avei oicua, ore reco tuprisa, ore rembiapo supi eté vahe, ihĩvi vahe pe Jesús reroyasar pãhuve.

¹¹⁻¹² Peicua niha, inungar mbia guahir upe, êgüe orohe pe monguerẽhi, pe mbovihasa avei ñepei-pe opacatu. Iyavei oromondo pe cuaitarã pe reco tupri água Tūpa remimbotar rupi. Ahe niha oñehe pẽu peico vaheã sese imborerecuasa porañetesave.

¹³ Co rese, “Aviye ndeu” orohe Tūpa upe ari yacatu rupi. Esepia, Tūpa Ñehengagüer, oromombehu vahe pẽu, peipisi ité, “Co Tūpa ñehe, ndahei ava tẽi ñehe” aipo peye ité pe chupe. Supi eté Tūpa ñehe. Ahe niha osecuñaro ité pe recocuer peroyare.

¹⁴ Ore rivireta, acoi cuese peiporara mbahe-mbahe tẽi pe mu eta pãhuve peicose; êgüe ehi tupri avei Jesús reroyasar Judea pendar yuvirecoi vahe Jesucristo recocuer rese. Imu judío ae oseca-seca yamotarẽhisave yuvireco.

¹⁵ Ahe niha oyuca yande Yar Jesús yuvireco. Ahe avei oyucapa Tūpa ñehe mombehusar yuvireco aracahe. Ore avei opa ore mombo yuvireco. Ndoviroyai Tūpa yuvireco iyavei opacatu ava amotarẽhimbar tẽi yuvirecoi.

¹⁶ Esepia, acoi oroñehe potase ava ndahei vahe judío upe iñepisiro água rese, ahe rumo ndoipotai yuvireco oreu. Ipipe sui oyemboangaipa catu yuvireco. Cũritei rumo Tūpa ñemoirosa ipirata vahe ou iharive yuvireco cute.

Pablo oso pota iri Tesalónica pendar repia

¹⁷ Ore rivireta, yepe ndayayoepia iri yayepipi raimise yandeyesui, ore piha pipe rumo, “Ahé” oroheño ité pẽu. Iyavei orequerẽhiño ité yepi oroso iri vaheã pe repia.

¹⁸ Orosãha tẽi ore so água pe repia yepi; che Pablo teieté setá yupagüer tẽi aso pota. Carugar rumo ndoipotai.

¹⁹ ¿Ava sui piha orosãro mbahe aviye vahe? ¿Uma ore vihasa? ¿Uma ore mboviharete catura? ¡Peño itera acoi yande Yar Jesucristo yevise curi!

²⁰ Pe ité niha ore mbovihara peye, iyavei oroviha catura pe rese no.

3

¹⁻² Evocoyase che nañemosa irise pe repiaẽhi rese, chepihañemoñeta yande rivri Timoteo mondo água pe repia; “Che güeraño tapita Atenas ve” ahe. Esepia niha, ahe oporaviqui vahe Tūpa upe ore rupi, omombehu vahe co ñehesa pĩsirosa resendar Cristo suindar ou vahe. Ahe amondo pẽu pe

moviracua catu ãgua, pe monguerẽhi catu ãgua avei peyeroya catu vaherã Cristo rese.

³ Evocoiyase tipo eme oyembosiquiye vahe co mbahe tẽi pe mombaraisuse. Peicua niha yaiporara rane itera co nungar mbahe.

⁴ Iyavei niha acoi oroico vitese pe piri, “Yande paraisu rane itera mbahe yavai vahe” orohe voi eté acoi pẽu. Ahe niha cõritei peicua.

⁵ Evocoiyase che nañemosã irise, amondo Timoteo ‘çyuvirecoiño ité pĩha Tũpa rese?’ che yapave. Che asiquiye, “Aviyeteramo Carugar omondora mbahe tẽi pipe yuvireco” ahe ‘ore poraviqui agüer evocoiyase ocañi tẽira’ che hesave.

⁶ Cõritei rumo Timoteo oyevi Tesalónica sui, güeru ñehesa aviye vahe pe resendar oreu pe Tũpa reroyasa, iyavei pe poroaisusa resendar avei. Iyavei aipo pemahenduha ore rese pe poroaisusa pipe. Iyavei pe ore repia pota tẽi peye no; inungar ore pe repiãsa pota tẽi avei.

⁷ Sese, ore rivireta, ore paraisusa pãhuve ore mboviharete peye, co oroicua pe reco tupri Tũpa reroyasa pipe.

⁸ Cõritei ore mopoase catu iri oroyanduse pe yemoviracua tupriãsa yande Yar rese.

⁹ “¿Mara yahera pĩha, ‘Aviye ndeu’ yande he tupri catu ãgua Tũpa upe?” orohe pe reco tupriãsa rese, iyavei ore yemboviha catusa rese avei no

¹⁰ pĩtu, ari rupi oroporandu Tũpa upe ore so ãgua pe repia eipeve iyavei Tũpa reroyasa ipane vite vahe mboaviye tupri ãgua pẽu.

¹¹ Iyavei ore oroipota ore pĩtivira yande Ru Tũpa, yande Yar Jesucristo avei ore so ãgua pe piri.

¹² Evocoiyase yande Yar tape moviracua catu, tombou catu avei pe yeaisu ãgua, iyavei opacatu raisu catu ãgua, inungar ore orovireco pe raisusa.

¹³ Ipape sui tape moviracua pe reco maranehi pipe pe mbahe aviẽhisave yande Ru Tũpa rovai acoi oyevisẽ yande Yar Jesús opacatu ovoya reseve. Ëgüe tehi pẽu.

4

Teco tupri Tũpa oipota

¹ Ore rivireta, cõritei oroñehe pota pẽu pe cuaitarã rese yande Yar Jesús rer pipe: inungar cõritei pe recocuer pereco, ãgüe peyeño ité catu peico ore pe mbohe agüer rupi Tũpa mboetei ãgua.

² Pe niha, peicua acoi ore pe mbohe agüer yande Yar Jesús rer pipe.

³ Esepia, Tũpa oipota pe reco maranehi ãgua oyeupe. “Tipo eme que ñepeï oyemboaguasa tẽi vahe” ehi.

⁴ Iyavei peico tupri pe rembireco rese pe reco ñvisa pipe Tũpa remimbotar rupi, iyavei pemboetei tupriãsa sereco yepi.

⁵ Peicoi rene ava Tũpa ndoicuai vahe reco pipe pe remimbotar tẽi apo ãgua.

⁶ Tipo eme avei oyapo vahe co nungar angaipa yande rivri reco momara ãgua tẽi. Esepia, Tũpa omondora oñemoirosa ipirata vahe evocoi nungar ava upe. Evocoi niha yipisuive oromombehu vahe pẽu.

⁷ Esepia, Tũpa niha yande poravo yande reco maranehi ãgua, ndahei angaipa pipe yande reco ãgua tẽi.

⁸ Sese acoi ndosendu potai vahe co yembohesa, ndahei eté ava tẽi viroĩro, ahe rumo Tũpa ité viroĩro yuvireco acoi ombou vahe oEspíritu Santo pẽu.

⁹ Iyavei co peyepãhuve pe yeaisusa rese, ndaicuachia iri chira pẽu. Esepia, Tũpa ité niha pe mbohe pe yeaisu ãgua opacatu.

¹⁰ Ēgüe peye niha opacatu yande rivireta co Macedonia rupindar raisu peico. Co catu peyapo che rivireta: pe mbouvicha vite catu pe poroaisusa.

¹¹ “Peico tupriño avei pe reco mbegüesa pipe; mbahe pe rembiapo reseño tupri pehañeco; peporaviqui pe po pipe ité” aipo orohé acoi pëu cuese.

¹² Evocoyase pe mboyeroyara ava ndahei vahe Jesús reroyasar yuvireco; iyavei ěgüe peyera mbahe pëu ipaneëhi ägua avei no.

Oyevira yande Yar co ivi pipe

¹³ Ore rivireta, ore oroipota peicua aveira manosa recocuer; sese ndapeicoi chira pe viharëhisa pipe inungar co ava ndoyeroyai vahe Tüpa rese.

¹⁴ Esepia, yande yaroya: Jesús omano, ichui ocuerayevi. Evocoyase yande avei yaroya Tüpa Guahir Jesucristo reseve ombogüerayevira opacatu acoi seroyasa pipe omano vahe yuvireco.

¹⁵ Sese co oromombehu pëu, ahe niha yande Yar porombohesa: yande yaicove vite vahe co ivi pipe, acoi oyevise yande Yar, ndahei chira yande rane omano vahecuer sui yayemboya yande Yar rese.

¹⁶ Esepia, yande Yar ité ogüeyi irira iva sui ou mborerecuar ivate vahe ñehesa pipe; ahese oyeendura Arcangel ñehe iyavei Tüpa remimbi moñehe pïratasa. Ahese seroyasar omano vahecuer rane opühara yuvireco.

¹⁷ Ipare voi yande yaicove vite vahe, serasopri yaicora opacatu iva quiha rese co yande Yar rovaïchi ägua ivitu rupi. Ēgüe yahera yande Yar piri yaico vaherä apirëhi.

¹⁸ Sese peyemonguerëhi catu co ñehesa pesendu vahe rese.

5

¹ Iyavei no, acoi ari yande Yar yusa resendar ore ndoroicuachiai chira pëu.

² Esepia, pe peicua tupri co yande Yar ari oyepotara imohaëhisa pipe, inungar acoi imonda rai vahe oyepota pïtu pipe.

³ Acoi ava aipo ehise yuvireco: “Opacatu aviye ité yaico, ndipo iri mbahe-mbahe tëi yandeu” ehise, ahese inungar acoi cuña imembirasavi aviyeteramo tëi, ěgüe ehi aveira, aviyeteramo tëi icañi oura iharive, ahese ndoicatu chira ichui oñemi yuvireco.

⁴ Pe rumo, ore rivireta, ndahei pïtumimbisa pendar nungar peico. Evocoyase oyepotase yande Yar ari, ndahei chira imonda rai vahe nungar pe resapiha tëi ou.

⁵ Esepia, pe opacatu peico vahe Tüpa poroesapesa pipe, ndahe iri yande pïtumimbi pipendar yaico.

⁶ Evocoyase ndayaicoi chira co ambuae yuviroque tëi vahe nungar pihañemoñetasa pipe; iyacatu rumo yande yayemopoase yande pihañemoñeta tuprisa pipe.

⁷ Acoi yuviroque vahe, yuviroque pïtu pipe; iyavei acoi osavaipo vahe, osavaipo avei pïtu pipe yuvireco.

⁸ Yande rumo yaico vahe Tüpa poroesapesa pipe. Evocoyase yareco tuprira yande pihañemoñetasa yande reco tupri ägua yepi. Iyavei yayoepira yande yeroyasa pipe, poroaisusa pipe avei no. Iyavei inungar acoi sundao vireco oäca ndiru guarepochi apopri yuvireco oäca repi ägua, yande avei tayareco yande remiaro yande ñepisiro ägua.

⁹ Esepia niha, Tüpa yande poravo ndahei yaico vaherä inëmoirosa pipe nara; ahe rumo yande poravo yasupiti vaherä ñepisirosa yande Yar Jesucristo rembiapo sui.

¹⁰ Esepia, ahe omano yande recocuer rese oyese yande rereco âgua opacatu yande recove vîtese, yamanose avei.

¹¹ Sese peyemonguerêhi catu, iyavei peyemoviracua catu vite peyeupe inungar co peyapo peico.

Pablo omboaracua Jesús reroyasar oico

¹² Iyavei no, ore rivireta, pemboyeroa acoi oporavîqui vahe yuvîreco pe pâhuve. Ahe niha pe cuai vahe yuvîreco, iyavei pe mboaracua vahe yande Yar uve nara yuvîreco.

¹³ Pemboyeroa iyavei pesaisu tuprîra iporavîquisa rese. Peico tupri avei peyepâhuve.

¹⁴ Iyavei ore rivireta, pe cuaisa: pemboaracua acoi ndoporavîqui potai vahe imbohe catu âgua. Iyavei pemonguerêhi acoi niquerêhi îri vahe. Peipîtivîi avei acoi ndoyemoviracuai vahe Tûpa rese güeco âgua. Iyavei peñemosañõ opacatu ava uve yepi.

¹⁵ Peicua catu pe rereco megua potasar sui. Ndapemboyevîi chira mbahe-mbahe têi co pe rereco megua potasar upe. Iyacatu rumo peyapo tupri mbahe aviye vahe peyeupe, opacatu ava upe avei no.

¹⁶ Peyembovîhañõra ari yacatu peico.

¹⁷ Iyavei peyeroquîra ari yacatu rupi no.

¹⁸ “Avîye ndeu” peyera Tûpa upe opacatu mbahe rese. Esepia, ahe niha Tûpa oîpota yandeu Cristo rese yaico vahe.

¹⁹ Iyavei ndapemombituhui chira mbahe Espîritu Santo oyapo pota vahe pe rese.

²⁰ Ndapeyamotarêhîi chira Tûpa ñehe imombehupri.

²¹ Pesâhapa rane opacatu mbahe. Ichui peipîsîra mbahe aviye vahe peyeupe.

²² Peyepêpi opacatu mbahe naporai vahe sui.

²³ Tûpa acoi ombou vahe teco tuprîsa yandeu tape pehapa tupri oyeupe nara. Iyavei tosâro tupri opacatu pe espîritu, pe hã, pe rete avei pe reco maranehî âgua co yande Yar Jesucristo yevî îrise.

²⁴ Ahe acoi pe poravo vahe oyeupe nara seco tupri vahe. Ahe omboavîyera opacatu co mbahe.

Pablo imahenduha Jesús reroyasar rese

²⁵ Ore rivireta, peyeroqui ore rese.

²⁶ Pemboavîrave opacatu yande rivri eipe pendar pe yeovaupîtesa pipe.

²⁷ Che opocuai yande Yar rer pipe: peyeroqui co cuachiar opacatu yande rivireta upe.

²⁸ Yande Yar Jesucristo tape rovasa tupriñõ pe rereco. Aipo rupive.

PABLO REMBICUACHIA IMOÑUVIROSIA TESALÓNICA PENDAR UPE TESALONICENSES

Pablo mahenduhasa Jesús reroyasar Tesalónica pendar upe

¹ Che, Pablo, Silvano, Timoteo reseve, aicuachía co ore ñehe pëu, ore rivireta, peñemonuha vahe Tūpa uve tecua Tesalónica ve, yande Ru Tūpa, yande Yar Jesucristo rese peico vahe.

² Tombou pëu oporovasasa pe reco tupri água yande Ru Tūpa, yande Yar Jesucristo avei.

Tūpa omombaraisura viroyasarëhi Jesucristo yevise curi

³ Ore rivireta, “Aviye ndeu” orohe itera Tūpa upe pe recocuer rese yepi. Esepia, Tūpa rese pe yeroyasa tuvicha-vicha iri, tuvicha-vicha iri avei pe yeaisusa opacatu peyeupe pereco vahe.

⁴ Evocoiyase, ore oroñehe pe rese ore vihasa pipe Tūpa reroyasar ñemonuhasa rupi. Esepia, acoi ava mbahe-mbahe tēise pëu, peñemosañu chupe pe Cristo rese pe yeroyasa pipe.

⁵ Co niha omboyecua Tūpa reco ñvisa ava upe. Esepia, ipipe pe rereco omborerecuasave pe reique água. Sese niha, peparaisu vite tēi peico.

⁶ Tūpa omombaraisura acoi pe mombaraisusarer. Iya ité ègüe ehi vaherã chupe.

⁷ Pe rumo imombaraisupri peico vahe, Tūpa omondora pe pituhu água, ore pituhu água avei, acoi yande Yar Jesús oyevise tata rendigüer pãhuve iva sui opacatu güembiguai seco pĩrata catu vahe reseve.

⁸ Ahe oura opacatu Vu Tūpa reroyasarëhi mombaraisu água iyavei oyesuindar ñehesa propiñiroso resendar rendu tēisar mombaraisu avei.

⁹ Evocoi iparaisura yuvireco, imocañipri yuvirecoira apirëhi. Iyavei imboyepisara amombri yande Yar reco piratasa porañetesa sui.

¹⁰ Acoi ouse ahe ari pipe, yande Yar imboeteiprira opacatu seroyasar pãhuve; ipãhuve pe peicora. Esepia, peroya ité oromombehu vahe pëu.

¹¹ Co rese oroyeroqui pe rese yepi: oroporandu yande Ru Tūpa upe tape rereco tupri güemienoi pe recosa pipe. Iyavei oroyeroqui chupe, tomboaviye güeco piratasa pipe opacatu ñepeí-peí mbahe aviye vahe peyapo pota vahe iyavei opacatu mbahe pe rembiapo aviye vahe sese pe yeroyasa pipe.

¹² Evocoiyase yande Yar Jesucristo rer imboeteiprira pe recocuer pipe sui; iyavei pe imboeteiprira peico yande Yar rese peico vahe yande Ru Tūpa, yande Yar Jesucristo pe raísusave.

2

Yande Yar Jesús yevisa resendar mombehu tuprisa

¹ Iyavei, ore rivireta, ore oromombehu potami pëu opacatu acoi yande Yar Jesucristo yevisa resendar yande monuha vaherã oyese.

² Peicua catu, tapepihañemoñeta rerova eme iyavei peyembosiquiyei rene que ava “che añehe Espiritu pipe” ehi vahe sui, que icuachiapri sui, que ñehesa pesendu vahe sui inungar-ra ore ñehesa ité viña “oyepota ari Jesús yevisa” ehi tēi vahe yuvireco pëu.

³ Peicua catu peyembopa ucai rene ñepei yepe ava upe. Esepia, yipindar ari Jesucristo yu água renonde, yugüerura mbahe-mbahe tēi aposar. Ahe Tūpa amotarēhisar yuvirecoi vahe. Ahese oyemboyecuara ava yangaipa guasu vahe. Ahe ocañi tēi vaherā.

⁴ Oyemboivate aira opacatu Tūpa rer rerecosar amotarēhisave iyavei ndoipotai chira ambuae mboetei. Oique aveira, oguapi Tūpa rēta pipe inungar-ra Tūpa ité viña. “Supi eté che Tūpa aico” ehi tupri tēira oī.

⁵ ¿Ndapemahenduhai vo acoi che ñhengagüer rese pe pāhuve aico vitesese cuese?

⁶ Co imombitasar peicua cūritei. Ihari oyepotase voi, oyemboyecuara.

⁷ Co porocuita amotarēhisar ndoyemboyecua vītei vahe rembiapo oime cūritei. Co güeraño ipane imombitasar renose água ipāhu sui,

⁸ ahese voi oyemboyecuara acoi ava yangaipa guasu vahe. Yande Yar Jesús rumo oyucara oñehe pipe, omocañi itera güendigüer pīratasa pipe oyevisse curi.

⁹ Yucasa renonde rumo, acoi ava yangaipa guasu vahe oura Carugar pīratasa pipe; güerura güeco pīratasa tuvicha vahe; omboyecua angahura poromondiisa.

¹⁰ Oyapo angahura opacatu mbahe tēi oporombopa água oico ava ocañi tēi vaherā upe. Esepia, evocoi ava ndosendu potai porombohesa supi eté vahe oñepisiro água yuvireco.

¹¹ Sese Tūpa oseyara co porombopasa reroya água yuvireco

¹² ipipe tocañi tēi co ava, opacatu mbahe supi eté vahe reroyaēhisar, acoi oyemboiha catu vahe mbahe-mbahe tēi rese yuvireco' oya.

Iporavopri ipīsiropirā

¹³ Ore rumo, “Aviye ndeu” orohera Tūpa upe pe recocuer rese yepi, ore rivireta, yande Yar rembiaisu peico vahe. Esepia, Tūpa niha pe poravo yipisuive pe pīsiro água pe reco maranehi água rese Espiritu pipe iyavei porombohesa supi eté vahe reroya água.

¹⁴ Sese niha, Tūpa oñehe yandeu yande piha pipe co ñehesa pīsirosa re-sendar pipe, ore oromombehu vahe pēu ‘tovireco che Rahir Jesucristo reco porañetesa’ oya.

¹⁵ Sese ore rivireta, peyemoviracua iyavei peresarai eme acoi oromombehu vahecuer iyavei oroicuachía vahe acoi pēu.

¹⁶ Yande Yar Jesucristo teieté, yande Ru Tūpa avei, yande raisusa yande rovasasa pipe ombou vahe vihasa apirēhi vahe yandeu iyavei yande reco tupri rāro água,

¹⁷ ahe tape monguerēhi, tape moviracua avei opacatu ñehesa aviye vahe rese, opacatu mbahe pe rembiapo aviye vaherā rese avei.

3

Pablo oporandu Jesucristo reroyasar yeroquisa rese oyeupenara

¹ Ore rivireta, co mbahe ipa vahe amombehu pota pēu: peyeroqui ore rese. Evocoiyase toyepota pihaivi yande Yar ñhengagüer opacatu rupi; tipisisa tupri imboeteisa pipe inungar oyepota pe pāhuve.

² Peyerure avei ore repi água rese ava ndaseco pōrai vahe, ipihañemoñeta rai vahe sui. Esepia niha, ndaopacatu Tūpa rese ipihañemoñeta yuvireco.

³ Yande Yar rumo seco ñvi vahe. Ahe pe recocuer moviracuara iyavei pe rārora mbahe tēi sui.

⁴ Ore oroyeroya yande Yar rovai peyapo vahe rese iyavei peyapo viteño vaherā rese acoi ore pe cuai agüer.

⁵ Yande Yar tape p̄itivii pe poroaisu āgua inungar Tūpa oporoaisu iyavei Cristo ñemosasa rereco āgua.

Yande cuaita yande poraviqui āgua

⁶ Ore r̄ivireta, opocuai yande Yar Jesucristo rer pipe: acoi ndoporaviqui potai vahe yande r̄ivri pe p̄āhuve, peyepipiño ichui, acoi ndoviroya potai vahe avei ore porombohesa oromombehu vahe p̄ēu.

⁷ Pe peicua mara peyera ore recocuer moña āgua peico. Ore oroicose pe p̄āhuve, ndoroico t̄ēi,

⁸ ndorohu t̄ēi avei ambuae tembihu imboep̄ip̄ir̄ēhi. Ore rumo que ñepe mañeco t̄ēiēhi āgua rese oroporaviqui ore cuera rane ité ari, p̄itu reseve.

⁹ Iya ité niha mbahe rese ore porandu āgua p̄ēu ore p̄itivii āgua rese viña; ore rumo oroporaviqui pe ore recocuer rupi pe guata āgua rese.

¹⁰ Acoi oroico vitese pe p̄āhuve, oromondo pe cuaitarā: acoi ndoporaviqui potai vahe, ahe tocaru eme.

¹¹ Oroyandu amove aipo pe p̄āhu pendar yuvirecoiño t̄ēi ndoporaviqui vahe. Evocoi omañeco t̄ēi ambuae avā recocuer.

¹² Ore oromondo acoi ava upe mborocuita yande Yar Jesucristo rer pipe: toporaviqui güeco quiririsa pipe; ipipe sui yuvirecovera.

¹³ Ore r̄ivireta, pecuerai eme mbahe aviye vahe apo.

¹⁴ Oimese ndoviroyai vahe ore remimombehu co cuachiar pipe, peicua tupri evocoi nungar. Peyemboya eme sese. Evocoiyase tochi ahe.

¹⁵ Pereco eme catu yamotarēhisa chupe; iyacatu rumo pemboaracua catuñora inungar yande r̄ivri.

Ñehesa ipa vahe

¹⁶ Aviye, yande Yar ae tombou güeco tupriisa pe reco tupri āgua p̄ēu ari yacatu rupi opacatu pe reco pipe. Tasecoi pe rese ari yacatu.

¹⁷ Che, Pablo, aicuachía co mahenduhasa che po pipe ité p̄ēu. Che rembicuachía icuapri opacatu che cuachiar pipe.

¹⁸ Yande Yar Jesucristo tape rovasa opacatu yepi. Aipo rupive.

PABLO REMBICUACHIA YIPINDAR VAHE TIMOTEO UPE TIMOTEO

Pablo mahenduhasa Timoteo upe

1-2 Che, Pablo, aicuachía che ñehe ndeu, Timoteo. Nde niha che rahir Tüpa reroyasa pipe ereico. Che niha Jesucristo apóstol aico, yande Písiosar Tüpa porocuaita rupi iyavei yande Yar Jesucristo porocuaita rupi. Ahe niha yande remiario. Tombou yande Ru Tüpa, yande Yar Jesucristo oporovasasa, oporoparisuerecosa ndeu nde reco tupri ägua.

Pablo, "Eicua catu porombohesa co coti tēi vahe sui" ehi Timoteo upe

3 Iyavei acoi aipo ahe ndeu cuese che so ägua Macedonia ve: nde epita co tecua Efeso ve. Evocoyase eremboaracuara co ava co coti tēi oporomboaracua vahe, toporomboaracua eme pihañemoñetasa co coti-coti tēi vahe rese yuvireco.

4 Toyapisaca eme avei tecocuer ipapapri tēi vahe rese, tecocuer aracahendar êgüe ehi tēi vahe rese avei. Ahe ichui osē yeacasa naporai vahe yepi; ndayande pítiviñi rumo Tüpa remimbotar reroya tupri ägua rese.

5 Sese co amondo porocuaita ndeu yande yeaisu ägua yande pihañemoñeta catuprisa pipe, yande reco yapisaca tuprisave, iyavei yande yeroyasa supi eté vahe pipe.

6 Esepia, amove ava oime ichui oyearacua mocañi oñehe-ñehe tēisa pipe yuvireco.

7 Oporombohe pota tēi Tüpa porocuaita rese; ndosenducuai rumo oporombohesa yuvireco, "Supi tupri revo yaporombohe" ehi tēi yuvireco viña.

8 Yaicua niha co porocuaita aviye ai eté yaiporuse Tüpa remimbotar rupi eté.

9 Yaicua avei acoi porocuaita ndahei ava aviye vahe upe nara. Ahe rumo ndiporeroyai vahe mboaracua ägua, ndayaracua potai vahe upe nara, angaipa viyar upe nara avei, iyavei opacatú mbahe-mbahe tēi aposar upe nara, nomboetei vahe Tüpa iyavei chupendar pihañemoñetasa; acoi vu, osi oyuca vahe; opacatu ava oporapichi vahe upendar.

10 Acoi oyemboaguasa tēi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi virocua tēi vahe mbiguai ambuae ava sui, semirañete ai vahe; iyavei acoi, "Che amombehu mbahe supi eté vahe" ehi tēi angahu vahe, chupe nara ité co porocuaita; imondosa avei opacatu porombohesa nimarai vahe amotarēhisar upe nara.

11 Co porombohesa nimarai vahe oyoya tupri ñehesa porañete vahe poropísirosa resendar rese. Tüpa sovasapri secoi, ahe che cuai vahe sese.

Pablo oparaisuerecosa rese, "Aviye ndeu" ehi Tüpa upe

12 "Aviye ndeu" ahe yande Yar Jesucristo upe. Ahe niha ombou pīratasa co che ñehe ägua. Esepia, ahe oyeroya che rese. Sese che mondo oñehengagüer mombehu ägua.

13 Yepe che yipindar che ñehe-ñehe tēi sese; aseca-secaño mbahe-mbahe tēi che rembiapoguã yamotarēhimbahe che yemboivate aisa pipe, Tüpa rumo, che paraisuerecoño. Esepia, che ahese, ndahe vitei Cristo reroyasar aico; ndaicua vitei mbahe ayapo vahe.

¹⁴ Ēgüe ehi yande Yar ombou catu oporovasasa che rese iyavei ombou che oyese yeroya āgua iyavei che poroaisu āgua Jesucristo rese che recosa pipe.

¹⁵ Iya peroya co supi eté vahe, che aipota avei opacatu oyapísacara yuvireco sese: Jesucristo ou co ivi pipe ava yangaipa vahe písiro āgua. Che rumo acoi ivate catu vahe yipindar aico ipāhuve.

¹⁶ Sese Tūpa che paraisuereco che rese rane Jesucristo reco mbegüe tuprisa mboyecua āgua. Ēgüe ehi che recocuer upe ambuae ava seroya āgua. Ipipe sui osupítira tecovesa apirēhi vahe yuvireco.

¹⁷ ¡Sese yamondo imboeteisa apirēhi yande Rerecuar ndopai vahe upe! ¡Ahe nomanoi vahe, ndayasepiai vahe, ahe ñepeí vahe Tūpa!

¹⁸⁻¹⁹ Che rahir Timoteo, co amondo nde cuaitarā ndeu nde reco moviracua āgua mbahe tēi recopi āgua Cristo rese nde yeroyasa pipe nde pihañemoñeta catuprisa pipe avei. Supi tupri cuese Tūpa reroyasar oñehe yuvireco nde rese serer pipe. Amove ava opihañemoñeta tupri reroyaēhisave, omocañi uca Tūpa rese oyeroyasa

²⁰ inungar vahe Himeneo rese, Alejandro yuvirecoi. Ahe che amondo Carugar povrive ‘evocoiyase toicua tiñehe-ñehe tēi eme Tūpa upe yamotarēhisave yuvireco’ che yapave.

2

Ñehesa yeruresa resendar

¹ Iyavei no, co che opomonguerēhi pe yerure āgua, peporandu, pemondo avei “aviye” pe hesa Tūpa upe opacatu ava recocuer rese.

² Iyavei peyerure opacatu mborerecuar rese. Evocoiyase tayareco yande reco tupri Tūpa mboetei tuprisa pipe, yande poromboeteisa pipe avei.

³ Co aviye ité; ahe niha yande Písirosar Tūpa remimbotar.

⁴ Supi eté ahe oipota opacatu ava ñepísiro iyavei co porombohesa supi eté vahe cua tupri āgua.

⁵ Esepia, ñepeíño ité Tūpa, iyavei ñepeíño ité ava oicatu vahe yande reraso Tūpa upe: ahe Jesucristo.

⁶ Esepia, Jesucristo omano opacatu ava yangaipa vahe repirā ipísiro āgua. Ahe imombehusa chupendar ari iporavopri rupi.

⁷ Sese che supi eté apóstol, icuaipri aico Tūpa Ñhengagüer mombehu āgua, ava ndahei vahe judío mbohe āgua, co yeroyasa rese iyavei supi eté vahe rese. Supi eté ndopombopai.

⁸ Evocoiyase che aipota opacatu rupi ava toyerure yuvireco. Tomopuha oyo yuvireco opihañemoñeta catuprisa pipe, ombahe mboasiēhisa pipe, oyeacāhisa pipe avei.

⁹ Iyavei cuña toyemonde tupriño turucuarño tēi pipe yuvireco. Aní chira rumo oāca moporañeteisa pipe yuvirecoi; tomondo eme avei mbahe sendí vahe inungar oro oyese yuvireco. Iyavei turucuar sepi rusu vahe tomondo eme yuvireco.

¹⁰ Iyacatu rumo yuvirecoi tuprira güembiapo aviye vahe pipe, inungar cuña oyemondo tupri vahe Tūpa upe yuvireco yepi.

¹¹ Iyavei cuña tosendu porombohesa oquiririsa pipe imboyeroyasave.

¹² Ndaipotai cuña oporombohe ava rehi pāhuve iyavei toyocuai eme cuimbehé. Iyacatu rumo iquiririñora yuvireco.

¹³ Esepia, Tūpa oyapo yipindar Adán; ipare Eva oyapo.

¹⁴ Adán ndahei imbopari; cuña rumo oyembopa uca. Ichui oviapi angaipa pipe.

¹⁵ Oñepisirora rumo ocuaita mboaviyesa pipe oyese yeroyasa rereco pipe, iporoaisusa pipe, güeco maranehisa pipe avei.

3

Tüpa reroyasar rãrosar cuaita

¹ Iyavei co supi eté: acoi amove oico pota vahe Tüpa reroyasar rãro ãgua, ahe oipota mboraviqui aviye catu vahe.

² Sese acoi vireco vahe ocuaita Tüpa reroyasar rãro ãgua, ahe secoi tuprira mbahe aviye vahe pipe yepi. Ipipe ava noñehei chira yamotarëhisave. Iyavei omendara ñepei cuña reseño ité. Toñearo tupri avei yuvireco, toyapo mbahe supi eté vahe, tiporomboetei tupri avei. Iyavei omoinguera oyepiri ava oyepota vahe güetave. Oicua aveira ava mbohe tupri ãgua.

³ Iyavei ndahei chira caguar tõi. Ndosecai chiaveira ovava ãgua. Iyacatu rumo seco mbegüera opacatu ava upe. Ndoipota rai chiaveira guarepochi.

⁴ Iyavei oicua tuprira güeta pipendar rãro ãgua. Ombohe aveira guahir iporeroya ãgua, iporomboetei ãgua avei.

⁵ Esepia, acoi ndoicuai vahe güeta pipendar rãro, çmara ehira evocoyase Tüpa reroyasar rãro?

⁶ Tüpa reroyasar rãrosar rumo ndahei chira oipisi ramo vahe Tüpa opiha pipe. Esepia, aviyeteramo oyemboivate ai tiëtera. Ipipe sui imocañipri avei secoira Carugar nungar.

⁷ Iyavei oyecua uca tupri ranera Tüpa reroyasarëhi pähuve. Ahese ndipoi chira imboeteiëhisa iyavei ndoviapi chira Carugar povrive.

Tüpa reroyasar rese ihañeco vahe cuaita

⁸ Iyavei Tüpa reroyasar rese ihañeco vahe yuvirecoira oporomboeteisa pipe. Tomboaviye oñehe. Ndahei chira caguar tõi; ndahei chiaveira guarepochi pota raisar tõi.

⁹ Iyacatu rumo, porombohesa supi eté vahe rese oyemboya catura opihañemoñeta catuprisa pipe yuvireco.

¹⁰ Iyavei secoãhasa ranera. Acoi osë tuprise, ahese toyuvirecoi Tüpa reroyasar rese ihañeco vahe.

¹¹ Iyavei sembireco yuvirecoi aveira oporomboeteisa pipe, nimahechiroi chira, osãro tuprira güecocuer yuvireco, iyavei imboyeroyapri aveira opacatu mbahe rese yuvireco.

¹² Iyavei Tüpa reroyasar rese hañecosar ñepeiño itera sembireco, oicua aveira guahir rãro tupri ãgua, güeta pipendar rãro ãgua avei.

¹³ Esepia, Tüpa reroyasar rese hañecosar oyapo tuprise oporaviçuisa yuvireco, ipipe sui imboyeroyasara. Osiquiyëëhisave avei secoira Jesucristo reroyasa pipe.

Tüpa reco oyecua ramo vahe reroya tuprisa

¹⁴ Che aso pihaivi pota nde repia. Aicuachía rumo co che ñehe ndeu

¹⁵ acoi che aracahese, ereicuãñora rumo pe reco tupri ãgua ava Tüpa rese yuvirecoi vahe pähuve; ahe acoi Tüpa oicove vahe upendar yuvirecoi, oyemoviracua tupri vahe yuvireco co porombohesa supi eté vahe mboyecua ãgua.

¹⁶ Supi eté tuvichá etepri Tüpa reco oyecua ramo vahe reroya tuprisa: Cristo oyemoporëhi yande reco nungar pipe yandeu.

Ipape Espiritu pipe imboyecua secocuer supi tupri vahe.

Iyavei Tüpa rembiguai rembiepiave secoi.

Ichui imombehusa opacatu ivi rupi; opacatu rupi avei seroyasa.

Iyavei ipisipri secoi ivave nara.

4

Oimera ava oyepepi vahe Tūpa rese oyeroyasa sui yuvireco coiye

¹ Iyavei Espiritu aipo ehi tupri yandeu: coiye, ari cañi renonde, amove ava oyepepira Tūpa rese oyeroyasa sui yuvireco. Omboyeroyara espíritu oporombopa tēi vahe, porombohesa Carugar suindar avei.

² Oyapisacara ava aipo ehi tēi vahe rese, semirañete ai vahe ñehe rese avei yuvireco. Ēgüe ehira opihañemoñetasa mocañi tēi yuvireco.

³ Co ava niha, “Aní chira yamenda” ehi tēi ava upe yuvireco; “Aní chira yahu opacatu mbahe” ehi avei chupe. Tūpa rembiapo rumo co tembihu poromoviracuasa. Sese Jesús reroyasar iyavei oicua tupri vahe mbahe supi eté vahe yuvirohura ‘aviye ndeu’ ohesa pipe Tūpa upe yuvireco.

⁴ Esepia, opacatu mbahe Tūpa rembiapo, aviye ité. Ahe ndiyai chira yaroïro yaipisise, “Aviye ndeu” yande hesa pipe chupe.

⁵ Esepia, Tūpa oñehe pipe yande yeroquise co tembihu rese, osovasa yandeu.

Cristo rembiguai aviye vahe resendar

⁶ Acoi erembohese co mbahe rese yande rivireta iyavei ereyemoviracuase ñehesa poreroyasa resendar rese iyavei porombohesa aviye vahe nde yese erereco vahe rese, ahesa Jesucristo rembiguai aviye vahe ereicora.

⁷ Ndereyapisacai chira rumo acoi mbahe aracahendar co ivi pendar yapisaca tēisa rese. Eyembohe catu yande Yar uveño ité nde reco água.

⁸ Esepia, yepe aviyeño chñhi yande retecuer yamoviracua viña, yande Yar upe yande reco água aviye catu opacatu yande reco uve nara. Esepia, ahe yande pítivira yande recove água cūrítei iyavei curi yande recove água.

⁹ Co supi eté vahe, evocoyase yande yaroyara opacatu yepi.

¹⁰ Sese niha yaporaviquí etepri. Esepia, yande yayeroya ité Tūpa ndopai vahe rese, ahe opacatu ava Písirosar, iyavei viroyasar Písirosar catu ité secoi.

¹¹ Co porombohesa eremombehura ava pāhuve, erembohe aveira sese.

¹² Tipo eme ava nde roeroïro vahe chñhivahe catu nde reco rese. Nde rumo ereico tuprira Tūpa reroyasar rovaque. Eñehe Tūpa reroyasave nde reco tuprisa pipe. Esaisu tupri nde yeroyasave nde recocuer maranehi pipe.

¹³ Che yepota renondeve, eyeroqui catu Tūpa Ñhengagüer rese opacatu ava rovaque. Emonguerēhi catu yande rivireta iyavei erembohe tuprira.

¹⁴ Nderepoi chira Tūpa ndeu mbahecuaasa ombou vahe sui. Esepia, ava Jesús reroyasar rārosar upe Tūpa omombehuse nde cuaitarā, omondo opo nde harive yuvireco.

¹⁵ Ndehañeco catu co mbahe rese; tosepia catu opacatu ava nde recocuer yemoingatu catusa yuvireco.

¹⁶ Iyavei eñearo tupri, eicua catu nde porombohesa rese; eyemoviracua sese ité nde hañeco. Acoi ēgüe erese, ipisiropri ereicora; nde ñehe rese oyapisaca vahe avei ipisiropri yuvirecoira.

5

Mara ehira Jesús reroyasar oye pāhuve yuvireco

1 Eremboaracua pĩrata eme mbia cuacuami. Iyacatu rumo eremboaracuara mbegũe rupi inungar nde yesupa ité sereco. Iyavei mbia chĩhivahe upe ereñehe tuprira secocuerã rese inungar nde rivri upe.

2 Cuña otĩaro vahe upe avei ereñehe tuprira inungar nde si ité sereco; iyavei cuñatai eremboaracua tuprira inungar nde reindri ité ererecora opacatu nde reco catuprisa pipe.

3 Acoi imer mano vahecuer ité ereipĩtivĩra que mbahe ipane vahe rese.

4 Que oimese imembri, anise que semiariro, toyembohe rane ocuaita mboaviye ãgua yuvireco chupe. Êgũe tehi guaisu mboyevi chupe, ahe niha Tũpa remimbotar.

5 Iyavei acoi cuña imer mano vahecuer, acoi supi eté ahe ae secoi vahe, ahe oyeroya ité Tũpa rese, iyavei oyeriquiño ité ari, pĩtu yacatu yepi.

6 Osecase rumo mbahe güemimbotar yuvireco, ahese omano vahe tẽi secocuer yuvirecoi.

7 Eyocuai tupri ava co ñehesa rese; ichui ndahei chira ava ñehepora tẽi yuvirecoi.

8 Acoi ava rumo nosaroi vahe omu; acoi güeta pipendar nosaroi vahe avei, ahe ndoguata iri Tũpa rese oyeroyasa rupi iyavei mbahe tẽi catu Jesús reroyasarẽhi sui.

9 Icuachiasara rumo ambuae cuña imer mano vahecuer pãhuve ivate catu sesenta sui iharaviter vahe, iyavei ñepeño ité omer vireco vahecuer.

10 Icuaprira secocuer icatuprisa rese, omboacua tuprise chĩhivahe oyesuindar, omõinguese ava güeta pipe, ihañecose ava Tũpa reroyasar rese ipi sei ãgua, oipĩtivĩise ava iparaisu vahe, oyapo tuprise opacatu mbahe aviye vahe.

11 Ereicuachia eme iharaviter ndosupiti vahe sesenta cuachiar pipe. Esepia, amove güemimbotar pipe tẽi oyepepi Cristo sui, omenda yupagũe pota iri vahe.

12 Ipipe oimera Tũpa poronupasa chupe. Esepia, yipindar oyemondo Tũpa upeño ité oyecuachiasẽ. Ipare rumo nomboaviyei eté oñehe.

13 Iyavei oi yacatu rupi tẽi oguatase oico, ahese virecora oatẽhisa, iyavei imahechiroi tẽira, oñangareco tẽira opacatu rese, omombehu-mbehu tẽi aveira mbahe naporai vahe.

14 Sese co aipota acoi imer mano vahecuer cuñatai vite vahe: tomenda iri, timembi iri avei yuvireco, iyavei tosãro tupri güeta pipendar. Sese yamotarẽhimbar secocuer ndahei chira oñehepora tẽi vireco yuvireco.

15 Esepia, oime ité amove oyepepi vahe güemimbotar pipe Carugar rupi güeco ãgua.

16 Acoi oimese que cuña Tũpa reroyasar vireco vahe que cuña imer mano vahecuer oyepiri, ahe toipĩtivĩi yuvireco. Ahe sese evocoyase tũparo pendar nihañecoi chira. Ahese oicatura supi eté imu ndipoi vahe rese hañeco ãgua yuvireco.

17 Iyavei acoi Tũpa reroyasar rãrosar osãro tupri vahe, ahe toipisi catu ava poropĩtivĩisa imboyeroyasave. Acoi oyemondo vahe Tũpa Ñehengagũer mombehu ãgua, ava mbohe ãgua avei, ahe co poropĩtivĩisa oipisi catura.

18 Esepia, arachendar icuachiapri pipe aipo ehi: “Ereiyuru ãpichi rene tivĩ oporaviqui vahe trigo cambesar” ehi. Iyavei aipo ehi: “Mbia oporaviqui vahe iyacatu oipisari oporaviqui repri” ehi.

19 Iyavei nde, ndereroyai chira mbahe omombehu vahe Tũpa reroyasar osãro vahe yamotarẽhisave yuvireco. Oimese que ñuvirio sepiasar, que mbosapi, ahese ramo ereroyara.

²⁰ Acoi oimese rumo angaipa aposar ipāhuve, ahese eremboaracuara opacatu ava rovaque. Evocoiyase ambuae osiquiyera angaipa apoēhi āgua yuvireco.

²¹ Iyavei che orocuai Tūpa rovaque, Jesucristo rovaque iyavei opacatu Tūpa rembiguai iva pendar rovaque avei: ereyapo tuprira co mborocuaita, nderemomahuatī chira ava imboaracua nde remimbotar rupi tēi.

²² Ndahei chira pihaiivi eresenoī mbīa mborocuaita rese ihañeco vaheṛā. Aviyeteramo nde rese pāve mbahe oimera. Eñearo tupri nde reco maranehisa pipe.

²³ Nde rie mbaherasisa upe ndereihui chira i güeraño tēi, chīhimi rumo uva ricuer ereihuñomira chupe.

²⁴ Amove ava angaipa oyecua tupri oyeupe porandu āgua renonde. Oime rumo acoi oñomi vahe oangaipa yuvireco. Ipare tēi icuasa.

²⁵ Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ité nañomisai chira.

6

¹ Iyavei co ava mbiguai Jesús reroyasar, ahe oyeroya tuprira güerecuar yuvireco ava oñehe-ñehe tēiēhi āgua Tūpa rer rese, yande porombohesa rese avei no.

² Acoi co mbiguai virecose güerecuar Tūpa viroya vahe yuvireco, ahese ndovirecoi chira imboyeroyaēhisa Jesús reroyasar recosa rese. Iyacatu rumo omboyeroya tupri catura güerecuar yuvireco. Esepia, serecuar oipisi vahe iporaviquisa, ahe Jesús reroyasar saisupri yuvirecoi yepi.

Tūpa rese yande pihañemoñetasa sepīrusu vahe nungar

Eporombohe, emombehu co mbahe:

³ oimese oporombohe vahe oyesuindar pihañemoñetasa co coti tēi vahe rese, ndoyoyai vahe yande Yar Jesucristo porombohesa aviye vahe rese, ndoyoyai vahe avei yande yembohesa Tūpa rese yande yeroya tuprira rese,

⁴ ēgüe ehi vahe oyemboivate ai tēi mbahe renducuaēhisave. Iyavei oporandu-randu tēi ñehesa rese secoāha āgua inungar imbaheasi vahe. Ichui osē mbahe pota raisa, ñemoirosa, ñehe-ñehe tēisa, yemboyeroyaēhisa

⁵ iyavei iporoacasa ndopai vahe ava yaracua rai vahe pāhuve. Ndoicuai rumo mbahe supi tupri vahe yuvireco. Ipihañemoñeta Tūpa rese omahenduhasa pipe mbahe rereco ati āgua yuvireco viña.

⁶ Yayembovihañose mbahe yande rembiereco rese, ahese Tūpa rese yande pihañemoñetasa inungar mbahe sepīrusu vahe yandeu.

⁷ Esepia, ndayarui eté niha mbahe yahase co ivi pipe iyavei ndayarasoi chiveira mbahe yamanose yande yeupi.

⁸ Iyacatu rumo yarecose yande remihura, yande yemonde āgua avei, sese yayembovihañora yaico.

⁹ Amove rumo ava, “Mbahe rerecosar ité taico” ehi tiēte viña, ndoyemoviracuai rumo tecoāhasa upe. Ipare oviapi mbahe tēi pipe, setá mbahe pota raisave, ipipe oyeecomomara. Ipare oyemocañi tēi.

¹⁰ Esepia, guarepochi pota raisa sui osē opacatu mbahe naporai vahe. Amove ava ipota raisa pipe oyepepi Tūpa reroyasa sui iyavei omombaraisu güecocuier ipipe ahe ae yuvireco.

Tūpa rese yande reco vīracuasa

¹¹ Nde rumo, Tūpa rese ereico vahe, eyepēpi opacatu co nungar mbahe naporai vahe sui. Eico nde reco ñvisa pīpe, ndemahenduhāño ité Tūpa rese. Eroya, esaisu, eñmosa avei eico nde reco mbegüesave.

¹² Eyemoviracua ité mbahe tēi uve Tūpa reroyasa rese. Erepoi rene tecovesa apirēhi vahe sui, sese niha Tūpa oñehe ndeu. Iyavei eremombehu ité niha Tūpa reroyasa nde reco āgua ava eta rovai.

¹³ Cūrītei Tūpa rovaque, ahe opacatu mbahe moingovesar iyavei Jesucristo rovaque, ahe niha omombehu tupri ité supi eté vahe Poncio Pilato rovai, che orocuai

¹⁴ Ndererovai chira che remimombehu ‘tipo eme, mara ehi, ehi tēi vahe yuvireco ndeu’ che yapave. Nderepoi chietera co nde reco tuprisa sui acoi ouse yande Yar Jesucristo.

¹⁵ Acoi oyepotase ari imombehupri curi, ahese Tūpa omboyevira Guahir. Ahe niha ñepēi vaheño ité imboeteipri, seco pīrata catu vahe. Aheño ité niha mborerecuar ivate catu vahe rerecuar.

¹⁶ Aheño ité teco apirēhi vahe, tesapesa secoi; ndipoi oyemboya vahe sese, ndipoi eté que ava osepia vahe. ¡Ēgüe tehi, imboeteipri tasecoi opacatu opīratasa apirēhi vahe rese!

¹⁷ Acoi imbahe eta vahe co ivi pīpe eyocuai: toyemboivate ai eme, iyavei toyeroya rai eme ombahe eta rese tēi yuvireco. Esepia, ahe Ēgüe ehi tēi vahe. Iyacatu rumo Tūpa rese oyeroyara yuvireco. Ahe niha opacatu mbahe icatupri vahe ombou yandeu nara yande rembiporugua.

¹⁸ Eyocuai avei evocoi ava: toyuvirecoi mbahe yar nungar mbahe aviye vahe aposa pīpe. Iyavei toyemoingatuño acoi mbahe vireco vahe mboyaho āgua ambuae ava upe yuvireco.

¹⁹ Evocoiyase virecora mbahe aviye vahe, apirēhi vahe oyeupe nara yuvireco curi tecovesa supi eté vahe rereco āgua.

Timoteo cuaitarā ipa vahe

²⁰ Timoteo, esāro tupri co porombohesa supi tupri vahe Tūpa ombou vahe ndeu. Ereyapisacai rene avā tēi pihañemoñetasā Ēgüe ehi tēi vahe rese, iyavei porombohesa co coti tēi vahe rese avei. Esepia, amove ava aipo ehi co porombohesa rese, “Co ité, yande mboaracuara” ehi tupri tēi vahe yuvireco chupe.

²¹ Ipīpe sui niha amove ava oyavi Tūpa reroyasa yuvireco. Aviye, yande Aposar tande rovasa. Aipo rupive.

PABLO REMBICUACHIA IMOÑUVIRIOSA TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, amondo co cuachiar ndeu, che rembiaisu, che rahir nungar, Timoteo. Che niha Jesucristo apóstol aico Tūpa remimbotar rupi acoi “che amondora teco piasu che reroiyasar uve” ehi vahe rupi tupri. Ahe cūritei oime yandeu Jesucristo rese yande recose. Yande Ru Tūpa iyavei yande Yar Jesucristo tombou oporovasasa, oporoparaisuerecosa nde reco tupri āgua ndeu.

Pablo oyocuai Timoteo Cristo recocuer mombehu āgua

³ Che yeroqui pāhuve, chemahenduha nde rese pītu, ari yacatu rupi. “Aviye ndeu” ahe Tūpa upe nde recocuer rese. Che aporaviqui tupri ité Tūpa rese che pihañemoñeta tuprisa pipe yepi inungar che ramoi eta oyapo yuvireco aracahe.

⁴ Ndacheresarai eté acoi nde yaseho agüer sui. Iyavei oroepia pota tēi che yemboviharete āgua.

⁵ Supi eté chemahenduhano ité nde Tūpa reroyasa supi eté vahe erereco vahe rese. Iyavei nde yari Loida, nde si Eunice, ahe niha yipīndar ēgüe ehi yuvireco. Evocoiyase ayeroyano ité nde rese, nde avei ēgüe erese.

⁶ Sese che oromonguerēhi embouvicha catu co Tūpa ombou vahe ndeu acoi amondose che po nde harive; ahe ereco catu nde yeupe.

⁷ Esepia, Tūpa nomboui siquiyesa yandeu. Ahe rumo ombou yande reco moviracuasa, poroaisusa, iyavei yande mbopihañemoñeta tupri āgua.

⁸ Evocoiyase eresiquiye eme catu yande Yar recocuer mombehu. Nderechī chiaveira che roquendasa sui tēi. Esepia, yande Yar recocuer mombehusa sui tēi niha che roquenda yuvireco. Iyacatu rumo, nde avei ereñemosañora co mbahe-mbahe tēi Tūpa pīratasa pipe. Ahe oura ndeu ñehesa pīsirosa resendar mombehusa sui.

⁹ Tūpa niha yande pīsiro iyavei yande renoi yande reco tupri āgua sese, ndahei yande rembiapo pipe. Ahe rumo güemimbotar rupi yande raisu Cristo Jesús rese yande recose. Ahe Tūpa ité yande raisu yipisuive ivi apo vitehiseve.

¹⁰ Cūritei rumo ahe omboyecua oporoaisusa yande Pīsiosar Jesucristo ouse, acoi ou vahe co ivi pipe manosa pīratasa recopi āgua. Iyavei ñehesa pīsirosa pipe avei oicua uca tecovesa ndopai vahe.

¹¹ Tūpa niha che cuai co ñehesa mombehu āgua. Che cuai avei apóstol che reco āgua iyavei che porombohe āgua.

¹² Sese niha che opacatu aiporara co mbahe-mbahe tēi vichico. Nachi eté rumo yande Yar resé che yeroyasa pipe. Esepia, aicua ahe vireco pīratasa acoi ñehesa ombou vahe cheu imocañiēhi āgua acoi Jesús yevi āgua rupi eté.

¹³ Erecoveño ité porombohesa aviye vahe che suindar, iyavei eicoño ité Tūpa rese nde yeroyasa pipe iyavei poroaisusa yareco vahe pipe Cristo rese yaicose.

¹⁴ Esāro avei co ñehesa aviye vahe Tūpa ombou vahe ndeu Espiritu Santo reco pīratasa pipe yareco vahe yandeyese.

¹⁵ Ereicia niha co ava opacatu Asia p̄ipendar oyepipiño che sui yuvireco. Ip̄āhuvē yuvirecoi mbia ñuvirío, ahe serer: Figelo, Hermógenes.

¹⁶ Yande Yar tomondo paraisuerecosa Onesíforo mu upe. Esepia, Onesíforo setá yupagüer che mboviha. Iyavei nochi eté ava rovaque che roquendasa sui.

¹⁷ Ouse rumo Roma ve, ndopituhui eté che reca.

¹⁸ Yande Yar tomondo oporoparaisuerecosa chupe ahe arí p̄ipe curi. Iyavei nde ereicia tupri ité ahe mbia yande p̄itivi vahe Efeso ve.

2

Jesucristo sundao oyemoviracua vahe

¹ Iyavei nde no, che rahir, eyemoviracua mbahecuasa Jesucristo ombou vahe p̄ipe ndeu.

² Acoi che porombohesa eresendu vahe ava rehii rovaque amondo vahe ndeu, embohe tupri mbia oyeroya vahe, oicatu vahe avei ambuae mbohe āgua.

³ Nde eyemoviracuaño teco asi upe Jesucristo uve nara inungar sundao oyemoviracua vahe ité.

⁴ Ñepe yepe sundao ndosirii eté ocuaita sui. Esepia, ahe oyemoingatu voi eté ocuai āgua güerecur upe.

⁵ Iyavei iguayi rai vahe, ndoipisii chira porerecosa oguayi tupriēhi p̄ipe.

⁶ Iyavei yande inungar que ava oñoti vahe mbahe, ahe rane omonuha güemiti yaviyese oyeupe yepi.

⁷ Eyapisaca tupri co che ñehe rese. Yande Yar niha osenducua uca tuprira opacatu co mbahe ndeu.

⁸ Iyavei no ndemahendua Jesucristo rese. Ahe niha ocuerayevi vahe. Iyavei arachendar mborerecur David suindar secoi. Co niha ñehesa ñepisirosa resendar amombehu vahe vichico.

⁹ Co ñehesa mombehua sui tēi che mombaraisu yuvireco. Che roquendasave aviye oporapichi vahe che rereco yuvireco. Tūpa Ñehengagüer mombita rumo ndoicatu eté yuvireco.

¹⁰ Sese che añemosañño opacatu mbahe-mbahe tēi upe opacatu Tūpa rembi-poravo recouer aviye āgua rese ‘tovireco catu p̄isirosa porañete, apirēhi vahe Jesucristo rese yuvireco’ che yapave.

¹¹ Co niha supi tupri vahe:

Yamanose Cristo rese, ahese yaicove aveira sese.

¹² Yañemosase mbahe tēi upe, ahese yande yaicora mborerecur imborere-cuasave ipiri.

“Ndaicuai Jesucristo” yahese, ahese ahe avei,

“Ndopocuai vahe” ehiñora yandeu.

¹³ Yepe co coti tēi yarovara yande recouer seroyaēhisave, ahe rumo ndovirovai chietera güeco ñvisa.

Esepia, ndoicatu, “Ndahei che ahe aico” ehi vaheñã.

Ava osē tupri vahe güecoñhasa Tūpa upe nara

¹⁴ Emamahendua yuvireco co ñehesa rese, iyavei eyocuai Tūpa rovaque: topoi ñehepoepi-episa sui yuvireco, co ñehepoepi-episa ēgüe ehi tēi vahe. Esepia, omomara ambuae ava osenduse iñehe rai yuvireco.

¹⁵ Eyapo tupri mbahe opacatu nde catugüer rupi nde recocuer mboyecua ägua Tüpa rovai inungar oporaviqui tupri vahe, nochi vahe. Ëgüe ere, eporombohe tupri ñehesa supi eté vahe rese.

¹⁶ Eyepepi ñehe tēisa, ëgüe ehi tēi vahe sui. Esepia, co nungar ñehesa tēi ombouvicha catu mbahe naporai vahe.

¹⁷ Iyavei iporombohesa rai oyembouvicha inungar caracha vai ndocuera catui vahe, oyembouvicha-vichaño yepi. Ëgüe ehi Himeneo, Fileto

¹⁸ oyavi porombohesa supi eté vahe sui yuvireco. “Opa cuerayevisa. Ndipo iri chira” ehi tēi yuvireco. Ipipe Jesús reroyasar oipihañemoñeta rerova yuvireco.

¹⁹ Tüpa rumo omondo mbahe moviracua tupri ägua, sese icuachiasa aipo ehi vahe: “Yande Yar oicua ité oyeupendar ava” ehi, iyavei, “Opacatu yande Yar rer vireco vahe, toyepipi mbahe naporai vahe sui yuvireco yepi” ehi.

²⁰ Oi guasu pipe, ndahei guarepochi, oro apopri güeraño oime, oime avei ivirape, ñaihu apopri avei no. Ñepi iporupirã ari imboeteisa pipe nara, ambuae rumo ari rupi iporupirã.

²¹ Acoi ava oñemoatiro vahe co tecocuerai sui Tüpa upe nara, ahe ipehasa inungar vaso oro apopri poromboeteisa pipe iporupirã; ahe ava oyemoin-gatu voi eté oico mbahe icatupri vahe apo ägua Tüpa upe.

²² Eyepepi mbia chihivahe pihañemoñeta rai tēisa sui. Emohivi tupriño ité nde recocuer sereco. Eyeroyaño ité Tüpa rese. Esaisu catu avei ava, eico avei nde reco tupri pipe, inungar Jesucristo reroyasar oyapo opihañemoñeta tuprisa pipe yuvireco.

²³ Eremboyeroyai rene ñehesa porandu-randu tēisa, ëgüe ehi tēi vahe. Ereicua niha ichui tēi oime yeamotarēhisa yepi.

²⁴ Iyavei yande Yar rese oporaviqui vahe, ndiyai oyeecopi oñehe pipe yuvireco. Iyacatu rumo, aviyera secocuer opacatu upe, oporombohe tupri, oñemosañora ombahe mboasiēhisa pipe oico.

²⁵ Iyavei omboaracuara güeco asiēhisa pipe acoi ava ndiporeroyai vahe. Esepia, aviyeteramo Tüpa osecuñarora ipihañemoñeta raisa oyeupe yevi iri ägua: ipipe sui porombohesa supi eté vahe oicuaru yuvireco.

²⁶ Ipipe sui avei toyemopoase, toyuvinose Carugar povri sui semimbotar apo iriēhi ägua.

3

Mara ehira ava ari ipa vahe pipe curi

¹ Iyavei tereicua ari ipa vahe yepotasa, ahese oimera tecocuer yavai catu vahe.

² Ahese ava ahe ae tēi oyeaisura yuvireco, guarepochi tēi oipota raira, oyemboivate aira, oyemboetei ai tēi aveira. Oñehe raira Tüpa rese yamotarēhisave. Nomboyeroyai chira oyesupa yuvireco. Setá aveira, “Aviye ndeu” ndehi vahe ava upe. Iyavei nomboetei chira Tüpa rese pihañemoñetasa yuvireco.

³ Ndosaisui chira oyesuindar yuvireco. Niñeroi chiveira oyeupe yuvireco. Iyavei imahechiroi aira. Noñemosai chira mbahe tēi apo ägua yuvireco. Güeco asi pipe avei yuvirecoira. Iyavei opacatu mbahe aviye vahe oyamotarēhira yuvireco.

⁴ Iyavei omondora ava yamotarēhimbar upe, ndiporomboetei chira güemimbotar apo yuvireco. Iyavei oyemboivate aira yuvireco, osecara

güemimbotar tēi oyemboviha āgua yuvireco. Ipipe rumo Tūpa ndosaisui chira yuvireco.

⁵ Ahe inungar-ra Tūpa rese ité yuvirecoi vahe viña. Tūpa pīratasa rumo nomboyecuai chietera güemiapi pipe yuvireco oyese.

Sese nde, eyepepiño evocoi nungar ava sui.

⁶ Esepia, evocoi nungar ava pāhve oime yuviroiqueño tēi vahe oi rupi cuña ndoicatu vahe angaipa rerecosar mbopa āgua. Esepia, ahe cuña opihañemoñeta raisa pipe yuvirecoi vahe.

⁷ Yepe oyapisaca tupri tēira ñehesa rese yuvireco viña, ndosupitití eté rumo co porombohesa supi eté vahe renducua āgua yuvireco.

⁸ Inungar co ava ipaye vahe Janes, Jambres serer vahe oyemboyere Moisés amotarēhi yuvireco, ēgüe ehi avei evocoi ava porombohesa supi eté vahe amotarēhisar yuvireco. Ahe oyemomara vahe opihañemoñeta raí pipe yuvireco. Ndoviroyai eté Jesús porombohesa yuvireco.

⁹ Ndoporombopa iri chira rumo yuvireco. Esepia, opacatu ava oicuaa yuvireco imbahecuaēhi rese, inungar co ñuvirío mbia Moisés amotarēhimbar yuvirecoi aracahe.

Timoteo cuaitarā ipa vahe

¹⁰ Nde rumo che reco rupi tupri ité ereico. Esepia, ereroya tupriño ité che porombohesa, che pihañemoñetasa, che Cristo rese yeroyasa, che reco mbegüesa, che poroaisusa iyavei che ñemosasa

¹¹ opacatu mbahe tēi porarasa rese. Nde niha ereicua opacatu mbahe tēi oime vahe cheu co tecua guasu, Antioquia ve, Iconio ve, Listra ve avei no, iyavei che paraisusa mara-mara tēi che rerecosar yuvireco. Yande Yar rumo che pīsiro opacatu evocoi mbahe-mbahe tēi sui.

¹² Supi eté opacatu acoi Jesucristo rese güecocuer vireco pota vahe oiporarara mbahe-mbahe tēi yuvireco.

¹³ Ava secocuer naporai vahe rumo, iporombopa serai vahe avei ombouvicha catura güecocuerai; oporombopa-mbopa tēira yuvireco. Iporombopasa pipe rumo ambuae omboyevira chupe.

¹⁴ Nde rumo ereyemoviracuaño itera acoi ereyembohe vahe rese. Ahe ereroya tupriño ité. Esepia niha, nde mbohesar ereicua.

¹⁵ Iyavei eyemomahenduha co rese: nde chíhivahe suive ité niha ereicua Tūpa ñehe icuachiapri eico. Ahe niha nde mombahecua vahe nde pīsiro āgua Jesucristo reroyasa pipe.

¹⁶ Opacatu co ñehesa icuachiapri ou vahe Tūpa sui, aviye ai eté porombohe āgua, iyavei poromboyapisaca āgua, poromboaracua tupri āgua iyavei ava upe ñehe tupri āgua secocuer mohivi āgua yepi.

¹⁷ Ichui, ava Tūpa rese yuvirecoi vahe oyemoingatu voira opacatu tecocuer tupri apo āgua yuvireco.

4

¹ Iyavei no, co rese che orocuai pota Tūpa rovaque, Jesucristo rovaque avei acoi ou vaheṛā omborerecuasa reseve oicove vahe, omano vahe recocuer rese porandu āgua.

² Emombehu Tūpa Ñehengagüer arí rupi. Erova ité ava reco. Eporomboaracua, eporomonguerēhi tupri avei opacatu nde reco asiēhisa pipe.

³ Esepia, coye ava ndosendu pota iri chira porombohesa aviye vahe yuvireco. Ahese güemimbotar tēi osecara ombohe āgua, güemimbotar tēi avei omombehu ucara oyeupe yuvireco.

⁴ Iyavei oyepēpīra co mbahe supi eté vahe sui. Viroyara rumo opacatu ava remimombehu tēi yuvireco.

⁵ Nde rumo, ererecovēñora nde aracua tuprisa. Eñemosañño mbahe naporai vahe upe. Ndehañeco catu ñehesa pīsīrosa resendar mombehu āgua. Emboaviye tupri avei opacatu nde poraviquisa.

⁶ Virovī ari che retecuer mondo āgua manosave inungar mbahe seropovēhepri yande Yar upe.

⁷ Ayapopa che recoeté pipe che poraviquisa aviye vahe che amotarēhimbar pāhuve. Amboaviye che cuaita. Ndayepēpī eté che yeroyasa sui.

⁸ Cūrīte che rāro ivave co porerecosa che poraviqui aviye vahe resendar. Yande Yar mborerecuar seco īvi vahe niha omboura cheu ahe ari pipe. Ndahei chira cheu güerañño. Ombou aveira opacatu Cristo raisusa pipe iyevisa osāro vahe upe yuvireco.

Pablo, "Eyu rane che repia" ehi Timoteo upe

⁹ Ndepoyava catu eyu che repia.

¹⁰ Esepia, Demas che reya co mbahe ivi pipendar tēi potasave, ichui tēi oso tecua Tesalónica ve. Crescente oso tecua Galacia rupi. Iyavei Tito oso Dalmacia ve.

¹¹ Lucas güerañño oicove che piri. Eseca Marcos, tou nde rupi che pītīvī āgua mboraviqui rese.

¹² Tíquico amondo tecua Efeso ve.

¹³ Acoi ereyuse, eru avirave che yemboyohasa aseya vahe Troas ve Carpo rētave. Iyavei cuachiar guasu, ambuae cuachiar reseve, ahe aipota catu vahe; erupa eyu.

¹⁴ Alejandro, guarepochi mombesar, oyapo mbahe tēi cheu. Yande Yar rumo oicuaa sembiapogüer rese chupe.

¹⁵ Iyavei nde eicua catu ichui. Esepia, ahe yande amotarēhi mbahe yande remimombehu rese oico.

¹⁶ Yipindar añehese che yoepi āgua mborerecuareta rovai, ndipoi eté que che pītīvīsar; opacatuño ité che reya yuvireco. Tūpa tiñero sese yuvireco chupe.

¹⁷ Yande Yar Jesucristo rumo che pītīvī. Che momirata co ñehesa pīsīrosa resendar mombehu tupri āgua opacatu ava ndahei vahe judío upe. Ēgüe ehi avei che renose mbahe tēi sui.

¹⁸ Ahe che pehara opacatu mbahe-mbahe tēi sui iyavei che pīsīrora oyepiri ivave che so āgua. ĩĒgüe tehi timboeteisa catu yande Yar apirēhi vahe yepi!

Mahenduhasa opacatu upe

¹⁹ Emombehu che mahenduha Prisca upe, Aquila upe iyavei opacatu Onesíforo rēta pendar upe avei.

²⁰ Erasto opīta Corinto ve, Trófimo rumo imbaheasi, evocoyase aseya Mileto ve.

²¹ Ndepoyava catu eyu irohī yu renondeve. Imahenduha yuvireco nde rese Eubulo, Pudente, Lino, Claudia iyavei opacatu yande Yar viroya vahe yuvireco.

²² Yande Yar Jesucristo toico nde rese. Iyavei Tūpa tape rovasa opacatu pe rereco. Avīye. Aipo rupive.

PABLO REMBICUACHIA TITO UPE TITO

Pablo mahenduhasa Tito upe

¹ Che, Pablo, Tūpa rembiguai aico iyavei Jesucristo apóstol semimbou aico Tūpa rese yeroyasa mondo āgua sembiporavo eta upe iyavei Tūpa rese pīhañemoñetasa supī tuprī vahe cua uca tuprī āgua.

² Esepia, tecovesa apirēhi vahe rārosa pipe sui viroyara, oicua aveira yuvireco. Tūpa ndoporombopai vahe niha omombehu co tecovesa mondo āgua ivi apo vīteēhiseve oico.

³ Ichui cūrīte arī oyepota yandeu iñehengagūer cua āgua. Sese Tūpa, yande Pīsīrosar, che cuai oñehengagūer mombehu.

⁴ Tito, co che ñehe aicuachīa ndeu; nde niha che rahir ité ereico Jesucristo rese yande recosa pipe. Esepia, oyoya yaroya vahe yaico. Yande Ru Tūpa, yande Pīsīrosar Jesucristo tombou oporovasasa nde reco tuprī āgua ndeu.

Tito poraviquisa caha pāhu Creta ve

⁵ Che oroeya vitu co caha pāhu Creta ve mbahe opita vite vahe moingatu tuprī āgua. Iyavei, “Eiporavo ava, Jesucristo viroya vahe rāro āgua ñepeipei tecua rupindar” ahe acoi ndeu cuese.

⁶ Evocoi Jesucristo viroya vahe rārosar toyuvirecoi güeco tuprī āgua. Tipo eme “co oyapo mbahe” ehi-ehi tēi vahe yuvireco oyeupe. Ñepeifño güembireco vīrecora yuvireco; tahir evocoiyase Jesucristo reroyasar pāvera. Iyavei ndoyuvirecoi chira ndoyemboaracuai vahe nungar oporeroyāēhisa pipe ambuae ava ñeheēhi āgua sese yuvireco.

⁷ Acoi Jesucristo reroyasar rārosar yuvirecoi vahe, ahe icuaita mbahe Tūpa upendar rese. Sese taseco ivi tuprī yuvireco. Iyavei toico eme oporeroyāēhisa pipe, toñemoiro eme avei, ndahei chīaveira caguar tēi; ndīvava serai chīaveira, tiguarepochi pota rai eme yuvireco.

⁸ Iyacatu rumo omoinguera ava oyepota vahe güētave oyepiri. Iyavei aviye aira yepi. Osāro tuprīra güecocuer. Iyavei taseco ivi güeco catuprī pipe Tūpa upe. Tosāro tuprī avei opīhañemoñetasa yuvireco.

⁹ Iya oyemboya catu oyembohesa supī tuprī vahe rese yuvireco. Ipīpe sui tomonguerēhi catu ambuae yuvireco co ñehesa maranehi pipe iyavei ambuae seroīrosar pīhañemoñeta mohīvi āgua.

¹⁰ Esepia, oime setā nimbahe reroyai vahe; judío “peyembocuncida pe ñepisiro āgua” ehi vahe pāhuve oime catu evocoi nungar. Ahe omondo-mondo tēi vahe oñehe, ombopa tēi vahe avei ava yuvireco.

¹¹ Ēgüe ehi vahe iyacatu pemonguiriri. Esepia, ahe niha setā ava oñemu vahe omboyepipi uca porombohesa supī tuprī vahe sui yuvireco. Oporombohe mbahe co coti tēi vahe rese guarepochi rereco āgua tēi yuvireco.

¹² Ñepeī mbīa, otūpa ñehe mombehusar, Creta iguar ae aipo ehi omu rese oñehe: “Co Creta iguar yuvirecoi vahe semirañete ai, mbahe mīmba nungar tēi, icaru ai, yangaipā vai yuvireco yepi” ehi oñehe.

¹³ Supī eté aipo ehi; sese emboaracua pīrata ité. Evocoiyase toviroya tuprī Tūpa yuvireco.

¹⁴ Iyavei toviroya eme co judío oyesui tēi mbahe omombehu vahe iyavei ava porocuita tēi yuvireco. Esepia, ahe oyemboyere mbahe supī vahe sui yuvireco.

¹⁵ Acoi ava ndaseco marai vahe upe opacatu mbahe nimarai. Ndi-poreroyai vahe, ipihañemoñeta rai tēi vahe upe rumo, ndipoi eté mbahe nimarai vahe. Esepia, ipihañemoñeta, yaracuasa avei naporai eté.

¹⁶ Iyavei, “Che aicua Tūpa” ehi tupri tēi angahu yuvireco. Mbahe sembiapo rese rumo icuasa seroyaēhisa yuvireco. Ahe niha ava ndosepia potai vahe, ndiporeroyai vahe yuvireco, ndoicatu mbahe aviye vahe apo yuvireco yepi.

2

Porombohesa nimarai vahe

¹ Nde ñehe toyoya tupri co porombohesa nimarai vahe rese yepi.

² Evocoyase mbia oñaro catu vahe Tūpa reroyasar toñearo tupri, im-boyeroyapri toyuvirecoi, tosāro tupri güecocuer, tovíreco tupri avei Tūpa reroyasa, oporoaisusa. Iyavei güeco mbegüesa pipe toñemosa mbahe-mbahe tēi upe.

³ Ēgüe tehi avei cuña oñaro vahe Tūpa reroyasar yuvireco: güeco tupri tovíreco oporomboeteisa pipe yuvireco. Iyavei timahechiroi eme, ndosavaipoi chiaveira. Ahe rumo omboyecua güecocuer aviye vahe,

⁴ ombohera cuñatai imer raisu āgua, imembri raisu āgua avei.

⁵ Tombohe avei seco tupri āgua, iñearo tupri āgua angaipa sui iyavei sēta pipendar rese hañeco tupri āgua yuvireco. Tomboaracua avei seco aviye āgua, imer mboyeroya āgua avei. Evocoyase noñehe-ñehe tēi chira ava Tūpa Ñehengagüer rese yuvireco.

⁶ Ēgüe ere avei emonguerēhi mbia chīhivahe secocuer rese iñearo tupri āgua.

⁷ Iyavei emboyecua nde recocuer aviye vahe opacatu mbahe rese yuvireco chupe; nde imbohe tuprisa pipe emboyecua nde reco maranehisa, nde poromboeteisa avei.

⁸ Iyavei ereñehera nde reco tupri pipe. Ipipe ambuae noñehe rai chira yuvireco nde rese. Evocoyase yande amotarēhimbar yuvinochira ndoica-tuise, “Mbahe” ohe āgua yuvireco yandeu.

⁹ Emboaracua avei mbiguai yuvirecoi vahe: tovíroya opacatu mbahe rese güerecuar, tomboyeroya imboeteisave, toiñehepoepi eme avei yuvireco.

¹⁰ Iyavei toñomi eme mbahe. Iyacatu rumo seroyapri tupri yuvirecoira. Evocoyase opacatu osepiase seco tuprisa, omboeteira yande Písirosar Tūpa recocuer resendar yembohesa yuvireco.

¹¹ Tūpa niha omboyecua oporoaisusa yandeu. Ahe güeru písirosa opacatu ava upe.

¹² Co poroaisusa Tūpa suindar yande mbohe mbahe-mbahe tēi iyavei yande remibotar tēi reya āgua. Iyavei yande mbohe co ivi pipe yande ñearo tupri āgua, yande reco ivi āgua iyavei Tūpa mboetei āgua.

¹³ Iyavei yasāro yande viharetisa pipe Tūpa omboaviye vaherā güemimombehu, ahe Jesucristo yande Tūpa seco ivaté vahe, yande Písirosar yevi irisa oporañetisa pipe.

¹⁴ Ahe oyemondo oyeyuca uca yande rese yande písiro āgua opacatu mbahe-mbahe tēi sui yande reco moatiro tupri āgua. Evocoyase yande yaico chupe nara güeraño ité yande querēhisave opacatu mbahe aviye vahe apo āgua.

¹⁵ Evocoi rese erembohera, eremonguerēhira, eremboaracua aveira opacatu nde porocuita pipe. Sese tipo eme que nde reroirosar.

3

Jesús reroyasar cuaita

¹ Co rese emomahenduha: toyapo ava mborerecuar guasu porocuita yuvireco iyavei opacatu ambuae mborerecuarecuarmi porocuita avei. Iyavei toyemoingatu tupri opacatu mbahe aviye vahe apo água yuvireco.

² Toñehe-ñehe tēi eme ambuae ava rese yuvireco. Iyavei tiñemoiro serai eme, toporoaisu, tomboyecua avei güeco mbegüesa opacatu ava upe yuvireco.

³ Esepia, yipindar yande avei ndayande mbahecuaí yaico iyavei ndayaroyá Tüpa. Ocañi tēi vahe yaico, iyavei yande mbiguai tēi yaico opacatu mbahe yande remimbotar apo pipe; iyavei yaseca-seca mbahe tēi vahe yande yemboviha água. Iyavei yaicoño mbahe tēi pipe, yaipotaño tēi ambuae ava mbahe, yamotarēhimbri yaico iyavei yandeyeupe ae-ae yayeamotarēhi.

⁴ Ipare rumo Tüpa, yande Písirosar, omboyecua güeco tuprisa, oporoaisusa opacatu ava upe.

⁵ Yande písiro, ndahei rumo yande rembiapo aviyesa sui, ahe rumo vireco oporoparaisuerecosa yandeu nara. Ichui omoatiro yande recocuer yande reco mopiasu. Iyavei Espiritu Santo pipe yande recocuer recuñaro tecove piasu rereco água.

⁶ Iyavei yande Písirosar Jesucristo rembiapo sui Tüpa ombou catu oEspiritu Santo yandeu,

⁷ ipipe yande reco ai sui yande renose yande reco ñvi tupri água oporoaisusa pipe 'toipisi co tecovesa apirēhi güemiaro yuvireco' oya.

⁸ Aipo ñehesa supi eté vahe. Che aipota sese ereporombohera. Ipipe Tüpa reroyasar toyapo mbahe aviye vahe yuvireco. Evocoi ñehesa aviye ité opacatu oiporu vaherã yuvireco.

⁹ Ereyepipira rumo opacatu co nungar mbahe sui: yipindar ñehesa yepoepi tēisa sui, ipare aracahendar ava recocuer rese ñehesa sui. Ereyepipi aveira ipromoñemoiro serai vahe sui, Moisés porocuita resendar sui tēi ñehepoepi-episa sui avei. Esepia, evocoi nungar mbahe egüe ehi tēi vahe.

¹⁰ Acoi ava omoimese yemboyahosa Tüpa reroyasar pãhuve, eñehe chupe. Nande reroyaise, eñehe iri chupe. Nande reroya catu itese, eremosera peyesui.

¹¹ Terecua evocoi nungar ava oyavi vahe güecocuer yepi, ahe ae oyemocañi vahe oangaipa pipe oico.

Tito upendar ñehesa

¹² Acoi amondose Artemas, anise Tíquico ndeu, eyu pihavi che repia tecua Nicópolis ve. Esepia, aheve apita pota sōhisa vahe pituhu rãro.

¹³ Eipitivií opacatu nde catugüer rupi ava recocuer moingatusar Zenas, Apolos avei. Ahe chupe emondo mbahe semimbotar. Evocoyase toyuviraso tupri oguatasa rupi; tipane eme que mbahe chupe yuvireco.

¹⁴ Iyavei ambuae Jesús reroyasar eipe pendar toyembohe avei yuvireco mbahe tupri apo água iyavei ava mbahe chupe ipane vahe pitivií água. Evocoyase secocuer aviye itera yuvirecoi.

Mahenduhasa iyavei porovasasa ipa vahe

¹⁵ Opacatu yuvirecoi vahe cohava che piri omondo omahenduhasa yuvireco ndeu. Iyavei emombehu che mahenduhasa yande mboripar iporeroya vahe upe. Tüpa tape rovasa eipeve opacatu. Aipo rupive.

PABLO REMBICUACHIA FILEMÓN UPE FILEMON

Pablo mahenduhasa Filemón upe

¹ Che, Pablo, che roquendasa Jesucristo recocuer sui tēi. Aicuachía co che ñehe yande rivri Timoteo reseve ndeu, Filemón. Nde niha ore rembiaisu iyavei ore ndugüer ité Tüpa upe mboraviqui apo água ereico.

² Iyavei amondo co cuachiar yande reindri Apia upe, Arquipo upe avei. Ahe avei yande ndugüer mboraviqui apo água Tüpa upe nara yuvirecoi, iyavei opacatu Jesús reroyasar nde rētave oñemonuha vahe upe nara.

³ Yande Ru Tüpa, yande Yar Jesucristo tombou oporovasasa, güeco tuprisa avei pēu.

Filemón poroaisusa iyavei Cristo rese iyeroyasa

⁴ Che niha, “Aviye ndeu” ahe yande Ru Tüpa upe che yeruresa pipe nde rese yepi.

⁵ Esepia, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar.

⁶ Aporandu Tüpa upe nde rese nde ereyeroyase yande Yar rese inungar ore ‘toicua tupri opacatu mbahe aviye vahe orovireco vahe nde Rahir Jesucristo reroyasa sui’ viya.

⁷ Cherorivete, ayemonguerēhi catu opacatu nde poroaisusa rese. Che rivri, nde niha eremonguerēhi catu opacatu yande Yar reroyasar yuvireco.

Pablo oporandu mbahe aviye vahe rese Onésimo upe nara

⁸ Sese yepe che aico Cristo apóstol nde cuai água viña.

⁹⁻¹⁰ Che rumo aporandu ndeu nde poroaisusa rese mbahe aviye vahe apo água co nde rembiguaigüer Onésimo upe nara. Che niha Pablo, acuacuami vichico. Cūrítei rumo aico soquendapri Jesucristo recocuer sui. Co Onésimo secói che rahir nungar yande Yar reroyasa pipe cohove che roquendasave.

¹¹ Aracaco co nde rembiguai secoise nde piri, ěgüe ehi tēi vahe secocuer ndeu viña. Cūrítei rumo ěgüe ndehi iri chira oico ndeu, iyavei cheu no.

¹² Amboyevi co imondo ndeu eipeve. Eipisi inungar-ra che itera viña.

¹³ Che aipota opita vaheerã nde nungar tupri che pítivíi água viña, co soquendapri vite che recose Jesucristo ñehengagüer sui.

¹⁴ Che rumo ndaipotai mbahe apo nde pihañemoñetasa cuaēhi viteseve. Nde rumo ereyapora co mbahe aviye vahe nde remimbotar rupi, ndahei chira che nde cuaisa pipe.

¹⁵ Aviyeteramo Onésimo oyepepi pucu raimi nde sui oyevi iri vaheerã nde piri nara.

¹⁶ Ndahe iri chira mbiguai tēi. Ahe rumo aviye catu itera mbiguai güeco eger sui. Esepia, yande rivri niha yande rembiaisu secói cūrítei. Che asaisu etepri iyavei nde eresaisu catu irira che sui. Ndererecoi chira ava nungar tēi; erereco tuprira saisusa pipe yande rivri nungar tupri ité yande Yar upe nara.

¹⁷ Inungar nde rivri che rereco eve. ěgüe ere tupri aveira co mbia pisi.

¹⁸ Acoi oyapose mbahe ndeu, anise vırocuase que mbahe nde sui, cheu emombehu. Che evocoyase amboepira ndeu.

¹⁹ Che Pablo, aicuachía che po pipe ité seroya tupri ãgua, ahe co amboepira ndeu; che nde mbohesa pipe sui ereroya yande Yar. Ipipe inungar ireve vahe ãgüe ere cheu. Che rumo, “Ndereve cheu” ndahei eté ndeu.

²⁰ Supi eté, che rivri, eyapomi mbahe icatupri vahe cheu che remimbotar yande Yar Cristo reroyasa pipe. Ipipe che mböviha catumi eve.

²¹ Che aicuachía ndeu. Esepia, aicua nde ereyapo tuprira aipo che porandusa, iyavei ereyapo catu itera co sui.

²² Iyavei amoha Tüpa che renose vaheã che roquendasa sui pe yeruresa pipe che so ãgua eipeve pe repia. Sese emoingatumi avei che pituhu ãgua.

Mahenduhasa, porovasasa ipa vahe

²³ Che ndugüer, Epafra, omondo omahenduhasa ndeu. Ahe avei soquendapri cohava yandé Yar Jesucristo recocuer rese.

²⁴ Iyavei Marcos, Aristarco, Demas, Lucas che ndugüer oporaviqui vahe Tüpa uve, ahe avei omondo omahenduhasa yuvireco ndeu.

²⁵ Yande Yar Jesucristo tape rovasa opacatu eipeve. Aipo rupive.

ICUACHIAPRI HEBREO YUVIRECOI VAHE UPE HEBREOS

Guahir Jesucristo pipe Tūpa oyemboyecua yandeu

¹ Aracahe suive setá yupagüer Tūpa omombehu uca yande ramoi eta upe oñehe mombehusar upe. Iyavei ambuae mbahe rupi oseca imombehu tupri āgua yuvireco chupe.

² Cūrítei yandeu omoñehe uca Guahir. Chupe avei oyapo uca opacatu mbahe. Ahe mbahe sembiapo chupe nara ité.

³ Ahe niha Vu Tūpa recocuer porañetesa secoi. Ēgüe ehi eté, ahe Vu recocuer tupri ité. Ahe opacatu mbahe omoviracua oñehe pīratasa pipe. Yande angaipagüer sui yande moatiro pare oso, oguapi Vu acato coti oī ivave cute.

Tūpa Rahir seco ivate catu Vu rembiguai iva pendar sui

⁴ Tūpa Rahir secoi ivate catu vahe Vu rembiguai iva pendar yuvirecoi vahe sui. Ahe vireco omborecuasa ivate catu vahe ichui.

⁵ Esepia, Tūpa aipo ndehi eté güembiguai upe:

“Nde che Rahir ereico; co pipe amondo nde recove āgua” ndehi eté.

Iyavei:

“Che Tu aicora, ahe evocoyase che rahir secoira” ndehi avei chupe.

⁶ Ichui rumo ombouse Guahir ñepei vahe co ivi pipe aipo ehi:

“Tomboetei opacatu che rembiguai yuvireco”

ehi.

⁷ Evocoyase güembiguai rese oñehe Tūpa aipo ehi icuachiapri aracahendar pipe:

“Ayapo che rembiguai ivitu nungar, tata nungar avei cheu oporaviqui va-herā” ehi.

⁸ Tahir rese ñehesa rumo aipo ehi icuachiapri aracahendar pipe:

“Che Yar Tūpa, nde mborerecuasa rumo apirēhi vahe ité.

Ereporocuai nde reco ivi tuprisa pipe yepi.

⁹ Mbahe ihivi vahe raisusar ereico.

Iyavei mbahe naporai vahe raisuēhisar.

Sese nde Yar Tūpa ité, nde poravo, omondo avei torivetesa ndeu ivate catu vahe opacatu nde mboetasa sui” ehi.

¹⁰ Iyavei aipo ehi iri:

“Nde, ore Yar, yipisuive eremoviracua vahe ivi.

Nde ité avei ereyapo iva.

¹¹ Opacatu co nde rembiapo opa vahe rā tēi,

inungar turucuar cuacua oyearo vahe opa.

Nde rumo apirēhi vahe rā ité ereico.

¹² Ipare ereyapara inungar turucuar yapapri iyavei ereseñarora inungar oturucuar oseñarō vahe.

¡Nde rumo ndereñecuñaroi chietera!

Iyavei nde recocuer ndopai vahe rā ité” ehi.

¹³ Ndahei que ñepei iva pendar güembiguai upe Tūpa aipo ehi:

“Eguapi che acato coti, ahese che amondora nde amotarēhimbar nde povrive” ehi.

¹⁴ Esepia, opacatu Tūpa rembiguai espíritu yuvirecoi chupe oporaviqui āgua, icuapri avei ava ipisiropirā pītivii āgua.

2

Yandemahemoha tuprira yande p̄sirosa rese

¹ Sese iyacatu co ñehesa yasendu vahe rese yayapisaca tupri catu co tecocuer p̄iasu sui yande yepepiēhi āgua.

² Esepia, co Tūpa rembiguai remimombehugüer seroyapri ité secoi, iyavei oyemboangaipa vahe, ndoviroyai vahe avei imombaraisupri ité sembiaporo rupi yuvirecoi aracahe.

³ ¿Mara yahera p̄iha evocoiyase yande yañemi Tūpa ñemoirosa sui viña acoi ndayandemahemoha tupriise co yande p̄sirosa aviye vahe rese? Esepia, yande Yar ahe rane ité omombehu co ñehesa ñepisirosa resendar. Ipare sendusar, “Supi eté co ñehesa” ehi yuvireco. Ichui ahe avei omombehu yuvireco yandeu.

⁴ Iyavei Tūpa oyapo setá mbahe yavai rai vahe poromondiisa ndayasepia vahe. Iyavei oEspiritu Santo pipe, omboyoavirati mbahecuasa imbou yandeu güemimbotar rupi ‘toicua yuvireco co ñehesa supi tupri vahe’ oyapave.

Jesucristo ava nungar tupri secoi

⁵ Ndaheí güembiguai povrive omondo Tūpa ivi oime vaherā, acoi oromombehu vahe p̄eu.

⁶ Oime rumo icuachiapri aracahendar pipe omombehu tupri vahe: “Che Yar, ¿uma vo evocoiyase ava?

¿Mahera ndemahenduha ava tēi rese, iyavei eresāro no?

⁷ Ndaseta ariimi erereco ivi coti catu nde rembiguai sui.

Ipare voi rumo eremondo nde porañetesa imboeteisave chupe.

⁸ Iyavei opacatu erereco uca mbahe nde rembiapo ipovrive” ehi imombehu. Ēgüe ehise Tūpa, ndoseyai eté que ñepeí yepe mbahe ipo pendarēhi. Cūrítei rumo ndaopacatu tupri vitei mbahe ipovrive.

⁹ Yaicua niha Jesús, ahe Tūpa güembiguai sui ndaseta araviter ivi coti catu vireco. Oporoaisusa pipe oipota imano āgua opacatu ava repirā. Cūrítei rumo iyemombaraisu pare, omondo oporañetesa imboeteisave chupe.

¹⁰ Iyavei opacatu mbahe oime Tūpa upe, ichuindar avei ‘toyuviroique opacatu che rahir che reco porañetesave’ oyapave. Sese omombaraisu uca Guahir Jesucristo ‘tomboaviye tupri rane che remimbotar Porop̄sirosar güeco āgua’ oya.

¹¹ Esepia, opacatu vireco ñepeí Vu yuvireco co seco catupri vahe, seco mbocatuprisar avei. Sese Tahir nochí eté, “Che rivireta peico” ohe āgua viroyasar upe.

¹² Ahe aipo ehi icuachiapri aracahendar pipe:

“Añehera nde rese che rivireta upe.

Asapucaí aveira sapucaisa ndeu opacatu ava ndeu oñemonuha vahe p̄ahuve” ehi.

¹³ Iyavei aipo ehi:

“Che ayeroya itera sese” ehi.

Ichui aipo ehi iri:

“Co oroico Tūpa rahir cheu ombou vahe rese” ehi icuachiapri pipe aracahe.

¹⁴ Inungar ava vireco vahe guahir, oyoya soho, suvi; ēgüe ehi avei Jesús vireco voho, vuví yande nungar; omano pipe sui omocañi vaherā iporoyuca ai vahe p̄iratasa; ahe Carugar.

¹⁵ Opacatu ava manosa sui osiquiyesa pipe mbiguai tēi nungar yuvirecoi vahe güecove viteseve, evocoi nungar sui senose āgua, ēgüe ehi Jesús.

¹⁶ Esepia, ahe ndoui Tūpa rembiguai pītīvii āgua, ahe rumo ou Abraham suindareta pītīvii āgua.

¹⁷ Sese niha tivireta nungar tupri ité oyapo Tūpa, “Toime che rovaque pahí rerecuar ivate catu vahe seco tupri vahe; taseco mbegüe avei, tomondo güetecuer ava angaipa repirā ñeroisa reime āgua” ehi.

¹⁸ Esepia, ahe avei oiporara Carugar poroātoisa. Sese cūrítei ahe oicatu ité ava Carugar remiatoi pītīvii āgua.

3

Jesús ivate catu vahe Moisés sui

¹ Evocoyase, che rivireta, iporavopri, pe Tūpa remienoi peico vahe chupe nara. Peyapisaca tupri Jesucristo recocuer rese. Ahe secói yandeu apóstol iyavei pahí ivate catu vahe yande yeroyasa.

² Ahe ité niha omboaviye tupri Vu remimbotar, osenoise imbou co tecocuer apo āgua inungar Moisés omboaviye tupri ocuaita Tūpa mbahe rāro aracahe.

³ Jesús rumo imboeteipri catu Moisés sui. Inungar acói oí aposar imboeteipri catu oí sui secói.

⁴ Esepia, ñepei-peí oí vireco oaposar viña. Tūpa rumo opacatu mbahe aposar secói.

⁵ Supi eté Moisés Tūpa rembiguai güeco pipe omboaviye opacatu oporaviquisa itūparo rese. Esepia, omombehu Tūpa omboyecua pōta vahe ava upe yepi.

⁶ Cristo rumo tahir güeco pipe omboaviye ocuaita Vu tūparo rese. Ahe tūparo yande yaico yayeroyaño itese Cristo rese iyavei yasároño itese yande yembovihasa pipe co mbahe aviye vahe oime vaherā yandeu curi.

Mbituhusa Tūpa upendar yuvirecoi vahe upe

⁷ Sese inungar aipo ehi Espíritu Santo icuachiapri aracahendar pipe: “Co pipeve voi, pesenduse Tūpa ñehe,

⁸ peyepihamoatai rene catu chupe, ndapeicoi chira ava ndiava reroyai vahe nungar acói ivi iporupirēhisa rupi Tūpa recoāhasar yuvirecoi vahe aracahe.

⁹ Aheve avei acói che recoāha tēi pe ramoi mbahe güembiapo pipe, yepe cuarenta araviter rupi osepia tēi mbahe che rembiapo yuvireco viña.

¹⁰ Sese añemoiro ahe ava upe, aipo ahe:

‘Ipihañemoñeta rai co coti tēi vahe rese yepi iyavei ndoicua potai eté che recocuer yuvireco’ ahe chupe.

¹¹ Sese che añemoiro ahe ava upe, ‘Ñepei reseve ndapepituhui chietera che pituhusa pipe’ ahe yuvireco chupe” ehi aracahe.

¹² Che rivireta, peñearo catu; tipo eme que ñepei ipihañemoñeta naporai vahe Tūpa reroyaēhisa pipe oyepepi vaherā ichui.

¹³ Iya rumo peyemonguerēhi catu ñepei-peí ari yacatu rupi cūrítei pe recove pipe angaipa upe pe yembopa uca iriēhi āgua, pe mbahe reroya iriēhi āgua rese avei.

¹⁴ Esepia, yayemoviracua tuprise Cristo rese yande yeroyasa yipisuive yareco vahe pipe yande mano āgua rupi eté, ahese yaico itera sese.

¹⁵ Supi niha acói aipo ehi ñehesa:

“Co pipe voi pesenduse Tūpa ñehe, peyepihamoatai rene catu chupe; ndapeicoi chira ava ndiava reroyai vahe nungar” ehi vahe.

16 ¿Ava pīha acoi ava iñehe mara vahe yuvireco Tūpa ñehe rendu pare chupe? Moisés remienose Egipto ivi sui ěgüe ehi yuvireco.

17 ¿Ava upe pīha acoi Tūpa oñemoiro cuarenta araviter rupi? Acoi oyemboangaipa vahe omanopa vahe yuvireco ivi iporupirēhisa rupi.

18 ¿Uma upe pīha acoi ñepeí reseve, “Ndapeiquei chietera che pituhusa pipe pe pituhu āgua” ehi Tūpa? Acoi viroyaēhisar upe aipo ehi.

19 Sese yaicua seroyaēhi pipe ndoicatuí yuviroique ipipe.

4

1 Oime vite Tūpa remimombehu yande yaique vaheṛā ipiri yande pituhu āgua. Sese iya ité yañearo tupri. Aní chira que ñepeí pe pāhu pendar ndoiquei chira.

2 Esepia, yandeu avei imombehusa ñehesa poropīsirosa resendar inungar yande ramoí upe ivi iporupirēhi rupi yuvireco aracahe. Co ñehesa rumo ndoipitívii eté ahe ava yuvireco. Esepia, ahe osendu yuvireco seroyaēhisave tēi.

3 Yande rumo yaroya vahe, yaiquera yande pituhu āgua, ahe chupe Tūpa aipo ehi:

“Sese añemoiro ahe ava upe; ñepeí reseve, ‘Ndoyuviroiquei chietera che pituhusa pipe opituhu āgua yuvireco’ ahe” ehi. Tūpa rumo yipive ité opa omboaviye oporaviquisa íva, ívi.

4 Esepia, co imbosietesa ari resendar ñehesa oime icuachiapri aracahendar pipe:

“Tūpa opituhu opacatu oporaviquisa sui imbosietesa ari pipe” ehi.

5 Iyavei aipo ehi iri icuachiapri pipe:

“Ndoyuviroiquei chietera che pituhusa pipe opituhu āgua yuvireco” ehi.

6 Ipane vite rumo amove ava yuviroique vaheṛā ahe pituhusave. Acoi yipindar osendu tēi vahe rumo ñehesa poropīsirosa resendar, ndoyuviroiquei eté seroyaēhisa pipe yuvireco.

7 Sese Tūpa omombehu tupri iri ambuae ari, chupe ité, “Co pipe” ehi. Ahe acoi coiye mborerecur guasu David upe omombehu ucasa aracahe yandeu icuachiapri pipe, aipo ehi vahe:

“Co pipe voi, pesenduse Tūpa ñehe, peyepihamoatai rene catu chupe” ehi vahe.

8 Ehi revo Josué omondose co pituhusa israelita upe aracahe viña, Tūpa evocoyase noñehe iri chira co ambuae ari rese viña.

9 Evocoyase oimeño itera mbituhusa iporavopri ava Tūpa upendar upe nara:

10 Acoi oique vahe evocoyase pituhusa pipe, opituhu oporaviquisa sui inungar Tūpa opituhu ombahe mboaviye pare aracahe.

11 Sese yayemoviracua catura yande reique āgua evocoi mbituhusa pipe. Aní chira ava aracahendar seroyaēhisar recocuer rupi tupri avei yaicora.

12 Esepia, Tūpa Ñhengagüer oicove vahe, ipirata avei. Ahe inungar avei quise saimbe catu vahe que ambuae quise pucu saimbe yoya vahe sui. Ahe oique vahe ité yande aviterve; ěgüe ehi avei iñhengagüer oñatoi eté yande hã, yande espíritu avei. Iyavei omboyecua tupri ité yande pihañemoñeta.

13 Ndipoí eté niha mbahe Tūpa rembiapo ñomipri ichuí. Opacatu ité oicua, osepia avei opacatu mbahe. Ahe niha oporandura opacatu yande recocuer rese yandeu curi.

¹⁴ Jesús, Tüpa Rahír, pahi ivate catu vahe secoi yandeu oique vahe ivave Tüpa piri. Sese yayemoviracuaño itera sese yande yeroyasa pipe.

¹⁵ Esepia, yande pahi ivate catu vahe oicuaño ité yande recocuer pírataêhisa. Ahe avei niha yande nungar aracaco viroparaisu opacatu mbahe-mbahe têi güecoâhasa. Ahe rumo ndoyemboangaipai eté ipipe.

¹⁶ Sese yayemboya catura yande yeroyasa pipe yande Ru Tüpa rese. Esepia, ahe yande raisu ité. Ipipe sui tayande paraisuereco güeco aviyesa pipe yande pítiviî âgua mbahe têi oimese yandeu.

5

¹ Opacatu pahi ivate catu vahe iporavopri secoi ava pâhu sui ava recocuer reropovêhe âgua Tüpa upe iyavei porerecosa mondo âgua chupe, mbahe mimba yucapri reropovêhe âgua avei ava angaipa repirã.

² Ahe pahi niha oiporara avei teco asisa ambuae ava nungar. Sese güeco asiêhisa pipe oipítiviî ava ndayaracuai vahe, oyavi vahe avei.

³ Ahe rumo güeco pírataêhisa pipe viropovêhe mbahe mimba yucapri Tüpa upe oangaipa repirã, opacatu ambuae ava angaipa repirã avei.

⁴ Ndiyai chira que ava oyesui têi pahi oyeapo. Tüpa ité rumo osenoira imboetei uca âgua inungar acoi Aarón upe aracahe.

⁵ Êgüe ehi avei Cristo, ahe noñeenoi pahi ivate catu vahe güeco âgua oyesui têi. Tüpa ité osenoi imboetei uca âgua acoi aipo ehise:

“Nde che rahír ereico, co pipe amondo nde recove âgua” ehi.

⁶ Aipo ehi avei ambuae icuachiapri pipe:

“Nde erico pahi ivate catu vahe apirêhi vaheerã, inungar tupri mbia Melquisedec serer vahe” ehi.

⁷ Co ivi pipe Cristo oicove vitesse, oyerokuî pírata oyasehosa pipe Vu Tüpa upe yepi. Esepia, ahe oicatu ipísiro âgua manosa sui. Êgüe ehi iporeroya tuprisa pipe, Tu osendu iyeroqui yepi.

⁸ Yepe Tahír ité viña, güeco paraisu pipe rumo oyembohe imboyeroya âgua;

⁹ evocoiya güeco pipe omboaviye güeco catuprisa. Ipipe sui güeru poropísirosa ndopai vahe opacatu viroyasar upe nara.

¹⁰ Esepia, Tüpa niha osenoi pahi ivate catu vahe seco âgua inungar Melquisedec aracahe.

Peicua catu, “Ndaroyai eté co tecocuer piasu” pe hesa sui

¹¹ Orovireco vite mo setá mbahe ore ñehe âgua pëu co mbahe tecocuer resendar rese. Yavai etepri rumo inombehu tupri âgua. Esepia, pe ndapeyenducua tupri vitei eté.

¹² Aracacove peporombohera viña; peipota vite rumo pëu mbahe ndayavaimi vahe inombehu iri âgua yembohesa Tüpa suindar. Ndapeyemoviracuai rumo; peihu iri pota cambi mbahe sâta vahe hu rãgüer sui.

¹³ Esepia, acoi êgüe ehi vahe pítani osi rese ocambu vite vahe nungar têi pe recocuer. Ipipe sui ndapeyembohei eté Tüpa Ñehengagüer rese mbahe tupri pe reco âgua.

¹⁴ Co tembihu sâta vahe rumo ahe ava ocuacua vahe upe nara. Esepia, ahe oyembohe tupri catu inehengagüer rese güeco tupri âgua yepi. Ipipe sui oicua ité mbahe aviye vahe poravo mbahe naporai vahe sui.

6

¹ Sese ndiyai yayembohe yembohesa yipindar vahe Cristo resendar ahe avei-vei vahe rese. Iya rumo yaguata catu tenonde inungar ava oicua catu vahe mbahe. Ipipe sui tayaicua seroyasa pipe ambuae mbahe Tūpa suindar co mbahe rese yembohe iri rāgüer sui. Ahe yipindar vahe co: yande ñecuñarosa, yande reco ai sui yande poisa, manosa apirēhi vahesave yande rerasoēhi āgua, iyavei Tūpa rese yande yeroyasa,

² yembohesa poroāpiramosa resendar, po mondosa Tūpa reroyasar harive, omano vahe cuerayevisa iyavei ava recouer rese porandusa resendar avei.

³ Tūpa oipotase yayembohera ambuae mbahe yavai catu vahe rese.

⁴ Acoi ava yipindar osenducua vahe Tūpa remimbotar, osāha vahe avei Tūpa suindar porerecosa iyavei oyandu ité Espiritu Santo güecocuer pipe,

⁵ osāha vahe avei Tūpa Ñehengagüer aviye vahe iyavei osāha chíhi ipiratasa curi oime vaherā viña,

⁶ oyepepise rumo ichui, ndayaicatu iri seco reroyevi iri āgua Tūpa upe. Esepia, yaticapri nungar iri eté vireco Tūpa Rahir iyavei ambuae ava omoñeheñehe tēi iri sese.

⁷ Esepia, ava inungar ivi osupite vahe amar oquise yepi. Iha tuprise mbahe miti oyese oporaviqui vahe upe, evocoyase evocoi nungar ava oipisira porovasasa Tūpa suindar.

⁸ Ahe ivi rese yu pāve tēi oyesuse, ahe naporai eté. Evocoi nungar ava Tūpa poromocañisavri ve tēi, sapipirā tēi avei yuvirecoira curi.

Yande remiario aviye vahe yande moviracua tupri vahe

⁹ Che mboripar saisupri, yepi aipo orohe pēu viña, oromoha ité rumo mbahe aviye catu vahe pēu co ñepisirosa pare.

¹⁰ Esepia niha, Tūpa seco aviye vahe, ahe ndasesarai chietera pe rembiapo aviye vahe sui pe poroaisusa pemboyecua vahe peipitiviise seroyasar. Ahe niha co peyapoño vite peico.

¹¹ Ore rumo oroipotaño ité ñepepepe pe pemboyecuaño itera ari cañi rupi eté co pereco vahe pe querēhisa pe remiario aviye vahe rupiti āgua.

¹² Ndoroiptai pe atēhisa perecora co tecocuer upe. Oroipota rumo pe saquicue moñara acoi ava yande Yar rese oyeroyasa pipe iyavei güeco ñemosasa pipe oipisi vahe porerecosa imombehupri Tūpa sui.

¹³ Peyemomahenduha acoi Tūpa güemimbotar omombehuse Abraham upe: “Che rer pipe amboaviyera co mbahe ndeu” ehise chupe aracahe. Esepia, ndipoi eté ambuae ivate catu vahe ichui ēgüe ehi vaherā. Sese ahe güerer ité osenoi

¹⁴ aipo ehi chupe: “Supi eté oroovasa itera, iyavei setara ava nde suindar” ehi.

¹⁵ Evocoyase Abraham osāro güeco mbegüesa pipe, ēgüe ehi ipisi oyeupendar Tūpa remimombehu.

¹⁶ Ava omoingatu potase oñehe, ivate catu vahe rer pipe omoingatu yuvireco yepi. Ēgüe ehise yuvireco, ndiya iri eté ipare oñehe vitera sese.

¹⁷ Tūpa güerer pipe ité omoingatu oñehe omombehuse güemimbotar aracahe ‘toicua tupri che remimombehu pisi āgua che ñehe ñepepe reseve vahe yuvireco, iyavei amboaviye itera che remimombehu chupe’ oyapave aipo ehi aracahe.

¹⁸ Ēgüe ehi oime ñuvirio mbahe imboyepoepipirēhi: Tūpa niha ndoporombopai vahe ité, ipipe avei yande monguerēhi catu yande yaseca vahe iporopitiviisa iyavei yayeroya vahe ñearosa yandeu ombou vahe rese.

¹⁹ Co mbahe yasãro vahe omoviracua tupri yande hã, inungar mbahe carite guasu mombitasa omoviracua tupri carite ivitu sui. Ëgüe ehi yande remiãro oi que turucuar guasu tũparo asiãsa cupeve oi imaranehi catu vahe-save ivave.

²⁰ Aheve Jesús oi que yande raperã mboi ãgua. Ëgüe ehi ahe apirẽhi vahe ité pahĩ ivate catu vahe güeco ãgua, inungar tupri Melquisedec aracahe.

7

Jesús pahĩ Melquisedec nungar tupri ité

¹ Co Melquisedec aipo mborerecuar guasu Salem pendar, iyavei pahĩ Tũpa ivate catu vahe upendar secoi aracahe. Abraham oyevise peri rupi ovavasa sui ou mborerecuar guasu eta momba pare, ahe se aipo osẽ voi eté oso Abraham rovaĩchi Tũpa porovasasa mondo ãgua chupe.

² Iyavei aipo Abraham omondo oporerecosa vavasa sui mbahe güeru vahe diez vahe sui ñepeĩ-peĩ chupe. 'Mborerecuar guasu seco ñvi vahe' oyapave Melquisedec ehi. Iyavei ahe mborerecuar Salem pendar, ahe tecua Salem 'mbahe tupri' oya; sese mborerecuar guasu mbahe tupri vahe secoi.

³ Ahe iyepã rumo ndicuasai eté iyavei ichi, tamoi, ari iharagüer ndicuasai vahe ité. Ndicuasai avei imano agüer yuvireco. Secocuer rumo inungar Tũpa Rahir recocuer; ahe pahĩ apirẽhi vahe ité.

⁴ Peyapisaca tupri co mbia recocuer rese: ivate ité secoi aracahe. Yande ramoi Abraham teieté avei omondo diez sui ñepeĩ-peĩ mbahe porerecosa mborerecuar guasu eta sui güembierocua chupe.

⁵ Moisés porocuita pipe rumo opacatu Levĩ suindar pahĩ eta yuvirecoi vahe vireco ité ocuita opacatu ava sui diez sui ñepeĩ-peĩ iporaviquimi rerocua ãgua yuvireco. Abraham suindar ité niha ãgüe ehi yuvireco.

⁶ Yepe Melquisedec ndahei Levĩ suindar viña, ahe rumo oipisi ité Abraham sui evocoi porerecosa; Abraham, ahe acoi oipisi vaheã mbahe Tũpa remimbehu. Ëgüe ehi Melquisedec Abraham rovasa.

⁷ Supi eté sovasapri sui oporovasa vahe ivate catu secoi yepi.

⁸ Evocoi levita suindar oipisi ava poraviqui repri diez sui ñepeĩ-peĩ. Ahe ava rumo omano vaheã tẽi yuvirecoi. Icuachiapri arachendar pipe rumo Melquisedec serer vahe oicoveño vahe ité.

⁹ Ndoyavi evocoyase opacatu pahĩ eta Levi suindar omondo vahe porerecosa Abraham rupive chupe yuvireco viña.

¹⁰ Esepia, Abraham oyesese vite Levi oyesuindar vireco, evocoyase ihaẽhi vitesevẽ oyeepia Melquisedec rese yuvireco aracahe.

¹¹ Ava israelita yuvirecoi vahe oipisi mborocuita pahĩ levita sui yuvireco; ahe Aarón suindar yuvirecoi. Supi etese rumo ava virecose Tũpa suindar güeco catupriã evocoi mborocuita reroya pipe viña, evocoyase ndoyemboyecuai chietera ambuae pahĩ viña. Ndahei chira rumo ahe Aarón nungar, ahe Melquisedec nungar itera.

¹² Esepia, Tũpa osecuñarose evocoi pahĩ cuaita, osecuñarõ aveira supive mborocuita;

¹³ iyavei yande Yar, ahe sese acoi icuachiapri pipe ñehesa, ndahei Levi suindar, ahe rumo ambuae judío ramoi suindar. Ahe ichui acoi ndipoi eté osẽ vahe ambuae pahĩ.

¹⁴ Esepia, icuapri ité yande Yar Judá suindar secoise. Iyavei Moisés noñehi ahe ichuindar turi vahe rese oñehese pahĩ cuaita rese.

¹⁵ Iyavei co oyecua tupri catu itera, oyecuase pahi ipiasu vahe Melquisedec nungar.

¹⁶ Ahe rumo ndahei porocuita “uma sui osëra pahiguã” ehi vahe sui oi que pahi güeco ägua; güecocuer pĩrata ndopai vahe reseve oi que.

¹⁷ Esepia, Tüpa ité aipo ehi oñehe sese:

“Nde pahi apirëhi vaherã ité ereico inungar Melquisedec” ehi.

¹⁸ Sese mborocuita aracahendar opa ité. Esepia, ahe nipiratai, ndayande pĩtivii eté.

¹⁹ Esepia, Moisés porocuita ndosecocuer mbocatuprii eté ava. Yande rumo yasãro mbahe aviye catu vahe yande recocuer uve nara. Supi niha yayemboya Tüpa rese.

²⁰ Tüpa rumo oñehe omoingatu ñepei reseve güerer pipe. Ambuae pahi rumo ndahei ñepei reseve senoipri yuvirecoi Tüpa rer pipe.

²¹ Yande Yar rumo Tüpa osenoi ñepei reseve güerer pipe pahi seco ägua icuachiapri pipe aipo ehise chupe:

“Yar Tüpa osenoi ñepei reseve, sese nosecuñaroi chietera:

‘Nde pahi apirëhi vaherã ité ereico’ ehi”
ehi icuachiapri pipe.

²² Sese Jesús rese yaicua Tüpa omboaviyera güemimbotar ipiasu vahe yandeu aviye catu vahe yipindar vahe sui.

²³ Yipindar setã pahi yuvirecoi. Opa-opaño rumo omano.

²⁴ Jesús rumo nomanoi vahe ité, sese nomondoi chietera pahi güecosa ambuae upe.

²⁵ Sese ahe oicatu ité ñepei reseve viroyasar Tüpa rese oyemboya vahe pĩsro ägua apirëhi. Esepia, ahe oicove vaherã ité apirëhi oyoeroqui vaherã Vu Tüpa upe sese.

²⁶ Supi eté Jesús pahi ivate catu vahe secoi. Evocoi nungar niha ipane ité yandeu yipindar. Ahe ndaseco marai vahe, ndoyapoi vahe mbahe tēi güeco maranehisa pipe, ndahoyoyai avei ava angaipa viyar rese, iyavei ahe ivate catu vahe iva pendar sui.

²⁷ Ndahei eté ambuae pahi eta nungar secoi, ndoyuca ranei ari yacatu rupi mbahe mimba Tüpa upe seropovëhe ägua yipindar oangaipa rese, ipare opacatu ambuae angaipa rese. Ñepei reseve ité rumo güete viropovëhe opacatu ava angaipa repirã.

²⁸ Moisés porocuita rupi iporavopri pahi ivate catu vaherã ava ndahei seco tupri vahe; Tüpa rumo Moisés porocuita pare osenoi ñepei reseve Guahir seco catupri vahe ‘tasecoi pahi ivate catu vahe apirëhi vaherã ité’ oya.

8

Jesús Tüpa remimbotar ipiasu vahe omoime yandeu

¹ Co rupi eté oroyepota ore remimombehu mbahe aviye catu vahe upe. Yareco ité evocoi nungar pahi ivate catu vahe. Ahe oguapri Vu acato coti omborerecuasa pipe ivave oi.

² Aheve pahi secoi oporaviqui Vu rēta supi eté vahe pipe. Ahe ivave ité yande Aposar rembiapo, ndahei ava tēi rembiapo.

³ Opacatu pahi ivate catu yuvirecoi vahe senoisa mbahe oporerecosa iyavei mbahe mimba yucapri viropovëhe vaherã Tüpa upe yuvireco. Sese Jesucristo avei vireco mbahe viropovëhe vaherã Vu Tüpa upe.

⁴ Ahe secoise co ivi pipe viña, ndahei chietera pahi secoi viña. Esepia, cohave oime vite ité pahi mbahe vïropovêhe vahe Moisés porocuita rupi yuvireco.

⁵ Co ivi pipendar pahi rumo ihañeco ìva pendar rahanga rese tēi yuvireco. Yaicua niha ahe sahanga tēi. Esepia, Moisés oyapo potase tūparo, Tūpa aipo ehi chupe: “Emahecua tupri acoi ivitri ve amboyecua vahe rese ndeu. Ahe inungar tupri eyapo” ehi chupe.

⁶ Yande pahi ivate catu vahe rumo, Jesús, vireco ocuita aviye catu vahe ambuae pahi sui. Esepia, Tūpa remimbotar ipiasu vahe Jesús güeru vahe yandeu aviye catu vahe ité yipindar vahe sui iyavei sesendar Tūpa remimbehu aviye catu vahe avei.

⁷ Esepia, yipindar Tūpa remimbotar oicatusé yande recocuer recuñaro ãgua viña, ndipoi chira ambuae semimbotar ipiasu vahe yandeu viña.

⁸ Tūpa rembiepiave rumo ava recocuer mbahe tēi eté. Sese aipo ehi icuachiapri pipe co ava rese aracahe:

“Yande Yar aipo ehi:

‘Oimera ari ayapo iri ãgua che remimbotar ipiasu vahe ahe Israel pendar upe, Judá pendar upe avei.

⁹ Ndahoyoyai chira rumo acoi tamoi eta rese yipindar ayapo vahe che remimbotar.

Ahese acoi opa anose ivi Egipto sui, nomboaviyei eté rumo che porocuita yuvireco.

Sese apoi ichui’ ehi yande Yar Tūpa.

¹⁰ ‘Co ari pare rumo na ahera che remimbotar apo Israel pendareta upe’ ehi yande Yar Tūpa,

‘Amondora che porocuita iyapisacasa pipe,

aicuachía aveira ipihañemoñetasa pipe.

Evocoyase che iTūpa ancora; ahe evocoyase cheundar yuvirecoira.

¹¹ Nombohe iri chira ondugüer, omu avei che cua uca ãgua yuvireco.

Esepia niha, opacatu chihivahe catu vahe sui, ava ocuacua catu vahe avei che cuara yuvireco.

¹² Iyavei cheñero aveira mbahe tēi sembiapogüer rese yuvireco chupe; ndayemomahenduha iri chiveira yangaipagüer rese’ ehi yande Yar” ehi icuachiapri pipe aracahe.

¹³ Oñehese Tūpa güemimbotar piasu rese, omombehu yipindar vahe cañi ãgua; chihimi tēi ipane icañipa ãgua.

9

Tūparo ivi pipendar iyavei tūparo ìva pendar

¹ Evocoyase yipindar Tūpa remimbotar vireco ava cuaitarã iñemonuha ãgua Tūpa mboeteisa pipe iyavei vireco tūparo co ivi pipendar.

² Ahe tūparo pipe na ehi mbahe imoingatusa: yipindar oi Nimarai Vahe serer. Ipipe oime vera renda iyavei mesa pan sovasapri Tūpa upendar reseve.

³ Imoñuviriosa turucuar tūparo asiasa cupeve oime ambuae oi, ahe serer Nimarai Catu Vahe.

⁴ Aheve oime itaisi rapisa renda oro apopri, aheve avei oime Tūpa porocuita riru oro pipe yaopri. Ahe ipipe oime cambuchi oro apopri ahe tembihi maná riru, ipipe avei oime Aarón pococa ahe sorì vahe, iyavei mborocuita cuachiapri ita ipe vahe rese oime ipipe.

5 Ahe mborocuaíta riru harive oime Tūpa rembiguai rahanga oyovai yuvino hai, “Tūpa oime ité cohave” he āgua. Ahe ipepo oyopi tupri Tūpa porocuaíta riru rovapiša yuvireco. Co rupive revo amombehura co mbahe pēu.

6 Evocoi nungar mbahe moingatupri pare, pahí eta yuviroiqueño yipindar oi asiapri pipe ari rupi ocuaíta apo āgua.

7 Imoñuviriosa oi pipe rumo pahí ivate catu vaheño oi que ñepei reseve ñepei-peí araviter pipe, iyavei güeique yacatu viroique mbahe mimba ruvi viropovēhe vaherā Tūpa upe oangaipa rese, ava icuaēhi pipe angaipa oyapo vahe repirā avei.

8 Co rese Espiritu Santo oicua uca yandeu avaño tēi ndiya vitei eté oi que ipa vahe oi imaranehi catu vahe pipe Tūpa rovai oime vitesse yipindar oi yasiapri.

9 Co opacatu mbahe yande mbohe mbahe cūrteindar rese. Esepia, co porerecosa iyavei mbahe seropovēhepri aheve Tūpa upe, nomoatiroi eté imboeteisar pihañemoñetasa.

10 Ahe rumo carusa, ihusa, ñemoatirosa nungar mbahe resendar tēi; yande retecer resendar tēi porocuaíta. Ahe rumo ěgüe ehiñomi tēi yuvireco Tūpa remimbotar ipiasu vahe yu āgua renonde.

11 Poropiširosar rumo ou cute. Iyavei ahe ité cūrteite yande pahí ivate catu vahe secoi mbahe aviye vahe güeru vahe yandeu. Ahe pahí reiquesa rumo ndahei ava rembiapo nungar tēi, ahe rumo aviye catu ité iyavei ndahei eté co ivi pipe yapopri.

12 Cristo rumo oi que ité imaranehi catu vahesave ivave. Ndahei rumo ovesa iyavei guaca rahir ruvi reropovēhe āgua, ahe rumo viropovēhe yuvi ité opacatu rese; ěgüe ehi ahe ñepei reseve oi que apirēhi vahe ñepisirosa reime āgua yandeu.

13 Supi eté guaca cuimbahe ruvi iyavei ovesa ruvi, guaca cuña tanimbu acoi imondopri vahe ava seco marā vahe rese, ahe avei vireco raimi tēi pīratasa ava rete moatiro āgua.

14 Cristo ruvi rumo vireco catu ité pīratasa. Esepia, Cristo, Espiritu apirēhi vahe pipe, oyemondo ahe ae Tūpa upe inungar mbahe seropovēhepri nimirai vahe, iyavei suvi yande pihañemoñetasa moatiro opacatu yandé rembiapo ai manosave yande rereco vahe sui Tūpa oicove vahe upe mbahe apo uca āgua yandeu.

15 Sese Jesucristo secoi Vu remimbotar ipiasu vahe moingatusar ava reru āgua Tūpa upe omano pipe. Ipipe sui oime ñeroisa oyemboangaipa vahe yipindar mborocuaítavrive yuvirecoi vahe upe ‘toipisi che rembiporavo yuvireco oyeupendar mbahe apirēhi vahe che remimombegüer rupi’ oya.

16 Que ava oicua ucasse güemimbotar ombahe mondo āgua omano renonde, icuasa tupri ranera rumo imanosa semimbotar apo āgua renonde.

17 Esepia, ndiya vitei eté omano vaherā recove vitesseve mbahe imondosa iyarā upe. Imanore voi rumo aviye imondosa.

18 Sese yipindar vahe Tūpa remimbotar yaposa mbahe mimba ruvi piyere pipe.

19 Esepia, Moisés omombehupase mborocuaíta opacatu ava upe, oipisi ovesa ragüer pira vahe iyavei ivira hisopo serer vahe rāca, ahe omoaqui guaca rahir ruvi iyavei ovesa rahir ruvi, i rese oyeseha vahe pipe. Ipipe opa osipií cuachiar mborocuaíta resendar, opacatu ava avei.

20 Evocoiyase aipo ehi icuachiapri pipe: “Co mbahe ruvi oicua tupri uca co porocuaíta Tūpa ombou vahe omboyeroya āgua pēu” ehi.

²¹ Mbahe mĩmba ruvi pipe avei opa Moisés osĩpĩ tũparo iyavei opacatu mbahe ipipendar iporupĩ.

²² Porocuaita rupi eté tuvi pipe seni opacatu mbahe oñemoatiropa Tũpa rovaque; ndipoi eté ñeroisa angaipa upe mbahe ruvi piyerepri porẽhise.

Tũpa upe güete reropovẽhe pipe Cristo omocañi angaipa

²³ Iyacatu ité imoatirosa evocoi nungar mbahe mbahe mĩmba seropovẽhepri ruvi pipe. Esepia, co mbahe iva pendar nungar tẽi sahangaposa; iva pendar ité rumo ipotasa seropovẽhepirã mbahe aviye catu vahe evocoi sui.

²⁴ Esepia, Cristo ndoiquei tũparo oi imaranehi catu vahe ava rembiapo pipe tẽi. Esepia, ahe iva pendar rahanga tẽi. Ëgũe ehi rumo ahe oi que ité ivave. Aheve cũritei secoi Tũpa rovai yande pitivĩi ãgua oyeroqui pipe.

²⁵ Judío pahi ivate catu vahe niha ñepi reseve oi que araviter yacatu oi imaranehi catu vahe pipe mbahe ruvi tẽi reropovẽhe ãgua; ndahei rumo vuvi ité viropovẽhe. Cristo rumo ndoyeeropovẽhe pihi Tũpa upe.

²⁶ Ëgũe ehise rumo, yĩpisuive omano pihira viña. Cũritei rumo oyemboye-cua co ipa arĩ rupi ñepi reseve, apĩrẽhi vaherã viropovẽhe ãgua güete Tũpa upe 'tocañipa angaipa' oya.

²⁷ Supi eté opa rane itera ava omano yuvireco, ipare voi ñepi reseve oimera porandusa.

²⁸ Indó, Cristo oyeeropovẽhe ñepi reseve opacatu angaipa mocañi ãgua. Ipare rumo oyevi irise ou, ndahe iri chira angaipa recocuer rese. Ahe rumo oyevira ou guãrosar piñiro ãgua.

10

¹ Esepia, Moisés porocuaita mbahe aviye vahe ou vaherã rahanga tẽi, ndahei ahe eté vahe ité. Sese ahe porocuaita ndoicatui eté ava Tũpa rese oyemboya vahe reco mohivi tupri ãgua mbahe seropovẽhepri araviter yacatundar pipe tẽi.

² Porocuaita oicatusẽ pe angaipa sui pe moatiro tupri ãgua, ndapeyandu iri chira pe angaipa viña iyavei pahi ndoviropovẽhe iri chiveira mbahe ruvi Tũpa upe yuvireco viña no.

³ Co seropovẽhepri rumo yande momahenduha uca ãgua tẽi yande angaipagũer rese araviter yacatu.

⁴ Esepia, mbahe mĩmba ruvi tẽi nomocañi eté yande angaipa yande sui.

⁵ Sese Cristo co ivi pipe ouse, aipo ehi Tũpa upe:

"Ndereipota iri niha mbahe mĩmba tẽi porerecosa seropovẽhepirã ndeyeupe, nde rumo erylapo che retecuer evocoi nungarã.

⁶ Ndahei niha nde piha rupi mbahe rapĩpri mbahe mĩmba yucapri ndeu seropovẽhepri ñepi reseve angaipa mocañi ãgua.

⁷ Evocoiyase che aipo ahe:

'Che ayu nde remimbotar apo ãgua, che Ru Tũpa, che resendar icuachiapri remimombehu rupi tupri mboaviye ãgua' ahe" ehi.

⁸ Yipindar aipo ehi, Tũpa ndoipotai eté, iyavei ndahei ipiha rupi mbahe mĩmba reropovẽhepri, porerecosa mbahe sapĩpri avei angaipa mboyeho ãgua, yepe ahe mborocuaita rupi seropovẽhesa viña.

⁹ Ipare aipo ehi: "Che ayu nde remimbotar apo ãgua" ehi. Ahe ipipe omombopa yipindar vahe mbahe seropovẽhepri co ambuae mbahe ipiasu vahe apo ãgua.

10 Tūpa evocoiyase yande peha angaipa sui oyeupe nara. Esepia, Jesucristo oyapo ité semimbotar mbahe ñepeí reseve apirēhi vaheṙā güete mondo pipe.

11 Opacatu judío pahi eta ari yacatu oyapo ocuaita iyavei mbahe mimba avei-vei viropovēhe Tūpa upe yuvireco. Yepe ahe viropovēhe tēi yuvireco viña, nomocañi catui eté rumo angaipa.

12 Jesucristo rumo oyeeropovēhe ñepeí reseve angaipa repirā apirēhi vaheṙā. Ipare oso ivave, oguapí oĩ Vu acato coti.

13 Aheve osāro oĩ Vu Tūpa opase voi omondo yamotarēhimbar ipovrive.

14 Esepia, ñepeí reseve oyeeropovēhe pipe osecomohivi tupri Vu Tūpa rembipeha apirēhi vaheṙā.

15 Iyavei Espiritu Santo aipo ehi tupri avei icuachiapri aracahendar pipe yandeu:

16 “ ‘Co ari pare rumo na ahera che remimbotar apo chupe’ ehi yande Yar Tūpa, ‘Coiye amondora che porocuita ipihañemoñetasa pipe, amondo aveira iyapisacasa pipe’ ehi.

17 Ndayemomahenduha iri chietera yangaipagüer rese iyavei mbahe tēi sembiapogüer rese yuvireco” ehi aracahe.

18 Ēgüe ehi angaipa rese oimese ñeroisa, ahese ndiya iri seropovēhesa mbahe angaipa repirā.

Yayemboya catura Tūpa rese

19 Sese che rivireta, iya ité cūritei yande reique āgua Tūpa rovai yande siquiyeēhisa pipe Jesucristo ruvi pipe sui.

20 Yaicoveño itera ipiasu vahe tecocuer tecovesa yandeu ombou vahe pipe. Ahe niha omboi tūparo pipe asiisa turucuar yande reique āgua Tūpa rovai. Ahe turucuar inungar Jesús rete.

21 Iyavei ahe yande pahi ivate catu vahe ité secoi Vu Tūpa rēta rārosar;

22 sese yayemboya catura Tūpa rese yande pihañemoñeta tupriisa pipe iyavei yande yeroyasa ipa voi vahe pipe. Supi eté ahe opa yande reco mbocatupri yande pihañemoñeta raisa sui iyavei omoatiro yande rete i marañehi pipe.

23 Yayemoviracua catura mbahe aviye vahe yande remiaro pipe yamombehu vahe ava upe yande pihañemoñeta rerovaēhisa pipe. Esepia, Tūpa omboaviye itera mbahe güemimombehugüer yandeu.

24 Iyavei yasecañora ñepeí-peí yañepitivii vaheṙā yande yeaisu catu āgua iyavei mbahe tupri apo āgua yandeyeupe.

25 Ndayamopanei chira yande ñemonuhasa Tūpa upe. Ndayaicoi chira omopane vahe nungar, iya rumo yayemonguerēhi catura ñepeí-peí yandeyeupe. Esepia, viroví ari yande Yar yeví iri āgua.

26 Acoi, “Tayemboangaipaño ité” yahese mbahe supi tupri vahe cua pare yaico, ndipo iri ambuae seropovēhepirā evocoi yande angaipa repirā yandeu;

27 Tūpa ñemoirosa ipirata vahe güeraño oimera yandeu iyavei tata guasu apirēhi vahe opara omocañi Tūpa amotarēhimbar yuvirecoi vahe.

28 Ava Moisés porocuita ndoviroyai vahe que ñuvirío, anise mbosapi rembiepiave, ahe secocuer mombehuse, ahe yucapri ité saisuēhisa pipe yuvirecoi.

29 Peyapisaca tupri co rese: ipirata catu oimera Tūpa ñemoirosa tahir roerōrosar upe curi iyavei acoi ava vireco vahe suvi inungar mbahe ēgüe ehi tēi vahe iyavei viroiro tēi vahe guaisusar Espiritu, chupe avei oimera

Tūpa ñemoirosa ipīrata catu vahe. Esepia, co tuvī rese niha seroyapri ité Tūpa remimbotar. Ipipe avei niha ahe ava Tūpa rembipeha yuvirecoi.

³⁰ Yaicua niha yande Yar aipo ehise: “Che ité asepira, sembiapo ai amboevira chupe” ehi aracahe. Iyavei ambuae ñehesa aipo ehi vahe: “Yar oporandura mbahe sembiapogüer rese ava oyeupendar upe” ehi.

³¹ ¡Mbahe tēi eté yaiquese Tūpa oicove vahe ñemoirosa pipe!

³² Peyemomahenduha acoi aracaco co tesapesa nungar supi eté vahe pisi ramose, peyemoviracuaño ité pe recoãhasa upe pe yemombaraisusa pipe.

³³ Esepia, acoi amove pe pāhu pendar rese iñehe-ñehe tēi yuvireco, mara-mara tēi avei pe reco opacatu ava rovaque. Ambuae pe pāhu pendar evocoiyase peipitivi pe yemombaraisusa rese.

³⁴ Pesaisuño ité avei ambuae soquendapri yuvireco. Opase pe mbahe virocua yuvireco pe sui peñemosuño avei pe viharetesa pipe peico. Esepia, peicua ivave perecora mbahe aviye catu vahe iyavei apirēhi vahe.

³⁵ Sese pemocañi tēi eme Tūpa rese pe yeroyasa. Esepia, evocoiya pe recosa pipe omoime ucara mbahe tupri pēu curi.

³⁶ Pe rumo peyemoviracuaño itera mbahe-mbahe tēi upe Tūpa remimbotar apo āgua semimombehugüer oime vaheṛā pisi āgua curi.

³⁷ Supi eté icuachiapri pipe Tūpa aipo ehi:

“Pihavi eté oura acoi ou vahevi.

Ndiaracahei chietera.

³⁸ Acoi cheupendar seco catupri vahe rumo che rese oyeroyasa pipe oicovera. Acoi oyepepise rumo che sui, che evocoiyase ndavihai chira sese” ehi aracahe.

³⁹ Yande ndahei oyepepi vahe nungar yaico. Evocoi nungar niha ocañi tēi vaheṛā yuvireco. Yande rumo yayeroya sese; ipipe yañepisiro.

11

Tūpa rese yeroyasa

¹ Supi eté yarecose yande yeroyasa Tūpa rese, ahese yaicua ahe ombou itera mbahe yasāro vahe yandeu, iyavei yaicua ité oime mbahe ndayasepia vahe.

² Supi eté amove yande ramoi aracahendar upe, “Aviye ité” ehi Tūpa oyese yeroyasa pipe sui.

³ Tūpa rese yande yeroyasa pipe yaicua ahe oñehe pipe ité oyapo opacatu mbahe. Sese yaicua cūrteindar mbahe yasepia vahe mbahe ndayasepia vahe apopri.

⁴ Sese oyeroya pipe Abel viropovēhe oporerocosa aviye catu vahe Caín porerocosa sui chupe. Sese, “Co ava seco catupri vahe che rovaque” ehi iyeroyasa rese oipisi tuprise iporerocosa. Yepe Abel omano viña, oimeño vite rumo Tūpa rese yeroya agüer resendar ñehesa.

⁵ Enoc avei Tūpa rese oyeroyasa pipe serasosa co ivi pipe sui, “Tomano rane” ndehi eté chupe. Ava ndoseca iri eté yuvireco. Esepia, Tūpa ité viraso secove reseve. Yipindar rumo Tūpa virasoēhi viteseve, “Enoc recocuer aviye ai rane ité chupe” ehi icuachiapri aracahendar.

⁶ Ndahei eté rumo Tūpa piha rupi yaico ndayayeroyaise sese. Esepia, oyemboya pota vahe sese, “Oime ité Tūpa” ehi rane itera, iyavei, “Oime itera mbahe secasar upe nara” ehi aveira.

⁷ Noé avei oyeroya Tūpa rese. “Oimera mbahe tēi co ivi pipe ndapesepia vitei vahe” ehise chupe, viroya voi eté. Evocoiyase seroyasave oyapo arca

oyesuindar pĩsĩro ãgua. Iyavei sese oyeroya pipe omombehu ava co ivi pĩpendar cañi ãgua. Ahe rumo Tũpa rese oyeroya pipe oñepisiro.

⁸ Abraham avei oyeroya Tũpa rese. Esepia, Tũpa, “Eso ambuae ivi ndeu amboyecua vaherã vahesave, ahe amondora ndeu” ehise, omboyeroyaño ité. Yepe ahe ivi ndoicuai viña, osẽño ité rumo oivi sui oso.

⁹ Ipare Tũpa rese oyeroya pipe avei secoiño ité ahe ivi pipe. Ndoyavii ambuae ivi pendar secoi vahe; oi mbahe pĩrer apopri pipe tẽi aheve secol. Ēgũe ehi tupri avei tahir Isaac iyavei sumino Jacob. Ahe avei oipisi vaherã Tũpa remimombehu ivi yuvireco.

¹⁰ Esepia, aipo Abraham osãroño ité tecua ivave ovĩracua vahe. Tũpa niha ahe tecua rãhasar, yaposar avei.

¹¹ Yepe Sara nimembii vahe viña iyavei Abraham ocuacuami, Tũpa rese oyeroyasave rumo oipisi pĩratasa Tũpa sui guahi ãgua. Esepia, viroyaño ité Tũpa oñehe omboaviye ãgua chupe.

¹² Evocoyase yepe Abraham ocuacuami viña, vireco rumo guahir. Ahe ichuindar sehii eteanga coiye inungar yasitata iyavei inungar ivi culhi para guasu popi rupindar ndayaipapa catui vahe ité.

¹³ Ahe ava rumo opacatu omanopa tẽi; ndoipisii eté mbahe semimombe-hugũer oyeupendar. Ahe mbahe amombrĩ rupi osepiañomi tẽi yuvireco oyeroyasa pipe, soriveteño avei sese. Ēgũe ehi oicuaño ité ndahei co ivi pĩpendar güecosa; ahe rumo yuvirecoveño raimi tẽi co ivi pipe.

¹⁴ Aipo ehi vahe oicua uca tupri yandeu oseca vite oyeupendar ivi yuvireco.

¹⁵ Ipihañemoñetase rumo ivi güeco agũer rese yuvireco viña, oyevi iriño itera aheve avei yuvireco viña.

¹⁶ Ahe rumo oipota ambuae ivi avĩye catu vahe yuvireco, ahe iva pendar. Sese Tũpa nochĩ eté, “Che Ru Tũpa” oyeupe hese. Esepia, vireco ité tecua imoingatupri chupe.

¹⁷ Tũpa rese yeroyasa pipe avei Abraham oyemoingatu voi guahir ñepeĩ vahe Isaac reropovẽhe ãgua Tũpa upe güecoãhasa pipe. Yepe Tũpa aipo ehi chupe aracahe viña:

¹⁸ “Nde rahĩr Isaac sui setã oimera nde suindar” ehi.

¹⁹ Esepia, oicua ité Tũpa vireco pĩratasa ava omano vahe mbogũeravevi iri ãgua. Evocoyase imano rãgũer sui eté oipisi iri guahir aracahe. Ahe evocoyase omboyecua mbahe yandeu.

²⁰ Tũpa rese oyeroya pipe avei Isaac osovasa Jacob, Esaú avei mbahe oime vaherã pisi ãgua.

²¹ Iyavei Tũpa rese oyeroya pipe avei Jacob omano pota ãgua, osovasa ñepeĩ-peĩ José rahĩr. Ahese opococa rese tẽi eté oyemovĩracua oyerogui ãgua Tũpa upe imboeteisa pipe.

²² Tũpa rese oyeroya pipe avei José, omano ãgua renonde, aipo ehi: “Yande mu israelita opara yuvĩnose ivi Egipto sui curi” ehi. Ipare oyocuai omu oitacuer rerovã ãgua aracahe.

²³ Tũpa rese oyeroya pipe avei, ohase Moisés, iyepi oñomi mbosapi yasi rupi yuvireco. Esepia, ahe pĩtani icatupri ai, iyavei ndoyembosiquiyei eté mborerrecuar guasu porocuaĩta yuca ãgua sui.

²⁴ Tũpa rese oyeroyasa pipe avei, ocuacuase Moisés, ndoipotai eté, “Egipto pendar mborerrecuar guasu rayri membri” oyeupe he ãgua.

²⁵ Ahe rumo oipota catu mara-mara tẽi güereco ãgua Tũpa reroyasar reseve chĩhi rupive mbahe tẽi rese yemboviha rãgũer sui.

26 Avíye catu ité chupe Tūpa rembiporavo upe nara mbahe tēi porara āgua Egipto pendar mbahe eta sepírusu vahe rereco rāgüer sui. Esepia, ahe ocuaño ité oyeupe nara porrecosa Tūpa ombou vaherā.

27 Tūpa rese oyeroya pipe avei osē ivi Egipto sui osiquiyēhisa pipe mborrecuar guasu roriēhise. Oyemoviracuaño ité oyese mbahe apo āgua; avíye osepia vahe ité Tūpa acoi ndoyecuai vahe.

28 Tūpa rese oyeroya pipe avei oyapo Pascua pieta. Opa uca oipichi ava upe oquenda rese mbahe mimba ruvi Tūpa rembiguai oporoyuca vahe ava israelita rahir ipi yucaēhi āgua.

29 Tūpa rese oyeroya pipe avei ava israelita osasa para guasu Pira Vahe ivi ipiru vahe hari rupi yuviraso. Ipare yamotarēhimbar Egipto pendar, “Ēgüe vahe avei” ehi yuvireco viña, i rumo opaño oyopi.

30 Tūpa rese oyeroya pipe avei israelita oyerese siete ari rupi tecua Jericó rese, opa ñachisa onduru.

31 Tūpa rese oyeroya pipe avei Rahab, oyemondo-mondo tēi vahecuer, nomanoi eté ambuae ava mbahe-mbahe tēi vahe rupi. Esepia, ahe oipisi tupriño güetave israelita Jericó ivi repiasar.

32 ¡Setá vite ambuae ava recocuer oime amombehu vaherā pēu! Ipane ité rumo ari imombehupa āgua: Gedeón, Barac, Sansón, Jefté, David, Samuel iyavei opacatu Tūpa ñehe mombehusar recocuer.

33 Evocoi avei Tūpa rese oyeroya pipe osecopi ité ambuae ivi pendar, oporocuai tupri güeco ívisa pipe, oipisiño ité Tūpa suindar mbahe semimombegüer yuvireco, oiyurumboyaño avei yaguar,

34 ombogüe avei tata ipirata vahe, oyeepi avei quise pucu pipe oyuca rāgüer sui; ava nipiratai vahecuer rumo oyemomirata yuvireco, oyemoviracua ité vavasave oyese; opaño ité oamotarēhisar sundao osecopi yuvireco.

35 Oime amove cuña ipāhuve vireco iri vahecuer omu manosa sui imbogüerayevipri.

Ambuae rumo omanopaño ité teco rasisa pipe, “Yasē catu co nungar mbahe sui” ndehi eté yuvireco cuerayevisa avíye catu vahe pipe güeco āgua.

36 Ambuae iparaisu catu ava upe oñeeroirosa pipe, onupasa pipe, oapīchichisa pipe, voquendasa pipe avei yuvireco.

37 Ambuae ita pipe oapi-apisave omano, amove imombitesa ivira asiasa pipe, anise ambuae yucasa quise pucu pipe, amove ipāhu pendar oguata tēi, ovesa, cavara pírer añomi tēi iyemondesa, iparaisu mbahe porēhi yuvireco nombohe catui ava ipihañemoñetasa pipe sereco iyavei mara-mara tēi vireco yuvireco no.

38 Evocoi seco catupri vahe yuvireco ndiyai co ivi pipendar Tūpa cuaparēhi upe vireco vaherā oyepāhuve, ahe oguata tēi ivi iporupirēhisa rupi, ivitri rupi, mbahecuar rupi avei yuvireco.

39 Yepe ahe opacatu avíye ité Tūpa upe oyeroyasa rese yuvireco viña, ndoipisii eté rumo oyeupe Tūpa remimombegüer yuvireco.

40 Esepia, Tūpa omoime mbahe avíye catu vahe yandeu ‘oyoya tupri toipisi güecocuer ihívi tupri āgua che remimombegüer rupi yuvireco’ ohesa pipe chupe, yandeu opacatu avei.

12

¹ Sese yande, yaicuase setá ité evocoi ava oime omboyecua vahe Tûpa rese oyeroyasa, iyacatu ité yaseyapa opacatu mbahe ndayande mbohe catui vahe Tûpa upendar mbahe rese iyavei yande angaipa yande mboha tupri vahe. Ichui yayemoviracuaño itera yande cuaita Tûpa ombou vahe rese yandeu inungar ivava catu vahe.

² Yamahe tupri itera Jesús rese. Ahe ichui niha yareco yande yeroyasa Tûpa rese. Ahe avei oyese yande mboporeroya tupri catu. Oiporara curusu rese omano ochîhisa pipe. Esepia, ahe oicua ité oparaisu pare vîrecoza ovîharetesa, oguapise omborerecuasave Vu acato coti ôi.

³ Pe avei catu, pepihañemoñeta Jesús recocuer rese; ahe oiporara ité mbahe rasicuer ava yangaipa vahe mara-mara têi güerecose. Sese pecuerai eme Cristo rese peico âgua iyavei, “Ndorequerêhi iri” ndapeyei chira.

⁴ Esepia, pe ndapemano vitei eté angaipa upe pe yembopihavîracuasa pipe.

⁵ Peresarai eté Tûpa pe mboaracuasa sui tahir ité pe recosa pipe; icuachi-apri aracahendar pipe aipo ehi:

“Che rahir, eyemoingatu voîño Yar nde mombaraisusa upe nde reco mohivi tupri âgua, iyavei, ‘Ndachequerêhi iri’ nderei chiaveira chupe ndeu oñhehe pîratase.

⁶ Esepia, Tûpa osecomohivi tupri ava güembiaisu iyavei omombaraisu rane guahir sereco âgua” ehi.

⁷ Peñemosañu catu pe mombaraisusa upe pe reco mohivi âgua. Esepia, Tûpa êgüe ehise pêu guahir ité pe rereco. ¿Oime piha que ñepeï ava guahir upe noñhehe pîratasi vahe secocuer mohivi âgua?

⁸ Tûpa ndape recocuer mohivise inungar oyapo ambuae guahireta upe yepi, pe evocoiyase inungar-ra chîhivahe ndiyesupai vahe, êgüe peye têi peico chupe.

⁹ Iyavei, chîhivahe têi vite yaicose, yande yesupa co ivi pipendar yande nupa yande recocuer mohivi âgua, ahese yamboetei. Sese yamboetei catura yande Ru Tûpa iva pendar tecovesa rereco âgua.

¹⁰ Yande yesupa co ivi pipendar opihañemoñetager rupi têi yande nupa yaicove raimi têise co ivi pipe; Tûpa rumo yande mombaraisu yandeu mbahe tupri âgua rese yande reco maranehi âgua inungar ahe ndaseco marai vahe.

¹¹ Supi eté yipindar, poronupasa yaipisi ramose, tasi yandeu. Coiye rumo yande imboyeroyasa pipe yayapo catura mbahe ihîvi vahe. Ahe evocoiyase yande recocuer rerecoza mbahe tupri pipe.

Peicua catu Tûpa ñehe rendu potaêhi sui

¹² Sese pemopoase iri pe reco pîratasa iyavei peyemongerêhi iri pe guata âgua yande Yar rupi.

¹³ Ipape peseca peri ihîvi vahe pe recocuer uve nara ‘toingatu che pi ndoguatai vahe’ pe yapave ‘timara catu iri eme’ pe hesa pipe.

¹⁴ Peico catu opacatu ava upe mbahe tupri pipe, peico avei pe reco maranehi pipe. Esepia, ava ndovirecoi vahe güeco maranehi, ndosepiaï chietera yande Yar.

¹⁵ Peñearo tupri catu, tipo eme ava ndoipisi vahe Tûpa porovasasa pe pâhuve, iyavei tipo eme mbahe têi que ava piha pipe; aviyeteramo opacatu rese ova tiêtera.

¹⁶ Tipo eme catu pe pâhu pendar oyemboaguasa têi vahe. Tipo eme avei ava Tûpa upendar mbahe viroïro vahe pe pâhuve inungar Esaú aracahe. Ahe omondo Tûpa porovasasa oyeupendar tahir ipi güecosa resendar mimoi repirâ têi vivri upe.

¹⁷ Iyavei peicua, ipare acoi Esaú oipisi pota Tūpa porovasasa vu sui viña. Ahe rumo ndiya iri eté sovasapirā seci. Yepe oyasehó iteanga viña, ndiya iri eté rumo mbahe sembierecovi rāgüer mboyevi āgua chupe.

¹⁸ Peyemboyase Tūpa rese, ndahei inungar pe ramoi israelita aracahendar. Esepia, ahe ivitri Sinái sese yapoco vahe rese tēi oyemboya vahe yuvireco; ahe ivitri rese sendí ité inungar tata rendigüer; oime pītu, pītumimbi vahe, ivitu ai avei sese.

¹⁹ Iyavei ndapesendui mimbí imoñehepri, Tūpa ñehe avei. Aracahendar rumo osendu ité yuvireco. Iñehe renduse rumo, osiquiyepave ndoipota iri ahe oyeupe ñehe yuvireco.

²⁰ Esepia, ahe oyembosiquiye ité evocoi porocuita aipo ehi vahe sui: “Acoi opiro vahe ivitri rese, yepe que mbahe mimba tēi viña, ahe peyapi-yapi yuca ita pipe, anise lanza pipe avei” ehi.

²¹ Ahe mbahe oyecua vahe aipo oporombosiquiye vahe ité. Evocoyase Moisés teieté aipo ehi: “Che siquiyepave ariri eté” ehi.

²² Pe rumo peyemboya iva pendar ivitri Sión ve, Tūpa oicove vahe recuave. Ahe tecua Jerusalén iva pendar. Aheve Tūpa rembiguai setá iteanga vahe oñemonuha imboetei āgua yuvireco yepi.

²³ Iyavei peyemboya opacatu ava Tūpa rahir ipi Cristo reroyasar rese, ahe serer icuachiapri ivave. Peyemboya avei Tūpa rese, ahe niha yande recocuer rese oporandu vahe seci; iyavei peyemboya ava seco aviye vahe espíritu yuvirecoi vahe rese. Ahe niha Tūpa osecomohivi tupri sereco.

²⁴ Peyemboya avei Jesús rese, ahe omoime yandeu Tūpa remimbotar ipiasu vahe, ahe suvi yande moatiro vahe. Ahe aviye catu yandeu Abel ruvi sui.

²⁵ Sese peicua catu, “Ndoroviroyai” peye vaherā acoi pēu oñehe vahe upe. Esepia, Moisés reroyaēhisa pipe pe ramoi noñemi eté Tūpa ñemoirosa sui yuvireco, oyeupe, “¡Peicua catu!” ehise co ivi pipe aracahe. Ēgüe ehise chupe yuvireco aracahe, Ēgüe ehi catu iri tiētera yandeu. Nayañemi chietera ichui cute ndayaroyaise co iva pendar, “Peicua catu” ehise yandeu.

²⁶ Tūpa oñehe pipe omboriri eté ivi aracahe; cūrítei rumo yandeu aipo ehi: “Che amboriri irira ivi, ndahei chira rumo ivi güeraño, iva avei amboririira” ehi.

²⁷ ‘Amboriri irira’ aipo oyapave aipo ehi: “Opara mbahe omii vahe omocañi güembiapo Tūpa ‘topita apirēhi mbahe nomii vahe’ oyapave” ehi.

²⁸ Tūpa mborerecuasa ombou vahe yandeu ahe nomii chietera. “Aviye ndeu” yahera evocoyase sese chupe; ipipe sui yayerure catu yande piha pipe chupe imboeteisave semimbotar rupi.

²⁹ Esepia niha, ahe inungar tata ñepeí reseve mbahe omocañipa vahe.

13

Mara yahera Tūpa mbovha

¹ Ndapepoi chietera pe yeaisusa sui ñepeí-peí oyeivri nungar pe recosa pipe.

² Iyavei peresarai eme pe avasa sui ava oyepotase pe piri. Esepia, co nungar apó pipe amove ava omoingue Tūpa rembiguai güetave icuaēhi pipe.

³ Peyemomahenduha avei soquendapri rese inungar-ra pe avei supive soquendapri peico vahe viña. Iyavei peyemomahenduha ava mara-mara tēi serecopri rese. Esepia, aviyeteramo Ēgüe ehi aveira pēu.

⁴ Pe opacatu pemboetei avei mendasa, iyavei peico pe reco maranehisa pipe mendasa rese. Esepia, Tūpa oicuara oyemboaguasa tēi vahe upe.

⁵ Ndahej guarepochi tēi peipota raira. Iya rumo peyembovihaño mbahe pereco vahe rese. Esepia, Tūpa aipo ehi: “Ndoroeyai chietera, ndapoi chietera nde sui” ehi aracahe.

⁶ Evocoyase aipo yahera Yar rese yande yeroyasa pipe:

“Che Yar che pītivii, ndasiquiyei chietera ava tēi sui oyapo potase mbahe cheu” yahera.

⁷ Peyemomahenduha pe reroguatasar rese, pēu Tūpa Ñhengagüer mombehusar rese avei. Pepihañemoñeta tupri secocuer rese, seco apri rese avei; iTūpa reroya agüer rupi tupri avei peico.

⁸ Jesucristo recocuer noñecuñaroi vahe ité, yipisuive secoi apirēhi vahe.

⁹ Peyembopa ucai rene yembohesa co coti tēi vahe upe. Aviye catu yayemomirata Tūpa poroaisusa rese que mborocuaita tembihu resendar sui. Esepia, co nungar mbahe ndovireco ucai mbahe aviye vahe ohusar upe.

¹⁰ Yande rumo yareco ambuae ité Tūpa upe seropovēhepri. Ahe niha ndiyai eté pahi tūparo yipindar yuvirecoi vahe pendar yuvirohu.

¹¹ Supi eté judío pahi ivate catu vahe viroique mbahe ruvi tēi Tūpa rēta oi imaranehi catu vahe pipe seropovēhe ava angaipa rerocua āgua; ahe mbahe mimba rete rumo osapi tecua ivii yuvireco yepi.

¹² Ēgüe ehi avei niha Jesús iparaisu, omano tecua ivii ava reco mbocatupri āgua vuvi pipe.

¹³ Ēgüe yahe aveira yasora Jesús upe yande paraisu āgua supi ava yande roirosa pipe yaico.

¹⁴ Supi eté, co ivi pipe ndayarecoi eté tecua apirēhi vahe. Yande rumo yaseca evocoi tecua oime yاهرā yandeu curi.

¹⁵ Sese Jesús rembiapo rese iyacatu yamboeteira apirēhi yاهرā yande Yar Tūpa. Co imboeteisa inungar mbahe seropovēhepri ari rupi chupe. ¡Ēgüe yahera imboetei yande ñehe pipe!

¹⁶ Peresarai eme catu ambuae ava upe mbahe tupri aposa sui. Iyavei pemondoño ité mbahe pereco vahe ambuae ava upe. Esepia, evocoi nungar inungar mbahe seropovēhepri Tūpa upe. Ahe niha Tūpa oipota.

¹⁷ Pemboyeroya pe cuaisar, peyapo semimbotar. Esepia, ahe ndopituhui eté pe recocuer rāro yuvireco. Esepia, oicua Tūpa oicua mbahe sembiapo rese chupe curi. Sese pemboyeroya catu ‘tayavai eme iporaviquisa chupe; tasoriveté oporaviquisa rese yuvireco’ pe yapave. Pemboavaise rumo, nosei chietera mbahe aviye vahe ichui pe recocuer upe nara.

¹⁸ Peyerure Tūpa upe ore rese. Supi eté, ore oroyandu ité mbahe aviye vahe oroyapo ore pihañemoñeta pipe yepi. Esepia, oroyapo pota mbahe aviye vahe opacatu mbahe rese ava rembiepiave.

¹⁹ Che yevi pihai vi āgua rese ité aporandu pe yeruresa rese pēu Tūpa remimbotar rupi.

Mahenduhasa ipa vahe

²⁰ Tūpa mbahe tupri rerecosar, ahe niha ombogüerayevi vahe yande Yar Jesucristo yande rārosar ivate catu vahe, suvi pipe omboyecua güemimbotar piasu ndopai vahe imbou yandeu,

²¹ tombou pe reco mohivisa iyavei pe reco aviyesa opacatu pe semimbotar apo āgua; iyavei ahe toyapo mbahe opacatu güemimbotar yande rese Jesucristo rembiapo sui. ¡Ēgüe tehi imboeteipri apirēhi tasecoi Cristo yepi!

²² Che rivireta, peñemosañe co che opomboaracua vahe rese, moviro tēi niha co ñehesa aicuachía pēu.

²³ Aipota pe peicua yande rivri Timoteo imosesa soquendasa sui. Oyepota pihaivise, arasora cheyeupi che sose pe repia.

²⁴ Pemombehu che mahenduha opacatu ava pe cuaisar upe, opacatu ambuae Tũpa upendar ava upe avei. Ivi Italia rupindar avei ombou omahenduhasa yuvireco pẽu.

²⁵ Aipo rupive, yande Ru Tũpa tape rovasa opacatu.

SANTIAGO REMBICUACHIA SANTIAGO

Mahenduhasa

¹ Che, Santiago, Tūpa, yande Yar Jesucristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

Mbahecuasa ou vahe Tūpa sui

² Che rivireta, pevihareteñora peico acoi oimese tecoãhasa pëu yepi.

³ Esepia, peicua niha pe poreroyasa rese oimese mbahe tecoãhasa, ahe ipipe peyembohe pe ñemosasa pipe pe reco rese peico.

⁴ Peicoño ité pe reco ñemosasa pipe pe reco mohivi tupri catu ãgua. Evo-coiyase nipane iri chira mbahe Tūpa suindar pëu.

⁵ Iyavei acoi ipanese que ava pe pãhu pendar upe yaracua ãgua, toporandu Tūpa upe. Evocoyase ahe omboura chupe. Esepia, ahe opacatu upe mbahe ombou güecatëhiëhisa pipe iyavei ombahe mboasiëhisa pipe avei.

⁶ Iyacatu rumo evocoi ava oporandura Tūpa upe sese oyeroyá pipe, ndahei chira opihañemoñeta rerova-rova tëisa pipe inungar acoi ivitu i ombohitu-hitu tëi vahe.

⁷ Acoi ëgüe ehi-ehi tëi vahe ava ndoipisi chira mbahe yande Yar sui yuvireco.

⁸ Esepia, ñepeí ari ipihañemoñeta ñepeí mbahe rese, ambuae ari ambuae rese. Ndoymoviracuai güeco tupri ãgua rese yuvireco.

⁹ Iyavei que Jesús reroyasar seco mbegüe vahe toyembovihareteño yepi Tūpa omboeco ivate ãgua rese.

¹⁰ Iyavei mbahe yar secói vahe pe pãhuve, toyemboviha viteño Tūpa viroyise seco ivatesa sui. Esepia, mbahe yar yuvirecoi vahe inungar caha potri ëqüe ehi raimi tëi vahe yuvireco.

¹¹ Evocoyase acoi ari osëse, sacú iteangase, ahese caha opa ipiru; ipotri avei opa oviapi ichui iyavei iporañetesa opa ichui. Ëgüe ehi aveira ava mbahe yar; omanora oporaviquisa sui.

Tecoãhasa, poroãtoisa resendar

¹² Acoi ava oyemoviracua vahe poroãtoisa upe oyembovihara oico. Esepia, osasa tuprise evocoi poroãtoisa, oipisira porerecosa, ahe tecovesa apirëhi vahe Tūpa ombou vahe guaisupar upe.

¹³ Acoi ava oyanduse poroãtoisa oyeupe mbahe tëi apo ãgua, “Tūpa revo ëgüe ehi cheu” ndehi chira. Esepia niha, Tūpa ãtoisar ndipoi eté mbahe tëi oyapo uca vahe rã chupe. Iyavei ahe noñatoi avei mbahe tëi apo ãgua ava.

¹⁴ Co rumo ava opihañemoñeta rai upe oñeatoy uca mbahe tëi apo ãgua yepi.

¹⁵ Güemimbotarai pipe evocoyase oyapo angaipa. Ipore angaipa apo pipe sui ou manosa chupe.

¹⁶ Che rivireta, che rembiaisu, peyembopai rene.

¹⁷ Esepia, opacatu mbahe aviyé vahe ahe Tūpa ombou vahe yandeu. Ahe niha opacatu íva rese mbahe aposar. Ndahei rumo güembiapo nungar secói. Esepia, sembiapo oñecuñaro vahe.

¹⁸ Ahe rumo ombou ité tecovesa yandeu co ñehesa supi eté vahe pipe ‘toyuvirecoi inungar yipindar mbahe miti ha seropovëhepri cheu opacatu che rembiapo sui’ ohesave yandeu.

Tūpa rese yande pihañemoñetasa supi tupri vahe

¹⁹ Iyavei che rivireta, che rembiaisu, peyemomahenduha co che ñehe rese: peyapisaca tupri voira ambuae ava ñehe rese, mbegüe rupi rumo peñehera chupe iyavei ndapembahemboasi voi tēi chiaveira.

²⁰ Esepia, yambahemboasi voi tēise, ndayayapoi Tūpa remimbotar.

²¹ Evocoiyase peseya teco raisa, opacatu ambuae oime vahe mbahe naporai vahe pe pāhuve. Co catu pe yemominisave peroya catu vite Tūpa ñehe omoingue vahe pe piha pipe. Ahe niha vireco pīratasa pe pīsiro āgua.

²² Pe rumo pemboaviyera co pe mbohe vahe ñehesa; ndahei acoi pesenduño tēira. Esepia, pesenduño tēise, pe ae peyembopara.

²³ Supi eté acoi ava osenduño tēise Tūpa Ñehengagüer, ipare rumo ndoviroyai, ahe inungar acoi ava osepiaño tēi vahe vova yepiasa pipe.

²⁴ Ipare rumo oyepepise ichui, cūrteimi sesaraiño ichui.

²⁵ Acoi ndasesarai vahe ité rumo güemiendu sui iyavei oyapisaca tupri vahe co mborocuita maranehi mbahe-mbahe tēi sui yande rerocua vahe rese iyavei oyemoviracuaño ité vahe oyapo vaherā iporocuita, ahe oviharetera opacatu güembiapo tupri rese.

²⁶ Amove ava, “Che aguata tupri Tūpa rupi” ehi tēi. Ndoicuai rumo oñehe monguiriri āgua. Evocoiyase ahe ae oyembopa oico. Sembieroya evocoiyase ěgüe ehi tēi vahe.

²⁷ Yarecose rumo yande rembieroya icatupri, nimarai vahe yande Ru Tūpa rovai, ahese yaipitiviira co tirēhi, imer mano vahecuer avei iparaisusa rese. Iyavei ndayayapoi chira mbahe naporai vahe.

2

Ndayamboyoavirati chira ava mboeteisa sereco

¹ Iyavei no, che rivireta, pe peroya vahe yande Yar Jesucristo seco porañete vahe peico, ndapeyeaisu yoavii chira.

²⁻³ Inungar-ra que ava mbahe yar oiquese pe ñemonuhasave viña, ahe icuã penda oro vahe, iturucuar catupri ai vahe. Sese pehañeco tupri, “Eguapi co tenda aviye catu vahesave” peyera chupe. Ahe pipeve avei co oiquese pe pāhuve iparaisu vahe oturucuar cuacua vahe reseve, “Eipe peve nde epita, anise eguapi ivive” aipo peyeñora co chupe viña.

⁴ Evocoiyase ěgüe peyese, peyapo mbahe ndoyoyai vahe, naporai vahe pe pāhuve ae iyavei peyeapo ava poravosar nungar peico pe pihañemoñeta raisa pipe.

⁵ Che rivireta, che rembiaisu, pesendu aipo ñehesa: Tūpa oiporavo ava iparaisu vahe co ivi pipe ‘toyuvirecoi mbahe yar nungar che reroyasa rereco’ oya, iyavei ‘toipisi che remimombehugüer rupi che mborerecuasa oyeupe nara’ oyapave guaisupar upe.

⁶ Pe rumo seroñosa pipe pemochi ava iparaisu vahe. ¿Ndahei vo mbahe yar mara-mara tēi pe rereco yuvireco yepi? Ahe niha pe mbotiriri mborerecuar rovai pe reraso yuvireco yepi.

⁷ Ahe avei niha oñehe-ñehe tēi seroñosa pipe yande Yar yaroya vahe rerimboyoyapri rese yuvireco.

⁸ Supi eté yayapo mbahe aviye vahe yamboaviyese mborocuita ivate catu vahe icuachiapri aipo ehi vahe: “Pesaisu ava pe yeaisu nungar” ehi vahe.

⁹ Acoi yayeaisu yoavirati tēise rumo, ahese yayapo angaipa, yayavi mborocuita Tūpa rovai.

¹⁰ Esepia, acoi ava viroya vahe opacatu mborocuaíta, ipare rumo oime que ñepei nomboaviye tuprii vahe, ahe oyavi opacatu mborocuaíta.

¹¹ Esepia, Tüpa ité niha aipo ehi: “Ndapeyemboaguasai chira” ehi. Ahe avei aipo ehi: “Ndapeporoyucaí chira no” ehi. Yepe acoi ndapeyemboaguasai chira viña, pe poroyuca pipe rumo, peyavi mborocuaíta.

¹² Evocoiyase peñehe tuprira iyavei peico tupri aveira. Esepia, oporandura yande recocuer rese yande Yar oporocuaíta pipe güeru vahe yandé reco tupri ägua.

¹³ Supi eté acoi ndoiparaisuerecoi vahe ava, ahe chupe ndipoi chiaveira poroparaisuerecosa mborandusave. Oporoparaisuereco vahe rumo, ahe soriveté catura yuvireco ahe arí pipe mborandusave curi.

Yamboaviye itera mbahe; ndahei chira yande ñehe tēi

¹⁴ Che rivireta, çaviyera pñha acoi ava, “Ayeroya yande Yar rese” ehi tēi vahe, ndoyapoise mbahe aviye vahe yuvireco? ¿Oicatura pñha ahe oñepisiro aipo ohe pipe tēi yuvireco?

¹⁵ Inungar-ra oimese que yande rivri, anise yande reindri upe ipanera iturucuará, semihura arí yacatu rupindar viña.

¹⁶ Evocoiyase que pe aipo peyeñora chupe viña: “Aviye, eso tupri eico. Eyeao eso sōhisagüer sui, ecaru tupri” peyera. Ipare rumo ndapemondoise mbahe ipane vahe chupe, çaviyera pñha ava upe aipo yande he tēi viña?

¹⁷ Ègüe ehi avei, “Ayeroya yande Yar rese” yande hesa; ndayayapoise rumo mbahe aviye vahe aipo yande hesa pipe, aipo yahe tēi yaico.

¹⁸ Aviyeteramo ava pe pñhu pendar aipo ehira cheu: “Nde ereyeroya yande Yar rese, che rumo ayapo mbahe tupri” ehi. Che evocoiyase aipo ahera chupe: “Emboyecua ru nde yeroyasa mbahe nde rembiapoēhi pipe. Evocoiyase che amboyecuara che yeroyasa oime vahe che rembiapo pipe ndeu” ahera.

¹⁹ Nde niha aipo, “Che aicua oime ñepei Tüpa” ere. Supi eté aipo ere. Co rumo carugar avei oicua. Ichui osiquiyepave rumo ahe orirí eté yuvireco.

²⁰ ¡Mbia, tapeico eme ndayaracuai vahe! ¿Ereicua vo co nde mbahe apoēhisa nde yeroyasa ègüe ehi tēi vahe?

²¹ Esepia, Tüpa oipisi yande ramoí Abraham seco tuprisa pipe oicuvēhese porerecosa nungar guahir Isaac chupe aracahe.

²² Indó, Abraham yeroyasa omboyecua ité güembiapo catupri reseve. Evocoiyase ègüe ehi ahe güembiapo tupri pipe omboaviye tupri oyeroyasa oico aracahe.

²³ Ègüe ehi yaviye icuachiapri aipo ehi vahe: “Abraham viroya ité Tüpa, evocoiyase, ‘Co seco catupri vahe’ ehi Tüpa ipisi” ehi. Ahese ava, “Abraham Tüpa mboripar ité” ehi yuvireco chupe.

²⁴ Indó, Tüpa, “Co seco catupri vahe” ehi ava upe sembiapo tupri repiase yepi, ndahei iyeroyasa rese güeraño.

²⁵ Ègüe ehi tupri avei cuña ndipihai vahe Rahab upe. Esepia, ahe omoingue ñuvirio ava ivi repiasar imondopri güeta pipe, ipare oñomi imondo ambuae peri rupi yamotarēhisar sui. Ipipe sui Tüpa oipisi inungar-ra seco ivi tupri vahe viña.

²⁶ Ègüe ehi yande rembiapo catupri ndayamboyecuaise yande yeroyasa pipe, ahe inungar avei Espiritu ndasecoise yande rese, yande yeroyasa evocoiyase omano tēi eté oico.

3

Yande ñehe resendar

¹ Che rivireta, yipindar ndapeyeapoi chira setá etepri oporombohe vahe peyepáhuve. Esepia, peicua niha yande oporombohe vahe yaicose, Tüpa oporandu catu itera ambuae ava sui yande porombohe agüer rese yandeu curi.

² Opacatu yande yayavi setá mbahe rese yepi. Oimese que ava ndoyavii vahe oñehe, ahe ava seco ivi tupri vahe. Iyavei oicua tupri opacatu güeco rereco tupri ägua.

³ Inungar acoi yamondose cavayu yuru penda sese seroguata ägua. Ahese opacatu cavayu retecuer yaicatu imboyahuva ägua.

⁴ Inungar tupri avei carite guasu, yepe tuvicha iyavei yepe ivitu omoañii opiratagüer pipe viña, serovasa rahimi pipe rumo seroguatasar omohivi-hiviño seraso güemimbotar rupi.

⁵ Ëgüe ehi avei yande äpecu, yepe chihimi tēi viña, ipipe rumo yayapo tēi mbahe tuvicha vahe ava upe. Inungar avei que tata chihimi vahe sui tēi yuvi guasu opa ocai.

⁶ Ëgüe ehi yande ñehesa tata nungar. Iyavei yande äpecu pipe opacatu mbahe-mbahe tēi yamombehu. ¡Evocoi mbahe-mbahe tēi mombehusar yande resendar ité! Ahe amove ovireco mara opacatu yande recocuer. Inungar tata ova-ova vahe mbahe rese. Evocoi yande ñehe tēisa caruguar suindar.

⁷ Ava oicatu opacatu mbahe mimba nimasoi vahe mboaracua ägua, vñrai, mboi iyavei mbahe ipi para guasu pipendar avei no.

⁸ Ndipoi eté rumo que ava oipoepi vaherã oñehe. Yandeu ndiyai eté ipoepi ägua. Yande ñehesa oporoyuca vahe nungar ité yepi, mbahe tēi eté.

⁹ Co yande äpecu pipe yamboetei yande Yar Tüpa, ipipe avei rumo yamomara ava, ahe ava rumo Tüpa oyapo onungar.

¹⁰ Ëgüe ehi eté, yande ñehe pipe yamboetei Tüpa, ipipe avei yaroïro ava. Che rivireta, ndiyai evocoi nungar mbahe yayapo yepi.

¹¹ ¿Oicatura pñha osē ñepeí i ohē vahe sui sēhe vahe, iro vahe avei viña?

¹² ¿Ihara pñha higuera ivira rese aceituna viña? ¿Iyavei oicatura pñha uva hi rese oha higo viña no? ¡Aní, ndoicatuí eté! Iyavei ndoicatuí ñepeí i ohē vahe sui osē i, sēhe vahe sēhe así vahe reseve.

Mbahecuasa supi eté vahe

¹³ Acoi oimese pe pãhuve yaracua vahe, oyapisaca vahe, tomboyecua catu güeco catuprisa, güeco mbegüesa avei ombahecua tuprisa pipe.

¹⁴ Oimese rumo pe pihave pe poroamotarēhisa mbahe pota raisa pipe, iyavei peyeupe nara tēi mbahe peseca, ahese ndiyai peyemboviha tupri tēi 'che yaracua vahe aico' pe yapave. Esepia, peremira tēira supi eté vahe mbahe rese.

¹⁵ Ëgüe ehi eté evocoi nungar aracuasa ndahei Tüpa suindar. Ahe rumo co ivi pipendar tēi vahe, ava pñhañemoñeta sui tēi osē vahe iyavei caruguar suindar tēi avei.

¹⁶ Esepia, poroamotarēhisa yande mbahe pota raisa pipe yarecose iyavei yaipotase mbahe yandeyeupe nara tēi, ichui osē ñehepoepisa iyavei opacatu mbahe tēi.

¹⁷ Acoi vireco vahe rumo Tüpa suindar aracuasa, ahe vireco itera opacatu ava rovaque güeco maranehisa iyavei secoira güeco mbegüesa pipe. Ahe ndaseco asíi chiaveira. Iyavei oyemoingatu voi vahe, ahe oporoparisuereco

vahe, nomboyoaviratii vahe güecocuer. Ahe ipihañemoñetasa ñepeí reseve vahe iyavei oyapo tupri vahe mbahe.

¹⁸Iyavei acoi oseca vahe mbahe tupri yepi, oipisi itera opiha pipe teco ñvisa.

4

Co ivi pipendar mbahe raisusa

¹¿Que sui pñha ou vavasa iyavei ñehepoepi-episa pe pñhuve? Ahe ou pe mbahe pota raisa sui pereco vahe pe pñhañemoñetasa pipe.

²Pe peipota rai mbahe. Ipare rumo ndapeicatui sereco ãgua. Evocoyase peporoyuca pe mbahe pota raisa pipe. Ndiyai eté rumo pñu sereco ãgua. Ipipe sui peyeecoñha, pevava avei no. Ndapeyosui eté rumo mbahe pe remimbotar. Esepia, ndapeporandui Tũpa upe.

³Acoi peporanduse rumo sese, ndapeipisi. Esepia, peporandu rai tñi, peipota pe yemboviha ãgua rese nara tñi.

⁴Pe mñia, peyavi vahe pe recocuer! ¿Ndapeicuai vo acoi ava Tũpa cuaparñhi mboripar tñi yuvirecoi vahe, ahe Tũpa amotarñhimbar yuvirecoi? Ëgñe ehi eté acoi oipota vahe co ivi pipendar mbahe-mbahe tñi pipe güeco ãgua, ahe oyeapo Tũpa amotarñhimbar.

⁵Supi eté Tũpa Ñehengagñer aipo ehi: “Tũpa osaisu güecatñhisa pipe o Espñritu omondo vahe yande piha pipe” ehi.

⁶Ahe rumo yande pñivii catu oporoaisusa pipe. Esepia, icuachiapri arachendar pipe aipo ehi: “Tũpa oyamotarñhi ava oyeecomboivate ai vahe. Oipñivii rumo seco mbegñe vahe saissusave” ehi.

⁷Sese pemboyeroya catu Tũpa. Peyemoviracua caruguar remimbotar apoñhi ãgua. Ahese ahe oyepepñra pe sui.

⁸Peyemboya Tũpa rese, ahe evocoyase oyemboyara pe rese. Pe, angaipa viyar, ipeñemoatiro mbahe peyapo vahe sui! ¡Iyavei pemoatiro pe pñhañemoñetasa ñuvirño pereco vahe sui!

⁹¡Tatasi pñu, tapeyaseho, perorñvete iri eme, pemboasi pe angaipa pe yemboviharñhisave!

¹⁰Peñnopiha Yar rovai imboyeroyasa pipe. Ahe evocoyase pe reco mboivatera.

Peroñro eme pe mboetasa

¹¹Che rñvireta, aní chira peñehe mara peyeupe. Acoi oñehe rai vahe iyavei viroñro vahe ambuae Jesús seroyasar, ahe oñehe rai tñi aveira mborocuaita rese seroñrosave. Ëgñe peyese, evocoyase seroyañhisa pipe peyemboivate catura mborocuaita sui viña.

¹²Oime rumo ñepeñño ité ombou vahe mborocuaita yandeu iyavei oporandu vahe yande recocuer rese. Ahe güeraño avei oicatu oporopñsñro iyavei oporomocaññ ãgua no. Evocoyase pe, ¡ndiyai pe cotindar reroñro ãgua pñu!

Ndayaicuai mbahe oime vaheñ yandeu ayihive

¹³Pesendu pe aipo peye vahe: “Cñritei, anise ayihive yasora que tecuave, anise que tecua guasuve revo. Aheve yaicora ñepeí aravñter yande poravñqui ãgua. Ahese yamogana catura guarepochi” aipo peye vahe.

¹⁴¡Ndapeicuai rumo mbahe oime vaheñ yandeu ayihive! ¿Mara ehi pñha yande recocuer? Ahe inungar ñvichi oyecua raimi tñi vahe, ipare opaño ocaññ.

¹⁵Iyacatu aipo peyera viña: “Oipotase yande Yar yande reco ãgua, yaya-pora co nungar mbahe, que ambuae mbahe” peyera yepi.

¹⁶ Pe rumo peñeheño pe yemboivate aisa pipe mbahe pe rembiaporã rese. Opacatu evocoi nungar mbahe rumo naporai.

¹⁷ Esepia, acoi oicua vahe mbahe tupri apo água, ipare rumo ndoyapoi eté, ahe oyapo angaipa.

5

Imbahe eta vahe paradisusa resendar

¹ Pe mbahe yar, pesendu co: peyaseho iyavei perãse! Esepia, peiporarara mbahe tēi peico.

² Opacatu pe mbahe eta ocañi tēi vaherã. Esepia, pe mbahe pe reco ati vahe opa ituyu. Iyavei pe turucuar yayi vahe opa avei ohu sasoi.

³ Pe oro, pe guarepochi opa opochi ati-ati no. Ahe niha pe recoña água, omboyecua vahe mbahe tēi pēu. Iyavei pe mbahe pota raisa ndoyavi pe roho ocai vahe vireco. Esepia, pemonuha guasu tēi mbahe pereco ati vahē sereco co ari ipa vahe pipe.

⁴ Peyapisaca, acoi oipoho vahe mbahe pēu nara yuvireco, chupe ndapemboepi eté. Sese sāsē tēi yuvireco. Ahe rumo yande Yar ipiratá vahe, ivate catu vahe oicua.

⁵ Co ivi pipe tēi pe peyecomoendiyai peico iyavei peyemboiha co ivi pipendar mbahe rese inungar guaca imonguirapri yuca água. Ipipe peymoingatu pe cañi água.

⁶ Pe ñehe pipe pemombaraisu ava ndoyapoi vahe mbahe yuvireco; yepe, “Mara” ndehi yuvireco pēu viña, pe rumo peyucaño.

Ñemosasa iyavei yeroquisa resendar

⁷ Che rivireta, peñemosañu yande Yar yevi iri água rese. Inungar ava omaheti vahe osãro rane güemiti poho água. Esepia, ahe osãro yipindar oqui vahe iyavei ipa oqui vahe mbahe miti aviye água.

⁸ Pe avei peñemosañu, peyemonguerēhi catu. Esepia, cōimi eté yande Yar yevi água cute.

⁹ Iyavei che rivireta, peñemoiroi rene peyeupe. Evocoiyase Tūpa ndoporandui chira co mbahe rese pēu. Esepia, mborerecuar guasu iva pendar oyemoingatu voi ohã yandeu porandu água.

¹⁰ Che rivireta, peico catu inungar Tūpa ñehe mombehusar aracahendar yuvirecoi vahe. Ahe oñemosañu mbahe rasicuer upe yande Yar rer pipe oñehe água yuvireco.

¹¹ Yande rumo yaicua sovasapri ava oñemosasa vahe mbahe rasicuer upe yuvireco. Pesendu niha pe acoi mbia Job serer vahe ñemosasa. Ipare peicua avei mbahe aviye vahe yande Yar oyapo chupe. Yande Yar niha oporoparisuereco vahe.

¹² Che rivireta, peyapisaca tupri catu co che ñehe rese. Pe ñehe água ndapeiporui chietera que iva rer iyavei que ambuae mbahe pe ñehe reroya uca água. Iyacatu rumo, “Supi eté” peyese, supiño itera; “Aní” peyese, aní chiño itera Tūpa poronupasa pisiēhi água.

¹³ Aviyeteramo que pe pãhu pendar iparaisura oico; toyerogui. Aviyeteramo oimera que sorivete vahe oico; ahe tosapucaí Tūpa upe.

¹⁴ Aviyeteramo que ava imbaheasira oico, toñehe evocoiyase Jesús reroysasar rãrosar upe. Ahe tomondo aceite yande Yar rer pipe yuvireco sese. Ipare toviroyeroqui yuvireco.

¹⁵ Acoi oyerokuise oyeroyasa pipe sese yuvireco, imbaheasi vahe evo-coiyase ocuerara; yande Yar avei omopuhara. Acoi angaipa virecose, oime aveira ñerosa chupe.

¹⁶ Sese pemombehu pe angaipa peyeupe, peyeroqui avei peyese pe yem-bogüera tupri uca água. Ava aviye vahe oyerokuise oquerêhisave opacatu güecocuer pipe, ahe iyeroquisa ipĩratá ité.

¹⁷ Acoi Tüpa ñehe mombehusar Elías yande nungar avei. Ahe oporandu oyerokuisa pipe Tüpa upe, “Toqui eme” ehi. Aipo ehise, ndoquií eté ivi harive mbosapi araviter imombitesa rupi.

¹⁸ Ipare oyerokuí iri, ahese oqui iyavei mbahe miti iha iri.

¹⁹ Che rivireta, acoi oimese oyahuva vahe supi eté vahe sui pe pãhuve, ipare ambuae viroyevise Jesús upe,

²⁰ tapeicua pe acoi viroyevi vahe angaipa viyar secocuerai sui, oipĩsiro ihã imano rãgüer sui. Iyavei omoime ñerosa tuvichá vahe yangaipa upe. Aipo rupive.

PEDRO REMBICUACHIA YIPINDAR VAHE SAN PEDRO

Pedro mahenduhasa Jesús reroyasar opacatu rupi oñemosai vahe upe

¹ Che, Pedro, Jesucristo apóstol aicuachía co che ñehe pëu, pe Tüpa rembi-poravo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe.

² Supi eté pe yande Ru Tüpa rembiporavo yipisuive peico semimbotar rupi. Evocoiyase oEspíritu Santo pipe pe peha oyeupe nara viroyasar pe reco água 'imoatiroproi toyuvirecoi che Rahir ruvi pipe oangaipagüer sui' oya. Peipisi catu Tüpa porovasasa pe reco tupri água.

Tüpa suindar mbahe aviye vahe rãrosa

³ ¡Imboeteipri tasecoi Tüpa, yande Yar Jesucristo Ru! Ahe niha oporoparisuerecosa pipe yande recocuer mbopiasu. Ëgüe ehi yandeu Guahir Jesucristo ocuerayevise. Ipipe sui yaicuaño ité oimera mbahe aviye vahe Tüpa suindar yandeu.

⁴ Ipipe sui avei Tüpa oipisi ucara pëu pe mombahesa ivave yapocatupri nocañhi vaherã, ndituyui vaherã iyavei ndopai vaherã ité.

⁵ Pe peyeroya ité Tüpa rese. Sese niha ahe opiratasa pipe pe repi mbahe tõi sui poropisirosa pe reco água. Ahe vireco vahe imoingatupri ari ipa vahe mboyecua água pëu.

⁶ Co rese peyembovihareteño peico, yepe cüritei pe reco pipe peparaisu pucu raimi tõi setã pe recoãhasa pipe peico viña.

⁷ Esepia, pe yeroyasa Tüpa rese aviye oro, ahe sãhasa tata pipe yepi. Ëgüe ehi aveira pe recocuer sãhambri tata nungar mbahe yavai vahe pipe, “¿Aviye vahe ité pãha?” hesave. Yañemosase evocoi mbahe yavai vahe upe, ahese yande yeroyasa aviye catura oro ocañhi tõi vaherã sui. Ëgüe yahese, “Che rese pe yeroyasa aviye ité” ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevise curi.

⁸ Pe niha pesaisu yande Yar Jesucristo, yepe ndapesepiai viña; cüritei rumo sepiaëhi pipe peyeroya sese. Sese pereco ité pe viharetesa tuvichã, aviye catu vahe, ndapeicatu vahe ahe imombehu.

⁹ Esepia niha, pesupiti pe remiaro poropisirosa apirëhi vahe peico pe yeroyasa pipe.

¹⁰ Aracahe suive ava Tüpa ñehe mombehusar oicua tupri pota ité co poropisirosa resendar yuvireco ‘¿mara ehi eté pãha co tecocuer?’ oyapave yuvireco. Iyavei oñemoñeta yuvireco Tüpa oporoaisusa pipe pëu mbahe ombou vaherã rese.

¹¹ Cristo Espíritu senondeve oicua uca mbahe Tüpa ñehe mombehusar upe aipo ehi: “Poropisirosar oyemombaraisu ranera, ipare rumo teco orisa porañete vahe oimera” ehi chupe aracahe. Sese, “¿Umara pãha evocoi mbia?” ehi; “¿Mbahesera vo oimera co Espíritu remimombehu yandeu?” ehi yuvireco.

¹² Tüpa rumo omboyecua chupe, ndahei chupe nara ité imombepri yuvireco, pëu nara ité rumo. Ahe avei niha poropisirosa resendar ñehesa mombehusar omombehu pëu cüritei, Espíritu Santo piratasa pipe imboupri iba pendar yandeu. ¡Tüpa rembiguai avei oicua tupri pota tõi cüritei yuvireco viña!

Tūpa yande poravo yande reco maranehi āgua

¹³ Sese pe pihañemoñeta tuprisa pipe pemahemoha tuprira peyese Tūpa porovasasa pēu ombou vaheṛā rese pe yeroya catu āgua acoi Jesucristo oyeviṣe curi.

¹⁴ Tahir iporeroya vahe pe recosa pipe ndapeicoi chira mbahe pe remimbotarai pipe, acoi pereco vahecuer peyese Tūpa recocuer cuaēhi viteseve.

¹⁵ Peicora rumo pe reco maranehisa pipe ité. Esepia, Tūpa pe poravo oyeupe nara; ahe ndaseco marai vahe ité.

¹⁶ Supi eté icuachiapri aracahendar pipe aipo ehi imombehu: “Pe tapeico seco maranehi vahe. Ēsepia, che ndaseco marai vahe aico” ehi.

¹⁷ Tūpa niha opacatu ava upe secocuer rese nomboyoaviratii chira oporandu curi, sese pe, “Che Ru” peye vahe chupe peyembosiquiyera mbahe tēi apoēhi āgua imboetisave co ivi pipe peico vitesve.

¹⁸ Esepia, Tūpa pe písiro aracahendar pe ramo suindar aracuasa ēgüe ehi tēi vahe sui. Peicua tupri ité niha co poropísirosa repri nimboepisai eté que mbahe ocañi tēi vaheṛā pipe inungar oro, anise guarepochira viña.

¹⁹ Imboepisa rumo Cristo ruvi maranehi pipe. Ahe seropovēhepri, inungar ovesa nimarai vahe.

²⁰ Ahe Tūpa oiporavo aracahe ivi, iva apoēhi viteseve ēgüe ehi vaheṛā. Cūrítei rumo oyemboyecua pēu mbahe tupri āgua.

²¹ Secocuer sui niha peroya Tūpa peico, ahe ombogüerayevi vahe omano vahe pāhu sui, ipare omondo oyemboeteisa, güeco porañetesa avei chupe. Ipipe sui peyeroya Tūpa rese iyavei pesāro co mbahe aviye vahe pisi āgua ichui.

²² Cūrítei Tūpa Ñehengagüer supi tupri vahe mboyeroyasa pipe imoatirosa pe recocuer pesaisu vaheṛā ambuae Jesús reroyasareta. Evocoiyase ēgüe peyera peyeaisu catu opacatu pe pihañemoñeta tuprisa pipe, iyavei opacatu pe píratasa pipe.

²³ Pe niha pereco tecovesa piyasu, ndahe pe yesupa omano tēi vahe suindar. Ahe rumo Tūpa Ñehengagüer supi tupri apirēhi vahe reroya pipe.

²⁴ Esepia, icuachiapri aracahendar pipe aipo ehi: “Opacatu ava inungar caha, iyemboeteisa evocoiyase inungar ipotri. Ipare ahe caha opa omano, ipotri avei opa oviapi;

²⁵ Tūpa Ñehengagüer rumo apirēhi vaheṛā ité yepi” ehi. Ahe co ñehesa imombehupri poropísirosa resendar pēu nara.

2

¹ Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar.

² Inungar pitanimi ocuacua āgua oipota cambi; ēgüe peye aveira pe querēhisa pipe Tūpa Ñehengagüer rese pe yembohe catu iri āgua, peico tupri āgua poropísirosa pipe,

³ que peicua itese yande Yar reco aviyesa.

Cristo inungar ita ndopai vahe

⁴ Peyemboya catu yande Yar rese. Ahe inungar ita ndopai vahe. Ava rumo oviroiroño yuvireco. Tūpa rumo ahe ita oiporavo aviye catu vahe.

⁵ Ēgüe ehira pe rereco oyeupe inungar ita ndopai vahe; ipipe sui omopuhara otūparoguā pe rese. Iyavei pahí ndaseco marai vahe nungar peicora

semimbotar rupi chupe. Pe evocoiyase Jesucristo rembiapo pīpe sui peyapora Espírītu upendar mbahe aviye vahe. Ahe inungar mbahe seropovēhepri aviye vahe Tūpa upe.

⁶ Esepia, icuachiapri aracahendar pīpe aipo ehi:

“Che amondo ñepeī ita nungar ava aviye vahe tecua Sión ve imovíracua āgua. Ahe che rembiporavo iporañete vahe, imboeteipri.

Acoi oyeroyá vahe sese, ahe nochī chietera ichuí” ehi.

⁷ Pe seroyasar peico vahe upe evocoi ita aviye vahe ité. Seroyasarēhi upe rumo imboaviyesa co ñehesa aipo ehi vahe:

“Oī aposar rumo viroíroño co ita yuvireco.

Ahe ita rumo coiye víracuasa aviye catu vahe”

ehi.

⁸ Iyavei omboaviye aipo ñehesa:

“Co ita oipihapī oitī uca ava” ehi. Esepia, Tūpa suindar ñehesa reroyaēhi pīpe sui oyemondo uca mbahe tēi pīpe yuvireco. Ēgüe ehi vaherā ité rumo ahe secocuer yuvireco.

⁹ Pe rumo ava oyesuindar nungar iporavopri peico Tūpa uve nara, imborerecuasa upendar pahī, iyavei chupendar ava seco maranehi vahe peico. Ēgüe peye Tūpa reco pīratasa mombehu āgua peico. Esepia, ahe pe renose pītumimbisa nungar pe recocuerai sui tesapesa aviye vahe pīpe pe reique āgua.

¹⁰ Yīpīndar ndahe vitei eté Tūpa upendar ava peico, cūrītei rumo ahe ité peico; yīpīndar ndaperecoi Tūpa poroparaisuerecosa, cūrītei rumo pereco ité cute.

Peico catu Tūpa mboetei āgua

¹¹ Che rīvireta, che rembiaisu, peico raimi tēi vahe co ivi pīpe, pepoi opacatu co ivi pīpendar pe pīhañemoñeta raisa sui. Esepia, pemomara uca tēi pe recocuer ipīpe.

¹² Pereco tupri pe recocuer aviye vahe ava Tūpa ndoicua vitei vahe rovaque. Yepe ava remieroíro peico inungar-ra mbahe tēi aposar viña, osepiase rumo pe rembiapo catupri, omboeteira Tūpa yuvireco ahe arī pīpe acoi yande Yar oporanduse opacatu ava recocuer rese curi.

¹³ Yande Yar raisusa pīpe pemboyeroya opacatu pe rerecuar co ivi pīpe: que mborerecuar guasu ivate catu vahe,

¹⁴ anise yivirindar. Ahe pe recua pīpendar rārosar imondopri ava naporai vahe mombaraisu āgua, iyavei ava seco catupri vahe upe, “Aviye nde recocuer” he āgua.

¹⁵ Esepia, Tūpa oipota pe peyapora mbahe aviye vahe ava mbahe ndoicuai vahe upe, ndayaracuai vahe upe pe rese iñehe-ñehe tēiñhi āgua.

¹⁶ Peico tupri ava rovaque mbiguai tēi nungar sui senosepri pe recosa pīpe. Ndiyai rumo ipīpe peyapo iri mbahe tēi. Peico tupri rumo Tūpa rembiguai pe recosa pīpe.

¹⁷ Pemboeteira opacatu ava. Pesaisu catu pe rīvireta Jesús reroyasar; pemboetei Tūpa; pemboyeroya avei mborerecuar guasu.

Yembohesa yande Yar Jesucristo mombaraisu agüer resendar

¹⁸ Pe, ava rembiguai, pemboyeroya catu pe rerecuar imboeteisa pīpe que seco catupri vahe, que ndaseco pōrai vahe avei.

¹⁹ Esepia, aviye catu yañemosase mbahe-mbahe tēi ava rembiapo upe Tūpa mboyeroya tupri pīpe.

²⁰ Mbahe tēi aposa pipe rumo pe mombaraisuse yuvireco, ndipoi eté evocoiyase ichui mbahe aviye vahe peñemosase evocoi nungar mbahe upe. Co rumo acoi mbahe tupri aposa pipe pe mombaraisuse yuvireco, ipare peñemosase chupe, ahe rumo aviye catu itera Tūpa upe.

²¹ Pe paraisu āgua rese niha Tūpa pe poravo. Esepia, Cristo oyemombaraisu pe recocuer rese. Ahe rane ěgüe ehi pe rese pe secocuer moña āgua.

²² Ahe ndoyapoi vahe ité angaipa iyavei ndoporombopai vahe ité.

²³ Acoi ava iñehe mara-mara tēise yuvireco chupe, nomboyevii eté iñehe raisa. Iyavei acoi omombaraisuse yuvireco, “Ayepira sese” ndehi eté. Ahe rumo, “Che Ru Tūpa seco ĩvi vahe oicuara chupe yuvireco” ehiño oyeupe mbahe-mbahe tēi aposar upe.

²⁴ Cristo teieté viraso yande angaipagüer güete pipe curusu rese ‘toyepipi angaipa sui yuvireco. Ipipe sui toyuvirecoi teco ĩvisave’ oyapave yandeu. Ahe niha yapichapri secoci pe recocuer moingatu āgua.

²⁵ Esepia, pe niha yipindar inungar ovesa ocañi tēi vahe peico viña. Cūrítei rumo peyevi Cristo upe. Ahe pe recocuer osāro cūrítei inungar ovesa rārosar.

3

¿Mara ehira ava omenda vahe recocuer yuvireco?

¹⁻² ěgüe peye aveira cuña, pemboyeroa itera pe mer. Esepia, amove ndoviroya vitei Tūpa Ñehengagüer yuvireco; pemboyecuase rumo pe reco tuprisa imboeteisa avei chupe, aviyeteramo ahe avei viroyara, yepe ndapeñehei chira chupe viña.

³ Acoi pemboyecua potase pe yemoporañetesa ndahei chira pe rete rese inungar oāca rese mbahe omoporañete ai vahe, ndahei chivaiera pe yemondesa sendi yai vahe oro nungar, que turucuar porañete catu vahe.

⁴ Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiēhisa pipe. Evocoi nungar aviye catu ité Tūpa rovaque.

⁵ ěgüe ehi avei cuña seco catupri vahe güeco porañetesa imboyecua aracahe. Ahe oyeroya Tūpa rese yuvireco, omer avei omboyeroa yuvireco.

⁶ Inungar Sara aracahe, omboyeroa ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyeēhisa pipe.

⁷ Iyavei pe imer, pereco mbegüera pe rembireco upe. Pemboeteira sereco. Esepia, ahe nipirata tuprii, iyavei Tūpa omboura güeco tuprisa pipe tecovesa apirēhi vahe oyoya voi pēu. ěgüe peyese, Tūpa osendu itera pe yeruresa.

Paraisusa mbahe tupri aposa rese

⁸ Iyavei na peyera pe opacatu peyese inungar ñepe i oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe.

⁹ Oyapose ava che mbahe tēi pēu, anise que oñehe raise, ndapemboyevii chira chupe. Iyacatu rumo mbahe tuprisa pipe pemboyevira chupe. Evocoi nungar mbahe apo āgua niha Tūpa pe poravo ‘toipisi che porovasasa’ oyapave.

¹⁰ Esepia,

“Peipotase pe recocuer aviye tupri āgua pe yemboviharetesa pipe, pemombituhu pe ñehe raisa iyavei ndapeporombopai chira.

¹¹ Pepoi aveira mbahe tēi sui, pesecara mbahe aviye vahe.

Peseca teco tuprisa peyeupe nara, peguata supi.

¹² Esepia, supi eté, yande Yar osãro ava seco catupri vahe iyavei osendu oyeupe yeruresa.

Ava mbahe tēi aposar rumo ndoipisii eté” ehi.

¹³ Ndipoi chira revo que ava mbahe tēi oyapo vahe pe recocuer upe yuvireco, pequerēhise mbahe aviye vahe apo.

¹⁴ Peparaisuse rumo mbahe pe rembiapo aviye vahesa rese, įsovasapri peico! Peyembosiquiyei rene que ava sui.

¹⁵ Pemboeteiñora rumo Cristo pe Yar secosa rese pe piha pipe. Peyemoin-gatu voira ava pe remiaro rese oporanduse pēu pe querēhisa pipe imombehu tupri āgua.

¹⁶ Ēgüe peyera rumo pe reco mbegüesa pipe imboeteisave. Peico tupri ra pe pihañemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

¹⁷ Tūpa oipotase pe yemombaraisu, aviye catu mbahe aviye vahe apo pipe yepi mbahe tēi apo rāgüer sui.

¹⁸ Esepia niha, Cristo teieté omano yande angaipa repirã ñepei reseve. Güeco maranehi pipe Ēgüe ehi ava recocuerai rese opacatu pe reraso āgua Vu Tūpa upe. Ahe omano güete rese. İpare rumo ocuerayevi güeco espíritu pipe.

¹⁹ Güeco espíritu pipe avei oso, omombehu Vu Tūpa remimbotar ava hã soquendapri yuvirecoi vahe upe.

²⁰ Ahe ava Noé recosendar ndiporeroyai vahe yuvireco aracahe. Tūpa osãro güeco mbegüesa pipe secocuer moingatu āgua viña Noé oyapo vitesese arca oico. Ahe ipipe oñepisiro ochomi tēi yuvireco amarusu sui.

²¹ Ahe i osāhangapo i poroāpiramosa, ahe omboyecua yande ipisiropro yande recosa. Poroāpiramosa rumo i pipe ndahei yande rete moatiro āgua. Co rumo yaporandura Tūpa upe, yande pihañemoñetasa moatiro āgua. İpipe sui evocoyase yañepisiora yande Yar Jesucristo cuerayevisa pipe.

²² Ahe oso ivave oguapi oĩ Vu acato coti. Opacatu sembiguai eta, mborerecuareta, opacatu imborerecuasa ipirata vahe avei ipovri pendar yuvirecoi.

4

Yandehañeco yandeyese mbahecuasa Tūpa suindar yaipisi vahe pipe

¹ Cristo oiporara mbahe rasicuer güete rese. Pe avei evocoyase peyemoin-gatu voi Ēgüe peye vahe rã peico chupe nara. Esepia, acoi ava oyemombarara vahe güete pipe oseya angaipa yuvireco.

² İpipe sui ndoyuvireco iri chira ari rupi ava tēi pihañemoñetasa pipe. Tūpa remimbotar rupi eté rumo oyapo pota mbahe co ivi pipe yuvirecoi vitesese.

³ Ēgüe peye pucu rane niha pe rembiapo ai pipe peico ava Tūpa reroy-asarēhi recocuer nungar rupi tupri. Ahese mbahe-mbahe tēi peyapo pe pihañemoñeta raisa pipe, savaiposa, pietasave pe rãse tēi pipe pe aracuasa pemocañi pe ihu tēisa pipe, pemboetei avei mbahe rahanga tēi peico.

⁴ Cūrutei rumo pe mboriparer, ndoyembovihal tēi pe rese, ndapeico irise supi semimbotarai apo āgua. Ahe oñehe-ñehe tēi yuvireco pe recocuer piasu rese.

⁵ Ahe chupe rumo oimera porandusa. Esepia, yande Yar oyemoin-gatu opacatu ava recocuer rese oporandu āgua omano vahe upe, oicove vite vahe upe avei curi.

⁶ Sese niha co ñehesa pĩsĩrosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirã, iespĩritu rumo yuvirecoi apirẽhi inungar Tũpa.

⁷ Vĩrovi rumo ari ipa vahe oico, sese pe yapĩsacasa pipe pepihañemoñeta tupri iyavei peyerure catuño ité pe yeroya tuprisa pipe.

⁸ Co catu opacatu tupri ité peyeaisura pe piha pipe. Esepia, ãgũe yahera poroaisusa pipe yande ñero voira seta ava yangaipa vahe upe.

⁹ Peipisi tupri ava yuvĩraso vahe pe rõtave; “¿Mbahe rese pĩha co ou?” peyei rene pe pihañemoñeta pipe pe piri ou vahe upe.

¹⁰ Ñepeipei yande yaiporura Tũpa suindar mbahecuaasa yareco vahe ambuae Jesús reroyasar rese hañeco tupri ãgua. Yaiporu tuprira co Tũpa porovasasa setã vahe yande cuaita mboaviye tupri ãgua.

¹¹ Acoi pemombehuse Tũpa suindar mbahe, pemombehura inungar iñehe ité; acoi peporopĩtivii potase, peyapoño opĩratasa pẽu Tũpa ombou vahe pipe. Opacatu mbahe peyapo vahe peyapõ ‘tomboetei ava yuvireco Tũpa yande Yar Jesucristo rembiapo pipe sui’ pe hesa pipe. Esepia, chupendar ité imboeteisa iyavei imborerecuaasa. ãgũe tehi apirẽhi vaherã ité.

Yemombaraisusa Cristo reroyasar yande recosa pipe

¹² Che rivireta, che rembiaisu, ndapeyesapiha ucai chira, acoi oimese mbahe-mbahe tẽi yande recoãhasa pẽu ‘ndoyavii, ndipoi chietera evocoi nungar mbahe cheu viña’ pe hesa pipe.

¹³ Yayemboviharẽteñora rumo ipipe. Esepia, yande rereco yande Yar yemombaraisu agũer nungar pipe yuvireco. Evocoiyase yayemboviharẽte itera acoi yande Yar oyevise gũeco pĩratasa pipe.

¹⁴ Iñehe marase yuvireco pẽu Cristo reroyasar pe recosa rese, sovasapri peico. Esepia, Tũpa Espĩritu gũeco porañetesa pipe secõi eté pe rese.

¹⁵ Acoi pe pãhu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tẽi aposa rese. Ndahei chiaveira que ambuae ava mbahe rese iñemañeco tẽisa sui ãgũe ehira serecosa.

¹⁶ Co rumo acoi peparaisuse Cristo reroyasar pe recosa pipe, ndapechĩ chietera. Pesapucaira rumo Tũpa upe imboeteisa pipe serer pereco vahe rese.

¹⁷ Esepia, oyepota ité ari Jesús reroyasar upe rane ité tecocuer rese porandu ãgua. ãgũe ehise yandeu, mbahe tẽi catu itera Jesús reroyasarẽhi upe.

¹⁸ Yavaise seco catupri vahe upe iñepisiro ãgua, ¿mara ehira pĩha ava ndaseco põrai vahe ava angaipa viyar yuvirecoi vahe upe?

¹⁹ Sese peyemomborase Tũpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hã rãro ãgua. Esepia, ahe niha yeroyasa ité secõi.

5

Aracuasa Jesús reroyasar upe

¹ Che amboaracua pota pe pãhu pendar Jesús reroyasar rãrosar. Inungar avei niha che aico iyavei asepia vahe ité yande Yar mombaraisu agũer. Inungar ahe vireco teco orisa, ãgũe ahe aveira acoi yande Yar oyevise curi.

² Pesãro tupri catu Tũpa upendar ava eta pe remiaro co omondo vahe pẽu inungar ovesa rese yangarecuar osãro tupri vahe ovesa; peyapora pe querẽhisa pipe ité. Ahe niha Tũpa oipota, ndahei ambuae yande cuaisa pipe

têi, ndahei avei guarepochi pota raisave yayapo. Yayapora rumo mboraviqui yande querêhisa pipe ité.

³ Ndapeicoi chira pe remiaro upe inungar que mborerecuar güeco ivatesa pipe oporocuai pĩrata vahe. Pemboyecuara rumo pe recocuer aviye vahe chupe imbohesa tupri pipe.

⁴ Evocoiyase acoi oyevise yande Yar, yande rãrosar ivate catu vahe, ahese peipisira mbahe porerecosa, teco ori porañete apirêhi vahe.

⁵ Iyavei no pe mbia chihivahe, pemboyeroyara ava pe rãrosar peico. Iyavei opacatu peyemboyeroyara pe reco mbegüesa pipe peyeupe peico. Esepia, “Tüpa ava oyeecomboivate ai vahe amotarêhimbar secoi; ava seco mbegüemi vahe upe rumo ombou oporovasasa” ehi.

⁶ Peyecomombegüe catu peico Tüpa pĩratasa povrive. Evocoiyase pe reco mboivatara curi.

⁷ Opacatu mbahe rese pe pihañemoñeta atisa pemombehura Tüpa upe. Esepia, ahe pe rãrosar ité secoi.

⁸ Pearacua cañii rene peyesui, pemahemoha ari rupi peyese. Esepia, pe amotarêhimbar Carugar pe reco momara pota yepi inungar yaguar oñaro vahe uguata têi oporoeca ‘tamomara ava’ oyapave.

⁹ Sese peyemoviracuara Tüpa rese pe yeroyasa pipe Carugar upe. Esepia, peicua niha opacatu rupi avei yande rivireta Tüpa rese yuvirecoi vahe iparaisu co nungar mbahe pipe.

¹⁰ Peparaisumi pare rumo, Tüpa teieté pe reco mohivi tupri, iyavei pe reco moviracuara, pe momirata aveira pe yepepi iriêhi ãgua ichui. Ahe niha oporovasasa pipe yande poravo oyeupe nara, yande yaso vaherã supi teco ori ndopai vahesave yande Yar rese yande recosa pipe.

¹¹ Êgüe tehi tasecoi güeco pĩratasa apirêhi vahe pipe.

Mahenduhasa ipa vahe

¹² Yande rivri Silvano omboaviye tupri vahe ité ocuaita yepi, ahe che pitiviisa pipe co ayapo imondo che rembicuachía ndipucuimi vahe pe mboaracua catu ãgua ‘ipipe toicua tupri catu yuvireco co porovasasa oipisi vahe, supi eté omboyecua vahe Tüpa poroaisusa’ che hesave. ¡Peyemoviracua tupri ité sese!

¹³ Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pëu. Marcos, che rahir nungar avei imahenduha pe rese.

¹⁴ Peyeovaupite “avirave” apo pe yeaisusa pipe.

Tapereco tecocuer tupri yande Yar Jesucristo rese peico vahe. Aipo rupive.

IMOÑUVIRIOSA PEDRO REMBICUACHIA SAN PEDRO

Pedro mahenduhasa Jesús reroyasar upe

¹ Che, Simón Pedro, apóstol, Jesucristo rembiguai aico. Co aicuachía che ñehe pëu nara, pe peipisi vahe yande Yar rese pe yeroyasa aviye vahe inungar ore. Esepia, yande Yar Tüpa, yande Písirosar Jesucristo seco ñvi vahe yuvirecoi.

² Tapeipisi catu porovasasa iyavei teco tuprisa Tüpa, yande Yar Jesús cua tupri pipe.

Jesús reroyasar recocuer

³ Tüpa ombou güeco pĩrata pipe opacatu mbahe ipane vahe yande recove ägua, sese yande pihañemoñeta catu ägua avei yandé secocuer cua tupri pipe. Ahe yande poravo güeco porañetesa pipe, güembiapo porañete vahe pipe avei.

⁴ Ipípe avei oseyá oñehe imboaviyepirã yandeu; ahe ñehe ñgüe ndehi tẽi vahe, aviye catu vahe ité. Co yandeu ñehesa pipe sui perecora Tüpa reco aviye vahe peyese pe yepipi ägua mbahe tẽi sui. Ahe acoi oime vahe co ñvi pipe ava remimbotar tẽi sui.

⁵ Sese pe peyeroya vahe Jesús rese, peyemomirata catu aveira peyapo vaherã mbahe aviye vahe. Peseca aveira Tüpa remimbotar cua tupri catu ägua.

⁶ Iyavei peñearo tuprira. Ipare peñemosañ aveira mbahe tẽi upe. Ipípe sui peyemondo tupri catura Tüpa upe.

⁷ Ipare peyeaisura peyivri nungar pe recosa pipe. Ipípe sui peseca catu vitera ava raisu tupri ägua.

⁸ Esepia, perecose evocoi nungar mbahe pe recocuer pipe, pembouvicha catuse avei, ahese pe recocuer ñgüe ndehi tẽi chira, peicua tupri catu aveira yande Yar Jesucristo.

⁹ Acoi ndovirecoi vahe rumo evocoi nungar mbahe oyese, ahe oyeapo inungar ndasesapisoi vahe, anise mbahe ndosepia tupri vahe, sesaraño oangaipa rese ñero agüer sui.

¹⁰ Sese che rivireta, peyemoviracua catu Tüpa pe renoisa mboyecua ägua iporavopri pe recosave. ñgüe peyese, ndapeviapi chietera mbahe tẽi pipe.

¹¹ Evocoi nungar pipe sui pe pisi tuprira omborerecuasa ndopai vahe pipe yande Yar, yande Písirosar Jesucristo.

¹² Sese niha opomomahenduhã itera evocoi nungar mbahe rese, yepi peicua, peicoveño avei mbahe supi tupri vahe rese.

¹³ Aviyeño itera revo che recove viteseve opomomahenduha vite co aracuasa rese.

¹⁴ Esepia, yande Yar Jesucristo oicua uca cõimi che mano ägua cheu.

¹⁵ Opombohera rumo opacatu che catugüer rupi co tecocuer rese che manore pe mahenduha ägua.

Co osepia vahe ité Jesús mborerecuasa yuvireco

¹⁶ Co porombohesa oromombehu vahe pëu yande Yar pĩratasa resendar, iyevi iri ägua resendar avei, ndahei oreyesui tẽi. Ore rumo orosepia vahe ité ore resa pipe yande Yar mborerecuasa.

17 Orosepia niha yande Ru Tūpa omboeteise Guahir iyavei omondose chupe seco porañete iri āgua aipo ehise oñehe güeco porañetesu pipe: “Co che Rahir, che rembiaisu ité, sese niha che ayemboviharere vichico” ehise.

18 Ore ité niha aipo ñehesa orosendu iva suindar oroicoese yande Yar rupi ivitri imboeteipri vahesave.

19 Ahe ñehesa omboyecua catu ñehesa aracahendar Tūpa ñehe mombehusar remimombehugüer supi tupri vahe Cristo resendar. Iya ité pēu pe yapisaca tupri āgua sese; inungar que tataendi pītusave osesape vahe oico acoi osēse voi cōhe rerusar yasitata guasu ou, ēgüe ehi co ñehesa pe piha pipe sesape.

20 Peicua catu co mbahe, co ñehesa aracahendar icuachiapri Tūpa suindar ité, ndahei yandeyesui tēi yaicua imombehu āgua.

21 Esepia, ndahei iñehe mombehusar oyesui tēi omombehu yuvireco. Ahe rumo ava seco catupri vahe ité. Tūpa ité omombehu uca oñehe chupe Espiritu Santo pīratasa pipe aracahe.

2

Oporombopa vahe porombohesa

1 Yuvirecove rumo aracahe porombohesar oporombopa tēi vahe Israel ivi rupi. Oime aveira niha pe pāhuvé co nungar oporombopa tēi vahe yuvireco. Ahe ñemisa pipe oporombohera co coti tēi vahe ava reco momara tēi āgua; evocoiya güeco pipe oicuaçuñora oyar opīsirosar. Co rumo güecocuer momba pihaivi āgua tēi ēgüe ehira yuvireco.

2 Setá ava oguatara secocuerai rupi. Ipipe sui ambuae ava oñehe rai tēira porombohesa supi tupri vahe rese yuvireco.

3 Mbahe pota raisa pipe pe mbopara yuvireco co porombohesa co coti tēi vahe rese. Icañi rumo oimeño itera yuvireco chupe. Yipisuive ité niha ahe imocañipirā yuvirecoi.

4 Esepia, aracahe Tūpa niñeroi eté güembiguai oyemboangaipa vahe upe. Ahe opa ité omondo mbahe tēisave. ēgüe ehi seyapa pītumimbisave, inungar ñapichimbri carena pipe yapocatupri yuvireco cañisave nara.

5 Iyavei acoi Tūpa niñeroi avei ava aracahendar ndaseco pōrai vahe ivi pipe yuvirecoi vahe upe. Omocañi ité amarusu pipe ahe ava yuvireco. Noé acoi omombehu vahe tecocuer ihivi vahe resendar iyavei ava siete yuvirecoi vahe supindar, ahe güeraño ité oipīsiro.

6 Iyavei opa omocañi tata pipe tecua Sodoma, Gomorra avei; ēgüe ehi imbotanambu tupri ‘na ahe aveira niha ambuae ava che reroyaēhisar upe curi’ ohesave.

7 Lot güeraño rumo ahese oipīsiro. Ahe mbia aviye vahe secocuer; ndoyemboviharē tēi ambuae ava recocuer mbahe-mbahe tēi yuvirecoi vahe repiase.

8 Co mbia aviye vahe secoise ahe ava pāhuvé ari rupi, tasi tēi ipihañemoñeta pipe osepiase, osenduse avei mbahe tēi yuvirecoi vahe rembiapo.

9 Indó, yande Yar oicua viroyasar renose āgua mbahe tēi sui; oicua avei mbahe tēi pipe yuvirecoi vahe rereco imombaraisu āgua ari cañise curi.

10 Tūpa omombaraisu catu itera acoi ndopoi vahe güemimbotarai sui, viroiro vahe yande Yar mborerecuasa, oyeecomboivate ai vahe güemimbotar aposa pipe, acoi osiquiyēhisa pipe oñehe rai vahe seco ivate, ipirata vahe rese.

11 Tūpa rembiguai eta iva pendar rumo yepe ipirata catu vahe, omborerecuasa vireco catu vahe avei yuvireco viña, niñehe-ñehe tēi rumo Yar rovai yuvireco sese.

¹² Co ava mbahe mimba nungar tēi ndovirecoimi eté opihañemoñetasa yuvireco. Opoco voiño tēi mbahe rese; evocoi nungar yuviroha yucapirā tēi eté. Ahe oñehe rai tēi vahe mbahe güemienducuaēhi rese. Mbahe mimba nungar tupri avei rumo omanora yuvireco güecocuerai pipe.

¹³ Oyemombaraisu uca ambuae ava mombaraísusa pipe sui tēi, “Yayemboviha mbahe yande rembiapo ai rese” ehi tēi eté yuvireco viña. ¡Oporomochi pipe tēi rumo yuvirecoi, yuvirasose pe pietasave pe piri, güeco rai reseve oyemboviha oporombopasa tēi pipe yuvireco!

¹⁴ Osepiase cuña, oipota voiño tēi; ndaporambai avei iyemboangaipasa chupe. “Yayapoño mbahe” ehiño ndoyembohe catui vahe upe. Evocoi nungar oyembohe-mbohe catu mbahe pota raisa reca āgua oyeupe yuvireco. Ava ocañi tēi vaheerā yuvirecoi.

¹⁵ Ocañi tēi secocuer yuvireco Tūpa ñehe mombehusar Beor rahir Balaam recocuerai nungar pipe. Esepia, oyepepi tecocuer aviye vahe sui mbahe tēi apo āgua guarepochi pota raisa pipe yuvireco.

¹⁶ Tūpa rumo oyaca yangaipa rese guaricu omoñehe ucase ava ñehe pipe chupe. Ahese ramo opoi oaracuaēhisa sui.

¹⁷ Co ava oporombohe vahe inungar ivicuar ipiru vahe. Iva quiha ivitu remimombo nungar tēi avei. Apirēhi vahe ité imombopirā yuvireco pītumimbi catu vahesave nara.

¹⁸ Esepia, oñehe tupri ai angahu tēi ava monguerēhi āgua ava pihañemoñeta raisa rupi seroyevi āgua. Ipipe sui ombopa tēi ahe ava seco catupri pota vahe yuvireco evocoi nungar mbahe tēi pipe iyevi iri āgua.

¹⁹ “Opacatu mbahe apo yaicatu yande reco pipe” ehi tēi yuvireco. Ahe ae rumo mbiguai tēi nungar yuvirecoi güecocuerai apo pipe. Esepia, noyuvinose catui eté ichui. Supi eté, yayapoño itese que mbahe tēi, ahe evocoyase mbiguai nungar ité yande rereco uca.

²⁰ Esepia, acoi oicua vahe yande Yar, yande Pīsirosar Jesucristo yuvireco, ipipe oyepepi co ivi pipendar mbahe-mbahe tēi sui, oyeiti uca irise rumo co nungar mbahe tēi pipe, ichui ndoicatu iri yuvinose. Ipare mbahe tēi catu yipindar secocuer sui yuvireco chupe.

²¹ Oyeupe Tūpa porocuaita imondopri aviye vahe cua pare oyepepise ichui, aviye catura revo ndoicuaise co tecocuer ihīvi vahe yuvireco viña.

²² Supi tupri ité yaviye ñehesa sesendar: “Cave rumo ohu iri ogüehē. Iyavei cuchi oyasu pare, oyevi iri tuyuve oyemboavaete āgua” ehi vahe.

3

Yande Yar yevisa

¹ Che rivireta, che rembiaisu, co aicuachía iri che ñehe pēu. Ipipe opo-pihañemoñeta tupri uca pota che pe mboaracuasa pipe.

² Peyemomahenduha aracahendar Tūpa ñehe mombehusar seco catupri vahe ñehengagüer rese, yande Yar Poropisrosar porocuaita rese avei acoi apóstol pe mbohe vahecuer yuvireco.

³ Peicua ranera co ari imombehupri ipa vahe virovise, oimera ava ahe oviroñora co tecocuer aviye vahe Tūpa suindar güemimbotarai pipe yuvireco

⁴ aipo ehira, “¿Marase tēi vo aipo oura Tūpa Rembiporavo imombehupri ou vaheerā curi? Esepia, yande ramoi opa tēi omano yuvireco. Cūrítei opacatu ahe tupriño tēi tecocuer aracahe ivi apo suive” ehi tēira yuvireco.

⁵ Ahe nimahenduha potai yuvireco co aracahendar rese. Esepia, Tūpa oyapo oñehe pipe i va, ivi avei, ahe ivi osē vahe i sui, i pāhuve avei secoi.

⁶ Coiye i pipe avei opa omocañi ivi, ombouse amarusu aracahe.

⁷ Cūríteindar rumo iva, ivi imoingatupri tata uve nara Tūpa porocuaita rupi. Evocoi tata pipe avei ocañi tēira ava mbahe tēi aposar yuvirecoi vahe curi.

⁸ Che rīvireta, che rembiaisu, peresarai rene co mbahe sui: yande Yar upe ñepe ar i ungar mil araviter; mil araviter evocoiyase inungar ñepe arimi tēi chupe.

⁹ Esepia, yande Yar ndiaracahei eté oñehe mboaviye āgua; inungar amove ava, “Iharacahe tēi” ehi yuvireco viña. Ahe rumo aviye etepri güeco mbegüesa pipe yandeu. Esepia, ndoipotai que ñepe yepi yande cañi tēi āgua; ahe rumo oipota opacatu tupri ité yande recocuer ñecuñaro āgua.

¹⁰ Yande Yar ari yande resapiha tēira inungar imonda rai vahe ou pītu pipe yepi. Ahe iva ocañi tupri tēira viapugüer ipīrata vahe pipe curi. Opacatu mbahe yapopri opara yuvirocai. Ipipe sui co ivi opacatu ipor reseve ocañi tēi etera.

¹¹ Opacatu ité niha co mbahe yapopri ocañi tēi vaherā. Sese, ¡peyemoviracuaño itera pe reco maranehisa rese Tūpa rese pe pihañemoñetasa pipe!

¹² Pesāroño Tūpa yepotasa resendar ari, iyavei peyapo opacatu peicatugüer rupi ‘toyepota poyava voi’ pe yapave. Ahe ari pipe iva opara ocañi tēi eté tata pipe. Ipipe sui opacatu mbahe yapopri ticupa tuprira curi.

¹³ Yande rumo yasāro ité iva, ivi ipiasu vahe Tūpa remimombehu. Aheve opacatu ava yuvirecoira güeco aviyesa pipe.

¹⁴ Sese che rembiaisu, pesāro viteseve co tecocuer, ēgüe peyera opacatu peicatugüer rupi pe reco tupri āgua pe angaipaēhi pipe, pēu Tūpa, “Peyavi mbahe” ehiēhi āgua.

¹⁵ Tapeicua co: yande Yar seco mbegüe yandeu yande pīsiro āgua. Ēgüe ehi avei yande rembiaisu Pablo icuachía oyeupe Tūpa ombou vahe mbahecuasa pipe pēu.

¹⁶ Opacatu ocuachiar pipe omombehu evocoi nungar mbahe pēu, yepi amove yavai senducua āgua yuvireco viña. Sese amove ndoyemoviracua tupri vahe yande Yar rese iyavei ndoyemboaracua tupri vahe, ahe co coti tēi vīrova ñehesa, inungar oyapo ambuae ñehesa icuachiapri Tūpa suindar rese. Ipipe güecocuer omocañi tēi ahe.

¹⁷ Che rivri, che rembiaisu, peicua ité niha evocoi mbahe; sese peñearo tuprira pe yembopa ucaēhi āgua ava ndiporeroyai vahe upe Tūpa rese pe recocuer yemoviracua sui pe yepepiēhi āgua.

¹⁸ Peicua tupri catura rumo yande Yar Propīsiosar Jesucristo iyavei peicoveño itera iporovasasa pipe. ¡Ēgüe tehi imboeteipri tasecoi cūrítei apirēhi vaherā! Aipo rupive che ñehe pēu.

JUAN REMBICUACHIA YIPĪNDAR VAHE SAN JUAN

Ñehesa tecovesa resendar

¹ Co cuachiar pīpe oromombehu pēu co yīpisuive secoi vahe. Ahe orosendu, orosepia avei ore resa pīpe ité iyavei oropoco ité sese. Ahe niha Tūpa Ñehes tecovesa resendar.

² Co tecovesa oyemboyecua, orosepia iyavei ahe secocuer oromombehu. Ahe tecovesa apirēhi oromombehu vahe pēu. Ahe Vu rese secoi vahe oyemboyecua vahe oreu.

³ Oromombehu co orosepia vahe, orosendu vahe ñepe vahe nungar pe reco āgua ore rese inungar ore oroico yande Ru Tūpa rese, Tahir Jesucristo rese avei.

⁴ Evocoyase cūritei oroicuachia evocoi mbahe pēu yande yembovharete catu āgua.

Tūpa tesapesa secoi

⁵ Iyavei Jesucristo ore mbohe co ñehesa rese, ahe oromombehu pēu: yande Ru Tūpa niha tesapesa secoi; ndipoi eté pītumimbisa sese.

⁶ “Che aico tupri Tūpa rese” yahese, yaicoño rumo angaipa pīpe, ahe inungar pītumimbi vahe, ahese yande remira tēi iyavei ndayayapoi mbahe supī tupri vahe.

⁷ Yaicose rumo tesapesa pīpe inungar yande Ru Tūpa secoi tesapesa, evocoyase yaico tuprira yandeyeupe. Iyavei suvi yande moatiro opacatu angaipa sui.

⁸ Iyavei, “Ndarecoi angaipa che piha pīpe” yahe tēise, yande ae yayembopa ipīpe. Evocoyase mbahe supi eté vahe ndayarecoi yandeyese.

⁹ Acoi yamombehuse yande angaipagüer Tūpa upe, ahese ahe omboura oñeroisa yande angaipa rese yandeu iyavei omoatirora opacatu mbahe-mbahe tēi yande sui. Esepia, ahe seco iivi vahe.

¹⁰ Iyavei, “Che ndacheangaipai eté” yahe tupri tēise yaico, evocoyase Tūpa semirañete ai vahe nungar yareco. Ipīpe ndayaroyai iñehengagüer.

2

Jesucristo yande reco moingatusar

¹ Che rahireta, co aicuachia pēu pe angaipaēhi āgua. Que revo ava oime oyemboangaipa vahe pe pāhuve, yareco rumo yande Pītivisar yande Ru rovai. Ahe Jesucristo, seco iivi vahe.

² Ichui oime avei ñeroisa yande angaipa rese yandeu iyavei opacatu ava uve. Esepia, ahe omano curusu rese yande angaipa mocañi āgua yande sui.

³ Acoi yayapo tuprise Tūpa porocuaita, ahese supi eté yaicua Tūpa.

⁴ Oime amove ava “che aicua Tūpa” ehi vahe; nomboaviyei rumo iporocuaita. Ahe semirañete ai vahe, ndovirecoi mbahe supi tupri vahe oyese.

⁵ Acoi yamboaviyese iñehengagüer, ahese supi eté yasaisu Tūpa. Ipīpe sui yaicua yande reco tupri Jesucristo rese.

⁶ Acoi “aico tupri Tūpa rese” ehi vahe, ahe secoira Jesucristo nungar.

Mborocuaita ipiasu vahe resendar

⁷ Iyavei, che rivireta, ndaicuachiai mborocuaita ambuae ipiasu vahe pëu. Aheño ité mborocuaita pereco vahe yipisuive. Ahe acoi yipindar pesendu vahe.

⁸ Co aicuachía vahe rumo ogüeru mborocuaita ipiasu vahe. Ahe supi eté tesapesa Jesucristo vireco vahe iyavei pereco vahe avei. Esepia, pítumimbi opara. Tesapesa evocoyase osesape.

⁹ Oime amove ava “che aico tesapesave” ehi angahu tēi vahe; oyamotarēhiño rumo ambuae omboetasa Tūpa reroyasar. Evocoi nungar recocuer pítumimbisave tēi vite.

¹⁰ Acoi osaisu vahe ambuae omboetasa Tūpa reroyasar, ahe seci tesapesave. Sese nomboangaipa ucai omboetasa.

¹¹ Acoi ndoyambotai vahe omboetasa, pítumimbisa pipe tēi seci, ndoicuai avei que rupi güecocuer virecora. Esepia, pítumimbi vahe nombosapisoi.

¹² Che rahireta, co aicuachía pëu nara. Esepia, Tūpa iñero pe angaipa rese pëu Jesucristo recocuer pipe.

¹³ Pe, yesupa peico vahe upe co aicuachía. Esepia, peicua yipisuive oicove vahe. Aicuachía avei pëu, mbía chihivahe. Esepia, pesecopi Carugar.

¹⁴ Iyavei pe tahireta aicuachía opacatu pëu. Esepia, peicua vahe niha yande Ru Tūpa. Aicuachía avei pëu, pe iyepupa. Esepia, peicua yipisuive oicove vahe. Aicuachía avei pëu, mbía chihivahe. Esepia, peyemoviracua etepri, peipisi avei Tūpa Ñhengagüer pe piha pipe. Ipipe pesecopi Carugar.

¹⁵ Evocoyase pesaisu eme co mbahe tēi ivi pipendar. Acoi ava co mbahe tēi osaisu vahe, ahe ndosaisui yande Ru Tūpa yuvireco.

¹⁶ Esepia, opacatu co mbahe tēi ndahei yande Ru Tūpa suindar; ahe rumo co ivi pipendar suindar. Ahe niha opacatu yande pihañemoñeta raisa, yaipota vahe sese yamahese, iyavei opacatu yande rembiereco rese yande yemboivate ai tēisa.

¹⁷ Co ivi pipendar mbahe tēi iyavei ava mbahe pota raisa opa pota ité ocañi. Acoi ava oyapo vahe rumo Tūpa remimbotar, yuvirecoira apirēhi vaherā ité.

Mbahe supi eté vahe iyavei mbahe ndahei vahe supi

¹⁸ Che rahireta, co ari ipa vahe ité yandeu. Iyavei acoi pesendu “oura Jesucristo amotarēhimbar” ehi vahe, ahe cūritei setá oyemboyecua yamotarēhimbar yuvireco. Sese yaicua ari ipa vahe yepota ägua.

¹⁹ Ahe oyepipi yande pähu sui; ndahei eté rumo yande rivri yuvireco Tūpa rese. Esepia, acoi yandé rivri itese, ahese opitara yande piri yuvireco viña. Ēgüe ehi oyecua ndahei opacatu yande rivri yuvirecoi.

²⁰ Cristo omondo Espiritu Santo pëu. Sese opacatu pe peicua mbahe supi tupri vahe.

²¹ Pe niha peicua co mbahe supi eté vahe. Sese aicuachía co pëu. Esepia, mbahe supi eté vahe sui ndoui temira.

²² Acoi “Jesús ndahei Poropísirosar imboupri” ehi vahe, ahe semira tēi vahe, yamotarēhimbar yuvirecoi. Ahe niha ndoviroyai Tu, Tahir avei yuvireco.

²³ Acoi ava “evocoi ndahei Tūpa Rahir” ehi vahe, ndovirecoi Tu oyese yuvireco. Acoi “evocoi niha Tūpa rahir” ehi vahe rumo, ahe vireco yande Ru Tūpa oyese yuvireco.

²⁴ Sese yipisuive pesendu vahe ñehesa peyapocatu pe piha pipe. Ēgüe peyese, ahese peico tuprira Jesucristo rese, Tu rese avei.

²⁵ Esepia, Jesucristo aipo ehi: “Pe perecora co tecovesa apirēhi vahe peyese” ehi yandeu.

²⁶ Sese co ava pembopa pota vahe resendar aicuachía pēu.

²⁷ Pe pereco Espiritu Santo Jesucristo ombou vahe pēu. Sese ndiyai eté ambuae pe mbohera. Espiritu ae pe mbohe opacatu mbahe rese oico. Iporombohesa supi eté, ndoporombopai vahe. Sese peicoño Jesucristo rese Espiritu Santo pe mbohesa rupi.

²⁸ Iyavei che rahireta, peicoño ité Cristo rese yareco vaherã sese yande yeroyasa. Acoi ogüeyise iva sui curi, ahese nayachí chietera sovai ichui.

²⁹ Pe niha peicua Jesucristo seco ñvi vahe. Iya peicua avei opacatu oyapo vahe mbahe ihívi vahe, ahe Tüpa rahir ité yuvirecoi.

3

Tüpa rahir yuvirecoi vahe

¹ Mara ehi rutei Tüpa yande raisu. Ahe aipo ehi yandeu: “Pe niha che rahireta peico” ehi, ahe supi eté aipo ehi. Sese niha co ava ndoviroyai vahe Tüpa, ndoicatu eté yande recocuer cua água. Esepia, ndoicuai Tüpa recocuer yuvireco.

² Che rivireta, yaico ité Tüpa rahir. Yande rumo ndayaicua tupri vitei yande reco água ipare. Cüritei rumo co mbahe yaicua: acoi oyemboyecuase Jesucristo, yaicora inungar. Esepia, yasepia itera opacatu seco reseve.

³ Iyavei opacatu osãro vahe Jesucristo yuvireco, oyepepiño ité opacatu angaipa sui güeco catupri água, inungar ahe secoi.

⁴ Opacatu ava oyemboangaipa vahe, ahe oyavi Tüpa porocuita. Esepia, angaipa Tüpa porocuita mboaviyeēhisa yepi.

⁵ Pe rumo peicua Jesucristo ou co ivi pipe yande angaipagüer mocañi água. Ahe niha ndovirecoi eté angaipa oyese.

⁶ Opacatu ava sese yuvirecoi vahe ndoyapoi angaipa. Acoi ava yangaipa vahe rumo ndosepia, ndoicuai avei secocuer yuvireco.

⁷ Che rahireta, peyembopa uca eme ambuae ava upe, acoi oyapo vahe mbahe aviye vahe yepi, ahe secocuer aviye vahe ité inungar Jesucristo.

⁸ Acoi oyapo vahe angaipa, ahe Carugar suindar. Esepia, Carugar yipisuive ité oyapo angaipa. Sese ou Tüpa Rahir Carugar rembiapo mocañi água.

⁹ Opacatu yuvirecoi vahe Tüpa rese ndoyapoi angaipa. Esepia, ahe vireco ité Tüpa recocuer oyese yuvireco. Sese ndoicatu iri angaipa apo água yuvireco. Esepia, ahe Tüpa rahir ité yuvirecoi.

¹⁰ Icuapri ité Tüpa rahir yuvireco, icuapri avei Carugar rahir yuvirecoi vahe. Esepia, acoi ndoyapoi vahe mbahe tupri iyavei ndosaísui vahe Tüpa reroyasar, ahe ndahei eté Tüpa rahir yuvirecoi.

Yayeaisura ñepeipei yande yacatu

¹¹ Co niha ñehesa, acoi pesendu vahe yipisuive, ahe co yayeaisura ñepeipei.

¹² Ndayaicoi chira inungar Caín, ahe Carugar remimbohe oyuca vivri. ¿Mahera pīha oyuca? Esepia, tivri oyapo mbahe aviye vahe; Caín rumo oyapo mbahe naporai vahe.

¹³ Che rivireta, pepihañemoñetai rene Tüpa ndoicuai vahe pe reroïrose yuvireco.

¹⁴ Yande rumo yaicua aracacondar yande hã cañi tēi agüer. Cüritei rumo yasē evocoi nungar sui tecovesa apirēhi vahe pipe yande reco água. Esepia,

yande niha yasaisu yande rivireta Tūpa rese yuvirecoi vahe. Acoi ndosaisui vahe rumo ahe ihā ocañi tēi vite ité yuvireco.

¹⁵ Opacatu ava ndoyambotai vahe yande rivri, ahe iporapichi serai vahe nungar. Pe rumo peicua ava iporapichi serai vahe ndovirecoi tecovesa apirēhi vahe oyese.

¹⁶ Jesucristo niha omondo güecocuer manosave yande recocuer repirā. Ichui yande yaicua poroaisusa. Sese yande avei ēgüe tayahe yande rivireta rese.

¹⁷ Acoi ava vireco tēi vahe mbahe eta oyeupe nara, osepiaño tēi rumo vivri upe mbahe ipane vahe, iyavei ndoipitivi, ahe ndovirecoi Tūpa poroaisusa oyese yuvireco.

¹⁸ Che rahireta, yande poroaisusa rumo ndahei chira yande ñehe pipe tēi, iyacatu rumo yamboycua mbahe yande rembiapo pipe.

Yande yeroyasa yareco vahe Tūpa rovai

¹⁹⁻²⁰ Ēgüe yahese, yande yaicua yande recocuer supi eté vahe pipe yaico. Acoi, “Ndahei revo Tūpa rahir aico” yahese, ahese Tūpa rovaque yayemomahenduhara evocoi nungar rese: “Tūpa niha tuvichá catu yande pihañemoñetasa sui. Ahe opacatu mbahe oicua.” Sese yayeroyara.

²¹ Supi eté che rivireta, yaicua itese yande piha pipe yande reco tupri Tūpa rese, ahese yayeroyaña itera sovai.

²² Ahe avei niha ombou opacatu mbahe yandeu yaporanduse chupe. Esepia, yamboyeroya iporocuaite iyavei yayapo semimbotar yaico.

²³ Co ité iporocuaite; yaroyara Tahir Jesucristo iyavei yayeaisura ñepeipei Tūpa yandé cuaisa rupi tupri.

²⁴ Acoi yaroyase iporocuaite, ahese yaicora Tūpa rese; ahe avei secoira yande rese. Iyavei ahe ombou Espiritu yandeu. Ichui yaicua Tūpa secoi yande rese.

4

Espiritu Tūpa suindar iyavei espíritu Cristo amotarēhimbar

¹ Che rahireta, aní chira peroya opacatu “Espiritu pipe añehe” ehi vahe. Iyacatu rumo pesāha rane ‘¿Tūpa suindar ité pīha?’ pe hesa pipe. Esepia, setá vai oporombohe angahu tēi vahe oguata opacatu ivi rupi yuvireco.

² Co rese peicua ava Espiritu Tūpa suindar vireco vahe: “Jesucristo ou opacatu güete reseve” ehise, aipo ehi vahe vireco Espiritu Tūpa suindar ité.

³ Acoi aipo ndehi vahe rumo, ndovirecoi eté Espiritu Tūpa suindar oyese. Ahe rumo vireco espíritu Cristo amotarēhimbar tēi. Aracaco niha pesendu ñehesa acoi yamotarēhisar espíritu ou vaherā resendar. Ahe cūritei secoi co ivi pipe.

⁴ Che rahireta, pe rumo Tūpa suindar peico. Iyavei pesecopi ité acoi semira tēi vahe peico. Esepia, Espiritu secoi vahe pe rese, ahe ipirata catu Carugar sui.

⁵ Evocoi co ivi pipendar tēi yuvirecoi vahe. Esepia, oñehe mbahe ivi pipendar rese tēi yuvireco. Iyavei ava supindar ae ité oyapisaca ñehe rese yuvireco.

⁶ Yande rumo Tūpa suindar yaico. Acoi oicua vahe Tūpa oyapisaca yande ñehe rese yuvireco. Acoi ndahei vahe Tūpa rahir, ahe yande ñehe ndosendu potai yuvireco. Sese yande yaicua vireco vahe Espiritu supi eté vahe, yaicua aveira vireco vahe espíritu oporombopa tēi vahe.

Tūpa oporoaisu vahe

⁷ Che rívíreta, che rembiaisu, yayeaisu ñepeí-peí. Esepia, yeaisusa Tūpa suindar. Opacatu osaisu vahe ava, ahe Tūpa rahír, oicua ité avei Tūpa yuvireco.

⁸ Acoi ndosaisui vahe ava, ahe ndoicuai Tūpa yuvireco. Esepia, Tūpa yeaisusa secoi.

⁹ Ēgüe ehi omboyecua oporoaisusa yandeu. Ahe niha, ombou Guahír ñepeí vahe co ívì pípe ichui yande recove āgua.

¹⁰ Ndahei yande rane yasaisu Tūpa. Ahe rane rumo yande raisu iyavei ombou Guahír imano āgua yande angaipa repirā. Ahe niha poroaisusa supí eté vahe.

¹¹ Che rívíreta, che rembiaisu, ēgüe ehi Tūpa yande raisu. Evocoyase ēgüe yahe aveira yande yayeaisu ñepeí-peí yepí.

¹² Ndipoi eté ava osepia vahe Tūpa. Yayeaisuse rumo, Tūpa secoi yande rese. Iporoaisusa evocoyase oime ité yande rese.

¹³ Ahe ombou oEspíritu yandeu; ipípe sui yaicua sese yande reco iyavei yaicua ahe secoise yande rese.

¹⁴ Iyavei orosepia vahe, oromombehú: yande Ru ombou Guahír ava ívì pípendar písiro āgua.

¹⁵ Acoi ava “Jesús niha Tūpa Rahír” ehi vahe, ahe secoi eté Tūpa rese; Tūpa evocoyase secoi sese.

¹⁶ Ēgüe yahe icua, seroya tuprí āgua co Tūpa yande raisusa. Ahe niha yeaisusa. Acoi víreco vahe oporoaisusa, yuvirecoi avei sese; ahe avei secoi sese.

¹⁷ Ēgüe yahe Tūpa poroaisusa mboavíye tuprí ichui yande siquíyēēhi āgua acoi oyepotase arí cañi yandeu. Esepia, yande yaico co ívì pípe inungar Jesucristo.

¹⁸ Yasaisu tuprí itese Tūpa, ndipoi chira siquíyesa yandeu. Ēgüe yahese, opara siquíyesa yande sui. Esepia, cañisa suí oime siquíyesa yandeu. Sese acoi ava osíquíye ai vahe, ndoporoaisu tuprí eté.

¹⁹ Yípíndar Tūpa yande raisu. Sese cūritei yande avei yasaisu Tūpa.

²⁰ Amove ava aipo ehi tēi: “Che asaisu Tūpa” ehi. Ahe ramoseve rumo viroíro omboetasa Tūpa reroyasar. Evocoyase ahe semira tēi vahe. Esepia, acoi ndosaisui vahe omboetasa Tūpa reroyasar sepiase, ndoicatui Tūpa ndayasepiái vahe raisu āgua.

²¹ Jesucristo ombou co porocuita yandeu: acoi osaisu vahe Tūpa, tosaidu avei omboetasa seroyasar yuvireco.

5

Yande mbahe-mbahe tēi co ívì pípendar recopisa

¹ Opacatu víroya vahe Jesús Tūpa Rembiporavo Poropísirosar seco rese, ahe Tūpa rahír yuvirecoi. Iyavei osaisu vahe ava, osaisu avei tahír yuvireco.

² Yande yasaisuse Tūpa, yayapose avei iporocuita, ahese yaicua yasaisu avei ava Tūpa rahír yuvirecoi vahe.

³ Yamboavíyese Tūpa porocuita, ahese yamboyecua Tūpa raisusa yaico. Iyavei iporocuita ndahei yavai etepri yapo āgua.

⁴ Esepia, opacatu Tūpa rahír yuvirecoi vahe osecopi mbahe-mbahe tēi ívì pípendar Cristo rese yeroyasa pípe yuvireco.

⁵ Acoi oyeroya vahe Jesucristo Tūpa Rahír secosa rese, ahe oicatu co ívì pípendar mbahe-mbahe tēi recopi āgua yuvireco.

Tūpa rahir recocuer resendar ñehesa

⁶ Co Jesucristo yusa icuasa i pipe ñapiramombrise: ndahei i reseño, suvi rese avei icuasa. Espiritu avei oseco mombehu. Esepia, ahe omombehu mbahe supi eté vahe yepi.

⁷ Evocoyase oime mbosapi imboyecusar:

⁸ Espiritu, i, iyavei suvi. Ahe mbosapi oyoya tupri.

⁹ Yaroya revo ava remimombehu; Tūpa remimombehu rumo aviye catu vahe ité ichui. Esepia niha, ahe Guahir omombehu.

¹⁰ Acoi viroya vahe Tūpa Rahir vireco ité ahe semimombehu opiha pipe. Acoi ndoviroyai vahe rumo Tūpa, semirañete ai vahe nungar tēi vireco. Esepia, ndoviroyai Tūpa ñehese Tahir resendar.

¹¹ Co Tūpa remimombehu: ahe ombou yandeu tecovesa apirēhi vahe. Co tecovesa Tahir rese secoi.

¹² Acoi oipisi vahe Tūpa Rahir opiha pipe, ahe vireco avei co tecovesa. Acoi ndoipisi vahe rumo, ndovirecoi eté tecovesa oyese.

Poromboaracuasa ipa vahe

¹³ Co aicuachía pēu, pe pereco vahe Tūpa Rahir, peicua āgua pe supi eté pereco tecovesa apirēhi.

¹⁴ Yande rumo yayeroya co rese: yaporanduse mbahe rese Tūpa remimbotar rupi chupe, ahese ahe yande ñehese osendu.

¹⁵ Evocoyase yaicuae ahe osendu yande yeruresa, yaicua avei mbahe yande porandusa ombou vaheerā yandeu.

¹⁶ Acoi osepia vahe yande mboetasa Tūpa reroyasar oyemboangaipa vahe, ahe rumo ndahei manosave nara, oyerquirā sese. Evocoyase Tūpa omondora secove āgua chupe. Oime rumo angaipa ahe güeru manosa. Che, “Peyeroqui evocoi nungar angaipa rese” ndahei pēu.

¹⁷ Opacatu mbahe-mbahe tēi ahe angaipa. Oime rumo angaipa ndayande rerasoi vahe manosave.

¹⁸ Yaicua Tūpa rahir ndoyapoi angaipa yuvireco. Esepia, Tahir osāro evocoi nungar. Ichui Carugar ndopocoi sese.

¹⁹ Sese yaicua yande Tūpa rahir yaico. Iyavei opacatu ava ndoviroyai vahe Tūpa, ahe Carugar povri pendar tēi yuvirecoi.

²⁰ Iyavei yaicua Tūpa Rahir ogüeru oaracuasa yandeu Tūpa supi eté vahe cua āgua iyavei yaico co supi eté vahe rese. Ahe niha Tahir Jesucristo, ahe avei Tūpa supi eté vahe iyavei tecovesa apirēhi vahe.

²¹ Che rahireta, peñearo tupri tūpa angahu tēi sui. Aipo rupive co che ñehesa amombehu pēu.

IMOÑUVIRIOSA JUAN REMBICUACHIA SAN JUAN

Mbahe supi eté vahe iyavei yeaisusa

¹ Che, icuapri, aicuachía co che ñehe pëu pe Tüpa rembiporavo peico vahe opacatu eipeve peico vahe upe. Che niha supi eté opoaisu. Ndahei rumo che güeraño opoaisu, opacatu oicua vahe porombohesa supi eté vahe avei pe raisu yuvireco.

² Opoaisu ité mbahe supi eté vahe yande piha pipe yareco vahe rese. Ahe ndopai chivaherã ité.

³ Yande Ru Tüpa, yande Yar Jesucristo, Tüpa Rahir, tombou oporovasasa, oporoparisuerecosa pëu nara. Tombou avei güeco tuprisa, güeco supi eté vahe pipe oporoaisusa pipe avei pëu.

⁴ Che mboviharete aicuase pe pãhu pendar yuvirecoi vahe güecocuier aviyesa pipe. Esepia, ahe viroya porombohesa supi eté vahe yuvireco. Ahe niha yande Ru Tüpa porocuita yandeu.

⁵ Iyavei, che rivireta, che rembiaisu, tayayeaisu catu ñepepei. Co aicuachía vahé ndahei porocuita ipiasu vahe. Ahe niha acoi yipindar icuachiapri pëu.

⁶ Co yande yeaisusa, yande guata tupri ãgua Tüpa porocuita rupi. Co Tüpa porocuita yipisuive pesendu vahe, ahe omombehu yande yeaisu tupri ãgua yandeu.

Iporombopa serai vahe resendar

⁷ Setá vai oguata ivi yacatu rupi oporombopa tēi vahe yuvireco. Ahe, “Jesucristo ou güete reseve” ndehi eté yuvireco. Ahe oporombopa tēi vahe Jesucristo amotarēhimbar yuvirecoi.

⁸ Peñearo catu pe poraviqui repri mocañi tēiēhi ãgua. Tapeipisi catu opacatu Tüpa porerecosa peyeupe nara.

⁹ Oime ava oyepepiño vahe Cristo porombohesa sui. Ahe Tüpa ndovirecoi opiha pipe yuvireco. Acoi oyapisaca tupri vahe Cristo porombohesa rese, ahe vireco Tüpa, Tahir avei oyese.

¹⁰ Acoi oyepotase ava oporombopa tēi vahe pëu, ndovirecoi vahe co porombohesa, ndapeipisii chira pe rētave. Iyavei ndapemboaviravei chiveira.

¹¹ Acoi pemboaviravese, pe avei pehara sembiapo pipe.

Ñehesa ipa vahe

¹² Che niha amombehu pota setá mbahe pëu. Namombehu potai rumo cuachiar pipe. Che teieté aso pota pëu che ñehe ãgua. Ahese yayemboviharetera oyese.

¹³ Iyavei Tüpa rembiporavo oñemonuha vahe cohava opacatu omondo omahenduhasa yuvireco pëu. Aipo rupive co che ñehesa amondo pëu.

IMOMBOSAPISA JUAN REMBICUACHIA SAN JUAN

Gayo recocuer aviye vahe resendar

¹ Che, icuaipri, aicuachía co che ñehe ndeu, che mboripar, che rembiaisu, Gayo. Che supi eté oroaisu yepi.

² Che rembiaisu, che rivri, cūrítei nde recocuer erereco tupri Tūpa rese. Che aheroqui nde rese opacatu nde reco tupri āgua iyavei tipo eme mbaherasisa ndeu.

³ Che aviharete asenduse yande rivri ñehe nde recocuer resendar yugūeruse cohawe. Ahe aipo ehi yuvireco cheu: “Evocoi Gayo oyemoviracua tupri mbahe supi eté vahe pipe” ehi yuvireco ndeu.

⁴ Ndiopoi eté niha ambuae ñehesa asendu vahe che mboviharete catu vahe que che rahireta oguatase co porombohesa supi eté vahe rupi yuvireco.

⁵ Che rivri, che rembiaisu, ereyapo tupri opacatu mbahe yande rivireta upe iyavei ambuae tecua pendar oyepota vahe upe avei.

⁶ Ahe omombehu ore ñemonuhasave opacatu nde poroaisusa resendar yuvireco oreu. Eyapo catu mbahe icatupri vahe; eipitívii catu chupe mbahe ipane vahe rese iguataño āgua Tūpa remimbotar rupi yuvireco.

⁷ Esepia, ahe oguata yuvireco Jesucristo rer pipe. Ndoipisii eté rumo mbahe ipane vahe opitívii āgua yuvireco ava Tūpa reroyasarēhi sui.

⁸ Sese yande ēgüe yahera yaico evocoi nungar upe ñehesa supi eté vahe rese ipitívii āgua.

Diótrefes recocuerai iyavei Demetrio recocuer aviyesa

⁹ Che aicuachía che ñehe eipeve Tūpa upe oñemonuha vahe upe cuese. Diótrefes rumo ndoviroyai ore mborerecuasa. Esepia, ahe oipota rai mborerecuar güeco āgua ipāhuve.

¹⁰ Evocoiyase asose eipeve, amboaracuara opacatu Tūpa viroya vahe rovai sembiapo ai rese. Esepia, ahe oñehe-ñehe tēi ore rese, ndahei ahe güeraño, ndoipisii potai avei güētave yande rivireta oyepota vahe. Iyavei ndoipotai ambuae upe ipisi āgua sētave. Acoi oipisise, omombo voiño ité ñemonuhasa sui.

¹¹ Che rivri, che rembiaisu, ereicoi rene evocoi ava recocuer nungar. Ereicora rumo ava aviye vahe recocuer rupi. Esepia, oyapo vahe mbahe aviye vahe, ahe Tūpa suindar. Acoi oyapo vahe rumo mbahe naporai vahe, ahe ndoicuai vahe Tūpa.

¹² Opacatu, “Demetrio aviye ité” ehi yuvireco. Ahe supi eté aipo ehi; aipo avei ore oromombehu. Pe niha peicuaño ore oromombehu mbahe supi eté vahe.

Ñehesa ipa vahe

¹³ Che niha amombehu pōta setá mbahe ndeu. Namombehu potai rumo cuachiar pipe tēi ndeu.

¹⁴ Esepia, aso pota ité nde repia. Ahese voi yañemoñetara oyeovai eté.

¹⁵ Eico tupri. Yande mboripar coha pendar omondo omahenduhasa yuvireco ndeu. Iyavei, eyapo mbahe icatupri vahe, emombehu nde teieté che mahenduhasa ñepeipei yande mboripareta upe eipeve. Aipo rupive.

JUDAS REMBICUACHIA SAN JUDAS

Judas mahenduhasa Jesús reroyasar upe

¹ Che, Judas, aico Jesucristo rembiguai, Santiago rɨvri. Che aicuachía co che ñehe pëu. Pe niha yande Ru Tüpa rembiaisu semienoi peico. Jesucristo niha pe rãro opacatu mbahe-mbahe tēi sui.

² Tüpa tombou catu pëu pe paraisuerecosa pe reco tupri ãgua pe raisusa pipe.

Oporombohe vahe ava mbopa tēi ãgua resendar

³ Che rivireta, che rembiaisu, yipindar chepihañemoñeta ité yande pīsirosa resendar cuachía ãgua pëu viña. Ipape rumo chepihañemoñeta iri: iyaño revo che aicuachía pe yemoviracua tupri catu ãgua yembohesa yaroya vahe rese. Ahe yembohesa yaroya vahe ñepeí reseve imondopri opacatu yandeu Jesucristo rese yaico vahe.

⁴ Esepia, amove ava iporombopa serai vahe yuviroique mbegüe angahu pe pãhuve. Aracahe suive rumo Tüpa Ñehengagüer icuachiapri pipe omombehu evocoi nungar ava imocañisa tēira yuvireco. Ahe ava ndaseco pōrai vahe, “Tüpa aviye ité, ndoyapoi chietera mbahe yandeu” ehi tiēte yuvireco. Sese oyapoño mbahe tēi. Iyavei, “Jesucristo ndahei yande Rerecuar” ehiño tēi vahe yande Yar ñepeí vahe upe yuvireco.

⁵ Che opomomahenduha pota iri acoi peicua tupri vahe rese. Yipindar yande Yar Tüpa vinoſe yandé ramoí eta Egipto sui. Ipape rumo opa omocañi viroyasarēhi.

⁶ Inungar avei Tüpa rembiguai yipindar vahe yuvirecoi, nomboaviyei vahe ocuaita. Ipipe sui Tüpa osoquenda pītumimbi ndopai vahesave ari cañise nara.

⁷ Iyavei ava Sodoma pendar, Gomorra pendar iyavei ahe tecua ivirindar avei inungar acoi Tüpa rembiguai oyemondo mbahe tēi pipe, ahe avei oyemondo vahe oyemboaguasa-guasa tēi ãgua yuvireco. Iyavei cuimbahe, cuimbahe rese; cuña, cuña rese no. Ipipe sui oiporara tata guasu apirēhi vahe yuvireco. Ahe opita opacatu yande yembosiquiye ãgua.

⁸ Ëgüe ehi avei niha evocoi nungar ava pe pãhu pendar. Esepia, ahe oqueraisa nungar reyoyasa pipe sui tēi omonguiha viteño güecocuer oangaipa pipe. Iyavei ndoviroyai vahe yande Yar mborerecuasa. Ahe avei oñehe-ñehe tēi vahe íva pendar rese yuvireco.

⁹ Aracahe Tüpa rembiguai ivate vahe Miguel oyepoepi-epi Carugar rese yuvireco Moisés retecuer rese. Yepe ahe Tüpa rembiguai rerecuar viña, ndiyai rumo chupe iñehe mara ãgua Carugar upe. Evocoiyase aipo ehi chupe: “¡Tüpa oicuara co rese ndeu!” ehiño.

¹⁰ Evocoi ava pe pãhu pendar rumo oñehe tēiño vahe que mbahe ndosen-ducuai vahe rese yuvireco. Iyavei co mbahe oicua vahe oyesui tēi inungar mbahe mimba ndipihañemoñetai vahe oyesui tēi imbahecua, ahe oiporu yuvireco oyemocañi ãgua tēi.

¹¹ ¡Iparaisu yuvireco! Cañi recocuer rupi tupri avei oyapo mbahe yuvireco. Inungar Balaam guarepochi pota raisave tēi oyavi güeco yuvireco. Inungar Coré omano oporeroyaēhisa pipe.

¹² Pe peñemonuhase pe yeaisusa pipe pe caru ãgua, ahese ahe avei yuviroique pe pãhuve; noyuvinochi eté ocaru ãgua pe piri. Ndapeicuai rumo ahe pe recocuer monguiha ãgua tēi yuviroique vahe pe pãhuve. Evocoi inungar ovesa rãrosar oyese tēi ihañeco vahe yuvireco. Iyavei ahe inungar iva quihã ndovirecoi vahe i, ivitu remimombo tēi. Ahe avei inungar ivira ndihai vahe ohasa rupi, ipiru vahe, evocoyase ahe sapohopri.

¹³ Inungar avei acoi iai pipe itu omombo tiyui vahe oyesui yepi. Ēgüe ehi avei evocoi mbia rembiapo poromochisa. Iyavei inungar yasitata amove omocañi vahe guaper co coti tēi oso pitumimbisave, ēgüe ehi aveira ava Tupa sui oyepepi vahe pitumimbisa apirēhive secocuer yuvirecoi.

¹⁴ Iyavei Enoc, Adán raquicuerindar imboseisa rupi oyesu vahe, ahe oñehe evocoi nungar ava naporai vahe recocuer resendar rese aracahe aipo ehi: “Co che asepia che queraisa nungar pipe yande Yar turi iva pendar rehii reseve

¹⁵ opacatu ava recoãha ãgua iyavei icañi mombehu ãgua opacatu mbahe-mbahe tēi aposar upe, opacatu oñehe-ñehe tēi yamotarēhisave yuvirecoi vahe upe avei” ehi.

¹⁶ Ahe mbia niha oporoviroiro yuvireco. Iyavei oseca oyeupe nara mbahe güemimbotar tēi apo ãgua. Ahe oyemboivate ai vahe oñehe pipe tēi yuvireco. Iyavei oñehe tupri ai angahu tēi ambuae ava upe imbahe rerocua ãgua ichui.

Jesús reroyasar pendar poromboaracuasa

¹⁷ Pe rumo, che rivireta, che rembiaisu, peyemomahenduha acoi yande Yar Jesucristo apóstol ñehengagüer rese

¹⁸ aipo ehi vahe: “Co ari cañi renonde oimera ava viroiro ai vahe Tupa rembiapo yuvireco. Iyavei oyapoño itera güemimbotarai yuvireco” ehi vahe.

¹⁹ Ahe ava niha omboyaho-yaho ucara ava Jesús reroyasar yuvireco. Güecocuer ivi pipendar tēi vireco vahe. Ahe niha ndovirecoi Tupa Espiritu yuvireco.

²⁰ Pe rumo, che rivireta, che rembiaisu, peyemoviracua pe poreroyasa maranehi vahe rese. Iyavei peyeroqui Espiritu Santo pe rãrosa pipe.

²¹ Peñearo tupri Tupa pe raisusa pipe. Iyavei pesãro viteño yande Yar Jesucristo yande paraisuerecosa pipe tecovesa ndopai vahe mondo ãgua yandeu.

²² Pesaisu ava ndoviroya tupri vahe Jesús.

²³ Amove ava pesecoreroyevi voi icañi rãgüer sui. Ambuae peiparaisuereco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepeí yangaipa pipe pe viapiēhi ãgua.

Tupa mboetei tupri sa

²⁴⁻²⁵ Tupa yande Pisirosar ñepeí vahe vireco pīratasa pe rãro angaipa pipe pe viapiēhi ãgua. Ahe avei pe rrecora güecocuer porañetesave pe reco angaipaēhisa pipe. Ichui peicora pe viharetesa pipe. Ahe imboeteipri tasecoi. Ēgüe tehi timboyeroyasa seco pīratasa iyavei imborerecuasa yande Yar Jesucristo sui, yipisui, cūritei apirēhi vahe rã.

TŪPA REMIMBOYECUA JUAN UPE APOCALIPSIS

Jesucristo yemoporēhisa

¹ Che, Juan, aicuachía mbahe imboaviye pihaiVIPirã pēu acoi Tūpa omboyecua vahe Guahir Jesucristo upe ‘tomboyecua oviroyasar yuvirecoi vahe upe’ oyapave. Ahe niha Jesucristo oicua uca Vu rembiguai pīpe imboyecua uca āgua güembiguai che recose cheu.

² Che supi eté amombehu opacatu mbahe asepia vahecuer iyavei amombehu evocoi Tūpa Ñhengagüer acoi Jesucristo oicua uca tupri vahe mbahe supi eté vahe.

³ Sorivete catura acoi ava oyerōqui vahe co Tūpa suindar ñehesa rese, acoi ava oyapisaca tupri vahe sese, viroya vahe avei icuachiapri pīpendar yuvireco. Esepia, ari cañi viroví ité yandeu.

Juan oicuachía siete tecua pendar Jesús reroyasar ñemonuhasa upe

⁴ Che, Juan, aicuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tuprisa Tūpa suindar, ahe yipivé vahe ité, cūrteindar apirēhi vahe avei; siete espíritu suindar avei no, ahe senda rovai yuvino hai vahe,

⁵ iyavei Jesucristo suindar, evocoi omombehu tupri vahe ñehesa supi vahe. Ahe acoi yipindar ocuerayevi vahe iyavei mborerecuar ivate catu vahe secoi opacatu ambuae-ae tēi mborerecuar sui. Ahe yande raisu iyavei yande pīsiro yande angaipa sui vuví pīpe,

⁶ iyavei yande rereco mborerecuarã, pahiguã avei no Vu Tūpa upe yande poraviqui āgua. ¡Ēgüe tehi imboeteipri tasecoi opīratasa pīpe apirēhi vahe rē!

⁷ ¡Esepia, Cristo íva quiha rese oura curi!

Ahese opacatu ava osepiara yuvireco, yamotarēhisarer, oicutu vahecuer avei.

Iyavei opacatu tecua ivi pīpendar ahese oyaseho tēira yuvireco sepiase.

Ēgüe ehi etera curi.

⁸ “Che aico yipindar iyavei ipandar” aipo ehi yande Yar Tūpa opacatu mbahe mboavaisarēhi evocoi yipivé vahe ité, cūrteindar apirēhi vahe avei.

Juan osepia oquer nungar pīpe Jesucristo porañetesa

⁹ Che, Juan, pe riquehir aico, iyavei che pe nungar Tūpa povri pendar aico, cheparaisu avei vichico Jesucristo rese che recosave che ñemosasa pīpe. Che roquendasa vichico caha pāhumi para guasu avíterve Patmos serer vahesave Tūpa Ñhengagüer mombehusa pīpe sui tēi, Jesucristo recocuer mombehusa pīpe sui tēi avei no.

¹⁰ Acoi yande Yar ari pīpe Espíritu povrive aicose, asendu che raquicuei oñehe pīrata vahe aviye acoi mimbí ñehe

¹¹ aipo ehi: “Eicuachía mbahe erese pia vahe. Ipare emondopa siete tecua pendar che reroyasar ivi Asia rupindar upe: Efeso ve, Esmirna ve, Pérgamo ve, Tiatira ve, Sardis ve, Filadelfia ve, ipa Laodicea ve” ehi cheu.

¹² Che evocoyase ayemboyere sese ‘¿ava pīha oñehe cheu?’ che yapave. Ahese asepia siete tupri vera hi oro apopri,

¹³ iyavei asepia ipãhuve mbia aviye tupri ava ité viña, iturucuar pucucuer ipi rupi tupri ité sese, sumbicuasa evocoiyase oro apopri ipochiha rupi tupri ité oyepota.

¹⁴ Iha morochí inungar acoi mbahe saviyu vahe, inungar avei yesapi ñapirata morochí vahe, sesa evocoiyase aviye tupri ité tata rendigüer.

¹⁵ Ipi evocoiyase sendi yai eté, aviye acoi bronca ocai vahe horno pipe, iyavei iñehe ipĩratá iteanga inungar itu riapugüer.

¹⁶ Oacato coti vireco siete tupri yasitata, iyavei iyuru sui osê quise pucu saimbe yoya vahe. Sova evocoiyase aviye ari rendigüer ipĩratá vahe.

¹⁷ Sepia ramoseve, aviapi ipive inungar omano vahe. Ahe rumo omondo opo oacato coti che rese aipo ehi cheu: “Nderesiquiyei chira. Esepia, che yipindar ité aico, ipandar avei.

¹⁸ Aicove vahe ité; yepe amano viña, cūritei rumo aicove iri ndopai chiva-herā ité aico. Che areco che mborerecuasa ava recocuer mocañi āgua.

¹⁹ Sese eicuachía co mbahe eresepia vahe: cūriteindar oime vahe mbahe iyavei mbahe oime vaheerā curi.

²⁰ Co acoi ndereicuai vahe eresepia vahe siete yasitata che acato coti, ahe yuvirecoi Tūpa rembiguai siete tecua rupindar che reroyasar rārosar; evocoiyase vera hi oro apopri, ahe yuvirecoi siete tupri tecua pipendar che reroyasar” ehi.

2

Ñehesa siete tupri tecua-tecua pendar Jesús reroyasar upe. Ñehesa Efeso pendar upe

¹ “Eicuachía Tūpa rembiguai Efeso pendar che reroyasar rārosar upe: ‘Acoi vireco vahe oacato coti siete yasitata, ahe acoi oguata vahe siete vera hi yacatu rupi, aipo ehi imombehu:

² Che aicua opacatu mbahe pe rembiapo, pe poraviqui pĩratasa iyavei pe yemoviracuasa. Aicua avei ndapeipotai ava naporai vahe pe pãhuve yuvirecoi vaheerā. Pesecoãha avei ava, ore apóstol oroico, ehi tēi vahe; ipare peicua iporombopa tēisa yuvireco.

³ Che aicua peñemosaño peyemombaraisu peico che raisupave; ndapecuerai eté ipipe.

⁴ Che rumo aicua oime mbahe ndahei vahe che piha rupi pe recocuer: ndapeyeaisu iri inungar yipindar.

⁵ Sese peyemomahenduha yipindar pe recocuer aviye vahe rese; pemboasi mbahe pe rembiapo, peyevi Tūpa upe; peyeaisu iri catu inungar yipindar. Anise ayevira pēu, arocuapara pe vera hi senda sui acoi ndapeyeviise Tūpa upe.

⁶ Co rumo mbahe pe rembiapo aviye cheu: ndapeipotaise nicolaítas rembiapo mbahe. Che avei niha ndaipotai eté.

⁷ ¡Acoi osendu pota vahe, toyapisacaño Espiritu omombehu vahe rese opacatu che reroyasar upe! Acoi oyemoviracua vahe mbahe-mbahe tēi apoēhi āgua, itohu amondora ivira ha tecovesa resendar oime vahe teco orisave che Ru piri, ehi’ erera icuachía chupe.

Ñehesa Esmirna pendar upe

⁸ “Eicuachía avei Tūpa rembiguai Esmirna pendar che reroyasareta rārosar upe: ‘Acoi yipindar vahe, ipandar avei; ahe acoi omano vahe viña, ocuer-avei iri rumo. Ahe ombou co ñehesa pēu aipo ehi:

⁹ Che aicua pe yemombaraisusa, pe paraisusa avei; pe rumo mbahe yar nungar ité peico iva pendar mbahe rese. Aicua avei pe rese ava semira tēi vahe, ore Tūpa rembiporavo judío oroico, ehi tēi vahe. Ndahei rumo ahe yuvirecoi. Esepia, Carugar reroyasar tēi evocoi yuvirecoi.

¹⁰ Ndapesiquiyei chira pe paraisu āgua sui. Esepia, Carugar osoquenda ucara amove pe pāhu pendar secoāha āgua; pe paraisu rane itera niha diez ari rupi peico. Acoi peyemoviracua tuprise ité chupe, Cristo rese ité amanora, pe hesave, ahese amondora porerecosa tecovesa pēu.

¹¹ ¡Acoi osendu pota vahe, toyapisacaño Espiritu omombehu vahe rese opacatu che reroyasar upe! Acoi ava oyemoviracua vahe mbahe-mbahe tēi apoēhi āgua, ahe imanore ihā ndoiporarai chira imoñuviriosa manosa pīpe, ehi' erera icuachía chupe.

Ñehesa Pérgamo pendar upe

¹² “Eicuachía avei Tūpa rembiguai Pérgamo pendar che reroyasareta rārosar upe: ‘Aipo ehi acoi vireco vahe quise pucu saimbe yoya vahe:

¹³ Che aicua pe recosa. Aheve acoi Carugar oguapí oī; mborerecuar guasu nungar imboyeroyapri seci. Pe rumo peyemoviracuaño ité chupe che recocuer rese peico. Ndapeseyai eté che rese pe yeroyasa yepe oyuca tēi che recocuer mombehu tuprisar Antipas evocoi tecua Carugar recosave.

¹⁴ Che rumo aicua mbahe pe resendar: eipeve amove ava ndoyepéi potai eté Balaam porombohesa sui yuvireco. Ahe omboaracua Balac israelita mboangaipa uca āgua, toyuvirohuño mbahe roho seropovēhepri mbahe rahanga upendar tēi, oya, iyavei, toyemboaguasaño yuvireco, oyapave avei.

¹⁵ Iyavei amove ava pe pāhuve ndoyepéi potai eté nicolaíta porombohesa sui yuvireco.

¹⁶ Sese pemboasi pe recocuerai, peyevi Tūpa upe, anise che aso poyava voira pēu, ahese avavara chupe yuvireco che yuru pīpe sui osē vahe quise pucu pīpe, ehi.

¹⁷ ¡Acoi ava osendu pota vahe, toyapisacaño Espiritu omombehu vahe rese che reroyasar yuvirecoi vahe upe! Acoi ava oyemoviracua vahe mbahe-mbahe tēi apoēhi āgua, semihura amondora ndasepiasai vahe maná. Iyavei amondora ita morochi vahe chupe. Ahe ita rese icuachiasara terer ipiasu vahe oī, evocoi ava oipisi vahe güeraño oicuará, ehi' erera icuachía.

Ñehesa Tiatira pendar upe

¹⁸ “Eicuachía avei Tūpa rembiguai Tiatira pendar che reroyasareta rārosar upe: ‘Tūpa Rahir acoi vireco vahe güesa inungar tata rendigüer, ipi avei inungar acoi bronce rapipri aipo ehi imombehu:

¹⁹ Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosa iyavei pe yemoviracuasa. Aicua avei yipindar sui mbahe peyapo catú avīye vahe.

²⁰ Oime rumo mbahe pe rembiavi: peñemosañño evocoi cuña Jezabel pe pāhu pendar upe, ahe acoi oñehe tēi angahu vahe Tūpa rese viña. Ahe rumo ombopa tēi oporombohesa pīpe che rembiguai iyemboaguasa-guasa tēi uca āgua sereco iyavei ohu uca mbahe roho mbahe rahanga tēi upe seropovēhepri yuvireco chupe.

²¹ Che amondo vite tēi ari chupe, tomboasi oangaipa Tūpa upe oyevi āgua, che yapave viña. Ahe rumo ndopoi potai eté oyemboaguasa tēisa sui.

²² Evocoyase cūrīteī che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñaro potaise ité yuvireco.

²³ Ipare ayucapara imembri ichui. Ēgüe ehi opacatu che reroyasar oicuaru yuvireco che aicua tupri ité opacatu ava piñahemoñetas iyavei ñepeī-peī pe yacatu amondora pe rembiapogüer repri pëu.

²⁴ Pe rumo opacatu Tiatira pendar ndaperoyai vahe co porombohe raisa iyavei ndapeyemboheī vahe Carugar suindar aracuasa, ndicuasai yavai vahe, ehi vahe rese, pëu ndarecoi que ambuae che porocuita.

²⁵ Peyemoviracuañora rumo evocoi mbahe pereco vahe rese, acoi che ayeise voi vitu curi.

²⁶ Acoi ava oyemoviracua vahe mbahe-mbahe tēi apoēhi āgua, oyapo vahe che remimbotar mano rupi eté, chupe amondora mborerecurar seco āgua opacatu ivi rupi

²⁷ inungar che Ru ombou che mborerecurar cheu; ēgüe ehi aveira oporocuai opacatu tecua rupi inungar acoi vara guarepochi, mbahe riapiipa uca āgua, aviyera acoi mahemoinda ñaihu apopri viña.

²⁸ Iyavei amondora yasitata cōhe rerusar chupe.

²⁹ ¡Acoi ava osendu pota vahe, toyapisacaño Espiritu omombehu vahe rese opacatu che reroyasar yuvirecoi vahe upe! ehi' erera icuachía.

3

Ñehesa Sardis pendar upe

¹ “Eicuachía avei Tüpa rembiguai Sardis pendar che reroyasareta rārosar upe: ‘Acoi ava vireco vahe siete tupri Tüpa espíritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepe amove ava, Co mbia yuvirecoi vahe ité Tüpa upe nara, ehi pëu viña; omano vahe nungar tēi rumo peico.

² Peyemopoase catu peico iyavei pemonguerēhi catu acoi viroya vite vahe. Esepia, oyepepīpa pota ité yuvireco viña. Supi eté mbahe pe rembiapo che Ru rovaque, ndaheī supi tupri vahe.

³ Peyemomahenduha acoi porombohesa peipisi vahe rese; pepoi rene ichui. Peyevi catu Tüpa upe. Ndapeyemopoaseise rumo, asora pëu inungar imonda rai vahe, ēgüe ahera vicho pe resapiha.

⁴ Oime rumo amove ava pe pāhu pendar ndoyapoi eté angaipa yuvireco, evocoyase inungar ava oguata vahe oturucuar morochi vahe rese, ēgüe ehi aveira ahe güeco maranehi piṑpe oguata che rupi yuvireco. Esepia, ahe chupe iya ité.

⁵ Acoi ava oyemoviracua vahe mbahe-mbahe tēi apoēhi āgua, ahe sese imondesara turucuar morochi vahe. Ahe serer namboyehoi chira cuachiar tecovesa resendar piṑpe sui, asenoira rumo che Ru rovai iyavei sembiguaī eta rovaque avei curi.

⁶ ¡Acoi ava osendu pota vahe, toyapisacaño Espiritu omombehu vahe rese che reroyasar yuvirecoi vahe upe! ehi' erera icuachía.

Ñehesa Filadelfia pendar upe

⁷ “Eicuachía avei Tüpa rembiguai Filadelfia pendar che reroyasareta rārosar upe: ‘Co seco maranehi vahe, supi tupri vahe ité, vireco vahe mborecuasa aracahendar mborerecurar guasu David nungar, acoi omboise que oquenda, ñepeī yepe que ava nomboyai chietera; iyavei acoi omboyase, ñepeī yepe que ava nomboī chiete aveira, ahe aipo ehi:

⁸ Che rumo aicua mbahe opacatu pe rembiapo. Esepia, che amondo pe rovaque inungar oquenda imboipri; pëu pemombehu vaheerā che recocuer. Ahe que ñepeí yepe ava nomboyai chietera yuvireco. Esepia, yepe pe nipirata tuprii vahe, peroya ité rumo che ñehe iyavei ndacheñomi eté ava sui peye.

⁹ Co Carugar reroyasar semira tēi vahe, ore Tūpa rembiporavo judío oroico, ehi tēi vahe, ndahei rumo ahe eté vahe yuvirecoi. Ahe amoñenopihapa ucara pe rovai, toicua yuvireco che pe raisusa, che yapave.

¹⁰ Esepia, peroya ité che porocuaíta, peyemoviracua ité evocoi mbahe tēi upe peico. Evocoiyase che opoepira acoi ari tecoãhasa ouse opacatu ivi rupindar upe curi.

¹¹ Ayeví poyavara. Peyemoviracua catu Tūpa reroyasa pereco vahe rese. Evocoiyase ñepeí yepe que ava ndovirocuai chietera Tūpa suindar porerecosa pe sui.

¹² Acoi oyemoviracua vahe mbahe-mbahe tēi apoēhi āgua yuvireco, ahe che Ru piri nara ité yuvirecoira. Ahe evocoiyase inungar-ra che Ru Tūpa rēta vīracuasa ndopai vahe yuvireco. Sese arova ucara che Ru Tūpa rer iyavei che Ru Tūpa recua rer avei no, ahe Jerusalén piasu, evocoi ou vaheerā iva pendar che Ru Tūpa sui, iyavei che rer ipiasu vahe ité arovava sese no.

¹³ ¡Acoi ava osendu pota vahe, toyapisacaño Espiritu remimombehugüer rese che reroyasareta upe! ehi' erera icuachía.

Ñehesa Laodicea pendar upe

¹⁴ “Eicuachía avei Tūpa rembiguai Laodicea pendar che reroyasareta rārosar upe: ‘Evocoi seco tupri vahe, omombehu vahe mbahe supi tupri vahe ité, ahe ichui oime opacatu Tūpa rembiapo, ahe aipo ehi:

¹⁵⁻¹⁶ Che aicua mbahe opacatu pe rembiapo. Pe inungar i ndahei sōhisa vahe iyavei ndahei sacu vahe. I sacu raimi tēi vahe nungar peico pe rembiapo pipe. ¡Ñepeí reseve vahe rumo aipota, ndahei iguayí tēi vahe! Pe recocuer rumo iguayí tēi vahe nungar, sese opomboyeviñora cheyesui.

¹⁷ Esepia, pepihañemoñeta: Che mbahe yar ité, opacatu mbahe areco, nipanei eté mbahe cheu, peye viña. Pe rumo ndapeicuai pe paraísusa che Ru rovaque inungar ndasesapisoi vahe peico. Iyavei ndapeyavií nditurucuai vahe peico.

¹⁸ Sese opomboaracua; peseca iva pendar oro tatave imoatiropri nungar che sui pe paraísuehi iri āgua che Ru rovaque; peseca avei turucuar morochi vahe teco tuprisa peyeupe che suindar nani tupri vahe nungar pipe pe recoēhi āgua, pe chīēhi āgua avei iyavei inungar ava oseca mosa güesa upe nara osareco iri āgua, ēgüe peye aveira.

¹⁹ Che añehe pīrata seco mohivi āgua che rembiaisu upe yepi. Peyemonguerēhi catu, pemboasi ité pe recocuer che Ru Tūpa upe pe yevi āgua.

²⁰ Esepia, inungar que ava oquenda omotara oquendipive ohā viña, ēgüe ahe pe pihave vichico; pesenduse che ñehe, pemboira cheu. Che evocoiyase aikuera pe piri, yacarura oyepiri.

²¹ Acoi ava oyemoviracua vahe mbahe-mbahe tēi apoēhi āgua yuvireco, ahe amboguapí ucara che ipive imoi che porocuaisave, inungar che mbahe tēi reco roroyí pare, aguapí che Ru ipive vīte.

²² ¡Acoi ava osendu pota vahe, toyapisacaño Espiritu remimombehugüer rese che reroyasareta upe! ehi imombehu pëu' erera icuachía” ehi Jesús cheu.

4

Tūpa mboeteisa ivave

¹ Ipare asepia mbahe inungar oquenda oyemboi vahe ivave. Ahese evocoi ñehesa ipīrata vahe mimbī nungar yipīndar oñehe vahe cheu, ahe asendu iri: “Eyeupi ave. Che evocoiyase mbahe amboyecuara ndeu mbahe imboaviyepirā curi” ehi.

² Ahe pipeve voi, Espiritu pīratasa pipe aico iyavei asepia tenda ivave, ahe iharive ñepepi uguapi oi.

³ Co uguapi vahe ndoyavii eté ita jaspe porañetesa iyavei ndoyavii coralina porañetesa no. Iyavei oime oyere tupri vahe tenda rese inungar arco iris sendí vahe, inungar esmeralda.

⁴ Iyavei asepia evocoi rese oyere tupri ambuae veinticuatro tenda, ahe iharive uguapi yuvinoi veinticuatro avei icuaipri yuvirecoi vahe; iturucuar morochi vahe yuvireco iyavei oāca rese omboyere tupri oro apopri yuvireco.

⁵ Evocoiyase Tūpa renda sui yuvinose overa-vera vahe, iyavei siapu guasu vahe, osunu vahe no; iyavei siete tupri tataendi sendipa yuvireco evocoi tenda rovai, ahe co siete tupri Tūpa espíritu.

⁶ Evocoi tenda rovai oime avei ndoyavii tupri para guasu tīpiu vahe oyecua tupri vahe mbahe ipipe.

Ambuae tenda pāhu rupi oyere tupri Tūpa renda rese irungatu iva pendar yuvirecove vahe, ahe sesa oyere tupri vahe sese, ahe osareco tupri vahe güenonera, guaquicuei coti avei no.

⁷ Yipīndar yuvirecove vahe pāhu pendar ahe ndoyavii tupri yagua pīta; saquicuerindar ndoyavii tupri guaca cuimbahe; imombosapisa ndoyavii eté ava; imoirungatusa cute ndoyavii vira guasu oveve vahe.

⁸ Evocoi iva pendar irungatu yuvirecove vahe vireco oyacatu seis tupri opepo yuvireco iyavei vireco opacatu güete rese güesa. Ndopituhui eté ari, pītu rupi aipo ehi yuvireco:

“¡Santo, santo, santo ité secoi, yande Yar Tūpa ité, ahe mbahe mboavaisarēhi, yipivé vahe ité, cūriteindar, apirēhi vahe!” ehi yuvireco.

⁹ Evocoi yuvirecove vahe omboetei yuvireco, “Aviye ndeu” ehi co uguapi vahe oi tenda harive ndopai vahe upe.

¹⁰ Ēgüe ehise evocoiyase veinticuatro tupri icuaipri yuvirecoi vahe, ahe oñenopiha imboeteisa pipe sovai yuvireco. Ipare osequi oāca resendar oyere tupri vahe omborerecuasa resendar sovai aipo ehi:

¹¹ “Ore Yar Tūpa, iya ité nde mboeteisa, ndeu sapucaisa nde pīratasa rese. Esepia, nde ereyapo vahe mbahe opacatu; nde remimbotar rupi niha oime opacatu mbahe” ehi yuvireco chupe.

5

Ovesami upe güeraño iyacatu cuachiar imboyapri mboi āgua

¹ Che asepia cuachiar Tūpa vireco vahe oacato coti, icuachiapri ipipe coti, ocar coti avei no, imboyapri siete sello pipe.

² Ipare asepia Tūpa rembiguai seco ivate vahe, ahe oporandu pīrata oico aipo ehi: “¿Ava upe vo iya cuachiar mboi āgua iyavei sello imboyeroyapri mondoro āgua no?” ehi.

³ Ndipoi eté rumo que iva pendar, ivi pipendar, ivivri pendar oicatu vahe rā cuachiar pipira sepia āgua viña.

⁴ Evocoyase che ayasehó iteanga. Esepia, ndipoi eté que ñepei yepe oime angara aviye vahe cuachiar pipira sepia água viña.

⁵ Ahese icuaipri páhu pendar ñepei aipo ehi cheu: “Ereyaseho iri eme. Esepia niha, evocoi ava yagua pñta vahe vahe chupe, Judá suindar, acoi mborerecuar guasu David suindar avei, ahe niha Carugar osecoreroyi. Sese iya ité chupe siete sello monodoro cuachiar pipira água” ehi.

⁶ Evocoyase, asepia Tūpa rovai íva pendar irungatu yuvirecove vahe páhuve, icuaipri yuvirecoi vahe mbiterve, ñepei ava Ovesami nungar ihái, aviye seropovēhepri. Ahe niha vireco siete tupri sáchi, siete tupri avei sesa; sesa evocoyase siete tupri Tūpa espíritu yuvirecoi opacatu ívi rupi imboguatapri.

⁷ Ipare evocoi Ovesami oso, oipisi cuachiar evocoi tenda harive oguapi vahe yacato coti sui;

⁸ ipisi pare, evocoi irungatu yuvirecove vahe, iyavei veinticuatro tupri icuaipri, ahe oñenophapa Ovesami rovai yuvireco. Oyacatu ñepei-peí vireco arpa yuvireco, itaisi riru oro apopri, ahe avei vireco yuvireco, ahe itaisi niha Tūpa reroyasar yeruresa.

⁹ Osapucaí ipiasu vahe sapucaisa pipe aipo ehi yuvireco:

“Ndeu iyacatu ité cuachiar pisi água, imboyapri monodoro água avei no.

Esepia niha, nde yucapri seropovēhepri ereico.

Evocoyase nde ruví pipe eremboepipa Tūpa upe nara opacatu ava ambuae-ae tēi vahe, ñehe ambuae-ae tēi vahe avei, ñepei-peí tecua yacatu rupindar, ívi rupindar avei yuvireco.

¹⁰ Iyavei eremborerecua uca Tūpa upe nara, erembopahi uca avei no, ipare ahe oporocuaíra opacatu ívi rupi yuvireco” ehi osapucaí yuvireco.

¹¹ Ipare asepia, asendu avei Tūpa rembiguai rehi ñehe evocoi oyere tupri vahe tenda rese yuvireco, iyavei evocoi yuvirecove vahe ñehe, icuaipri ñehe avei asendu setá iteanga yuvirecoi.

¹² Ahe aipo ehi pírata yuvireco no:

“¡Co Ovesami yucapírer, ahe chupe iyacatu ité mborerecuasa pisi água, opacatu Tūpa suindar porerecosa pisi água, mbahecuasa, pírata, mboyeroyasa, poromboeteisa, iyavei sapucaisa pisi água avei no!” ehi.

¹³ Ahese asendu avei opacatu Tūpa rembiapo ívave yuvirecoi vahe, ívi pipendar, ívivri rupindar iyavei para guasu pipendar, aipo ehi yuvireco:

“¡Toime sapucaisa, Tūpa upendar mboyeroyasa, imboeteisa, iyavei pírata, ahe timondosa apirēhi vaherā Tūpa acoi güendave oguapi vahe upe, Tahír Ovesami nungar upe avei no!” ehi.

¹⁴ Evocoi irungatu ava yuvirecove vahe, “¡Ēgüe tehi eté!” ehi yuvireco. Iyavei icuaipri veinticuatro tupri yuvirecoi vahe, ahe oñenopiha yuvireco sovai imboeteisave.

6

Siete sello

¹ Ipare asepia acoi Ovesami omonodoro yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe páhu pendar oñehe pírata. Ñehe ndoyavíi osunu vahe, “¡Erio!” ehi cheu.

² Ahese asepia cavayu morochi vahe, ahe ava ihari pendar vireco virapar. Chupe omondo yeguaca yuvireco. Ĕgüe ehi ahe osë seco pĩrata catu vahe ava recó reroyi āgua.

³ Omondorose acoi Ovesami imoñuviriosa sello, ahese asendu imoñuviriosa yuvirecove vahe pāhu pendar ñehe, “¡Erio!” ehi vahe cheu.

⁴ Ipare osë cavayu pĩra vahe, ahe ava ihari pendar oipisi pĩratasa mbahe tuprisa rerocua āgua ivi pĩpendar ava sui ‘toyeyuca-yuca tēi yuvireco’ oypave. Ipare imondosa quise pucu chupe.

⁵ Omondorose acoi Ovesami imombosapisa sello, ahese asendu imombosapisa yuvirecove vahe pāhu pendar ñehe, “¡Erio!” ehi vahe cheu. Amahe sese, ipare asepia cavayu sū vahe, ahe ava ihari pendar vireco opo pipe mbahe rāhasa.

⁶ Ipare asendu yuvirecove vahe cotindar ñehe, ahe aipo ehi: ‘Nēpei kilo trigo serocuasa guarepochi ñepei ari resendar mboraviqui repri pipe, mbosapi kilo cebada evocoyase serocuasa avei ñepei ari resendar mboraviqui repri pipe no. Pemocañi eme mbahe quira iyavei uva ricuer avei no’ ehi.

⁷ Evocoi Ovesami omondorose imoirungatusa sello, ahese asendu ava imoirungatusa ñehe aipo ehi: “¡Erio!” ehi cheu.

⁸ Amahe, ipare asepia cavayu iyu rasi vahe, ahe ava ihari pendar serer Tehōgüer. Ipare saquicuei ou vahe oico ahe serer Omano-vahe-recosa. Ahe chupe yuvireco imondosa teco pĩratasa ivi imoirungatusa yahocuer rupi iguata āgua ava yuca āgua vavasa pipe, tieporēhi pipe, mbaherasi pipe, mbahe ipi pipe avei no.

⁹ Evocoi Ovesami omondorose imbopoyandeposa sello, ahese asepia mbahe seropovēhepri rendavrive ava hã, ahe yucasa vahe yuvireco Tūpa Ñehengagüer mombehusa sui tēi iyavei Jesús reyoyasa sui tēi avei no.

¹⁰ Ahe aipo ehi pĩrata yuvireco: “Ore Yar Tūpa seco maranehi, supi tupri vahe, ¿mbahese vo eremombaraisura ore yucasarer yuvirecoi vahe ivi pĩpendar ore repisave?” ehi yuvireco.

¹¹ Ipare imondosa iyacatu turucuar morochi vahe chupe, ahese aipo ehi: “Pepituhu vite rane, tayaviyepa rane pe rivireta retacuer Cristo upendar mbahe aposa pipe yucapri pe nungar yuvireco” ehi.

¹² Ipare Ovesami omondorose imoñepei ovasa sello, ahese oime ivi riri ipĩratá vahe. Ari evocoyase sū, aviye acoi turucuar sū vahe mano sendar yemondesa iyavei yasi pĩrá inungar tuvi,

¹³ yasitata evocoyase opa oviapi iva sui ivi rese yuvireco no inungar acoi higo hacri ombosururu vahe ivitu ai yepi.

¹⁴ Ahese iva ndoyecua iri cute inungar acoi cuachiar yeapoapipri vahe, opacatu tupri avei ivitri, caha pāhu avei no osiri güenda sui yuvireco.

¹⁵ Mborerecuareta avei co ivi pĩpendar yuvirecoi vahe opa tēi oñemi mbahecuar pipe yuvireco, ita guasu pāhu rupi avei yuvireco no, oyoya guasu seco ivate vahe, sundao rerecuareta, mbahe yar seco pĩratá vahe, iyavei opacatú tupri mbiguai eta, ava ndahei vahe mbiguai avei;

¹⁶ iyavei aipo ehi yuvireco ivitri upe, itape guasu upe avei no, “¡Eviapi ore harive, toroñemipa tēi Tūpa sui iyavei Ovesami sui acoi ombou vahe co poronupasa ipĩrata vahe oreu!

¹⁷ Esepia, oyepota ité Tūpa ñemoirosa oreu. Ndipoi chietera ava oye-moviracua tupri vahe oyese chupe” ehi yuvireco.

7

Israel suindar iporavopri yuvirecoi vahe

¹ Ipare asepia irungatu tupri Tūpa rembiguai iva pendar yuvinochai vahe irohī coti, norte coti, ari sēsa coti, caharu coti avei no omombituhu tupri vahe irungatu ivitu yuvirecoi vahe ivi hari rupi ipeyuēhi āgua, que para guasu pipe angara viña, que ñepepe yepi ivira ro angara viña no.

² Ipare asepia avei ambuae Tūpa rembiguai iva pendar ou vahe ari sēsa coti sui, ahe vireco oyese Tūpa oicove vahe rer mondose. Ahe niha osapucai pīratá evocoi irungatu tupri Tūpa rembiguai iva pendar yuvirecoi vahe upe, oipisi vahe pīratasa ivi, para guasu momara āgua yuvireco, aipo ehi:

³ “¡Ndapemomara vitei chira rumo ivi, para guasu avei, ivira avei no, co ndoromondo viteiseve ava Tūpa rembiguai eta upe isiva rese Tūpa rer icuachiapri!” ehi.

⁴ Ipare asendu Tūpa rer oipisi vahe retacuer: ciento cuarenta y cuatro mil tupri, evocoi opacatu doce judío ramoi suindar pāhu sui iporavopri yuvireco.

⁵ Doce mil tupri yuvirecoi iporavopri Judá suindar, doce mil tupri Rubén suindar, doce mil tupri Gad suindar,

⁶ doce mil tupri Aser suindar, doce mil tupri Neftalí suindar, doce mil tupri Manasés suindar,

⁷ doce mil tupri Simeón suindar, doce mil tupri Leví suindar, doce mil tupri Isacar suindar,

⁸ doce mil tupri Zabulón suindar, doce mil tupri José suindar, ipa evocoyase doce mil tupri Benjamín suindar.

Ava rehi iturucuar morochi vahe

⁹ Ipare asepia setá iteanga ava, opacatu ivi rupindar, ambuae-ae tēi vahe, ambuae-ae tēi vahe iñehe yuvireco iyavei secua ambuae vahe avei no. Ahe opūhapa vahe Tūpa rovai Ovesami rovai avei yuvireco no, ahe ndayaicatui eté ipapapa āgua. Esepia, setá etepri yuvireco iyavei iturucuar morochi vahe pāve; pindo-pindomi vireco opove yuvireco no.

¹⁰ Ipare opacatú guasu oñehe pīrata yuvireco aipo ehi:

“¡Poropisirosa yande Ru Tūpa suindar, ahe oguapi vahe oī güendave, iyavei Ovesami suindar avei no!” ehi.

¹¹ Iyavei opacatu Tūpa rembiguai iva pendar yuvirecoi vahe oyere tupri Tūpa renda rese, icuaipri rese avei yuvinocha iyavei irungatu yuvirecove vahe rese avei no; ahesa oyeaivi omboya ité osiva ivi rese senda rovai Tūpa mboetisave yuvireco,

¹² aipo ehi:

“¡Ēgüe tehi!

Sapucaisa, poromboeteisa, mbahecuasa, ‘¡Aviye ndeu’ hesa, poromboyero-asa, mborerecuasa,

teco pīratasa avei tasecoi yande Ru Tūpa upe!

¡Ēgüe tehi apirēhi vahe ité yepi!” ehi.

¹³ Ahese icuaipri ipāhu pendar aipo ehi cheu cute: “¿Ereicua vo co ava rehi iturucuar morochi vahe pāve yuvirecoi, ereicua que sui pīha yugūeru?” ehi.

¹⁴ Che evocoyase, “Nde rumo ereicua” ahe chupe. Ipare ahe aipo ehi cheu: “Co acoi yuvinose tupri vahe ité teco asisa sui yuvireco, inungar oyosei, omomorochi vahe oturucuar, Ēgüe ehi avei güecocuier imomorochi Ovesami rui pipe yuvireco.

¹⁵ “Sese Tūpa renda rovai yuvirecoi, chupe mbahe apo āgua ari, pītu rupi avei sēta pipe.

Güendave oguapí vahe oĩ, güecocuer pipe osepíra.

¹⁶ Evocoi ndiyumbiasí iri chira yuvireco, ndihusei iri chiaveira, iyavei ari ndoyope iri chira, ndasacuvasi iri chiaveira chupe no.

¹⁷ Esepia, evocoi Ovesa seci Vu renda rovai, ahe osãrora ava rehi sereco inungar ovesa rãrosar. Ipare opara viraso tecovesa resendar i ndopai vahesave imboihu ãgua. Tũpa evocoiyase omombituhupara imboyasehosa sui yuvireco” ehi.

8

Imoñuvirío ovasa sello iyavei itaisi rapisa oro apopri

¹ Ipare coiyete cute co Ovesami omondorose imoñuvirío ovasa sello cuachiar mboyasa ichui, ahese sũ tupri ivave ñepe hora yemombitesa rupive.

² Ichui asepia siete tupri Tũpa rembiguai íva pendar yuvinohai vahe Tũpa rovai, chupe opa imondosa siete tupri mĩmbi.

³ Ipare ou ambuae Tũpa rembiguai íva pendar oro itaisi rapisa reseve, iyavei ou ohã itaisi rapisa renda rovai; ipare imondosa tuvichã itaisi chupe oicavêhe vaherã oyoya tupri opacatu ava Tũpa upendar yeruresa rese oro mbahe reropovêhepri renda harive; ahe Tũpa renda rovai chini vahe.

⁴ Itaisi rãtachi evocoiyase oso Tũpa rembiguai íva pendar po sui. Ëgüe ehi oyepota oso Tũpa recosave, oyoya tupri chupendar yeruresa rese.

⁵ Ipare evocoiyase Tũpa rembiguai íva pendar opoco itaisi rapisa rese, omboapipo mbahe reropovêhepri renda pendar tãtapii pipe. Ipare opa omombo ivi hari rupi. Aheseve voi osunu vahe opororo-roró, overa-vera iyavei ivi oririi.

Siete vahe mĩmbi

⁶ Evocoiyase siete tupri Tũpa rembiguai íva pendar oyemoingatu voi güemimbi moñehe ãgua yuvireco.

⁷ Yipĩndar vahe Tũpa rembiguai omoñehe güemimbi, ahese imombosa ivi hari rupi amanda iyavei tata oyeseha vahe tuvi rese. Ipare opa ocaí ivi mombosapisa yahocuer. Oyoya tupri ivira mombosapisa yahocuer rese iyavei capihí reseve avei opa yuvirocaí.

⁸ Imoñuviriosa Tũpa rembiguai omoñehe güemimbi. Ahese imombosa para guasu pipe inungar tupri acoi ivitri sendi vahe tata pipe; ipare para guasu mombosapisa yahocuer oyeapo tuvi.

⁹ Iyavei para guasu mombosapisa yahocuer pipendar ava omano yuvireco. Ipare carite guasu mombosapisa yahocuer pipendar opa tupri avei imo-cañisa.

¹⁰ Ipare imombosapisa Tũpa rembiguai íva pendar omoñehe güemimbi, ahese yasitata tuvichã vahe oviapi íva sui ou. Sendi guasu inungar acoi ivira rese tata sendi guasu vahe. Ahe oviapi íai mombosapisa yahocuer pipe iyavei ivi sui i ohẽ vahe mombosapisa yahocuer pipe avei no.

¹¹ Yasitata rer evocoiyase Iro-vahe. Ipare i mombosapisa yahocuer iró iteanga. Evocoi i pipe setã ava omano yuvireco.

¹² Imoirungatusa Tũpa rembiguai omoñehe güemimbi. Ipare ari mombosapisa yahocuer imegua, yasi mombosapisa yahocuer, iyavei yasitata mombosapisa yahocuer avei no. Ichui imombosapisa yahocuer ndosesape iri yuvireco ari mombosapisa yahocuer pipe, pĩtu mombosapisa yahocuer pipe avei no.

¹³ Ipare asepia, asendu avei no vira guasu ovevese íva mbiter rupi, aipo ehi pucu oñehe oico: “¡Too, too! ¡Iparaisu catura moco ava yuvirecove vite vahe

ivi pipe yuvireco acoi omoñehese ambuae mbosapî Tûpa rembiguai güemimbi yuvireco!" ehi.

9

1 Tûpa rembiguai imbopoyandeposa omoñehese güemimbi, ahese asepia yasitata oviapi vahe iva sui ou ivive. Ipare chupe imondosa ivicuar picucu p̄tumimbi vahe mboisa.

2 Ipare omboise ivicuar rovapisa, ichui opūha tātachi, inungar acoi horno guasu pipe sui osē vahe. Evocoiyase evocoi tātachi ndosesape uca iri ari upe, niporēhi iri eté mbahe.

3 Iyavei evocoi tātachi sui opa yuvinose tucru guasu rehii oñemosai opacatu ivi rupi; chupe avei imondosa seco p̄rata āgua inungar acoi mba-herumbiquiāpe.

4 Icuaisa rumo opacatu capihi mbahe roc̄ri iyavei ivira momaraēhi āgua, ēgüe ehi rumo acoi ava nomboyecuai vahe osiva rese Tûpa rer, chupe nara ité.

5 Nimondosai rumo mborocuaite chupe ava yuca āgua. Ēgüe ehi rumo ‘tomombaraisu pucu rane poyandepo yasi rupi sereco’ oyapave tēi, inungar tupri acoi mba-herumbiquiāpe rasi cuer.

6 Evocoi ari rupi ava oipota tēira omano āgua yuvireco viña. Imanosa rumo que vitera yuvireco ichui.

7 Tucru guasu rehii inungar cavayu imoingatupri vavasave nara yepi; oāca rese evocoiyase vireco ndoyavii yeguaca oro apopri, iyavei sova aviye tupri ité ava repiaca.

8 Iha ndoyavii cuña ha, s̄ai evocoiyase ndoyavii tupri yagua p̄ta r̄ai.

9 Setecuer evocoiyase oyopia tupri guarepochi apopri, iyavei ipepo riapuḡer aviye tupri ité acoi c̄reto riapuḡer cavayu vinoña vahe vavasave.

10 Vireco vuguai rese opopiar aviye mba-herumbiquiāpe popiar. Ahe niha vireco op̄ratasa poyandepo yasi rupi ava momara āgua tēi.

11 Evocoi tucru guasu rerecuar, ahe icuairi ivicuar ipicucu vahe mboi āgua. Ahe serer hebreo ñehe pipe Abadón; griego ñehe pipe evocoiyase Apolión ehi.

12 Opa yip̄ndar vahe mbahe-mbahe tēi; oime vite rumo co pare ñuvirio mbahe tasi vahe.

13 Imoñepeï ovasa Tûpa rembiguai omoñehese güemimbi, ahese asendu ñehesa itaisi rapisa renda oro apopri Tûpa rovaïndar irungatu s̄achi vahe p̄ahu sui.

14 Ahe aipo ehi evocoi imoñepeï ovasa Tûpa rembiguai upe: “Eyorapa evocoi irungatu Tûpa rembiguai ñapichimbri iai guasu Eufrates ivirindar” ehi.

15 Evocoiyase opa yorasa ava mombosapisa yahocuer yuca āgua yuvireco. Esepia, evocoi imoingatupri co ari rupi tuprise nara yuvireco.

16 Ipare asendu sundao rehii cavayu harive yuvirecoi vahe, ahe setacuer doscientos millones tupri.

17-18 Ēgüe ehi asepia cavayu rehii che quer nungar pipe, ihari pendar evocoiyase vireco opochiha rupi tupri oyoepisa guarepochi apopri yuvireco, ahe iparaḡer pira vahe tata nungar, sov̄i vahe, iyu vahe avei no. Cavayu rehii āca evocoiyase aviye tupri yagua p̄ta āca, iyuru sui evocoiyase yuvinose-nose tata, tātachi iyavei azufre. Ipipe sui ava mombosapisa yahocuer opa tupri omano yuvireco.

¹⁹ Esepia niha, cavayu pīratasa iyuru rese chini, suguai rese avei no; ahe suguai ndoyavīi tupri ité mboi āca, ipipe avei ava omomara.

²⁰ Ava rumbīrer rumo nomanopa vītei vahe co mbahe tēi sui yuvireco, nosecuñaroi eté güecocueraí yuvireco. Ndopoi potai eté caruguar mboetei aisa sui, iyavei opacatu mbahe rahanga tēi oro apopri, guarepochi, bronce, ita, anise ivira apopri mboeteisa sui avei yuvireco. Evocoi mbahe apopri rumo ndosarecoi vahe, ndosendui vahe ité mbahe, ndoguatai vahe avei.

²¹ Iyavei noñecuñaro potai eté oporapichisa sui yuvireco, opaye aisa sui, que cuña, que cuimbahe ambuae rese angaipa aposa sui, omonda raisa sui avei.

10

Tūpa rembiguai iva pendar vireco vahe icuachiapri cuachiarimi

¹ Ipare asepia ambuae Tūpa rembiguai iva pendar ipīratá vahe ogüeyise iva sui ou mbahe pītu pāhuve; ahe ñaca rese arco iris oyere tupri. Sova sendí aviye ari, setima evocoiyase ndoyavīi tata rendigüer opūha tupri vahe.

² Cuachiarimi oyemboi vahe vireco opove. Opi oacato cotindar pipe opīro para guasu rese, ambuae opive evocoiyase opīro ivi rese.

³ Evocoiyase sāsē pīratá, inungar yagua pīta rāse; sāsese, evocoiyase siete tupri osunu vahe ñehe oyendu yuvireco.

⁴ Oñehepase, ahese iñehe che aicuachiara viña; asendu rumo iva sui ñehesa aipo ehi vahe: “Eremboyecuai rene acoi siete tupri osunu vahe ñehe, ndereicuachiai chietera” ehi cheu.

⁵ Evocoiyase Tūpa rembiguai asepia vahecuer, ahe acoi opīro vahe para guasu rese, ivi resé avei opo oacato cotindar omopuha iva cofi.

⁶ Ichui Tūpa ndopai vahe rer pipe evocoi oyapo vahe iva, ivi, para guasu iyavei opacatu mbahe ipor reseve, omoingatu oñehe aipo ehi: “Nasarosa iri chietera;

⁷ oyepotase rumo imoñuvirío ovasa Tūpa rembiguai upe güemimbi moñehe āgua, ahese imboavīyesara Tūpa remimbotar yipindar ndicuasai vahe, ahe acoi omombehu vahe güembiguai oñehe mombehusar upe aracahe” ehi.

⁸ Ñehesa asendu vahe iva sui oñehe iri cheu aipo ehi: “Eso, tereipisi cuachiarimi imboipri Tūpa rembiguai vireco vahe evocoi opīro vahe para guasu rese ohā, ivi rese avei no” ehi.

⁹ Evocoiyase aso Tūpa rembiguai upe, aporandu cuachiarimi rese, ahese ahe aipo ehi cheu: “Ndo co, eipisi, ehu. Nde yuru pipe evocoiyase sēhera eiri nungar, nde avīterve rumo irora” ehi cheu.

¹⁰ Ahese aipisi cuachiarimi cute Tūpa rembiguai sui, ipare ahu; yipindar sēhé che yuru pipe inungar eiri, amocopase rumo, che avīterve iró cheu.

¹¹ Evocoiyase aipo ehi yuvireco cheu: “Nde ereñehe irira Tūpa aipo ehi vahe rese ambuae-ae tecua pipendar rese, ivi rupindar rese, ambuae-ae iñehe vahe rese, mborerecuar rese avei no” ehi.

11

Ñuvirío ava Tūpa recocuer mombehusar

¹ Ipare ombou vara mbahe rāhasa yuvireco cheu, ichui aipo ehi yuvireco cheu no: “Erio, teresāhapa tūparo, mbahe reropovēhepri renda avei, ipare opara ereipapa ipipendar Tūpa mboeteisar retacuer” ehi.

2 “Nderesāhai chira rumo ñachimbri pipe tūparo rocar rupi. Esepia, evocoi opa imondosa ava Tūpa ndoicuai vahe upe, ahe opīrora tecua nimarai vahe rese yuvireco cuarenta y dos yasi rupi” ehi.

3 “Ipare ñuvirío ava amondora che recocuer mombehu āgua opacatu ava upe mil dosciento sesenta ari rupi. Ahe omondera turucuar ipo guasu vahe yuvireco” ehi.

4 Co ava ñuvirío, ahe inungar ñuvirío ivira Olivo iyavei inungar ñuvirío vera hi yuvinoha vahe ivi Yar rovai.

5 Acoi que oimese ovireco mara pota vahe, ahese che reco mombehusar yuru sui osēra tata sapipa āgua; ēgüe ehira ava omano que che reco mombehusar reco momara potasar.

6 Co ñuvirío vireco opīratasa oqui vahe mombita āgua, acoi ari rupi che reco mombehu viteseve yuvireco; iyavei vireco pīratasa i recuñaro āgua tuvi pipe yuvireco, imombaraisu uca āgua avei ivi opacatu-catu tēi mbaherasi pipe güemimbotar rupi.

7 Omboaviyepase rumo Tūpa reco mombehusa yuvireco, ahese osēra ivicuar guasu ipicucu vahe sui mbahe ipi vai. Ahe ovavara sese, osecopira, ichui oyucara.

8 Sehögüer evocoiyase yangarecuavēhi tēi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amove ava, “Sodoma pendar nungar yuvirecoi” ehi yuvireco; “Egipto pendar nungar yuvirecoi” ehi avei yuvireco no.

9 Ipare mbosapi ari yemombitesa rupi, ava-ava tēi tecua rupindar, ava ambuae-ae tēi vahe, iñehe ambuae vahe iyavei ambuae-ae ivi rupindar osepiño tēira sehögüer yuvireco iyavei ahe noñoti ucai chietera ava upe yuvireco.

10 Ava yuvirecove vahe ivi pipe, ahe oviharetera yuvireco imano rese. Ēgüe ehira sorivete, iporeredora oyese yuvireco. Esepia, evocoi ñuvirío ava Tūpa ñehe mombehusar imombaraisupīrer yuvirecoi.

11 Mbosapi ari yemombite pare rumo, Tūpa opa ombogüerayevi, ahese opūhapa yuvireco. Evocoiyase ava opacatu osepiya vahe osiquiyé iteanga yuvireco ichui.

12 Ipare ahe ñuvirío osendu yuvireco ñehesa ipīrata vahe iva suindar aipo ehi vahe: “¡Peyeuipipa ave ivate!” ehi. Evocoiyase opa oyeupi ivave yuviraso iva quiha pāhu rupi oamotarēhisareta rembiepiave.

13 Aheseve voi oime ivi ririñi tuvichá vahe, ichui tecua guasu imbodiesa yahocuer opa onduru; ahese siete mil tupri ava opa omano yuvireco. Evocoiyase ava rumbīrer, osiquiyepave tēi osapucai Tūpa iva pendar upe imboeteisa pipe yuvireco.

14 Opa mbahe-mbahe tēi moñuviriosa cute; ou poyava irira rumo imombosapisa.

Imoñuvirío ovasa Tūpa rembiguai omoñehe güemimbi

15 Imoñuvirío ovasa Tūpa rembiguai omoñehese güemimbi, ahese oyeendu ñehesa ipīrata vahe iva suindar aipo ehi vahe:

“Yande Yar Tūpa, Sembiporavo Poropīsirosar avei vireco co ivi pipendar mborerecuasa opovrive yuvireco cute.

Ahe evocoiyase mborerecuar apirēhi vaheñā itera secoi” ehi.

16 Evocoiyase veinticuatro tupri icuapri, evocoi oguapi vahe yuvinoi Tūpa renda rovai, ahe oyeaivi omboya ité osiva ivi rese imboeteisa pipe yuvireco,

17 aipo ehi:

“Aviye ndeu ore Yar, Tūpa mbahe mboavaisarēhi, nde acoi yipisuive vahe ité, ereicoveño avei cūritei.

Esepia, nde pīratasa tuvichá vahe pipe ereporocuai eico.

¹⁸ Ambuae tecua rehii pendar nde amotarēhi ité yuvireco.

Nde ñemoirosa rumo cūritei oyepota, iyavei nde porandusa oime voira ava omano vahe upe.

Iyavei eremondora mbahe porerecosa nde rembiguai eta nde ñehe mombehusar upe,

ndeundar secó catupri vahe upe, iyavei acoi nde rer mboeteisar upe no, que seco ivate vahe upe, que seco ivi coti catu vahe upe avei no; iyavei eremocañira co ivi pipe mbahe tēi rerusar” ehi yuvireco.

¹⁹ Ahese oyemboi tūparo iva pendar, iyavei oyecua tupri cuachiar porocuita resendar riru. Ipare overa-vera, siapu guasu, osunu, ivi oriri, amanda osururu avei no.

12

Cuñia iyavei mbahe ipi oporomocañi vahe

¹ Evocoiyase iva rese oyecua mbahe poromondiisa tuvichá vahe ambuae mbahe mboyecua água: oime cuñia iturucuar inungar ari rendigüer, aviye opiro vahe yasi rese ohã, oãca yeguaca rese doce tupri yasitata vireco.

² Co cuñia ipuruha oico, sãsé tēi omembri iha pota água oyesui. Esepia niha, oiporará ité tasicuer.

³ Ipare coiye oyecua iva rese ambuae mbahe mboyecua tuprisa: mbahe ipi pira vahe, ahe ñaca siete tupri, sãchi evocoiyase diez iyavei vireco yeguaca oãca yacatu.

⁴ Suguai evocoiyase ombotiriri yasitata iva pendar imombosapisa sui ñepey iyahocuer seraso. Ipare opa omombo ivive. Ahe evocoiyase opita osãro cuñia imembira pota vahe rovai ohã, “Tahupaño voi imembri oha ramoseve” ehi viña.

⁵ Ipare co cuñia membri oha cuimbahemi, ahe mborerecuar virecora mbo-coca guarepochi apopri, ipirata catu vahe secoira opacatu ava ivi rupindar upe. Ichui serocuasa voi serasosa Tūpa rovai.

⁶ Cuñia evocoiyase oñemi ivi iporupirēhisave oso. Aheve omoingatu Tūpa iyemboerecua água, eipeve icaru água mil doscientos sesenta ari rupi.

⁷ Oime avei vavasa ivave; ahese Tūpa rembiguai iva pendar ivate catu vahe Miguel güeru ovoya eta ovava água mbahe ipi oporomocañi vahe upe ivoya upe avei yuvireco.

⁸ Ndoicatuí eté rumo Miguel recopi água yuvireco. Sese ndipoi eté ivave seco água yuvireco chupe.

⁹ Egüe ehi imoyepipisa mbahe ipi oporomocañi vahe reco pīratasa sembiguai eta reseve; opa imombosa ivi pipe yuvireco. Evocoi mboi vai, “Carugar” ehi vahe yuvireco chupe; “Satanás” ehi avei yuvireco chupe. Evocoi niha ava ombopa-mbopa tēi vahe opacatu ivi pipe yuvireco.

¹⁰ Evocoiyase asendu ñehesa ipirata vahe ivave, aipo ehi vahe:

“Cūritei oime poropisirosa, pīratasa iyavei yande Tūpa mborerecuasa, Poropisirosar mborerecuasa avei no.

Esepia niha, imoyepipisa iva sui acoi oseca-seca vahe yande rivri Tūpa reroyasareta recocuer momara água pītu, ari yacatu rupi yande Ru Tūpa rovai.

¹¹ Yande rivri osecoreroyi Ovesami ruvi piyere pipe sui yuvireco iyavei acoi secocuer mombehu tuprisa pipe sui avei no.

Esepia niha, ndosiquiyeyi eté güetecuer mocañi ñgua yuvireco.

Ahe rumo oyemoingatu voi eté omano ñgua.

¹² ¡Peyemboviha catu pe iva iguar peico vahe!

Pe rumo, ¡preparaisu catura ivi pipe, para guasu pipe avei peico vahe!

Esepia niha, Carugar ogüeyi pëu oñemoirosa pipe, oicuase güeco pucuehi ñgua” ehi.

¹³ Ipare mbahe ipi oporomocañi vahe oicuase imombopri güecose ivi rese, ahe se omoña cuña imembrí cuimbahemi reseve yamotarëhisa pipe.

¹⁴ Evocoi cuña upe rumo imondosaño ñuvirio vira guasu pepo iveve ñgua chupendar ivi imoingatupri ava porëhisave seco ñgua, amombri mbahe ipi oporomocañi vahe sui. Aheve oyopoi mbosapi araviter yemombitesa rupive.

¹⁵ Ipare mbahe ipi oporomocañi vahe oyuru rupi ombotipimacia cuña raquicuei iai apo ‘tocañi tēi’ oyapave viña.

¹⁶ Ivi rumo oime co cuña pitiviisa, ahe oyeca. Ipare opa omoco iai evocoi mbahe ipi oporomocañi vahe rembiapo.

¹⁷ Evocoiyase, oñemoiró iteanga cuña rese, ipare oso ovava ambuae ichuin-dar rehii rese, ahe omboyeroya vahe ité Tüpa porocuita yuvireco iyavei yuvirecoi tupri vahe Jesucristo remimombehu rupi.

¹⁸ Ipare mbahe ipi oporomocañi vahe opita para guasu popive ohã.

13

Ñuvirio mbahe ipi vai

¹ Ipare asepia para guasu pipe sui osëse mbahe ipi vai, ahe siete tupri ñaca vahe iyavei diez tupri sãchi. Guãchi yacatu evocoiyase vireco ñepeipei oyeagua, iyavei oãca yacatu rese vireco terer Tüpa upe mbahe tēi vahe.

² Co mbahe ipi vai aviye tupri acoi yaguar iparaũ vahe; iyavei ipi aviye tupri oso pi, iyuru evocoiyase aviye yagua pita yuru. Mbahe ipi oporomocañi vahe evocoiyase omondo opiratasa iyavei omborerecuasa chupe.

³ Ñepe mbahe ipi vai ñca oyeapicha guasu vahe ndoyavii omano vaheerã ité viña; ahe rumo ocuera tupri iriño evocoiyase opacatu guasu ava sepiase, ndoyembovihai. Ichui viroya catu yuvireco.

⁴ Omboetei guasu mbahe ipi oporomocañi vahe sereco yuvireco. Esepia, omondo omborerecuasa mbahe ipi vai upe. Ipare ahe avei omboetei ai yuvireco no, aipo ehi yuvireco: “Ndipoi eté mbahe ipi vai nungar, iyavei ndipoi eté ava oicatu vahe ovava vaheerã sese” ehi yuvireco.

⁵ Iyavei mbahe ipi vai upe ipotasa iyemboivate ai ñgua oñehe pipe ava rovaque iyavei Tüpa reroiro ñgua avei no, iyavei mborerecuar guasu seco ñgua cuarenta y dos yasi rupi.

⁶ Egüe ehi ñehe mara-mara tēi Tüpa rese, ñehe-ñehe tēi avei serer maranehi rese, sēta rese, iva pendar rese avei no.

⁷ Imondosa avei chupe vavasa apo uca ñgua Tüpa upendar ava eta upe secopi ñgua. Ipare imondosa avei mborerecuar seco ñgua chupe ava ambuae-ae tēi vahe upe, secua ambuae vahe upe, ambuae-ae tēi ñehe vahe upe, iyavei ambuae ivi rupindar upe avei no.

⁸ Ipare omboetei ai sereco yuvireco opacatu ava ivi pipendar acoi ivi apoëhi suive ndovirecoi vahe güerer Ovesami cuachiar tecovesa resendar pipe, ahe niha acoi yucapirer.

⁹ Que amove osendu pota vahe, toyapisacaño co rese:

10 “Acoi ava oyeoquenda uca vaherã, oyeoquenda ucaño itera; iyavei acoi ava omano vaherã quise pucu pipe, ipipeño ité omanora.”

Co pipe oyecua Tûpa rese yeroyasa iyavei ipiratasa ava chupendar rese.

11 Ipare asepia ambuae mbahe ipi vai osê vahe ivivri sui. Co vireco ñuvirío guãchi ndoyavii tupri Ovesa rãchi, mbahe ipi oporomocañi vahe ñehe pipe rumo oñehe oico.

12 Ahe vireco opacatu evocoi yipindar vahe mbahe ipi vai mborerecuasa sovaque, iyavei ava ivi pipendar yuvirecoi vahe upe ombotei uca yipindar mbahe ipi vai, ahe acoi ocuera tupri vahe oyeapichasa oyua rãgüer sui.

13 Iyavei oyapo setá mbahe poromondiisa mbahe mboyecua ãgua. Iva sui eté niha oiti uca tata ivive imbou opacatu ava rembiepiave.

14 Ombopa tēi ava ivi pipendar yuvirecoi vahe mbahe poromondiisa pipe evocoi imondosa vahe yapo ãgua chupe yipindar mbahe ipi vai rovai. Ipare oporocuai yapichapri ocuera tupri vahe rahangapo ãgua imboetisave.

15 Ipare imondosa pīratasa chupe tecovesa mondo ãgua evocoi sahanga upe ‘toñehe, toyuca uca avei ava opacatu omboteiēhisar’ oyapave.

16 Ipare ava opacatu yuvirecove vahe upe, seco mbogüemi vahe upe, seco ivate vahe upe avei, que mbahe yar upe, que iparaisu vahe upe, ava nimañecoprii vahe upe, mbiguai tēi upe, ahe chupe, “Toyecuachía opo oacato cotindarve yuvireco, anise osivave” ehi.

17 Ahese ava ndipoi eté oicatu vahe mbahe reroqua, anise que mbahe mondo ãgua acoi ndovirecoise mbahe ipi vai rer, anise serer retacuer ndovirecoise oyese no.

18 Iya pereco mbahecuasa co renducua tupri ãgua. Acoi osenducua vahe toicua tupri mbahe ipi vai rer retacuer. Evocoi niha ava rer retacuer. Ahe seiscientos sesenta y seis.

14

144,000 ava iporavopri sapucaisa

1 Ipare asepia Ovesami ivitri Sión rese imoha. Ahe supi yuvirecoi ciento cuarenta y cuatro mil tupri ava evocoi oicuachía vahe Ovesami rer, Tu rer avei osiva rese yuvireco.

2 Ipare asendu mbahe riapu iva sui ou vahe; ndoyavii acoi itu guasu riapugüer iyavei ndoyavii eté acoi osunu vahe opororo-roró iteanga vahe; ndoyavii avei acoi ava setá vahe omoñehese arpa yuvireco, ěgüe ehi siapugüer.

3 Ipare osapucái sapucaisa ipiasu vahe yuvireco Tûpa rovai iyavei iva pendar irungatu yuvirecove vahe rovai, icuapri eta rovai avei no. Ñepeí yepe que iva pendar ndoicatuí eté evocoi sapucaisa rese oyembohe vaherã. Ęgüe ehi rumo ava ciento cuarenta y cuatro mil tupri yuvirecoi vahe, evocoi oñepisiro vahe ivi pipendar pãhu sui, ahe güeraño tupri ité oicatu osapucái yuvireco.

4 Co avatoyapoi vahe ité mbahe co coti tēi cuña rese. Esepia, oñearo tupri güeco catuprisa pipe yuvireco; iyavei osaquicue moñaño ité Ovesami que iguatasa rupi. Opa serocuasa ava pãhu sui iyavei inungar yipindar mbahe seropovēhepri Tûpa upe, Ovesami upe avei.

5 Ndiipoi eté que temira sese. Esepia niha, ndipoi eté mbahe oyavi vahe yuvireco.

Mbosapi Tûpa rembiguai omombehu iñehe ava upe yuvireco

6 Evocoyase asepia ambuae Tūpa rembiguai iva pendar oveve vahe iva mbiter rupi iyavei vireco Tūpa Ñehengagüer pīsirosa resendar ndopai vahe imombehu āgua opacatu ava co ivi pīpendar upe: opacatu ivi rupindar upe, ava ambuae-ae vahe upe, iñehe ambuae-ae vahe upe, opacatu tecua rupindar upe avei no.

7 Ipare oñehe pīrata aipo ehi: “Pesiquire Tūpa sui iyavei pesapucái seco ivatesa rese chupe no. Esepia niha, cūrítei oyepota arí chupe ava recocuer rese iporandu āgua. Pemboetei catu oyapo vahecuer iva, ivi, para guasu, i ohē vahe avei no” ehi.

8 Ambuae Tūpa rembiguai iva pendar raquicuerindar aipo ehi oico: “¡Oviapi Babilonia guasu cute! ¡Esepia niha, evocoi opa ombosavaipo opacatu ambuae tecua pendar ohigua yemboaguasa tēisa resendar pipe!” ehi.

9 Ipare ambuae Tūpa rembiguai iva pendar imombosapisa, saquicue moña aipo ehi pīratá iri oico: “Acoi que ava omboetei vahe mbahe ipi vai sereco, sahanga avei no, iyavei acoi oyembohe catu vahe oyecuachía āgua osiva rese, que opo rese no,

10 oipisi itera Tūpa ñemoirosa ipīrata vahe ité; ipare omombaraisura setecuer azufre ocái vahe pipe güembiguai iva pendareta reco maranehi rovaque, Ovesami rovaque avei no.

11 Tātachi icaigüer pendar evocoyase oyeupira ndopai vaherā, ahese ndipoi chietera pituhusa pītu, arí pipe evocoi mbahe ipi vai mboeteisar upe, sahanga mboeteisar upe avei no, iyavei acoi vireco vahe serer cuachiapri oyese yuvireco no” ehi.

12 ¡Ēgüe ehira Tūpa rese ité yuvirecoi vahe yeroyasa oyecua ahe acoi iporocuaíta mboaviye tuprisar, Jesús reroya tuprisar avei yuvireco!

13 Ahese asendu ñehesa iva pendar aipo ehi vahe cheu: “Eicuachía co: Co pipe suive sorivete catura acoi ava omano vahe yande Yar rese yuvireco” ehi.

“Ēgüe ehi eté —ehi Espírítu imombehu—, opituhura oporaviquisa sui yuvireco. Esepia, mbahe sembiapo rerācua osora ivave supí” ehi.

Ivi pīpendar recoáhasa

14 Ahese asepia iva quíha morochí vahe; iharíve ndoyavíi ava oguapí vahe oĩ. Vireco niha oyeguaca oro apopri oāca rese iyavei mbahe miti asiasa saimbé vahe vireco opove.

15 Ipare osē ambuae Tūpa rembiguai tūparo sui. Ahe osapucái pīrata evocoi iva quíha haríve chini vahe upe: “¡Eyasía nde remiti iyavei emonuha nde rembiasía! ¡Esepia, nde remiti ivi pendar yaviye ité!” ehi ava recocuer uve chupe.

16 Evocoyase evocoi chini vahe oyasia güemiti ivive oico, ahese opa omonuha güembiasía.

17 Ipare osē ambuae Tūpa rembiguai tūparo sui, ahe avei vireco mbahe miti asiasa saimbé vahe.

18 Ipare ambuae Tūpa rembiguai osē mbahe reropovēhepri renda sui, ahe tata rese hañecosar secoi. Iyavei oñehe pīrata evocoi vireco vahe mbahe miti asiasa upe aipo ehi: “¡Eyasía uva ha apacuar, evocoi oime vahe ivi pipe! ¡Esepia niha, opa yaviye!” ehi.

19 Evocoyase co Tūpa rembiguai inungar oyasia vahe uva ha ēgüe ehi opa ava ípeha ivi pīpendar. Ipare opa oyapocatu Tūpa ñemoirosa rāro āgua.

20 Ipare inungar uva ha icambeprí tecua cupeve, ēgüe ehi co ava imombaraisu; ichui osē tuví evocoi tipigüer oyepota ité cavayu yuru penda rupi eté sese, ahe ipucucuer trescientos kilómetros tupri ité.

15

Ipa siete tupri Tūpa rembiguai güeru mbaherasi yuvireco

¹ Ipare asepia ivave ambuae mbahe mboyecuasa tuvichá vahe poromondiisa: siete Tūpa rembiguai, siete tupri mbaherasi ipa vahe vireco vahe, ahe ipá vahe ité Tūpa ñemoirosa.

² Iyavei asepia para guasu ndoyavii yepiasa oyeseha vahe tata rese. Ahe ipopive yuvinoha ati mbahe ipi vai recopisar, sahanga recopisar iyavei nomondo uca potai vahe serer cuachía água yuvireco oyese. Ahe vireco Tūpa upendar arpa yuvireco.

³ Ipare osapucaí Tūpa rembiguai Moisés sapucaisa yuvireco, iyavei Ovesami sapucaisa aipo ehi:

“Tuvichá opacatu mbahe nde rembiapo, che Yar Tūpa opacatu mbahe mboavaisarēhi; nde recocuer supi tupri vahe ité; seco ñvi vahe. ¡Too, nde mborerecar guasu opacatu ivi rupindar ereico!” ehi.

⁴ “Yar, nde sui opacatu ité osiquiyera yuvireco nde mboetei água.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvireco. Esepia niha, sepiasa nde rembiapo supi tupri vahe” ehi.

⁵ Ipare asepia ivave oyemboise Tūpa rēta imaranehi vahe. Aheve acoi yapocatasa mborocuaita resendar.

⁶ Evocoiyase ichui yuvinosepa evocoi siete Tūpa rembiguai vireco vahe siete tupri mbaherasi vai yuvireco. Ahe iturucuar secose vahe, ndiquihai vahe, sendí iteanga. Vumbicuasa ipe vahe oro apopri pipe evocoiyase oyeumbicua opochiha rupi tupri yuvireco.

⁷ Ipare ñepeí evocoi irungatu íva pendar yuvirecove vahe pāhu pendar omondo siete tupri Tūpa rembiguai upe siete Tūpa ñemoirosa riru oro apopri, ahe oicove vahe ité, ndopai vahe.

⁸ Ipare Tūpa rēta omboapipo tátachi, evocoi ou vahe Tūpa reco porañetesa iyavei ipiratasa sui. Aheve ndiyai eté que ava upe seique água acoi opase voi eté omomba siete tupri mbaherasi vai vireco vahecuer siete Tūpa rembiguai.

16

Siete Tūpa ñemoirosa riru

¹ Evocoiyase asendu ñehesa ipirata vahe osé vahe Tūpa rēta pipe sui. Ahe aipo ehi siete Tūpa rembiguai yuvirecoi vahe upe: “Peso, tapeipiyerepa ivi hari rupi evocoi siete tupri mbahe riru pipendar Tūpa ñemoirosa” ehi.

² Yipindar vahe Tūpa rembiguai opa oipiyere ígua riru pipendar ivi hari rupi; evocoi opacatu ava vireco vahe mbahe ipi vai rer oyese sahanga mboeteisar tēi avei, ahe chupe oime setá caracha vai tasi vahe.

³ Tūpa rembiguai imoñuviriosa opa oipiyere ígua riru pipendar para guasu pipe. Ahe evocoiyase oyeapo omano vahe ruvi nungar; ichui opa omano opacatu mbahe yuvirecove vahe ipipe.

⁴ Tūpa rembiguai imombosapisa opa oipiyere ígua riru pipendar íai pipe, i ohé vahe pipe avei no. Ipare opa ahe oyeapo tuvi yuvireco.

⁵ Co pare asendu Tūpa rembiguai i rese ihañeco vahe ñehesa aipo ehi:

“Nde seco tupri vahe ité ereico evocoi ava upe eremouse nde ñemoirosa, che Yar Tūpa, seco maranehi vahe. Nde yipisuivendar ité ereico.

6 Esepia, ahe opa oyuca ndeundar ava iyavei nde ñehe mombehúsar yuvireco.

Cūrítei rumo eremboihu uca tuvi pipe.

¡Evocoi nungar upe aviyesa rupi eté!” ehi.

7 Asendu avei ambuae ñehesa mbahe reropovēhesa renda sui aipo ehi vahe: “Supi eté, che Yar Tūpa, opacatu mbahe mboavaisarēhi, nde ava recocuer mombaraisusa supi tupri vahe ité iyavei nde reco ivi vahe ité no” ehi.

8 Tūpa rembiguai imoirungatusa, opa oipiyere mbahe riru pipendar ari rese, ipare ari upe imondosa pīratasa ava rapīpa āgua.

9 Ipare opacatu ité ava yuvirocaipa tupri; ndoyevii eté rumo Tūpa upe iyavei nomboteiño ité yuvireco. Ēgüe ehi rumo iñehe mara-mara tēiño mbaherasi rerecose Tūpa upe yuvireco.

10 Tūpa rembiguai imbopoyandeposa oipiyere mbahe riru pipendar mbahe ipi vai renda rese. Ahese aviyeteramo tēi serecuar ipovri pendar avei pītumimisave yuvirecoi. Ava evocoiyase oñeapecusuhu-suhu tēi yuvireco mbahe rasicuer pāhuve;

11 ndopoiño ité rumo mbahe-mbahe tēi aposa sui yuvireco, ahe rumo iñehe mara-mara tēiño Tūpa ivate vahe rese oyeupe mbahe tasi vahe pāhuve yuvireco.

12 Tūpa rembiguai imoñepei ovasa oipiyere mbahe riru pipendar iai guasu Eufrates pipe. Ahe evocoiyase opa ipiru peri apo āgua añihivei coti sui mborerecuareta yu āgua.

13 Ipare asepia mbahe ipi oporomocañi vahe, mbahe ipi vai, ndahei vahe Tūpa ñehe mombehúsar supi vahe avei, ahe yuvirecoi vahe yuru rupi yuvínose mbosapi carugar vireque nungar.

14 Co Carugar suindar yuvirecoi, ahe oyapo poromondiisa mbahe mboye-cuasa yuvireco. Ipare opa yuvínose opacatu ivi rupi mborerecuareta monuha āgua vavasave nara, acoi ari cañi pipe Tūpa mbahe mboavaisarēhi amotarēhisave.

15 “Peyapisaca tupri che ñehe rese, che aviyeteramo tēi ayura imonda rai vahe nungar curi. Sorivetera acoi ava imahemoha vahe oyemonde tupri vahe güembiapo aviye vahe pipe. Ahese nochí chietera oico che sui” ehi.

16 Ipare opa omonuha mborerecuareta hebreo ñehe pipe serer Armagedón ve.

17 Evocoiyase imbosietesa Tūpa rembiguai oipiyere iñemoirosa mbahe riru sui ivitu rupi. Ipare iva pendar Tūpa rēta pipe sui osē ñehesa ipirata vahe evocoi ou vahe senda sui: “¡Opa ité yaposa cute!” ehi.

18 Ahese oime overa vahe, mbahe siapu guasu vahe iyavei osunu vahe. Ipare ivi oriríi ipirata catu vahe opacatu ivi riríi sui ava yuvirecove viteseve ivi pipe.

19 Tecua guasu oyeca-yeca mbosapi rupi, opacatu tecua evocoiyase opa onduru ivi pipendar. Ipare Tūpa oyemomahenduha evocoi tecua guasu Babilonia pendar rembiapo ai rese, evocoiyase omondo oñemoirosa ipirata catu vahe chupe.

20 Opacatu caha pāhu, ivitri avei ocañipa ité yuvireco.

21 Iyavei yuviroviapipa iva sui ava harive amanda guasu, ahe iposiigüer cuarenta kilos rutei. Ava rumo iñehe mara-mara tēiño vite ité Tūpa upe yuvireco amanda sui tēi. Esepia niha, evocoi Tūpa poronupasa ivaté catu vahe.

17

Cuña oyemondo-mondo tēi vahe mocañisa

¹ Siete Tūpa rembiguai vireco vahecuer mbahe riru yuvireco, ipāhu pendar ñepeí ou aipo ehi cheu: “Erio, amboyecuara co cuña yaguasa serai vahe upe ñemoirosa ndeu, ahe evocoi oguapí i harive oĩ” ehi.

² “Co cuña rese yaguasa-guasa tēi mborerecuareta ivi pipendar yuvireco iyavei ava ivi pipendar inungar osavaipo vahe ndopoi potai eté oyemboaguasasa sui yuvireco” ehi cheu.

³ Ipare che quer nungar pipe Espiritu omboyecua vahe cheu, Tūpa rembiguai iva pendar che reraso ava porēhisave. Aheve asepia cuña mbahe ipi vai pira vahe harive chini. Evocoi mbahe ipi vai opacatu rupi oyapete tupri ñehesa vai Tūpa amotarēhisa sereco oyese, iyavei vireco siete tupri oāca, diez tupri guāchi.

⁴ Co cuña turucuar, suendi vahe, pira vahe avei no, iyavei oyemoendi yai oro pipe oico, ita iporañete ai vahe pipe, opohir pipe avei no. Vireco igua riru oro apopri. Ipipe omboapipo mbahe yavaeté vahe sereco oyemboaguasaguasa tēisa;

⁵ iyavei icuachiapri isiva rese terer ndicuasai vahe aipo ehi vahe: “Co Babilonia guasu, cuña yaguasa-guasa tēi vahe si, opacatu ava ivi pipendar secocuer yavaeté vahe si avei no” ehi.

⁶ Ipare aicua evocoi cuña osavaipo vahe oĩ Tūpa reroyasar ruvi pipe iyavei acoi Jesús recocuer mombehusa sui tēi yucapri vahe ruvi pipe avei no.

Co asepiase che quer nungar pipe, ndache mbovīhai eté.

⁷ Ahese ahe Tūpa rembiguai iva pendar aipo ehi cheu: “¿Mahera vo nderevīhai eico? Aicua ucara mo ndeu co imombehusa ndicuasai vahe cuña resendar, iyavei acoi mbahe ipi vai vireco vahe siete tupri oāca, diez tupri avei acoi sāchi” ehi.

⁸ “Acoi mbahe ipi vai eresepia vahe ahe yipive secoi vahe, cūrītei rumo ndipo iri; osēra rumo ivicuar guasu ipicucu vahe sui omano āgua renonde curi. Acoi ava ivi pipendar ndovirecoi vahe güerer cuachiar tecovesa resendar pipe yuvireco yipive ivi apoēhiseve, ahe ndovīhai chira yuvireco osepiase evocoi mbahe ipi vai yipive oicove vahe viña, ndoicove iri rumo, oyevi irira curi.

⁹ “Co rese icuasara uma vireco mbahecuaasa senducua āgua: Co siete tupri vahe ñaca ahe omombehu ‘siete tupri ivitri’ oyapave. Ahe iharive evocoi cuña oguapí oĩ iyavei ahe siete ñaca avei omoporēhi ‘siete tupri mborerecuar’ oyapave.

¹⁰ Cinco tupri mborerecuar evocoi ipāhu pendar ndipo iri yuvireco, ñepeíño evocoiyase oporocuai cūrītei oicó, ambuae rumo ndou vītei. Ouse rumo ipandar, ou raimi tēira.

¹¹ Mbahe ipi vai secoi vahe yipindar, ndoicove iri cūrītei, ahe imbohochosa secoira mborerecuarā, yepe siete tupri vahe mborerecuar guasu mboetasa viña, ahe rumo ocañi tēi vaherā secocuer” ehi.

¹² “Evocoi diez tupri vahe sāchi, ahe mborerecuar diez tupri ndoyuviroique vītei vahe oporocuai vaherā yuvireco. Oyoya rumo oporocuai raimi tēira mbahe ipi vai reseve yuvireco curi.

¹³ Co diez tupri mborerecuar yuvirecoi vahe oyoya guasura ipihañemoñeta evocoi mbahe ipi vai upe omondo vaherā pīratasa iporocuai āgua yuvireco.

¹⁴ Ipare ovavera Ovesami rese yuvireco; Ovesami rumo osecoreroyira. Esepia niha, ahe yande Yar opacatu ava Yar iyavei mborerecuar guasu secoi no opacatu mborerecuareta rerecuar, iyavei acoi ava yuvirecoi vahe

sese, ahe senoipri yuvirecoi iyavei iporavopri oyemoviracuaño vahe ité supi oguata āgua yuvireco” ehi.

¹⁵ Iyavei Tūpa rembiguai aipo ehi cheu: “Evocoi para guasu eresepia vahe, iharive cuña yaguasa-guasa tēi vahe oguapī oī, ahe ‘ava rehī tecua yacatu rupindar, iñehe ambuae-ae vahe iyavei opacatu ambuae tēi vahe ivi rupindar’ oyapave.

¹⁶ Evocoi eresepia diez tupri vahe sāchi mbahe ipi vai rese, ahe ndoyambotai chira cuña yaguasa-guasa tēi vahe; iyavei osequiū tuprira seya; ohupara soho, ipare opara osapi.

¹⁷ Tūpa niha omondo ipiha pipe mbahe güemimbotar apo āgua ‘ahe toye-monguerēhi yuvireco omborerecuasa mondo āgua mbahe ipi vai upe; tomboaviye rane ité che remimombehugüer yuvireco’ oyapave.

¹⁸ Iyavei evocoi cuña yaguasa-guasa tēi vahe eresepia vahe, evocoi niha tecua guasu ivi pipendar mborerecuareta vireco vahe opovrive yepi” ehi Tūpa rembiguai cheu.

18

Babilonia viapi agüer

¹ Ipare asepia ambuae Tūpa rembiguai ipirata vahe ogüeyi vahe iva sui. Vireco omborerecuasa ivate vahe, ahe sendigüer osesape tupri ivi rupi.

² Iyavei oñehe pirata oico aipo ehi: “¡Oviapi tecua Babilonia cute!

Carugar yuviroique sese, opacatu carugar naporai vahe iyavei vīrai vai nungar yuviroique sese.

³ Esepia niha, opacatu ambuae ivi rupindar inungar osavaipo vahe ndopoi potai eté yemboaguasasa sui, evocoiyase mborerecuareta ivi pipendar oyapo mbahe tēi yuvireco sese, iyavei mbahe mboepisar ivi pipendar oyemombahe eta imbahe porañete ai vahe pota raisa pipe sui yuvireco” ehi.

⁴ Evocoiyase asendu ambuae ñehesa iva sui ou vahe, ahe aipo ehi: “Peyepipi evocoi tecua guasu sui, pe peico vahe cheundar evocoi yangaipa rese imboyoyaēhi āgua.

Iyavei ñepe yepi taperupiti eme imbaherasisa.

⁵ Esepia niha, yangaipagüer oyepota ité ivave.

Tūpa evocoiyase oyemomahenduha mbahe-mbahe tēi sembiapogüer rese chupe.

⁶ Inungar ahe ambuae upe, ěgüe peye tupri avei chupe; pemboepi ñuvirío rupi mbahe sembiapogüer chupe; pemomirata catu mbahe igua ñuvirío rupi pemboyeseha imondo chupe;

⁷ pemondo setecuer mobaraisusa chupe, tiparaisu tahoyoya iyemondo-mondo tēi agüer iyemboetei ai agüer rese avei no.

Esepia niha, ahe aipo ehi opiha pipe oico:

‘Cohave che aguapī vīte mborerecuar che reco nungar pipe.

Ndahei imer mano vahecuer che aico, iyavei ndacheparaisui chietera’ ehi viña.

⁸ Sese niha aviyeteramo tēi oura mbaherasisa chupe:

paraisusa, tieporēhi, manosa; ipare sapisara.

Esepia niha, yande Yar Tūpa mbahe mboavaisarēhi secoi, ahe, ‘Tomano’ ehi chupe” ehi.

⁹ Evocoiyase mborerecuar ivi pipendar yuvirecoi vahe co cuña resendarer, chupe oyemondo-mondo tēi vahecuer imbahe eta rese, oyaseho tēira

yuvireco iyavei ndoyembovihal chira sese osepiase evocoi cuña rātachi yuvireco curi.

¹⁰ Opitañora amombrive osiquiyepave, iparaisusa sui aipo ehi tēira yuvireco:

“¡Ndeparaisu catu, tecua guasu Babilonia, nde reco pīrata vahe tie viña! Esepia niha, co aviyeteramo tēi ou nde mombaraisu catusa” ehira yuvireco.

¹¹ Evocoiyase ava mbahe mboepisar ivi pipendar yuvirecoi vahe, ahe avei oyaseho tēira iyavei ndoyembovihal chietera evocoi tecua rese yuvireco. Esepia niha, ndipo iri chietera que virocuva vahe rā imbahe yuvireco ichui,

¹² co opacatu mbahe sepi vahe rā ahe: oro, guarepochi, ita iporañete ai vahe, mbohír sendi vahe, turucuar secose vahe, turucuar sendi vahe, iyavei pīraumbi vahe, pīra vahe no; iyavei opacatu-catu tēi ivirape síacua vahe; mbahe-mbahemi marfil apopri, ivira ícatupri vahe apopri, bronce apopri, guarepochi apopri, mármol avei;

¹³ mbahe serocuapri yahu vahe canela, tembihu moiacuasa; itaisi, mirra, mbahe síacua vahe; uva ricuer, mbahe quira, trigo cuhi aviye vahe, trigo avei; iyavei mbahe mimba ovosii vahe no, ovesa, cavayu, cāretomi iyavei mbiguai no.

¹⁴ Aipo ehi tēira yuvireco co tecua guasu upe:

“¡Nderereco iri acoi mbahe ha ereipota etepri vahe; iyavei eremocañi tēi apirēhi opacatu nde mbahe eta nde yemboeteisa avei!” ehira.

¹⁵ Evocoiyase evocoi mbahe mboepisareta oyemombahe eta vahecuer co mbahe rese tecua guasu sui, ahe opitañora amombrive osiquiyepave iparaisusa repiase yuvireco. Oyaseho tēira iyavei ndoyembovihal tēi chira yuvireco no,

¹⁶ iyavei aipo ehi tēira yuvireco:

“¡Too! ¡Iparaisú iteanga tecua guasu pendar!

Inungar tie cuña acoi oyemonde tupri vahecuer secoi cuese viña iyavei iturucuar suendi,

pīra vahe; oro pipe oyemboetei vahecuer,

ítami iporañete vahe pipe iyavei mbohír sendi vahe pipe oyemboetei vahe no.

¹⁷ ¡Aviyeteramo tēi rumo opa ocañi imbahe eta ichui!” ehi.

Evocoiyase opacatu ava carite guasu pipendar rerecur, ava imbehi ivirindar carite guasu reroguatasar, i rupi oporaviqui vahe oyeupe nara mbahe rereco āgua, ahe opaño opita amombrive yuvireco ichui

¹⁸ iyavei co tecua rātachi repiase, ahese osapucaí pīrata tēi yuvireco: “¡Ndipoi eté niha yipisui tecua na ehi vahe!” ehi yuvireco.

¹⁹ Ipare imboasipave omondo ivi cuhi oācave yuvireco, oyaseho iyavei ndoyembovihal tēi, ipare osapucaí tēi yuvireco aipo ehi:

“¡Too! ¡Iparaisu catu tecua guasu pendar!

Esepia niha, evocoi tecua guasu mbahe eta pipe sui ava i rupi oporaviqui vahe oyemombahe yar yuvireco viña.

¡Aviyeteramo tēi rumo opa ocañi!” ehi.

²⁰ Peyembovihaño evocoi tecua rese, pe íva pendar, iyavei opacatu chupendar peico vahe, pe no Jesús apóstol peico vahe,

opacatu Tūpa ñehe mombehusar peico vahe avei no.

Esepia niha, co tecua omocañisa pipe Tūpa oyapo mbahe tupri pēu nara.

²¹ Ahese Tūpa rembiguai íva pendar seco pīrata vahe osupi ita inungar mbahe mbocuhisa, ipare omombo para guasu pipe aipo ehi:

“Na ehi aveira tecua guasu Babilonia mocañisa.

Imombopri secoira.

Ipare ndapesepia iri chietera apirēhi vaherā” ehi.

²² “Ndasendusa iri chietera ocar rupi arpa moñehesar, mimbí moñehesar, iyavei mimbí guasu moñehesar avei no; ndererecoi chietera ava oporaviqui vaherā, ndasendusa iri chiaveira ita mbahe mbocuhisa monarasa nde suindar.

²³ Iyavei ñepepe yepe que tataendi ndosesapei chietera ndeu, ndasendusai chiaveira ava aivu mendasa rupi, yepe niha nde ava upe mbahe mondosar seco pīrata etepri vahe opacatu rupi ereico viña.

Iyavei erembopa-mbopa tēi opacatú ambuae tecua rupindar eico nde payesa pipe” ehi

Tūpa rembiguai chupe.

²⁴ Esepia niha, evocoi tecua guasu pipe oyecua Tūpa ñehe mombehusar ruvi, Tūpa upendar ava ruvi, iyavei opacatu ava yucapri vahe ivi pipendar ruvi avei.

19

¹ Co pare, asendu ava rehi ñehe pīrata ivave aipo ehi vahe:

“¡Imboeteipri yande Yar tasecoi!

Poropisirosa, teco porañetasa iyavei ipīratasa ahe yande Ru Tūpa suindar.

² Esepia niha, ahe oyapo mbahe supi eté vahe,

“Tocañi” ehise co cuña oyemboaguasa-guasa tēi vahe nungar tecua guasu upe evocoi niha oseco momara tēi vahe ava ivi pipendar güeco rai pipe; ichui Tūpa osepí oyeupendar” ehi.

³ Ipare aipo ehi iri yuvireco no:

“¡Imboeteipri yande Yar tasecoi!

Esepia niha, evocoi tecua rātachi ndopai chietera” ehi.

⁴ Evocoyase veinticuatro tupri iva pendar icuapri yuvirecoi vahe iyavei irungatu iva pendar yuvirecove vahe, ahe Tūpa mboeteisa pipe oyeaivi ivi rese yuvireco. Ipare aipo ehi yuvireco no: “¡Ēgüe tehi! ¡Imboeteipri yande Yar tasecoi!” ehi.

⁵ Evocoyase Tūpa renda sui tupri oyeendu ñehesa aipo ehi vahe:

“¡Pemboetei yande Ru Tūpa opacatu peroya vahe, que seco ivi coti catumi vahe, que seco ivate vahe avei, pe pesiquiye vahe imboyeroya āgua!” ehi.

Pieta mendasa Ovesami resendar

⁶ Asendu avei ava rehi ñehe, inungar acoi itu guasu riapu, ndoyavii avei osunú guasu vahe aipo ehi:

“¡Imboeteipri yande Yar tasecoi!

Esepia niha, yande Yar Tūpa opacatú mbahe mboavaisarēhi omboipi oporocuai.

⁷ Tayayemboviha catu yaico iyavei tayamondo yande viharetasa, yande sapucaisa yande Ru Tūpa upe.

Esepia niha, cūrítei oyepota mendasa ari Ovesami upendar.

Sembireco evocoyase opa oyemoingatu oico:

⁸ chupe ipotasa iyemonde āgua turucuar secose vahe, ndiquihai, sendi vahe pipe.

Esepia niha, co turucuar secose vahe “Tūpa rese yuvirecoi vahe recocuer ihivi vahe’ oyapave aipo ehi” ehi.

⁹ Evocoyase Tūpa rembiguai, “Na ere icuachía: ‘Sorivete catu acoi ava mendasave ichohopri yuvireco’ ere” ehi cheu. Iyavei aipo ehi cheu no: “Co niha Tūpa ñehesa supi tupri vahe ité” ehi.

¹⁰ Ipare añenopiha Tūpa rembiguai rovai imboetei āgua. Ahe rumo aipo ehiño cheu: “Ēgüe erei rene. Esepia, che Tūpa rembiguai tēi aico nde nungar iyavei nde rivireta nungar oguata vahe Jesús ñehengagüer rupi. Emboetei Tūpa” ehi.

Esepia niha, evocoi Jesús recocuer mombehusar moñehe ucasar, ahe niha acoi omombehu uca vahe Tūpa ñehe mombehusar upe.

Cavayu morochi vahe reroguatasar

¹¹ Evocoiyase asepia iva oyemboi vahe. Aheve aviyeteramo tēi cavayu morochi vahe oyemboyecua, evocoiyase ava sese oyeupi vahe rer: “Ocuaita-omboaviye-tupri-vahe iyavei Supi tupri vahe” ehi. Esepia, güeco ñivisa pīpe oporocuai iyavei oyapo vavasa.

¹² Sesa evocoiyase ndayaviyei eté acoi tata rendigüer; iyavei oāca rese setá vireco oyeguaca, iyavei vireco terer icuachiapri oyese; ahe güeraño ité oicua.

¹³ Iturucuar evocoiyase imopirapri tuvī pīpe; serer evocoiyase, “Tūpa Ñehe” ehi.

¹⁴ Sundao rehīi iva pendar saquicuerive yuvirecoi. Iturucuar secose vahe pāve morochi vahe, ndiquihai vahe avei. Ahe cavayu morochi vahe harīve yuvirecoi.

¹⁵ Iyuru pīpe sui osē quise pucu saimbe vahe opacatu ambuae-ae tecua rupindar momara āgua. Ahe oyocuaia oamotarēhisar guarepochi apopri opo pendar pīpe. Iyavei osecoñhara inungar uva opive otiamī vahe yuvireco iyavei ombohura evocoi uva ricuer paraisu catusa resendar pīpe. Ahese Tūpa mbahemboavaisarēhi oñemoiro itera chupe.

¹⁶ Oturucuar popi rese vireco icuachiapri ohivipi rese avei aipo ehi vahe: “Mborerecuareta rerecuar guasu iyavei ava Yar ivate catu vahe” ehi.

¹⁷ Ipare asepia Tūpa rembiguai opūha vahe arisave. Ahe osapucāi pīrata opacatu vīrai mbahe rohoguar upe oveve vahe iva rese: “¡Perio! ¡Peñemonuha Tūpa suindar carusa guasusave;

¹⁸ pehu co mborerecuareta roho, sundao eta rerecuar roho iyavei ava oico eté vahe roho, cavayu roho, ihari pendar roho avei, opacatu ava roho ava nimañecosai vahe roho, mbiguai roho, seco ivi coti catumī vahe roho, seco ivate vahe roho avei!” ehi.

¹⁹ Ahese asepia mbahe ipi vai iyavei mborerecuareta ivi pipendar osundao reseve-seve. Ahe oñemonuha yuvireco ovava āgua evocoi cavayu hari pendar rese iyavei isundao rese avei no.

²⁰ Co mbahe ipi vai yipindar vahe soquendasa, oyoya evocoi Tūpa ñehe mombehusar angahu tēi rese. Ahe acoi oyapo vahe mbahe yavai rai vahe yipindar mbahe ipi vai rovaque, evocoi mbahe yavai rai vahe apo pīpe ombopa-mbopa tēi ava, acoi seroyasar vireco vahe mbahe ipi vai rer oyese iyavei omboetei vahe sahanga yuvireco. Evocoiyase co mbahe ipi vai iyavei Tūpa ñehe mombehusar angahu tēi, ahe opa imombosa secove reseve ipa azufre ocai vahe pīpe yuvireco.

²¹ Ambuae evocoiyase evocoi cavayu morochi vahe hari pendar yuru pīpe sui osē vahe quise pucu pīpe opa omano yuvireco. Evocoiyase opacatu vīrai mbahe rohoguar opa soho pīpe oyemohitaro yuvireco.

20

Mil araviter resendar ñehesa

¹ Ipare asepia Tūpa rembiguai ogüeyi vahe ou iva sui ivicuar guasu ipicucu vahe mboyasar iyavei carena ipo guasu vahe opove vireco.

² Ipare oipisi mbahe ipi oporomocañi vahe mboi nungar aracahendar, ahe niha Carugar secoi, Satanás serer vahe; ahe oicuhacia carena pipe mil araviter rupi imoi.

³ Ahe se omombo ivicuar guasu ipicucu vahe pipe. Aheve osoquenda. Omondo sello soquenda rese opacatu ambuae-ae fecua rupindar mbopa-mbopa tēi iriñhi āgua rese acoi osupitise voi mil araviter. Coiye rumo mil araviter pare, imosesa raimi tēira.

⁴ Ipare asepia tenda, iharive setá ava oguapi yuvinoi evocoi oipisi vahe omborerecuasa yuvireco ava upe mbahe rese porandu āgua. Iyavei asepia ava hā evocoi opa vahecuer oyasia ñaca yuvireco Jesús recocuer mombehusa sui tēi iyavei Tūpa Ñehengagüer mombehusa pipe sui tēi avei. Ahe ava nomboetei vahe mbahe ipi vai yuvireco; sahanga avei nomboetei yuvireco no; iyavei nomondo ucai vahe avei osiva rese serer yuvireco, opo rese avei. Ahe asepia opa ocuerayevi yuvireco. Ipare oporocuai Cristo rese mil araviter rupi yuvireco.

⁵ Ahe co yipindar vahe cuerayevisa. Ambuae ava omano vahe rumo ndocuerayevi iri eté yuvireco osupitise voi mil araviter.

⁶ ¡Sorivete catu acoi ava vireco vahe yipindar cuerayevisa yuvireco! ¡Esepia niha, ahe Tūpa upendar ité yuvirecoi! Imoñuviriosa manosa evocoyase chupe ndipo iri eté. Ēgüe ehira rumo ahe Tūpa upe naraño ité pahi yuvirecoira, Cristo upe avei. Ipare mborerecuar yuvirecoira sese mil araviter rupi.

Carugar recopisa

⁷ Acoi osupitise rumo mil araviter cute, ahe se Carugar yorasara soquenda sui.

⁸ Ichui osēra opacatú ava ivi pipendar mbopa-mbopa tēi oico; osēra ivi Gog mbopa tēi āgua, ivi Magog mbopa tēi āgua avei. Ipare omonuhara vavasave nara isundao eta. Esepia niha, ahe sehü etepri yuvireco inungar ivi cuhi para guasu popi rupindar.

⁹ Ēgüe ehi yugüeru ati amombri sui, oyerepa tupri Tūpa recua rese yuvireco no, evocoi tecua Jerusalén sembiaisu rese avei. Tūpa rumo ombou tata iva sui, ahe ipipe opa tupri ité osapi.

¹⁰ Carugar evocoyase, ava mbopa-mbopa tēisar, ahe opa imombosa ipa azufre ocai vahe pipe. Aheve acoi opa imombosa mbahe ipi vai iyavei Tūpa ñehe mombehugar angahu tēi vahe avei no. Aheve iparaisura pītu, ari yuvireco apirēhi vaherã.

Tūpa oguapira güendave ava recocuer rese porandu āgua ari ipa vahe pipe

¹¹ Evocoyase asepia tenda imboeteipri, morochi vahe. Iharive oime ava oguapi vahe oī. Sovai ivi iyavei iva opa ocañi tupri tēi. Ndoyecua iri eté co coti rupi yuvireco.

¹² Ipare asepia omano vahecuer seco ivate vahe, seco mbegüemi vahe avei no opūha yuvinoha Tūpa rovai; ahe se cuachiar opa ipipirasa yuvireco, iyavei ambuae cuachiar. Ahe cuachiar tecovesa resendar. Omano vahecuer upe evocoyase porandusa evocoi cuachiar pipendar mbahe sembiapogüer rese.

¹³ Omano vahecuer opa yuvinose para guasu pipe sui, iyavei tehögüer recosa sui opa yuvinose; ichui opacatú mbahe sembiapogüer rese porandusa yuvireco chupe no.

¹⁴ Ipare manosa recua opa imondosa tata nungar ipa pipe. Evocoi ipa niha imoñuviriosa manosa.

15 Aheve opa imondosa acoi ndovirecoi vahe güerer icuachiapri cuachiar tecovesa resendar pipe.

21

Iva piasu iyavei ivi piasu

1 Ipare asepia iva piasu iyavei ivi piasu. Esepia niha, yipindar vahe mbahe opa ité ocañi yuvireco, para guasu avei no.

2 Che asepia tecua nimarai vahe, ahe Jerusalén piasu, evocoi ogüeyi vahe Tüpa sui ou. Opacatu imoingatusa tupri vahe, inungar acoi cuña omenda ägua oyemboetei tupri omevi upe.

3 Ipare asendu ñehesa pírata tenda suindar aipo ehi vahe: “Tüpa cūrítei oicove ava rehi pāhu rupi oico. Ahe oicove vaherā ité sese yuvireco yepi, ahe ava evocoyase chupe nara ité yuvirecoira. Ahe teieté niha secoira yuvireco chupe.

4 Ahe niha omombituhura opacatu ava resai; iyavei ava nomanoi chietera; ndoyasehoi chira yuvireco; ndipoi chira viharēhisa, tecoasisa avei chupe. Esepia niha, opacatu mbahe oime vahecuer yipindar, ndipo iri eté” ehi.

5 Ahese evocoi oguapi vahe tenda harive oī, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esepia niha, co ñehesa supi tupri vahe ité, evocoyase iya ité peyeroya sese” ehi.

6 Ipare aipo ehi cheu: “Opa ité yaviye. Che aviye acoi letra omboipi vahe A sui yepi, Z rupi. Esepia, che yipive vahe ité, ipandar avei. Acoi ava ihusei vahe amboihuño tēira i tecovesa resendar ndasepii vahe pipe.

7 Acoi ava oyemoviracua vahe ité mbahe-mbahe tēi apoēhi ägua, ahe oipisira co mbahe opacatu omahera yuvireco. Evocoyase che aicora chupendar ité, ahe evocoyase che rahir ité yuvirecoira.

8 Acoi ava osiquiye ai vahe rumo che recocuer sui, ndache reroyai vahe, ava ndiporoepia potai vahe, oporoyuca vahe, acoi ava oyemboaguasa tēi vahe, ipaye sérari vahe, mbahe rahanga mboeteisar tēi iyavei opacatu ava semira-mira tēi vahe, ahe opara yuviraso ipa nungar azufre ocai pírata vahe pipe. Ahe niha imoñuvirío manosa” ehi.

Tecua Jerusalén piasu

9 Evocoyase ou ñepeí siete Tüpa rembiguai pāhu pendar acoi siete tupri igua riru, siete mbaherasi ipa vahe vireco vahecuer ipipe, ahe aipo ehi cheu: “Erio, amboyecua cuña omenda vahevi ndeu, Ovesami rembirecovi” ehi.

10 Evocoi che quer nungar pipe Espíritu osepia uca vahe cheu, che reraso ivitri guasu ivate vahesave. Aheve omboyecua tecua guasu Jerusalén nimarai vahe cheu, ogüeyi vahe Tüpa sui.

11 Ahe tecua sendí iteanga Tüpa rendigüer pipe. Sendigüer evocoyase oyoya tupri ita iporañete vahe rese, oyoya avei ita jaspe serer vahe ipírerimi vahe rese.

12 Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoyase ñepeí-peí Tüpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese.

13 Vireco niha mbosapi oquenda añihivei coti, mbosapi norte coti, mbosapi irohí coti iyavei mbosapi caharu coti no.

14 Tecua guasu ñchisa vireco doce tupri ita imoviracuasa. Ahe sese evocoi doce tupri yuvirecoi vahe Ovesami apóstol rer icuachiasa yuvireco.

¹⁵ Evocoi Tūpa rembiguai oñhe vahe cheu vireco vara oro apopri tecua rāha āgua, opacatu soquendipi rāha āgua, ñachisa rāha āgua avei no.

¹⁶ Tecua guasu pucucuer oyoya tupri ipigüer rese. Evocoiyase Tūpa rembiguai osāha tecua guasu ruvichagüer; osāhase ipucucuer dos mil dos cientos kilómetro tupri ité; ipucucuer, ihivategüer iyavei ipigüer oyoya pāve tupri ité no.

¹⁷ Ipare osāha ñachisa: osāhase ipigüer sesenta y cinco metro tupri. Evocoi Tūpa rembiguai osāha ava rembiporu pipe.

¹⁸ Tecua āchisa ahe ita porañete vahe Jaspe serer vahe apopri; tecua evocoiyase oro pāve tupri, aviye vidrio secose catu vahe.

¹⁹ Ñachisa moviracuasa vireco opacatu ambuae ita-ita tēi iporañete vahe pāve: yipindar iviracuasa jaspe, imoñuviriosa zafiro, imombosapisa ágata; imoirungatusa esmeralda;

²⁰ imbopoyandeposa ónice; imoñepeí ovasa, cornalina; imoñuvirío ovasa, crisólito; imombosapí ovasa, berilo; imoirungatu ovasa, topacio; imbopoyandepo ovasa, crisoprasa; co opoyandepo yovaivesa ahe jacinto; imoñuvirío yovaivesa, amatista.

²¹ Doce tupri vahe oquenda guasu ahe doce tupri mbohír; ñepeí-peí oquenda ñepeí mbohír sui yapopri. Calle guasu tecua aviter rupindar evocoiyase oro pāve, inungar vidrio yande porēhi tupri vahe ipipe.

²² Ndasepiaí eté evocoi tecua guasu pipe ñepeí yepe tūparo. Esepia niha, yande Yar Tūpa mbahe mboavaisarēhi, Ovesami reseve yuvirecoi aheve.

²³ Evocoi tecua guasu ndovireco iri eté ari, yasi güesape āgua. Esepia niha, Tūpa ité osesape güendigüer pipe, iyavei Ovesami tataendi nungar secói aheve yuvirecoi vahe upe.

²⁴ Sendigüer osesapera opacatu tecua rupindar iguatasa rupi, iyavei ava mbahe yar mborecuar ivipendar opara güeru ombahe eta porañete vahe yuvireco chupe.

²⁵ Evocoiyase soquendipi nimboyasai chietera ari yacatu rupi. Pítu ndipoi chiaveira aheve.

²⁶ Ipare opara aheve ambuae tecua mbahe eta, porañete vahe omoingue yuvireco;

²⁷ ava angaipa viyar rumo, Tūpa remimbotarēhi oyapo vahe, iporombopa serai vahe, ahe ndoyuviroiquei chietera aheve. Ēgüe ehi rumo acói ava vireco vahe güerer icuachiapri Ovesami cuachiar tecovesa resendar pipe yuvireco, ahe güeraño yuviroiquer aheve.

22

¹ Ipare Tūpa rembiguai omboyecua íai tecovesa resendar cheu, típiu, oyecua tupri, osé vahe Tūpa iyavei Ovesami renda porañete vahe sui.

² Calle guasu mbiter rupi oso. Iyavei íai íque yacatú oíme ivira tecovesa resendar, íha vahe doce yupagüer rupi ñepeí araviter pipe. Iyavei evocoi ivira ro aviye aí ava opacatu rupindar mbogüera āgua.

³ Ndipoi chietera aheve que mbahe tēivri pendar. Tūpa renda porañete vahe iyavei Ovesami renda avei chinira evocoi tecua guasu pipe. Aheve sembiguai eta omboeteira yuvireco.

⁴ Osepiaira sova iyavei virecora serer osíva rese yuvireco.

⁵ Aheve ndipoi chietera pítu, iyavei ava aheve yuvirecoi vahe ndosecai chietera tataendi. Ndosecai chiaveira que ari güesape āgua yuvireco. Esepia niha, yande Yar Tūpa teieté osesapera. Ipare ahe ava mborecuar apirēhi vaherá ité yuvirecoira sese.

Cōimi eté Jesucristo yeví āgua

⁶ Ipape Tūpa rembiguai aipo ehi cheu: “Co ñehesa supi tupri vahe ité, sese iya ité peyeroya. Iyavei yande Yar Tūpa acoi omboyecua tupri vahe mbahe oyesuindar oñehe mombehusar upe, ahe ombou güembiguai iva pendar mbahe omboaviye poyava voi vaherā mboyecua āgua viroyasareta upe” ehi.

⁷ “¡Yeví poyava voira curi! ¡Sorivete catura acoi ava viroya vahe ñehesa Tūpa suindar mbahe oime vaherā resendar co cuachiar pipe!” ehi.

⁸ Che, Juan, asepia iyavei asendu ité co mbahe. Sendu pare voi, añenopiha evocoi Tūpa rembiguai rovai imboetei āgua viña.

⁹ Ahe rumo aipo ehiño cheu: “Aní ereñenopiha che rovai. Esepia niha, che Tūpa rembiguai tēi aico, nde nungar, nde rivireta nungar avei evocoi oñehe vahe Tūpa Ñehengagüer rese yuvireco, iyavei unungar opacatu viroya vahe co cuachiar pipendar icuachiapri yuvireco no. Tūpa catu pemboetei” ehi.

¹⁰ Aipo ehi avei cheu no: “Ereicuacui rene co ñehesa Tūpa suindar mbahe oime vaherā resendar sereco, evocoi icuachiapri cuachiar pipe. Esepia niha, arí cōimi secoi imboaviye āgua.

¹¹ Acoi ava mbahe tēi aposar, toyapoño mbahe tēi; iyavei acoi ava seco rai vahe, taseco raiño ité oico; acoi ava seco tupri vahe rumo, ahe toyapoño mbahe tupri oico; iyavei acoi ava Tūpa upe oyemondo tupri vahe ité, ahe taseco tupriño avei oico chupe” ehi.

¹² “Supi eté ayeví poyavara, iyavei arura mbahe porerecosa ñepeí-peí ava rembiapogüer rupi-rupi amondo vaherā chupe.

¹³ Che aico inungar letra A iyavei Z, yipindar vahe, ipandar vahe avei no; yipive vahe ité apirēhi vaherā” ehi.

¹⁴ “Sorivete catura acoi ava omoatiro vahe güecocuer. Esepia, ahe oipisira ivira ha tecovesa apirēhi vahe resendar. Ipipe sui oiquera tecua guasu pipe.

¹⁵ Ava rehí ndiporeroyai vahe rumo opitapara ocarve tēi yuvireco, iyavei ava ipaye serai vahe, oyemboaguasa-guasa tēi vahe, oporoyuca vahe, mbahe rahanga upe tēi oyerocu vahe, iyavei opacatu ava oipota rai vahe oporombopa-mbopa tēi āgua yepi” ehi.

¹⁶ “Che, Jesús, amondo che rembiguai iva pendar mbahe mombehu āgua opacatu che reroyasar upe oñemonuha vahesa rupi-rupi. Che aico mborerecuar guasu David suindar. Iyavei aico inungar yasitata guasu sendi vahe añihiveindar no” ehi cheu.

¹⁷ Espiritu Santo iyavei Ovesami rembireco aipo ehi: “¡Perio!” ehi ava upe yuvireco. Iyavei acoi ava osendu vahe ñehe, “¡Perio!” tehi ambuae ava upe yuvireco. Iyavei acoi ava ihusei vahe, toyugüerño; acoi ava oipota vahe, toipisi i tecovesa resendar ndasepi vahe yuvireco.

¹⁸ Opacatu acoi ava osendu vahe co ñehesa Tūpa suindar mbahe oime vaherā resendar icuachiapri co cuachiar pipe yuvireco, ahe chupe, “Peicua catu” ahe. Amove que ava co mbahe resendar omboeapri iri vahe, ahe chupe Tūpa omboeapri aveira co cuachiar pipendar mbahe-mbahe tēi imombehupri.

¹⁹ Amove que ava virocua vahe co cuachiar pipe sui ñehesa Tūpa suindar, Tūpa avei evocoiyase ndoipotai chira chupe co cuachiar pipe imombehupri ivira ha tecovesa resendar rereco āgua iyavei co tecua maranehi pipe seique āgua.

²⁰ Acoi co mbahe mombehusar aipo ehi: “Supi eté ayeví poyavara” ehi.

Ēgüe tehi ayase. ¡Erio, che Yar Jesús!

²¹ Yande Yar Jesucristo tape rovasa opacatu. Aviye, aipo rupive.